

UTL AT DOWNSVIEW



D RANGE BAY SHLF POS ITEM C
39 10 01 18 09 023 5

BINDING SECT. APR 3 1985

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

BRIEF

PJC 0057202

01-858-680

زاسخ اف

﴿ فهرست خلاصة الشروح ﴾

ترجمة حال مؤلف	صحيفة درس
دباجة كتاب ونظم لمحرره	• ٩
مقدمة كتاب يدي درسي محتويدر	• ١٠
مطلق علمك تعريف وموضوع وغايتك بياني (وجهت)	١ ١٠
وحدت ذاتيه وعرضيه ايله تعريفك طريقى ارائه ونحو	
لفظك معنارى و (علم نحو) ك موضوع وغايتك وجهت وحدت	
ذاتيه وعرضيه ايله تعريفك وواضعك بياني	
كله ايله كلامك لغة بياني وجرح معناسنه اولان كلم دن	٢ ١٣
اشتقاقلى وكله نك تعريف و اوج قسمده وجه انحصارى	
كلامك تعريفى و جمله دن نه جهته فرق اولنديغى وكلام نه دن	٣ ١٤
تركب ايلديكنك بياني ومركبات غير كلاميه نك تعريف	
كلامدن خروجى	
عاملك تعريفى اسم وفعللرده مقتضى اعرابك بياني و	٤ ١٦
عاملك اقسامى	
معمولك تعريف و اقسامى	٥ ١٩
اعرابك تعريفى وذات ومحل ونوع ووصفى اعتباريله تقسيمات	٦ ٢٠
اربعة متداخله سنك مجملآ بياني	
معمول اوله بيلوب واوله ميانلرك وصورت ترديد ايله اعرابدن	٧ ٢٢
محلى اولوب واوليان جمله لرك بياني	
المطلب الاول فى الاسم	• ٢٣
اسمك تعريف ووجه تسميه سى وخواص اسمك بياني	٨ ٢٣
باب المعرب من الاسم	• ٢٤

Brief
PJC
0057202

- ۲۴ ۹ معرب لفظنك معنای لغویسنی بیان (واصطلاحاً) تعریفی •
 (معرب ده) بالفعل اعرابه استحقاق شرط اولدینی • صاحب
 کشفه کوره اعرابه مجرد صلاحیت معتبر اولدینی • (ومعربك)
 حکمی (واعرابك) لفظنده ظهور و عدم ظهوری جهتله تقسیم
 مقدمه ده کوستریلان ذات اعرابك مفصلاً بیانی نوع اعراب
 ۲۶ ۱۰ درت دانه اولدیغك عیانی
- ۲۷ ۱۱ (محل اعراب) طقوز دانه اولدینی (محل اول) اسم مفرد منصرف
 و جمع مکسر منصرف • (منصرفك) بیانی محل ثانی غیر منصرف
 غیر منصرفك بیانی و علل تسعه تك عیانی
- ۲۹ ۱۲ مبحث عدل • عدلك بیانی و تحقیقی و تقدیری قسملرینه
 مقسم اولدینی عدل تحقیقی نك بولندیغی لفظلر احاد و موحد الح
 ۳۱ ۱۳ ودخی عدل تحقیقی جموعدن اخر و جمع و کتبع و بتع و بصع کبی
 (عدل تقدیرینك) عیانی
- ۳۳ ۱۴ الوصف
- ۳۴ ۱۵ التأنیت
- ۳۵ ۱۶ المعرفه
- ۳۷ ۱۷ العجمه شرط اول شرط ثانی (علامه زحشرینك) عجمه ده
 ذهابی (سبویهك) عجمه ده ذهابی و شیخ رضی نك ترجیحی
 الجمع مراد صیغه منتهی الجموع ایله معنون اولان ایلر و فی الاصل
 جمع بولنق و یا خود حکماً و یا تقدیراً جمع اعتبار اولنق دخی منع
 صرفه کافی اولدینی فواعل و زننده اولان هر بر جمع منقوص
 و اوی و یائی نك بیانی و بویابده اولان مذهبلك عیانی
- ۳۹ ۱۸ التركيب (الالف والنون) الزائدتين
- ۴۱ ۱۹ وزن الفعل
- ۴۲ ۲۰ (علمیت) علل منع صرفدن دردنده شرط تأثیر ایکسند
 مستقل سبب اولدینی (علمیت) ایله وصفیت و عدل ایله
 وزن فعل بیننده ضدیت بولندیغی • (سبویهك) اخفشه مخالفتی

غیر منصرفك حكمی (غیر منصرفك) ضرورة وزن شعر	۲۱	۴۳
وقایه رعایتدن ایچون بعض منصرف حکمنده قیلنه جفی و (بعض ولی) ایلدیکی بر منصرفه مناسبتدن ایچون دخی منصرف حکمنده قیلنه جفی (جمع باب غیر) منصرف لام تعریفك دخولی و اضافتله کسره ایله مجرور قیلنه جفی و شو حالده کلمه نك غیر منصرفلقدن چیقوب و یاخود حقیقیه جفنك بیانی و بوبابده اولان مذهبلك عیانی		
محل ثالث جمع مؤنث سالم	۲۲	۴۶
(محل رابع اسماسته) معتله		
محل خامس جمع مذکر سالم	۲۳	۴۷
(محل سادس اسم) مثنی		
محل سابع محل ثامن محل تاسع	۲۴	۴۹
مبحث وصف اعراب (اعراب) تقدیرینك بیانی ویدی	۲۵	۵۰
دانه اعراب تقدیری موضعلرینك عیانی (موضع اول)		
موضع ثانی	۲۶	۵۱
موضع ثالث	۲۷	۵۲
موضع رابع موضع خامس	۲۸	۵۴
موضع سادس	۲۹	۵۵
موضع سابع	۳۰	۵۶
(کیفیت تقسیم ده برکوی) رحمه الله ایله ابن حاجب رحمه اللهک تعین و تفریق نظرلری		
اعراب محلی نك بیانی	۳۱	۵۸
(المعمولات)		۵۸
(المرفوعات)		
(الفاعل) (خلیل عنندنده) فاعل اوچ جهتله مرفوعاتده	۳۲	۵۹
اصل ایدوکی (و سبویه) عنندنده ایکی جهتله مبتدا اصل ایدوکی و (فاعلك) تعریف و بیانی		

- ۶۱ ۳۳ فاعل ده اصل اولان فعلانی ولی ایتک اولدینگنک بیانی لفظاً
ورثه اضمار قبل الذکرک عدم جوازی و اخفش ایله ابن
جبی نک مطلقاً تجویزلی
- ۶۲ ۳۴ درت محمله فاعلی مفعول اوزره و درت محمله مفعولی فاعل
اوزره تقدیم واجبدر
- ۶۳ ۳۵ فاعلک فعلی بعض محله جوازاً و بعض محمله وجوباً حذف
اولنور و بعض جوازاً فعل مع فاعله حذف ایدیلور
- ۶۴ ۳۶ تنازع عاملین مذهب بصریین مذهب کسائی
- ۶۵ ۳۷ مذهب کوفیین مذهب فرا کوفیلرک امری القبسک شعریه
استدلالری تنازعک اسم ظاهرده کوسترلمسینه باعث
- ۷۱ ۳۸ نائب فاعل نائب فاعل اوله میانلر
- ۷۲ ۳۹ المبتدا (عاملنک) بیانی (مبتدا) ایکی قسمدر مبتدای
قسم ثانی ده سبویه و اخفشک یکدیگرینه مخالفتی
- ۷۳ ۴۰ مبتداده اصل اولان معرفه اولمقدر آلتی محمله نکره مبتدا
اوله بیلور
- ۷۴ ۴۱ مبتدایک حقی تقدیمدر سکر محمله مبتدای خبر اوزره تقدیم
واجبدر مبتدا بعض جوازاً و بعض وجوباً حذف اولنور
- ۷۵ ۴۲ مبتدایک خبری اوزره فانک دخولی واجب اولان محل
یتمش محمله مبتدایک خبری اوزره فانک دخولی جائزدر
- مبتدایک خبری اوزره فانک دخولنه مانع اولانلرک بیانی
مذاهب ضعیفه نک ردی
- ۸۱ ۴۳ الخبر خبرک تعریفی و مشتق و جامد اوله جفنگ بیانی خبرده
اصل اولان نکره و افراد اولدینی و بعض جمله اوله جفی
و جمله واقع خبرده مبتدایه عائد الی نوع اوزره بولندینی
عائد ضمیر اولدقده بعض حذفده اولان شروط
- ۸۳ ۴۴ خبر ظرف اولدقده تقدیر متعلقده بصریلرک و کوفیلرک ذهابی
خبرک مبتدا اوزره الی محمله تقدیمی واجب اولدینی

۴۵	۸۶	خبرك بعض جوازاً حذف اولمسی اذای مفاجاة ده اوچ مذهب واردرد
۴۶	۸۸	درت موقعده خبری حذف ایلمك واجب اولدینی موقع اول موقع ثانی اون ایکی اعتباری مشتملدر
۴۷	۹۱	موقع ثالث موقع رابع
۴۸	۹۳	اسم باب کان خبر باب ان مبتدآنك خبرندن یدی محله آیر یلمسی
۴۹	۹۵	خبر لالنی الجنس اسم ماوالا المشبهین بلیس المنصوبات
۵۰	۹۷	المفعول المطلق مفعول مطلقك اقسامی
۵۱	۹۹	مفعول مطلقك عاملی بعض جوازاً حذف اولنور یدی لفظده وجوباً سماعاً حذف اولنور
۵۲	۱۰۱	مفعول مطلقك عاملی یدی محله وجوبا قیاسا حذف اولنور محل اول . محل ثانی . محل ثالث
۵۳	۱۰۳	محل رابع . محل خامس . محل سادس
۵۴	۱۰۴	محل سابع . ووجوبا حذف اولنان بعض دیگر محلك بیانی
۵۵	۱۰۶	المفعول به مفعول بهك عاملنده اولان اختلاف
۵۶	۱۰۸	مفعول به فعلنك اوزرینه بعض جوازاً (وبعض وجوباً) تقدم ایلدیکی (وجوبا) تأخرایتدیکی محل . و (مفعول بهك) جواز حذفی . و (حذفی جائز) اولیان سکر محل . و (مفعول بهك) فعلی بعض جواز و بش موضعده (وجوبا) حذف اولنه جفك بیانی
۵۷	۱۱۰	الموضع الاول عربدن مسموع اولش بعض لفظلك بیانی
۵۸	۱۱۲	الموضع الثانی (المنادی) منادآنك تعریفی (منادای مستغاث) و (منادای متعجب منه) و (منادای مهدد) مناداده داخل اولدقلری و بیانلری
۵۹	۱۱۴	منادآنك عاملنك بیانی و مستغاث و متعجب منه و مهددده اولان لامك و مستغاث لهده بولنان لامك بختلری

- ۱۱۵ ۶۰ منادانك اقسامی (منادای مفرد) ایکی قسمدر یا معرفه و یا نکره اولور (منادی مضافك) بیانی منادای مشابه للمضافك بیان انواع وتحقیق
- ۱۱۷ ۶۱ منادای مفرد معرفهك احکامی و (مستثنا اولان) اوچ موضع ومنادای مفرد نکره ومنادای مضاف ومشابه للمضافك احکامی
- ۱۱۹ ۶۲ یای متکلمه مضاف اولان منادانك بیانی
- ۱۲۰ ۶۳ توابع منادانك احکامی
- ۱۲۳ ۶۴ اوزرینه حرف ندانك دخولی ممتنع معطوف معرف باللامك و بدل ومعطوف مجرد عن اللامك بیانی
- ۱۲۵ ۶۵ معرف باللام اوزره ایکی شرطیله حرف ندانك جواز دخولی (وشاذ واقع) اولان شعرلر (معرف باللام ندا) اولنق طلب اولنسه (منادای مفرد معرفه) نك صورة تکرری
- ۱۲۸ ۶۶ مندوبك بیانی
- ۱۳۰ ۶۷ ترخیم منادانك شروطی
- ۱۳۱ ۶۸ ترخیمده حذفك تعیین مقداری واقسام ثلثه سنك بیانی
- ۱۳۴ ۶۹ حرف ندانك حذفی جائز اولان محللر وحذفی جائز اولیوب حذفی شاذ بولنان محللر . و (بعض منادانك) دخی حذفی
- ۱۳۸ ۷۰ الموضع الثالث ما اضممر عامله علی شریطة التفسیر
- ۱۴۰ ۷۱ تعریف مذکورده اولان قیوديله اغیارك خروجی
- ۱۴۲ ۷۲ اضممار علی شریطة التفسیر بابدن اولمسی ظن اولنسان اسم بش احتمالدن خالی دکلدر (رفع واجب) اولان محل (رفع مختار) اولان محل
- ۱۴۴ ۷۳ اون موضعده نصب مختار اولدینی
- ۱۴۶ ۷۴ ایکی موضعده نصب واجب اولدینی رفع ونصب مستویا جائز اولان محل
- ۱۴۸ ۷۵ الموضع الرابع التحذیر

- ۷۶ ۱۴۹ الموضع الخامس الاغراء
- ۷۷ ۱۵۰ المفعول فيه (تعريف) (واقسامی) (قیاساً) (فی) حذف
اولئان اوج محل
- ۷۸ ۱۵۲ مفعول فيه ظرف مكان محدود اولسه
- ۷۹ ۱۵۴ المفعول له تعريف واقسامی ولامك حذفی شروط ثلثه نك
اجتماعی عندئذ اولدینی
- ۸۰ ۱۵۶ المفعول معه تعريف و بیانی عاملنك یالفظی و یامعنوی
اولدینك بیانی . مفعول معه نك عاملنده اولان مذاهب خمسة
- ۸۱ ۱۵۹ الحال حالی كوزلجه فهم ایتك حاله متعلق اون بحشه دقت
ایلمكله اولور حال (برفاعل ویا) مفعولك هیئتتی بیان ایدر
(فاعل ومفعولك) حقیقه و حکما اولمغه شمولاری (مضاف
الیه دن) حال وقوعی اوج وجه اوزره در
- ۸۲ ۱۶۱ حالك عاملی اوج قسم . اوزره در حالك (شرطی) همیشه
نكره اولماید و (تأویل اولئان) كلمه لر و (تأویل) ده
اولان ایکی وجه
- ۸۳ ۱۶۳ حال واقع اولان ماده لر ایکی قسم اوزره در حال (ذوالحال
اوزره) اوج محله و جواباً تقدم ایدر حال عامل معنوی
اوزره تقدم ایدم میه جکی حال (عامل معنوی) اوزره تقدم
ایلدیکی محل حالك (ذوالحال مجرور) اوزره تقدم ایدم بیلوب
واید میه جکی
- ۸۴ ۱۶۵ حالك مشتق وجامده تعمیمی و (هذا بسراً اطیب منه رطباً)
مثالنك ترکیبنده اولان اوج مذهب حالك (بعض جمله)
اوله جفی و جواز تعددی واقسامنك بیانی
- ۸۵ ۱۶۷ جمله واقع اولان حالك بش قسم اوزره اولدینك و رابط لرك بیانی
- ۸۶ ۱۷۰ حالك عاملنك بعض جوازاً و بعض وجوباً حذفی
- ۸۷ ۱۷۳ التمييز تعريف واقسامی قسم اول ذات مذکورده دن ابهامی
رفع ایلیان واسم مهم تمامك تمامیتی بش شیئك بریله اولدینك بیانی

- ۱۷۴ ۸۸ اسم مبهم تام اکثر کنندیه بر نسنه نك قدر و عیاری تعیین اولنان
اسم اوله جنی و گاه غیر مقدار بولنه جنی و بیان احکامی
- ۱۳۵ ۸۹ قسم ثانی بر جمله و یا شبه جمله و یا اضافه ده کائن بر نسب ده ملخوظ
ذات مقدره دن ابهامی رفع اینلیان
- ۱۷۷ ۹۰ تمیزك قسم ثانیه نك اوچ حالدن خالی اولدیغی
- ۱۷۸ ۹۱ تمیزك علی اوزره تقدم ایده میه جکی و مبرد (و مازنی نك)
ذهاب و استدلال لاری و ویریلان جواب
- ۱۸۰ ۹۲ المستثنی تعریف و اقسامی (مستثنای منقطعك) بیانی تفصیلاً
- ۱۸۲ ۹۳ مستثنای متصل بیانی تفصیلاً
- ۱۸۴ ۹۴ مستثنای مضرعك غالب حالده کلام غیر موجب ده اوله جنی
و مستثنی نك عاملنده اولان اختلاف
- ۱۸۶ ۹۵ مستثنی خلا و عدا و ما خلا و ما عدا اولیس و لایکون لفظلرندن
صکره واقع اولسه
- ۱۸۸ ۹۶ مستثنی حاشا لفظندن صکره واقع اولسه و غیر و سـوی و سـراء
لفظلرندن صکره بولنسه . (کوفیلرك) ذهابی
- ۱۸۹ ۹۷ آلاکله سنك استثناء متعذر اوله رق غیر معناسنه صفت اولمسی
(و بعض) عدم تعذر عندنده دخی معناسنه کلیسی
- ۱۹۱ ۹۸ خبرکان و اخواتها (کان) نك بعض جوازاً حذف اولنه جنی
الناس مجزیون باعمالهم ان خیراً فخير قول شریفی امثالنده
درد وجهك جوازی (کان) نك و جو باحذفی اسم باب ان
- ۱۹۴ ۹۹ اسم لالنفی الجنس لالنفی الجنسك مدخولی اوچ قسم اوزره
اولدیغی قسم اول معرب اولان قسم ثانی علی ماینصب به مبنی
بولنان
- ۱۹۶ ۱۰۰ قسم ثالث رفع و تکریر واجب اولان
- ۱۹۸ ۱۰۱ لالنفی الجنسك اوچ قسم اوزره بولنان مدخولنك توابعنك
احکامی
- ۲۰۱ ۱۰۲ خبر ما و لا المشبهتین بلیس

المجرورات

- ۲۰۲ ۱۰۳ اضافة معنويه نك تعريف واقسام ثلثه سنك بياني وشرطي
كوفيلرك ذهابتك قياسا واستعمالاً ضعفي
- ۲۰۵ ۱۰۴ اضافة لفظيه نك بياني وآنحق لفظاً برتحفيف افاده ايليوب
مفيد تعريف اولديني وبونك اوزره متفرع اولان احكام
وفرانك ذهاب واستنادي
- ۲۰۸ ۱۰۵ صفتك موصوفه موصوفك صفته اضافتك جواز وعدم
جوازي بحئي الفاط مترادفه نك يكديكره اضافتارينك جائز
اولديني اسم مفردك لقبه اضافتي
- ۲۱۰ ۱۰۶ اسم صحيحك واخرنده حرفي علم بولنان كلمه لرك واسماءسته نك
ياء متكلمه اضافتي
- ۳۱۳ ۱۰۷ مضاف ايله مضاف اليه بيننده يدي شيله فصلك جائز اولديني
۲۱۵ ۱۰۸ مضاف ومضاف اليهك حذفى تقديرنده اولان احكامك بياني
۲۱۷ ۱۰۹ التوابع تعريف وبياني
- ۲۱۹ ۱۱۰ بحث النعت تعريف واقسامي
- ۲۲۰ ۱۱۱ صفتك تعددينك جائز اولديني وصفك مشتق لازم اولديني
وحقيقه وياحكما نكره اولان مفردك جمله خبريه ايله جوازا تصافى
۲۲۱ ۱۱۲ صفت يا موصوفك ويا متعلقك خالى اولمقدن خالى اولديني
وهر قسمك بياني
- ۲۲۳ ۱۱۳ موصوف صفتندن اعرف ويا اكاساوى اولمق لازم اولديني
۲۲۴ ۱۱۴ بحث العطف تعريف وبياني اسملي يكديكرى اوزره عطف
اولنقده درت قسم اوزره تصور اولنديني
- ۲۲۵ ۱۱۵ بركله نك ضمير اوزره عطف اولنمسي بحئي وبصريلرك
وكوفيلرك ذهابي
- ۲۲۷ ۱۱۶ معطوفك معطوف عليه حكمنده اولديغتك بياني
- ۲۲۹ ۱۱۷ برحرف عطفيه ايله برعاملك معموللرى اوزره عطف جائز
اولديني واما عاملين مختلفينك معموللرى اوزره عطف مختلف

- فیہ بولدیغی و بوندہ اولان درت مذہیک بیائی
- ۱۱۸ ۲۳۱ بحث تا کید تعریف و بیان اقسامی
- ۱۱۹ ۲۳۳ بحث بدل تعریف و بیان اقسامی
- ۱۲۰ ۲۳۵ بدک مبدل منه نه شیلرده مطابقتی لازم اولوب ونه شیلرده لازم اولدیغی
- ۱۲۱ ۲۳۶ بحث عطف بیان تعریف و بیائی و بدلدن کیفیت فرقی
- میحت المنی من الاسم
- ۱۲۲ ۲۳۳ مبنی تک تعریف و بیان اقسامی
- ۱۲۳ ۲۳۹ بناتک سیلری
- ۱۲۴ ۲۴۳ المضمرات وجوه بنا و کیفیت تقسیمی و تقدم ذکر لفظا و معنا و حکماً یعنی شو اوج جهته اوله جفتک بیائی و مضمرات بش قسم اوژره اولدیغی
- ۱۲۵ ۲۴۵ قسم اول ضمیر مرفوع متصل
- ۱۲۶ ۲۴۶ قسم ثانی ضمیر مرفوع متصل
- ۱۲۷ ۲۴۸ (قسم ثالث) ضمیر منصوب متصل (قسم رابع) ضمیر منصوب متصل (قسم خامس) ضمیر مجرور متصل
- ۱۲۷ ۲۴۹ مانع اتصال آلتی دانه اولدیغی
- ۱۲۹ ۲۵۱ اجتماع ضمیرین بخئی
- ۱۳۰ ۲۵۳ کان و اخواتک خبری ضمیر اولور ایسه و عسی و لولا دضکره واقع ضمیرک کیفیتنی نون و قایه تک بیائی
- ۱۳۱ ۲۵۴ ضمیر فصل و ضمیر شاتک بیائی
- ۱۳۲ ۲۵۷ اسماء الاشارة وجوه بناسنک و افرادینک بیان و عیائی
- ۱۳۳ ۲۶۰ الموصولات تعریف و بیائی و (صله تک) عیائی
- الف لام موصوله تک بیائی
- ۱۳۴ ۲۶۲ اسماء موصوله تک بیان افرادی
- ۱۳۵ ۲۶۶ الذی ایله اخبار بایی اخبار متعذر اولان بدی محل
- ۱۳۶ ۲۶۹ میحت اسماء افعال و ما کان علی وزن فعال (هاریوید) (هلم) (هانت)

۲۷۱ ۱۳۷ جیہل باہ علیک دونک آمین وراک امامک الیک صہ طہ مہ
قط نزال قرقار عرعار

۲۷۵ ۱۳۸ ہیہات

(شتاب) سرعان وشکان بطآن اف

(اوہ)

۳۷۷ ۱۳۹ اسماء افعالک شو مذکور اتدہ عدم انحصاری و (معناری)

مبالغہ و تأکید شامل اولدینی (فعال) وزندہ مصدر

وصفت و علملر دخی اولدینی و مؤنثہ مخصوص بولندینی

۲۷۹ ۱۴۰ بحث الاصوات مطلقا صوتک تعریف و بیانی و بورادہ مانحن

فیہمز اولان صوتک تعینی

۲۸۲ ۱۴۱ مانحن فیہمز اولان صوتک عندالنحات تعریف و بیانی

۲۸۳ ۱۴۲ بعض المركبات اقسام مرکباتک بیانی و مانحن فیہمزک تعینی

۲۸۶ ۱۴۳ مانحن فیہمز اولان بعض مرکباتک تعریف و بیانی

۲۸۸ ۱۴۴ مبحث بعض الکنایات تعریف و بیانی و مقصود من اولان

بعض کنایاتک تعینی و کم لفظنک بیانی

۲۹۱ ۱۴۵ کم استفہامیہ و خبریہ نک میز لریٹک جواز حذفی و ترکیلریٹک

بیانی کم عمقک یا جریر نخونده (کم) دہ و مابعدندہ اوچر

وجہک جائز ایدوکی

۲۹۴ ۱۴۶ کذا و کیت و ذیت و کاین لفظلریٹک بیانی

۲۹۵ ۱۴۷ اسماء استفہام و شرط دخی کلمات کنائیہ دن معدود ایدوکنک

بیانی

۲۹۶ ۱۴۸ بعض الظروف مقصودک تعینی امس قط عوض مذ مند

۳۰۰ ۱۴۹ اذا لفظنک بیانی اذا لما لفظلریٹک بیانی

۳۰۲ ۱۵۰ متی این انی ایان کیف حیث لذی کاف عن علی

۳۰۵ ۱۵۱ مبحث مبنی العارض غیراللازم واجب البنا اولان درت قسمدر

۳۰۷ ۱۵۲ جائز البنا اولان اوچ قسمدر

- ۱۵۳ ۳۰۸ مبحث معرفه ونكره معرفه نك تعريف وبياني والتي
نوع اوزره اولديغى (ووضعتك) بياني (تعيين وعدم تعيين)
ده معتبر اولان دلالت لفظ ايدوكى
- ۱۵۴ ۳۱۱ معارف دن نوع اول مضمرات (نوع ثاني) اعلام (علمك)
تعريفى اعلام (شخصيه وجنسيه) نك بياني
- ۱۵۵ ۳۱۴ بنى انسانك غيرى ايجون دخى اعلام شخصيه وضع اولنديغتك والفت
(اولميان) حيوانلرايجون آنجق اعلام جنسيه مسموع اولديغتك
بياني (علملراعيان ده جارى اولدقلىرى كى معانى ده دخى جارى
اولدقلىرى نك بياني اوقات ايجون دخى اسملر طاقيلديغى بر عدد ايله
نفسى مراد اولنسه بولنديغى مرتبه نك علمى عد اولنه جنى اوزان
موزونلرى نك علمى عد اولنه جنى علملره (بعض الف) لام داخل
اوله جنى و بوده ايكي قسم اوزره بولنديغى علملرى نكره قيلمك طريقى
- ۱۵۶ ۳۱۸ علملر يا كنيه و يالقوب و ياسم اولور (ومفرد و مركب
ومنقول و مرتجل اولور اعلام منقوله) نك بيان واقسامى
(اعلام مرتجله) نك بياني
- ۱۵۷ ۳۲۰ نوع ثالث مبهمات نوع رابع معرف باللام نوع خامس
معرف بالندا نوع سادس معرف بالاضافه
- ۱۵۸ ۳۲۳ مبحث اسماء عدد تعريف وبياني وقاعده تعدادك عياني
- ۱۵۹ ۳۲۵ واحد واثنان لفظلرى نك تميز دن مستغنى اولدقلىرى (وثلثه دن) عشرة
حدينه وارانده دكن عددلرك تميزى مجرور و مجموع اولديغتك بياني
مائ لفظنك جمع (مذكر سالم و جمع مؤنث) سالمك ثلث و اخوانه
تميز اوله ميه جنى (معدودلرى نك جمع) قلاتى و ارايسه آنجق اكامضاف
قيلنه جقلىرى (تميزلرى نك لفظاً و معنا جمع اولمى و معنا جمع دن مراد
احد عشر نك تسعة وتسعين عددينه دكن ميزلرى منصوب
- ۱۶۰ ۳۲۸ ومفرد اولديغى (مائه و الف و ثنيه) و جمعلرى نك ميزلرى
مجرور و مفرد اولديغى (معدود مؤنث) و لفظ مذكر و ياخود
برعكس اولورسه (تميز عددك) توصيفى و صفت دن وقوعى

- ۱۶۱ ۳۳۰ عددلرك باعتبار التصير وباعتبار مراتبهم بياني
- ۱۶۲ ۳۳۲ مبحث المذكر والمؤنث مذكر ومؤنثك تعريفلري (لفظي وتقديرى) قسملرينه انقسامى (حقيقى ولفظى) قسملرينه انقسامى لفظنده علامت تائيت ظاهر اولميان كلهلرك مؤنث اولديغنى بيلمك طريقى
- ۱۶۳ ۳۳۴ تا حرفنك اسمده اون ايكي وجه اوزره متصور اولديغنى ذكر اولنان وجوه اثني عشرده اولان تانك تائينه راجع اولديغنى كندينه تاء تائيت لاحق اولميان صفتلر
- ۱۶۴ ۳۴۰ آخرنده الف مقصوره اولوب وآنحقي تائيت ايچون اولان وزنلر اوتوز ايكي در
- ۱۶۵ ۳۴۵ آخرنده الف ممدوده اولوب وآنحقي تائيت ايچون اولان وزنلر يكرمى اوچدر
- ۱۶۶ ۳۴۷ واجب التائيت اولان مؤنثات سماعيه جائز التائيت اولان مؤنثات سماعيه
- ۱۶۷ ۳۵۵ مبحث مثنى
- ۱۶۸ ۳۵۶ آخرنده الف مقصوره وممدوده بولمانلرك تشيهلري
- ۱۶۹ ۳۵۸ مبحث جمع تعريف وبياني
- ۱۷۰ ۳۶۱ جمع مذكر مصحح وشرائطنك بياني
- ۱۷۱ ۳۶۴ جمع مؤنث مصححك بياني وشرائطنك والف تايله جمع اولنه جقلرك عياني
- ۱۷۲ ۳۶۶ جمع مكسرك بياني جمع (قلتك) بياني واوزان مخصوصهسى
- جمع (كثرتك بياني) ويكرمى ايكي وزن اوزره اولديغنى
- ۱۷۳ ۳۶۹ فعل وشبه فعلك مذكر ويامؤنث مظهر ومضمره اسنادلري
- مبحث العامل القياسى
- ۱۷۴ ۳۷۲ مبحث المصدر جدول (المصادر)
- ۱۷۵ ۳۷۷ عمل يالكز مصدرك وياخود يالكز فعلك وياخود مصدر
- فعل اولنه بيلمهسى بختلري

۱۷۶ ۳۸۱ مصدرک معمولی کندينک اوزرینه تقدم ايده ميه جي فاعلي

(بلا نائب) حذفك جوازي مصدر (فاعلنه) ويا مفعولنه

اضافه ويا عدم اضافتي مصدر (متعدينك) اضافتنده بش وجه

متصور اولديغي

۱۷۷ ۳۸۲ مبحث اسم الفاعل وعملنك شرائطي

۱۷۸ ۳۸۶ مبحث اسم المفعول وشرائط عمل

۱۷۹ ۳۸۷ مبحث الصفة المشبهة

۱۸۰ ۳۸۸ صفت مشبهة نك بنا اولنديغي بابلك ووزنلرينك بياني

۱۸۱ ۳۹۱ صفت مشبهة نك عملي وشو صورتده متصور اولان اون سكر

وجهك بيان وجدولي

۱۸۲ ۳۹۴ جدولده كوستريلان اون سكر وجهدن احسن وحسن وقيح

ومختلف فيه ومتمتع بولنانلك جهتلرينك بياني

۱۸۳ ۳۹۵ غير متعدي بولنان اسم فاعل ومفعول صفت مشبهة كبي

اولديغي وفوائد اخر

۱۸۴ ۳۹۶ مبحث اسم التفضيل تعريف وبياني (اسم تفضيل بناسي يدي)

شرطيله متصور اولديغي

۱۸۵ ۳۹۹ اسم تفضيل من ويا خود اضافه ويا خودالف لاميله استعمال اولنه جني

۱۸۶ ۴۰۰ وجوه ثلثه دن هر برنده اولان مسائل مخصوصه

۱۸۷ ۴۰۱ اسم تفضيلك براسم ملفوظده عمل ايده ميوب آنجق ضمير

مستترده عمل ايده بيلمسي

۱۸۸ ۴۰۲ اسم تفضيلك فاعل ظاهرده عمل ايلمسك شرائطي

۱۸۹ ۴۰۴ مسئله كل بشقه عبارده لر ايله دخي تمثيل اولنه بيله جي

۱۹۰ ۴۰۶ اسماء افعال دماعدا اولان معنای فعللرك بياني

(المطلب الثاني في الفعل)

۱۹۱ ۴۱۱ فعلك لغة واصطلاحاً بيان وتحقيقي

۱۹۲ ۴۱۳ مبحث فعل الماضي بش محل ده ماضي استقبال معناسنه منصرف

اوله جني وآلي محله ماضي واستقباله محتمل بولنه جني

- ۴۱۶ ۱۹۳ مبحث المضارع اسم فاعله لفظاً ومعناً واستعمالاً مشابهتی
کوفیلرک ذهابی
- ۴۱۸ ۱۹۴ فعل امرک وقف اوزره بناسی فعل مضارعه نون تأکید و نون
جمع مؤنث لاحق اولدقده مبنی اوله جنی
- ۴۲۰ ۱۹۵ فعل مضارعک بیان اعرابی
- ۴۲۱ ۱۹۶ فعل مضارعک برفعهده عاملی تعیین ده اولان اختلاف
ومذاهک سبعة
- ۴۲۳ ۱۹۷ مبحث النوصب ان ناصبه نک بیانی لن واذن لفظنک بیانی
- ۴۲۶ ۱۹۸ نواصب دن کی لفظنک بیانی
- ۴۲۷ ۱۹۹ التی موقعده فعل مضارع ان مقدره ایله منصوب اوله جنی
اولکیسی
- ۴۲۹ ۲۰۰ ایکنجیسی اوچنجیسی دردنجیسی بشنجیسی التجیسی
- ۴۳۱ ۲۰۱ ان مقدره نک اظهاری جائز اولوب واولیان محالر ومن غیر
عمل اضماری
- ۴۳۳ ۲۰۲ مبحث الحوازم درت دانه سی برفعلی مجزوم قیلر لم لما لام امر
لانی
- ۴۳۴ ۲۰۳ اون بردانه سی کلمه مجازاة دنیلور ایکی فعلی مجزوم قیلر
- ۴۳۵ ۲۰۴ جزاده بش موقعده فانک دخولی واجیدر
- ۴۳۷ ۲۰۵ جزاده فانک دخولی ایکی موضع ده جائز وایکی موضع ده
ممتنع اولدیغی
- ۴۳۹ ۲۰۶ بش شیدنصره فعل مضارع ان مقدره ایله مجزوم قلنور
- ۴۴۱ ۲۰۷ کلمه مجازاتک نفسلرینه دائر مسائل
- ۴۴۳ ۲۰۸ مبحث صیغه الامر
- ۴۴۴ ۲۰۹ مبحث فعل مالم یسم فاعله
- ۴۴۶ ۲۱۰ مبحث المتعدی و غیر المتعدی
- ۴۴۹ ۲۱۱ مبحث افعال قلوب
- ۴۵۰ ۲۱۱ خضائن افعال قلوب

- ۴۵۱ ۲۱۲ ايکي موضعده الغاء عمل جائز والتي موضعده واجب اولديني الغا
صورتنده معنا اعمال صورتنده اولان معنا کي اولوب اولديني
- ۴۵۳ ۲۱۳ مسئلهء تعليق
- ۴۵۵ ۲۱۴ مفعولينى اوزره ان مفتوحة مشددة نك دخولى فاعل ومفعولى
ضميرين متحدى المعنى اولمى
- ۴۵۶ ۲۱۵ مبحث الافعال الناقصة تعريف وبياني
- ۴۵۷ وبعض فعل تام فعل ناقص معناسنه کلدیکی
- ۴۵۸ وبعض افعال ناقصة دخى فعل تام معناسنه اوله رق افعال
تامه دن اولمى
- ۴۵۹ ۲۱۶ مدخولارينک بياني کان واخواتنک ايضاح معناسى
- ۴۶۳ ۲۱۷ خبرلرينک اسملى اوزره تقدم وتأخيرلرى خبرلرينى کنديلرك
اوزرينه تقديم كيفيتى اوچ قسم اوزره اولديني ابن كيسانك مذهبي
- ۴۶۴ ۲۱۸ مبحث افعال المقاربة قسم اول عسى
- ۴۶۶ ۲۱۹ قسم ثانى كاد
- ۴۶۷ ۲۲۰ قسم ثالث طفق وكرب واخواتى
- ۴۶۹ ۲۲۱ مبحث فعل التعجب
- ۳۷۱ ۲۲۲ صيغة تعجب اخذى ممكن اوله ميانلردن فعل تعجب اخذى
مراد اولنسه افعال تعجبك فعل واسم اولمسنه دائر اختلاف
- ۴۷۳ ۲۲۳ صيغة تعجبدين ما افعله تركينك بياني
- ۴۷۴ ۲۲۴ صيغة تعجبدين افعال به تركينك بياني
- ۴۸۵ ۲۲۵ مبحث افعال مدح وذم شرطلرينك بياني
- ۴۷۷ ۲۲۶ مخصوص بالمدح ومخصوص بالذمك بياني
- ۴۷۸ ۲۲۷ افعال مدح وذم دن ساء وحبذا
- (المطلب الثالث فى الحرف)
- ۴۷۹ ۲۲۸ حرفك لغة واصطلاحاً تعريف وبياني
- ۴۸۰ ۲۲۹ مبحث حروف الجر
- ۴۸۳ ۲۳۰ من اون بش معنى كمشدر

الی سکز معنایه کیشدر	۲۳۱	۴۸۵
حتی نك بیانی	۲۳۲	۴۸۷
فی اون معنایه کیشدر	۲۳۳	۴۸۸
با اون درت معنایه کیشدر	۲۳۴	۴۹۰
لام یکر می ایکی معنایه کیشدر	۲۳۵	۴۹۲
رب کله سنك بیانی	۸۳۶	۴۹۵
واو رب نك بیانی	۰۰۰	۴۹۷
واو قسم تاء قسم باء قسم	۲۳۷	۴۹۸
کیمه ولولاك ولعل نك حرف جراو ملاری متفق علیه اولدینی	۲۳۸	۵۰۰
عن اون معنایه کیشدر	۲۳۹	۵۰۲
عن کله سی اوچ وجه اوزره استعمال اولنور	۰۰۰	۵۰۳
علی طقوز معنایه کیشدر	۲۴۰	۵۰۴
علی ایکی وجه اوزره استعمال اولنور	۰۰۰	۵۰۵
کاف بش معنایه کیشدر کاف مفرده جاره و غیر جاره اوله رق استعمال اولنه جینی	۲۴۱	۵۰۶
حروف جاره دن مذ و مند	۲۴۲	۵۰۷
مبحث الحروف المشبهه بالفعل	۲۵۳	۵۰۸
ان وان نك بیانی و تاویل مصدرک طریق بش اولدینی	۲۴۴	۵۰۹
الف تون ماده سنك مکسور قلندینی محالر	۲۴۵	۵۱۰
الف نون ماده سنك مفتوح قلندینی محالر	۲۴۶	۵۱۲
الف نون ماده سنك مفتوح و مکسور اوقتمسی جائز اولان محالر	۲۴۷	۵۱۴
ان مکسوره نك اسمنك محل بعیدینه حملاً رفعیله عطفک	۲۴۸	۵۱۸
جوازی مبرد و کسائی نك ذهابی لام ابتدائک دخولی		
ان مکسوره مشدده نك تخفیفی جائز اولدینی وان نافیه دن فرقی	۲۴۹	۵۱۹
وفوائد اخر		
ان مفتوحه مشدده نك دخی تخفیفی جائز اولدینی وان ناصبه دن فرقی	۲۵۰	۵۲۰
کان کله سنك بیانی و جواز تخفیفی	۲۵۱	۵۲۳

لكن كلمه سنك بيانى وجواز تخفيفى	۲۵۲	۵۲۵
ليت نك بيانى	۲۵۳	۵۲۶
لعل نك بيانى	۲۵۴	۵۲۷
مبحث حروف العاطفه واو فائمه حتى كلمه لرينك بيانى	۲۵۵	۵۲۹
او اما ام	۲۵۶	۵۳۱
ام يامتصله ويا منقطعه اوله جنى وبيانى	۲۵۷	۵۳۳
حروف عاطفه دن لابل لكن	۲۵۸	۵۳۴
مبحث حروف التنبيه وحروف الندا	۲۵۹	۵۳۵
مبحث حروف ايجاب نعم	۲۶۰	۵۳۷
بلى اى اجل جبر ان	۲۶۱	۵۳۸
مبحث حروف زياده	۲۶۲	۵۳۹
مبحث حرفى التفسير	۲۶۳	۵۴۲
مبحث حروف المصدر	۲۶۴	۵۴۳
مبحث حروف التحضيض وحرف التوقع والتحقيق	۲۶۵	۵۴۴
مبحث حرفى الاستفهام همزه هل	۲۶۶	۵۴۵
همزه نك يدى موضعده هل كلمه سندن وهل درت موضعده	۲۶۷	۵۴۶
همزه دن ممتاز ايدوكى		
مبحث حروف شرط ان	۲۶۸	۵۴۹
لو	۲۶۹	۵۵۰
اما	۲۷۰	۵۵۱
مبحث حرف الردع وتاء التائيد الساكنه	۲۷۱	۵۵۳
مبحث التوين	۲۷۲	۵۵۴
مبحث نون التاكيد	۲۷۳	۵۵۶
نون تاكيدك ضمائر بارزه ايله كلمه منفصله وضمير مستتر ايله	۲۷۴	۵۵۸
كلمه متصله حكمنده اولديغى		
(نون مخففه نك بعض) حذف اولمىسى	۵۵۹	۰۰۰
(نون مخففه نك بعض) الفه قلب اولمىسى	۶۰۰	۰۰۰

﴿ اعتذار ﴾

اشبو (خلاصه الشروح) نام اثر لطيفك تصحيح و ترتيبنده الدن كلديكي
 قدر دقت اولندي ايسه ده برنجي طبعي اولمق ملاسه سيله حسب البشريه
 هر نصله بعض . املا . نقطه . حرف . كلمه سهولري كورمك كوزه
 طوقنان بعض سهولر زيرده وضع اولنان صواب خطا جد و ليله كوسترلمشدر
 لكن اثر مزبورك جسامته كوره استكشار اولنه جق درجه ده اولميوب
 اكثرى ادنى تأمل ايله اكلاشله جنى جهته ناظرين كرامك عفولري
 رجا اولنور

صحيحه سطر	صواب	خطا
۳ ۰۸	حضر تلرينك	حضرينك
۱۳ ۱۱	كلم ماده سندن	كلمه ماده سندن
۱۸ ۲۰	كلم مجازاة	كلمه مجازاة
۲۸ ۱۱	منها	منهما
۸۹ ۰۷	ويا فاعل و مفعولك	ويا فاعل مفعولك
۱۰۲ ۰۳	مفعول	مفعول
۱۲۶ ۰۹	تحميل	تحميل
۱۲۶ ۱۲	فيا الغلامان	فيا الغلامات
۱۲۷ ۱۳	الظريف	الضريف
۱۳۸ ۰۰	درس ۷۰	درس ۶۶
۱۴۱ ۱۹	ولام ابتدا دركه	ولام ابتدا كي
۱۴۱ ۱۶	وزيد لعمر و يضريه	وزيد لعمر و يضريه
۱۵۲ ۲۶	مسما سنده	مسما سنده
۱۷۴ ۰۰	درس ۸۸	درس ۸۱
۱۷۷ ۲۵	ابي	آبي
۱۸۱ ۲۳	حذف	حذف

خطا	صواب	صفحه	سطر
بعده	بعد	۲۴	۱۸۳
(زيدك) ك	(زيد) ك	۲۱	۱۸۳
الاشي	الاشي لا يعايه	۱۴	۱۸۳
حملاً ايسه	حملاً	۰۸	۱۸۴
ماتضع	ماتضع	۲۵	۱۸۷
شراصيه	شرطيه	۰۷	۱۹۲
اوزه در	اوزره در	۰۷	۱۹۴
حاضر	حاضر	۱۵	۱۹۴
لاتقى الجنسك	لاتقى الجنسك	۱۶	۱۹۴
وغلامين له	ولا غلامين له	۱۹	۱۹۵
وغلاميه	ولا غلاميه	۰۳	۱۹۶
لاتقى الجنس	لاتقى الجنسى	۱۷	۱۹۶
تكرير شخص	تكرير شخصى	۰۷	۱۹۷
اولمغه	اولمغه	۱۶	۲۰۹
وار در	وارد اولمشدر	۱۱	۲۰۱
حاضر	حاضر	۰	۲۰۱
مضاف اليه	مضاف اليه	۱۸	۲۰۳
عما	العمى	۹	۱۰۴
اغشى	اعشى	۱۵	۲۰۶
عبدلره	عبدلرده	۲۲	۲۰۶
وعربك	عربك	۲۵	۲۰۸
تحفيضدنكره	تحفيضدنصكره	۲۱	۲۱۵
ضربت بك وبزید	مهرت بك وبزید	۲۱	۲۲۵
ان يحيل	ان يحال	۲۰	۲۲۶
اولمغه	اولمغه	۳	۲۳۳
بوکي	ودخی بوکي	۶	۲۴۳
صره سندن	صره سنده	۱۶	۲۴۳

خطا	صواب	صحیفہ سطر
جہلہ	جہتلہ	۲۱ ۲۴۵
امر حاضر	وامر حاضر	۶ ۲۴۶
واضر ب کبی	اضرب کبی	۶ ۲۴۶
مفصل	منفصل	۵ ۲۵۰
واجب الانفصال	واجب الاتصال	۲۳ ۲۵۱
درس ۱۲۰	درس ۱۳۲	۰ ۲۵۷
الذی ضرب هو عمرو	الذی ضرب هو زید	۳ ۲۶۸
فیہ	نافیہ	۱۹ ۲۷۱
صاحبنا	صاحبنا	۱۱ ۲۹۹
ایتدک ایدی	ایتدک ایدی	۱۲ ۲۹۹
ورأیته	وما رأیته	۱۰ ۲۹۹
وکر	وکرک	۹ ۳۰۵
کچشدر	کچمشدر	۴ ۳۰۸
معرف	معروف	۱۲ ۳۲۱
درک	دردک	۱ ۳۳۲
۱۴۸	درس ۱۶۸	۰ ۳۵۶
۱۷۴	درس ۱۷۱	۰ ۳۶۴
ضربان	ظربان	۱۲ ۳۶۹
ایلمسی	ایلمسی	۱ ۳۷۴
درها	درهما	۲۳ ۳۸۱
حادثہ	حدثہ	۲۲ ۴۱۱
ملاحظنہ	ملاحظہ	۳ ۴۱۲
طرفین نسبتک	طرفی نسبتک	۲ ۴۱۳
(اما)	(ما)	۱۱ ۴۱۵
کلہ دہ	کلہ دہ	۷ ۴۱۹
اولی	الی	۸ ۴۳۸
ما کان صفۃ اللہ تعزہم	ما کان صفۃ	۲۴ ۴۲۹

خطا	صواب	صحیفه سطر
ویا خود یبهم	الله تعذیبهم	۲۴ ۴۲۹
مک	منک	۸ ۴۳۰
بیع	یبیع	۲۷ ۴۴۵
متعدوی	متعدی	۲۶ ۴۴۷
قو غجلق	قو غیجلق	۲۲ ۴۵۰
علت	علمت	۰۸ ۴۵۱
تدز	زید	۰۳ ۴۵۲
ایسه در	ایسه ده	۱۲ ۰۰۰
صننت	ظننت	۱۰ ۴۵۶
نانی	تانی	۰۷ ۴۵۸
دیگو	دیگر	۱۹ ۴۶۰
ناقصه نک	ناقصه نک	۰۸ ۴۶۳
قریت	قریت	۰۳ ۴۶۴
دیمکدر	دیمکدر	۰۳ ۴۶۵
تالی	ثانی	۰۴ ۴۶۶
ما افله	ما افله	۰۹ ۴۷۴
احسن	احسن	۰۴ ۴۷۵
تقی	یعنی	۱۰ ۴۷۷
مشابه	مشابه	۲۲ ۴۷۷
ادلالتی ولانلردرکه	دلالتی اولانلردرکه	۰۶ ۴۸۱
تیین	تیین	۰۸ ۴۸۶
حرف تفسیر	حرفی تفسیر	۱۰ ۵۴۲



Esad, Khell

— ❧ خلاصة الشروح ❧ —

Khulāṣat al-Shurūḥ

صاحب امتیازی
موالی کرامدن حلب بدایت حقوق محکمہ سی رئیس فضاہیلو
علی رضا افندی زاده مدرسیندن و مکتب نواب طلبہ سندن
خلیل اسعد

معارف نظارت جلیہ سنک رخصتیلہ طبع اولنشد

در سعادت

(محمود بك) مطبعہ سی — باب عالی جوارنده ابوالسعود

جاده سنده نومرو ۷۲

۱۳۰۵



MAR

1985

ترجمہٴ حال مؤلف

صاحب تالیف علماء فضائل انتماء عثمانیہ دن و صدور عظام
 سماحت اسامدن مرحوم کردنقرن عمر خلوصی افندی حضر تکرینک
 تلامیذندن حب بدایت محکمہ سی رئیس اولی موالی کرامدن
 فضیلتلو علی رضا افندی نک انجال فضیلتلرندن اولوب مشار الیہک
 سیواس محکمہ استیناف ریاستی اثناسنده پدرلرینی کورمک اوزره
 اورایہ کیتد کلرنده موسم شتا حیولت ایدہرک اوراده بولندقلری
 مدتده اضاعه وقت ایتامک ومجرد مطالعہ سی مسائل نحو یہ نک
 تمرین و تآکیدینہ وسیلہ اولمق ملاحظہ سیلہ کافیہ سیاتی اوزره
 شیخ رضی ومنلا جامی و بعض حواشییدن خلاصہ و اطلالی نام
 کتاب فوائد نصابدن دخی برطاقم مسائل نافعه اقتباس و درس
 درس جمع و ترتیب ایدہرک الامور مرهونہ باوقاتہا فحواسنجه
 اکمال نواقص مقصد علوی مرصدیلہ دارالخلافة العلیہ یہ کلہرک
 حضور دقائق نشور حضرت فتوائپناہی یہ عرضلہ منظور سامی
 بیوریلہ رق مظهر تلطیف و اثر معروضک طبعی امر و تنسیب
 بیورلدیغنه مبنی مہارف نظارت جلیلہ سندن استحصال رخصتلہ
 محمود بک مطبعہ سنده طبع و تمثیل قلمشدر .

مومی الیه {علی رضا افندی} علاء الدولہ اصحاب کھف شریفک
 مقام معالارین تعمیر ایلدیک ائنادہ کنگریده نشرله مشغول
 ارباب فضل و کمالدن الیاس افندی رحمۃ اللہ علیہ حضر تلرینی جلب
 و مدرس نصب ایلدکرنده مشار الیهک اول مقام معالاده اوچ
 مخدوم فضائل موسومی تولد ایدرک جملہ سی کندندن اکمال تحصیل
 ایتلریله برینہ زراعت و برینہ تجارت طریقنی اراہ و قوہ علمیہ
 و کمال زهد و ورعلری ایجابنجه نشر ایلہ مشغول اوللرینی تنسیب
 و اراده بیوردقلری ال بیوک مخدوملری یملیخا افندی حضرینک
 سلالہ سندندر مشار الیه یملیخا افندی اول آراق علم افراز شقا
 اولان کروه جبارہ نک تجاوز و ظلم و تعسفلی نشر و تحصیلہ مانع
 اولوب مؤخرأ بارقہ عنایت ربانیہ جلو دکر ساحة ظهور اوله رق
 اورال رکده ید عدالت پیوند دولت عثمانیہ یتودیع بیورلدیغنده
 بش ساعت بعد مسافه ده اولان البستان قصبه سنہ ہجرت و نشر
 علم و معارفہ بذل کمال و سع و مقدرت ایلمشلردر کہ شهر مذکور
 حقیقہ بر دار المعارف توصیفنه سزا بر صورت کسبیلہ بی ہمتا
 اولمشدر .

مشار الیہ یملیخا افندی حضر تلرینک سلالہ لرندن اثار علمیہ لرلیہ
 استفادہ و استفاضہ اولنور بیوک علی افندی خواجہ عبداللہ افندی
 و مؤلف مومی الیهک جدلری منتخبات فقہیہ صاحبی حاجی مصطفی
 افندی و مؤلفات عدیدہ صاحبی موالیٰ فخامدن مصطفی کامل

افندی کبی نیجه ذوات فضائلسمات تکمیل انفاس معدوده حیات
ایتمشدردر.

مشار الیهمدن عبدالله افندی متبحر برعالم بارع اولوب بیک
ایکیوزیدی تاریخنده حلبده علامه مشهور صبغة الله افندی
حضر تریله ملاقاتلرنده مشار الیه حضر ترینک { من عرف نفسه فقد
عرف ربه } حدیث شریفنک { ولا تكونوا كالذين نسوا الله فانساهم
انفسهم } آیت کریمه سنک عکس نقیضندن نه وجهله استفاده
اولندیغنه دائر ایراد ایلدکری سؤاله اول مجلسده تحریر ایلدکری
رساله مخصوصه لرینی صبغة الله افندی حضر تری مطالعه ایلدکلرنده
اوزرینه { یا اخی کتبت خیراً فی الاطلاع علی حقیقه الحال واصبت
خیراً فی الاستفسار بالمال } یازمشدردر که خط دستریله رساله
مذکوره ده محرردر.

مؤلف مومی الیه پدرینک اطنه نیابتندن بالا تفصیل سیواس
طریقیه درعلیه یه عزیمتلرنده بیک ایکیوزیتش اوچ سنه سنده
توقادده تولد ایدوب تحصیلی البستان و باشلوجه سی عربستان
و عراق جهتلرنده اولوب مؤخرأً انطاکیه ده تحریر ذیفنون شیخ
عبدالصمد افندی رحمه الله رحمه واسعة حضرینک مجلس ملائک
انیس لرینه ملازمتله مشار الیهک توجه مخصوصلرین احراز
واجازتنامه اخذیه کسب مفخرت و امتیاز ایتش و برآلق نشرایله
مشغول اولوب مؤخرأً اکمال نواقص عزم خالصانه سیله درسعاده

مواصلت و حالا علامهٔ بیدانی استاذ فضیلتشعار سماحتلو احمد
افندی حضر تلیزینک حلقهٔ تدریس تحریرانه لرینه دخالت مسارعت
ایلمشدر. مؤلف مومی الیه فقه شریفه کمال انتساب و توسل
ارزوی عالیسیله مکتب فیض مکسب نوابه دخی بالامتحان داخل
اولمشدر.

مکتب مشارالیه جل وسع و مقدرترین ترقی انواع معارف
خصوصنه ابذل بیورمقدمه اولان پادشاه معارفپرور و شهنشاه
عنایت کستر افندمن حضرینک محضا موفقیت سنیة جناب
جهانبانیلری ثمرهٔ باهره سی وداعی صداقتشعارلری شیخ الاسلام
ومفتی الانام دولتلو سماحتلو احمد اسعد افندی حضر تلیزینک
نظارت و دقت تمامدیه لرینه تودیع بیورملری اثار فاخره فیض
دثارندن اوله رق امتحانلرده کمال اعتنا ایله منتهی صورته طلبه لر
قبول اولنمسی و ذرتما آثار صحابت قطعاً مفقود اولوب و بو
خصوصده ارتق و جدان عامه ده بر امنیت کامله تقرر ایلمسی
و مدیر و معلمینک اصحاب فضائل اتسامدن اولمسی جهته
حقیقه اصلا قیاس قبول ایتیه جاک بر درجه ده بر مجمع فضلا
صورتن اکتساب ایلمشدر که بویله بر مکتب عال العاله مداومت
انسانجه پک بیوک بر شرف و عزیتدر.

بناء علیه جناب خلاق مستعان ذات ملائکسات حضرت
خلاقینهای بی الی الابد سریر شوکت مصیر شاهانه لرنده دائم

و شيخ الاسلام مشار اليه حضر تلرينى استجلاب دعوات خيريت
آيات تاجدارانه لرينه موفقيته مسند جليل فتواده قائم بيورسون.
امين

اعاظم رجال علميه دن اوقاف همايون مفتى فضيلتو عمر حلمى افندى حضر تلرينك تحرير
بيوردقلى تقريرن سميحانه لريدر

لما طالعت هذا الاثر وجدته من الاثار النافعة للطالبيين الراغبين
جعل الله سعى مؤلفه الكامل مشكورا وعمره موفورا

كتبه الفقير الى الاء ربه الغنى قرين
ابادى عبدالرحمن افندى زاده
عمر حلمى



— خلاصۃ الشروح —

بِسْمِ اللَّهِ الرَّحْمَنِ الرَّحِيمِ

عظیم الشان مولایہ سزادر حمد لایحی
کہ رفع و نصب و خفض اتمک آنکدر کیم ایدرا حصا
صلاة ایلہ سلام اولسون حبیب اللہہ کیم تمیز
ایدوب اعراب و اظہار قیلدی حق اول شرف افزا
دخی آلیلہ اصحابہ ایدوب اعلام دینی رکنز
قوافع الی احوالی بیلوب وضع ایتدیلر اسما

(اما بعد) داعی فقیر و پر تقصیر و بینوا السید خلیل اسعد حقیر بن علی
رضا سبب تالیف زبدۂ فرحت فزادہ شو و وجہلہ بادہ ریز قندادا اولور کہ
بیک اچیوز سنہ سی اوائلندہ شہر من بولنان قضیۂ البستاندن سیواس محکمہ
استیناف رئیس بولنان والد اکرمی و والدہ محترمہ و برادران ہمدیمی زیارت
و بردہ رخصت و یریلور ایسہ

(قطعہ)

(اسعدا) بازار فندہ نیچہ لر شہر تلنر
مظہر تقدیر اولوب آثاری پک رغبتلنر
سندخی عرض ایلہ کردینسہ نہ وار بر پیلور
کاهی جوہر پیلور کاه پیلور جوہر لنر

حسب حالنجه درعليه سیر و سیاحت قیامق املیه سیواسه کش ایدم
(الامور مرهونه باوقاتها) فحواسنجه شمذیلک رخصت ویرلیوب وایامشتا
اجرای احکامه مبادرت قیلمش اولغله عودت دخی مناسب کوریه میوب
بر قاج ماه بلده مزبورده اقامت رونما اولمش حالبوکه
(قطعه)

(چونکه ویرلدی سکا) (اسباب هر دوسرا)

(بوش کز مه سومن خدا) (در پی نفس و هوا)

مفادنجه بوش طور مق موافق آداب و حکمت اولمامغله لاجل المطالعه برادرلره
بر هدیة مرغوبه و نظر تقدیر ایله باقیلور ایسه بلکه جمله اولاد وطنه تحفه
مطلوبه اولمق اوزره اصطلاحات و تعریفات کما هو المصطاح والمعروف ثبت
و تحریر اولنهرق لسان ترکی عذب الیانه (علم نحو) ضبطی غایت اسهل
و آسان و طلاب سعد اقترا نه باعث سرور و قوت جان اولمق اوزره شروح
و حواشیدن زبده و خلاصه قیلنهرق ترتیب و تصویر ایدیلمشدر
و تسهیلاً للمطالعه فرقه فرقه درسره تفریق اولنوب بر مقدمه و اوج مطلب
ایله تقریر اولنمش و اسم و فعل و حرفدن هر بر لرینه متعلق مباحث کندی
مطلبارنده جمع و تمیز اولنوب پک کوزل بر طرز قویم ایله تنویر قلمشدر.
اشبو اثر دقت اولنور ایسه کافیه اسلوبی اوزره در فقط کافیه ده تفصیل
اولنمیان بر طاقم مواد مفیده بحثده تزیید و علاوه قیلنمش و امام بر کوی
رحمه اللهک بحث اعرابده اولان اسلوبی پک کوزل بر طرز اوزره بولندیغندن
اول اسلوبه موافق اولهرق بحث اعراب معرب بحثه علاوة شرح و بیان
ایدیلنمش و مباحث کافیه نک وضع و ترتیندن چیقمامق و فقط جمعیتلی
اولسون ایچون بحث مبنی دخی اسلوبده بر کوی و بیانده کافیه نشئه سنده
اولهرق معمولات بحثی عقینده کتورلشدر. و بعض تقریر بحثده تسهیل
طریق ضبط و عیان و تقویم بنیان فهم و بیان ایچون تقدیم و تأخیر دخی
وقوعبولشدر. اشبو اثر مرکز هله کافیه اوقنور ایکن مطالعه سی فهمه مدار
اولوب اولیه جفی عندالمطالعه وجدانه حواله اولنور ترکی العبارة بولنمسیده
ایشته اشبو فهمه مدار اولمق نکته سندن ایلر و کشدر.

(نظم المحرره)

محنت دنيا تيز الدن ايرمسيدي سويلنر
 غنچه وش عالمده طيب رايحه م شهرتلنر
 حل ايدر ارباب فن هر مشكلي اويسه فلك
 ليك تقدير اوييوب تدبيره پك قيمتلنر
 نوبت عبدالحميد خانيده هر بر معرفت
 چون رواجن بولدي آندن اهلي پك منتلنر
 اويله برخسروكه شمس معرفت در ذاتي چون
 اقتباس ايتدكجه نور ارباب دين وسعتلنر
 اولديغندن مظهر حسن توجه جمله سي
 قدر ارباب معارف كونيكون رفتهلنر
 آستان شوكتنده دولته ايرمك ندر
 معرفت كيم سايه سنده دوردن دولتلنر
 منبع عزتده عزت بولنور ليكن هنر
 عزت آني اسعدا بولمقدر اول عزتلنر

(مقدمه)

اشبو مقدمه من علم نحو ك تعريف و موضوع و غايتني و كله ايله كلامي
 و مجملأ عامل و معمول و عمل و اعرابي و معمول اولوب و اوله ميانلري
 بيان ايدر .

درس ۱

معلوم اوله كه (علم) لغتده بيلمك معناسنه اولوب اصطلاحده شئ واحد
 و يا اشياء متناسبه به متعلق احوالدين باحث بر طاقم مسائل مجتمعه به دينوركه
 بر آلاي معلومات مخصوصه در صرف نحو منطق كبي اسماء علوم بعض
 معلومات مخصوصه به اطلاق اولنوركه بوكا كوره هر علمك حقيقتي اول

علمك مسألندن . وبعض شومعلومات مخصوصه يي بيلمكه دينوركه بوكا
 كوره هر علمك حقيقتي اول علمك مسألني تصديقدن عبارت اولور .
 وبر علمده نه شيك احوال يعني عوارضندن بحث اولنور ايسه آكاموضوع
 علم اطلاق اولنور . وشو بحثدن نه فائده حاصل اوله جق ايسه آكا اول
 علمك غايي دينور . پس هر بر علم مثلاً (شو علم شوشيدن شو جهته
 بحث ايدر بر علمدر) دينهرك موضوعي ايله ويا خود (شو علم كندندن
 شويله بر فائده حاصل اولور بر علمدر) دينهرك غايي ايله تعريف اولنه
 بيلور اشته شو تعريفلا ايله اول علم ديكر علملردن ممتاز اولوب علم واحد
 عد اولنور .

وبر علمك من جهة الموضوع تعريفنه جهة وحدت ذاتيه ومن جهة الغاية
 تعريفنه جهة وحدت عرضيه ايله تعريف دينلور . شو بيانمزدن مفهوم
 اولان هر علم بر كثر يعني بريجه مسئله لر اولوب آني بر جهة وحدت
 ذاتيه وبر جهة وحدت عرضيه ضبط ايلر . اويله ايسه بر علمه شروع
 ايتك اراده ايدن هر بر طالبه آني طلبده بصيرت اوزره اولمق وكندينه
 بر مسئله ايراد اولندقدن اول علمدنميدر ويا دكميدر بيلمك ايچون اول او
 علمك موضوعي وبرده سعي واهتمامي زياده اولمق ايچون او علمك غاييني
 يعني (آني اوقومقدن غرض ندر ونه فائده حاصل اوله جغني او كرمك)
 وشوايكي جهتلرايله علم مزبوره بر علم اجمالي تحصيل ايتك وظيفه لازمه در
 ولفظ (نحو) محو وزنده لغتده بريجه معنارله كمشدركه اشبوايكي شعر آني
 جمله سني شاملدر .

(شعر)

نحونا نحو دارك يا حيبي لقينا نحو الف من رقيب
 وجدناهم جياعاً نحو كلب تمنوا منك نحواً من شهاب

يعني قصدنا جهة دارك يا حيبي لقينا مقدار الف من رقيب وجدناهم جياعاً
 مثل كلب تمنوا منك نوعاً من شهاب ديمكدر .

(شعر)

نحنا المحبوب فی نحو نحنا نحواً الى نحوی
الى قد نحنا الطرف نحانی من سوی المحو

یعنی مال المحبوب لی فی طریق قصد قصداً الى جهتی الى قدرد بصره صرفی
من سوی المحو دیکدر واصطلاحاً کلام عربینک کنذیلہ سمت ومنهاجی
ادراک اولنوب ومقصود اولی النہی اولمسی ملابسہ سیلہ جہت ویاخود قصد
معن الرندن اخذ اولنہ رق وایخر کلمہ دن من حیث الاعراب والبناء باحث
بولنان شوفن عزیزہ اطلاق اولنمشدرد.

اشبو بسطمن معلوم اولدی ایسہ علم نحوک موضوع وغایتی وشو جہت لری
ایلہ تعریفی بیلیمک لازم کلمشدرد.

علم نحو (ک موضوعی کلمہ وکلامدر شو علمدہ من حیث الاعراب والبناء
کلمہ لک آخری حاللرندن بحث اولنور وغایت یعنی فائدہ سی کلام عربی بی
او قومقدہ اعراب وبننا جہتیلہ خطادن سام بولنمقدرد پس من جہتہ الموضوع
تعریفندہ (علم یعرف بہ احوال وایخر الکلم من حیث الاعراب والبناء) دینور
یعنی علم نحو بر علمدرکہ آنکلمہ او ایخر کلماتک من حیث الاعراب والبناء
حاللری بیلنور . ومن جہتہ الغایہ تعریفندہ (علم یعصم مراعاتہ اللسان
عن الخطاء فی اعراب الکلم و بناء ہا) دینلور . یعنی علم نحو بر علمدرکہ
آکا مراعات و آئی اجرا ایلمک کلمہ لک اعراب وبناسندہ خطادن لسانی
حفظ ایلر وبعض حقیقت علم تصدیق بالمسائل اولدیغنہ کورہ (علم
باصول) دنیلہ رک (باصول) قیدی زائد قیلنور . بودخی بیلنملیدرکہ
بعض بر علمک موضوعی دیگر بر علمہ دخی موضوع اولہ بیلور . فقط
بعض حیثیتلر ایلہ یکدیگرندن فرق و تمیز اولنور . مثلاً علم صرفدہ دخی
موضوع کلمہ در . لکن علم صرفدہ کلمہ لک صیغہ ومن حیث الاعلال والادغام
احوالندن بحث اولنور . اشته شو حیثیت ایلہ علم صرف علم نحو دن ممتاز
اولور . وبر علمک واضعنی بیلیمک دخی فائدہ دن خالی دکدر . علم صرفک

واضحی امثله بی جمع و ترتیب ایتمکله حضرت امام علی رضی الله تعالی عنه و کرم الله وجهه اولمسی منقول اولدینی کبی علم نحو ک دخی بر صحابینک اعراب کلامده خطاسنه تصادف ایتمیکنده (الفاعل مرفوع والمفعول منصوب والمضاف الیه مجرور) دهرک اساسنی وضع ایلمشیر بوا یسه پک محمل اولوب وقواعد اعرابدن جاهل اولنلره پک کافی اولمدیغندن بعده تکثیر وتفصیل اولمشدر . وشو تکثیر وتفصیله جهل جهالک سیمیت و یرمسنه بناء (العلم نقطة کثرها الجاهلون) دینلمشدر .

درس ۲

درس سابقدن مستفاد اولدینی اوزره علم نحو ک موضوعی کله وکلامدر کله لغتده کرک اسم ویافعل ویا حرف اوله بر لفظه واحده یه وکلام کرک مفید ویغیر مفید اوله قوله دنیلور بولنلر جرح معناسنه اولان سکون لایله کله ماده سندن آلمشدر . علم اشتقاق قاعده سنجه مشتق ایله مشتق منه بیننده ایسه مدلولات ثلثه نیک برنده مناسبت لازمدر . بوراده مناسبت مدلول مطابقلرینک یکدیگرینه صحت ایلام وتأثیرده مشابیه تیدر . واقعا جرحده ایلام وتأثیر بولندینی کبی کله ایله کلامده دخی بولنه بیلور . نته کیم بیورلمشدر .

(شعر)

جراحات السنان لها الیتام ولا یلتمام ما جرح اللسان

ننه کیم بومعنا ده ترکیه اوله رق دخی دینلمشدر .

(بیت)

اولور مرهم جراحات سنانه علاج اولمز ولی زخم لسانه

واما اصطلاح نحاتده کله (لفظ وضع لمعنی مفرد) دینهرک تعریف اولنور یعنی کله مفرد اولان بر معنایه وضع اولمش لفظدر . بر لفظک جرئی معناسنک جزئنه دلالت ایتمز ایسه اکا مفرد وایدر ایسه اکا مرکب دینور معنی (ما یقصد بشئ) یعنی بر شیئله قصد اولناندر . مثلاً کله لفظیله قصد

اولنسان لفظ مفرد مفهومی کبی و بعض معنی (مایتعلق به القصد) دینمکله ده
تعریف اولنور . یعنی معنی کندیسنه قصد تعلق ایدن شیدر . بوکا کوره
معنی الفاظک وضعاً مدلولاری اولان مفهوملره صادق اولدینی کبی بعض
لفظلر ایله قصد اولنسان دیکر بعض الفاظه دخی صادق اولور مثلاً جمله
و خبر لفظلرینک صادق اولدقلری (زید قائم) و (ضرب زید) لفظلری
کبی اشیو (زید قائم) و (ضرب زید) امثالی هر نقدر کندی معنالرینه
قیاسیله مرکب ایسه لرده لکن هر برینک من حیث المجموع لفظلری جمله
و خبر لفظلری ازاسنده موضوع اولسنه نظراً مفردلردر .

شو صورتده اعتراض اولنه رق کله مفرد اولان برمعنایه موضوعدر .
برلفظک معناسی ینه لفظ اولورمی و مثلاً (زید قائم) و (ضرب زید) امثالی
مرکب (جمله) و (خبر) لفظلری مفردلردر . مفرد اولان برمعنایه وضع
اولنشلر دنیه یلورمی کبی اشکاللر وارد اولیه جنی درکاردر .

بالاده ذکر اولنسان تعریف ایله معرف اولان کله اوچ قسمه منقسم
اولمشدرکه اسم فعل حرفدر وشو اوچده وجه انحصار زیراکله کندی
نفسنده یا برمعنایه دلالت ایدر و یا خود ایتمز . کندی نفسنده برمعنایه
دلالت ایتمز ایسه حرفدر . واکر کندی نفسنده برمعنایه دلالت ایدر
ایسه بودخی اوچ زمانک برینه یامقترن اولوب و یا خود اولماز مقترن اولور
ایسه فعل واکر اولماز ایسه اسمدر . شو بیاندن مجمللاً هر برینک تعریفی
بیله چکی کبی مطلبلرنده دخی ایلزوده بیان اولنه جقدر . واصطلاح نحائده
کلام (ماتضمن کلتین بالاسناد) دینمکله معرفدرکه درس آتیده بیله جقدر .

درس ۳

درس سابقده بیان اولندیغی اوزره کلام لغتده مفید و یاغیر مفید سوزه
دینور . واصطلاح نحائده (ماتضمن کلتین بالاسناد) دینمکله تعریف
اولنور . یعنی اسناد ایله حاصل برتضمن ایله ایکی کله یی متضمن اولان
لفظدر واسناد ایله مراد مخاطبه فائده تامه افاده ایلر یعنی اوزرینه سکوت
صحیح اولور برصورتله ایکی کله دن برینی آخره نسبت ایلمکدر تعریف
مذکورده اولان (ما) کله سی موصوله و یا خود موصوفه اولوب لفظدن

عبارتدر مهملات ومفردات ومركبات كلاميه وغير كلاميه شاملدر
(تضمن كلمتين) دينمكلمه مفردات چيقمشدر وكمه برمعايه وضع اولنان
لفظه اطلاق اولنه جغندن بونكمه مهملات دخی خارج بولنمشدر (وبالاسناد)
قيديله مركبات غير كلاميه دخی چيقوب آنجق مركبات كلاميه قالمش
وشو جهتله تعريف مذکور افراديني جامع اغياريني مانع برتعريف
اولمشدر .

مركبات غير كلاميه بش دانه دركه تركيب تعدادی تركيب اضافی تركيب
تقيیدی تركيب مزجي تركيب صوتی دنيلان مركباتدر (احد عشر)
(غلام زيد) (حيوان ناطق) (بعابك) (سيويه) كي محملارنده كلكجه
معلوم اولور .

هرنقدر شو تركييلرك بعضيسنده برشاءة اسناد وار ايسهده فقط كلامده
معتبر اولان اسناد مذكوره مخاطبه مستلزم سكوت برفاءة تامه اعطا
ايدر بونلرده يوقدر شواجلدن مركبات كلاميه تركيب اسنادی دينلمشدر
پس مجموع مركبات التي قسم اولمشدر .

مركبات كلاميهده ياخبريه وياخود انشاءيه اولور زيرا كلامدن فهم
اولنوب ذهنده حاصل اولان نسبت ايچون اكر برخارج اولور يعنى كلامك
ايكي طرفي بيننده خارجهده برنسبت ثبوتيه وياخود سلبيه بولنور ايسهكه
كلامدن فهم اولنان نسبت خارجهده بينالطرفين واقع اولان نسبت ايكيسي
دخی ثبوتيه وياسلبيه بولنق كي مطابق اولهرق صادق وياخود مطابق
اوليهرق كاذب اولور بوكي كلامه خبر دينور (ضرب زيد) و(ضربت هند)
و(زيد قائم) گي واكر كلامدن فهم اولنان نسبت ايچون بويله برخارج
اولماز ايسه اول كلامه انشا دنيلوركه صدق وكذب احتمالی اولهمن (اضرب)
و(لاضرب) كي .

وبيلميلدركه كلامك متضمن اولديني ايكي كمه حقيقتيه وياخود حكما كمه
اولمغه شامل اولديغندن (زيد ابوه قائم) و(زيد قام ابوه) و(زيد قائم ابوه)
كييلر دخی تعريف كلامده داخل اولور زيرا شو جملهلرده اولان خبرلر
هرنقدر مركب ايسهلرده كلمه مفرده حكمنده يعنى (قائم الاب) منزلندهدر

و بونك كې (جسق مهمل) و (دیز مقلوب زید) قوللر من دخی داخلدر
زیرا بونلردهده مسندالیه هر نقدر لفظ مهمل اولوب کله دکل ایسهده
لکن هذااللفظ اعتبار یله کله حکمندهدر کلامده ذکر اولنان شو تعریف
ابن حاجب حضر تلینك اختیار ایلدیکی اولوب بوکا کوره مثلاً (ضربت
زیداً قائماً) مجموعی بردن کلامدر یعنی متعلقات خارج دکلدر زیرا مجموعی
ذکر اولنان وجه اوزره ایکی کله یی متضمندر .

واما شرح مفصل صاحبی تعریف کلامده (هوالمركب من كلمتين اسندت
احدهما للأخرى) بیورمشلر در که بوکا کوره خارج قاله جنی درکاردر
تعریف کلامده اسناد (مقصوداً لذاته) دینهرك تقييد اولنماغله جمله ایله
کلام مترادفین اولور لکه صاحب مفصل و صاحب لباب بوجه اوزره
ذاهلر در .

کلامی جمله دن اخص قیلنلر تعریف کلامده اسنادی (مقصوداً لذاته) ایله
تقييد و تعریف جمله ده مطلق بر اقدیلر شو تقدیرده مثلاً (زید ابوه قائم)
و (جاءنی زید یقوم) عبارلر نده (ابوه قائم) و (یقوم) کبی خبر و صفت
واقع اولان جل خبریه یه کلام دنیه میوب فقط جمله اطلاق اولنور .
و خفی اولیه که جمله و کلام آنجق ایکی اسمدن و یا بر اسم و فعلدن حصوله
کلور زیرا اسناد بر مسند و بر مسند الیهی مقتضی اولوب فعل ایسه دائماً
مسند اولور حرف ایسه هر کز مسند و مسند الیه اولماز شو جهتله ایکی
فعلدن و ایکی حرفدن و بر اسم بر حرف و بر فعل بر حرفدن اصلاً کلام
ترکب ایتمز کلام ایکی اسمدن ترکب ایتدکده بری مسند و دیگری مسند الیه
اولور و بر فعل بر اسمدن ترکب ایتدکده فعل مسند و اسم مسند الیه اولور ،
کله و کلام بیلندی ایسه شواراده مقدمجه بر معلومات و زیاده فائده ایچون
عامل و معمول و عمل یعنی اعرابی دخی برر درس ایله تعریف و تقسیم
ایده جکزر .

درس ۴

(العامل) عامل (هو ما اوجب بواسطة كون آخر الكلمة على وجه مخصوص
من الاعراب) دینهرك تعریف اولنور یعنی عامل بر واسطه ایله کله نك

آخرینك اعرابدن بروجہ مخصوص اوزره اولسنى ايجاب ايليان شيدر .
 واسطه ايله مراد مقتضىء اعرابدرکه اسملرده آنى عامل تحصيل ايدوب
 اعرابدن بروجہ مخصوصيده اول مقتضىء اعراب اقتضا ايدر مقتضىء
 اعراب اسملرده فاعليت مفعوليت مضاف اليه اولمقدرد مثلاً (ضرب زيد
 غلام عمرو) دنيلدکده ضرب عاملدر زیدده فاعليت و غلامده مفعوليت
 تحصيل ايتمش و غلام دخى عاملدر عمروه مضاف اولمغله عمروك مضاف
 اليه اولسنى حصوله کتورمشدر شومعنالر ايسه امور خفيه اولمغله برر
 علامتى مقتضى اولمشدر پس فاعل قليل وعمده اولمغله ثقیل وعمده اولان
 ضمه آکا ومفعول کثیر وکلامده فضله اولمغله خفيف اولان فتحده
 آکا علامت قيلنوب مضاف اليهده جرقالمش و برده مضاف اليه کثرة
 وقوعده فاعل ايله مفعول بيننده متوسط اولديغندن کندينه ثقلنده ضمه
 ايله فتحه بيننده متوسط اولان جرك ویرلمسى پک مناسب اولمشدر :
 شوبيانه کوره اعرابدن وجه مخصوصى معانى مزبوره بالفعل اقتضا ايدوب
 عامل ايسه تحصيل ايلديكى شومعنالر واسطه سيله ايجاب ايتمش اولور .
 واما فعللرده مقتضىء اعراب بر عاملدن حصوله کليوب انجق اسم فاعله
 مشابهت تامه در وشومشابهتده آنجق فعل مضارعده در اشته شومشابهتدن
 ايچون فعل مضارع اسمده اصل اولان اعرابده اسمه تابع اولديغى کي
 اسمدخى فعلده اصل اولان عملده فعله تابع بولنمشدر انشاءالله محللرنده
 تفصيلي کلور .

اشبو تعريف ايله معرف اولان عامل لسانله تلفظ اولنور ايسه آکا عامل
 لفظى واکر لسان ايله تلفظ اولنوب قلاباً بيانه جک بر معنا ايسه عامل
 معنوى دينور .

عامل لفظى دخى اکر عمل ايتمى سماعه متوقف اولور ايسه عامل سماعى
 واکر مثلاً (کل فعل يرفع الفاعل) ديمک کي عملنده موضوعى غير
 محصور بر قاعده کليه ذکر اولنه بيلور ايسه عامل قياسى دينور مجموع
 عوامل پرکوى حضر تارينك بياننه کوره التمشدر ايکيسى معنويدر که

مبتدا ایله خبرك ونواصب وجوازمدن خالی فعل مضارعك عاملایدر
 وطقوزی قیاسیدر که بریسی فعلدر ویدیسی فعله مشابهت ویا مناسبتی
 اولان اسملردر که اسم فاعل اسم مفعول صفت مشبهه اسم تفضیل مصدر
 اسم مضاف اسم مبهم تامدر وطقوزنجیسی کننددن بر فعل اصطلاحینک
 معنای مطابق ویا تضمینیسی فهم اولیان لفظلردر اسماء افعال و غیر یلری
 کبی اسماء افعال کننددن افعال مخصوصه نك مطابقه معنای فهم اولنور
 اسملر دیکدر که بونلردن بر قسمی امر و بر قسمی ماضی معنایسنددر محالنده
 تفصیلی کله جکندن بوراده اطناب کلامه حاجت کوره میز .

اسماء افعالن ماعدا ظرف مستقر اسم منسوب اسم مستعار اسم صفت اسم
 اشاره دخی معنای فعلدن اولور و حروف مشبهه بالفعلدن (لیت) و (لعل)
 و (حرف ندا) و (حرف تنیه) و (حرف نفی) ده دخی بعض معنای
 فعل اعتبار اولنور بونلر کده تفصیلی محالرنده کلور شو ذکر اولنلان
 عوامل قیاسیه دن فعل مطلب فعلده و دیکر لمطلب اسمده ورودایده جکدر .
 عواملک باقی قلان قرق طقوزیده سماعیدر که یکر میسی اسم واحدی مجرور
 قیلان حرفلدر بونلره حروف جر و حروف اضافت دینلور و سکرزی
 اسمنی منصوب خبرینی مرفوع قیلر که بونلردن (ان) (ان) (کائن)
 (لکن) (لیت) (لعل) کله لرینه حروف مشبهه بالفعل دینلور عوامل
 سماعیه دن ایکسیده (لیس) یه بکزر حرفلر دینلور که (ما) و (لا)
 کله لریدر اسملری مرفوع خبرلری منصوب قیلرلر و دردی داخل
 اولدیغی فعل مضارعی منصوب قیلر که انلر (ان) (لن) (کی) (اذن)
 کله لریدر واون بشی داخل اولدیغی فعل مضارعی مجزوم قیلر بونلردن
 (لم) (لما) (لام امر) (لاء نهی) بر فعلی جزم ایدرلر و دیکر اونبری
 کله مجازاة تسمیه قیلنور که ایکی فعل مضارعی مجزوم قیلوب برینه شرط
 دیکرینه جزا دینلور عواملک کیفیت تقسیمی شو صورتله ظاهر در .

العامل على قسمين

لفظی وهو على قسمين		معنوی وهو على قسمين	
سماعی وهو على خمسة انواع		قياسی وهو تسعة	
النوع الاول الحروف الجارة		عامل في المبتداء	عامل في الفعل
وهي عشرون		والخبر	المضارع الخالي
بامن الى عن على لام في كاف		۱ فعل	عن النواصب
حتى رب و او قسم تاء قسم		۲ اسم فاعل	و الجوازم
حاشا منذ منذ خلا عدا لولا		۳ اسم مفعول	
كي لعل		۴ صفت مشبهة	
النوع الثاني ثمانية احرف		۵ اسم تفضيل	۶ مصدر
تنصب الاسم وترفع الخبر		۸ اسم مبهم تام	۷ اسم مضاف
وهي ان ان كان لكن ليت			۹ معنای فعل
لعل لان في الجنس الا في الاستثناء			
المنقطع			
النوع الرابع حروف تنصب			
الفعل المضارع وهي ان لن			
كي اذن			
النوع الثالث حرفان ترفعان			
الاسم و تنصبان الخبر وهما			
ما ولا المشبهتين بليس			
النوع الخامس الجوازم وهي			
لم لما لام امر لاء نهى ان حيثما			
ان اني اذا اذا ما متى مهما			
ما من اي			

اشبو عوامل سماعيه دن كلمه مجازاتك ماعداسی حرفدر و كلمه مجازاتدن (ان) كلمه سی حرفدر باقیسی اسمدر هربری محل مناسبلرنده بیان اولنه جقدر .

درس ۵

(المعمول) (معمول ماوقع علیه اثر العامل) دینہرک تعریف اولنور یعنی معمول برکله درکه عاملک اثری یعنی برواسطه ایله اعرابدن تحصیل ایتدیکی وجه مخصوص اوزرینه واقع اولمشدر معمول صفت اعراب حسیله یعنی اعرابک لفظنده ظاهر ویامقدر اولسی ویامحلنه نسبت ویرلسی جهتله لفظی

تقدیری محلی قسملرینه تقسیم اولندیگی کبی نوع اعراب حسبیلله دخی مرفوع منصوب مجرور مجزوم قسملرینه آریلور .

معمول مرفوع طقوز و معمول منصوب اون اوچ و معمول مجرور ایکی و معمول مجزوم بردانه در و بونلردن بشقه بش دانده معمول بالتبعیه و اردر بونلردن معمول مجزوم و مرفوعاتک طقوزنجیسی نواصب و جوازمدن خالی فعل مضارع و منصوباتک اون اوچنجیسی نواصبدن بریله منصوب فعل مضارع مطلب فعلده و باقیلر مطلب اسمده کله جکدر معمول کیفیت تقسیمی شو صورتله ظاهر در .

المعمول وهو علی قسمین

معمول بالاصالة وهو علی اربعة انواع			
المعمول المرفوع وهو تسعة	المعمول المنصوب وهو ثلثة عشر	المعمول المجرور وهو علی قسمین	المعمول المجزوم وهو واحد وهو
١ فاعل	١ مفعول مطلق	مجرور بحرف الجر	الفعل المضارع ١ صفت
٢ نائب فاعل	٢ مفعول به	مجرور بالاضافه	الداخل علیه ٢ عطف
٣ مبتدا	٣ مفعول فيه	احدى الجوازم بالحروف	٣ بدل
٤ خبر	٤ مفعول له		٤ تأكيد
٥ اسم باب كان	٥ مفعول معه		٥ عطف
٦ حر باب ان	٦ حال		بیان
٧	٧ تمیز		
خبر لانی الجنس	٨ مستثنی		
٨	٩ خبر باب كان		
اسم ما ولا	١٠ اسم باب ان		
المشبهتین بلیس	١١ اسم لانی الجنس	١٢ اسم ما ولا المشبهتین بلیس	
٩	١٣ الفعل المضارع الداخل علیه احدى النواصب		

المضارع الخالی عن النواصب والجوازم

درس ٦

(الاعراب) اعراب (وهو شیء جاء من العامل یختلف به آخر المعرب)
دینه رک تعریف اولنور یعنی اعراب برشیدرکه عاملدن کلمش یعنی برواسطه

ایله آندن حاصل اولمشدر آنکله معرب اولان کله لرك آخری مختلف اولور
اشبو اعراب دخی ذات و محل و نوع و وصفی اعتباریله تقسیمات متداخله
اربعمیه منقسم بولنمشدر .

(ذات اعراب) اون دانه در زیرا اعراب (حرکه) (حرف) (حذف)
اولمقدن خالی دکدر حرکه اوچدر (ضمه) (فتحه) (کسره) حرف
درتدر (واو) (الف) (یا) (نون) حذف اوچدر (حذف حرکه)
(حذف آخر) (حذف نون) مجموعی اون اولور .

(محل اعراب) طقوزدر زیرا محل اعراب (حرکات محض) (حروف
محض) (حرکه مع الحذف) (حرف مع الحذف) ایله اولمقدن خالی دکدر
حرکات محضله اولان اوچدر بری تام الاعراب حرکه ثلثه ایله معرب اسم
مفرد منصرف و جمع مکسر منصرفدر و بری ناقص الاعراب حرکتین ایله
معرب اولوب رفعی ضمه و نصب و جری فتحه ایله درکه غیر منصرفدر و بری
ناقص الاعراب حرکتین ایله معرب اولوب رفعی ضمه و نصب و جری کسره
ایله درکه جمع مؤنث سالمدر .

حروف محضله اولان دخی اوچدر بری تام الاعراب حروف ثلثه ایله معرب
اسماء سته معتلهدر و بری ناقص الاعراب حرفین ایله معرب اولوب رفعی
واو و نصب و جری یا ایله درکه جمع مذکر سالمدر و بری ناقص الاعراب
حرفین ایله معرب اولوب رفعی الف و نصب و جری یا ایله درکه مثنی
و ملحقا تیدر .

حرکه مع الحذفله اولان ایکیدر بریسی آخرینه ضمیر متصل اولیوب آخری
حرف صحیح اولان فعل مضارعدرکه رفعی ضمه و نصبی فتحه و جزمی حذف
حرکه ایلهدر و بریسی آخرینه ضمیر متصل اولیوب آخری حرف عله اولان
فعل مضارعدرکه رفعی ضمه و نصبی فتحه و جزمی حرف اخرینی حذفلهدر .
حرف مع الحذفله اولان بردر آخرینه جمع مؤنث نوننک غیری ضمیر متصل
اولان فعل مضارعدرکه رفعی نونله و نصب و جزمی حذف نون ایلهدر
مجموعی طقوزدر .

(نوع اعراب) درتدر رفع نصب جر جزمدر رفعله نصب اسمله فعل بیننده

مشترك اولوب جر اسمه وجزم فعله مختصدر (صفت اعراب) اوچدر
لفظی تقدیری محیدر تفصیلری محالرنده کلور .

درس ۷

خفی اولیه که بر معنایه وضع اولنان لفظلر ایکیدن خالی دکلدر یا ترکییده واقع
اولور و یا خود ترکییده واقع اولماز ترکییده واقع اولیان اصلا معمول
اوله مدینگی کبی عامل دخی اوله منر بوده اسماء و حر و فدن مثلاً (زید)
(عمرو) (بکر) (هل) (بل) (قد) کبی الفاظ معدوده در ترکییده واقع اولنلر
دخی اوچدن خالی دکلدر یا اصلا معمول اولماز اصلا معمول اولیان ایکیدر بریسی
مطلقاً حرف و بری امر بغیر اللامدر و یا دائماً معمول اولور بودخی ایکیدر
بریسی مطلقاً اسمدر و بری فعل مضارعدر و یا اصل اولان معمول اولماق
ایکن بعض معمول اولنلر موقعنده واقع اوله رقی محالرینه اسناد اعراب
اولنور) بودخی ایکیدر . بریسی فعل ماضیدر که همیشه عامل اولوب هر کن
معمول اولماز فقط ان مصدریه دن صکره و یا بر جازمدن صکره شرط و یا جزا
اوله رقی واقع اولور ایسه شو ایکی محله اولکننده فعل ماضینک محله نصب
و ایکنجیده جزمله حکم اولنور . (و بریسی) جمله درکه کړک اسمیه و کړک
فعلیه اوله اصل اولان معمول اولماقدر فقط تأویل مفرده چیقار یلوب
و یا خود (خبر) و یا (مفعول) و یا (مع الفاء او اذا جواب شرط جازم) و یا
(حال) و یا (اعرابدن محلی اولان بر جمله یه و یا مفرده تابع) یعنی (صفت)
(معطوف) (بدل) (تأکید) (عطف بیان) اولور ایسه شو صورتلرده
معمول قلنور .

اقسام جمله دن اعرابدن محلی اولوب اولیان صورت تردیدده شو وجهله
بیان اولنور که جمله یا تأویل مفرده اولور و یا خود اولماز تأویل
مفرده اولور ایسه هر بر موضعه کندیچون اعراب اولور بوده
یا ، هذا اللفظ ، اعتبار یله لفظی مراد ایتک و یا خود ان مفتوحه مشدده و یا
(ان) و (ماء) مصدر یتین واسطه سیله معنای مصدری مراد اولنقی ایل
اولور . تأویل مفرده اولماز ایسه بوده ایکیدن خالی دکلدر یا معمول
اولور و یا خود اولماز معمول اولسی بش موضعه درکه (خبر) (مفعول)

(مع الفاء اوازا جواب شرط جازم) (حال) (تابع) اولدیغنده در
نته کیم ذکر اولندی . هرکز اعرابدن محلی اولیوب معمول اولیان
یدی جمله در . (جمله ابتدائی) و (صله واقع اولان جمله) و (جمله معترضه)
و (جمله تفسیری) و (جواب قسم) و (جواب غیر جازم) واقع اولان
جمله لر و برده اعرابدن محلی اولیان جمله یه تابع بولنلندر . مقدمه زبده
مزده ایلروده فهمه مدار اولق اوزره مجملأ بوقدر ایله کفایت ایدلدی
متعلمینه ممکن اولدینی درجه تفهیم ایدلملیدر .

المطلب الاول فی الاسم

اشبو مطلب اسمک بیاننده اولوب اسمدن معرب و منی معمول وعامل
معرفه ونکره نی مذکر ومؤنث تشیه وجمع ودیکر فوائد کثیره یی باحث
وشاملدر :

درس ۸

اشبو درسمر تعریف اسمده در . اسم لغتده علو معناسنه اولان سمودن
مأخوذ اوله رق هر نسنه نك علامت ونشاننه وجوهر وعرضدن هر نسنه
ازاسنه وضع اولنان لفظه دینورکه فارسیجه نام وترکیده آد دیرلر اصطلاح
نخاتده کلمه دن بر قسمة دینورکه فعل ایله حرفک مقابلیدر . مسند ومسندالیه
اولوب ویالکیز ایکی اسمدن کلام ترکب ایلمکده اخوینی اولان فعل
و حرفه استعمالی اولمغله اسم دینمشدر . وهر معارضه دن سالم اوله رق تعریفده
(مادل بمادته علی معنی مستقل بالفهم غیر دال بهیئته علی احد الازمنة الثلاثة)
دینامشدر . یعنی اسم بر کلمه درکه ماده سیله فهمده مستقل بر معنایه دلالت
ایدوب هیئتی ایله اوچ زمانک برینه دال دکدر . حرفک معناسی فهمده
مستقل اولیوب فعل ایسه هیئتی ایله اوچ زمانک برینه دال بولندیغندن
شو تعریفدن خارجلدر . (امس) و (غدا) و (الآن) و (صبح)
و (غبوق) کبی ماده سیله زمانه دلالت ایدن اسملر وزمانه دلالت ایتسی
هیئتیه اولیوب بلکه عقل ویاخود غلبه استعمالیه بولنانلر مثلاً اسماء افعال
واسم فاعل واسم مفعول کبی بولنلر حد اسمده داخلدر . اما (عسی)

و (کاد) کبی بحسب الاستعمال زماندن منساخت اولان فعللر هیئتلری فی الاصل زمانه دال بولمغله خارجلردر .

و خفی اولیه که اسمک خواص کثیره سی واردر . باشلیجه سی حرف تعریف و تنوین و حرف جرک دخولی و مبتدا و فاعل و مضاف اولمسیدر . بونلردن بشقه تثنیه و جمع و تصغیر و برنسنه کندینه منسوب اولمق و مفعولیت و ندا و وصف و تائید معنوی اولمق و لحوق تاء تأنیث المتحرکه و مایتفرع علیهادخی اسمک جمله خواصنددر . جهت اختصاص محللرنده معلوم اوله جقدر . اسمک بعضیسی فعله بر مشابعت و یا مناسبتی اوله رق و یا خود کندنده معنای فعل بولنه رق عاملدر . و بعضیسی کندنده فعله بر مقارنت کوریه - میهرک غیر عاملدر .

باب المعرب من الاسم

خفی اولیه که معرب ایله مبنی بحقی مطلب اسمک اجل مباحتندن بولنوب اسم شو ایکی قسمدن خالی دکدر و بوباده علی قدر الطاقه برنجه درسار ترتیب ایدلمش و مقدمجه معربدن بحث هر حالده انسب بولنمش و شو درسمر معربک تعریف و بیاننده قیلنمشدر .

درس ۹

(معرب) لغتده اظهار معناسنه اولان و یا خود همزه سی سلب ایچون اوله رق ازاله فساد معناسنه بولنان اعرابدن اسم مفعولدر اصطلاح نحاطده (هو المركب الذی لم یثبه مبنی الاصل) دینه رک معرفدر یعنی معرب دنیلان بر اسمدر که بر دیگرى ایله عاملی برلکده تحقق ایده جک صورتده ترکیب اولنوب مبنی اصله منع اعرابده مؤثر بر مناسبت ایله مناسب و مشابه اولمامشدر . شو تعریفه کوره معرب ده بالفعل اعرابه استحقاق شرط اولوب هرکز ترکیبده واقع اولمیان ، الف ، با ، تا ، زید ، عمرو ، کبی الفضاظ معدوده و ترکیبده بولنه رق عاملی برلکده تحقق ایتیانلر مثلاً (غلام زید) ترکیبده اولان (غلام) کبی بونلر معربدن خارجلر اولوب مبنیات قیلندن اولوزلر . بالفعل اعرابه حصول استحقاق شرط ایدلمسنندن

بر کله نك معرب اولمسنده بالفعل وجود اعراب لازم اولميوپ عاملی برلکده تحقق ایتکله ترکیبده بولنان کله لره شو حالده معرب اطلاق اولنور مثلاً (ضرب زید) و (عمرو قائم) ترکیبیلرنده زید و عمرو و قائم شویله بر ترکیبده بولندقلری حیثیتله معربلردر. ایشته بو شیخ ابن حاجب حضر- تارینك ذاهب اولدقلریدر که تعریف معربده ترکیبی اخذ ایتمشدر. و لکن صاحب کشف معربده بعدالترکیب اعرابه استحقاقه مجرد صلاحیت اعتبار ایلدیلر بوکا کوره مشابیهت مذکورهدن عاریه اسماء معدوده معرب اولور. پس آنفاً مرور ایدن مثلاً زید و عمرو و قائم ترکیب مزبورلرده بولملری حیثیتی ایله اولمیهرق مجرد بویله بر ترکیبده بولنهرق اعرابه استحقاقه قبل التרכیب دخی صلاحیت ایله متصف اولدقلرندن هر حالده معرب تسمیه اولنورلر.

معرب اولان کله نك حکمی اوزرینه عامل داخل اولدقه آخرنده اعراب حادث اولوب داخل اولان عامللرک عملده اختلافی سببیه آخری حقیقه و یا حکماً اولهرق لفظاً و یا تقدیراً مختلف اولمقدر. اشبو معرب اکر اعراب لفظنده ظاهر اولور ایسه اول اعرابه اعراب لفظی دینلیدیکی کی لفظ معربه دخی معمول لفظی دینور. و اکر آخر لفظده ظهور اعرابه بر مانع اولهرق اعراب تقدیر اولنور. ایسه اول اعرابه اعراب تقدیری و لفظ معربه معمول تقدیری دینور. و اکر مانع اعراب لفظک نفسنده اولور ایسه آتیده بیان اولنهجی اوزره اول لفظه مبنی و معمول محلی و آنک محنده بولنان اعرابه اعراب محلی دینلور. لیکن کسندده اعراب محلی بولنق ایله اول لفظه معرب دینلمیوپ مجرد مقتضی اعراب تحقق ایلوب نفس لفظ ایسه اعرابه مانع بولنخله اکر اول لفظک موقعنده بر لفظ معرب بولنش اولسه اعراب لفظاً و یا تقدیراً تحقق ایلر ایدی دیک اولور. و بو دخی یلنملیدر که اعرابه محل قیلنان مبنی مبنی عارضدر مبنی الاصل اوزرینه معانی مقتضیه للاعرابک عدم تواردندن ایچون محل اعراب دکدر فقط فعل ماضی ایله جمله درس سابعده کوسترلیدیکی اوزره بعض محله مجرد معمول اولنلر موقعنده بولنهرق عارضی اولهرق محللرینه

اسناد اعراب قیلنور معربی لایقیله تفهیم صدندده بولندیغمزدن اعرابك
ذات و محل و نوع و وصفندن بچشمز لازم کلمشدر .

درس ۱۰

(ذات اعراب) مقدمهده کوسترلینکی اوزره اون دانه اولوب اوچی
حرکهدرکه ضمه فتحه کسرهدر (جاءنی زید) و (رأیت زیداً) و (مررت
زید) کبی و اعرابده اصل اولان اعراب بالحرکهدر . و درت دانهسی
حرفدرکه (واو) (الف) (یا) (نون)در (جاءنی ابوه) و (رأیت اباه) و (مر-
رت بابیه) و (یضربان) و (یضربون) و (تضربین) کبی . بونلر اصل
اولیوب فقط بولندقلری کلمهده اعراب و علامت اولمغه صالح اولدقلرندن
اعراب بالحرکهدن استغنا حاصل اولور . و برده فعل مضارعلرده حذفدرکه
حذف حرکه حذف اخر حذف نون قسملرینه منقسمدر (لم یضرب)
(لم یغز) (لم یضربا) کبی . بونلردن حرکه و حرف لفظیه اولورلر مثال
مذکورلرده اولدینگی کبی . و تقدیریه دخی اولورلر (جاءنی عصی) و رأیت
عصی) و (مررت بعصی) (جاءنی ابوالقوم) و (رأیت ابوالقوم) و (مررت
بانی القوم) کبی . و حرکه محلیه دخی اولور (جاءنی احد عشر) و (رأیت
احد عشر) و (مررت باحد عشر) کبی . فقط حرفدن انحق یا حرفی
محلیه اوله بیلور (یازیدان) و (مررت بزیدین) کبی بونلرده زیدان وزیدین
کلملری محلاً (یا) حرفیه منصوبلردر . و حذفدن حذف حرکه و حذف
آخر و حذف نون دخی لفظیه اولورلر ذکر اولنان مثاللرده اولدینگی کبی .
حذف حرکه تقدیریه و محلیه دخی اولور (لم یضرب القوم) و (ان لم یضرب)
کبی اولکننده (لم یضرب) تقدیراً و ایکنجیده (لم یضرب) (ان) ایله محلاً
محزومدر . حذف آخر . ضرورة شعریه لك ماعداسنده تقدیریه اولیوب
فقط محلیه اولور (ان لم یغز) کبی و حذف نون دخی هکذا تقدیریه اوله -
میوب محلیه اوله بیلور (ان لم یضربا) کبی

و خفی اولیه که حروف اعراب تنیه ایله جمعلرده قبل دخول العامل
انحق تنیه ایله جمعه دلالت ایدر حرفلر اولوب بعد دخول العامل معانی
مقتضیه للاعرابه دال و علامت قیلنورلر اما اسماء سته معتله و ملحقات

تثنيه وجمعده قبل دخول العامل بر شينه دال دكلردر آنجق بعد دخول العامل كذا معاني مقتضيه للاعرابه دال و علامت اولورلر بونلر آتیده كله جك درسار مزده واضحاً اكلاشيلور .

(نوع اعراب) بوده مقدمه ده كوسترلديكي اوزره درت دانه دركه (رفع) (نصب) (جر) (جزم) در ذات اعرابدن رفعه علامت اولان درتدركه (ضمه) (واو) (الف) (نون) در (ضمه) اسم و فعلده بولنور (واو) اسمدن جمع مذكر سالمده واسماء ستهده (الف) اسمدن تثنيهده (نون) فعلدن تثنيه وجمع مذكر و مفرد مؤنث مخاطبهده در . و (نصبه علامت اولان) بشدركه فتحه كسره الف يا حذف نون در (فتحه) اسم و فعلده بولنور (كسره) اسمدن جمع مؤنثده در (الف) اسماء ستهده (يا) اسمدن تثنيه وجمع مذكر سالمده در (حذف نون) فعلده در . و (جره علامت اولان) اوچدركه كسره فتحه يا در (كسره) منصرفده (فتحه) غير منصرفده (يا) تثنيه و جمع مذكر سالم واسماء ستهده در . و (علامت جزم) اوچدركه حذف حرکه حذف آخر حذف نوندر .

(محل اعراب) طقوزدركه وجه حصريله آنفاً درس رابعده بيان اولندي بوراده وظيفه مز برقاج درسار ايله محل مزبورلري شرح وايضا حدر .

درس ۱۱

(محل اول) اسم مفرد منصرف وجمع مكسر منصرفدركه اعرابي احوال ثلثهده حرکه ثلثه ايله در (جاءني رجل) ياخود (رجال) (رأيت رجلاً) ياخود (رجلاً) (مررت برجل) ياخود (برجال كبي جمع مكسر ك بيانى كلور مفرد سابقاً بيلندي پس اسم منصرفي بيان ايده لم .

(منصرف) لغتده خالص معناسنه اولان صادق كسريله صرف وياخود تغيير و بريردن بريره تحويل ايلمك وزياده معنارينه بولنان صادق فتحيله صرفدن منفعل اوله رق اصطلاح نحاتده (مادخله الجر والتوين) دينهرك معرفدر يعنى فعله تحقق فرعيتينده بر مشابهي اوليوب كسندينه جر وتوين داخل اولمش اسمه دينور بوده اسم منصرف اسميتده خالص اولمسي وياخود فعله مشابهي اولمامغله فعله اقبالدن كانه رجوع ايتمسي وياخود جر

و تنوینک دخولیله متغیر اولوب و یا غیر منصرف اوزره شو و وجهله زائد
بولمنسی منصرف تسمیه سنه باعث اولمشدر تعریفلرندن مستثنای اوله جنی
اوزره منصرف ایله غیر منصرف اسم معرب بالحركة نك قسملری اولوب
غیر منصرف اقل اولمغله زیرده بیان اولندقدہ ماعداسی منصرف دیمک
اولور .

مبحث غیر المنصرف

(محل ثانی) غیر منصرفدر غیر منصرف اعرابی ناقص اوله رق حرکتین
ایله معربدرکه رفعی ضمه و نصب و جری فتحه ایله در (جاءنی احمد) و
(رأیت احمد) و (مررت باحمد) کبی اصطلاح نجاتده اسم منصرفک
مقابلی اولوب (ما لایدخله الجر والتوین) ایله میندر .

شیخ ابن حاجب رحمه الله کافیه سنده (ما فیہ علتان من تسع او واحدة منهما
تقوم مقامهما) بیورمشلردر یعنی غیر منصرف براسمدرکه آنده منع
جر و تنوینده مؤثر طقوز علتدن ایکی علت و یا تأثیرده ایکی علت مقامنده
قائم بر علت بولمشدر نته کیم ابوسعید الانباری النحوی علل تسع غیر منصرفی
شو اوج بیتله بیان ایلمشدر .

نظم

موانع الصرف تسع کما اجتمعت ثنتان منها فما للصرف تصویب

یعنی بر کلمه نك جر ایله تنوین داخل اولوب منصرف قیلنمسنه مانع
طقوزدر بر کلمه ده هر نه وقت آندن ایکیسی مجتمع اولور و شرائط تأثیریه
بولنور ایسه آنی منصرفلغه صواب کورمک یوقدر و حقیقه منع صرفده
مؤثر علت ایکیسنک اجتماعی و یا ایکیسی مقامنده قائم بر یسنک بولنمسیدر
بر علت ایکی علت مقامنده قائم اولان جمع ایله الف تأنیثدر نته کیم بینانی
کلور پس اول طقوزدن هر برینه علت اطلاق تسمیه الجزء باسم الكل
قیلندن اوله رق مجازدر .

عدل و وصف و تأنیث و معرفة وعجمة ثم جمع ثم ترکیب

اول طقوز علت (عدل) و (وصف) و (تأیث) و (معرفه) و (عجمه)
پس (جمع) پس (ترکیب) در .

والنون زائدة من قبلها الف ووزن الفعل وهذا القول تقرب
ودخی زائد اولیجی اولدیی حالد نوندرکه اولنده الف زائده وازدر دخی
وزن فعلدر ودخی شونظم ایسه حفظه تقرب وتسیدر .

درس ۱۲

(عدل) براسمک معدول اولسی اصل وقاعدنک اقتضا ایلدیکی صورت اصلیه-
سندن مخرج اولسیدرکه ماده باقی قاله رق مجرد صورتده برتغایز بولنور .
وصورت اصلیه اولیه معدول عنه وصورة ثانیه معدول دینور صیغه مصدر
مشتقاتک اصل وقاعدنک اقتضا ایلدیکی کندی صیغهری اولمامغله شوتعریفدن
مشتقات خارج اولمش . واسم معدولک اصل وقاعدنک اقتضا ایلدیکی
صورتدن مخرج اولسی ملتزم اولدیغدن اصل وقاعده تحتند غیرداخل
برصورت کیره جکی متبادر خاطر بولنمغله مغیرات قیاسیه دخی حیقمش .
ومغیرات شاده دخی هرکز صیغ اصلیه دن مخرج اولمامغله خارج بولنمشدر
(زیرا) مثلاً جموع شاده دن اولان (اقوس) (وانیب) قیاسک اقتضا
ایلدیکی اقواس وانیب بدن مخرج اولیوب بلکه قوس وناب خلاف قیاس
اوله رق ابتداءً اقوس وانیب اوزره جمع اولنمشدر واکر اولاقواس
وانیاب اوزره جمع اولنملری اعتبار اولنسه ایدی شذوذ ایل حکم اولنه من
ایدی زیرا اسم مخرج ایچون برقاعده یوقدرکه اکا مخالفتله شذوذ لازم
کله پس شویانمزدن مستبان اوله جنی اوزره معدول اولان اسملر بالجمله
عربدن مسموع اولمشدر وبراسمده عدل اعتبار ایلیمکه اول اسم ایچون
براصل بولنمق واول اصلدن خروجنی اعتبار ایلیمک لازمدر شوتقدیرده
اکر اول اصلک وجودینه منع صرفدن بشقه بر دلیل بولنور ایسه اکاعدل
تحقیقی واکر بولنمزایسه عدل تقدیری دینلور .

(عدل تحقیقی) عربدن مسموع اولمق اوزره برنجیه لفظلرده بولنمشدر
(احاد) و (موحد) (ثناء) و (مثنی) (ثلث) و (مثلث) (رباع) و (مربع)

کبی امام مبرد و کوفیون بوکا قیاس ایدرک یاء نسبتله خماسی و سداسی
دینهرك تساعی به قدر مسموع اولمغه (خماس) و (مخمس) و (سداس)
و (مسدس) و (سباع) و (مسبع) و (ثمان) و (مثمان) و (تساع
ومتسع) یی زیاده ایلدیلر فاضل عصام خماسی و سداسی و اخواتنده نسبتک
(کرسی) لفظنده اولدیغی کبی لفظیه اولمسی محتمل اولمغه بلا یاء النسبة
(خماس) و (مخمس) و اخواتنک عربدن مسموع اولمسنه دلیل اوله من
بیوردیلر . ابن مالک (خماس) و (مخمس) یی دخی سماعه داخل قیلوب
وبعضلر جمله سنک و رودینی تصدیق و (عشار) و (معشر) لفظنی دخی ذکر .
و شاعرك

لم یستر تبوك حتى رمیت فوق الرجال فصلاً عشاراً

قولیه استدلال ایلدیلرکه فاضل جامی دخی بونی تصویب ایلدی بونلرده
اصل معدول عنک وجودینه دلیل هر برینک معناسنده تکرار بولندیغیدر
معنی تکرار ایتدکجه ایسه لفظ دخی تکرار ایللمیدر (جاء فی القوم واحداً
واحداً) قولمزدده اولدیغی کبی پس بیلندیکه (احاد) و (موحد) دن
هر برینک اصلی واحد واحد و (ثناء) و (مثنی) دن هر برینک اصلی
اثنان اثنان و (ثلث) و (مثلث) دن هر برینک اصلی ثلاثة ثلاثة در ترکیه
برر برر و ایکیشر ایکیشر و اوچر اوچر دینلور (عشار) و (معشر) به
واریجه دکن بوقیاس اوزره در . او یله ایسه بونلرک منع صرفنده سبب
عدل و برده وصفیت در زیرا بونلرک اصلارنده اولان وصفیت عارضه
کنیدیلرنده اصلیه اولمشدر اصلارنده وصفیت عارضه بولمسی چونکه مثلاً
ثلاثة اولجه مراتب عدددن برمرتبه معینه به موضوع اولوب ثلاثة ثلاثة دینلرک
ترکیب اولندقدده عارض اولان شو ترکیب سببیه و (ما بالعارض عارض) قاعده سنجه
بروصفیت حاصل و عارض اولمشدر و شو وصفیتک کنیدیلرنده اصلیه اولمسی
ماوضع له لرنده معتبر بولمسننددر و وصفیت معناسنک استعمالاً همیشه
معتبر اولدیغنه ایسه استعمالاً مثلاً جاء فی رجال ثلث دینلوب جاء فی ثلث
رجال دینله مامسی دلیلدیر .

ودخی عدل تحقیقی جموع ـ بدن (آخر) و (جمع) و (کتبع) و (بتع)
و (بصع) کبی (آخر) ضم اول وفتح عینله اولوب آخرنک مؤنثی
اولان آخری نک جمعیدر و بونده (اصل معدول عنہک) وجودینه دلیل
زیرا (آخر) تأخیر جهتیه اشد معناسنه فی الاصل اسم تفضیل اولوب
مؤخرأ غیر معناسنه نقل ایدلمشدر اسم تفضیل ده ایسه لازم و قیاس اولان
محلنده ذکر اولنه جنی اوزره، من، ویا، لام تعریف، ویا، اضافت، ایله استعمال
اولنمقدر (آخر) ایسه بونلردن بریله استعمال اولنمدیغندن بونلرک بریله
مستعمل اولاندن معدول ایدوکی بیلنمشدر. لیکن اختلاف واقع
اولوب بعضیلر من ایله مستعمل اولاندن معدولدر دیدیلر زیرا لام تعریف
منع صرفه ملایم اولیوب و برده لام تعریفله مستعمل اولاندن معدول
اولسه معرفه اولور ایدی حالبوکه حق سبحانه و تعالی نک (فعدة من ایام
آخر) قول شریفنده نکرهیه صفت واقع اولمغله نکره در و اضافتله مستعمل
اولاندن دخی معدول اوله من زیرا اضافت دخی منع صرفه ملایم دکلدر.
و بعضیلر لام تعریفله مستعمل اولاندن معدولدر زیرا من ایله مستعمل
اولانک افرادی واجبدر دیدیلر. فقط اضافتله مستعمل اولاندن معدول
اولسنه کسه قائل اولمادی زیرا اضافت محلنده ذکر اولنه جنی اوزره مضاف
الیهک حذفی تقدیرنده یا مثل محذوفه مضاف اولان (یاتیم تیم عدی) ده
اولدینی کبی تکرر ایدر. و یا خود (بین ذراعی وجهة الاسد) ده اولدینی
کبی مثل محذوفه مضاف اولان محذوفه مضاف اولانه عطف اولوب محذوفه
مضاف اولان حالی اوزره قالور. و شو ایکی صورتدن بری اولمدجه اکر
مضاف جهات ست و حسب و لاغیر کبی غایتلردن دکلسه مضاف الیه محذوف
دن عوض یومئذ و حیثئذ ده اولدینی کبی مضافه بر تنوین و یرلمسنی. و شو
غایتلردن بری ایسه مبنی قیلنمسنی ایجاب ایدر (آخر) ده ایسه بونلردن
بری ملحوظ دکلدر. و کذا (جمع) اجمع نک مؤنثی جمعاء نک جمعیدر اصل
معدول عنہک وجودینه دلیل زیرا افعل فاعلاء موزونلرینک جمعنده قیاس
اولان اکر صفت اولور ایسه ضم اول سکون عینله (فعل) وزنی اوزره

واکر اسم اولور ایسه، فعالی، و، فعلاوات، وزنلرنده جمع اولمقدردن حمراء حمراء
اوزره و، صحراء صحراء و صحراوات اوزره جمع اولندیگی کی (جمع) ایسه شو
وزنلردن برنده اولمامله بونلرک برندن معدول ایدوکی بیلندی و کتبع . بتع .
بصع . بونلر جمع یه تابع اولوب و بوقیاس اوزره درلر بونلرده منع صرفه
سبب عدل و برده وصفیت اصلیه در باب تأکیدده اولان (غلبه اسمیه)
ضرر و یرمز و عندالخلیل سبب منع صرف مثلاً، جمع، جمیعهم تقدیرنده اولمامله
عدل ایله تعریف اضافیدر ظهور اضافتک منع صرفه عدم ملایمتی فرض قیلندن
اولان تقدیر اضافتک عدم ملایمتی مستلزم دکلدر دیدی . و بعضیلر عدل
ایله بلاادات التعریف تعریف و ضمیدر دیدیلر شواختلافدن ایچون ان
حاجب جمع و اخواتی وصفیت ایله تقيید ایلمدی عدل تحقیق بیلندی ایسه
عدل تقدیری یه کله لم .

(عدل تقدیری) وجود اصله منع صرفدن ماعدا کندنده دلیل کورنمیاندرکه
علم اولدقلری حالده (عمر) (زفر) (زخل) (قزح) کی بونلر کلام
عربده غیر منصرف اولوب منع صرفه ایسه بر دلیل بولمادیغندن (عاصر)
(زافر) (زاخا) (قازح) دن معدول اولملری تقدیر اولمشدر بونلرده
علت منع صرف عدل برده علمیتدر و اکر نکره قیلنه رق علمیت زائل
اولور ایسه منع صرفده بر عدل کفایت ایتیه جکندن منصرف اولورلر
(و خفی اولمیه که) اعیان مؤثنه یه علم اولوب فعال وزننده بولنانلردن آخر
حرفی را اولنلری مثلاً حضار بوار طمار کی اکثر بنی تمیم
حرف راده تکرر و ثقات بولمامله بنایه مناسب کوردیلر مجرد علمیت ایله
تأیث ایسه موجب بنا اولمیه جکندن فعال وزننده اولان امرلرک امر
فعلیدن معدول اولسی جهته اکا وزنا مماثل اولدینیگی عدلاً دخی مشابه
اوله رق موجب بناسی اولسون ایچون ذوات الراده عدل اعتبار ایلدیلر
ذوات الرانک ماعداسنده مثلاً (قطام و حضام) کی شو ثقات اولمامله
معرب و غیر منصرف اولسنه ذاهب اولوب فقط ذوات الرأه حملاً بونلرده
دخی عدل اعتبار ایلدیلر بوبابک بیانی ایلروده کلور .

(وصف) اصطلاح نحات و متکلمین ده بعض صفاتیه مأخوذ بر ذات مبهمه یه
یعنی اوصافندن بروصفله اخذ و اعتبار اولئان بر نسنه یه دلالت ایلیان اسمیه
و مصدر اوله رق بروجه محرز بر اسمک دلالت ایلمسنه دینور . شو
دلالتده بحسب الوضع اولور ایسه اول وصفه اصلی واکر بحسب الوضع
اولیوب استعمال حسیله اولور ایسه عارضی دینور . (وصفیت اصلیه)
مثلاً (احرر) کلمه سنده اولدینی کبی که اوصافندن وصف حمرتله اخذ
اولنش بر ذاته دلالت ایلر . منع صرفده معتبر اولان وصفیتله ده مراد
اشبو و صفیت اصلیه در مؤخرأ (غلبه اسمیه) یعنی بحسب اصل الوضع
عام اولوب انواع متعدده یه شامل ایکن مؤخرأ اول انواعدن بر نوعده
استعمالی شایع اوله رقی همان اول نوعه اختصاصی (منع صرفه سببیتنه
خلل ویرمن مثلاً (ارقم) و (اسود) و (ادهم) کبی که (ارقم) فی الاصل
بیاض و سیاهله قاریشق هر بر نسنه یه دینور ایکن مؤخرأ کنندنده بیاض
و سیاه بولئان حیه یه و (اسود) و (ادهم) فی الاصل سواده مقارن هر بر
نسنه یه دینور ایکن مؤخرأ (اسود) سیاه حیه یه و (ادهم) قید یعنی
بوقایه اسم قیلمشدر . احرر وزن فعل و فی الحال و الاصل وصفیت ایله
و (ارقم) و (اسود) و (ادهم) وزن فعل و وصفیت اصلیه ایله غیر
منصرفلر در .

و صفیت عارضیه ده مثلاً (مررت بنسوة اربع) قولزده (اربع) کلمه سنده
اولدینی کبی که فی الاصل مراتب عدددن بر مرتبه معینه یه موضوع اولوب
کنندنده وصفیت یوق ایکن مؤخرأ مثلاً قول مز بورده نسوده اوزره
جاری اولسندن (مررت بنسوة موصوفة بالاربعية) مفادنی اشرا بایدوب
کنندنده عارضی بروصفیت حصوله کلمشدر و صفیت عارضیه ایسه منع صرفه
سبب اوله میه جغندن اربع منصرف بولمشدر . و فی الاصل اوصاف اصلیه
اولدینی مجزوم اولیان اسملر مثلاً نام حیه اولان افعی و شاهین و طغان کبی

قوشه دنیلان اجدل و طائر ذی خیالنه دنیلان اخیل کبی هر نقدر فی الاصل
(افعی) نك خبث معناسنه اولان فعودن واجدلك قوة معناسنه اولان
جدلن واخیلك خالدين اشتقاقی توهم اولمش ایسهده مجرد توهم غیر کافی
اولمغله بونلرك منصرف اولملری اقوی بولمشدرد .

درس ۱۵

(تأنیث) . تأنیثك من حیث ذاته ابحائی کلور * مقصدمز منع صرفه سبب
اولمی جهتیله بحشیدر * (تأنیث) یا الف مقصوره و یا ممدوده ایله در و یا خود
لفظاً و یا (تقدیراً) تا ایله در الف مقصوره و ممدوده ایله اولنلر كرك علم
اولسون و كرك اولسون مطلقاً غیر منصرفدر (حبلی) و (حمراء) کبی سبب منع
صرف تأنیث اولوب و کله یه لزومی علت اخری منزلنده در ایشته بر علت
ایکی علت مقامنده قائم اولاندن بریسی بودر

لفظاً تا ایله اولان تأنیثلرکه (تأنیث لفظی) دینور منع صرفده مؤثر اولمی
علمیت ایله مشروطدر مثلاً (ضاربة) منصرف و (فاطمه) غیر منصرفدر
و تقدیراً تا ایله اولنلرکه (تأنیث معنوی) دینور کذا علمیت ایله مشروط
اولوب فقط بونده علمیت جواز منع صرفه شرطدر (وجوب منع صرف) ده
علمیت ایله بیله اشبو امور ثلثه دن بری بولنمیلدرکه یا وسطی متحرک و یا خود
اوچ حرف اوزره زائد و یا خود عجمه اولمیلدر (سقر) و (زینب) و (ماه)
(وجور) کبی (سقر) وسطی متحرک و (زینب) اوچ حرف اوزره
زائد و (ماه) و (جور) ده عجمه لك اولوب علمیت و تأنیث معنوی ایله غیر
منصرفلردر

ولکن (هند) ده شو اوچدن بری بولنمغله و مجرد علمیت ایسه آنحق
جواز منع صرفی موجب اولمغله منصرف اولمی جائز اولدیغی کبی علمیت
و تأنیث ایله غیر منصرف اولمی دخی جائز کورلمشدر * تأنیث معنوی نك
وجوب تأثیرنده امور ثلثه دن برینك شرط ایدیلمسی امور ثلثهده اولان
ثقلت سببیله علمیت و تأنیثده اولان ثقلته معارض بولنان (خفت) کله دن
بالکلیه زائل اوله رق سببین مزبورینك تأثیرلری قوت بولمق ایچوندرد

و خفی اولیه که اشبو تائیت معنویله مؤنث بولانلر ایله اکر بر مذکر
تسمیه قیلنور ایسه منع صرفه سببیتی کله نك اوج حرفدن زائد اولسیله
مشروطدر تا که حرف رابع تاء تائیت مقامنده قائم اولوب منع صرفی
ایجاب ایلیه * شو تقدیرده اوج حرفلی ومؤنث معنوی اولان (قدم)
برکشی یه اسم قیلنسه منصرف اولور فقط درت حرفلی ومؤنث معنوی
اولان (عقرب) کله سی برکشی یه اسم قیلنسه علمیت وتائیت حکمی ایله
هر حالده غیر منصرفدر . حرف رابع تاء تائیت مقامنده قائم اولسنه قدم
تصغیر اولندقدده (قدیمه) کبی تاء مقدره نك ظاهره چقمسی وعقرب تصغیر
اولندقدده عقرب دینلوب تاء تائیتك ظاهر اولماسی دلیل باهردر

درس ۱۶

(المعرفه) سبب منع صرفدن بریده تعریفدر منع صرفده مؤثر اولسی
انواع تعریفدن عام اولدینی حالده در زیرامضمرات ایله مبهمات آنحق مبنیاندده
بولنور منصرف و غیر منصرف ایسه اقسام معربدنر و تعریف باللام
والاضافه ایسه کله بی منصرف قیلرلر * شو تقدیرده سبب منع صرف
طوغریدن طوغری یه علمیتدر دینلملی ومعرفه لك شرط قیلنملی ایدی
نته کیم بعضیلر بویله قیلمشدر فقط بوراده برعکس کوسترلمسی علمیتك
تسکیره فرعیتدن تعریفك فرع اولسی اظهر اولدیغنددر

(العجمه) عجمه بر لفظك واضعی عربك ماعداسی اولمق یعنی بر لفظ
لسان عربك ماعداسی بولمقددر عجمه نك منع صرفه سبب اولسی
ایکی شرط ایله مشروطدر (شرط اول) عجمیتده علم اولوب و یاخود
عجمیتده اسم جنس ایکن علم قیلنوب عرب به نقل اولمشیدر (ابراهیم)
و (قالون) کبی (ابراهیم) حال عجمیتده علم اولوب و (قالون) لغه رومده
جید معناسنه اسم جنس ایکن حیادت قرائتندن ایچون روات نافعندن
مشهور برذاته علم قیلنوب عرب به نقل اولمشدر (شرط ثانی) یا اوج
حرفدن زائد اولمیدر (ابراهیم) و (قالون) کبی و یاخود اوج حرفلی
اولور ایسه وسطی متحرک اولمیدر بر حصنك نامی اولان (شتر) کبی *

بومذکور ابن حاجب و برکوی حضرت تارینک بیانلر یدر بونلره کوره (نوح) وسطی متحرک اولیوب اوچ حرف اوزره زائد بولنماغله هر حالده منصرفدر « علامه زنجشیری » عجمه یی تأیثه قیاسله تحرك الاوسط وجوباً منع صرف ایلمسنده معتبر اولوب عجمه وسطی ساکن اولغله بیله اعتبار اولنه ییلور پس (هند) کلمه سنک علمیت و تأیث ایله مع سکون الاوسط غیر منصرف اولسی جائز اولدینی کی (نوح) کلمه سنک دخی علمیت و عجمه ایله غیر منصرف اولسی جائزدر دیوب (ماه) و (جور) ده مع سکون الاوسط عجمه نك اعتبار اولندیغنی کوسـتردیـلر . لیکن تأیث امر حقیقی اولوب علامتی دخی واردرکه بعض تصرفاتده ظاهر اولور شو جهتله قـویدر عجمه ایسه امر اضافی اولوب بر علامت ظاهره سی یوقدر شو تقدیرده (هند) کلمه سنده مع سکون الاوسط تأیث معتبر طوتله رق عدم صرفنی تجویز ایلمکله (نوح) کلمه سنده دخی بوکا قیاسله عجمه یی اعتبار و عدم صرفنی تجویز لازم کلز . و (ماه) و (جور) کلمه لرنده مع سکون الاوسط عجمه نك اعتبار اولنسی عجمه خفت سکونه مقاوم اوله رق سببین آخرین اولان علمیت و تأیثی تقویه ایچونددر یوخسه عجمه شوکلمه لرده منع صرفده مستقل بر سبب معتبر دکلددر شو جهتله ذهاب زنجشیری رد اولمشدر .

و ، سیدویه ، عجمه ده شرط معتبر علمیت و برده اوچ حرف اوزره زائد اولمسیددر دیوب وسطی متحرک اولمنی شرط ایلمدی تأیث معنوی ده وسطی متحرک اولمق معتبر اولسی حرکه تأیث مقامنده قائم حرف رابع مقامنده بولنسون ایچونددر عجمه ایچون ایسه بر علامت یوقدرکه برشی دخی آنک مقامنده قائم اوله . پس تحرك الاوسط ایله عجمه یی تقویه واهی اولوب انجق اوچ حرف اوزره زائد بولنسیله تقویه لنور زیرا اکثر کلام عجم طول و امداد اوزره اولوب عریده ایسه اوزان خفیفه مرعات اولنور وسطنده مجرد بر حرکه زیاده ایلمک ایسه طولی موجب اوله مز .

شیخ رضی دخی مذهب سیدویهی ترجیح و اختیار ایلمش وفاضل عصام دخی حاشیه سنده اول جهت مائل بولمشدر و (شتر) نك بقعه اعتبار یله مؤنث اوله رق علمیت و تأیث ایله غیر منصرف اولسنه احتمال

ویرلمشدر و بعض شو آراده اسماء بقاعك تائینی واضعك اعتبار ایلمسنه
 کوره در (بقعه) اعتبار یله مؤنث قیلنه جینی کبی (مکان) اعتبار یله ده مذکر
 ایدیله بیلور پس (شتر) مذکر اعتبار اولندقدده منع صرفنده علمیت
 و عجمه دن ماعداسی ملحوظ اوله منر دینلور ایسه ده فقط حضرت نوح
 علیه السلامك پدرلرینك اسمی اولان فتحین ایله یاخود عضد وزنده
 (ملك) بالاتفاق منصرف اولوب عدم صرفی مسموع دکلدر حالبوکه علمیت
 و عجمه لك دخی بولنمشدر اشته بو لفظ ایله حاشیه امتحانده ینه اعتراض
 اولنوب ذهاب سیبویه صواب کورلمشدر و خفی اولیه که جبرائیل میکائیل
 اسرافیل عزرائیل کبی اسماء ملائکه بالجمله غیر منصرفدر و اسماء انبیای
 عظام دخی کذا غیر منصرف کور یله رك فقط آلتیسی منصرف بولنمشدر
 نته کیم شو نظم ایله کوسترلمشدر .

بیت

کرهمی خواهی که دانی نام هر پیغمبری
 تا کدا مست ای برادر نزد نحوی منصرف

صالح و نوح و محمد باشعیب و هود و لوط
 منصرف دان جمله را باقی همه لاینصرف

درس ۱۷

(جمع) بوراده مراد حرف اول و ثانسی مفتوح و حرف ثالثی الف
 و بعدالالف ایکی حرف متحرك و یا وسطی ساکن اوج حرف بولنان
 جمعلر در که صیغه منتهی المجموع ایله معنونددر (مساجد) و (مصایح) کبی . و وجه
 تسمیه سی بر دهها مغیر صیغه اولان جمع تکسیر ایله جمعی قابل اولدیغندن
 و حتی قابل اولماق اوزره بعض ایکی کره جمع تکسیر ایله جمع اولنوب
 هیئت مزبورده یی بولدیغنددر اکالب و اساور و اناعیم کبی که اکالب کلبك
 جمعی اولان اکلبك و اساور سوارك جمعی اولان اسوردهك و اناعیم نعمك
 جمعی اولان انعامك جمعیدر . اشته منع صرفنده مؤثر اولسی تغییردن مصون

اوله رق جمعیتده قوی و مؤثر بولنسون ایچون صیغه منتهی الجموع اوزره اولوق ایله و برده مفرد اولان (مدانی) و (کراهیت) وزنلرنده اوله رق جمعه قنور کلامک ایچون آخرنده یاء زائده و عندالوقف ها اوقنور تاء تأنیث بولنماق ایله مشروطدر .

و فی الاصل جمع بولنق و یاخود حکماً و یا تقدیراً جمع اعتبار اولنق دخی منع صرفده کافی کورلمشدر شو اجلدن (حضاجر) هر نقدر فی الحال ضبعه علم اولوب جمع دکل ایسه ده فی الاصل عظیم البطن معناسنه اولان حضجرک جمعی اولمغله غیر منصرفدر کانه هر بری عظم بطنده بر جماعت مثابه سننده اولمغله ضبعه حضاجر تسمیه قیلنمشدر . و (سراویل) کله سی بعضیلر عنندنه اسم العجمی اولوب حقیقه نه فی الحال و نه فی الاصل جمع دکل ایسه ده اناعیم و مصابیح کبی جموع عربیه وزننده اولمغله حکماً جمع قیلندن قیلنهرق غیر منصرف قیلنمشدر . و (امام مبرد) سراویل عربی اولوب غیر منصرف کورلمش شو وزنک بلاجمعی غیر منصرف اولسی ایسه خارج قاعده بولنش اولمغله حفظاً للقاعده تقدیراً سروالهنک جمعی قیلهرق غیر منصرفدر دیشدر و بعضیلر فی الاصل جمع اولمغله منصرف قیلنمشلر واسماده اصل اولان ایسه منصرف اولمقدر دیشلردر و (فواعل) وزننده جواروی و دواعی کبی هر بر جمع منقوص واوی و یائی بحسب الصورة قاض لفظی کبی اولوب جائتی جوار و دواع و رأیت جواروی و دواعی و مررت بجوار و بدواع دینور بونلر حالت نصیده مع الجمعیت صیغه منتهی الجموع ایله بالاتفاق غیر منصرف اولوب فقط حالت رفع و جرلرنده اختلاف اولنمشدر بعضیلر اغلال جوهر کلهیه متعلق اولمغله بعد تمام الکلمه احوال کله دن اولان منع صرفدن مقدمدر واسمده اصل اولان صرف اولمغله حالت رفعه مثلاً جوار کله سنک اصلی ضم ، یا ، و تنوینله جواروی و حالت جرده کسریا و تنوینله جواروی اولوب ضمه و کسره ثقلنلرندن ناشی و حرف یا التقاء ساکنین محذورندن ایچون دوشهرک تنوین ماقبلنه ویرلمکله جوار قالمشدر دیدیلر شوصورتده صیغه منتهی الجموع قالمیوب و تنوین صرف دخی بولمغله منصرف اولملرینه ذاهب اولدیلر .

وبعضيلر محذوف مقدر منزلنده اولمغله جمعيت وصيغه منتهى الجموع موجود اولوب تنوين ايسه تنوين صرف ساقط اوله رق ياي محذوفه دن وياخود حركه سندن عوض كتورلمش برتنويندر ديه رك بعد الاعلال غير منصرف اولمارينه ذاهب اولديلر .

وبعضيلر مع الجمعيت صيغه منتهى الجموع علتك موجود اولمسندن منع صرف اعلال اوزره مقدمدر پس حالت جرده مررت بجواري دينور حالت نصبه اولديغي كي (يا) حرفي مفتوح اولوب فتحه ايسه خفيف اولمغله اعلال اولنمز و آنجق حالت رفعده بلاتنوين ضمه ايله جاتى جواري دينور ضمه ثقیل اولمغله اعلال اوله رق ثقلندن ايجون حذف اولنور واندن عوض برتنوين ويريلور پس حرف يالتقاء ساكنين لازمكلايكندن حذف اولنوب وتنوين ماقبلنه ويريله رك جوار قالور ديديلر شو تقدیرده حالت جرو نصبه بلاشك غير منصرف اولديغي كي حالت رفعده دخي تنوين تنوين صرف اولمامغله محذوفده مقدر منزلنده دينلور ايسه ينه غير منصرف اولور .

اشته بر علت ايكي علت مقامنده قائم اولاندن برى دخي اشبو صيغه منتهى الجموعيله معنون جمعدر كه اكالب و اساور كييلرده اولديغي كي حقيقه وياخود مساجد مصابيح كييلرده اولديغي كي حكما كندنده جمع تكرار ايلمشدر .

درس ۱۸

(تركيب) سبب منع صرف اولان فى الاصل ايكي اسمدن وياا كثردن تألف ايتمش و بر كمة واحده قلنمش تركيبدر (منع صرف) كمة واحده نك حالى اولمغله افراد تحقق ايدوب وتغيردن مصون اوله رق قوه تأثير بولمق ايجون فى الحال علم اولمسى شرطدر (بعلبك) كي حرفلرك عدم استقلالندن ايجون جزئيت حرف معتدبه اولمامغله بر جزئى حرف اولمامليدر شو جهته (النجم) و (بصرى) كلهلرى علم قيلنسه لرينه منصرفلردر زيرا هر كز مركب دكل كييلدر بونكه بيله قبل العلميه معرب واحدها آخرده عامل اولماق دخي لازمدر شو جهته (عبدالله) و (تابط شراً) كييلر علم اولدقلى حالده اعراب حكايه ايله محكيان اولوب غير منصرف دكلردر (من زيد) (وان زيداً) كي تركيبلر

دخی علم اولدقلری حالدہ بوقیلنددر زیرا آخر لرندہ اعراب حکایہ بولمغله
 بوکیلردہ منع صرف ظاهر و مفید اولہ من و بردہ عبدالله کیلردہ اضافت
 مضافدہ صرفی اقتضا ایتمکله مضاف الیہدہ ارتق منع صرفی ایجاب ایدہ من زیرا
 فاعل غیر مختار مثلاً بورادہ (اضافت) کبی امرین متضادیندہ مؤثر اولہ من مثلاً
 آتش آنجق حرارتی و صو آنجق برودتی ایجاب ایدہ بیلور * و دخی جزء ثانسی
 (سیبویہ) لفظندہ اولدینی کبی صوت و یاخود (خمسة عشر) و (جاری بیت بیت)
 قوللرمزدہ اولدینی کبی متضمن حرف اولماملیدر زیرا (سیبویہ) لفظی
 کیلر علی رای مبنی و علی رای محکی البنادر و (خمسة عشر) و (جاری بیت بیت)
 کیلردخی علی رای مبنی و اطہلی مرحومک تصریحنہ کورہ علی الاصح محکی
 البنادر در غیر منصرف ایسہ معرب اولدیندن مبنی بولنالر طبعیقلہ خارج
 قالہ جغندن جای بحث دکلدرد و محکی البنا اولنلر تقدیراً معرب عد اولنورلر
 ایسہدہ لکن آنلردہدہ منع صرفک اثری ظاهر اولہ من. (الالف والنون
 الزائدین) سبب منع صرفدن بری دخی الف و نون زائدین در اوزر لرینہ
 تاء تأنیثک دخولی ممتنع اولمقدہ الف تأنیثہ مشابہتری اولمغله مضارعین
 دخی تسمیہ اولنورلر منع صرفہ سببیتلرنندہ بصریون الف تأنیثہ مشابہت
 و مضارعیتی و کوفیون مزیدتین اولوب مزیدک مزید علیہ فرعیتی ارانہ
 ایلدیلر. اشبو الف و نون اکر صفت اولیان اسمدہ اولورلرایسہ زائد
 اولملری لزومنی و یاخود (تا) نک دخولی ممتنع اولہرق الف تأنیثہ مشابہتری
 تحقیق و تأکید ایچون اسم مزبورک علم اولسی لازمدر عمران و مروان
 کبی. و اکر صفتدہ اولورلرایسہ بصریون (فعلاۃ) وزنندہ مؤنثی اولمامسنی
 و کوفیون مؤنثی (فعلی) وزنندہ بولمسنی شرط ایلدیلر شوجہقلہ (رحمن)
 کلمہ سنک نہ (رحمانہ) ونہدہ (رحمی) کبی بر مؤنثی اولمامغله بصریلرہ کورہ غیر
 منصرف کوفیلرہ کورہ منصرف اولمشدر و (سکران) کلمہ سنک مؤنثی سکری
 اولوب سکرانہ اولمامغله بالاتفاق غیر منصرف و (ندمان) کلمہ سندن ندیمدن
 مأخوذ اولدینی حالدہ مؤنثی ندمانہ اولوب ندمی اولمامغله بالاتفاق منصرف
 اولمشدر اما نادمدن مأخوذ اولدینی حالدہ مؤنثی ندمی اولوب ندمانہ
 اولمامغله سکران کبی بالاتفاق غیر منصرفدر.

(وزن الفعل) بر اسمك اوزان فعلدن عد اولنور برون اوزره بولنمسيركه منع صرفه سببیتنده احد الامرین لازمدره اولکسی یا فعله مختص اولوب اسماء عربیه ده فعلدن منقول اوله رق بولنمیدر (شمر) کبی که تشمیردن مأخوذ فعل اولوب مؤخرأ حجاج ظالمک بر فرسنه علم قلنمشدره وبر صویه علم اولان (بذر) وبر موضعه علم اولان (عثر) وبر رجله علم اولان (خضم) کبی بونلرک جمله سی عربیتده فعل ایکن اسمیه نقل اولنمشدره اما شتر سقر بقم شلم اسماء عجمیه دن بولنه رق عربیته نقل اولنمشدر . آنجق منع صرفلرنده علمیت ایله عجمه ویا تأنیث اعتبار اولنوب وزن فعل معتبر اولماز ثلاثیدن فعل ماضی بناء معلوم هیئتنده مثلاً شجر حجر مدر کبی فعل وزننده بولنان اسملر اولدیغندن شوو وزننده وزن فعل معتبر دکدر . رباعی مجرد و ملحقاتی اوزان معلومه لرنده دخی مثلاً جعفر جوهر کبی اسملر اولمغله بو هیئتده بولنان اسملرده دخی وزن فعل اعتبار اولنمز . اما فعل ماضی بناء مجهول هیئتنده بولنان اسملرده شو وزن آنجق فعله مخصوص اولدیغندن اسماء عربیه ده آنجق فعلدن منقول اوله رق بولنه یلوب وزن فعل اعتبار اولنور وثلاثی مزیددن معلوم ویا مجهول فعل ماضی وزنلرنده اولان اسملرده شو وزنلر دخی آنجق فعله مختص اولدیغندن وزن فعل اعتبار اولنور فافهم . ایکنجیسی ویا خود فعله مختص دکسه ده اولنده حروف اتین دن بر حرف بولنوب و منع صرفه داعی اولان اعتباره قیاس ایله ده اخری ، تاء ، یه قابل اولما لیدر . زیرا تاء تأنیث اسم مختص اولمغله اسمی وزن فعلدن اخراج ایدر . شو جهتله احمر بالاتفاق غیر منصرف بولنمشدر . واما (یعمل) کله سی ناقه قویه یه (یعمله) وارد اولمغله تاه قابل اولوب منصرف بولنمشدر . اما (یعمله) لفظی وزن فعلیه اولیه رق علمیت و تأنیث ایله غیر منصرفدر . وانفا (منع صرفه داعی اولان اعتباره قیاس ایله) تاه (قابل اولماملی) دیکلکمز زیرا اسود غیر منصرف اولدینی کبی حیة اثی یه دنیلان اسوده دخی غیر منصرفدر . زیرا (تا) نك دخولی منع صرفه داعی اولان وصفیت

اصلیه اعتباریله اولمیوب بلکه عارض اولان غلبه اسمیه اعتباریله در وقس علیه

درس ۲۰

معلوم اوله که علمیت علل منع صرفدن دردنده شرط تأثیردرکه آنلر لفظاً ویا معنأ تأنث بالتاء وعجمه و ترکیب و غیر صفت اسمده بولن ان الف ونون زائدین در . وایکسمنده شرط تأثیر اولمیوب مستقل سبب مؤثردرکه آنلر عدل ایله وزن فعلدر . بونلرک ماعداسنده الف تأنث ایله صیغه منتهی الجموعدن هربری ایکی علت مقامنده قائم اولوب منع صرفده کافی اولمغله علمیتک بر تأثیری اولمیوب و احتیاج دخی یوقدر و (علمیت ایله وصفیت وضع علمیت مفید خصوص و وضع وصف مفید عموم ایدو کندن متضادینلر اولوب بریرده مجتمع اوله مزلر .

بونک کبی عدلیله وزن فعل بیننده دخی ضدیت اولوب بریرده اجتماعلری محالدر . زیرا اسماء معدوله بالاستقراء اوزان مخصوصه اوزره کلوب اول وزنلردن بریسی ایسه منع صرفده معتبر اوزان فعلدن دکلدر . مفازه یه علم اولان کسرتین ایله (اصمت) فی الاصل امر اولمغله اوزان فعلدن اولوب وضمت یصمت دن یعنی باب اولدن امر حاضر ضمتین ایله اولمق قیاس بولنمغله او ایله ایسه ضمتین ایله اولان (اصمت) دن معدولدر پس عدلیله وزن فعل مجتمع اولمشدر دیواعتراض ایلمک واهیدر . زیرا کسرتین ایله (اصمت) دخی هر نقدر غیر مشتهر ایسه ده وارد اولمغله عدل تحقق ایلمز .

اشبو بسطمز بیلندی ایسه خفی اولیه که علمیت کندنده شرط تأثیر ویا سبب بولن ان بر غیر منصرف او اسمیه مسمی اولنلردن بر فرد اعتبار اولمق تاویلنه نکره قیلنسه علمیت زائل اولوب علمیت کندنده شرط تأثیر اولاندن ایسه بلا سبب مؤثر قاله جغندن و علمیت کندنده سبب اولاندن ایسه بر سبب واحد ایله بولنه جغندن منصرف اولور . مثلاً قانون کله سی که عجمه و علمیت ایله غیر منصرفدر نکره قیلنه رق علمیت زائل اولسه علمیت عجمه ده شرط تأثیر اولمغله عجمه لکک دخی بر سببیتی قالمیوب بلا سبب قالور و منصرف اولور و مثلاً احمد که وزن فعل و علمیت ایله غیر منصرفدر نکره قیلنه رق علمیت زائل اولسه علمیت

شرط تأثیر اولیوب بلکه سبب مستقل ایدوکنندن برون فعل قالب بوده
یا لکنز منع صرفی ایجاب ایده مامکه کلمینه منصرف اولور شو جهتله بر لطیفه
درکه احمد نام بر کیمسه بر عورتک خانه سینه کیرد کده عورت آکا (انصرف)
دیر اول کیمسه (انا احمد واحد لاینصرف) دیدکده عورت تفرس ایدوب
(اذا کان معرفة) دیر فافهم

واکر کنندنده وصفیت بولنان مثلاً احمر و سکران کیلر علم قیلنسه لر
علمیت ایله وصفیت اصلیه زائل اوله رق شو تقدیرده منع صرف لر نده احمر
کله سنده علمیت و وزن فعل و سکران ده علمیت والف نون زائدتین
اعتبار اولنور واکر شو صروده علمیت دخی نکره قیلنملریله زائل اولسه
وصفیت اصلیه ضدی اولان علمیتک زائل اولسیله عودت ایدرمی و یا خود
ایتمزمی سیبویه ایله اخفش بیننده مخالف حاصل اولدی (اخفش)
اسمده اصل اولان صرف اولمغله وصفیت زائله بی اعتباره بر باعث
اولیوب عودت ایتمز و کله منصرف اولور دیدی (سیبویه) وصفیت
اصلیه بی اعتباره علمیت مانع اوئش ایدی مانع زائل اولدقده وصفیت
اصلیه ینه معتبر اولوب کله غیر منصرف اولور دیدی نته کیم شونظمیه
بیلدیر یلمشدر .

چونکه سن بیلدک ایا صاحب پیشه	سیبویه اولدی مخالف اخفشه
دیرکه اخفش السقوط لایعود	سیبویه دیر ضدی رفع اولسه یعود
اخفش کدر حق النده بی خلاف	سیبویه اولدی پس حمل خلاف

درس ۲۱

برکله غیر منصرف اولدقده بونک حکمی اول کله یه کسر و تنوین داخل
اولما مقدر زیرا علل تسع مزبوره دن هربری بر فرعیت ایله متصفدر
(عدل) معدول عنک و (وصف) موصوفک و (تأنیث) تذکیرک
و (تعریف) تنکیرک و (جمع) واحداک و (ترکیب) افرادک و (الف
و نون زائدتین) مزید علیک و (وزن فعل) اسمک فرعیدر . پس
کله ده ایکی علت و یا ایکی علت مقامنده قائم بر علت بولنور اینسه ایکی

فرعیت بولنش اوله رق فعله مشابه اولور . زیرا فعل دخی فاعله افتقاری
ومصدر دن اشتقاقی جهته ایکی فرعیتی حائزدر . کسر وتنوین ایسه
اسمک ملایمی اولوب فعلدن ممنوع اولمغله غیر منصرف بولنان کلمه دن دخی
تحقق فرعیتین ده فعله بکزه مکله منع اولنور . لکن اشعارده ضرورت و وزن
شعر و یا خود قافیه به رعایتدن ایچون بعض منصرف حکمنده قیلنوب جر
وتنوین داخل اولور .

نته کیم حضرت فاطمة الزهرا رضی الله تعالی عنها والده من افند من حضرت تلرینک
حضرت پیغمبر علیه من الصلوات ما هو الاوفر افند من حضرت تلرینک
رحلتلرنده تربة پرانورلری اوزره بیوردقلری .

ماذا على من شم تربة احمد ان لايشم مدى الزمان غواليا
صبت على مصائب لوانها صبت على الايام صرن لياليا

نظم شریفلرنده مصائب قولنده اولدینی کبی که ضرورت شعر یه دن ایچون
منوئاً قرائت اولنوب منصرف حکمنده اولمشدر واکر بالاتنوین اوقونسه
متفاعان وزنی نا کامل قالب وزنه خلل طاری اولور ایدی و امام اعظم
حضرت تلرینک مدحنده شاعرك انشاد ایلدیکی .

اعد ذکر نعمان لنا ان ذكره هو المسك ما كررته يتضوع

شعر نده نعمان قولنده اولدینی کبی که ضرورت شعر یه دن ایچون جروتنوین
ایله اوقنوب منصرف حکمنده اولمشدر واکر بالاتنوین فتحیله اوقونسه
وزنده زحاف واقع اولوب شعر سلاستدن خروج ایدرایدی ونته کیم
عليه الصلوة والسلام افند منك مدحنده انشاد اولنان شاعرك

سلام على خير الانام وسیدی حبيب اله العالمين محمد
بشير نذير هاشمي مکرم عطوف رؤف من یسمى باحمد

شعرنده باحد قولنده اولدینی کبی که قافیه رعایت ضرورتندن ایچون
احمد قولی کسرله مجرور اوقنوب منصرف حکمنده قلنمشدر .

علیه الصلوة والسلام افندمک مرثیه سنده بیوریلان شعر اولک مفادی
نبی ذیشانک تربه شریفه لرینی شم ایلیان کیمسه یه آرتق زمان نهایت بولنجیه
دکین دیکر خوشبو نسنه لری شم ایلمسه نه واردر حضرت نبی ذیشانک
فراقی سببیه اوزریمه برطابق مصیبتلر دوکلدیکه اکر اول مصیبتلر کوندزلر
اوزره دوکسه ایدی قرانلق کیجه لر اولورلر ایدی دیمکدر . و امام اعظم
حضرتلرینک مدحنده اولان شعر ثانیکن مفادی حضرت نعمان ابن
ثابتک ذکرینی بزه اعاده وتکرار ایله زیرا آنک ذکر ی مسک کیدرکه
سن آنی تکرار ایلدیجه رایحه طبیعییه سی اطرافه منتشر اولور دیمکدر .
وعلیه الصلوة والسلام افندمک مدحنده اولان شعر ثالثک مفادی خلاق
عالمک اخیبی اولان ناسک اک خیرلیسی و بنم سید و ناصر م اوزره سلام
اولسونکه اول حضرت محمددر و احمد اسمیه مسمی اولان اول مفخر
کائنات بشیر و نذیر و هاشمی و مکرم و عطوف و رؤفدر دیمکدر . و بیلملیدرکه
بعض غیر منصرف ولی ایلدیکی بر منصرفه مناسبتدن ایچون دخی منصرف
حکمنده قیلنه بیلور (سلاسل و اغلال) قول شریفنده اولدینی کبی که
منصرف اولان (اغلال) کلمه سینه مناسبتدن ایچون غیر منصرف اولان
(سلاسل) کلمه سی اوزره تنوین ادخال اولنه رق اوقونمشدر .

(و خفی اولیه که) جمیع باب غیر منصرف لام تعریفک دخولی و یاخود
برغیری یه اضافتیه کسره ایله مجرور قیلنور لکن شو حالده کله منصرفی
اولور و یاخود کالاول غیر منصرفی دینور اختلاف اولنمشدر . ابن حاجب .
غیر منصرفده آنحق ایکی علتک و یا ایکی علت مقامنده قائم بر علتک
بولمنسی کوستر مکله شو تعریفه کوره مع اللام و الاضافه ایکی علت باقی
قالدجه کله حالا غیر منصرف و اکر ایکسی بردن و یا بریسی زائل اولور
ایسه منصرف اولور چونکه (علمیت) الف لام و اضافتله زائل اوله جغندن
(علمیت) کنندده شرط تأثیر بولنلر بلا سبب مؤثر قالدرق و علمیت
کنندده سبب مستقل اولانلر سبب واحد ایله بولنه رق منصرف اولور

و علمیت کنندنده نه شرط تأثیر ونه سبب مؤثر بولنانلر ایسه مخذوردن سالم
قالورکه کنندنده ایکی علت حالا اعتبار اولنه رق غیر منصرف اولور اشته
بعضیلر بوسایاق اوزره ذاهب اولمشلردر و بعضیلر الف لام و اضافت
خواص اسم دن اولمغله بر غیر منصرفده بولندقدده فعله مشابهتی ضعف
بولوب مطلقا منصرف اولور دیدیلر . و بعضیلر ، غیر منصرفدن بالاصاله
ممنوع اولان تنوین اولوب سقوط کسره تنوینه تبعیتله در .

الف لام و یا اضافتله فعله مشابهت ضعف بولدقدده ایسه اشبو ضعفیت آنحق
سقوط تنوین ده مؤثر اوله بیلوب تابعی بولنان کسره یی اسقاط ایده من
شو حالده کسره حالی اوزره عودت ایدر و شو تقدیرده سقوط تنوین ایله
کله مطلقا غیر منصرفدر دیدیلر نته کیم دینمشدر .

نظم

کر الف لام و اضافت کلسه غیر منصرف
بعضیلر دیر علتین طور دقجه اولمز منصرف

بعضیلر دیر منصرفدر فعله شبهی اولدی کم
بعض پس تنوین آنحق دوشدی دیر منعی اهم

درس ۲۲

(محل ثالث) محل اعرابدن اوچنجیسی جمع مؤنث سالمدرکه اعرابی
ناقص حرکتین ایله معرب رفعی ضمه و نصب و جری کسره ایله در جمع
مذکر سالمده نصب جره تابع اولوب جمع مؤنث سالم ایسه جمع مذکر
فرعی اولمغله بونده دخی نصب جره تابع قلمشدر جائی مسلمات و رأیت
مسلمات و مررت بمسلمات کی جرو تنوینه قابل بولندیغندن جمع مؤنث
سالم دخی منصرف قسمندندر اعرابده ناقص بولمنسی آریجه ذکرینه باعث
اولمشدر (محل رابع) اسماء سته درکه اعرابی تام احوال ثلثده حروف
ثلثه ایله معرب رفعی و او نصی الف جری یا ایله در جائی ابوک رأیت اباک
مررت بابیک کی اسماء سته دینلان (ابوک) (اخوک) (حموک) (هنوک)

(فوك) (ذو مال) در اولكى درت دانه منقوصات و او به در وفوك اجوف و اوى اولوب اصلى فو هدر و ذولفیف مقرون اولوب اصلى ذو و در و الحاق اسم جنسه مضاف اوله جغندن اسم مظهره مضاف اوله رق كوسترلدى و ديكر لر كافه مضاف اوله رق ككتور ملك مجرد تمثيل اچوندر و بيلمليدر كه حم جانب زوجدن قريپ مرأيه دينور شو جهتله هميشه مؤنثه مضاف اولور . بونلرك اعراب بالحر و فله مغرب اولملرى مكبره و مو حده اولوب ياء متكلمك غيرينه مضاف اولدقلرنده در . زيرا مصغر اولدقلرنده اعرابلى احوال ثلثه ده حركه ثلثه ايله در . و ثنيه و جمع اولدقلرنده ايسه ثنيه و جمع اعرابلى له مغربلدر . و ياء متكلمه مضاف اولدقلرنده ايسه اعرابلى تقديريدر . و هر كز مضاف اولدقلرنده ينه حركه ثلثه ايله مغربلدر . اشبو اسماء سته مزبوره نك اعرابى حروفله اولملى ثنيه ايله جمع مذكر سالمك اعرابى حروفله قلنديغى و هر برينك اعرابى اوچ بولنديغى حسييله آحاد ايله بيلرنده و حشت و منافرت اولسون اچون هر برينك اعراب ثلثه لرى مقابله آحاددن اوچ اسم بوله رق اعرابى حروفله قلنمق استلشمشدر اشبو اسماء سته دن هر برى ايسه بر ذات آخرى مقتضى مثلاً اخ براخى و اب برولدى و حم بر زوجى و هن بر شئ منكر مستهجن الذكرى و ذو بر اسم جنسى و فم شفيتى مستلزم اولمغله يعنى معنالى تعددى مبنى و مشعر بولمغله ثنيه به مشابهتلى بولنوب و با خصوص آخر لرى ايسه عند الاضافه سماعاً ثابت و عند الافراد محذوف بولنديغندن زائده شبيه و ثنيه ايله جمع ده اولديغى كې اعراب قيلنمغه صالح اولديغندن پس اشبو اسماء سته اختيار و تعيين اولنمشدر و اما يد و دم كې اسماء محذوفه الاعجازك عند الاعراب حروف محذوفه لرى اعاده اولنمق مسموع اولمغله اسماء سته به قياس اولنه ميوب بولنديقلرى حال اوزره اعرابلى حركه ثلثه ايله در .

درس ۲۳

(محل خامس) جمع مذكر سالمدر كه اعرابى ناقص حرفين ايله مغرب اولوب

رفعی واو و نصب و جری یا ایله در جائی مسلمون و رأیت مسلمین و مررت بمسلمین کبی و (ذو) نك من غیر لفظه جمعی اولان (اولو) و دخی عشرون و ثلثون تسعین به وارانہ دکن جمع مذکر سالمه ملحقدر (جائی اولو مال و عشرون رجلاً) و (رأیت اولی مال و عشرین رجلاً) و (مررت باولی مال و بعشرین رجلاً) کبی .

(محل سادس) اسم مثنی درکه اعرابی ناقص حرفین ایله معرب اولوب رفعی الف و نصب و جری یا ایله در جائی مسلمان و رأیت مسلمین و مررت بمسلمین کبی . و (اثنان) و (اثنان) هر نقدر مفرد ایسه لرده صورتلری صورت تنثیه و معنای تنثیه بولند یغندن تنثیه به ملحقدر (جائی اثنان) و (رأیت اثنین) و (مررت باثنین) کبی . و (کلا) و (کلتا) لفظاً مفرد و معنأً تنثیه بولند قلرندن هرایکی جانبه رعایت اولمق ایچون (اصل اولان مظهره) مضاف اولد قلرنده اصل بولنان لفظ جانی اعتبار اولنور و اعرابده حرکه اصل اولمغله احوال ثلثه ده حرکه ایله معرب اولور لر فقط آخر لرنده الف بولمغله اعرابلری تقدیری اولور . و (فرع مظهر اولان مضمرة) مضاف اولد قلرنده فرع بولنان معنا جانی اعتبار اولنور و اعراب بالحروف اعراب بالحرکه نك فرعی اولمغله شو تقدیرده مثنی به ملحق اوله رق اعرابلری حرفله اولور . (جائی کلاها) و (رأیت کلیمها) و (مررت بکلیمها) کبی (تنثیه) و (جمع و ملحقاً تکرینک اعرابی حروفله اولمسی) تنثیه ایله جمع واحدك فرعی اولوب و اعراب بالحروف ایسه اعراب بالحرکه نك فرعی اولمغله فرعه فرع مناسب کورلمش و باخصوص آخر لرنده اعرابه صالح علامت تنثیه و جمع بولمغله پس اوعلامت بولنان حرفلر اعراب قلنمشددر . و حروف اعراب انحق اوج اولوب تنثیه ایله جمعدن هر بری ایسه اوچر اعراب استمکله ایکیمسه دخی اول حروف ثلثه ویرلسه التباس لازم کله چکنندن ویرینه ویریلسه دیکری اغرابسز قاله جغندن پس ینلرنده توزیع اولنوب فمللارک تنثیه لرنده الف ضمیر مرفوع بولند یغندن اسم مثنی به علامت رفع (الف) و فعللارک جمعلرنده واو ضمیر مرفوع ایدو کندن اسم مجموعه دخی علامت رفع (واو) تعیین اولنمشددر و حالت نصب و جرده اعرابلری یا ایله قیلنوب فقط یانک ما قبلی تنثیه ده مقتضوح

و جمعه مکسور قلغمغه فرق ایدلمشدر بو ایسه (خفت فتحه و کثرت تشیه)
 و (ثقلت کسره و قلت جمع) جهته باقلد قده برعدالت بولنشدر .
 و تشیه ایله جمعه نصبك جره تابع بولنوب رفعه حمل اولنماسی علامت فضله
 بولنمقده جره مناسبتندن ایلر و کلمشدر نته کیم غیر منصرفده دخی جرك
 نصبه حمل اولنوب رفعه حمل اولنماسی شو جهته ایلر و کلمشدر .

درس ٢٤

(محل سابع) آخرینه ضمیر مرفوع متصل اولیوب آخری حرف صـحیح
 بولنان فعل مضارعدرکه اعرابی نام اولوب رفعی ضمه و نصبی فتحه و جزمی
 حذف حرکه ایله در یضرب ولن یضرب ولم یضرب کی آخرینه ضمیر مرفوع
 متصل اولماق ایله تقییدایتمکلیکمز زیرا آخرینه ضمیر منصوب متصل اولمغه
 شو حکمدن خارج اولماز .

(محل ثامن) آخرینه ضمیر مرفوع متصل اولیوب آخری حرف عله
 بولنان فعل مضارعدرکه رفعی تقدیراً (ضمه) و نصبی . آخری الف اولدقجه
 لفظاً و الف اولدقجه تقدیراً (فتحه) و جزمی مطلقاً (حذف آخر) ایله در
 یغزو . یرمی . یخشی . ولن یغزو . لن یرمی . لن یخشی . ولم یغزو .
 لم یرم . لم یخش . کی .

(محل تاسع) آخرینه جمع مؤنث نونك غیری ضمیر متصل اولان فعل
 مضارعدر (جمع مؤنث نونك غیری اولان ضمیر) تشیهده (الف) و جمع مذکرده
 (واو) و واحده مخاطبهده (یا) در بونك اعرابی آتجق ناقص اولوب رفعی (نون)
 و نصب و جزمی (حذف نون) ایله در یضربان ولن یضربا ولم یضربا کی جمع مؤنث
 نونك غیریله تقییدمزه باعث زیرا آخرینه جمع مؤنث نونی متصل اولان
 آخرینه نون تأکید داخل اولمش کله کی مبنی در . و رفعی (نون) ایله اولمسی زیرا
 ضمیر مرفوعك فعله شدت اتصالندن ایچون (جزء) کی بولندیغندن اعرابی
 اندنصرکه به براقشدر . و برده حرف عله یعنی ضمیر مرفوع متصل اولان ذکر
 اولنان (الف) (واو) (یا) نك ایسه وضعلری سکون او زره اولمغه حرکه به غیر متحمل

اولدیغندن پس حالت رفعده اعرابی نون ایله قلمشدر و جزمی حذف نون ایله قلمش و نصبی دخی جزمه حمل اولنوب حذف نون ایله بولنشدر. زیرا فعلده جزم اسمده جر مثابه سنده اولوب نصبك ایسه علامت فضله اولمقدہ جرہ مناسبتی واردر شو اوج محلدن مطلب فعلده دخی بحث اولنور.

درس ۲۵

(مبحث وصف اعراب) تقسیمات اربعه اعرابدن بریسی دخی صفت اعراب حسیهله تقسیم در صفت اعراب مقدمهده کوسترلدیکی اوزره اوچدر لفظی تقدیری محیدر.

اعراب لفظی لفظ معربك آخرنده عدم مانعدن ایچون ظاهر بولنان اعرابدر. تقدیری ایله محلی بیلندکده ماعداسی لفظی اوله جغندن بوراده تقدیری ایله محلیدن بحث ایتلیر.

(مبحث اعراب تقدیری)

اعراب تقدیری اعراب لفظی كي آنجق معرب اصطلاحیده بولنورکه (مالا يظهر فی اللفظ بل یقدر فی آخره لماع فیہ غیرالاعراب الحقیقی) دینمکه تعریف اولنور. یعنی ظهور اعرابه لفظ معربك آخرنده اعراب حقیقیك غیر برمانع بولندیغندن اعراب ظاهر اوله میوب بلکه آخرنده تقدیر اولنان اعرابدر دیمکدر.

واما بر لفظ معربك آخرنده (اعراب حقیقی) اولور ایسه لفظ معرب مزبورك اعرابی محلی اولور (مررت بزید) قولمزده (زید)ك اعرابی کبی که محل قرینی حقیقه (با) ایله مجرور اولمغله مفعولیتك اقتضا ایلدیکی نصب لفظنده اظهار و تقدیر قلنه میوب آنجق محل بعیدی محلا منصوب مررت فعلنك مفعول به غیر صریحیدر دنیلور.

اعراب تقدیری برکوی حضر تکرینك بیان ایلدیکی اوزره یدی موضعهدر.

(موضع اول) آخرنده الف بولنان هر بر لفظ مفرد معربدر . الف مزبور هر نقدر التقاء ساکنین دن ایچون حذف اولنسه دخیینه (اعراب) تقدیریدر فقط لفظ مزبور اسم ایسه الف قابل حرکه اولمامغله احوال ثلثهده تقدیریدر جائی العصا وعصا . رأیت العصا وعصا . مررت بالعصا وبعصا . کبی واکر فعل اولور ایسه رفع ونصب حالنده الف بولندیغندن تقدیریدر وخال جزمده (حذف الف) ایله لفظیدر زید یحشی الله ولن یحشی الناس ولم یحش کبی .

درس ۲۶

(موضع ثانی) تنهیه نك غیری یاء متکلمه مضاف اولان اسم معربدرکه هر نقدر بعدالاضافه اکتفاءً بالكسره (یاء متکلم) حذف اولنسه ویاخود الفه منقلب بولنسه دخیینه تقدیریدر (یاغلامی) و(یاغلام) و(یاغلاما) کبی واما (اسم مثنی) یاء متکلمه مضاف اولسه حرف اعراب موجوداولغله هر حالده اعرابی لفظی اولور (جائنی مسلمای) و(رأیت مسلمی) و(مررت بمسلمی) کبی . اسم مزبور اکر (جمع مذکر سالم) ایسه انحق حالت رفعده وای یایه قلب وادغام لازم کلوب علامت رفع اولان واولمامغله اعرابی تقدیری اولور (جائنی مسلمی) کبی که اصلی (مسلموی) در واما حالت نصب وجرده علامت نصب وجر بولنان (یا) حرفی موجود اولوب فقط یاء متکلمه مدغم بولمغله لفظیدر (رأیت مسلمی) و (مررت بمسلمی) کبی . واکر جمع مذکر سالمک غیری اولورسه کړ (مفرد) ویا (جمع مکسر) ویا (جمع مؤنث سالم) اولسون اعرابلری احوال ثلثهده تقدیریدر غلامی ورجالی ومسلماتی کبی . زیرا یاء متکلمه مضاف اولمغله (ماقبل یاء متکلم) ده مثال مزبورلرده اولدینی کبی کسر . واکر آخر کله الف ایسه (عصای) ده اولدینی کبی ماقبل یاء متکلمده سکون . واکر یاء متکلم الفه منقلب بولنور ایسه (غلاما) ده اولدینی کبی ماقبلنده فتح واجب ولامدر . پس بعدالعامل حرکه اعراییه دخی ظاهر قلنسه (صورت کسرده) حالت جرده مثیلین . و حالت رفع ونصبده ضدین ایکی حرکه نك و (صورت فتح) ده حالت نصبده مثیلین . و حالت رفع وجرده ضدین ایکی حرکه نك و (صورت سکونده) هر حالده حرکه ایله

سكونك مجتمع اولسى لازم كلور ایدی . بوايسه محال و متعذر در « سید شریف » بعد العامل صورت کسر حالت جرده کسره بی و صورت فتح حالت نصبه فتح بی اعراب قلمق ممکندر نته کیم تشیه ایله جمعه قبل العامل ثابت بولنان حرفلر قابلیتندن ایچون بعد العامل اعراب قلمشدر دیو ذاهب اولمش ایسه ده تشیه ایله جمعه حروف مزبوره تبدل عامل حسبیه تبدل اولوب اشبو کسره و فتحه ایسه هر حاله تبدل اولماغله قبول اولنماشدر و « جمهور » (یاء متکلمه مضاف اولانلر) (یاء متکلم) تلفظده غیر مستقل اولسی حسبیه یاء متکلمدن اکتساب بنا ایدر دیو مبنی اولمزینه ذاهب اولدیلر ایسه ده ابن حاجب ضمیره اضافت بنایی موجب اوله مز نته کیم غلامنا و غلامك و غلامه قوللر مزده غلام معربدر دیو تضعیف ایلمشدر .

درس ۲۷

(موضع ثالث) آخرنده اعراب محکی بولنان اسم معرب بالحركة او الحرف درکه اولا آخرنده بر عاملدن بر اعراب بولنه رق بعده آندن حکایه ایدیلدکه عواملك و رودیله آخرنده اعراب ظاهر اولیوب اولکی اعراب ایله حکایه و تلفظ اولنور فقط اقتضاء عوامل حسبیه آخرنده اعراب تقدیر ایدیلور . و حالی اوزره حکایه ایدیلان اولکی اعراب فی الحال حقیقه اعراب اولماغله اکا اعراب اطلاق باعتبار ما کان علیه مجاز قیلندندر . و شو موضعه اعراب تقدیری اولسی اصلنه دلالتدن ایچون اعراب اولی حکایه لازم اولوب ظهور اعراب تقدیرنده ایسه موضع ثانیه مرور ایتدیکی اوزره مثیلین و یا ضدین حرکتینك اجتماعی لازم کلوب بوايسه متعذر اولدیغندندر .

آخرنده اعراب محکی بولنمغله اعرابی تقدیری اولان اسم معرب مزبور یا (فی الاصل جمله ایکن فی الحال علمیه نقل اولنمش) و یا خود (حکما علم قلمش) اولور . « شق اول » (تأبط شراً) کی شری قولتیغنه آلدی معناسنه بر (جمله فعلیه) ایکن « ثابت ابن جابر ابن غنم » نام شخصی سیفنی قولتیغنه آلوب خانه سندن چیققدقه و الدمنك تأبط شرا دیسی اوزره علم قلمشدر پس علی حاله شو اعراب ایله محکی اوله رق (جاءنی تأبط شراً)

و (رأیت تأبط شراً) و (مررت بتأبط شراً) دینلوب حالت رفع و نصب و جرده
 (اعراب) تقدیری اولمشدر (شق ثانی) یعنی کنندنده حکماً علمیت بولنان
 مثلاً (قلت قام زید) و (زید قائم جمله خبریه) قوللرمزده (قام زید)
 و (زید قائم) ده اولدینی کبی . و عند الحجازین معتبر اولدینی اوزره
 اعراب حکایه مفردده دخی اولور مثلاً (ضربت زیداً) سویلیان کیمسه یه
 (زید) دن سؤال اولندقدده سؤال زیددن اولدینی اشعار ایچون نصب ایله
 (من زیداً) دینور (من زیداً) قولمزدده ایسه (زید) مبتدا اولمغله تقدیراً مرفوع
 قلنور و مثلاً مقام استفهامده (الک تمرتان) سویلیان کیمسه یه (دغنی
 عن تمرتان) دینلور (تمرتان) تنیه اولوب جری (یا) ایله اوله جغندن
 پس (یا) ایله اعراب تقدیر اولنور . (ودخی جزء ثانسی اعرابه ناقابل
 ویاخود اعرابه قابل ، بر عاملک معمولی واقع اولان ترکیلرکه علم قلنلر)
 اعراب حکایه بونلرده دخی جاری اولور فقط جزء ثانسی اعرابه قابل
 اولیان بر عاملک معمولی واقع اولانلرده) هرایکی جزئنده اظهار اعراب
 ممکن اولما مغلّه آخرلرنده تقدیر اولنور مثلاً (ان زیداً) و (هل زید)
 و (من زید) قوللرمز بر کیمسه یه علم قلندقلرنده اولدینی کبی
 فی الاصل جزء ثانسلری اعرابه غیر قابل بر عاملکه اولکننده (ان)
 وایکنجیده (عامل معنوی) و اوچنجیده حرف جر اولان (من) در
 معمول بولنمشلردر پس علی حالهم شوا اعراب ایله محکی اوله رق مثلاً (جاءنی
 ان زیداً) و (رأیت ان زیداً) و (مررت بان زیداً) دینور و (هل زید)
 و (من زید) دخی بوقیاس اوزره اولوب احوال ثلثه ده اعراب
 تقدیریدر . (واما جزء ثانسی فی الاصل اعرابه قابل بر عاملک معمولی
 واقع اولانلرکه مثلاً عام اولدقلری حالده (عبدالله) و (مضروب
 غلامه) و (المعطی ابوه) کبی فی الاصل جزء ثانسلری اعرابه قابل
 بولنان (عبد) و (مضروب) و (المعطی) کله لرینک معموللریدر
 بوکیلرده اعراب اکر جزء اولارنده قبل العلمیه (المعطی ابوه) ده
 اولدینی کبی تقدیری ایسه فی الحال دخی تقدیری واکر (عبدالله) و (مضروب
 غلامه) ده اولدینی کبی لفظی ایسه فی الحال دخی لفظی اولور . زیرا جزء

ثانی فی الحال اعراب حکایه ایله مشغول اولوب و جزء اول ایسه فی الاصل
تقدیری اولدوقده کلمه تقدیری اولور و اما جزء اول فی الاصل لفظی
اولدوقده هر نقدر فی الحال جزء اولک آخری وسط کلمه حکمنده ایسه ده
قبل العلمیه قابل اعراب اولغله بالکلیه اعراب هدر و تقدیری اولماق ایچون
مجموع کلمه نك مستحق اولدینی اعراب جزء اولده قلنه رق کلمه لفظی اولور
و جزء اول اقتضاء عوامل حسبیله مرفوع منصوب مجرور بولنورکه شو
مذکور برکوی حضر تیرینک ذهابلریدر . و اما (جمهور نحات) فی الحال
اعراب مجموعک اولیوب بلکه جزء اولکدرکه اقتضاء عوامل سبیله معرب
اولور و جزء ثانی جزء اولک اقتضا ایلدیکی اعراب حقیقی ایله معربدر
دیرلر . و بیلملیدرکه آخرنده بناء محکی بولنانلرکدخی آخرنده اعراب
محکی بولنانلر کی اعرابی تقدیری اولور عام اولدینی حالده (خمسة عشر)
کی زیر قبل العلمیه بر معنای حرفی یعنی (واو عاطفه) بی متضمن اولغله
هر ایکی جزئی فتح اوزره مبنی بولنوب علم قلندوقده اشبو موجب بنا فوت
اولغله و علم اولیان خمسة عشر دن منقول ایدوکنه دالتدن ایچون ینه
اولکی اعراب ایله حکایه لازم اولوب ظهور اعراب تقدیرنده ایسه مخذور
سابق لازم کلمه کله پس آخرنده تقدیر اولنور و بعضیلر قبل العلمیه اولدینی
کی ینه مبنی اولسنه ذهاب اولمشدر .

درس ۲۸

(موضع رابع) آخرنده اصلیه و یا منقلبه ماقبلی مکسور بر (یا) حرفی بولنان
معربدر هر نقدر التقاء ساکنین دن ایچون حذف ایدیلسه دخی مقدر بولنغله
ملفوظ حکمنده در .

اگر معرب مزبور اسم ایسه حالت رفع و جرده یا اوزره ضمه و کسره ثقیل
اولغله حذف اولنور لکن معرف باللامده (یا) ساکن قالب (اعراب) تقدیری
اولور (جاء فی القاضی) و (مررت بالقاضی) کی و (غیر معرف باللام) ده بعد
حذف الضمه او الکسره التقاء ساکنین دن ایچون (یا) حذف اولنوب و تنوین
(ماقبل یا) ینه و یریلکله اعراب تقدیری اولور (جاء فی قاض) و (مررت بقاض)

کبی و اما حالت نصبده فتحه خفیف اولمغله (یا) حرفی نه حذف ونه ساکن
 قلوب اعراب لفظی اولور (رأیت القاضی) و (رأیت قاضیا) کبی
 و اگر معرب مزبور فعل ایسه حالت نصبده فتحه و حالت جزمده حذف
 آخر بولمغله (اعراب لفظی اولور (لن یرمی) و (لم یرم) کبی و اما حالت رفعده
 آخرنده ضمیر مرفوع اولماز ایسه (یا) اوزره ضمه ثقیل اولمغله حذف
 اولنوب اعراب تقدیریدر (هو یرمی) و (انت ترمی) و (انا یرمی) و (نحن ترمی)
 کبی و اگر آخرنده ضمیر مرفوع اولور ایسه اگر نون جمع مؤنث ایسه اعراب
 محلی اولور (یرمین) و (ترمین) کبی و اگر دیکری ایسه احوال ثلثه ده لفظیدر
 یرمیان و (لن یرمیا) و (لم یرمیا) کبی (موضع خامس) آخرنده ماقبلی مضموم
 و او بولنان فعلدر زیرا بو صفتده اسمده بولنه من فعل مذکورک الحق
 صورت رفعده ضمه ثقلتندن ایچون حذف اولنه رق اعرابی تقدیریدر (هو
 یغزو) و (انت تغزو) و (انا اغزو) و (نحن نغزو) کی فقط ضمیر مرفوع بولور
 ایسه موضع رابعده اولدنی اوزره لفظی و یا محلی اولور اما حالت نصبده
 فتحه خفتندن ایچون حذف اولنوب و حالت جزمده حذف آخر بولمغله
 اعراب لفظیدر کما مر بو کیلردن بحث هر تقدیر مطلب فعله مناسب ایسه ده
 استطراداً ذکر اولندی .

درس ۲۹

(موضع سادس) هر بر اسم معربدر که اعرابی حرف ایله اولوب پس بر
 ساکنه یعنی اولنده همزه وصل اولان بر کلمه یه ملاقی اوله زیرا همزه وصل
 درج عندنده ساقط اولمغله اجتماع ساکنین لازم کلوب دفعی ایچون حرف
 اعراب حذف اولمغله (اعراب) تقدیری اولور . اگر اسم مزبور اسماء سته
 مذکورده دن ایسه احوال ثلثه ده اعرابی تقدیری اولور (جاء فی ابوالقاسم)
 و (رأیت ابا القاسم) و (مردت بابی القاسم) کبی اما خطده (واو) و (الف)
 و (یا) نك یازلسی آخر کلمه ده اولان حرکات مختلفه حرکات اعراییه ظن
 اولنسون ایچوندر . زیرا آنلر قبل الاضافه حروف مزبوره اولنده بولنان
 حرکه لر در و برده احوال ثلثه دن هر برینه اول امرده اشارت و کسب

اطلاع ایچوندر. واکر اسم مزبور جمع مذکر سالم اولور ایسه شو
 صورته اکر (ماقبل حرف اعراب) مفتوح ایسه دفعاً لاجتماع الساکنین
 حرف اعراب (واو) ایسه ضمه و (یا) ایسه کسره ایله تحریک اولنوب
 اعراب احوال ثلثهده لفظی اولور (جاءنی مصطفو القوم) و (رایت مصطفی القوم)
 و (مررت بمصطفی القوم) کی. واکر مفتوح دکل ایسه دفعاً لاجتماع الساکنین
 (واو) و (یا) حذف اولنوب احوال ثلثهده اعراب تقدیری اولور (جاءنی
 صار بالقوم) و (رایت صار بی القوم) و (مررت بصار بی القوم) کی.

واکر اسم مزبور تنبیه ایسه دفعاً لاجتماع الساکنین حالت رفعهده الف حذف
 اولنوب اعراب تقدیریدر (جاءنی غلاماً ابنک) کی حالت نصب وجرده
 (یا) حرفی کسره ایله تحریک اولنوب اعراب لفظی اولور (رایت غلامی ابنک)
 و (مررت بغلامی ابنک) کی

درس ۳۰

(موضع سابع) اعرابی حرکه ایله اولان هر بر معرب که سکون اوزره وقف اولمش
 اوله زیرا اعرابی حرف ایله اولان عندالوقفینه لفظیدر صار بون یضربون کی
 معرب مزبور اکر تنوین تمکن ایله منون دکل ایسه ویاخود آخرنده (تاء
 تأنیت) ویا تاء تأنیت دن منقلبه (ها) بولنور ایسه اعراب احوال ثلثهده تقدیریدر
 (احمد) و (ضاربة) و (ضاربات) کی (احمد) هر کز منون اولمیوب
 و (ضاربة) آخرنده ها بولنوب و (ضاربات) تنوین تمکن ایله غیر منون
 بولنمشر.

واکر آخرنده (تاء تأنیت) ویا آندن منقلبه (ها) بولنمیوب آخرنده تنوین
 تمکن واریسه رفع وجر حالنده وقف ایله اعراب ساقط اوله جغندن (اعراب)
 تقدیری واما نصب حالنده آخرنده الف ایله وقف اولنه جغندن و (ماقبل
 الف) ده ایسه فتح بولنه جغندن لفظیدر آخرینک سکونیه (جاءنی زید)
 و (مررت زید) و آخرنده الف اوزره وقف اولنه رق (رایت زیدا) کی.

و خفی اولیه که آخری مجرد تحفیف ایچون ساکن قلنان معرب مثلاً
 قراءة ابی عمروده تسکین همزه ایله (بارئکم) کی ویاخود حرف آخری

دیگر بر کلمه نك حرفه ادغام اوله رق ساکن قلنان مثلاً میم رحیمی میم
ملکه ادغام ایدره ك كذا قراءه ابی عمرو ده (الرحیم ملك يوم الدين) کبی
بونلرده (اعراب) تقدیری اولوب حرف آخر سکون ایله مشغول اولمقده
اشتراکندن ایچون اوزرینه سکونله وقف اولنان یعنی موضع سابعه ملحق
قالمشدر . ودخی حرف آخرینك حرکه سی دیگر حرفك حرکه سنه مجرد
مشاکلت ومناسبتدن ایچون تابع بولنان مثلاً قراءه ابی جعفر ده ضم تا ایله
(للملائكة اسجدوا) وقراءه حسن بصری ده کسر دال ایله (الحمد لله)
کبی الملائكة والحمد لفظلرنده دخی شو حالده اعراب تقدیری اولوب آخری
حرکه غیر اعرابیله مشغول اولمقده اشتراکندن ایچون آخرنده اعراب
محکی اولان یعنی موضع ثالثه ملحق بولنمشدر شو ذکر اولنانلرده احوال
مذکوره ده اعرابك تقدیری اولدیغنی شرح مغنی اللیبیده دماینی تصریح
ایلمشدر .

لکن لغة بنی تمیم ده فعل مضارع مجزوم مدغم مثلاً حرکات ثلثه دال مهمله
ایله (لم یجد) نخونده جزم تقدیری اولوب شو محللرك برینه ایسه پك مناسب
اولدیغندن اعراب تقدیرینك محلی سکوزه و بلکه موضع ثالث و سابعه
ملحق قیلنان دخی ضم اولنور ایسه اونه ترقی ایتسی دخی عند البعض وارد
خاطر اولمشدر .

شویان برکوی رحمه الله کدرکه اعراب تقدیرینك محلنه نظر ایتمشدر .
ولکن ابن حاجب رحمه الله تقدیر اعرابك منشأه نظر ایلمشدرکه تقدیر
اعراب یالفظ معربده ظهور اعراب متعذر و تمتع اولدیغنده در و یا خود
ظهوری استتقال اولدیغنده در .

(تعذر اعراب) محل اعراب حرکه اعرابییه قابل اولدیغنده در و معرب
بالحرکه یه خاصدر محل اعرابدن آخرنده الف اولان عصا لفظی کبی وتثیه و جمع
مذکر سالمک غیری اوله رق یاء متکلمه مضاف اولنلر غلامی ورجالی کبی و آخری
(اعراب حکایه) ویا (بناء محکی) ایلله مشغول بولنان یا (تابط شرا) و (من زید)
و (خمسة عشر) کبی و اعرابی حرکه ایلله اوله رق سکونله وقف اولنان (احمد) و (ضاربة)
و (زید) کبی بونلرده تقدیر اعراب شو حالده ظهوری متعذر اولمشندن ناشیدر .

واما (استثقال اعراب) محل اعراب تحمل اعرابه قابل لکن ظهوری لسان
اوزره ثقیل اولدیغنده درکه معرب بالحركة و معرب بالحروفه شاملدر و تعذر
اعراب موقعلرینک غیرنده واقعدرکه آخری (یا) ماقبلی مکسور اولان
و آخری (واو) ماقبلی مضموم اولانده و مابعدنده برساکنه ملاقی اسم معرب
بالحروفده و (مسلمی) نخونده اولدیغی کی .

درس ۳۱

(مبحث اعراب محلی) اعراب محلی نفس لفظده ظهور اعرابه مانع بولمغله
(اعراب) آخر لفظده اظهار و تقدیر اولنه میوب بلکه نفس لفظده یعنی محلنده
اعتبار اولنان اعرابدر اعراب محلی ایکی موضعه بولمشدر .

(موضع اول) آخری اعراب غیر محکی ایله مشغول بولنان اسم معربدر
(مررت بزید) کی (زید) ک جری اعراب محکی اولیوب بلکه محل قریی
حقیقه (با) ایله مجرور اولوب محل بعیدی محلاً منصوب (مررت) فعلنک
مفعول به غیر صریحیدر دینور و کذا (اعجی ضرب زید) و (مر بزید)
قولزده (زید) ک اولکی مثالده محل قریی لفظاً مجرور ضربک مضاف الیهیدر
و محل بعیدی محلاً مرفوع ضربک فاعلی و یاخود محلاً منصوب مفعولیدر
و ایکنجی مثالده محل قریی لفظاً با ایله مجرور و محل بعیدی محلاً مرفوع
(مر) فعل ماضی مجهولنک نائب فاعلیدر تأمل فی الفهم و التفهیم .

(موضع ثانی) منی بولنان کله لردر فقط مقتضی اعرابنک عدم توارندن
ایچون محل اعراب منی اصل اولیوب بلکه منی عارضدر . بحث منی بعد المعرب
اسمک اجل مباحثدن اولمغله برنجه درسلا ایله آندن دخی بحث ایلیه جک
ایسکده ابن حاجب حضر تلرینه تبعاً بحث توابعدن صکره نه تأخیر اولندی .

(المعمولات)

خفی اولیه که معمول مقدمه ده کواسترلیدیکی اوزره مرفوع منصوب مجرور
مجزوم قسملرینه منقسم اولوب یکر می بشی معمول بالا صاله و بشی معمول بالتبعیه درکه

مجموعی اوتوز دانه در فقط مرفوعات طقوز دانه اولوب طقوزنجیسی که نواصب وجوازمدن خالی فعل مضارعدر ومنصوبات اون اوچ دانه اولوب اون اوچنجیسی که نواصبدن بری داخل اولان فعل مضارعدر ومجزوم که بردانه اولوب جوازمدن بری داخل اولان فعل مضارعدر شواوچی فعل اولغله ذکرى مطلب فعلده کله جکدر پس اسم اوله رق مرفوعات سکز ومنصوبات اون ایکیدر و مجرورات ایکی دانه اولوب ذاتاً اسم مختصدر ومعمول بالتبعیه مفرد اوله رق آنجق اسمدر فقط کاه جمله اوله رق جمله فعلیه و جمله اسمیه دخی اولور بونکده بچی کلور .

(المرفوعات)

بوراده بحث ایدیه جکمز معمول مرفوع سکزدرکه (ماشتمل علی علم الفاعلیه) دینه رک تعریف اولنور یعنی معمول مرفوع اسمک فاعل اولسی علامتی که (ضمه) (واو) (الف) در مشتمل اولان اسمدر دیمکدر و اشمالندن مراد لفظاً و یا تقدیراً و یا محلاً آنکله موصوف اولمقدر .

درس ۳۲

(فاعل) معمول مرفوعدن اولکیسی فاعلدر «فاعل» عندالخلیل اوچ جهته مرفوعانده اصلدر و اکثر نجات بونده خلیله تابعدر (جهت اول) اعرابی وضعدن مراد مقتضی اعراب اولان معانی خفیه یعنی (فاعلیت) (مفعولیت) (مضاف الیه) علامت ونشانه اولوب بری برندن تمیز وتفریق اولمقدر فاعل ایسه مفعولدن آنجق علامت رفع ایله ممتاز اولور واما مبتدا غالباً ذات اولور که خبردن چوق کره فرق اولنور پس فاعل علامت رفعه احوج اولوب مرفوعانده اصل اولور (جهت ثانی) فاعل جمله لرده اصل اولان جمله فعلیه نك جزئیدر پس فاعل دخی اصل اولور جمله فعلیه نك اصل اولسی زیرا جمله فعلیه ده جزء اول فعلدر فعلان ایسه وضعنده برفاعله نسبت اولنسی مأخوذ اولغله اول امرده فاعلیله ارتباطی اقتضا ایدر واما جمله اسمیه ده

مبتدا مستقل اسم اولمغله اول امرده لذاته برنسنهيه ارتباطي مقتضى دكلدر پس جمله فعلیهده امتزاج وارتباط جمله اسمیهدن قوی وشدید اولوب اصل اولور (اصل اولان برنسنهدن جزء اولان ایسه) اکا نسبتله اصل اولمیان برنسنهدن جزء اولاندن زیاده اصلته الیق اولمغله پس فاعل دخی اصل اولور (جهت ثالث) مبتدآنك عاملی معنوی اولوب فاعلك عاملی ایسه لفظی اولمغله فاعلك عاملی اقوی در بوایسه عمل رفعهده دخی اقوی اولمسنی ایجاب ایتسکله پس فاعل مرفوعانده مبتدآن اصل اولور. فاعلك نائب فاعلدن اصل ایدوکی درکار اولوب مبتدآن دخی اصل اولدقده مبتدآنك ایسه سائرندن اصل ایدوکی مسلم اولمغله فاعل جمله سندن اصل اولمش اولور.

واما سیبویه عندنده مرفوعانده ایکی جهتله مبتدا اصلدر و بعض نحات بونده سیبویه تابعدر (جهت اول) مسند الیهده اصل اولان مسند اوزره مقدم اولمقدر مبتدا ایسه شو اصل اوزره باقیدر (جهت ثانی) مبتدایه جامد ومشتق ایله حکم اولنه ییلور هذا رجل وزید قائم کبی فاعله ایسه حقیقه ویا حکما مشتق اولان ایله حکم اولنور لکن شوایکی جهتدن جهت اول مبتدآنك انحق مسند الیه اولمقده اصلته وجهت ثانی محکوم علیه اولمقده اصلته دلالت ایدر مطلوب اولان ایسه مرفوعیتده اصلتیدر دیو جواب ویرلمشدر.

مرفوعانده اصل اولان اشبو (فاعل) عندالنحات (هو ما اسند الیه الفعل اوشبهه وقدم علیه علی جهة قیامه به) دینهرك تعریف اولنور یعنی فاعل حقیقه ویا حکماً براسمدرکه فعل ویاخود شبه فعل اول اسمله قائم بولمق اوزره واقع براسناد ایله یعنی (حقیقه ویا حکماً معلوم صیغه سی اوزره اوله رق) بالاصاله اکا اسناد اولمشلر و اوزرینهده مقدم بولمشلردر (ضرب زید) قولزده زید و (اعجبنی ان ضربت) قولزده ان ضربت و (زید قائم ابوه) قولزده ابوه کبی (زید) حقیقه اسمدرکه ضرب نک فاعلیدر و (ان ضربت) تأویل مفرد وحکم مصدرده اولوب حکماً اسمدرکه (ضربك) تأویلندهدر اعجب فعلنك فاعلیدر و (ابوه) ضمیره مضاف اوله رق شبه فعل اولان (قائم) فاعلیدر (ضرب) و (اعجب) صیغه معلوم اوزره درو (قائم) حکما معلوم اوله رق بونلرک فاعلرینه اسنادلری فاعلر یله قائم اولملری جهتی اوزره براسناددر. واما بر فعل

مجهول و مجهول حکمنده اولان مثلاً اسم مفعولك نائب فاعله اسنادی نائب فاعل اوزره واقع اولمیری جهتی اوزره بر اسناد اولمغله پس (علی جهة قیامه به) قیدیه خارجلدر .

واسناددن مراد اسناد بالاصاله اولمغله توابع فاعل دخی خارجدر و (قدم علیه) قیدیه (زید ضرب) نخونده زید کیلردخی خارجدر .

بعضیلر حقیقة (فاعل) کندندن بر فعل صدور ایدوب و لفظاً مرفوع اولاندر دیو فاعلی اوچ نوع اوزره تصور ایلدیلر . بر یسی لفظاً و معنأ فاعلدر (قام زید) قولمزده زید کی و بر یسی لفظاً فاعل معناده دکلدر (مات زید) قولمزده زید کی و بر یسی معنأ فاعل لفظده دکلدر (کفی بالله شهیدا) قولمزده لفظه جلاله کی فقط مرفوعات و فاعلک تعریفنده ذکر اولنان تأمل اولنور ایسه اشکال قالمز .

درس ۳۳

خفی اولیه که فاعلده اصل اولان فعلنی ولی ایتلی یعنی فعلی عقببنده واقع اولمیشدر که حتی بودر . پس هر تقدیر آراده مفعول فاصله اوله رق فاعل مؤخر اولسهده رتبه مقدم اعتبار اولنور . شو جهتله (ضرب غلامه زید) ترکیبی که غلام (ضرب) نك مفعولی اولوب و ضمیر (ضرب) نك فاعلی اولان مؤخر زیده راجع اوله جائز کورلمش و اما (ضرب غلامه زیداً) ترکیبی که غلام (ضرب) نك فاعلی اولوب و ضمیر (ضرب) نك مفعولی اولان مؤخر زیده راجع اوله تجویز اولنماشدر ، زیرا (ترکیب اول) ده فاعلک حتی تقدم اولمغله رتبه اولیوب انحق لفظاً اضمار قبل الذ کر لازم کلمکله تجویز اولنماشدر . و اما (ترکیب ثانیه) مفعولک حتی ذاتاً تأخر اولمغله لفظاً و رتبه اضمار قبل الذ کر لازم کلدیکنندن تجویز اولنماشدر . لکن اخفش وابن جنی مطلقاً اضمار قبل الذ کری جائز کوردکلرندن شو ترکیبی تجویز ایتشلردر . و بوبابده استنادلری شاعرك

جزا ربه عنی عدی ابن حاتم جزاء الکلاب العاویات و قد فعل

شعیرد که (ربه) ده اولان ضمیر جزانک مفعولی اولان مؤخر (عدی)
 کله سنه راجعدر . پس لفظاً ورتبه اضممار قبل الذکر واقعدر دیدیلر . لکن
 بوراده تسلیم وعدم تسلیم ایله جواب ویریله یلور که تسلیم اولندقدنه
 ضرورت شعریه دن ایچون واقع اولمشدر دینلور و یاخود تسلیم اولنمیوب
 ضمیر عدی به راجع دکلدر . بلکه (جزا) فعلنک مصدرینه راجعدر
 تقدیر کلام جزا رب الجزا دیمکدر . نته کیم (اعدلوا هو اقرب للتقوی) آیت
 کریمه سنده (هو) ضمیری (اعدلوا) دن منفهم عدله راجع اولمشدر . پس کلامده
 اضممار قبل الذکر هرکز یوقدر دینور واشبو شعرك اصلی عدی ابن حاتم
 نعمان ابن مندره برقصر بنا ایدوب اکمال ایلدکهده نعمان کنسینه بونک
 مثانی هرکز یاپدکمی دیدکده هرکز یایدم و باخصوص بونی برطاش اوزره
 بنا ایتدکه اکر اول طاش اخذ اولنسه قصر خراب اولور دیدی نعمان
 اول طاشی سندن غیری بیلان وارمیدر دیدکده یوقدر دیدی . پس
 امر ایدوب عدی بن حاتم قصر دن اشاغی آتوب هلاک ایتدیلر . شو حالی
 عدی بن حاتمک عدوسی اولان شو شعرك قائل کوردکده اشبو شعری
 دیمشدر که مفاد بیت رب الجزا عدی بن حاتم بنندن ایچون عوعو ایدن
 کلبلك جزاسی یعنی (شو حال ایله جز النذکر کی جز الندرسک حالبوکه
 بویلجه ایشلادی یعنی جز الندردی ولایقی ویردی دیمکدر . عدی بن
 حاتمک خدمته مقابل نعمانک شو معامله سندن ایچون جهانده ایلکه ایلک
 اولیدی که نعمان شاه سناره ایدردی . دیمشدر .

درس ۳۴

خفی اولیه که درت محله فاعلی مفعول اوزره تقدیم واجب اولور (اولکیسی)
 فاعلک فاعلیته و مفعولک مفعولیتنه بالوضع دال اولان اعراب لفظاً متقی
 اولسه و قرینه دخی بولنسه شو حالده دفع التباس ایچون مقدم واقع اولان
 وجوباً فاعل قلنور (ضرب موسی عیسی) کی واما لفظاً اعراب متقی اولسه
 مرفوع اولان فاعل و منصوب اولان مفعول اوله جغندن التباس اولماز
 و کذا قرینه ایله معلوم اولسه مثلاً (ضربت موسی حبلی) کی (ضربت) مؤنث

اولمغه فاعلی حبلی ایدوکی شو قرینه لفظیه ایله آشکاردر . واکل الکمتری
یحیی) کی که آکل آنجق انسان اوله جغدن (اکل) نك فاعلی یحیی کله سی ایدوکی
شو قرینه معنویه ایله درکاردر . شو تقدیرده دخی التباس یوقدر (ایکنجیسی)
مفعول فعلندن مؤخر و فاعل فعلنه متصل ضمیر اولسه اتصال انفصاله
منافی اولمغه فاعل وجوبا مقدم اولمش اولور ضربت زیداً) کی که فاعل ضمیر
متکلم اولان (تا) در و (زید ضرب عمرواً) کی که فاعل ضرب ایچنده مستتر
(هو) در . مفعولك فعلندن مؤخر اولسی کوسترلمسی زیرا شو صورتده
مفعول کاه لاجل الاهتمام فعلی اوزره تقدیم اولنور (زید ضربت) کی که
شمدی مانحن فیهمز دکلدر .

(اوچنجیسی) فاعلك فاعلیتی مفعول اوزره حصر ایلمك اراده اولنسه
فاعل ایله مفعول آراسنه ادات استنادن (الا) کله سی توسط ایدوب مفعول
(الا) دنصکره و فاعل وجوباً مقدم قلنور . (ماضرب زید الا عمرواً) کی
زیرا حصر هر حالده الادنصکره واقع جزء اوزره در . پس اگر فاعل الادنصکره
واقع اوله رق (ماضرب عمرواً الا زید) دینسه ایدی مفعولك مفعولیتی فاعل
اوزره حصر افاده ایدر که حصر مطلوبمز دکلدر و اگر فاعل و مفعول
(الا) دنصکره کلوب فاعل مقدم قلنسه که (ماضرب الا زید عمرواً) دینسه یا
(مضرویت عمرو) ک زید اوزره حصرینی افاده ایلر و یا خود (ماضرب احد
احداً الا زید عمرواً) معناسنده اولوب هر برینك صفتك آخرده انحصارینی
ارائه ایدر که هیچ بریسی حصر مطلوبمز دکلدر . واکر مفعول مقدم
قلنسه که (ماضرب الا عمرواً زید) دینسه مدعایزدن خارج ایهده ضاریت
زیدك عمرو اوزره انحصارینی افاده ایدر که حصر مطلوبمز در . لکن هنوز
تمام اولدن بر صفتی برنسنهیه قصر ایتك قییلندن اولور که شو ترکیب هر حالده
غیر مستحسندر . واکر (ماضرب احداً احد الا عمرواً زید) معناسنه قلنسه
شو تقدیرده کذا هر برینك صفتك آخرده انحصارینی افاده ایدر که حصر
مطلوبمز دکلدر . شو جهتله کرك صورت تقدیم و کرك صورت تأخیرده الا
کله سنك توسط ایلمسی کوسترلدی (ودخی) فاعلك فاعلیتی مفعول اوزره
حصر ایلمك اراده اولنوب فاعل و مفعولی مشتمل جمله نك اولنه الا

معناسنه انما کلمه سی کتور لسه جمله مزبور ده دخی فاعلی تقدیم واجب اولور (انما ضرب زید عمرواً) کبی زیر ا بونده حصر جزء اخیر ده در پس ا کر فاعل مؤخر قلوب (انما ضرب عمرواً زید) دینسه مفعولک مفعولیتک فاعل اوزره حصرینی افاده ایدر که حصر مطلوبین دکلر .

(در دنجیسی) فاعل و مفعول فعلنه متصل ضمیر اولسه لر فاعل وجوبا مقدم اولور ضربتک کبی .

(و خفی اولیه که درت محله مفعولی فاعل اوزره تقدیم واجب اولور .
(اولکیسی) مفعوله راجع بر ضمیر فاعله متصل اولسه مفعول تقدیم واجبدر (ضرب زیداً غلامه) کبی والا لفظاً ورتبه اضمار قبل الذکر لازم کلور ایدی .

(ایکنجیسی) مفعولک مفعولیتی فاعله حصر اراده اولنسه فاعل ایله مفعول آراسنه ادات استئنا اولان (الا) کلمه سی توسط ایدوب فاعل (الا) دنضکره کتور یلوب مفعول وجوباً مقدم قلوب (ما ضرب عمرواً الا زید) کبی واکر برعکس اولسه حصر مطلوب حاصل اولماز ایدی .

(اوچنجیسی) کذا مفعولک مفعولیتی فاعله حصر ایلمک اراده اولنوب (جمله) (الا) معناسنه (انما) دنضکره کتور لسه مفعول وجوبا تقدیم اولنور (انما ضرب عمرواً زید) کبی واکر برعکس اولسه حصر مطلوب حاصل اولماز ایدی .

(در دنجیسی) مفعول فعلنه متصل ضمیر اولوب و فاعل غیر متصل اولسه اتصال انفصاله منافی اولمغه مفعول وجوبا مقدم اولور (ضربک زید) کبی .

درس ۳۵

خفی اولیه که فاعلک فعلی بعض محله جوازاً حذف اولنور . نته کیم فاعل بر سؤال محققیه جواب واقع اولسه مثلاً (من قام) دیو سؤال ایدن سائلک جوابنده (زید) دیندکده اولدینی کبی تقدیر کلام (قام زید) در وفعل تقدیر اولنوب خبر تقدیر اولنامسی زیر (زید قائم) تقدیرنده

قلنهرق خبر مقدر اولسه (قائم) گله سنك ايچنده بر ضمير بولنه جغندن ايكي
جزء حذف اولمق لازم كلور و اما فعل تقديرنده فاعلى مظهر اولغله يالكنز
بر جزئى يعنى فعلى حذف ايلامك لازم كلور حذفده تقليل ايسه اولى در.
ونته كيم فاعل بر سؤال مقدرديه جواب واقع اولسه ضرار بن نهشل
برادري يزید بن نهشلك مرثيه سنده سويلديكي

ليک يزید ضارع الخصومة و مختبط مما تطيح الطوايح

شعرنده ضارع كى (ليک) ناقص دن امر غائب بناء مجهول صيغه سى اوزره
اولوب (يزید) گله سى نائب فاعليدر و (ضارع) من يكيه يولو بر سؤال
مقدر جوابنده واقعدركه تقدير كلام يكيه ضارع ديمكدر ضارع عاجز
وذليل معناسنده و (الخصومة) ضارعه متعلقدر (و مختبط) ضارع
اوزره معطوفدر و يكيه مختبط ديمكدر مختبط افتعال دن اسم فاعل صيغه سى
اوزره من غير وسيله طلب احسان ايليان سائله دينور (مما) لفظنده
من تمليل ايجونددر مختبط لفظنه متعلقدر و ما مصدريره در (تطيح) افعال دن
فعل مضارع مفرد مؤنث غائبه در تهلك معناسنده در (الطوايح) تطيح نك
فاعليدر مطيحه نك جمعيدر (مطيحه) مهلك نسنه يه دينور تطيح نك مفعولى
لاجل التعميم حذف اولمشدر مثلاً (تطيح الطوايح مانه و مايتوسل به الى
تحصيل المال) كى تقدير اولنور (مفاد بيت) يزید بن نهشل اغلا نلسون
(كيم اغلاسون) هر بر خصومه عاجز و ذليل يعنى مقاومت خصمايه غير
مقتدر اولان اغلاسون و دخی مهلكات هر وازينى و تحصيل ماله وسيله
قانه جق نسنه لر بنى اهلاك ايلديكى اجلدن من غير وسيله كلوب طاب احسان
ايليان هر بر سائل اغلاسون ديمكدر كه مومى اليهك مظلوم و عاجز لره معين
و من غير وسيله طلب احسان ايليان لره معطى و محسن اولديغنى بالارائه
فوتى ايله تحزين در . و اكر (ليک) بناء معلوم صيغه سى اوزره اولوب
و (يزید) اكا مفعول اولور ايسه شو صورتده (ضارع) ذكر اولنان

(لیک) یہ فاعل اولہ جغندن مانحن فہمزدن اولہ من و شو تقدیرده معنا
 یزیدہ شو کیمسہلر اغلاسون طرزندہ اولور . خفی اولیہ کہ بر فاعلک
 فعلی بعض وجوبا حذف اولنور بودہ فعل مزبور حذف اولنہرق حذفدن
 ناشی ابہام دفع اولنق ایچون ثانیہ تفسیر اولنان محلہدر زیرہ تفسیر ایلان
 فعل ایلہ بیلہ تفسیر اولنان فعل دخی ذکر اولنہ تفسیر ایلان فعل حشو
 زائد اولور ایدی حق سبحانہ و تعالیٰ نک (وان احد من المشرکین
 استجارک) قول شریفندہ اولدینی کبی کہ (احد) کلمہ سی وجوبا مقدر
 بر (استجار) فعلنک فاعلیدر ایکنجی (استجار) آنی مفسردر تقدیر
 کلام (وان استجارک احد من المشرکین) در اول (استجارک) حذف
 اولنوب ثانیہ تفسیر اولنشدہ حرف شرطک اسم اوزرہ دخولی جائز
 اولامغلہ بورادہ (احد) کلمہ سی ابتدائیت اوزرہ مرفوع اولہ من بلکہ حرف
 شرط دنصکرہ (احد) لفظنی رافع بر فعل تقدیری تحت وجو بددر .
 ودخی بعض فعل مع فاعلہ جوازاً حذف اولنور بودہ (اقام زید) کبی بر
 استفہام جوابندہ (نعم) دیندکده اولدینی کبی کہ تقدیر کلام نعم قام زید
 دیمکدر وجواب سؤالہ مطابق اولسون ایچون آنجق جملہ فعلیہ تقدیر
 اولنور .

درس ۳۶

خفی اولیہ کہ بعض ایکی و ایکدن زیادہ عامللر کندیلردنصکرہ اولان اسم
 مظهرده متفقین فی العمل اولہرق (فاعلیت) و یا (مفعولیت) ده و یا مختلفین
 فی العمل اولہرق (فاعلیت و مفعولیت) ده تنازع ایدرلر . بورادہ بز اکتفاء
 ایکی فعلک تنازعنی بیان ایدہ جکز بوندن زیادہ نک و فعلک غیری عامللرک
 تنازعلر یدخی بوقیاس اوزرہ بیلنور . صورت تنازع اشارت اولدینی
 اوزرہ اوچ نوع اوزرہ تصور اولنور (نوع اول) فعلیندن هر بر ینک اسم
 ظاہری کندینہ فاعل قلمقدہ تنازعلر یدر (ضربی واکرمنی زید)
 کبی و عامل غیر فعل اولہرق مثلاً (زید کریم و شریف ابوہ) کبی (نوع
 ثانی) هر بر ینک اسم ظاہری کندینہ مفعول قلمقدہ تنازعلر یدر (ضربت

و اکرمت زیداً) کبی و عامل غیر فعل اوله رق مثلاً (زید معط و مکرم عمرواً) کبی و بعض بر ترکیده شوایی نوع جمع اولور که هر بری کندیلر- دنصکره معین بر اسم ظاهری کندینه فاعل قلمقده و معین دیگر بر اسمی کندینه مفعول قلمقده تنازع لیدر (ضرب واهان زید عمرواً) کبی (نوع ثالث) مختلفین فی العمل اوله رق بری اسم ظاهرک کندینه فاعل اولسنی و دیگری ینه اول اسم ظاهرک کندینه مفعول اولسنی اقتضا ایله هرک تنازع لیدر (ضربنی و ضربت زیداً) کبی و عامل غیر فعل اوله رق (زید معط و شریف ابوه) کبی

(مذهب بصریین) اشبو نزاعی فصل و قطعه بصریون فعل اولی اعمال ایلمکی مع الضعف تجویز ایله برابر قر بتیندن ایچون اسم ظاهرده حق عملی فعل ثانییه و یرمکی ترجیح و اختیار ایدوب فعل اول فاعل اقتضا ایتدکه فاعلانی اضممار ایلدیلر که ضمیر مذکور فعل ثانیك فاعلی و یا مفعولی قلئان اسم ظاهره راجعدر زیرا اظهار اولدینی تقدیرده تکرار لازم کلور حذفی ایسه متمتعدر و لازم کلان اضممار قبل الذکر (عمده) ده اولغله جائزدر دیدیلر و فعل اول مفعول اقتضا ایتدکه مفعول کلامده فضله اولغله کندندن استغنا اولنور ایسه حذف اولنور و اگر استغنا اولنه میوب ذکرینه حاجت کورینور ایسه ذکر اولنور دیدیلر پس (ضربنی و اکرمنی زید) نخونده (زید) اکرم فعلنک فاعلیدر و ضرب فعلنک فاعلی زیده راجع ضربده مستتر ضمیردر و (ضربت و اکرمت زیداً) نخونده (زیداً) (اکرمت) نک مفعولیدر ضربت نک مفعولی زید حذف اولمشدر و (ضرب واهان زید عمرواً) نخونده (زید) اهان نک فاعلی و عمرواً مفعولیدر (ضرب) نک فاعلی زیده راجع ضربده مستتر ضمیردر و مفعولی عمرو و محذوفدر و (ضربنی و ضربت زیداً) نخونده (زیداً) ضربت نک مفعولیدر (ضربنی) نک فاعلی زیده راجع ضمیر مستتردر و اما (حسبتنی منطلقاً و حسبت زیداً منطلقاً) نخونده هرگز تنازع اولیوب (زیداً) و (منطلقاً) حسبت نک ایکی مفعولیدر و (حسبتنی) ده مفعول اولی یاء متکلمدر و (منطلقاً) مفعول ثانیدر که حذف اولنه میوب ذکر اولمشدر زیرا حسبت فعلنک احد مفعولینتی

حذف ایلمک جائز دکلدر (مذهب کسائی) امام کسائی مذهب بصرینی اختیار ایدوب فقط اضمار قبل الذکر دن احترازاً فعل اولده فاعلی اضمار ایتیموب حذف ایلدی پس (ضربانی واکرمنی الزیدان) ترکیبی عند البصرین قبول اولنور واما عند الکسائی مقبول دکلدر و (ضربنی واکرمنی الزیدان) ترکیبی ده برعکس درکه اثر خلاف اشته شو مثالدرده ظاهر در.

درس ۳۷

(مذهب کوفین) واما کوفیلر فعل ثانی بی اعمال ایلمکی مع الضعف تجویز ایله برابر اضمار قبل الذکر دن احترازاً و برده سبقت ایلدیکندن ایچون اسم ظاهرده حق عملی فعل اوله ویرمکی ترجیح و اختیار ایلدیلر پس فعل ثانی فاعل اقتضا ایتدکده فاعلی اضمار ایلدیلرکه ضمیر مذکور فعل اولک فاعلی ویا مفعولی قلنان اسم ظاهره راجعدر و شو تقدیرده اضمار قبل الذکر انحق لفظاً اولوب رتبه اولمامغله جائز کورلمشدر و فعل ثانی مفعول اقتضا ایدرایسه کذا برمانع منع ایلمدکجه اضمار ایلدیلر لکن برمانع منع ایتدکجه مع الضعف حذفی دخی تجویز ایلدیلر اضماری اختیار ایلملری فعل ثانینک مفعولی مذکوره مغایر توهم اولنسون ایچوندر واکر اضمار وحذفه برمانع بولنور ایسه اظهار اولنور (حسینی وحسینهما منطلقین الزیدان منطلقاً) ترکیبنده اولدینی کبی دیدیلر (الزیدان) (حسینی) یه فاعل و (منطلقاً) مفعول قلنوب و فعل ثانیده مفعول اول ضمیر اوله رق کتورلدیکه (ها) در و مفعول ثانیه که منطلقین در مظهر قلندی . زیرا ضمیر مفرد اوله رق کتورلسه مفعول اوله مخالف اولور ایدی و ضمیر ثنیه اوله رق کتورلسه مرجعه یعنی (منطلقاً) لفظنه مخالف اولور ایدی پس اضمار ممکن اولیوب و (حسبت) بابتک احد مفعولینی حذف ایلمک دخی جائز اولمامغله ذکر و اظهار قلندی . لکن فاضل جامی شو مثالده اصلاً تنازعک اولمدیغنی بیان ایلدیلر زیرا فعل اول مفرد بر مفعول و فعل ثانی ثنیه اوله رق بر مفعول اقتضا ایلمکده اولدیغندن ایکسی بر امر واحده متوجه دکلدر در مکرکه مفعول ثانینک

تثنيه وافرادی ملاحظه اولمىوب انحق انطلاق ايله متصف برذاته دال
اسم اولدينى ملاحظه اولنه (مذهب فرا) امام فرا كوفيلر مذهبنى اختيار
ايدوب فقط فعل اول واراينك فعل تانيك عامل اولمىنى تجويز ايتما مشدر.
امام فرادن تشريك رافعين دخی روايت اولمشدر مثلاً (ضربنى واكرمنى
زيد) تركينده زیدی على سبيل المناوبه والبديله هم (ضربنى) وهم
(اكرمنى) به فاعل قلمق كى و بعدالظاهر اضممار فاعل دخی مرويدر
مثلاً (ضربنى واكرمنى زيد هو) و (ضربنى واكرمت زيد آ هو) كى
فقط روايت متن مشار اليه دن غير مشهور اولوب ثابت دكلدر .

(كوفيلر) فعل اولى اعمال ايلمكى اختيارده مذهبلى ينك حقيته امرى
القيس شاعرك

ولولنا اسمى لادنى معيشة كفانى ولم اطلب قليل من المال

شعرنده مصراع ثانيه استدلال ايدوب (كفانى) و (لم اطلب) فعللىرى
(قليل) لفظنه متوجه اولوب (كفانى) (قليل) لفظنك لفظا مرفوع
فاعلى اولمىنى و (لم اطلب) لفظا منصوب مفعولى اولمىنى اقتضا ايتمكه
اولمغله تنازع تحقق ايلمش وامرى القيس افصح شعراء عرب ايكن قليل
لفظنى مرفوع قلوب فعل اولى اعمال ايتمشدر ديديلر . لكن بصريار
بوراده تنازعك وجودى مسلم دكلدر زيرا تنازع تقديرنده معنا فاسد
اولور ديو جواب ويرديلر زيرا لوكله سى مدخولى كرك شرط وكرك
جزا وكرك بونلرك برى اوزره معطوف اولسون مثبت ايسه منفى ومنفى ايسه
مثبت قيلر . شو تقديرده اكر كوفيلرك ديديكى كى تنازع بولنوب (كفانى)
و (لم اطلب) فعللىرى اقتضاي مذكورلى اوزره (قليل من المال) لفظنه
توجه ايلسه لر ادناى معيشت ايچون سعى ايتمىوب و آزالده كفائيت
ايلمىوب و آزالى طلب ايلمىنى مفيد اولور كه برى برينه منافى صدر پس
ر (لم اطلب) ايچون العز والمجد كى برمفعول تقدير ايدور زكه (ولم اطلب
العز والمجد) ديمك اولور بوكا ايسه بيت آتيسى اولان .

ولكنما اسمى لمجد مؤئل وقد يدرك المجد المؤئل امثالي

مفادی دخی دلالت ایدر (مؤئل) تأئیلدن اسم مفعولدر مجدك
صفتیدر (مجد) شان و شرف و کرم و جلال و نسباً علو منزلت معناسنه در
(تأئیل) برنسنه اصل و اساس طوئوب نما و برکتله فراوان اولمق و برملکی
اولولندرمق و اهل و متعلقاتنه لباس فاخر لر اکسایله نوازش و احسان
ایلمك معناسنه در (مفاد بیت اول) اگر بن ادنای معیشته سعی ایتسه ایدم
بکا آز مال کفایت ایدر و بن عزو مجدی طلب ایتمز ایدم لکن بن ادنای
معیشته سعی ایتمز و بکا آز مال کفایت ایتمز و بن عزو مجدی طلب ایدرم
دیگدر نته کیم بیت ثانی ده بونی اشراب ایتمشدر (مفاد بیت ثانی) لکن
بن اساس طوئوش بر مجد و شرفه سعی ایدرم و حالبوکه اول مجد مؤئله بنم
امثالم ایریشر لر یعنی نائللردر . بندخی امثالک نائل اولدقلری او مجد
و شرفه نائل اولمقی استرم دیگدر .

خفی اولیه که تنازع عاملینک اسم ظاهرده کوسترلمسینه باعث زیرا کندیلردن
صکره ضمیر متصل اولسه متصل بولندیغی فعل ثانی به مستحق اولوب
تنازع اولماز ایدی و اگر ضمیر منفصل اولسه مثلاً (ماضرب واکرم الا انا)
کبی بونده فعل اول ویا ثانیده اضمار فاعل ایله قطع تنازع ممکن دکلدر زیرا
(الا) ایله بیله اضمار ممکن اوله من و (الا) اولیهرق یالکمز فاعلی اضمارده
ایسه معنا فاسد اولور . بزم بوراده مانحن فیه همز ایسه طریق قطعی اضمار
فاعل ایله اولان تنازعدر شو جهتله مبتدای بجشده تنازع اسم مظهره تخصیص
اولندی واما امام کسائی عنندنه (ماضرب واکرم الا انا) کیلرده تنازعك
طریق قطعی حذفدر و امام فرا عاملینک معاً ضمیر منفصلده عملی تجویز
ایتمشدر .

و تنازع عاملینک کندیلردن صکره کلان اسمنده کوسترلمسی زیرا بینلرنده
توسط ایلیان (اسم) فعل اوله مستحق اوله جغندن تنازع تحقق ایلمز
وعلیک الاعتبار

(نائب فاعل) مرفوعاتك ايكنجيسى نائب فاعلدرکه (ما اسند اليه الفعل) اوشبهه وقدم عليه على جهة وقوعه عليه (ايله تعريف اولنور . يعنى نائب فاعل حقیقه ويا حکماً بر اسمدرکه فعل ويا خود شبه فعل اول اسم اوزرينه واقع اولق اوزره براسناد ايله يعنى حقیقه ويا حکماً مجهول صیغه سی اوزره اوله رق بالاصاله اسم مزبوره اسناد اولنوب اوزرينه ده تقدیم اولنشلردر (ضرب زید) و (زید مضروب غلامه) و (اعجب ان ضربت) قوللر مزده (زید) (غلامه) (ان ضربت) کي اشبو نائب فاعله (مفعول مالم یسم فاعله) دخی دینورکه فاعلی ذکر وتسمیه اولنیان فعل ويا شبه فاعلک مفعولی دیمکدر زیرا نائب فاعل فی الاصل مفعولدرکه عاملی حقیقه ويا حکماً مجهول صیغه سینه تحویل اولنوب وفاعل حذف اولندقدده فاعل مقامنده قائم قلنمشدر .

خفی اولیه که نائب فاعل اوله میان درت مفعولدر (اولکیسی) علمت بابنک مفعول ثانیسیدرکه مفعول اوله اسناد تام ايله مسنددر واکر فعلده کندینه اسناد اولنسه بلاشک (اسناد) ینه تام اوله جغندن اسناد تام ايله هم مسند وهم مسندالیه اولسی لازم کلور ایدی (ایکنجیسی) اعلمت بابنک مفعول ثانی درکه علمت بابنک مفعول ثانسی حکمنده اولغله نائب فاعل اوله مز (اوچنجیسی) حرف جر اولان (لام) مقدر اوله رق (مفعول له) درکه منصوبدر و (نصب) علیتی مشعردر واکر فعل کندینه اسناد اولنسه مرفوع اوله رق نصب و اشعار فوت اولور ایدی (دردنجیسی) مفعول معه درکه برواوه ملتبسدر (واو) ایسه فی الاصل عاطفه اولغله دلیل انفصال اولوب فاعل ایسه فعلدن جزء مثابه سنده درکه اتصال ملایمدر پس (واو) ايله بیله فاعل مقامنده قائم اوله مز و (واو) سز اولسه مفعول معه اولدینی بیانمز ایدی و اما بونلرک ماعداسنی نائب فاعل قلمق جائزدر لکن بر کلامده مفعول به بولندقدده نائب فاعل انحق اول مفعول به قلنور . زیرا تعقل فعل بر فاعله متوقف اولدینی کي بر مفعول بهه دخی متوقفدرکه فاعلک

بعد الفاعل مفعول به احتیاجی و ارسته بیاندر (ضرب زید یوم الجمعہ امام الامیر ضرباً شدیداً) کبی . و معلوم اوله که ایکنجی مفعولی اولکی مفعولنه مغایر اولان اعطیت باینک مفعول اولی مفعول ثانی به نسبتله معنای فاعلیتی حائز اولغله نائب فاعل اولغله ناییدن اولی در . پس (اعطی عمرو زیداً درهماً) قولزده فعل مجهول قلوب و فاعل اولان (عمرو) حذف اولنسه نائب فاعل (زیداً) کلمه سی قلوب اعطی زید درهماً دینور (زید) ایسه آخذ اولغله معنای فاعلیتی حائز در . و اما التباس بولنان موقعده مفعول اولی نائب فاعل قلمق واجب اولور پس اعطی بکر زیداً عمرواً قولزده فعل مجهول قلوب و فاعل حذف اولنسه دفع التباس ایچون (زیداً) نائب فاعل قلمق واجب اولوب (اعطی زید عمرواً) دینور .

درس ۳۹

(المبتدا) مرفوعاتک اوچنجیسی مبتدادر مبتدا و خبرک عاملی بصریلر عندنده معنویدرکه مبتدا اولان اسمک برنسنه کندینه ویا کندی برنسنه یه اسناد اولنق ایچون عوامل لفظیه دن تجریدر واکر امر عدمی شیء وجودیده نیچه مؤثر اوله ییلور دینور ایسه عوامل مؤثرات اولیوب بلکه تأثیر متکلمه علامتلردر دینلور . و بعضلر مبتدا مسندالیه اولوب مسندبولنان خبردن اقوی اولغله مبتداده عامل ابتدادر یعنی تحقیقا ویا تقدیراً صدر وابتداء کلامده بولنسیدر و مبتدا مع الابتدا خبرده عاملدر دیدیلر بونلره کوره مبتداده عامل معنوی خبرده عامل لفظی در . واما کوفیلر عوامل لفظیه دن مجرد امر عدمی وابتداده بولنق امر اعتباریدر شیء وجودیده مؤثر اوله مزلر دیو مبتدا ایله خبردن هربری آخرده عاملدر دیدیلر بونلره کوره هر برینک عاملی لفظی اولمش اولور و بونلرده مقتضی اعراب فاعلیت حکمیه در زیرا مبتدا مسندالیه اولده و خبر کلامده جزء ثانی بولنقده فاعله شبیهلردر وسائر مرفوعاتده دخی مقتضی اعراب فاعلیت حکمیه درکه تأمل ایله وجهی معلومدر .

خفی اولیه که مبتدا ایکی قسمدر بر قسمی اسم و بر قسمی صفتدر زیرا (اسم)

اوج شی مقابلنده استعمال اولنور (۱) ظرف مقابلنده استعمال اولنوب
 هذا اسم دینور لیس بظرف دیکدر (۲) صفت مقابلنده استعمال اولنوب
 هذا اسم دینور لیس بصفة دیکدر (۳) فعل وحرف مقابلنده استعمال
 اولنوب هذا اسم دینور لیس بفعل ولا حرف دیکدر . مبتدایان قسم اول
 صفت مقابلی اولان اسمدرکه (هو الاسم المجرد عن العوامل اللفظية مسنداً
 اليه) دیمکله تعریف اولنور یعنی مبتدا مسند الیه اولدینی حالده عوامل
 لفظیه دن مجرد اولان یعنی کندنده معنأ مؤثر برعامل لفظی بولنیمان (اسم)
 ویاخود (اسم تاویلنده) اولاندر دیکدر (زید قائم) و (حق انک قائم)
 و (ان تصوموا خیر لکم) قوللرمزده اولدینی کبی اشیبو مبتدا مسند الیه
 اولوب و بر خبره محتاجدر .

و مبتدایان قسم ثانی صفت اولاندرکه (هو الصفة الواقعة بعد النفي والاستفهام
 رافعةً لظاهر) دیمکله تعریف اولنور یعنی بر اسم ظاهری و یا (مثلاً
 ضمیر منفصل کبی) اسم ظاهر حکمنده اولان براسمی رافع اوله رق کلمات
 نفی و یا استفهامدنصکره واقع اولان صفتدر دیکدر (ما قائم الزیدان) و
 (ماراغب اتماعنا) و (غیر قائم البکران) و (لیس قائم البشران) و
 (اقائم الزیدان) و (اراغب انت عن آلهتی یا ابراهیم) و (ماصانع البکران)
 و (متی ذاهب البشران) و (کیف مصبح ابنک) و (ایان قادم رفیقاک)
 کبی . خفی اولیه که بوراده ایکی احتمال وارددر .

(احتمال اول) صفت مابعدنده اولان اسم ظاهره افراد و تشیه و جمعده
 موافق اولمقدر افرادده موافقت صورتنده مثلاً (اقائم زید) دینورکه ایکی
 وجه جائزدر وجه اول صفت مبتدا اولوب و مابعدی فاعل و ساد مسدالخبر
 اوطلق وجه ثانی صفت خبر مقدم و مابعدی مبتدای مؤخر اولمقدر و تشیه
 و جمعده موافقت صورتنده مثلاً (اقامان الزیدان) و (اقامون الزیدون)
 دینورکه انحق صفت خبر مقدم و مابعدی مبتدای مؤخردر .

(احتمال ثانی) صفت مابعدنده اولان اسم ظاهره افراد و تشیه و جمعده
 موافق اولماقدر نته کیم آنفا سبقت ایلیان مثالرده اولدینی کبی که بونارده
 صفت مبتدا و مابعدی فاعل و ساد مسدالخبردر .

و خفی اولیه که مبتدایان قسم ثانیه ائمه نحاتدن سیبویه ماقبلنده کلمات نفی
 واستفهامدن بریسی بولمیه رق صفتک مبتدا اولسنی مع القبح جائز کوردی
 ولیکن (اخفش) من غیر قبح تجویز ایلوب و شاعرك (فخر نجن عند
 الناس منکم) مصرعیه شو وجهله استدلال ایلدیکه خیر کله سنک اصلی
 اخیر اولوب اسم تفضیلدرکه صفتدر وما قبلنده بر استفهام و یانفی ادانی
 اولیه رق مبتدادر و نحن فاعلیدرکه ساد مسدا الخبردر واکر (نحن) مبتدا
 و (خیر) کله می اکا خبر قلنسه اسم تفضیل اولان (خیر) کله سیله معمولی
 اولان (منکم) بینی بر اجنبی ایلکه (نحن) کله سیدر فصل اولمقی لازم
 کلور ایدی زیرا مبتدا ایله خبر بیننده هر تقدیر تلازم واریسه ده یکدیگرندن
 اجنبی عد اولنور . واما (خیر) کله سی مبتدا و (نحن) فاعلی اولدینی
 صورتده (فاعل) عاملندن جزء مشابه سننده اولدیغندن فصل اعتبار اولمز
 دیدی .

لکن فاضل عصام استدلال اخفی رد ایدوب اسم تفضیلک فاعل ظاهرده
 عملی مسئله کله منحصردرکه شروط مخصوصه سی بولندقدردر بوراده
 ایسه فاعل ظاهرده عملی جائز دکلدر بلکه (خیر) خبر مقدمدر و معمولی
 محذوفدرکه (منکم) در و مذکور اولان (منکم) آئی مفسردر و (نحن)
 مبتدادر دیدی .

و خفی اولیه که کړک فاعل و کړک مبتدایان قسم اول مسندالیه در مسندالیه اولمق
 ایسه اسم خاص اولدیغندن فاعل و مبتدایان قسم اول اسم مختصلدردر
 و مبتدایان قسم ثانی هر تقدیر مسند ایسه ده قسم اولک فرعی اولوب فرع
 ایسه اصله تابع بولندیغندن بودخی اسم خاصدر و سائر فاعلیت حکمیه
 تحتده بولنان مرفوعات دخی اسم مختصلدردر .

درس ۴۰

خفی اولیه که مبتدا مخبر عنه و محکوم علیه اولوب بر مجهولدن خبر ویرمک
 و مجهول اوزره حکم ایلماک مفید اولدیغندن مبتداده اصل اولان معرفه
 اولمقدر . ولیکن بعض جهتله تخصص کسب ایتدکده نکره مبتدا اولور

بوده کافیه ده رمز ایدلیدی اوزره التي محله در (اولکیسی) نکره بر
 صفت و یا بر مضاف الیه و یا بر دیگر نسبه ایله تقید اولندقدده در (ولعبد
 مؤمن خیر من مشرک) آیت کریمه سنده و (صوت بلبل شغلی) و (افضل
 منك افضل منی) قولزده اولدینی کی (ایکنجیسی) نکره حیز استفهامده
 واقع اولسه (ارجل فی الدار ام امرأة) قولزده اولدینی کی زیرا متکلم
 برینک دارده اولدینی بیلوب تعیننی طلب اتمکله (رجل) متکلمک شو
 وجهله معلومی اولسیله تخصص ایلمشدر و کلمات استفهام واقع اولان دخی
 بو قیلدندر (من عندک) کی (اوچنجیسی) نکره حیز نفی ده واقع اولسه
 (ما احد خیر منك) قولزده احد کی عموم افاده ایدوب جمیع افرادده ایسه
 من حیث المجموع تعدد اولیوب امر واحد سببکننده اولغله کسب تخصص
 ایتشددر و اثبات ده دخی کندیله عموم و شمول قصد اولنان نکره کسب
 تخصص ده بو کبیدر قمره خیر من جراده کی (دردنجیسی) فی الاصل
 مؤخر و فاعل اوله رق بعده لاجل التخصیص تقدیم اولنوب مبتدا قلنان
 محله در فاعله شیه بولغله فاعلک کسب تخصص ایدلیدی برجهتله کسب
 تخصص ایتش اولسی ملاحظه سیله مبتدا قانور (شرا هر ذاناب)
 قولزده اولدینی کی فاعلک کسب تخصص ایدر اولدینی برجهت مثلاً (قام)
 فعلی ذکر اولندقدده مابعدنده قیام ایله محکوم علیه بر فاعل اوله جنی معلومدر
 پس (رجل) دیندکده رجل موصوف بصحة الحکم علیه بالقیام دیمک
 اولورکه شو جهتله کسب تخصص ایلر بونک کی کانه قول مزبورده دخی
 (اهر ذاناب) دیندکده مابعدنده اهر ارایله متصف بر فاعلک بولنه جنی
 مجزوم اولوب (شر) دیندکده بودخی ارائه اولدینی وجه اوزره کسب
 تخصص ایلمش و لاجل التخصیص بالتقدیم شو ملاحظه ایله مبتدا قلنمشدر
 قول مزبور بین العرب ما اهر ذاناب الا شر موضعنده مستعمل بولنه رق
 مھرک شر اولق اوزره قصرنی مفیددر . و (بیلمیدر) که معتادی
 اوزره کلک نباحی یعنی اوریمی گاه بر اجنبی دوستک کلسنده اوله رق
 خیر و گاه بر عدوک کلسنده اوله رق شر اوله جغندن « نباح معتاد » مراد
 اولندقدده اشبو قصر خیره نسبتله اولوب قصر اضافیدرکه (شر لاخیر

اهرذئاب) دیمکدر واما کلک غیر معتادی اوزره نباحی یعنی اولیمسی
 زمان جاهلیت اعتقادی اوله رق مشاوم اولوب آنحق شر اولدیغندن « نباح غیر
 معتاد » مراد اولنورایسه بوکا کوره قصرک صحتی ایچون بر صفت تقدیر
 ایلمک لازم اولورکه مثلاً (شر عظیم لاحقیر) دیمک اولوب شوصورته
 قول مزبور محل اول قیلندن اولور اشیو قول بین العرب ضرب مثلدی
 قوی برکیمسه بر حادثه ده عاجز اولدقه آنک حقهده استعمال اولنور
 (بشنجیسی) خبر ظرف اوله رق تقدیم اولندیغنده درکه تقدیم خبر ایله
 کسب تخصص ایدر (فی الدار رجل) کبی زیرا مقدمه (فی الدار) دیندکه
 بعده دارده استقرار ایله موصوف برکیمسه نک ذکر اولنه جفی بیلمکله شوجبهله
 تخصص کسب ایتیش قوه سننده در (التنجیسی) متکلمه نسبتله تخصص کسب
 ایلدیکنده در (سلام علیک) کبی زیرا اصلی (سلامت سلاماً علیک) ایدی
 دوام واستمرار قصدیه جمله فعلیه دن ا- مییه عدول ایچون (سلامت)
 فعلی حذف اولنوب ونصب دن رفعه عدول اولمغله (سلام علیک) اولمشدر
 (سلامی علیک) منزله در خفی اولیه که بعضیلر عدد مخصصاتی اونه بالغ
 قلدیلر و شرح تسهیلده اون طقوزه ابلاغ اولندی لکن بعض محققین
 جهت تخصص بولمده بونجه تکلفاته دوش- میوب بر نکره دن خبر ویرمنک
 صحتی افاده اوزره مبتنی قلدیلر یعنی بر فائده ی مفید اولدقه صحیح و بر
 فائده ی مفید اولدقه غیر صحیح عد ایتدیلر پس (کوکب انقض الساعة)
 قولمز مفید اولمغله هیچ بروجه مخصص اولمدیغی حالده جائز کوریلوب
 (کوکب) لفظی مبتدا قلدیلر خبری (انقض) جمله سیدر و (الساعة)
 انقض فعلنک مفعول فیه- در (مفادی) بر کوکب شو ساعتده ساقط
 اولدی دیمکدر واما (رجل قائم) قولمز مفید اولمغله جائز کورمدیلر
 قاضی بیضاوی دخی بونی اختیار ایلدی وفاضل جامی هذا اقرب الی
 الصواب دیدی .

درس ۴۱

خفی اولیه که مبتدا ذات و خبر احوالندن بر حال اولوب ذات ایسه احوال

اوزره مقدم اولغله مبتداده اصل اولان بر مانع منع ایتدکجه خبری اوزره
مقدم اولمقدرد مبتداتک حتی تقدم اولدیغی جهتله (فی دازه زید) ترکیبی که
(فی دازه) خبر مقدم وضمیر مبتدا اولان مؤخر (زیده) راجع اوله
جائز کورلمشدر . زیرا مبتدایرتبه مقدم اولغله آتجق لفظاً اضممار قبل الذکر
لازم کلور بوايسه جائزدر . واما (صاحبها فی الدار) ترکیبی که (صاحبها)
مبتدا وضمیر خبر واقع اولان (فی الدار) ترکیبده دازه راجع اوله جائز
کورلماشمشدر . زیرا خبرک حتی ذاتاً تأخر اولغله لفظاً ورتبه اضممار
قبل الذکر لازم کلمکله جائز دکلدرد .

خفی اولیه که سکنز محمله مبتدای خبری اوزره تقدیم ایلمک واجبدر
(اولکیسی) مبتدا صدارت کلام اقتضا ایدر بر معنایی مشتمل اولسه مثلاً
(من ابوک) کبی من معنای استفهامی مشتمل و وجوباً مقدم مبتدادر
لکن بوسیله یه عنندهدر . واما آنک غیری (من) لفظی وجوباً مقدم
خبر و (ابوک) بی کافه اضافتله معرفه اولغله مبتدا قیلرلر . بومقامده متفق
علیه مثال (من قام) قولمزدرد که من وجوباً مقدم مبتدا وقام جمله سی خبردر
(ایکنجیسی) مبتدا و خبر ایکیسی دخی معرفه اولسه کک رک تعریفده
متساویتین اولوب وکک غیر متساویتین اوله رق برینک مبتدا آخرک خبر
اولسنه قرینه اولسه انا بوالنجم وزید المنطق کبی (اوچنجیسی) اصل تخصیصده
متساویتین اولسه لر (افضل منک افضل منی) کبی که هر بری معمولیه
کسب تخصیص ایتمشدر . دفع اشتباه ایچون شو صورتلرده مقدم واقع
اولان وجوباً مبتدا قلنور (تساویئک اصل تخصیصده کوستراسی) زیرا
تساویدن مرادمن احدهماده تخصیص آخرده اولان تخصیص مقدارنجه
اولمق دکلدرد . بلکه کک مبتدا وکک خبر ایکیسی دخی هر نه جهتله اولور
ایسه اولسون بروجهله کسب تخصیص ایلامش بولنمسیدر . شو صورتله
(غلام رجل صالح خیر منک) و (ضارب امرأة ضارب رجل صالح)
قوللرمزده هر تقدرد اولککنده مبتدا خبردن و ثانیده خبر مبتدادن مقدار
تخصیصده زیاده ایسهده مبتدا کذا وجوباً مقدم واقع اولمشدر (دردنجیسی)
خبر مبتداتک فعلی اولسه (زید قام کبی) مبتدا کذا وجوباً مقدم اولور

زیرا تأخیر اولوب (قام زید) دینسه (زید) کله سی فاعله و یا خود قام
کله سنک ایچنده فاعله راجع بر ضمیرک مستتر اولسی تصورینه کوره
فاعلدن بدله ملتبس اولور ایدی و فعل (تثنیه) و یا (جمع) اولان محله مثلاً
(الزیدان قاما) و (الزیدون قاموا) کبی تأخیر اولنسه فاعلدن بدله ملتبس اولور
ایدی و (تثنیه ایله جمعه الف و واو تثنیه و جمعه دلالت ایدر حرفلردر .
ضمیر دکلردر) دیو ذاهب اولانلر عندنده فاعلری اسم مظهر اوله جغندن
کذا فاعله التباس لازم کلور ایدی و اما خبر مبتدایک فعلی اولسه تقدیم
واجب اولماز (زید قام غلامه) کبی که قیام مبتدا اولان زیدک فعلی اولیوب
غلامک فعلیدر بونده (قام غلامه زید) دینک دخی جائردر (بشنجیسی)
مبتدایک خبری اوزره فاداخل اولان موقعلرده مبتدا و جواباً مقدمدر
نته کیم درس آتی ده بیانی کلور (التنجیسی) خبر لفظاً و یا معنأ (الا) دن
صکره واقع اولسه مبتدا و جواباً مقدمدر (مازید الا قائم) و (انما زید قائم)
کبی (یدنجیسی) مبتدا (لام ابتدا) یه مقارن اولسه و جواباً مقدم اولور
(لزید قائم) کبی (سکرنجیسی) مبتدا ضمیر شان اولسه و جواباً مقدم اولور
(قل هو الله احد) قول شریفنده اولدینی کبی . و خفی اولیه که مبتدا
قیام قرینه عندنده بعض جوازاً حذف اولنور . غره هلالی کورن
کیمسه نك (الهلال والله) قولنده اولدینی کبی که (هذا الهلال والله)
دیمکدر و مثلاً (زید اقامم ام قاعد) دیو سؤال ایدن کیمسه نك جوابنده
(قائم) دیندکده اولدینی کبی که (زید قائم) تقدیرنده در .
و بعض و جواباً حذف اولنور بوده لقصد الذم او المذح بر (نعمت) ماقبلندن
قطع اولنوب مرفوع او قوندقده در . مثلاً بسمله ده (الرحمن) (والرحیم)
مرفوع او قنوب ماقبلندن قطع اولنسه لر (هو الرحمن) (هو الرحیم)
تقدیرنده و جواباً محذوف بر مبتدایک خبری اولور (نعم الرجل زید) قولمزی
(نعم الرجل هو زید) تقدیرنده کورنلر زیدی کذا و جواباً محذوف
بر مبتدایک خبری قلمشلردر .

خفی اولیه که (اما) ی شرطیه دنصکره واقع مبتدأ نك خبرنده فانك دخولی
واجبدر . (امازید فنطلق) کبی بوندن ایکی موقع استئنا اولنور اولکیسی
ضرورت شعریه در نته کیم لاجل الضروره شاعرك

(اما القتال لا قتال لیدیکم ولکن سیر آفی عراض المواقب)

شعرنده (فا) سز اوله رق واقع اولمشدر (فلا قتال لیدیکم) دیمکدر . مصرع
ثانیه (سیرا) مقدر بر فعلک مفعول مطلقیدر (ولکن تیرون سیراً)
تقدیرنده در (عراض) طرفلر و ناحیهلر معناسنده در (مواکب) موکب
جمعیدر (موکب) حیش فرقهلرینه وارد و کاهه دینور (مفاد بیت) اما
قتال و محاربه جه سزده قتال یوقدر یعنی عاجز سکز ولکن تقرب ایدمه میوب
عسکر اردولرینک اطراف و ناحیهلرنده یورر طولانر سکز دیمکدر .
ایکنجیسی فای حاوی اولان قول حذف واضمار اولندقددر (واما الذین
اسودت وجوههم اکفرتم) آیت کریمه سنده اولدینی کبی (فیقال لهم اکفرتم
تقدیرنده در واکر بعد حذف القول (فا) مقولنه و یریلسه (مقول) جمله
اولغله جزاء شرط مقولدر توهم اولنور ایدی . و خفی اولیه که یتش محمله
مبتدأ نك خبری اوزره فانك دخولی جائزدر (اولکیسی) مبتدأ اسم موصول
اولوب صله سی جمله فعلیه اولسه الذی یأتینی فله درهم کبی (ایکنجیسی) مبتدأ
اسم موصول اولوب صله سی جمله ظرفیه اولسه الذی فی الدار فله درهم کبی
(اوچنجیسی) مبتدأ صله سی جمله فعلیه اولان اسم موصول ایله موصوف اولسه
الرجل الذی یأتینی فله درهم کبی (دردنجیسی) مبتدأ صله سی جمله ظرفیه اولان
اسم موصول ایله موصوف اولسه الرجل الذی فی الدار فله درهم کبی
(بشنجیسی) مبتدأ جمله فعلیه ایله موصوف نکره اولسه رجل یأتینی فله
درهم کبی (التنجیسی) مبتدأ جمله ظرفیه ایله موصوف نکره اولسه رجل
فی الدار فله درهم کبی . و (الی قسم دخی) مبتدأ شو ذکر اولنسان الی

قسم دن هر برينه مضاف نكره واقع اولسه (غلام الذي يأتى اوفى الدار
فله درهم) و (غلام الرجل الذي يأتى اوفى الدار فله درهم) و (غلام رجل
يأتى اوفى الدار فله درهم) كى

(اون او چنجيسى) مبتدا مفرد ايله موصوف بر نكرهيه مضاف اولان
(كل) لفظى اولسه (كل رجل عالم فله درهم) كى و اما جمله ايله موصوف
نكرهيه مضاف اولان ماسبق ده داخلدر (اون دردنچيسى) مبتدا غير
موصوف بر نكرهيه مضاف (كل) لفظى اولسه كل رجل فله درهم كى .
شو مبتدرك خبرنده فانك دخولنه سبب مبتدا معنای شرطى متضمن
اولديغنددر بوراده معنای شرط ولو متكلمك مجرد اعتبارنده اولسون اولك
ثانيه ويا ثانيه حكمه سببى در وشيخ رضى بوراده معنای شرطى ثانيك
اوله لزوميله تعريف ايلدى و برده شو محملرده مبتدا ايهامندن ايجون اداة
شرط و جمله واقع صفت و صله لر فعل شرط و خبر جزاء شرط مشابهنده در
هر نقدر اون او چنجيده صفت مفرد ايسه ينه فعل شرطه مشابهتى
تأكيددن خالى دكلدر و اون دردنچيده مبتدا عمومى مفيد اولسندن ذوصفت
اولنلر منزلنده در .

شو اون درت قسمدن هر برى اوزره (ان) مشدده ، مكسوره دخى داخل
اولوركه اون درت قسم دخى شو جهته حاصل اولور و (ان) مفتوحه
مشدده و (لکن) و (كان) دخى داخل اولوب بونلرك دخى هر برندن اون
دردر قسم متصور اولوركه مجموعى یتش اولور امثله مناسبه لر ينى استخراج
عند التامل طالب روشن ضميره غير خفیدر .

خفى اوليه كه حروف مشبه بالفعلن (ليت) و (لعل) خبرينه فانك
دخولى جائز اولان بر مبتدا اوزره داخل اولسه لر فانك دخولى منع
ايدرلر زيرا فانك صحت دخولى مبتدا ايله خبرك شرط و جزايه مشابهتلى
ملايه سيله در (ليت) و (لعل) ايسه داخل اولدقلى كلامى خبريتدن
انشائيه اخراج ايدر اولدقلى و شرط و جزا ايسه اخبار ياتدن
بولنديغندن مشابهتى ازاله ايدرلر و بعضيلر (كان) يى دخى رأسا مانع
قلوب و (ان) مشدده مكسوره و مفتوحه و (لکن) يى دخى مانع

زمره سنه الحاق ایلدیلر ایسه ده (ان) و (ان) و (لکن) نك قرآن
عظیم الشانده و کلام فصیحاده مانع اولمقلری کورلمکله رد اولمشدر
نته کیم (قل ان الموت الذی تفرون منه فانه ملائیکم) آیت کریمه سنده
(ان) مشدده مکسوره و (واعلموا انما غنمتم من شیء فان لله خمسہ)
آیت کریمه سنده (ان) مشدده مفتوحه و شاعرك

(واما الوداد فی قلوب فراسخ) (وان کان بین الجسوم فراسخ)
(فوالله ما فارقتکم قالیالکم) (ولکن ما یقضى فسوف یكون)

شعر نده بیت ثانیده مصرع ثانیده (لکن) دخول فایه مانع اولمیوب
خبر لری اوزره (فا) داخل قلنمشدر (مفاد شعر) اماود و محبتمن قلبلرده
راسخ و ثابت دره هر نقدر جسملرمن بیننده فرسخلر یعنی بدمسافه وار
ایسه ده . اللهه قسم ایدرمکه بن سزدن سزه بغض ایدیچی اولدیغم حالده
مفارقت ایلمدم . ولکن قضا و تقدیر اولنان شی عاقبت اوله جقدر . دیمکدر
واما (کان) کله سنده اکثر نجات ساکت ایسه ده بعض تحقیق ایچون کله
(ان) کله سنه موافقه عدم مانعیتی تصحیح اولمشدر و استعمالاً کلام
فصیحاده خبر نده فانك دخولنه دسترس اولنه مدیغندن تسهیل و لب الالباب
صاحب لری مطلقاً منع ایلمشلر در .

درس ۴۳

(الخبر) مرفوعاتك دردنجیسی خبردرکه عاملی عندالبصرین معنوی و انلرك
غیری عندنده لفظیدر (خبر) (هوالمجرد عن العوامل اللفظية المسند به المغابر
للصفة الواقعة مبتداء) دینمکله تعریف اولنور یعنی خبر عوامل لفظیه دن
مجرد و مسند به و (مبتدا) واقع اولان صفته مغایر براسمدر دیمکدر . بوده
کاه جامداولور (زید غلامك) و (عمرو اخوك) و (هند امك) قوللرمزده
(غلام) (اخ) (ام) کبی . و کاه مشتق و یا اسم مستعار و اسم منسوب

کبی مشتق مجراسنده جاری اولان براسم اولور (زید قائم) و (زید اسد)
و (زید بغدادی) قوللرمزده (قائم) (اسد) (بغدادی) کبی که (قائم)
مشتق در و (اسد) محترئ و (بغدادی) منسوب الی بغداد مفادنده اولمغله
مشتق مجراسنده جاریدر وشو مذکور بصریلرک ذاهب اولدیغیدر که خبری
مبتدا اوزره حمل ایلمنک معناسی خبر و مبتدا بر ذات واحدهیه صادقلردر
دیگدر دیدیلر . واما کوفیلر (خبر) بعینه ذات مبتدا اولمغله هر حالده
خبرده مبتدایه راجع بر ضمیر لازمدر دیرلر و (خبر جامد) ده کتوریلان
امثله یی (زید مملوکک) و (عمرو مؤاخیک) و (هند والدتک) تأویلنده
قیلرلر .

خفی اولیه که خبرده اصل اولان نکره اولمق ایسه ده منافی افاده اولمغله
کاه معرفه دخی اولور (الله الهنا) و (محمد نبینا) قوللرمزده اولدینی کبی
و خبرک تعددی دخی جائزدر (زید قائم قاعد) کبی و خبرده اصل اولان
مفرد اولمقدر لکن بعض جمله واقع اولور که بوده یا جمله اسمیه اولور
(زید قائم ابوه) کبی و یا جمله فعلیه اولور (زید قام ابوه) و (زید ضربته)
کبی و یا جمله ظرفیه اولور که (متعلق) فعل تقدیر اولندیغنه کوره جمله
فعلیهیه راجعدر (زید فی الدار ابوه کبی) واما اسم فاعل تقدیر اولندیغنه
کوره مرکب ناقص اولور (جمله) فی ذاتها مستقل اولوب آخره ارتباطی
غیر مقتضی اولمغله خبر واقع اولان جمله البته کنیدی مبتدایه ربط ایده جک
برعائده محتاجدر . و عائد التی نوعدر .

(اولیکسی) مبتدایه راجع ضمیردر امثله مذکورده اولدینی کبی .
(ایکنجیسی) افعال مدح و ذمک فاعلاری اوزره داخل الف لامدر
(نعم الرجل زید) و (بئس الرجل عمرو) قوللرمزده اولدینی کبی لکن شو
مذکور مخصوص بالمدح یا خود مخصوص بالذمی مؤخر مبتدا و ماقبلنده
بولنان افعال مدح و ذم جمله سنی خبر قیلنلر عندنددر .

(اوچنجیسی) مضمیر موضعنده مظهر وضع ایلمکدر (الحاقه مالحاقه)
کبی (الحاقه) مبتدا و (مالحاقه) جمله سی خبردر (ماهی) منزلنده در که
مضمیر موضعنده مظهر وضع اولمشدر .

(در دنجیسی) خبر مبتدایه تفسیر اولمق یعنی مبتدایان عبارت بولمقدرد که کمال اتصال و امتزاجدن ایچون شوکیفیت رابط مقامنده اولور (قل هو الله احد) کبی که (هو) مبتدا و (الله احد) جمله سی خبریدر و آنی مفسردر .

(بشنجیسی) عائد کاه اسم اشاره اولور (والذین کفروا و کذبوا بآیاتنا اولئک اصحاب النار) آیت کریمه سنده اولدینی کبی (والذین) مبتدا و (اولئک اصحاب النار) جمله سی خبریدر (اولئک) اسم اشاره و رابطدر .

(التنجیسی) جانب خبرده مبتدایه شامل اولان عمومدر (اماالقتال لاقتال لیدیکم) شعرنده اولدینی کبی ودخی (انه من یتق ویصبر فان الله لایضیع اجر المحسنین) آیت کریمه سنده دخی جمله شرط ایله جوابی بیننده رابط محسنین ده اولان عموم مشتملدر دینمشدر .

و خفی اولیه که عائد ضمیر اولدقدده قیام قرینه عننده بعض قیاساً حذف اولنور که بوده اوچ شرط ایله مشروطدر . اولکیسی جمله خبریه (اسمیه) اولمیدر . ایکنجیسی عائد اولان ضمیر (من ایله مجرور) بولمیدر . اوچنجیسی جمله خبریه ده اولان مبتدا معناده مبتدای اولدن جزء اولمیدر .

(البر الکربستین) قولزده اولدینی کبی که (البر) مبتدادر ، بر ، خطه معناسنده (الکربستین) جمله سی خبردر عائد محذوفدر تقدیر کلام (البر الکربمنه بستین) در بابیع البته شیء آخرک بهاسنی بیان اتمیه جکی قرینه سیله عائد حذف اولنمشدر (کر) یدیوز یکرمی صاعه دینور که هر صاع بیک قرق درهمدر معنای مثال شو خطه دن هر بر کر التمش درهمدر دیمکدر وعائد بعض سماعا حذف اولنور (ولن صبر وغفران ذلك لمن عزم الامور) آیت کریمه سنده اولدینی کبی که (ان ذلك منه) تقدیرنده در

درس ۴۴

(خفی اولیه که) خبر (ظرف زمان) ویا (ظرف مکان) اولسه ویا (جار و مجرور) اولسه که جمیع احکامده ظرف مجراسنده جاری اولدیغندن جار و مجروره دخی اصطلاحاً ظرف تسمیه اولنمشدر بونلرده عندالبصرین بر

فعل وعند الكوفيين براسم فاعل مقدر قيلنور زیرا ظرفده برعامل لازم
اولوب فعل عاملیتده اصل اولغله بصریلر فعل تقدیر ایلدیلر و (خبر) ده
اصل اولان افراد اولغله کوفیلرده بوجهته باقهرق اسم فاعل تقدیرینی
اختیار ایلدیلر مثلاً (القتال يوم الجمعة) و (زید عندك) و (زید فی الدار)
قوللرمزده بصریلر کان و حصل کی بر فعل تقدیر ایدرلرکه (القتال کان
يوم الجمعة) و (زید کان عندك) و (زید کان فی الدار) دیمك اولور
فعل مزبور حذف اولنوب و فاعلی ظرفده قلمشدر پس ظرف جمله
فعلیه ایله مؤل اولوب و محلاً مرفوع خبر قيلنور واما کوفیلر کائن
و حاصل کی اسم فاعل تقدیر ایدرلرکه ذکر اولان مثاللر (القتال
کائن يوم الجمعة) و (زید کائن عندك) و (زید کائن فی الدار) دیمك
اولور اسم فاعل حذف اولنوب و ایچنده مستتر بولنان فاعلی ظرفده
قلمشدر اسم فاعل ایچنده مستتر فاعلیله بیله مرکب ناقص و مفرد
حکمنده ایدوکندن پس (ظرف) مرکب ناقص اولوب کذا محلاً مرفوع
خبر قيلنور و شو ظرفلره عامللرینك مقامنده قائم اولوب كرك معنا و كرك
عمل و اعراب و ضمیرلرینی متضمن اولدقلرندن ظرف مستقر دنیلور شو
بیاندن مستبان اوله جنی اوزره ظرف مستقر بصریلره کوره جمله فعلیه
و کوفیلره کوره مرکب ناقص اولوب امثله مذ کورهده محلاً مرفوع
اوله رق مبتدایه خبر قلمشدر و بیلمیلدرکه ظرفلر مع هذا کنیدی
نفسلرنده ظرف زمان و ظرف مکان ایسه متعلق محذوفك مفعول فیهی
و جار و مجرور ایسه جمهوره کوره مفعول بهی و ابن حاجب و برکوی
و بونلرك اثرینه تبعیت ایدنلره کوره مفعول فیهی اولمق اوزره منصوبلردرکه
متعلق محذوف عبارده کوستریلهرك امثله سابقهیه چشم دقتله نظر اولندقدده
بك جلیدر .

شو تقریردن مستبان اولدینی اوزره انتصاب ظروف مفعول فیه و یا مفعول
به اولمق اوزره اولوب و نصبلرنده (عامل) ذکر اولدینی اوزره متعلق
محذوفدرکه بصریلرك ذهابیدر واما کوفیلره کوره بر مبتدایه خبر واقع
اولان شو ظرفلرك انتصابی علی الخلاف اولوب نصبلرنده عامل مغنویدر .

على الخلاف منصوبدر دیکدن مراد لری شواولیورکه مثلاً زید قائم دیندکده
 خبر مبتدایه موافق بولنشددرکه، قائم، اولان، زید، در وحق سبحانه وتعالی نك
 و (ازواجه امهاتهم) قول شریفی نمونده دخی موافقددرکه مبتدا کانه عین
 خبردر یعنی ازواج مطهرات حضرت رسالت علیه وعلیهن اتم التسلیات
 والتحیات حقیقه امهات مؤمنین دکلسده لکن امهات مؤمنین منزله درلر
 شو جهتله خبر مبتدایه اعرابده موافق بولنش واما (زید عندك) قولنرده
 خبر مبتدایه مخالفدرکه زید (عند) اولیوب (اسم خبر) مبتدا اوزره
 اطلاق اولنه من شو جهتله اعرابده مبتدایه مخالف بر اعراب ايله متصف
 اولوب انتصاب ظرو فده عندلرنده اشته شو مخالف متعاسی عامل قلنمشدر
 بوكا بر شینك بر شیئه مخالفتی موجب انتصاب اوله من دینهرك جواب
 ویرلشدر وبعض نحات (عامل) مبتدادر دیشلردر.

مبتدایه خبر واقع اولان ظرفلرك حالی بیلندی ایسه بر موصوفه صفت
 ویر موصوله صله و بر ذوالحاله حال واقع اولان ظرفلرك حالی دخی بوقیاس
 اوزره ظاهردر واما شو مواضع اربعه نك غیرنده ظرف و جار و مجرور
 اضلا بر ملفوظ موجودك غیرینه تعلق ایتمزلر نته کیم بونی شیخ رضی
 ذکر و تصریح ایلمشدر. ظرف مستقر ك مطلب اسمك آخرنده معنای
 فعلده واضحا بحی کله جکدر و خفی اولیه که خبرده اصل اولان مبتدادر
 مؤخر اولقدر لکن الی محله مبتدا اوزره تقدیمی واجیدر.

(اولکیسی) صورة مفرد اولان بر خبر صدر کلام اقتضایدر بر معنایی مشتمل
 اولسه (این زید) کبی (این) معنای استفهامی متضمن اولغله وجوباً مقدم
 خبر و (زید) مؤخر مبتدادر لکن (این) ظرف اولغله بضریلره کوره
 بر فعل مقدر اولوب این کله سی صورة مفرد ایسه ده حقیقه جمله در شو
 جهتله ترکیب اولندقه (این) ظرف مستقر متعلق محذوفدن انتقال ایدن
 فاعل ضمیر تحتشده مستتر (هو) راجعدر زیده فاعلیدر ظرف مستقر ك
 (ظرف مستقر) مع فاعله جمله سی جمله فعلیه اعرابدن محلا مرفوع خبر
 مقدم و (زید) مبتدای مؤخر دیو ترکیب اولنور واما کوفیلره کوره
 اسم فاعل مقدر اولغله این کله سی صورة و حقیقه مفرددر پس وجه

مذکور اوزره ترکیب اولنوب لکن ظرف مستقر مع فاعله (مرکب ناقص محلاً مرفوع خبر مقدمدر) دینور سائر ظرف مستقر لک ترکیبی دخی بو سیاق اوزره اجرا اولنور .

(ایکنجیسی) خبر مبتدأ نك مبتدا واقع اولسنی مصحح اولسه (فی الدار رجل) کی (فی الدار) ظرف مستقر و وجوباً مقدم خبر درکه نکره اولان (رجل) لفظی آنک تقدیمیه کسب تخصص ایدوب مبتدا اولشددر اشبو (فی الدار) عبارته سنده دخی بصر یلر و کوفیلرک اختلاف و توجیهی سبقت ایلان بیانز ایله معلومدر .

(اوچنجیسی) جانب مبتداه متعلق خبره راجع بر ضمیر بولنسه (علی التمرة مثلها زبداً) قولزده اولدینی کی (علی التمرة) ظرف مستقر اولوب وجوباً مقدم خبردر و (مثل) مؤخر مبتدا اولوب ضمیره مضاف اولشددر واشبو ضمیر (تمرة) لفظنه راجعدرکه خبرک تعلقاندندر زیرا خبر (علی التمرة) قولیدر یالکز (تمرة) لفظی آندن بر جزء اولغله آنک متعلقیدرکه جزئک کله تعلق قیلندندر و اگر شومثال نخونده خبر تأخیر اولنسه لفظاً و رتبه اضمار قبل الذکر لازم کلور ایدی .

(دردنجیسی) (ان) مفتوحه مشدده جمله سندن خبر واقع اولسه (حق انک قائم) کی (حق) وجوباً مقدم خبر و (انک قائم) جمله سی (قیامک) تأویلنده اوله رق محلاً مرفوع مؤخر مبتدادر و اگر شو مثال نخونده خبر تأخیر اولنسه (ان) مفتوحه (ان) مکسوره یه ملتبس اولور ایدی . (بشنجیسی) (الا) دن و یا (الا) معناسندن صکره واقع اولسه خبر وجوباً مقدم اولور ماقائم الازید و انما قائم زید کی

(التنجیسی) تقدیم خبردن قصد اولنان معنا تأخیری حالنده فهم اولنمز ایسه خبری تقدیم واجبدر مقام تفاخرده هاشمی انا کی

درس ۴۵

خفی اولیه که (خبر) بعض جوازاً حذف اولنور نته کیم (ازید قائم ام عمرو) دیو بر سؤال جوابنده (زید) قولزده اولدینی کی (زید قائم)

تقدیر ندهد و (اذا) ی مفاعله تنصکره واقع مبتدأ نك خبری دخی عند
الاكثر جوازاً محذوفدر (خرجت فاذا السبع) قولزده اولدینی کی
(خرجت) فعل و فاعل جمله سی لامل لها من الاعراب استینافیه در
و (فا) عندا لاكثر سبیه در مابعدینك ماقبلنه لزومنی ارائه ایدر که صاحب
مطول (مفاعلة سبع لازمة للخروج) ایله و فاضل عصام (تسبب عن
خروجی مفاعلة السبع) سیاقنده بیان ایلمشدر و امام مازنی و زجاج (فا)
زائده در دیدیلر و هر تقدیر شیخ رضی زائد اولسه حذفی جائز اولور
ایدی دیو تزییف ایلدی ایسه ده فاضل عصام لازم الزیاده اولمق احتمالیله
جواب و یردی و معنی الیبده (جواز حذف) زوائدك لوازمندن دکلر
زیرا فعل تعجب ثانیده مثلاً (انصر به) ده اولدینی کی زائد بعض لازم
اولوب حذف اولمز دیو تصریح اولندی و نحاس دن (ابو بکر) حملاً
علی المعنی عاطفه اولسنه ذاهب اوله رق (خرجت ففاجأت) سیاقنده بیان
ایلدی و شیخ رضی بونی ترجیح ایتمدی و (اذا) کله سننده اوچ مذهب
واردر (عندالاحفش) حرفدر که سکون او زره مبنی اولوب اعرابدن محلی
یوقدر و (السبع) لفظاً مرفوع مبتدأ در و خبری محذوفدر که (واقف) در
و (زجاج) عندنده (اذا) ظرف زماندر خبر محذوفك مفعول فیهیدر
(فقی وقت خروجی السبع واقف) دیمکدر و بوکا کوره جانب مبتدأ در
مضاف تقدیر یله (اذا) ی مبتدأیه خبر قیلمق دخی جائزدر که (خرجت ففی
ذلك الوقت حصول السبع) تقدیر نده اولور و (اذا) ی مابعدنده جمله
اسمییه مضاف قلوب عامانی حذف ایلمك یعنی (خرجت ففاجأت وقت
وجود السبع بالباب) تقدیر نده کوسترمك دخی تجویز اولمش ایسه ده شو
صورتده (اذا) فاجأت فعلنه مفعول به اوله رق ظرفیتدن اخراج اولمق
لازمکلور که محض کلفتدر و امام مبرد عندنده (اذا) ظرف مکان اولوب
خبر مقدمدر و (السبع) مبتدأ مؤخردر تقدیر کلام (خرجت ففی
مکان خروجی السبع) در. لکن شو توجیه هر بر محله جریان ایلمز که
مثلاً (خرجت فاذا السبع بالباب) قولزده جاری اوله مز. مثال مذکورك
احفش عندنده معناسی خروج ایتمك که نا کهان اسد واقف در دیمکدر.

وزجاجة كوره خروج ایتدم که اول آنده اسد واقفدر دیمکدر . ومبرده
کوره خروج ایتدم که خروج ایلدیکم مکانه اسد وار ایدی یعنی آتی
اسد اشغال ایلمش ایدی دیمکدر .

درس ۴۶

خفی اولیه که خبر مقامنده برنسنه نك قیامی التزام اولنان محله خبر وجوباً
حذف اولنور که بوده درت موقعده در (موقع اول) لولا کله سندنصره
واقع مبتدیانك خبر یدر که عام اولدقه وجوباً حذف اولنور (لولا زید
لکان کذا) قولزده اولدینی کبی که (لولا) حرف دال علی امتناع الشئ
لوجود غیره سکون اوزره مبنی لاجل له من الاعراب و (زید) مبتدادر
و خبری لولانك وجوده دلالت ایلمی قرینه سیله وجوباً محذوفدر که
(موجود) در و (لکان کذا) جمله سی (لولا) نك جوابیدر که خبر
مقامنده قائمدر . مفاد مثال اگر زید موجود اولسه شویله اولور ایدی
دیمکدر و آنفاً خبری عام اولق اوزره تقیید ایلمککمز زیرا خبر خاص
اولدقه حذفی واجب اولماز . نته کیم امام شافعی رحمه الله اشبو

ولولا الشعر بالعلماء یزری لکننت الیوم اشعر من لیبیدی

نظم لرنده اولدینی کبی که خبر (یزری) جمله سیدر . خاص اولغله حذف
اولنماشدر . مفادی اگر شعر سویلمک علمایه شین وعیب ایراث ایدر
اولسه بوکونده بن لید شاعر دن اشعر اولور ایدم دیمکدر . شو ذکر
اولنان بصر یلرک ذهبایدر . واما کوفیلر مثال اول نخونده (لولا) دن
صکره واقع اسمی بر فعل مقدرک فاعلی قیلوب (لولا وجد زید لکان کذا)
تقدیرنده کوریرلر . (وامام فرا) مثال اول نخونده (لولا) دن معنای
وجود منضم اولغله لولا کله سنی مابعدنده عامل قیلر بونلره کوره مانحن
فیهز دن اوله من (موقع ثانی) اون ایکی اعتباری مشتملدر .
(اولکیسی) مبتدا صوره مصدر اوله رق فاعلنه منسوب اولوب صکره ده

بر حال ذکر اولندیغنده در (ذهابی راجلاً) کی (ذهابی حاصل راجلاً)
یعنی ذهابی یورر اولدیغم حالده در دیمکدر.

(ایکنجیسی) مبتدا صورة مصدر اوله رق مفعولنه منسوب اولوب صکرده
بر حال ذکر اولندیغنده در (ضرب زید قائماً) کی (ضرب زید حاصل
قائماً) یعنی زیدی اورمق قائم اولدیغی حالده در دیمکدر.

(اوچنجیسی) مبتدا صورة مصدر اوله رق فاعل ومفعولنه منسوب
اولوب صکرده فاعلک ویا مفعولک ویا فاعل مفعولک هیئت میین بر حال
ذکر اولندیغنده در (ضربی زیداً قائماً) کی ضربی زیداً حاصل قائماً یعنی
بنم زیدی اورمقلغم قائم اولدیغم حالده ویا قائم اولدیغی حالده در دیمکدر واکر
(قائمین) دینور ایسه فاعل ومفعولدن حال اولوب قائم اولدیغمز حالده در
دیمک اولور .

(دردنجیسی) مبتدا مصدر تأویلنده اوله رق فاعلنه منسوب اولوب صکرده
بر حال ذکر اولندیغنده در (ان ضربت قائماً) کی ضربتک حاصل قائماً یعنی
اورمقلغک قائم اولدیغک حالده در دیمکدر .

(بشنجیسی) مبتدا مصدر تأویلنده اوله رق مفعولنه منسوب اولوب صکرده
بر حال ذکر اولندیغنده در (ان یضرب زید قائماً) کی (مضروبیه زید حاصل
قائماً) یعنی زیدک اورمقلغی قائم اولدیغی حالده در دیمکدر .

(التنجیسی) مبتدا مصدر تأویلنده اوله رق فاعل ومفعولنه منسوب اولوب
صکرده بر حال ذکر اولندیغنده در (ان ضربت زیداً قائماً) کی ضربتک زیداً
حاصل قائماً یعنی زیدی اورمقلغک قائم اولدیغک حالده در دیمکدر .

والتی اعتبار دخی مبتدا ذکر اولن ان شوالتی اعتبارده وجه مذکور
اوزره بولن ان مصدره مضاف اسم تفضیل اولدیغده در (اکثر ذهابی
راجلاً) و (اکثر ضرب زید قائماً) و (اکثر ضربی زیداً قائماً)
و (اکثر ان ضربت قائماً) و (اکثر ان یضرب زید قائماً) و (اکثر ان
ضربت زیداً قائماً) کی

شو اون ایکی اعتبارده بولن ان مبتدانک خبری وجوباً محذوف اولوب (حال)
خبر محذوف مقامنده قائمدر و توجیه کلامده بش مذهب وارددر پس برنده

مثلاً (ضربی زیداً قائماً) قولزده تطبیق ایدم تا که عند التأمّل باقی ا کا
قیاس ایله معلوم اوله

(ضربی زیداً قائماً) قولمز عند البصرین ضربك زیداً حاصل اذا كان قائماً
ویا خود حالك فاعلین حال واقع اولدیغنه کوره اذا كنت قائماً تقدیرنده در
(ضربی) مبتدا اولوب فاعلنه مضاف اولمشدر و (زیداً) ضربك مفعولیدر
و (حاصل) مبتدایك خبریدر.

و (اذا) خبرك یعنی (حاصل) لفظنك مفعول فیهیدر (كان) ثبت معناسنه
فعل تامدر و فاعلی ایچنده مستتر (هو) در و اگر (كنت) ایسه فاعل ضمیر
متكلمدر جمله شرطیه (اذا) نك مضاف الیهیدر و (قائماً) كان نك فاعلندن
ویا خود كنت تقدیر اولندقدده ضمیر متكلمدن حالدیر پس نته کیم (زید عندك)
نخونده ظرفك متعلق یعنی (كان) و یا (كان) حذف اولندیگی کی شو ترکیده
دخی (حاصل) حذف اولمش و محالنده (اذا كان قائماً) و یا خود (اذا كنت
قائماً) قالمشدر پس (اذا كان) و یا (اذا كنت) حذف اولنوب حال انك
مقامنده قائم اولمشدر شو تقدیرده حال خبر مقامنده قائم اولان بر نسنه نك
مقامنده قائم اولوب پس بالواسطه خبر مقامنده قائم اولمش اولور.

اجله نحاتدن شیخ رضی بصریلرك شو توجیهی بکنما مشدر زیرا بونده (اذا)
مضاف الیهی اولان جمله ایله بیله حذف اولنق و (كان) ده اصل اولان
ناقصه اولق ایکن ظاهر دن عدول ایله تامه قلنمق کی تكلفات کثیره
واردر شو جهتله تسهیل طریق ایدوب ترکیب مزبورده تقدیر کلام ضربی
زیداً یلابسه قائماً و یا خود حالك فاعلین حال اولدیغنه کوره یلابسنی قائمادر
(ضربی) مبتدا اولوب فاعلنه مضاف در و (زیداً) مفعولیدر (یلابسه)
ویا خود (یلابسنی) جمله سی مبتدایك خبریدر و قائماً (یلابسه) ده اولان ضمیر
غائب و یا خود (یلابسنی) ده اولان ضمیر متكلمدن حالدیر ذوالحال اولان
ضمیر حذف اولنوب یلابس قائماً قالمشدر قیام قرینه عندنده ذوالحال اولان
ضمیری حذف ایلمك ایسه شایع در (الذی ضربت قائماً) قولزده اولدیگی کی که
اصلی الذی ضربته قائمادر و بعده (یلابس) دخی حذف اولنوب حال آنك
مقامنده قائم اولمشدر قیام قرینه عندنده حالك عاملنی حذف و حالی آنك

مقامنده اقامه ایلکم ایسه جائزدر. (راشداً مهدیاً) قولزده اولدینی کی که اصلی سر راشداً مهدیادر.

واما کوفیلر ترکیب مزبورده (قائماً) لفظی ابتداء مبتدأک متعلقاتندن قیلوب قول مزبوری ضربی زیداً قائماً حاصل تقدیرنده قیلرلر شو ذهابه کوره خبر مقامنده برشی قائم اولیهرق خبری حذف ایلکم لازم کلمکه اعتراض اولمشدر.

واما نجاتدن اخفش عندنده ترکیب مزبورده (خبر) که حال آنک مقامنده قائمدر صاحب حاله مضاف مصدر درکه ضربی زیداً ضربی قائماً ویاخود (ضربه قائماً) در یعنی بنم زیدی اورمقاغم قائم اولدیغم ویاخود قائم اولدینی حالده بر اورمقدر دیمکدر.

واما نجاتدن ابن درستویه بوکی مبتدأک فعل معاسنه اولدیغندن خبری یوقدر زیرا (ضربی زیداً قائماً) قولز ما اضرب زیداً الا قائماً معاسنه در دیدی وازا اردت التفصیل فارجع الی المطولات

درس ۴۷

(موقع ثالث) هر بر مبتدأ که خبری مقارنت ومصاحبت معاسنی مشتمل اولوب اوزرینه مع معاسنه اولان (واو) ایله بر نسنه عطف اولنسه شو مبتدأک خبری دخی وجوباً حذف اولنور (کل رجل وضعته) قولزده اولدینی کی که (کل) مبتدأدر (رجل) لفظنه مضاف اولمشدر کل کلهسی مضاف الیهنک حکمی اخذ ایدر اولغله فی الحقیقه مبتدأ کل فرد معاسیله کیمته نصل اولنان (رجل) کلهسیدر (واو) مع معاسنه اولوب عاطفه در (ضعته) ضمیره مضاف اولوب کل رجل اوزره معطوفدر و مبتدأک خبری واوک مقارنته دلالت ایتسی قرینه سیله وجوباً محذوفدرکه (مقرون) در ومعطوف که (ضیعه) در خبر موضعنده قائمدر شو توجیه بصریلر عندنده در (ضیعه) هلاک اولق معاسنه مصدردر بوراده هلاک وموت معاسنه اسمدر وملك وعقار معاسنه دخی کلوب وصنعت وحرقتدن کنایه ده اولنور مفاد مثال هر بر رجل موتیه مقروندر دیمکدر ویاخود هر بر رجل ملك وعقار

ويا صنعت و حرفتيله مقرون در ديمكدر كه تركبه ده (هر كس اوله جكد در)
(هر كس كندی ايشنده در) دینلور .

سيد شريف اشبو مثالی زيد قائم و عمرو تركيبي قیلانندن كوره رك شو تركيك
اصلي زيد قائم و عمرو قائم اولديني كي مثال مذ كورده (كل رجل مقرون
وضيعة اي وضیعتہ مقرونة ايضا) ديمك اولوب يعنى (وضیعتہ) ايچون آريجه
خبر تقدير ايلدي بوكا كوره معنا (انسان) و (اولوم) دن هر برى مقرون
يعنى يكديكره مقارنلر در ديمك اولور .

وبعضيلر (كل رجل مقرون هو وضیعتہ) تقدير نده كوره رك (ضیعتہ) لفظي
خبرده مستكن ضمير اوزره معطوف قلوب خبرك متعلقاتندن قلديلر و بوكا
سبب تاكه خبرك تمه سنندن اولوب مقام خبرده قیامی ظاهر اوله .

واما كوفيلر مثال مذ كورده خبر (وضیعتہ) در زيرا اكر (واو) مقامنده
(مع) ذكر اولنسه ايدى بلاشك (مع) گله سی خبر اولور ايدى پس
(مع) معناسنه اولان (واو) دخى بو حكمنده در ديديلر شو صورتده معنا
هر بر رجل ضیعتيله در يعنى موته ملابس و مصاحبدر ديمكدر علامه تفتازانى
من جهة المعنى بو ذهاب قويدر لكن من جهة اللفظ واو حرف اولوب
مع ايسه اسمدر واوى تركيبده مع حكمنده قلمق هر كز مثلى نامسبق
اولمغله ضعيفدر ديدى و شيخ رضى دخى زياده تزييف ايتدى .

(موقع رابع) مبتدا (ائمن الله) و (لعمر ورك) كي كندينه قسم اولنور
الفاظندن اولسه خبرى اكثر نحات عننده قسمی لفظيدر كه وجوبا حذف
اولنور (لعمر ورك لافعان كذا) قولنزه اولديني كي (لعمر ورك) ده لام
فتح اوزره مبنی در قسمی ايدان و اعلام ايدوب و اكا توطئه اولمغله (لام
موطئه للقسام) و (لام مودنه) دينور (عمروك) ضميره مضاف اولوب
مبتدادر بقاءك ديمكدر و خبر قسمه دلالت ايتمی قرينه سيله وجوبا
محذوفدر كه (قسمی) در و (لافعان كذا) جمله سی جواب قسمدر كه خبر
مقامنده قائمدر (مفادی) سنك بقاءك بنم قسممدر يعنى قسم ايدده جكم شيدر
و معنا انشا اوزره اولمغله بقاءكه قسم اولسونكه شويلاجه ايشلرم ديمكدر .

(ابن عصفور) (انما قسمی لعمر ورك) تقدير نده محذوف (مبتدا) اولسنی
دخى تجويز ايتدى بوكا كوره مانحن فيهمز دن دكلدر .

(اسم باب کان) مرفوعاتک بشننجیسی کان بابنک اسمیدر (کان زید قائما)
 ترکیبده (زید) کی (باب) (نحو) (مثل) و بوکی لفظلر ایله (هر بر
 مضاف الیهلری قیلندن اولانه یعنی بر قاعده کلیه یه اشارت مقصود اولمغله کان
 بابیله مراد هر بر افعال ناقصه دن بولن اندر که اسمنی مرفوع خبرینی
 منصوب قیلر افعال ناقصه فی الاصل مبتدا و خبر اولان ایکی اسم اوزره
 داخل اولورلر نته کیم مطلب فعلده بیانلری کلور بونلرک اسملری مسند
 الیه اولوب فاعل حکمنده در که کاه اسم و کاه اسم ایله مؤل اولان اولور
 و عامللری اوزره تقدیم اولنلری جائز اولماز و مضمیر و مظهر واقع
 اولورلر فقط کان بابنک اسمی بعض ضمیر شان دخی اولور که شو حکمده
 فاعل اوزره زائدلردر .

(خبر باب ان) مرفوعاتک التنجیسی (ان) بابنک یعنی اسمنی منصوب
 خبرینی مرفوع ایلیان حرفلرک خبریدر که آنلره حروف مشبهه بالفعل
 دینلور آنلر (ان) (ان) (کان) (لیکن) (لیت) (لعل) در نته کیم مطلب
 حرفده بیانلری کلور (ان زیدا قائم) قولمزده قائم کی بونلر دخی فی الاصل
 مبتدا و خبر اوزره داخلدر . بونلرک خبرلری . هو المسند بعد دخول
 هذه الحروف دینه رک تعریف اولنور که شو حرفلرک بری داخل
 اولدقدنصکره کلامده مسند واقع اولاندر دیمکدر و واحد و متعدد و مثبت
 و منفی و مفرد و جمله و مذکور و محذوف اولمقده و جمله اولدقده بر عائد
 لازم اولوب و بلاقرینه عائد حذف اولنه مامقده مبتدآنک خبری حکمنده در
 فقط مبتدآنک خبرندن بعض احکامده آیر یلور که بوده شایع اولان یدی
 محله در .

(اولکیسی) مبتدآنک خبرینی مبتدا اوزره تقدیم جائزدر لکن (ان) بابنک
 خبری ظرف دکل ایسه اسمی اوزره هرکز تقدیم اولنه مز زیرا مطلب
 حرفده بیان اولنه جنی اوزره شو حرفلر عملده فعلک فرعیدر پس بونلره
 فعلک عمل فرعیسی ویرلمشدر که منصوبی مرفوعی اوزره مقدم اولمقدر .

لكن (خبر ظرف) اولور ايسه شو صورتده اسمى معرفه ايسه خبر جوازاً
تقديم اولنور (ان الينا اياهم) آيت كريمه سنده اولدينى كې و اكر اسمى
نكره ايسه خبر وجوباً تقديم اولنور (ان من البيان لسحرا) و (ان من
الشعر لحكمة) قول شريفنده اولدينى كې و خبر ظرف اولدقده تقديم
اولنه بيلمسى زيرا ظرفلر حميم عامل اولمغله آنلرده توسع اولتمشدر فقط
شو حالده اكر اسمى عاملنه متصل ضمير اولور ايسه خبر تقديم اولنه من
انك فى الدار كې

(ايكنجيسى) مبتدأ نك خبرى كاه صدارت كلام اقتضا ايدر كلهلر اولور
(اين زيد) و (من ابوك) كې لكن (ان) بابنك خبرى صدارت كلام
اقتضا ايليان كلهلر اوله من

(اوچنجيسى) مبتدأ نكره و خبر معرفه اولمق جائز دكلدر لكن (ان)
بابنك اسمى نكره و خبرى معرفه اولمق جائزدر (ان اول بيت وضع للناس
لاذى بكة) قول شريفنده اولدينى كې و سيوييه (ان قريباً منك زيد)
مثالى كتمورمشدر .

(دردنجيسى) مبتدأ نك خبرى اوزره لام ابتدا داخل اولمق جائز دكلدر
لكن ان بابنك خبرى اوزره دخولى جائزدر (ان زيدا لقائم) كې
(بشنجيسى) مبتدأ نك خبرى امر و نهى اوله بيلور (زيد ليضرب) و (زيد
لايضرب) كې لكن (ان) بابنك خبرى امر اوله من و نهى اوله رق ورودى
غايه نادردر .

(التنجيسى) ان بابنك اسمى نكره و خبرى ظرف اولان محله خبرينى
حذف ايلمك كثير الوقوعدر (ان مالا وان ولداً) كې ان مالا لهم وان
ولداً لهم ديمكدر لكن مبتدأ نك خبرى بويله دكلدر و نادراً (ان) بابنك
خبرينك ظرف اولدينى حالده دخى حذفى واقعدر (ان الذين كفروا
بالذکر لما جاءهم) و (ان الذين كفروا ويصدون عن سبيل الله والمسجد الحرام)
قول شريفنده اولدينى كې

(يدنجيسى) (ان) بابنك اسمى علم و شعوره دلالت ايدر كله اولوب

مابعدنده براستفهام واقع اولسه خبری وجوباً حذف اولنور (لیت شعری
ازید قائم) قولمزده اولدینی کبی.

درس ۴۹

(خبر لالنی الجنس) مرفوعانک یدنجیسی نفی جنس ایچون اولان (لا) نک
خبر یدر که (هوالمسند بعد دخولها) دینه رک تعریف اولنور یعنی لالنی
الجنسک دخولندنصکره بالاصاله مسند واقع اولاندر دیمکدر ونفی جنسندن
مراد جنسندن بر حکمی نفیدر نفس جنسی نفی دکلدر مثلاً (لارجل قائم)
قولمزده (قیام) رجل دن نفی اولنوب یوخسه نفی اولنان (رجل) دکلدر
اشبو لالنی الجنسک خبری کاه ظرف اولور (لاغلام رجل فی الدار)
قولمزده (فی الدار) کبی وکاه غیر ظرف اولور (لاغلام رجل ظریف)
قولمزده ظریف کبی وکاه متعدد واقع اولور (لاغلام رجل ظریف فی الدار)
و (لاغلام رجل غنی عابد) قولمزده اولدینی کبی . و بونک حکمی دخی
مبتدئانک خبرینک حکمی کیدر لکن عاملی ضعیف اولمغه بونی اسمنک
اوزرینه ظرف اولسه دخی تقدیم ایلمک اصلاً جائز دکلدر . و (عام)
اولدیغنده همیشه وجوباً محذوفدر (لاله الاالله) کبی لاله موجود الاالله
دیمکدر . و بنو تیم هرکز خبرینی ذکر ایتمز لر . و اکثری هرکز تقدیر
دخی ایتمز لر لاهل ولامال قولمز اتقی الاهل و المال دیمکدر تقدیر خبره
محتاج دکلدر دیر لر و خبر اولمغه احتمالی اولان مثلاً امثله سابقه ده (فی الدار)
و (ظریف) کبی لفظلری لالنی الجنسک اسمنه صفت قیلر لر .

ویلملیدر که لالنی الجنسک خبرنده عامل کوفیلر عنندنه معنویدر (لا)
کلمه می دکلدر واما بصریلر عنندنه (لا) عاملدر فقط سیبویه لالنی الجنسک
اسمی مبنی اولان محله خبرنده عاملک کذا معنوی اولمسنه قائل اولدی
زیرا اقرب بولنان اسمنک بناسنه سبب اوله رق ایجاب اعراب ایده مدیکی
حاله ابعده بولنان خبرنده ایجاب اعراب ایدوب کندی سیبویه مستحق
اعراب اولسنی استبعاد ایلمشدر .

(اسم ماوالا المشبهین بلیس) مرفوعانک سکننجیسی نفی ایچون اولوب مبتدا

و خبر اوزره داخل اولمده ليس کله سنه مشابه اولان (ما) و (لا)
 کله لر ينک اسميدر که هوالمسنداليه بعد دخولهما دينه رک تعريف اولنور
 يعنى (ما) و (لا) کله لر ينک دخولند نصکره بالاصاله مسنداليه اولان
 اسمدر ديمکدر (مازید قائماً) و (لارجل حاضرأ) قوللر مزده زيد ورجل
 کي بونلرک حکمی مبتدائک حکمی کيدر وبيلمليد رکه (ما) و (لا)
 ايکيسي دخی ليس يه مشابهلر ايسه ده لکن (لا) نک مشابهتی ضعيفدر
 زیرا (لا) مطلق نفی ایچون اولوب ليس ايسه نفی حال ایچوندر واما (ما)
 کله سی ليس کي نفی حال ایچون اولغله ليس يه مشابهتی (لا) کله سندن زياده در
 (لا) کله سنک ليس يه مشابهتی ضعيف اولدینی جهتله عملی قليل اولوب
 سماعه متوقفدر نته کيم شاعرك

(من صد عن نیر انها) (فانا ابن قيس لابرأح)

شعرنده لابرأح کي که برأح لفظاً مرفوع (لا) نک اسميدر و خبری محذوفدر
 (لابرأح لی) ديمکدر (مفاد بیت) کيمکه حربک آتشلرندن اعراض ايلسه بن
 ابن قيس دينمکله مشهورمکه بکا زوال يوقدر ديمکدر و (لا) نک ليس يه
 مشابهتی ضعيف اولديغندن وفي الاصل نفی جنس ایچون اولوب لالنفی الجنس
 ايسه آنجق نکرده عامل ايدوکنندن بودخی آنجق نکره لرده عمل ايدر
 وبنی تيم (ما) و (لا) کله لرینی عامل قلمیوب کنديلرند نصکره اسم و خبر
 کنديلر ينک دخوللرندن اول اولدینی اوزره عامل معنویله مرفوع لر درديرلر .

المنصوبات

منصوبات (هو ما اشتمل على علم المفعولية) دينه رک تعريف اولنور يعنى
 معمول منصوب اسمک حقيقة ويا حکماً مفعول اولمق علامتلى اولان
 (فتحه) (کسره) (الف) (يا) دن برینی مشتمل اولان يعنى لفظاً ويا
 تقديرأ ويا محلاً شو علامتلردن بريله لاجل المقتضى موصوف اولان

معمولدر دیمکدر یوراده بحث ایده جکمز منصوبات اون ایکیدر زیر
مراراً بیان اولدینی اوزره اون اوچجیسی نواصبدن برینک دخولیه
منصوب فعل مضارعدرکه آندن مطلب فعلده بحث اولنه جقدر.

درس ۵۰

(المفعول المطلق) منصوباتک اولکیسی مفعول مطلق در مفعول مطلق
برمعنانک اسمیدرکه اول معنا حقیقه ویا حکماً مذکور اولان عاملک
فاعلیله قائم و عامل مذکورک مدلولی اول معنایی مشتملدر ضربت ضرباً
قولزده (ضرباً) کبی که معنایی اولان حدث حقیقه مذکور (ضرب) نک
فاعلی اولان ذات متکلم ایله قائم و (ضرب) نک مدلول تضمنیسی اولان
(حدث ضرب) بعینه ذکر اولنان مفعول مطلقک معناسیدر .

وگاه عامل مذکورک مدلولی مفعول مطلق معناسنه مطابقة موافق اولورکه
بوده عامل مصدر اولدیغندهدر ضربی ضرباً قولزده اولدینی کبی .
وبیلملیدرکه آنفاً عاملک حقیقه ویا حکماً مذکور اولسنی کوسترمکملکمز
زیرا مفعول مطلقک عاملی ضربت ضرباً قولزده اولدینی کبی بعض ذکر
اولنور و بعض ذکر اولنیوب مقدر اولورکه مذکور حکمندهدر نته کیم
(فضرِب الرقاب) قول شریفنده اولدینی کبی که اصلی فاضربو الرقاب ضرباً
ایدی (اضربوا) جمله سی حذف اولنوب مفعول مطلق اولان (ضرباً)
تقدیم اولنهرق (اضربوا) مقامنده قائم قلنمش و مفعول اولان الرقاب
کله سنه مضاف ایدلشددر .

ودخی آنفاً (مفعول مطلق معناسنک) عاملنک فاعلیله قیامنی کوسترمکملکمز
زیرا مثلاً (مات موتاً) و (جسم جسمامة) و (شرف شرافة) قوللر مزده مفعول
مطلق عامللرینک فاعلنک فعلی دکدر انجق عامللرینک فاعلیله قائمدر واکر
اولیله جه تعمیم ایدلماش اولسه شو مثاللرده اولان مفعول مطلقلر خارج قالور
ایدی شو جهتله کافیه نک مفعول مطلق تعریفنه یعنی (هو اسم مافعله فاعل فعل
مذکور بمعناه) قولنه اعتراض اولنهرق (فاعل فعلک) مفعول مطلق معناسنی فاعل
اولسنیله مفعول مطلق معناسنک (فاعل فعل) ایله قیامی مراد اولنشددر . ۷

و کذا تعریف مذکورده اولان فعل ایله بر حـدثـه دال اولان عامل مراد اولتور تاکه (ضربت ضرباً) و (ضربی ضرباً) و (ضارب ضرباً) و (سرعان سرعة) قوللرمزه شامل اوله شو جهتله بز تبعاً للبرکوی فعل لفظنه بدل عامل لفظنی استعمال ایندک .

ویلملیدرکه (مفعول مطلق) عاملنک لفظی جنسندن اولمق غیر لازمدر (قعدت جلوساً) قولمزده اولدینی کی وبر بادن اولملری دخی لازم دکدر (انبت الله نباتاً حسناً) قول شریفده اولدینی کی که انبت مزیددن و مفعول مطلق اولان (نباتاً) ثلاثیدندر . لکن « سیویه » بونده جمهوره مخالفت ایدوب مثال مذکورلرده (قعدت و جلست جلوساً) و (انبت الله فبت نباتاً) کی کندی بابلرندن فعل تقدیر ایلمشدر . و تعریفده مطلقاً فاعلک مذکور اولسی شرط ایدلمدیکندن فاعلک هر حالده ذکر اولسی لازم دکدر مجهول صیغه سیله (ضرب زید ضرباً) قولمز صحیح و ضرباً مفعول مطلقدر . و تعریفده عاملک حقیقه و یا حکماً مذکور اولسی ذکر اولندیغندن پس عاملی هرکز ذکر اولنمیان مصدر مفعول مطلق اوله میوب خارجدر الضرب واقع قولمزده اولدینی کی . و هر حالده تعریف مذکور ایله دیگر منصوبات بالکلیه خارج اولدینی عندالتأمل ظاهردر .

شو تعریف ایله معرف اولان مفعول مطلق اوج قسمه منقسمدر بری مفعول مطلق تأکیددرکه عالمندن مستبان مفهوم اوزره معناسنده بر زیاده لک اولمیان مفعولدر مجرد عاملنک مدلولی اولان حدثی تأکید ایچون کتوریلوب تشیه و جمعی کلز جلست جلوساً قولمزده جلوساً کی تشیه ایله جمعی کلامسی زیرا تشیه ایله جمع تعدده دالدر پس (جلست جلوسین) و (جلست جلوسات) دینلمز مکرکه عدد و یانوع قصد اولنه عدد و یانوع قصد اولندیغنده ایسه قسمین اخیرین قییلندن اولور . و بری مفعول مطلق عددیدرکه مفادعامل اوزره زائد اوله رق عددده دلالت ایلیاندر (جلست جلسته) قولمزده حییمک فتحیله جلسته کی که بر کره اوتورمغه دلالت ایلر . و بری مفعول مطلق نوعیدرکه مفادعامل اوزره زائد اوله رق بر نوعنه دلالت ایلیاندر (جلست جلسته) قولمزده حییمک کسریله جلسته کی که

بر نوع اوتورمغه دلالت ایلر شوایکی قسمك تشیه و جمعی کلور (جلست
جلستین) و (جلست جلسات) قولزده اولدینی کی جیمك فتح و کسریله
و بعض شوایکی نوع مفعول مطلق خارجدن برقید ایله حاصل اولور مثلاً
ضربت ضربا واحداً وضربت ضرباً شديداً و یحتاج اشدالاحتیاج کی فافهم
خفی اولیه که اشبو مفعوله مفعول مطلق دینسی (به) (فیه) (له) (معه)
کی برقید ایله مقید اولیه رق هر فردینه مفعول لفظی اطلاق صحیح
اولدیغندندر و مطلق لفظی قید اولیوب مجرد برقید ایله مقید اولدیغنی
افاده الچون کتورلمشدر

درس ۵۱

خفی اولیه که مفعول مطلقك عاملی قیام قرینه عنندنده کاه جوازاً حذف
اولور سفردن ککش برکیمسه یه عربارك (خیر مقدم) قوللری کی (خیر)
لفظاً منصوب مفعول مطلق اولوب (مقدم) لفظنه مضاف اولمشدر عاملی
محدوفدرکه (قدمت) در فقط خیر اسم تفضیل اولوب مفعول مطلق ایسه
همیشه مصدر اولور و برده عاملنك نه لفظ ونه معناسنه مناسبتی یوقدر پس
بونك مفعول مطلق اولسی یا اسم تفضیل مضاف الیهنك حکمنی اخذ ایدر
اولغله مضاف الیهندن اکتساب مصدریت ایتسیله در و یا خود بر موصوف
تقدیر یله در تقدیر کلام قدمت قدوما خیر مقدم دیمکدرکه موصوفندن
اکتساب مصدریت ایتمشدر .

بوکیلره مفعول مطلق مجازی دینورکه اسم موصوف صفت اوزره و یا اسم
مضاف الیه مضافه اطلاق اولنمق قیلندندر مضاف ایله مضاف الیه و موصوف
ایله صفت برکله منزلنده اولغله علاقه جزئیت در (خیر) مقدم خیرلو بر قدوم
ایتمکله قدوم ایتدك دیمکدرکه ترکیجه ده (خوش کلدك) دینور ،
و خفی اولیه که مفعول مطلقك عاملی کاه وجوباً حذف اولور اشبو حذفده
بعض الفاظده سماعی و بعض محالدره قیاسیدر عاملی سماعاً حذف اولنان
لفظلردن کافیه ده ذکر اولنان یدی دانه در ،
(اولکیسی) سقیادرکه خیر ایله دعا مقامنده استعمال اولور عاملی وجوباً

مخوذ و در سقا الله سقياً تقدیرنده در مولای متعال آب لطف و گرمیه
سنی صوارسك صوارمق ایله یعنی سکا انعام واحسان ایتسون دیمکدر .

(ایکنجیسی) رعیا درکه ینه خیرایله دعا مقامنده مستعملدر رعاك الله رعیا
تقدیرنده در مولای متعال سنی حفظ اتمکله حفظ ایتسون یعنی سنی
اسرکسون و حفظ و حمایه سنده قلسون دیمکدر .

(اوچنجیسی) خبیة درکه عربلرك خاب الرجل خبیة قولندن مأخوذدر
بدعا مقامنده مستعملدر خاب خبیة تقدیرنده در خائب وخاسر اولمق ایله
خائب وخاسر اولسون یعنی ضرر و زیانه اوغراسون دیمکدر .

(دردنجیسی) جدعادر جدع ال وطوداق و بورون و قولانغی قطع اتمکه
دیرلر و مطلق قطع و حبس معناسنده مستعملدر عربلر بدعا مقامنده
جدعادرلر عاملی بنای مفعول صیغه سیله اوله رق جدع بدعا تقدیرنده در
خیردن قطع اولنوب ناقص و معیوب اولسون دیمکدر و لام ایله استعمال
اوله رق جدعاله دینور مولا خیردن قطع ایدوب ناقص و معیوب ایلسون
دیمکدر .

(بشنجیسی) حمدادرکه مولای متعاله انشای حمد مقامنده استعمال اولنور
حمدت حمدا تقدیرنده در .

(التنجیسی) شکرادرکه انشای شکر مقامنده مستعملدر شکرت شکرأ
تقدیرنده در .

(یدنجیسی) عبادر مقام تعجب ده استعمال اولنور عجبت عجبا دیمکدر
بونلردن بشقه (ایضا) دخی واردر آض ایضا تقدیرنده در شودکر اولنان
کله لر لام ایله و لامسز مستعملدر بونلرده سماعاً و جوب حذفک معناسی
فصحای عربدن شو مصدرلرك عاملرینی کندیلر ایله استعمال مسموع
اولمامشدر دیمکدر و بعضیلر و جوب حذف لام ایله استعمال اولندقلرنده در
(سقیا له) (رعیا له) (خبیة له) (جدع له) (حمد له) (شکر له)
(عجیا له) کبی زیرا شو تقدیرده کلام اوزایه رق تخفیفه مستحق اولوردیدیلر
و شیخ رضی فاعلی و یا مفعولی اضافت و یا حرف جر واسطه سیله بیان
اولندقجه و جوب حذفی رد ایلوب و بیان اولندقدده قیاساً و جوب حذفه

قائل اولشدر فاعلی اضافتله بیان اولنان مثلاً (کتاب الله) (صبغة الله)
 (سنة الله) (وعد الله) (حنانك) (دوايك) کبی ومفعولی اضافتله بیان
 اولنان مثلاً (ضرب الرقاب) (سبحان الله) (لييك) (سعيدك) (معاذ الله)
 کبی وفاعلی حرف جرایله بیان اولنان (بؤسالك) (سحقالك) (بعدالك)
 کبی ومفعولی حرف جرایله بیان اولنان (عقرالك) (جدعالك) (شكرالك)
 (حمدالك) اه (عجا منك) کبی بونلرك جمعنده عامل وجوبا محذوف
 وحذف قیاسیدر دیدی تفصیلی محندن طلب اولنه .

درس ۵۲

مفعول مطلقك عاملی کافیهدن فهم اولنان یدی محله حذف قیاسی ایله
 وجوباً حذف اولنور (محل اول) مفعول مطلق اثباتی اراده اولنهرق بر
 نفی ویا معنای نفی دنصکره واقع اولملی واول نفی ویا معنای نفی ده مفعول
 مطلقك خبر واقع اولهمیه جفی براسم اوزره داخل اولمش بولملی (ماانت
 الاسیراً) و (ماانت الاسیر البرید) قوللرمزده اولدیفی کبی مثال اولده (ما
 کلهسی لیسیه مشابه اولان مادر (الا) ایله نفی متتقض اولمغله ماننی عن
 العملدر سکون اوزره مبنی لامحل لها من الاعراب (انت) مبتدادر (الا)
 حرف استثنا سکون اوزره مبنی لامحل لها من الاعراب (سیراً) مفعول
 مطلق تأکیددر عاملی وجوباً محذوف اولوب حرف استثنادنصکره مقدر
 (تسیر) در تقدیرکلام (ماانت الاتسیر سیراً) در و (تسیر) جملهسی
 مبتدانك خبریدر بونده عاملك حرف استثنادنصکره تقدیر اولنمسی زیرا
 اول تقدیر اولنسه برشیك کندی نفسندن استثنا اولنمسی لازم کلور و مثال
 ثانی ده مثال اول کیدر لکن مثال ثانیده مفعول مطلق (برید) کلهسنه اضافتله
 مقید اولوب مفعول مطلق نوعیدر و برده شو مثالده مستثنا سیر مقید ومستثنی
 منه سیر مطلق اولوب محذور سابق لازم کلامکله عاملنی حرف استثنادن
 اول تقدیر ایتك دخی جائزدر واول تقدیر اولنسدقده جملهسی (ما)
 کلهسنك خبری قلنور . خفی اولیه که اکر مفعول مطلقك نفی اولنمسی مراد
 اولنسه مثلاً (مازیدسیراً) کبی حذف عامل واجب اولماز . واکر (نفی) فعل

اوزره داخل اولسه مثلاً (ماسرت الاسیرآ) و (انما سرت سیرآ) کبی مفعول مطلقك عاملی ذکر اولنش اولغله مانحن فیهمزدن اوله منزه واکر نفی ویا معنای نفی مفعول مطلق قیلنه جق کله نك خبر واقع اوله جنی اسم اوزره داخل اولسه (ماسیری الاسیر شدید) و (انما سیری سیر کثیر) قولمزدده اولدینی کبی (ما) و (انما) دنصکره (سیری) مبتدا و (سیر شدید) و (سیر کثیر) خبر اولوب هرکز مفعول مطلق دکلدر.

(محل ثانی) مفعول مطلق خبر واقع اوله میه جنی بر اسم دنصکره مکرر اولدرق موضع خبرده واقع اولدیغنده در (زید سیرآ سیرآ) کبی (زید) مبتدادر و اولکی (سیرآ) مفعول مطلق در عاملی وجوباً محذوفدرکه (یسیر) در و (یسیر) جمله سی مبتدانك خبریدر وایکنجی سیرآ اولکی به تأکید لفظی در.

(محل ثالث) مفعول مطلق بر جمله متقدمه مضموننك اثرینی تفصیل ایدر اولدیغنده در (مضمون جمله) ایله مراد جمله نك فاعل ویا مفعولنه مضاف اوله رق مصدریدر و (مضمون جمله نك اثرندن) مراد آندن مطلوب اولان غرضدر و (تفصیل اثر) دن مراد انواع مختلفه احتمله سنی بیاندر حق سبحانه و تعالی نك (فشد و الوثاق اما مناً بعد و اما فداء) قول شریفنده اولدینی کبی که جمله متقدمه (شدوا الوثاق) جمله سیدر و مضمونی (شد الوثاق) دن غرض یا (من) و یا خود (فدا) درکه مولای متعال شو غرضی (فاما مناً بعد و اما فداء) قول شریفله تفصیل ایتشددر (فا) تفصیل ایچوندر (اما) حرف تردیددر (مناً) لفظاً منصوب مفعول مطلق در عاملی وجوباً محذوفدرکه فاما تمنون مناً تقدیرنده در (بعد) اضافندن منقطع اولغله ضم اوزره مبنی محلا منصوب اولوب عندالسیرافی مقدر (تمنون) نك مفعول فیهیدر و سیدویه عندنده مقام فعاده قائم اولدیغیچون مفعول مطلقك مفعول فیهیدر (و اما فداء) ده و او عند الجمهور زائده و (اما) عاطفه در و بعضیلر و او عاطفه درکه اشبو اما کله سنی اولکی اما اوزره و (اما) عاطفه درکه مابعدینی اولکی (اما) نك مابعدی اوزره عاطفه در دیدیلر (فداء)

لفظاً منصوب مفعول مطلق در عاملی وجوبا محذوف در که و اما تفدون فداء
تقدیر نده در.

درس ۵۳

(محل رابع) مفعول مطلق افعال جوار حدن بر فعله دال اوله رق بر نسنه
کندینه تشبیه اولنوب بر جمله دنصکره واقع اولمی و اول جمله مفعول مطلق
معناسنه بر اسمی و اول اسمک مفهومک قائم اولدینی بر ذاتی مشتمل
بولنمی (مررت بزید فاذا له صوت صوت حمار قولزده اولدینی) کبی بن
زیدک یانندن کچدم آنک ایچون حمار کبی سسلنمکله برسس وار ایدی
یعنی حمار سسی کبی سسلنیور ایدی دیمکدر (مررت) فعل و فاعل
و (بزید) مفعولیدر (فا) سببیه و یا خود عاطفه و یا خود زائده در کمار
و (اذا) مفاجأة ایچوندر عندا لاخفش لا محل لها من الاعراب و عندا لاخر
محلاً منصوب ظرف مستقرک یعنی (له) نک مفعول فیهیدر (له) ظرف
مستقر خبر مقدم در و (صوت) مبتدای مؤخر در و جمله سی لا محل لها
من الاعراب استینافیه در (صوت حمار) ده (صوت) حماره مضاف اوله رق
مفعول مطلق نوعیدر عاملی وجوبا محذوف در یصوت صوت حمار
تقدیر نده در صوت تصویت معناسنه مصدر در صات الشئ یصوت صوتاً
بایندندر شو ترکیبده مفعول مطلق یعنی (صوت حمار) افعال جوار حدن
اولوب و بر نسنه کندینه تشبیه اولنمشدر و بر جمله دنصکره واقع اولمشدر که
(له صوت) در جمله مزبوره مفعول مطلق معناسنه بر اسمی مشتمل در که
صوت در و بر ذاتی مشتمل در که (له) ده اولان ضمیر در اشبو ضمیر
زیده راجع و آندن عبارتدر که صوت آنکله قائمدر و (مررت بزید فاذا له
صراخ صراخ الشکلی) دخی بوقیلدندر که یصرخ صراخ الشکلی تقدیر نده در
بن زیدک یانندن کچدم آنک ایچون چوجنی فوت اولمش عورت کبی صیحه
ایلمکله بر صیحه وار ایدی یعنی آنک کبی فریاد و فغان ایدوب آه و این
ایدیور ایدی دیمکدر آنحق شو مثالده مفعول مطلق ذوی العقولدن ذی روحه
و مثال اولده غیر ذوی العقولدن بر ذی روحه مضاف اولمغله تفنن اولنمشدر و کاه

غیر ذی روحه دخی مضاف ایدیلور مررت بزید فاذا له صوت صوت الرعد
کبی .

(محل خامس) مفعول مطلق بر جمله نك مضمونی واقع اولوب اول جمله یه
مفعول مطلقك غیرى محتمل اولدیغنده در . بوراده مضمون جمله ایله
مراد مفاد جمله یه لازم اولان بر حکمدر . بوده مثلاً (له على الف درهم
اعترافاً) قولزده (اعترافاً) کبی که (له على الف درهم) جمله سنك مضمونی
اولوب و آنجق مستبان اولانده بودر . زیرا جمله من بوره نك اقرار
واعتراف لازمیدر . بر کیمسه له على الف درهم دیش اولسه بیک درهمی
اقرار واعتراف ایلمش اولور که شو جمله نك اقرار واعترافدن غیر یه احتمالی
یوقدر . پس اعترافاً مفعول مطلق اولوب عاملی و جواباً محذوف اعترفت در
شونوع مفعول مطلقه نفسنی مؤکد مفعول مطلق دینور (والله قائم بالقسط
حقاً) و (محمد رسول الله حقاً) و (اولئك هم المؤمنون حقاً) جمله لرنده اولان
حقاً دخی بو قیلدندر که (حق حقاً) و (یا حقت حقاً) تقدیرنده در .
زیرا حقیق جمله متقدمه لرك مضمونی اولوب آندن غیر یه ایسه
احتمالی یوقدر .

(محل سادس) مفعول مطلق بر جمله نك مضمونی اولوب اول جمله یه مفعول
مطلقك غیرى دخی محتمل اولدیغنده در (زید قائم حقاً) قولزده (حقاً)
کبی زید قائم جمله سی حق و غیر حق اولمغه محتمل اولوب حقاً دیندکه
غیر حق ایله متصف اولیوب بلکه مفعول مطلقك عینی ایله یعنی صفیته
متصف اولدیغنی مشعر و مؤکد اولور و جمله نك حق اولسی ذاتاً دخی
محتمل اولمغه من جهة ینه نفسنی مؤکد اولمش اولور .

درس ۵۴

(محل سابع) مفعول مطلق فاعلنه و یا مفعولنه مضاف اوله رق تشیه صیغه سیله
واقع اولدیغنده در لکن معنای تشیه مقصود اولیوب آنجق مرة بعد
اخری تکرر و تعدد دن یعنی کثرت وقوعدن کنایه ایدیلیمک مراد اولنور
(لیک) کبی که (لین) مفعول مطلق و تشیه در کافه اضافتله نونی

دوشمشدر عاملی وجوبا محذوف اولوب نفس متكلم صیغه سیله (الب) در
 الب اقیم معناسنه در و (سعدیک) کی که (سعدین) مفعول مطلق
 و تنیه در کافه اضافتله نونی دوشمشدر عاملی وجوبا محذوف اولوب نفس
 متكلم صیغه سیله (اسعد) در اعین معناسنه در. (لیک) ترکیبک اصلی
 الب لك الباین ایدی (الب) حذف اولنوب مصدر اولان (الباین)
 کله سنک زواندی حذف اولنهرق ثلاثی به نقل اولنوب (لین) قالب
 (الب) مقامنده قائم قلنمش و مفعولدن یعنی (لك) دن حرف جر اولان
 لام حذف اولنهرق (لین) کافه مضاف ایدلمش و اضافتله نون تنیه ساقط
 اولهرق لیک اولمشدر بن سنک امر و فرمانکه اجابت و اطاعت مرکزنده
 مقیم و پایدارم دیمکدر خفی اولیه که لیک ابتداء ثلاثیدن اخذ ایدلمک
 دخی جائز و بلکه زواندینی حذف ایله ثلاثی به رد مشقتدن سالم بولندیغندن
 انسبدر زیرا بوماده نك ثلاثی مزیددن افعال بابیله ثلاثیسی معناه یکدیگره
 موافق بولنمشدر الب بالمکان البابا و لب بالمکان لبا دینور اقام بالمکان اقامة
 دیمکدر اشبو لیک مواجهه معناسنه اولان لبدن مثنی اولور ایسه مرة بعد
 آخری هر بار بنم توجه سنک طرفکه در دیمک اولور و محبت معناسنه لبدن
 مثنی اولور ایسه بنم محبت و انجذاب هر بار سکادر غیره دکدر دیمک اولور
 و خالص معناسنه لبدن مثنی اولور ایسه بنم اخلاص یعنی صدق و عبودیت
 همیشه سکادر دیمک اولور که (لیک) مقامنه کوره شودرت معناده مستعملدر
 و (سعدیک) فی الاصل اسعدک اسعادین ایدی ماسبق تأمل اولندقدده
 بونک دخی توجیهی ظاهر در بن مرة بعد آخری یعنی هر بار سکا اعانه
 ایدرم یعنی تنفیذ امر که و خدمتکه علی الدوام قیام و اقدام ایلرم دیمکدر
 اشبو سعدیک کله سی آنجق لیک کله سنه مقروناً ذکر اولنور نته کیم حدیث
 شریفده کلمشدر.

(كان عليه السلام يقول في افتتاح الصلوة لیک وسعدیک والخیر بین یدیک
 والشریس الیک) انتهى و (حنانیک) و (دوالیک) دخی لیک وسعدیک
 قیلندندر فقط بولورده مصدر فاعلنه مضافدر (حنانیک) تحنن حنانا بعد
 حنان یعنی بکا هر بار رحمة و رأفة قیل دیمکدر و (دوالیک) دوال مداولة

بعد مداولة یعنی مثلاً شو و عمل و کاره متعاقباً مداول اول دیمکدر بونک
معناسنده قاموس ده تفصیلات وارد در .

و خفی اولیه که مع الاستفهام تو بیخ مقامنده قائم اولان مفعول مطلقك دخی
عاملی بین الفصحاح و جواباً قیاساً محذوف در (امکراً قد علم الله) و (اقیاما قد قعد
الناس) قوللر مزده مکراً و قیاماً کبی اتمکرمکراً و اتقوم قیاماً تقدیرنده در
شو مثاللر کده معناسی آیامکر و حیلهمی ایدرسک حالبوکه الله عظیم الشان
بیلمشدر و آیاقده می طوریرسک حالبوکه ناس اوتورمشدر دیمکدر .

و دخی قننی مفعول مطلق که عامل مذکورك لفظ و بایندن اولسه سیبویه
عندنده کندی بایندن اوله رق عاملی و جوابا مقدر در نته کیم ذکر می مرور ایلدی .
و شیخ رضی عندنده فاعل و یا مفعولی اضافت و یا حرف جرایله بیان اولنان
مصدر لرده دخی عاملنی حذف ایلکم قیاسیدر نته کیم بوکا دخی اشارت
سبقت ایلدی .

درس ۵۵

(المفعول به) منصوباتك ایکنجیسی مفعول به درکه (هو اسم ما وقع علیه
فعل الفاعل) دینهرك تعریف اولنور یعنی مفعول به برشیئک اسمیدرکه
فاعلك فعلی آنک اوزرینه واقع اولمش یعنی حسا و یا عقلاً اکا تعلق ایتمشدر .
(ضرب زید عمروا) و (عرفت بکراً) قولمزده (عمرواً) و (بکراً) کبی خفی
اولیه که فاعلدن مراد من حقیقی و حکمی به شامل اولغله صیغه مجهول اوزره
(ضرب زید) قولمزده نائب فاعل یعنی (زید) مفعول به تعریفندن خارجدر
زیرا فی الاصل هر نقدر حقیقه مفعول ایهده شمدی فعل کنندینه اسناد اولنوب
فاعل مقامنده قائم اولغله حکماً فاعل اولوب مفعول به تعریفندن خارجدر
و (اعطی زید درهماً) قولمزده (زید) دخی کذا خارجدر و اما (درهماً)
داخلدر چونکه (زید) آخذ اولغله حکماً فاعل اولوب و آخذ زید درهمه
تعلق ایلمکله درهمده ما وقع علیه فعل الفاعل الحکمی مفادی صادق اولور .
و (فعل فاعلك) مفعول به اوزره واقع اولسی واقع مجراسنده جاری اولغله
دخی شامل اولغله (ما ضربت زیداً) و (اوجدت ضرباً) قوللر مزده زیداً

و ضرباً مفعول به - لر در ، که گانه (ماضربت زیداً) قولزده زید اوزره
عدم ضرب ایقاع اولمش و (اوجدت ضرباً) قولزده ضرب گانه برشیدر که
اوزرینه ایجاد ایقاع اولمشدر .

ودخی بیلمیدر که (وقوع) دن مراد عبارته نك دلالتی حسبیله وقوع اولمغه
واقعیه غیر مطابق اوله رق (ضرب زید عمرواً) و (ماضرب زید عمرواً)
قولزده (عمرواً) ینه مفعول به در و خفی اولمیه که فعل فاعلك مفعول به
تعلق بلا واسطه الجار و بواسطه الجار اولمق قسملرینه متناول اولوب بواسطه
الجار تعلق فعل لازم و متعدی به شاملدر که (جارك اعرابدن حظی یوق
محرور محلا منصوب مفعول به غیر صریحدر) دیو ترکیب اولنور (مهرت
بزید) و (اشتریت الفرس بسرجه) قوللر مزده (بزید) و (بسرچ) کبی
و بلا واسطه الجار تعلق آنجق فعل متعدی به خاصدر که تعلق ایله یکی شی
طوغریدن طوغری به مفعول به قلنور شو تعریفله معرف اولان مفعول به عاملنك
معناسنده اولیوب و فعله ظرف و وقوعنه علت و وایله مستعمل دخی
اولمامغله سائر مفعوللرك بالکلیه شو تعریفدن خروجلری ظاهر و هیچ برینك
اوزرینه (ماوقع علیه فعل الفاعل) دیمك صحیح اولمامغله امر باهردر .

و خفی اولمیه که مفعول بهك عاملنده اختلاف اولمشدر عند البصرین عاملی
حسب المقام فعل و یا شبه فعل و یا معنای فعلدر زیرا (رفع) فاعلیت
و (نصب) مفعولیت علامتی اولوب فاعلیت و مفعولیت معناری ایسه بونلر
ایله حاصلدر .

وامام فرا مفعولده عامل بونلر ایله بیله فاعلدر دیدی و کوفیلردن هشام ابن
معاویه مفعولده عامل یالکزر فاعلدر دیدی و سائرلری مفعولده عامل
مفعولیت در نته کیم فاعلده ده عامل فاعلیتدر دیدیلر و اخفش مفعولده عامل
فاعلده کی فاعلیتدر دیدی .

خفی اولمیه که نصب مفعولك کلامده فضله اولمسی علامتیمیدر و یا خود مفعولیت
علامتیمیدر اختلاف اولمشدر شیخ رضی نصب علامت فضله اولمسنه کوره
اولا اولان مفعول به ده عامل امام فرانك ذهابی اوزره فعل و فاعل و یا خود
هشام معاویه نك بیانی اوزره یالکزر فاعل اولمسیدر دیدی لکن اوفق

واحری اولان نصب علامت مفعولیت اولسی واحق اولان بصریلرک
 ذهابیدر زیرا شبهه یوقدرکه فاعلیت ومفعولیتی محصل فعلدر زیرا فعل
 صادر اولدینی محله فاعلیت وواقع اولدینی محله مفعولیت صفتی احداث
 ایلر زیرا معلول بلاعلت متصور اولدینی کی فاعلیت ومفعولیت معناری
 فعلک صدور ووقوعنسر متصور اوله من وفعلک شومعناری مقتضی اولوب
 شومعنارده امور خفیة اوله رق برار علامتی مقتضی اولملری تصور اولندقد
 فاعلده رفی مقتضی اولان فاعلیت ومفعولده نصبی مقتضی اولان مفعولیت
 اولوب وفعل بالواسطه مقتضی اولدینک حقیقی ظاهر اولور.

درس ۵۶

خفی اولیه که مفعول به فعلنک اوزرینه بعض جوازاً تقدیم اولنور نته کیم
 وقوع فعلک مفعوله اختصاصی اراده اولنسه (ایک نعد) و (ایک نستعین) کی
 ویامفعوله اهتمام مراد اولنسه (وجه الحیب اتنی) کی و (اما) کله سنک
 جوابنده فانک مدخولی اولان فعلک بردن زیاده مفعولی اولسه شرط محذوف
 منابنده نائب اولقی اوزره هر قنغیسی تقدیم اولنسه جائردر (اما یوم الجمعة
 فاضرب زیدا) و (اما زیدا فاضرب یوم الجمعة) کی واکر شرط محذوف
 منابنده بر شرط آخر نائب اولسه (فا) نک مدخولی اولان فعلک مفعولی
 کذا تقدیم جائز اوله بیلور (اما ان لقیتم زیدا فاضرب خالدا) قولزده
 اما خالدا ان لقیتم زیدا فاضرب دخی دینله بیلور

وبعض مفعول به فعلنک اوزرینه وجوباً تقدیم اولنور نته کیم مفعول به
 معنای استفهامی متضمن اولسه (من رأیت) کی ویامعنای استفهامی
 متضمن اولانه مضاف اولسه (غلام من تکریم یکریمک) کی ویاخود (اما)
 کله سنک جوابنده (فا) نک مدخولی فعلک آنجیق بر مفعولی اولوب
 وشرط محذوف منابنده آخر بر شرط نائب اولسه فعل من بورك مفعولی
 تقدیم واجب اولور (فاما الیتیم فلا تقهر) و (اما السائل فلا تنهر) کی
 وبعض مفعول به فعلنکدن وجوباً مؤخر اولور. نته کیم فعلنه نون تأکید
 مشدده ویا مخففه داخل اولسه (اضربن زیدا) کی زیدا اضربن دیمک

جائزدر ؛ زیرا نون تأکید مضمون فعلك مؤکد ومهم اولسنه وفعلی تأخیر
اهمیتی اولمامسنه دلالت ایدرکه بری برینه منافیلردر .
ودخی مفعول به تقدیم اولندقدده آخره التباس ومشابهت لازم کلسه وجوبا
تأخیر اولنور (ضرب موسی عیسی) کبی واکر عیسی ضرب موسی دینسه
عیسی لفظی کلامده مبتدادر ظن اولنور ایدی ودخی فعل تعجیک مفعولی
وجوباً مؤخردر زیرا محلنده بیان اولنهجنی اوزره آنک معمولنده تصرف
اولنمز (ما احسن زیدا) کبی ودخی صلهء حرف اولان فعلك مفعولی وجوباً
مؤخردر زیرا حروف موصوله ایله صلهسی بیننی فصل ایلمک جائز دکلدر
(عجیت من ان ضربت زیدا) کبی که زیداً وجوباً مؤخردر (ان مصدریه) نک
مدخولی اولان ضربت نک مفعول بهیدر و برده (ان) کلمهسی مدخولنی
مصدر تاویلنده قیلر معمول مصدر ایسه مصدر اوزره تقدم ایده مز .
وخفی اولیه که مفعول بهک حذفی جائزدر . لکن بریچه محله حذفی جائز
اولماز .

(اولکیسی) افعال قلوبده حذفی جائز دکلدر مکرکه فعل لازم منزلنه تنزیل
اولنوب ویا مفعولی تعیین ایدر برقرینه بولنه .
(ایکنجیسی) فعل تعجیک مفعولی حذف اولنمز مکرکه آنی تعیین ایدر
برقرینه اوله .

(اوچنجیسی) بر سؤال جوابنده مثلاً (من ضربت) یعنی کیمی ضرب
ایلدک دینلدهکده جواب اوله رق (ضربت زیدا) قولمزده مفعول به حذف
اولنمز .

(دردنجیسی) مستثنا واقع اولان مفعول حذف اولنمز ماضربت الازیداکبی
(بشنجیسی) (انما) دنصکره واقع اولان مفعول به دخی حذف اولنمز
انما ضربت زید عمرو آکبی .

(التنجیسی) ذکر ی مطلوب اولسه مثلاً وقوع فعلك کندینه اختصاصنی
ویا کندینه اهتمام اولندیغنی بیان ایتک کبی .

(یدنجیسی) سابقا مثالی مرور ایلدیکی اوزره بردانه اولوب (اما)
کلمه سندن صکره شرط محذوف مقامنده قائم اولسه .

سکن نجیسی معنای استفهام و یا شرطی متضمن و یا متضمن اولانه مضاف
 اواسه نته کیم مثاللری کجدی زیرا حذف اولنسه استفهام و شرطدن غرض
 و یا (غرض تعین) فوت اولور ایدی و خفی اولیه که مفعول به جوازاً
 حذف اولندقدده دخی یا منویا حذف اولنور (یغفر لمن یشاء)
 کبی لمن یشاؤه دیمکدر که مفعول به اولان ضمیر غائب منویا حذف اولمشدر
 و کاه منسیا حذف اولنور بوده یا تعمیم و یا مبالغه ایچون فعل لازم منزله
 تنزیل اولمغله اولور (فلان یعطی و ینع) کبی مفعوللری منسیا ترک اولندی
 تاکه اعطا و منعلری هر بر کیمسه به عام و شامل اولدیغنی افاده ایچون
 و (والله یقبض و یبسط) کبی مفعوللری حذف اولندی مولای متعالک
 قبض و بسطی هر شیئه شامل اولدیغنی اعلام ایچون

و کاه فعل متعدی لازم معناسنی تضمین ایلدیکندن ایچون اولور (یخالفون
 عن امره) آیت کریمه سنده اولدیغنی کبی چونکه (یعدلون) معناسنی تضمین
 ایلمشدر و خفی اولیه که مفعول بهک فعلی دخی بر قرینه حالیه و یا مقالیه
 بولندقدده کاه جوازاً حذف اولنور نته کیم (من اضرب) یعنی کیمی ضرب
 ایدیم دیو استفهام ایلان کیمسه جوابنده (زیداً) دینسه واقعدر که اضرب
 زیداً دیمکدر . اشبو قرینه مقالیه دن ایچون عامل حذف اولمش در و نته کیم
 مکة مکرمه به متوجه اولان کیمسه به (مکة) دینسه واقعدر که (ترید مکة)
 یعنی مککی می اراده ایدیورسک دیمکدر . اشبو قرینه حالیه دن ایچون
 عامل حذف اولمشدر .

و بعض مفعول بهک فعلی و جوبا حذف اولنور بوده بش موضعه در .

درس ۵۷

(الموضع الاول) مفعول بهک عاملی و جوبا حذف اولنان موضعلردن موضع
 اول سماعیدر که عربدن مسموع اولمش بعض مثاللردر (امراء و نفسه) کبی
 اترك امراء و نفسه یعنی شو کیمسه بی و نفسنی ترك ایت یعنی بوندن و از کچ
 دیمکدر و آیت کریمه ده (واتهوا خیرا لکم) کبی اتهوا عن التلیث و اقصدوا
 خیراً لکم یعنی تلیثدن و از کچوب کندیکره خیری یعنی توحیدی قصد

ایدیکنز دیمکدر و (اهلا وسهلاً) کبی (اهلا) آیت اهلاً ای (مکاناً
 مأهولاً لا خراباً) یعنی معمور بر مکانه کدک خراب یره کمدک دیمکدر
 و یاخود (آیت اهلاً ذاقراً لا جانب) یعنی خصم و اقر بالریکه کدک کدیکک
 محله اجنبی یوقدر دیمکدر و (سهلاً) (وطئت سهلاً لا حزناً) یعنی
 یومشاق و دوزجه بر محله قدم وضع ایتدک سرد و غلیظ یره وضع ایتدک
 دیمکدر و (هذا ولا زعماتک) کبی (ازعم هذا ولا ازعم زعماتک) یعنی
 بن شونی زعم و اعتقاد ایدرم سنک زعم و توهماتکی زعم ایتم دیمکدر و یاخود
 (هذا الحق ولا توهم زعماتک) یعنی حق اولان بودر (سنک زعم ایلدکریکی
 توهم وزعم ایللم دیمکدر و غیر معروف بر کیمسه مثلاً فضیلتله مشهر زید ایله
 تسمیه لنسه عربلرک آئی تهوین ایچون (من انت زید) قوللری کبی که
 (من انت تذکر زیداً) یعنی زیدی سندن ایچوننی ذکر ایدر سک یعنی
 آنک علمنی کندیکه می اسناد ایدرسک دیمکدر و یاخود من موضوله اولوب
 سن کیمسک که زیدی ذکر ایدیورسک دیمکدر و (عذیرک من فلان) کبی
 عذیر عذر و بهانه و عذر و بهانه ایده جک کیمسه به دخی دینور قول مزبور
 (احضر عذیرک من فلان) تقدیر نده در که فلاندن ایچون عاذرکی و یا عذر
 و بهانه کی احضار و تیه آیت دیمکدر و (مرجاً) کبی آیت مرجا ای مکانا
 واسعاً لا مضایقه ولا استتقال یعنی طارلق و استتقالدن عاری معمور و آباد
 و واسع محله کدک بوراده قطعات وحش و دلکیر اولمزسک دیمکدر و بر کیمسه به
 مصادف اولوب مرجا دینسه صادفت مرجا ای رحبا وسعة یعنی رحب
 و وسعت و ککیش لکه مصادف اولدک دیمکدر و معنا انشا اوزره اولدقده
 بویله اوله سک دیمکدر و (اهلك واللیل) کبی الحق اهلك مع اللیل
 یعنی کیجه ایله اهلكه لاحق اول یعنی کیجه سبقت ایتیه رکه عجله اهلكه
 ایرش دیمکدر و (الکلاب علی البقر) کبی ارسل الکلاب علی البقر یعنی
 کلبلری بقر وحشی اوزره ارسال آیت دیمکدر و مثلاً عربدن بر کیمسه نک
 یاننده (زردالو) و (الما) و (خورما) اوله رق عمر و زردالو و المایه اشارت
 ایدمک (ای هذین ترید) یعنی شوایکی دن قنغیسنی استرسک دیدکده عمر و ک
 زردالو و الما ایله برابر خورمای دخی استیه رکه (کلیمها و قرأ) قولی کبی که

اعطی کلیمما و تمرأ تقدیرنده در یعنی بکا اول ایکسنی و خورمایی دخی
ویر دیمکدر

درس ۵۸

(الموضع الثانی المنادی) مفعول بهک عاملی وجوبا حذف اولنان محللردن
ایکتنجیسی منادادرکه منادالغه کنندینه ندا اولنمش یعنی چاغرلمش
کیمسهیه دینور واصطلاح نجاتده (هوالمطلوب اقباله بحرف نائب مناب
ادعو لفظاً و تقدیراً) دینمکله تعریف اولنور یعنی منادا ادعو مقامنده قائم
حروف خمسه دن بر یله که آنلر (یا) (ایا) (هیا) (ای) (همزه) در
حقیقه ویا حکماً اقبال و توجه ایلمسی طلب اولنادر دیمکدر (یازید) قولزده
اولدینی کبی که حقیقه زیدک قلباً ویا وجهاً کنندینه اقبال و توجه ایلمسنی طلبدر
سنی چاغریورم دیمکدر و (یاسماء) و (یارض) و (یاجبال) کبی که مماء
وارض و جبال ندا اولنمغه صالح اولانلر منزله تنزیل اولنوب کانه اقباللری
طلب اولنمشدر که اقبال و توجه ایلملری مطلوب حکمنده در . ادات ندادن
(یا) ملفوظ و مقدر اوله رقدده بولنور واما دیکرلر آنحق ملفوظ اوله رق
استعمال اولنور نته کیم محللرنده بیلنور و خفی اولیه که (مستغاث)
و (متعجب منه) و (مهدد) دخی مناداده داخلدر .

(منادای مستغاث) ندا اولنه رق کنندن استغاثه واستمداد اولنان ذات
دیمکدرکه عربلر چوق کره اوزرینه مفید تخصیص بر (لام جاره مفتوحه)
ادخال و آنحق ادات ندادن (یا) ایله ایراد ایدرلر مثلاً عمرو مظلوم
زیددن استمداد ایلسه (یالزید) دینور واکر بر آخر ایچون استمداد
ایلسه که اکا مستغاث له دینلور مثلاً عمرو بیکر مظلومدن ایچون زیددن
استمداد ایلسه شو صورتده منادای مستغاث دن صکره مستغاث له دخی ذکر
اولنور (یالزید لیکر) کبی فقط مستغاث له ده لام مکسوردر و تعلیل ایچوندر
و بعض مستغاث له من ایله دخی ذکر اولنور (یالزید من بکر) کبی و بعض
حذف اولنوب یالکمز مستغاث ذکر اولنور وکاه منادای مستغاث حذف
اولنوب مستغاث له باقی قالور (یالام مظلوم) کبی یاقوم لام مظلوم دیمکدر مظلوم

مستغاث له ایدوکی لامک مکسور اولسیله بیلنور منادای مستغاث ده لامک مفتوح قلنمسی ایکی جهتدن ایچوندن بریسی (یا لامظلوم) نخونده مستغاث له دن فرق اولنق ایچوندن و بریسی منادای مستغاث کاف ضمیر موقعددر کاف ضمیره متصل اولان لام جاره ایسه (لک) دیندکده اولدینی کی مفتوحدر .

ویلملیدرکه اگر منادای مستغاث اوزره (یا) دن غاری اوله رق بر آخری عطف اولنسه (یا لیزید و لعمر) کی مستغاث له مستغاث اوزره عطف اولنمیه جنی جهتله مستغاث ایله مستغاث له بیننده اشبو عطفله فرق حاصل اوله جغندن معطوفده لام مکسور قلنور واما اگر (یا) ایله عطف اولنور ایسه (یا لیزید ویا لعمر و) کی لام ینه مفتوحدر .

ودخی منادای مستغاث بعض آخرنده الف ایله و لاجل الوقف ها ایله ایراد اولنور (یا لیزید) کی لیکن بوکی مستغاثک اولنده لام اولماز زیرا لام آخر کلهده جر اقتضا ایدر آخرنده (الف) اولدیننده ایسه الف ماقبلنک فتحی اقتضا ایدرکه شو ایکی اثر یکدیگرینه منافیدر واما (منادای متعجب منه) تعجب اولنان شیدرکه عربلر برشیدن تعجب ایلسه لر آنک اوزرینه مستغاث ده اولدینی کی اکثر برلام جاره مفتوحه ادخال و انحق ادا ت ندادن یا ایله ایراد ایدر لر مثلا برصونک جسامت ویا حلاوت و خوشکوار لغندن تعجب اولنسه (یا لاء) دینورکه کانه تعجب اولنق اوزره حضورینی طلب ایلمکدر .

(منادای مهدد) تهدید و تخویف اولنورق ندا اولنسان کیسه درکه کذا اوزرینه غالبا برلام مفتوحه ادخال و انحق ادا ت ندادن (یا) ایله ایراد اولنور (یا لیزید لاقتلک) کی یعنی یا لیزید سنی قتل ایلم یعنی بکا متوجه اولوب شو تهدیدی طوی و متنبه اول دیمکدر اشبو (منادای متعجب منه) و (منادای مهدد) منادای مستغاث حکمندهدر و بعض نحسات منادای مستغاث جمله سندن کور مشردر شو جهتله منادای متعجب منهده تعجب ایلیان کیسه کانه متعجب منه حاضر اوله رق تعجینی قضا ایله شو تعجب دن

قورتلمسی ایچون استغانه واستمداد ایتمکده در و منادای مهدده تهدید
وتخویف ایلیان کیمسه کانه تهدید اولنسان شخص حاضر اوله رق آندن
انتقام آلوب الم خصومتدن قورتلمسی ایچون استغانه ایتمکده در لکن شیخ
رضی شو بعضک توجیهی تسکلفدر دیمشدر .

درس ۵۹

خفی اولیه که منادا مفعول به اولقی اوزره لفظاً ویا تقدیراً ویا محلاً منصوبدر
(عاملی سیبویه) عندنده وجوباً مقدر بر فعلدر (یازید) قولمز ادعو زیدا
دیمکدر منادانک کثرت استعمالندن و برده حرف ندا دلالت ایلدیکی جهته
(ادعو) حذف اولمش و حرف ندا (ادعو) مقامنده قائم اولمشدر که
اکثر نجات عندنده مختار اولان بودر ابن حاجب دخی بونی اختیار
ایلمشدر .

و (امام مبرد) عامل حرف ندادر زیرا (فعل) حذف اولندقدده حرف
ندا فعل مقامنده قائم اولوب و عملنه وارث اولمشدر و اما «فاعل» محذوفدر
دیدى و نجاتدن (ابوعلى) حرف ندا (اسم فعل) اولوب عاملدر دیدى
فقط بوابوعلى نك بعض کلامنده کوریلوب آندندخی مشهور اولان مذهب
سیبویه در اشبو مذهبین اخیرینه کوره منادانک عاملی مذکور اولغله مانحن
فهمزدن دکلدر .

واما مستغاث و متعجب منه و مهدد اوزره داخل اولان (لام) (امام مبرد)
زائد اولوب بر شیئه متعلق دکلدر دیدى . و (فاضل عصام) زائد اولوب
مقدر ادعویه متعلق اولمسنی اختیار ایلدى . (ابن جنی) زائد اولیوب
حرف ندایه متعلقدر زیرا حرف نداده فعل معناسی وارددر دیدى .
(سیبویه) زائد اولیوب تعدیه ایچونددر مقدر ادعویه متعلقدر دیدى
و بوکا ادعو بنفسه متعدیدر دیو اعتراض اولندى ایسهده لکن شو متعلق مثلاً
یالزید نحو ندده فعل مقدر التجا معناسنی ویا للماء نحو ندده تعجب معناسنی
و بوکبی متضمن اولمسی اعتباریله در دیو جواب ویریلدى و بعضلر حذف
ایله کندینه ضعف کلمکله لاجل التقویه لام ایله تعدیه اولمشدر دیدیلر

وبعضيلر نه زائده محض ونه معديه محض در ديو منزله بين المنزلتين اثبات ايدوب
تعلق وعدم تعلقی تجویز ایلدیلر .

واما کوفیلر منادی مستغاث ده اولان لام حرف جر دکلدر بلکه (آل)
لفظنک بقیه سیدر مثلاً یالزید فی الاصل یا آل زید اولوب پس لاجل التخفیف
همزه و (لالتقاء الساکنین) احدى الالفین حذف اولنوب یالزید قالمشدر
دیدیلر لکن کنند یچون (آل) اولمیانده دخی مثلاً (یالله) و (یالاماء) کبی
لام مذکور اولمغله کوفیلرک ذهابی رد اولنمشدر .

واما مستغاث له ده اولان لام (ابن جنی) عندنده حرف ندایه و سائر لر
عندنده مقدر ادعویه متعلقدر . و بعضیلر منادادن حال واقع اولمق اوزره
براسم تقدیر ایلوب مستغاث له ده اولان لامی اککا متعلق قلدیلر مثلاً
(یالزید لعمر و) قولمزی ادعوک مدعواً لعمر و . تقدیر نده قلدیلر . و اما
(من) ایله مستعمل اولان مستغاث له ده (من) شیخ رضی نک بیان ایلدیکی
اوزره ماقبلنده اولان کلامدن منفهم فعله متعلقدر مثلاً (یالله من الم الفراق)
قولمز استغیث یا الله من الم الفراق تقدیر نده در .

درس ۶۰

خفی اولیه که منادا یا مفرد و یا مضاف و یا مضافه مشابه واقع اولور بحث مناداده
مفرد ایله مراد مضاف و یا مضافه شیه اولما مقدر . زیراً مفرد درت معناده
مستعملدر (ترکیب) مقابلنده استعمال اولنور . هذا مفرد دینور که ایس
بمرکب دیمکدر . و (جمله) مقابلنده استعمال اولنور هذا مفرد دینور که
لیس بجملة دیمکدر . و (تنییه) و (جمع) مقابلنده استعمال اولنور هذا مفرد
دینور که لیس بتنیه و لاجع دیمکدر . و (مضاف) و (مضافه شیه) مقابلنده
استعمال اولنور هذا مفرد دینور که لیس بمضاف و لامشابه للمضاف دیمکدر
بحث مناداده مفرد ذکر اولندیغنده اشبو معنای اخیر مراد اولنور . پس
شو صورتده مفرد اولان منادا تنیه و جمعه دخی صادق اولور (یازید)
و (یازیدان) و (یازیدون) کبی . و یلملیدر که (منادای مفرد) ایکی
قسمدر یا معرفه و یا خود نکره اولور . معرفه ایله مراد ندا ایله تعینی قصد

اولناندر . بوده كرك قبل الندا معرفه اولسون يازيد كبي و كرك قبل الندانكره
اولوب ندا ايله تعينى قصد اولنغله معرفه اولسون يا رجل كبي ونكره ايله
مراد تعينى قصد اولنميا ندر . نته كيم بر رجل غير معين ندا اولنه رق (يار جلا)
كبي ومضاف ايله مراد معلومدر كه مابعدنده بر كليه مضاف اولاندر كرك
علم اولسون و كرك اولسون يا عبدالله و يا افضل الناس و يا غلامى كبي ومضافه
شبيهه ايله مراد مابعدنده متمماتندن بر اسم ذكر اولناندر كه اول ذكر
اولنان اسمده يا معمولى اولور و يا خود اوزر ينه عطف اولنه رق ايكي سى
بر اسم منزلنده اولور و يا خود جمله و يا ظرف اولوب صفتى اولور ايسته
مضافه شبيهه اولان مناداشو اوچ قسم اوزره تصور اولنور * مابعدنده
متمماتندن اوله رق ذكر اولنان « اسم » معمولى اولمق مثلاً (ياطالعا جبالا)
و (يا حسناً وجهه) و (يا خيراً من زيد) قوللر مزده اولدينى كبي * ومابعدنده
ذكر اولنان اسم كندينك اوزر ينه عطف اولنه رق ايكي سى بر اسم منزلنده
بولمق مثلاً (يا ثلاثة وثلثين) قوللر مزده اولدينى كبي بوده علم اولوب اولماق
شقلرينه شاملدر . اما اندلسى وابن يعيش مضافه مشابه اولمى علم اولديغنده در
ديدلر و علم اولمقدده بر جماعت معينه قصد اولنور ايسه يازيد والحادث
قيلندن كوره رك (يا ثلاثة وثلثون) و (يا ثلاثة وثلثين) دينلمكى يعنى
معطوفده رفع ونصبى تجويز ايلديلر وغير معين قصد اولمقدده (يار جلا
وامراً) قيلندن كوره رك آنجق (يا ثلاثة وثلثين) دينلمكى يعنى معطوفده
انجق نصبى التزام ايتديلر * وشبيهه مضاف اولان منادادن قسم ثالث يعنى مابعدنده
ذكر اولنان جمله و يا ظرف اولوب صفتى اولمق مثلاً (يا حليماً لا يعجل)
و (يا جواداً لا يبخل) و (يا ساعراً اليوم) و (يا كريماً فى الدار) قوللر مزده
اولدينى كبي .

شواوچ قسم اوزره متصور اولان مناداي مشابهه للمضاف اكر علم اولور
ايسه بلاشك معرفه در و اكر علم دكاشه شوصورتده قصد ايله تعين اولنور
ايسه ينه معرفه و اكر تعينى مقصود اولماز ايسه نكره در .

نكره ده (يا حسناً وجهه ظريفاً) و (يا ثلاثة وثلثين ظرفاء) دينور ومعرفه ده
(الظريف) و (الظرفاء) دنيلور عكسى جائز اوله مز و بوقياس اوزره

(یا حلیما لایعجل) نخوانده نکرده ده مثلاً (یا حلیماً لایعجل غفاراً)
 و معرفه ده (یا حلیما لایعجل الغفار) دنیلور لکن جمله نکره حکمنده اولوب
 بر شیء نکره ایله توصیف نکره معرفه ایله توصیف موجه کورلمدیکندن
 بونده هر حالده انسب اولان مثلاً (یا حلیماً لایعجل غفاراً) دیکدر
 دنیلمشدر فافهم .

درس ۶۱

اشبو بسطمنز معلوم اولدی ایسه منادانک احکام لفظیسنه مبادرت ایلمه
 (منادای مفرد معرفه) قبل الندا حالت رفعده علامت رفع اولان (ضمه)
 (الف) (واو) دن قنغیسیله موصوف ایسه حال نداده لفظاً و یا تقدیراً
 اول اعراب اوزره مبنی اولوب و محلاً منصوب مقدر (ادعو) یه مفعول به
 قلنور (یازید) و (یارجل) و (یازیدان) و (یازیدون) کبی (زید) و
 (رجل) لفظاً ضم اوزره و (زیدان) لفظاً الف اوزره و (زیدون)
 لفظاً واو اوزره مبنی در و منقوص و مقصوده و قبل الندا مبنی اولان کلمده
 ضم مقدر در (یاقاضی) و (یافتی) و (یاهذا) و (یانت) و (یاهؤلاء)
 کبی نحاسدن یونس منقوصده یایی حذف و آندن عوض تنوین و یروب
 (یاقاض) دیدی و اما (یامری) نخوانده احجاف کلمه دن حذراً حذف
 ایلمدی منادای مفرد معرفه نیک مبنی قلنمسی زیرا (یازید) قولمز ادعوك
 منزلنده در . شوصورتده منادا اولان (زید) ادعوكده اولان کاف ضمیر
 مقامنده اولوب اشبو کاف ایسه ذلکده اولان کاف خطاب حرفیه لفظاً
 و معنأً مشابه و افرادو تعریف و خطابده مماثل اولدیغندن (منادای مفرد معرفه)
 حرفه مشابهتی اولان بر شیء مقامنده بولمغله مبنی اولور و حرکه اوزره مبنی
 اولمسی بناسی عارضی اولدیغنددر و قبل الندا مرفوع اولدیغی اعراب اوزره
 مبنی اولمسی هر نقدر مفعول ایسه ده لیکن کلامده فاعل مشابه سنده اولوب
 عمده اولدیغندن ایچون و برده آتیده بیان اولنه حق منادای معرب و منادای
 مبنی حرکه سندن فرق اولمق ایچونددر (خفی اولیه که) منادای مفرد معرفه ده
 قبل الندا رفی نه ایله ایسه حال نداده آنک اوزرینه مبنی اولمق قاعده کلیه

اولوب شوقاعدهدن خروج ایلمک جائز دکلدر . فقط اوچ موضع بوندن مستثنادر .

(اولکیسی) منادای مفرد معرفه علم اولوب مابعدنده (ابن) ویا (ابنة) لفظیله موصوف اوله رق شو لفظلرده بر علم آخره مضاف اولدیغندهدر . مثلاً (یازید ابن عمر) و (یاهند ابنة بکر) کبی اشبو منادا فتح اوزره مبنی قلنمق اختیار اولمشدر . زیرا شو نوع مناداده کثرت وقوعندن ایچون تخفیف مطلوب اولوب فتح ایسه ضمه دن خفیفدر و برده منادا مفعول اولمغله فتح حرکه اصلیه سنه موافق اولوب فتح اوزره بناسی مختار اولمشدر . لکن علی الاصل ضم اوزره بناسی دخی جائزدر .

(کوفیلر) ابن وابنة لفظلرینه تخصیص ایتیوب منادای مفرد معرفه علم اولوب هر قننی بر صفت منصوبه ایله متصف قلنسه مثلاً (یازید المالمال) کبی شو مناداده فتح اوزره بنایی تجویز ایلدیلر و (بعض بصریلر) هر قننی مفرد و معرفه اولان مناداکه (ابن) کلمه سیله موصوف اولوب اشبو ابن لفظی ده لفظین متفقین بیننده واقع اولسه مثلاً (یاعالم ابن العالم) کبی شو مناداده دخی فتح اوزره بنایی تجویز ایتدیلر .

(ایکنجیسی) منادای مستغاث باللام ولامه مقارن منادای متعجب منه و منادای مهدد مطلقاً معرب ولام ایله مجرور لردر . زیرا عات بنا حرفه مشابهتدر لام جاره ایسه خواص اسمدن اولمغله شو مشابهتی ضعیف ایلر . پس معرب اولوب ترکیبده مثلاً (یالزید) قولمزده (زید) ک محل قریبی لفظاً مجروردر لام ایله و محل بعیدی محلاً منصوب مفعول بهدر دینلور و (یاللماء) و (یالزید لا ضربک) قولمزده (ماء) و (زید) ده دخی بویله ترکیب اولنور .

(اوچنجیسی) منادای مستغاث بالالف درکه الف ماقبلانک فتحی اقتضا ایتمکله فتح اوزره مبنیدر یازیداه کبی لکن شو حکم قبل الالف بشقه برکله فاصل اولمدینی حالدهدر واما (یازیدانه) و (یازیدونه) نحو نونه فاصل اولمغله علی الاصل (زیدانه) الف اوزره و (زیدونه) و او اوزره مبنیدر . منادای مفرد معرفه نک احکامی و شو حکمدن مستثنی طوتیلانلرک

احوالی بیندی ایسه بونلرک ماعداسنک دخی احکامنی اوکرنمکه ذهن ویرملیدرکه آنلر (مفرد نکره) اولان منادا و (منادای مضاف) و (منادای مشابه للمضاف معرفه) و (منادای مشابه للمضاف نکره) در . بونلر معرب اولوب منصوبلردر (منادای مفرد نکره) بر غیر معین ندا اولنهرق (یارجلأ) کبی رجلاً لفظاً منصوب مقدر ادعونک مفعول بهیدر و (منادای مضاف) یا عبدالله و (یاغلامی) کبی (عبد) لفظاً منصوب و (غلام) تقدیراً منصوب مفعول بهلردر و (منادای مشابه للمضاف معرفه) یا طالعا جبلاً و (یاثلاثة وثلاثین الضرفاء) و (یاحسننا وجهه الضریف) و (یاحلیما لایعجل غفاراً للذنوب) کبی (طالعا) و (ثلاثة) و (حسننا) و (حلیماً) لفظاً منصوب مفعول بهلردر و منادای مشابه للمضاف نکره سابقاً بیانی کجدیکی اوزره عام اولیوب و تعیین لری قصد اولنیهرق (یا طالعا جبلاً) و (یاثلاثة وثلاثین ضرفاء) و (یاحسننا وجهه ضریفاً) و (یاحلیماً لایعجل) کبی

درس ۶۲

خفی اولیه که یای متکلمه مضاف اولان مناداده یاغلامی نخونده درت وجه جائزدر

(اولکیسی) یای متکلم مفتوح اولهرق (یاغلامی) در
(ایکنجیسی) یای متکلم ساکن اولهرق (یاغلامی) در .
(اوچنجیسی) یای متکلمک ماقبلنده کسره اولدیغنده یای متکلم کاه اکتفاءً بالکسره حذف اولنور (یاغلام) کبی لکن یای متکلمک اولنده (الف) اولور ایسه یای متکلم حذف اولنمز (یاقتای) کبی .
(دردنجیسی) الف و (فتحه) (یا) دن و (کسره) دن خفیف اولنغله یای متکلمی الفه قلب ایلمکدر (یاغلاما) کبی مناداده خفت مطلوب اولنغله شوایکی قسمک مناداده وقوعی دیگر لرندن غالبدر لکن هر بر یای متکلمه مضاف اولان کلمده جاری اولیوب یای متکلمه اضافتی غالب اولان کلمه لر ده جاریدر .

پس (یاعدوی) و (یاعدوا) جائز دکلر و (یاغلاما) نحوئده اکتفاء
 بالفتح الف حذف ایلمک دخی شاذ اوله رق واقعدر اشبو وجوه اربعه دن
 هر برینه وقف ایله وصل بیننی فرق ایچون عندالوقف بر (ها) لفظی
 الحاقله (یاغلامیه) و (یاغلامیه) و (یاغلامه) و (یاغلاماه) دینور .
 ومحاورات عربده (اب) و (ام) لفظلری منادا اوله رق یای متکلمه
 مضاف اولدیغنده بونلرده دخی (یاغلامی) ده وقف ووصل عندنده
 اولان وجوه اربعه جاری اولدیغی کبی (یا) دن بدل (تا) ایله دخی ایراد
 اولنوب مضاف الیه اولان یای متکلمه ده (یاغلامی) و (یایی) ده اصل
 اولان فتح اولغله (تا) نک فتحیله (یابت) و (یامت) دینلور و (یا) یه
 مناسب کسره اولغله (تا) نک کسریله (یابت) و (یامت) و نادر اماندای
 مفرد معرفه مجر اسنده جاری قلنه رق (تا) نک ضمیله (یابت) و (یامت)
 و جمعاً بین العوضین (تا) دنصکره آخرنده (الف) زیاده سیله (یا ابتا)
 و (یاامتا) دخی وارد اولمشدر واما (یا ایتی) و (یا امتی) دینک عوض
 ایله معوض عنه بیننی جمع ایلمک لازم کلامک ایچون تجویز اولنماشدر .
 و (منادا) ابن ویا (بنت) لفظی اولوب (ام) ویا (عم) لفظنه مضاف
 وام وعم لفظلری دخی یای متکلمه مضاف اولسه شو ترکیب ده دخی
 (یاغلامی) ده اولان وجهلر چاژدر لکن بونده (طول لفظ) و (ثقل
 تضعیف) اولوب کثرت استعمالدن ایچون اکتفاء بالفتح الف حذف ایله
 (یابن ام) و (یابن عم) دخی شایعدر و برده شو ترکیب نحوئده اکتفاء
 بالکسره یای متکلمی حذف ایلمک ثقلت و کثرت استعمالدن ایچون ام وعم
 لفظلرینه مخصوصدرکه مثلاً (یابن اخ) و (یابن خال) دینر بلکه (یابن
 اخی) و (یابن خالی) دینور .

درس ۶۳

احکام منادا معلوم اولدی ایسه توابع منادانک دخی احکامنی بیلملیدر .
 خفی اولیه که سابقاً بیانلرمزدن بیلمدیکی اوزره منادادن بر قسمی معربدرکه
 منادای مستعاث باللام ولامه مقارن منادای متعجب منه و منادای مهذب و منادای

مفرد نکره و منادای مضاف و منادای مشابه للمضاف معرفه و منادای مشابه للمضاف نکره در .

و بر قسمی مبنی در بونکرده بر قسمی فتح اوزره مبنی در که منادای مستغاث بالالف در و بر قسمی علی مایرفع به مبنی قلنا در که مفرد معرفه در و توابع ایله مراد اعرابده متبوعنه تابع اولندر در که صفت و بر حرف ایله عطف و تأکید و بدل و عطف بیاندر و بر حرف ایله عطف اولن باب نداده ایکی قسمدر که بر قسمی اوزرینه (یا) نك دخولی ممتنع اولندر که معطوف معرف باللام در و بر قسمی اوزرینه یانك دخولی ممتنع اولمیاندر که لام تعریفدن مجرد اولان معطوفدر اشبو توابعدن بدل و لام تعریفدن مجرد اولان معطوف لامه مقارن منادالرك و منادای مستغاث بالالفك غیرنده مستقل منادا حکمنده قلنمشدر اشبو بسطمن اذعان اولندی ایسه بیان ایله حکمز احکام توابعه کوزلجه صرف فکر ایلملیدر .

(منادای مستغاث باللام) و (لامه مقارن منادالرك) توابعی بالجمله لفظلرینه تابع اولوب مجرد لر در تابع كرك مفرد و كرك مضاف و كرك مشابه للمضاف اولسون تابع صفت اولسه (یالزید کریم) و (یالزید ضارب عمر) و (یالزید ذی المال) و (یالزید طالع جبلا) و (یالزید حسن وجهه) کبی و تابع معطوف اولسه (یالزید و عمرو) و (یالزید و الحارث) و (یالزید و ضارب عمرو) و (یالزید و ذی المال) و (یالزید و طالع جبلا) و (یالزید و الحسن وجهه) کبی و لامی اعاده ایله دخی مستعملدر و تابع تأکید اولسه (یالزید زید) و (یالتمیم اجمعین) کبی و تابع بدل اولسه (یالزید عمرو) و (یالزید اخی بکر) کبی و تابع عطف بیان اولسه (یالزید بشر) و (یالزید ابی بکر) کبی و اما (منادای مستغاث بالالف) حال لفظی فتح اوزره بنا و حال محلی نصب اولوب حال فتحله حال نصب سیان و بردیمک اولمغله توابعی بالجمله منصوب لر در تابع كرك مفرد و كرك مشابه للمضاف اولسون تابع صفت اولسه (یازیدا کریم) و (یازیدا ضارب عمرو) و (یازیدا ذالمال) و (یازیدا طالعاً جبلاً) و (یازیدا حسناً وجهه) کبی و تابع معطوف اولسه (یازیدا و عمرآ) و (یازیدا و الحارث) و (یازیدا و ضارب عمرو) و (یازیدا و ذالمال) و (یازیدا و طالعاً جبلاً)

و (یازیداً والحسن وجهه) کبی وتابع تاکید اولسه (یازیدا زیداً)
و (یاتیمیا اجمعین) کبی وتابع بدل اولسه (یازیداعمر واً) و (یازیدا ابابکر)
کبی وتابع عطف بیان اولسه (یازیدا بشرأ) و (یازیدا ابابکر) کبی . واما
(منادای مفرد نکره) . و (منادای مضاف) . و (منادای مشابه للمضاف
معرفه) و (منادای مشابه للمضاف نکره) نک بدل و معطوف مجرد
عن اللامک غیری توابعی بالجملة لفظلرینه تابع اولوب منصوبلر در تابع کړک
مفرد و کړک مضاف و کړک مشابه للمضاف اولسون (منادای مفرد نکره ده)
تابع که صفت اوله یارجلا کریمأ و (یارجلا ضارب عمرو) و یارجلا طالعا
جیلاً) و (یارجلا حسنا وجهه) کبی و عطف یارجلا والحارث کبی و تأکید
(یارجلا رجلا) کبی و عطف بیان یارجلا بشرأ و (یارجلا ابابکر) کبی
(و منادای مضاف ده) تابع که صفت اوله یاعبد الله الکرم و (یاعبد الله
ضارب زید) و (یاعبد الله ذا المال) و (یاعبد الله طالعا جیلاً)
و (یاعبد الله حسنا وجهه) کبی و عطف (یاعبد الله والحارث) کبی
و تأکید (یاعبد الله عبد الله) و (یابنی هاشم اجمعین) کبی و عطف بیان
(یاعبد الله بشرأ) و (یاکعبه العشاق بیت الحرام) کبی (و منادای مشابه
للمضاف معرفه ده) تابع که صفت اوله (یاطالعا جیلاً الضریف) و (یاطالعا
جیلاً ضارب عمرو) و (یاطالعا جیلاً ذا المال) و یاطالعا جیلاً خیرأ
من زید) کبی و عطف (یاطالعا جیلاً والحارث) کبی و تأکید (یاطالعا
جیلاً طالعا جیلاً) کبی و عطف بیان (یاطالعا جیلاً بشرأ) و (یاطالعا
جیلاً ابابکر) کبی و (منادای مشابه للمضاف نکره ده) تابع که صفت
اوله (یاطالعا جیلاً ضریفاً) و (یاطالعا جیلاً ضارب عمرو) و (یاطالعا
جیلاً خیراً من زید) کبی و عطف (یاطالعا جیلاً والحارث) کبی و تأکید
(یاطالعا جیلاً طالعا جیلاً) کبی و عطف بیان (یاطالعا جیلاً بشرأ)
و (یاطالعا جیلاً ابابکر) کبی .

واما (منادای مفرد معرفه) نک بدل و معطوف مجرد عن اللامک غیری
توابعی اگر تابع اضافت مغنویه ایله مضاف ایسه منصوب قلنور تابع که صفت
اوله (یازید ذا المال) کبی و تأکید (یاتیم کلهم) کبی و عطف بیان (یاعمر

اباحفص) کبی واما معطوف معرف باللام متصور دکلدر زیر اضافت
 مغنویه ده مضافه لام تعریفک دخولی ممتنع در
 اشبو تابعک منصوب قلنمسنک وجهی زیر اضافت حقیقه ایله مضافدرکه
 منادا قلنمش اولسه ایدی معرب اولوب و منصوب اولور ایدی پس تابع
 واقع اولدقده منصوب قلنمسی اولی و احرری اولور واکر تابع (مفرد)
 ویا (اضافت لفظیه ایله مضاف) ویا (مشابه للمضاف معرفه) ویا (مشابه
 للمضاف تکره) اولسه متبوعی اولان منادای مفرد معرفه نك لفظنه حملاً
 مرفوع و محمله حملاً منصوب قلنمسی جائز اولور زیر منادانك
 بناسی عارضی اولمغله معربه مشابهتی اولوب توابعی معربك توابعی کبی
 لفظنه تابع اولسی جائز اولدینی کبی (توابع مبنی) نك حق مبنی نك محمله
 تابع اولسی اولوب و بوراده محلی ایسه مفعولیت اوزره منصوب بولمغله
 شو اجلدن محمله تابع اولسی دخی جائزدر تابع صفت اولسه (یازید العاقل)
 و (یازید ضارب عمرو) و (یازید الحسن وجهه) کبی (العاقل) و (ضارب)
 و (الحسن) ده رفع و نصب جائزدر و عطف (یازید و الحارث) کبی (الحارث) ده
 کذا رفع و نصب جائزدر و تأکید (یازید زیداً) و (یازید زید) و (یاتیم
 اجمعین) و (یاتیم اجمعون) کبی رفع و نصب ایله و عطف بیسان (یازید
 بشرأ) و (یازید بشر) کبی رفع و نصب ایله

درس ۶۴

معلوم اوله که اوزرینه یانك دخولی ممتنع اولان معطوف معرف باللام ده
 یعنی (یازید و الحارث) نخوانده معطوفده خلیل که سیبویهك استاذیدر رفعی
 اختیار و ترجیح ایلدی ترجیح ایلمسنه باعث زیر بر حرفه معطوف
 اولان حقیقه منادای مستقل اولوب شوجهتله منادای مستقل اوزره
 جاری حال اوزره اولمی ایسه ده لکن حرف ندا مباشرت ایلمامکله احوال
 کندینه اعراب قلنه رق مرفوع بولمشدردیدی و ابو عمر و بن العلاء النحوی که
 قرآندردن و خلیل دن مقدمدر نصبی ترجیح ایلدی و ترجیح ایلمسنه
 باعث زیر معطوف معرف باللام اوزره حرف ندانك دخولی ممتنع

اولغله منادای مستقل اولیوب آنجق کندیچون تبعیت حکمی واردر تابع
مبنی ایسه مبنی نك محله تابع اولوب و بوراده محلی ایسه مفعولیت اوزره
نصبر دیدی .

و ابوالعباس المبرد حکم اولوب اکر معطوف مزبور فی الاصل علم بولنور
ولام تعریف مؤخر آکتورلمش اوله رق (الحسن) و (الحارث) کله لری
کبی کنندن لام تعریفك نزعی جائز اولور برکله ایسه خلیلی رأینده تصویب
ایدوب زفع مختاردر دیدی و اکر لام تعریف ایله بیله علم قلمش اوله رق
(النجم) و (الصعق) کله لری کبی کنندن لام تعریفك نزعی جائز اولیان
برکله ایسه ابو عمرو بن العلاء النحوینك رأینی تصویبله نصبی اختیار ایلدی
پس ابوالعباس المبرده کوره (یازید و الحارث) قولزده رفع و (یازید و النجم)
قولزده نصب مختار اولمش اولور (النجم) معرف باللام اوله رق اولکر
یلدیزینك علمیدرکه فارسیده پروین دینور و (الصعق) معرف باللام
اوله رق کنندینه صاعقه اصابت ایتمش برکیمسه نك علمیدر فافهم .

بورایه قدر ارباب مطالعهیه خفی اولمدیغی اوزره بیان اولنان احکام توابعدن
(منادای مفرد نکره) و (منادای مضاف) و (منادای مشابه للمضاف
معرفه و نکره) و (منادای مفرد معرفه) نك تابعی بدل و یا خود معطوف
مجرد عن اللام اولور ایسه اشته بو قالدیکه بونی دخی اوکرنك لازمدر .
خفی اولیه که شو ذکر اولنان منادالرك كرك بدل و كرك لامدن مجرد اولان
معطوفلری منادای مستقل حکمنده در زیرا بدل مقصود بالذکر در که مبدل
منه بدلك ذکرینه مقدمه و توطئه در و لام تعریفدن مجرد اولان معطوف
حرف عطف حرف ندا مقامنده اولغله کانه هرکز معطوف اولیوب حقیقتده
رأساً منادای مستقندر حالوکه اوزرینه (یا) نك دخولنه دخی بر مانع
اولماغله پس معطوف علیه قرینه سیله آنده (یا) مقدردر .

شو وجهله مستقل منادی حکمنده اولدقلرنده معلومدر که مفرد معرفه ایسه لر
علی مایرفع به مبنی قلنورلر و اکر مفرد نکره و یا مضاف و یا مشابه للمضاف
ایسه لر منصوب قلنورلر (منادای مفرد نکره ده) تابع که بدل اوله (یار جلاً
عمرو) و (یار جلاً اخامرو) و (یار جلاً طالعاً جلاً) و (یار جلاً

رجالاً صالحاً) کی و تابعه معطوف مجرد عن اللام اوله (یار جلا و عمرو)
و (یار جلا و اخامرو) و (یار جلاً و طالعاً جلاً) و (یار جلاً و رجلاً
صالحاً) کی .

و (منادای مصافده) تابعه بدل اوله (یاعبدالله اخامرو) و (یاعبدالله
طالعاً جلاً) و (یاعبدالله رجلاً صالحاً) کی و تابعه معطوف مجرد عن اللام
اوله (یاعبدالله و عمرو) و (یاعبدالله و اخامرو) و (یاعبدالله و طالعاً
جلاً) و (یاعبدالله و رجلاً صالحاً) کی .

و منادای مشابهه للمضاف معرفده تابعه بدل اوله (یاطالعاً جلاً عمرو) و
(یاطالعاً جلاً اخامرو) و (یاطالعاً جلاً خیراً من زید) و (یاطالعاً جلاً
رجالاً صالحاً) کی .

و تابعه معطوف مجرد عن اللام اوله بواو کتور لمکله مثال
حاصلدر و منادای مشابهه للمضاف نکرده تابعه بدل و یا معطوف مجرد
عن اللام اوله بونک مثالی دخی عند التامل ظاهر در .

و منادای مفرد معرفده تابعه بدل اوله (یازید عمرو) و (یازید اخا
عمرو) و (یازید طالعاً جلاً) و (یازید رجلاً صالحاً) کی و معطوف
مجرد عن اللامه مثال برواو کتور مکله حاصلدر .

امثلهده تفصیل و اطناب وقوع بولدی ایسهده مدار فهم اولمق ایچون واقع
اولدیغندن معذور طو تلملیز و نظر انصاف ایله باقلور ایسه ضمن امثلهده
چوق شی وضع ایدوب ایجاز و اختصاری التزام ایلمشزدر .

درس ۶۵

خفی اولمیه که معرف باللام اوزره حرف ندانک دخولی جائز دکدر .
زیرا ایکی ادات تعریفی جمع ایلمک لازم کلور . لکن ایکی شرط ایله
جائز اولور بریسی لام تعریف بر محذوفدن عوض اولمیدر و دیکری
کلهیه لازم اولوب نزعی جائز اولمایدر . بوده «یاالله» کی که اصلی (اله)
ایدی همزه حذف اولنوب و آندن عوض الف لام کتورلمش و کلهیه
لازم اولمشدر و اما (النجم) و (الصعق) کلهلرنده الف لام کلهیه لازم

ایسه ده بر محذوفدن عوض اولمامغله و (الناس) کله سنده که اصلی اناس اولوب همزه حذف اولنهرق و آندن عوض برالف لام کتورلمشدر .
بر محذوفدن عوض ایسه ده لیکن کلمه یه لازم اولمامغله ومثلا (الرجل) و (الحسن) کله لرنده بر محذوفدن عوض اولمیوب و کلمه یه لازم دخی اولمامغله بو کیلره حرف ندانک دخولی ممتنع در واما شاعرك :

من اجلك يا التي تيمت قلبي وانت بخيلة بالوصل عني

شعر نده (التي) کله سنده الف لام کلمه یه لازم ایسه ده بر محذوفدن عوض اولمیوب و بونکله بیله حرف ندانک دخولنه شاذ اولمغله جواب ویرلمشدر مفاد بیت یا محبوبه که قلبی سکا منقاد و ذلیل ایلمشسک شومشقه تحمّم سندن ایچون ایکن حالو که سن بکا وصلت وملاقات جهتیه بخيله و غیر راضیه سک دیمکدر ودخی شاعرك .

فيا الغلامات اللذان فرا اياكما ان تكسباني شرأ

شعر نده (الغلامان) کله سنده الف لام نه بر محذوفدن عوض ونده کلمه یه لازم اولوب بونکله بیله حرف ندانک دخولنه اشد شذوذ دینکله جواب ویرلمشدر (مفاد بیت) ای فرار ایدن ایکی غلاملر بکا شرکسب ایتمکدن یعنی بنی سنک تربیه کزه قیامله شره القا ایتمکدن حذر ایدیکز دیمکدر شو بیانمز منقهم اولدی ایسه اوزرینه یانک دخولی ممتنع اولان بر معرف باللام مثلا (الرجل) کی ندا اولنق طلب اولنسه حرف ندا ایله (الرجل) بیننده های تنبیه بیله (ای) لفظی توسیط ایله (یا ایها الرجل) دینورکه (ای) قصد ایله متعین اولوب منادای مفرد معرفه در و (ها) حرف تنبیه و (الرجل) مقصود بالندا اولوب (ای) نک صفتیدر و یا خود (هذا) لفظی توسیط ایله (یا هذا الرجل) دینورکه (ها) حرف تنبیه و (ذا) اسم اشاره در تقدیر اضم اوزره مبنی اولوب منادای مفرد معرفه در و (الرجل)

مقصود بالندا اولوب (هذا) نك صفتيدر وياخود (اى) و (هذا)
لفظلرينك ايكسنى ده توسط ايله (يا ايها الرجل) دينوركه (اى)
مناداي مفرد معرفه در و (ها) حرف تنبيه و (ذا) (اى) نك صفى
و (الرجل) مقصود بالندا اولوب فاضل عصام عننده مختار اولان صفت
بعدالصفتدر وساى عننده (هذا) نك صفتيدر .

مناداي مفرد معرفه نك صفتنده ذكرى سبقت ايلديكى اوزره ايكي وجه
جائز ايسه ده لکن بو تركيب نحو نده يعنى مناداي مفرد معرفه اسم مبهم
اولدقده صفتنده « حرکه اعرابيه مى علامت منادا اولان حرکه بنائيه
موافق اوله رق مقصود بالندا اولديغنه دلالت ايتسون ايچون » رفع التزام
اولمشدر واشبو صفتك توابعنده دخى تابع كرك مفرد وكرك مضاف
اولسون ينه رفع ملتزم اولمشدر . مثلاً شو تركيبلرده (الرجال) كلمه سنك
رفعى ملتزمدر و (الرجل) كلمه سنك توابعنده دخى ملتزم اولان رفعدر
(يا ايها الرجل الضريف) و (ايها الرجل ذوالمال) كې .

وخفى اوليه كه مناداي مفرد معرفه صورة تكرر ايدر وثايندن صكره
براسم مجرور كلور ايسه اولكنده ضم ونصب جائزدر شاعرك :

يا تيم تيم عدى لا ابالكُم لا يلقينكم فى سوءة عمر

شعرنده واقع (يا تيم تيم عدى) ده اولديغى كې (سيديويه) اولكى تيم
مناداي مفرد معرفه اوله رق ضم اوزره مبنى اولوب وايكنجى تيم اضافت
معنويه ايله (عدى) لفظنه مضاف اوله رق اولكى تيم نك تا كيدى اولسنى
(ودخى) اولكى تيم مذكور (عدى) كلمه سنه مضاف اوله رق مناداي مضاف
اولق اوزره منصوب وايكنجى تيم مضاف ايله مضاف اليه ييننده فاضل
واولكى تيم نك تا كيدى اولسنى تجويز ايتمشدر پس سيديويه كوره اولكنده
ضم ونصب جائز اولوركه شيخ ابن حاجب دخى بونى اختيار ايلمشدردر
واما (سیرافى) اولككنك مناداي مفرد معرفه وايكنجى نك عدى كلمه سنه
مضاف اوله رق اولكى تيم نك تا كيدى اولسنى اختيار ايدوب فقط
ثانى نك نصبينه اتباعاً اولكنده فتحى دخى تجويز ايتمشدر .

واما (مبرد) اولكى تيم مذكور (عدى) كلهسى قرينه سيله مخذوف بر
 (عدى) كله سنه مضاف اوله رق منادى مضاف اولغله منصوب واينكجى
 تيم مذكور (عدى) كله سنه مضاف اولوب اولكى تيم نك تا كيديدر ديدى
 شو ذهابلك جمله سنده اينكجى تيم منصوب در . زيرا يامنادى مضافه تابع
 واقع اولوب وياخود منادى مفرد معرفه نك اضافت معنويه ايله مضاف واقع
 اولان تابعيدركه هر حالده نصبي واجيدر واکر مثالده (ياضارب ضارب عمرو)
 دينسه اينكجيده اولكى منادى مفرد معرفه قيلندقه رفع ونصب جائزدر
 تأمل مفاد بيت عدى قبيله سى منسوب اتندن تيم قبيله سندن (عمر) شاعر
 جريرى هجو ايتك استيه رك جرير ايشتدكه (عمر) ك قومنه خطابا
 ديوركه (ياتيم عدى) سنك بابا كنز يوقدر يعنى پدردن مستغنى شجيعلرسكنز
 وياخود پدرى نامعلوم كيمسه لرسكنز سزى عمر بنم طرفدن بر بليه ومكروهه
 القا ايتسك ديمكدركه مدح و ذم اولغله محتملدر .

درس ۶۶

خفى اوليه كه حروف ندادن (يا) كله سى مندوبه دخی داخل اولور و (وا)
 لفظى بالخاصه مندوب ده مستعمل اولور (مندوب) لغتده محاسنى تعداد
 اوله رق اوزرينه بكا اولانان ميتدر واما اصطلاح نحاتده ادات ندادن (يا)
 وياخود (وا) لفظيله آكلوب آچينلان واغلانلاندر . زيرا عرب برميه
 وياخود وفاتى خبرى كلان بر كيمسه يه ويا فوت ايتدكلى بر شيئه آچوب
 ودر دنك اولدقلرنده آنى وياخود شوسيله اوزرينه واقع اولان حال مصيبتى
 مقتضای حاله كوره (يا) وياخود (وا) لفظيله ياد ايدوب ومعذور
 طوتلملر يچون مندوبك محاسنى تعداد ايله بكا ايدرلر وكاه مد صوت اچون
 آخري نه بر الف زياده ايدرلر وعندالوقف آخري نه برده هاكتوريرلر
 يازيده و وابكره ويا مصيبتاه ويا حسرتاه و واجبتاه كي والف زياده
 اولندقه غير التباس لازم كلور ايسه الفى مندوبك آخري نك حره سى
 جنسندن بر حرف مده قلب ايدرلر . مثلا بر عورتك غلامنه عورته خطابا
 ندبه اولندقه (واغلامكه) ديرلر واغلامكاه دينز . زيرا مخاطب مذكر ك

غلامنه ملتبس اولور و بر جماعتك غلامنه جماعتسه خطاباً ندبه اولندقدہ
 واغلامكموه ديرلر چونكه ميم في الاصل مضمومدر واغلامكاه دينمز .
 زیرا ايكي مخاطبك غلامنه ملتبس اولور ايدي وغفلت اولنميه كه الف ندبه
 مندوبك صفتنه الحاق اولنمز مثلاً وازيد الطويلاه دينمز بلكه وازيداه الطويل
 دينور واما يا امير المؤمنيناه دنيلور زیرا موصوفك صفتنه اتصالي مضافك
 مضاف اليه اتصالي كي دكلدر زیرا مضاف اليه مضافك متممى اولوب جزء
 كيدر واما صفت بعد تمام الموصوف مجرد تخصيص ويا توضيح ايجون
 كتوريلور لكن نحاتدن يونس وازيد الطويلاه نحويني دخي تجويز ايدوب
 موصوفك صفتنه اتصالي هر نقدر مضافك مضاف اليه اتصالندين لفظاً انقص
 ايسهده لكن من جهة المعنى آندن اتمدر زیرا موصوف اليه صفت بالذات
 ،تحددر . مثلاً مثال مذكوره طويل اولان زيددر واما مضاف اليه
 مضاف اليه بويله اوليوب متغيرلدر ديمشدر و برعربك ايكي قدخى ضايع
 قيلد يغمده (واججمتى الشاميتناه) قولنى حكايه ايلمشدر (جمجمه) قدح
 معناسندهر .

معلوم اوله كه مندوب منادا حكمندهدر كه مفرد معرفه ايسه ضم اوزره
 مبنى در و اكر مضاف ويا مشابه للمضاف ايسه لفظاً ويا تقديرأ منصوبدر .
 وعلى كل حال مقدر ادعونك مفعول بهيدر واما آخرنده مدصوت ايجون
 الف زياده سنده الف ما قبلنك فتحى اقتضا ايتمكه لمارض آخرى فتح اوزره
 مبنى اولمش اولور لكن بيلميدركه مندوب نكره اولمز زیرا شئ مجهوله
 ندبه اولنمز پس (وارجلاه) دينلمز مندوبك اقبال وتوجهى مطلوب
 ومأمول اولما مغله تعريف مناداده داخل قلنا مشدر كه شوزهاب ابن حاجبك
 مسلكيدر لكن اكثر نحات تعريف مناداده داخل قلديلر زیرا مندوبك
 هر نقدر حقيقه اقبال وتوجهى مطلوب دكل ايسهده لكن مطلوب حكمندهدر
 مثلاً (يازيداه) يازيد كل بن سكا مشتاق و حسر تكله دردنا كم حكمندهدر .
 فاضل جامى دخي ابن حاجبك مندوبى منادادن خارج قلوب ذكرينى افراد
 ايتمنى تحكمدر اولى اولان مناداده داخل اولسيدر ديمشدر .

خفی اولیه که ندادن سرعتله فراغت ایدوب (مناداله) جانبیه مواجه اولوق ایچون مناداده ترخیم جائزدر واما منادانک غیرنده ترخیم ضرورت شعریه دن ماعدا سعه کلامده جائز دکدر (ترخیم) کلامی سهل ایتک معناسنه اولان (رخامة) دن مأخوذ اولوب براسمک آخرین بلا موجب مجرد تخفیف ایچون حذف ایلمکدر پس لموجب آخری محذوف (قاض) و (دم) و (ید) کیلر علم قلوب ندا اولندقدده منادای مرخمده داخل دکلردر .

بیلملیدر که ترخیم منادانک بش شرطی وارد (شرط اول) منادا مضاف اولیوب و مضافه مشابهه دخی اولاملیدر زیرا منادای مضاف و مشابهه للمضافک ایکی جزئندن جزء اول (نظراً الی المعنی) و جزء ثانی (نظراً الی اللفظ) اجزای منادانک آخری اولاملغله هیچ برنده ترخیم اوله من واما شاعرك (خذو حظکم یا آل عکرم واذکروا) شعرنده (یا آل عکرم) قولنک اصلی یا آل عکرمة اولوب منادای مضافده مضاف الیه دن (تا) حرفی حذف ایله ترخیم بولنسی ضرورت شعریه دن ایچوندر (شرط ثانی) ترخیم اولنان منادا منادای مستغاث اولاملیدر زیرا مستغاث باللامده مستغاث مجرور اولوب نصب و بنا کی اثر ندا کنندده ظاهر اولاملغله و مستغاث بالالفده زیاده الف حذفه منافی اولغله ترخیم جائز اوله من (شرط ثالث) منادا جمله دخی اولاملیدر مثلاً (تأبط شرا) کبی که فی الاصل جمله فعلیه اولوب بعده علم قلنمشدر ندا اولندقدده یا تأبط شرا دینور اولکی حالیه محکی اولغله بونده ترخیم جائز اولمز (شرط رابع) منادا مندوب دخی اولاملیدر زیرا مندوبده مدصوت واطهار تفجیع مطلوب اولوب وحتی بونک ایچون اکثریا آخرنده الف زیاده قلنور که ترخیم مناسب اوله من .

اشبو شروط اربعه عدمیدر (شرط خامس) وجودیدر که ترخیم اولنه جق منادا (یا علم) اولوب اوچ حرفدن زائد اولملیدر (مروان) و (بعلبک) و (حارث) کبی زیرا اوچ حرفدن زائد اولمدقدده عند الترخیم کله اقل

ابنیه معربدن یعنی اوچ حرفدن انقص اولور ایدی پس یازید قولمز ترخیم اولنه مز . و (یاخود) آخرنده تائیث بولمیلیدر کړک علم اولسون (طلحه) کبی و کړک غیر علم اولسون (ضاربة) کبی و کړک اوچ حرف اوزره زائد اولسون (ثبه) و (شاة) کلملری کبی زیرا تائیث معرض زوالده اولوب سقوطی ایچون برادنی مقتضی کافی در باب ترخیمده ایسه حرف اصلی نك سقوطی کثیر الوقوع در پس تائیثك سقوطی اولویت درجه سنده قالور (ثبه) ناك ضمیمه جماعت و گروه معناسنده در جمعی ثبات و ثبوت کلور ابن حاجب عندنده بی ماده سندندر که لام الفعلی محذوفدر و جوهری ثوب ماده سندن مأخوذ اولسنی دخی کوسترمشدر که بوکا کوره عین الفعلی محذوفدر و قاموس ده و ثب ماده سنده دخی مذکوردر که بوکا کوره فاء الفعلی محذوفدر هر حالده آخرنده اولان تاء تائیث محذوفدن عوض کتورلمشدر و (شاة) کلمه سی شوه ماده سندندر اصلی شاهقه در لام الفعلی محذوفدر قیونه و عورته دینور اشبو (ثبه) و (شاة) کلملری ندا اولنوب ترخیم اولندقدده یا ثب و یا شبا دینور که ایکی حرف اوزره قالورلر لکن ایکی حرف اوزره قالملری ترخیمدن ناشی اولیوب تاء تائیث بولندقدده دخی یننه ایکی حرف اوزره درلر بیلیمیلیدر که اشبو ذکر اولنان شرطلر بولندقدده منادی ترخیم اولنمز و اما صاحب لفظی کثیر الاستعمال اولدیغندن علم اولیوب و آخرنده تاء تائیث یوق ایسه ده شاذ اوله رق عربدن ندا و ترخیم ایله یا صاح مسموع اولمشدر نته کیم دینمشدر .

اعانی منك یا صاح و منك الحنث قدلاح
ترکنا جاطب لیل وان الرکب قدراح

درس ۶۸

شروط ترخیم معلوم اولدی ایسه ترخیمده حذفك مقدارینی دخی تعیین ایده لم بوده اوچ قسم اوزره در (قسم اول) ترخیم ایله آخرندن ایکی حرف حذف اولساندر بوده ایکی موقع ده در (موقع اول) آخرنده

ایکسی بر دفعه ده زائد قیلنش ایکی حرف زائد بولان کله لر در پس
مرجانه و ثمانية لفظلری بوموقعدن خارجدر زیرا (مرجانه) ده نون
و (ثمانية) ده یا اولازائد قیلنوب بعده تاء تأیث داخل اولمش اولمغله بر دفعه ده
زائد دکلر در بولنر ندا و ترخیم اولندقلرنده آنجق آخرلرندن تاحذف
اولنور .

بیلملدرکه آخرلرنده بر دفعه ده زائد قیلنش ایکی حرف بولن ان یدی
صنف اوزره در .

(اولکیسی) تشیه درکه آخرنده الف و نون زائده واردر مثلاً علم قیلنه رق
زیدان و یضربان کبی ندا و ترخیم اولندقلده یازید و یا یضرب دینور (دال)
و (با) نک فتحیه .

(ایکنجیسی) جمع مذکر سالمدرکه آخرنده (واو) و (نون) و یا خود
(یا) و (نون) زائده واردر مثلاً علم قیلنه رق (مسلمون) و (مسلمین)
کبی ندا و ترخیم اولندقلده (یا مسلم) و (یا مسلم) دینور اولکننده میمک
ضمی و ایکنجیده کسریله .

(اوچنجیسی) جمع مؤنث سالمدرکه آخرنده (الف) و (تای زائده)
واردر مثلاً علم قیلنه رق (مسلمات) کبی ندا و ترخیم اولندقلده (یا مسلم)
دینور میمک فتحیه .

(دردنجیسی) آخرنده الف و نون زائده لر بولن ان اسم و صفتلر در مثلاً علم
قیلنه رق (مروان) و (ندمان) کبی ندا و ترخیم اولندقلده (یا مرو)
و (یا ندم) دینور واو و میمک فتحیه .

(بشنجیسی) آخرنده نسبت ایچون ایکی یاء زائده اولان و بوکا مشابه
بولن انلر در مثلاً علم قیلنه رق (کوفی) و (رومی) و (کرسی) کبی ندا
و ترخیم اولندقلده (یا کوف) و (یا روم) و (یا کرس) دینور (فا) نک
و میمک و سینک کسریله .

(التجیسی) آخرنده الفی تأیث اولان کله لر در مثلاً علم قیلنه رق (صحراء)
و (حمراء) کبی ندا و ترخیم اولندقلده (یا حمر) و (یا حمر) دینور رالرك
فتحیه .

(یدنجیسی) آخرنده الف مقصوره زائده دن صکره همزه الحاق بولسان
کله لر در مثلاً علم قیلنه رق (حرباء) و (غلباء) کبی ندا و ترخیم اولندقدده
(یا حرب) و (یا غلب) دینور بالرك فتحيله .

(موقع ثانی) آخرنده حقیقه و یا حکماً بر حرف صحیح اولوب و آندن
مقدم حروف مددن زائد بر حرف بولوب و مجموع کله درت حرف دن
اکثر اولان کله لر در علم اوله رق (منصور) و (عمار) و (مسکین) کبی
ندا و ترخیم اولندقدده (یامنص) و (یاعم) و (یامسک) دینور صادق ضعیله
و میمک فتحيله و کافک کسريله و بر کیمسه یه علم قیلنه رق (مرمی)
و (مدعو) دخی بوموقعده داخلدر . زیرا حرف آخرلری اصالتده
حرف صحیح حکمنده در . پس ند او ترخیم اولندقدده (یامررم) و (یامدع)
دینور و اما (اسماء) کله سی سیوییه کوره حسن معناسنه و سامتدن
ماخوذ اولوب فعلاء وزننده در که موقع اولدن صنف سادسده داخلدر
و ابن حاجیک مختاری بودر و اما غیریلر عندنده اسمک جمعی اولوب افعال
وزننده در که اشبو موقع ثانیده داخلدر هر حالده علم قیلنه رق ندا و ترخیم
اولندقدده (یا اسم) دینور میمک فتحيله

(قسم ثانی) ترخیم ایله آخرندن کله حذف اولنقددر که احدهما اخرده
عامل اولیه رق ایکی کله دن ترکیب ایلوب و بر اسم واحد حکمنده علم
قانون مرکباتده در (بعلیک) و (نقطویه) و (خمسة عشر) کبی ندا
و ترخیم اولندقدده (یابعل) و (یانقط) و (یاخسة) دینور که اسم اخیر
تای تانیث منزلنده کور یله رک حذف اولنور .

(قسم ثالث) آخرندن بر حرف حذف اولنادر که قسمین سابقینک غیری
اولان کله لر در علم اوله رق (حارث) و (مالک) و (مختار) و (ثمود)
کبی ندا و ترخیم اولندقدده (یا حار) و (یا مال) و (یا ثمو) دینور (مختار)
لفظنک آخری حرف صحیح و ما قبلنده الف وار ایسه ده (الف زائده)
اولیوب عین الفعل کله دن مقلوب اولمغله و (ثمود) درت حرفدن اکثر
اولمالمغله قسم اولدن موقع ثانیده داخل اولیوب اشبو قسم ثالثدن
اولمشدر .

و خفی اولیه که منادای مرخم جمیع اجزاسیله ثابت حکمنده در که بعد الترخم آخر کلمه اولان حرف اولجه بولندینی حرکه وسکون اوزره باقیدر نته کیم کتوردیکمز مثالرده تصریح اولندی و برده مثلاً (ثمود) کلمه سی ندا و ترخم اولندقدده (یاثمو) دینوب (واو) اعلال اولنامسی و مثلاً (کروان) کلمه سی ندا و ترخم اولندقدده (یاکرو) دینوب واو الفه قلب اولنامسی محذوف ثابت حکمنده اولدیغنددر .

و بعض استعمالده منادای مرخم کانه کنندن برشی حذف اولنامش کبی اعتبار اولنوب برآسه اسم قلنمشدر . بوکا کوره بنا و اعلال و تصحیحخنده حکم اصلنه لظر اولنوب حکم نفسنه نظر اولنور مثلاً (یا حارث) دن مرخم (یا حار) کانه کلمه مستقل اولوب مفرد معرفه اولمغله ضم اوزره مبنی قیلنور و یاثمو قولزده واو بعدالضمه طرفده واقع اولمغله یایه قلب اولنوب یاثمی دینور و (یاکرو) ده واو متحرک و ماقبلی مفتوح اولمغله الفه قلب اولنوب یاکرا دینور اما (ثمود) لفظنده واو طرفده اولمغله و (کروان) لفظنده مانع اعلال بولمغله اعلال اولنمز :

درس ۶۹

خفی اولیه که باب مناداده حرف ندایی حذف جائزدر . لکن براسم جنس و یا اسم اشاره منادا واقع اولسه بونلردن و منادای مستغاث و مندوبدن حرف ندایی حذف ایلمک جائز دکلدر .

اسم جنس واقع اولان منادادن حرف ندانک حذف اولنامسی زیرا اسم نکره اولوب و منادا واقع اولدقدده ایکیدن خالی دکلدر که یاندا ایله تعینی قصد اولنه رق معرفه اولور و یا قصد اولمیه رق نکره قالور حرف ندادن استغنا ایسه منادی ندا ایلیان کیسمه یه متوجه و مقبل بولندقدده اوله جغندن قبل الندانکره اولوب و بعدالندا معین اولیان مناداده حرف ندا حذف اولنه مز و بعدالندا معین اولان مناداده ایسه حرف ندا حرف تعریف دیمک اولوب حرف تعریف ایسه ککندیله تعرف ایدن کلمه دن حذف اولنه میه جغندن حرف ندا حذف اولنه مز و اسم اشاره واقع اولان منادادن

حرف ندانك حذف اولنامسى زیرا اسم اشاره دخی ابهامده اسم جنس
مثابه سنده در .

ومنادای مستغاث و مندوبدن حرف ندانك حذف اولنامسى زیرا بونلرده
مدصوت مطلوبدر که حذف بوکا منافیدر .

واما منادا علم اولمغله معرفه اولسه بونده حرف ندایی حذف جائزدر واشبو
حذفده ایکی نوع اوزره بولمشددر که یا حرف ندا حذف اولندقدده اندن عوض
اوله رق بر حرف آخر کتور یلور (اللهم) کله سی کبی که اصلی (یا الله)
در حرف ندا حذف اولنوب اندن عوض آخرینه برمیم مشدده کتور لمشددر
ویا خود بلا عوض حذف اولنور (یوسف اعرض عن هذا) قول شریفده
اولدیفی کبی که اصلی یا یوسف در و (اسم موصول) واقع اولان (منادا)
ده دخی حرف ندایی حذف جائزدر (من لایزال محسنا احسن الی) قولزده
اولدیفی کبی که اصلی یا من لایزال محسنا احسن الی در که حرف ندا محذوفدر
و (بر معرف باللام) ایله موصوف ای لفظندن دخی حرف ندایی حذف
جائزدر (ایها الرجل) کبی اصلی یا ایها الرجل در هر تقدیر (ای) ندا ایله
تعرف ایلمش اولوب بونده حرف ندانك حذفی جائز اولماملی ایسه ده لکن
مقصود بالندا صفتی اولمغله جائز کورلمشدر . و (بر معرف باللام) ایله
موصوف اولان ایله موصوف (ای) لفظندن دخی حرف ندایی حذف
جائز کورلمشدر (ایها الرجل) کبی اصلی یا ایها الرجل در زیرا مقصود
بالندا الرجل در و اما مقصود بالندا ذکر اولمیه رق ایها دیمک جائز دکدر
بلکه یا ایها دینور . و (هر بر معرفیه) مضاف منادادن دخی حرف ندایی
حذف جائزدر (غلام زید افعل کذا) کبی اصلی یا غلام زید افعل کذا در ،
واما مضمرات منادا واقع اولمق شاذدر یا انت و یا ایاک کبی .

حرف ندانك حذفی جائز اولوب اولمیان محللر کوزلجه فهم اولندی ایسه
کندنده حرف ندا شاذ اوله رق محذوف بولنان بعض شعر و کله لره دخی
کسب وقوف ایلملیدر .

خفی اولمیه که ام جنبدک (أصبح لیل) قولنده اسم جنس اولان لیل
لفظندن حرف ندا حذف اولمشددر اصلی صر صبحا یا لیل در یا کیجه صباح

اول دیمکدر بوکا شاذ واقع اولمشدر دینهرك جواب ویریلور ام جنذب
 امری القیسك عورتیدر که اشبو قوی برکیجه زوجنك آغزینك رایحه
 کریهه سندن بیزار اولدیغده دیمشدر قول مزبور مؤخرآ بین العرب
 ضرب مثل اولمشدر که محله کوره استعمال اولنور ودخی (افتد مخنوق)
 ضرب مثلنده اسم جنس اولان مخنوق لفظندن حرف ندا حذف اولمشدر
 اصلی (افتد یا مخنوق) در بوکا دخی شاذدر دیو جواب ویریرز (افتد)
 کلمه سی اقتدادن امردر افتدا اسیر و گرفتار اولمش برکیمه سی فدیة و بدلنی
 و یروب خلاص ایتکه دینور اشبو کلامی برکیمه برکیجه سلیم ابن سلیم
 نام برکیمه نك اوسته آتی بو غمق ایچون دوشدکه دیمشدر که مفادی ای
 بوغلان کیمسه نفسکی فدیة ایله تخلیص واشترا ایت که دیگر صورتله المدن
 خلاص اوله جغك یوقدر دیمکدر پس مومی الیه (اللیل طویل وانت مقمر)
 دیمشدر که کیجه اوزوندر و سن مقمر سك یعنی اوزریکه قر طلوع ایتمشدر
 بنم سنی اغنا ایده جکمدن امین اولملیسك خنق واسیر ایتکه استعجالك ندر
 دیمکدر مرویدر که سلیم قوی اولمغله اوستنده کندینی بو غمق دیلیان کیمسه سی
 صیقه رق شرطه لدقه (اضربا وانت الا علی) دیمشدر یعنی شرطه
 لیور میسك حالبو که سن اوستنده سك دیمکدر پس شوکلامرك هربری ضرب
 مثل اولمشدر که محله مناسب استعمال اولنور .

ودخی شاعرک (اطرق کر اطرق کرا . ان النعامه فی القرا . بغاثکم فی ارضنا .
 ما استسرا ما استسرا) شعرنده اطرق کرا قولنده اسم جنس اولان کرا
 لفظندن دخی حرف ندا محذوفدر اصلی اطرق یا کرواندر بونده ایکی
 جهتله شدوز واردر زیرا کروان اسم جنس ایکن حرف ندا حذف ایدلمش
 و علم اولمدینی حالد ترخیم اولمشدر (اطرق) افعال بابندن اوله رق
 امردر اطراق بویون امکه دینور و (کرا) (کروان) دن مرخدر که
 اصلی یا کرواندر کروان نروان وزنده برجنس قوش در که ترکیده (طوی
 قوشی) دینلور و (نعامه) دوه قوشنه دینور و (بغاث) بانك حرکات
 ثلاثیه صیده غیر مقتدر اوفق قوشلره دینور (ما استسرا) ترکیبده (ما)
 کلمه سی نافیه در لکن معنا استفهامی اوله رق اثبات اوزرینه در (استسرا)

استنساردن فعل ماضی در وایکنجی (ما استنسرا) جمله سی اولکنی تأکید در
و فعلک آخرنده اولان الف اشباعیه در وزن ایچون کتورلمشدر و بعض
نسخه ده (ما) ی نافیه اولیه رق استنسرا استنسرا واقعدر که حرجدن
سالمدر (استنسار) نسر یعنی کرکس کی قوی وزور مند اولق معناسنه در
(مفادیت) ای کروان قوشی بیونکی اک (ای کروان قوشی بیونکی اک)
تحقیق دوه قوشلری بزم قریه لریمزده در (یعنی انلر سزدن بیوک ایکن بزه
تسلیم اولمشلر و امین لردر) و سزدن اوفق قوشلریکیز بزم ارضمزمده
کرکس کی قوی اولمدیی (کرکس کی قوی اولمدیی) یعنی اوت اولدی
و کیمسه آنلره ضرزایلمز پس سزدخی امین اولوب بزه تسلیم اولیکیز
و قریه مزه کلیکیز دیمکدر مرویدر که عربلر اشبو شعری سویلدکلرنده طیر
مذکور باشنی اکوب و آنلر آنی سهولتله ضید ایدرلر ایمش لکن بز بونی
کروانی اغفال و صید ایچون اوقیدیغمزمده بزه شو جوابی ویردی .

یاصی یاصی لاتغفل تصادبه یان هینقه هذا یصادبه
یعنی (یاصیاد یاصیاد) (صقین اغفال اولمه) (آنحق بونکله سن اولنورسک)
(یا این هینقه بونکله صید اولنور) دینه رک یعنی بونکله احق اولان
صیادی یالدارلر دیمکدر اصح اولان شعر مزبور بر مثل مخترعدر که اکثر
برادمی یومشاق و خوش سوزلر ایله برطاق منفعتلر کوستروب اغفال و بر
غالبیه دوشرمک استئلدیکی صرده ضرب اولنور .

و خفی اولیه که حرف ندانک حذفی واقع اولدیی کی بعض قیام قرینه غندنده
(منادا) دخی حذف اولنور بعض قرائته کوره (الا یا اسجدوا) قول
شریفنده اولدیی کی که الا حرف تنبیه و یا حرف ندا اوله حرف ندانک
فعل اوزره داخل اولیه جعی قرینه سیله بر منادا محذوف ایدو کی بیلنمشدر که
یا قوم اسجدوا تقدیرنده در .

واما دیگر قرائته کوره که (الا یسجدوا) اوقنور اشبو قرائته الا حرف
تنبیه اولیوب بلکه ان ناصبه و (لا) ء نافیه دن مرکب اولوب نونک لامة
قرب مخرجی اولمغله لامة قلب و ادغام اولنمشدر تشدید ایله مقرودر و یسجدوا
فعل مضارع جمع مذکر غائب اولوب نون جمع علامه للنصب ساقط اولمشدر

بوقرائته كوره كلامده هرگز منادا اولمامغله كندنده منادا محذوف اولان
قييلندن اولمز .

درس ۶۶

(الموضع الثالث ، ما اضمر عامله على شريطة التفسير) مفعول بهك عالمي
وجوبا حذف اولنان موضعلك او چنجيسى مابعدنده تفسير اولنمق شرطيله
عالمي حذف و تقدير اولنان مفعول به دركه وهو كل اسم بعده فعل او شبهه
مشتغل عنه بضميره او متعلقه لوسائط عليه هو او مناسبه لنصبه دينمكله تعريف
اولنور يعنى عالمي على شريطة التفسير حذف و تقدير اولنان مفعول به
هر بر اسمدر كه كندند نصكره بر فعل و يا خود شبه فعل ذكر اولنوب اشبو
فعل و يا خود شبه فعل اسم مزبوره راجع بر ضميرده و يا خود اسم مزبورلك
متعلقنده عمل ايتمكله مشتغل اولوب اسم مزبوره عمل ايتدن اعراض
ايلمش اولمليدركه اكر فعل و يا شبهه فعل و يا مرادفلى و يا مغالرينه
مناسب و لازم ديكر بر فعل و يا شبهه فعل ديكر بر شى ده عمل ايله مشتغل
قينميه رق اسم مزبورلك اوزرينه تسليط اولنسه اسم مزبورى مفعوليت
اوزره منصوب قيلمليدركه بوده درت نوع اوزره متصور بولنمشدر .

(اولكيسى) فعل و يا شبهه فعل اسم مزبوره راجع ضميرده عمل ايله مشتغل
اوله رق اسم مزبوره عملدن معرض اولملى و بر حالده بولنمليدركه اكر بعينه
فعل و يا شبهه فعل ديكرده عمل ايله مشتغل قينميه رق اسم مزبور اوزره
تسليط اولنسه آنى منصوب قيلمليدركه (زيدا ضربته) و (زيدا انت ضاربه)
قوللر مزده اولديغى كې كه اولمك كنده ضربت ايكنجى ده ضارب ضميرده
عمل ايله مشتغل قينميه رق اسم مزبوره (زيدا) اوزرينه تسليط اولنهرق ضربت زيدا
وانت ضارب زيدا دينسه زيدى مفعوليت اوزره منصوب قيلرلر پس
(زيدا ضربته) قوللر زيدا مقدر بر ضربت نك مفعول بهيدر كه مابعدنده
ضربت آنى مفسردر و (زيدا انت ضاربه) قوللر زيدا (زيدا) انت ضارب
زيدا تقديرنده اولوب مقدر بر ضاربك مفعول بهيدر كه مذكور اولان
آنك مفسريدر .

(ایکنجیسی) فعل و یا شبه فعل اسم مز بوره راجع ضمیرده عمل ایله
 مشغول اوله رق اسم مز بورده عملدن معرض اولمی و بر حالده بولمیلدر که
 اگر فعل و یا شبه فعلک مراد فی اسم مز بور اوزره تسلیط اولنسه آنی منصوب
 قیلمیلدر (زیداً مررت به) و (زیداً انا ماربیه) کبی مررت و مارهر نقدر
 فعل لازم اولمغله زید اوزرینه تسلیط اولنسه آنی منصوب قیله مز لر ایسه ده
 لکن (با) ایله متعدی اولدقلمزده (مررت به) جاوزت و (ماربیه) مجاوز
 معناسنه مراد فی اولور که بونلر تسلیط اولنهرق (جاوزت زیداً) و (انا
 مجاوز زیداً) دینسه زیدی منصوب قیلرلر پس (زیداً مررت به) قولمزده
 (زیداً) مقدر بر جاوزت نک مفعول بهیدر که (مررت به) آنی مفسردر
 و (زیداً انا ماربیه) قولمزده (زیداً) (انا مجاوز زیداً) تقدیرنده اولوب
 مقدر (مجاوز) نک مفعول بهیدر که (ماربیه) آنی مفسردر .

(اوچنجیسی) فعل و یا شبه فعل اسم مز بوره راجع ضمیرده عمل ایله
 مشغول اوله رق اسم مز بورده عملدن معرض اولمی فقط فعل و یا شبه
 فعلک انحق لازم و مناسبی تسلیط اولنهیلوب تسلیط اولندقدده اسم مز بوری
 منصوب قیلمیلدر (زیداً حبست علیه) قولمزده اولدینی کبی (حبست)
 ماضی مجهول اولمغله زید اوزره تسلیط اولنسه انی منصوب قیله مز ایسه ده
 لکن برنسنه برشی اوزره حبس اولندقدده اولنسنه نک محبوس علیه ملابس
 اولمی لازم و ضروری اولمغله شو صورتده لازم معناسی اولان (لایست)
 زید اوزره تسلیط اولنسه آنی منصوب قیلر پس زیداً حبست علیه قولمزده
 (زیداً) مقدر بر (لایست) نک مفعول بهیدر که (حبست علیه) آنی
 مفسردر و بونده اسم مز بوردن صکره شبه فعل اولدیغنه مثال (زیداً انا
 محبوس علیه) کبی .

(دردنجیسی) فعل و یا شبه فعل اسم مز بورك متعلقنده عمل ایله مشغول
 اوله رق اسم مز بورده عملدن معرض اولمی وانحق لازم معنا تسلیط
 اولنهیلوب تسلیط اولندقدده اسم مز بوری منصوب قیلمیلدر اسم مز بورك
 متعلقندن مراد بالفعل و یا بالواسطه اسم مز بوره راجع بر ضمیری مشتمل
 اولان کلمه در (زیداً ضربت غلامه) و (زیداً انت ضارب غلامه) کبی

بونلرده آكر ضربت ويا ضارب (زيد) اوزره تسليط اولنسه هر نقدر منصوب
 قيلر ايسهده فقط (زيد) مضروب اوليوب مضروب اولان غلام اولمغله
 معنا فاسد اولور ايدى حاليوكه زيدك غلامنى ضرب ايلمك زيده اهاتى
 مستلزم اولمغله پس لازم معنا اولان آهنت ويا موهن تسليط اولنور
 شو صورتده زيدا ضربت غلامه قولزده (زيداً) برمقدر آهنت نك
 مفعول بهيدر كه ضربت غلامه آنى مفسردر و (زيدا انت ضارب غلامه)
 قولزده (زيداً) (انت موهن زيدا) تقديرنده اولوب برمقدر (موهن)
 كله سنك مفعول بهيدر كه ضارب غلامه آنى مفسردر .

خفى اوليه كه مثلاً زيدا ضربت غلامه قولزده غلام زيدك متعلقيدر كه
 زيددن عبارت اولان ضميره تعالى ايتش واکامنسوب بولمشددر اشبو
 تعالى وخواه كشيده ايله متصوردر كه اسم مزبوره راجع اولان ضميرى
 (كاه) فعل ويا شبه فعاك مفعولى مشتمل اولور زيدا ضربت غلامه
 قولزده اولدينى كى و (كاه) مفعول اوزره عطف اولنان اسم مشتمل
 اولور (زيداً ضربت عمرواً واخاه) كى معطوف معطوف عليه حكمنده
 اولمغله ضربت بواسطه العطف معطوفده عمل ايله مشغلددر وكاه مفعولك
 صفى مشتمل اولور (زيداً ضربت رجلاً اهانه) كى صفت موصوفك
 غيرى اولمغله ضميرى موصوف مشتمل اولمش حكمنده در وكاه اسم
 مزبوره راجع ضميرى (مفعول) اسم موصول واقع اونه رق صله سى
 مشتمل اولور زيدا ضربت الذى اهانه كى موصولك كلامدن جزء تام
 اولمى صله سيله اولمغله وارسته بياندر وكاه مفعول اوزره عطف اولنان
 كله نك صفى مشتمل اولور (زيدا لقيت عمرواً ورجلاً يضربه) كى
 وكاه معطوف اوزره عطف اولنان كله اسم موصول اولوب صله سى
 مشتمل اولور زيدا لقيت عمرواً والذى يضربه كى وقس على هذا

درس ۷۱

خفى اوليه كه تعريف مذكوره اولان قيود ايله اشبو بادن اوليانلرك
 جمله سى خارجدر (اسم مزبورك ضمير ويا متعلقنده عمل ايله مشغلددر

اولمی (قیدیه) (زیداً ضرب) کیلر خار جدر زیرا ضربنک بویه بر
اشتغالی اولمغله زیدی ناصب ضرب اولوب اضمار علی شریطة التفسیر
بابندن دکلدیر .

و مجرد شواشتغال ایله اسم مز بورده عملدن معرض اولمی قیدیه زید کلمه سی
مبتدا اوله رق (زید ضربته) کیلرده خروج ایدر زیرا (ضربته) هر نقدر
ضمیرده عمل ایله (زید) ده عملدن اعراض ایتکده ایسه ده فقط (ضربت)
نک (زید) ده ناصب اولسنه مجرد اشتغال مانع اولوب (زیدک) ک عامل
معنوی ایله مرفوع قلنمی دخی زید ایچون بر ناصب تقدیرینه مانعدر .
و (فعل و یا شبه فعل و یا بونلرک مرادف و یا مناسبلری اسم مز بور اوزره
تسلیط) اولنه بیلمی قیدیه اسم مز بور ایله فعل و یا شبه فعل بیننه واجب
التصدر برکله توسط ایتکدن احتراز اولندی زیرا شواصورتده اول کلمه نک
مابعدنده اولان ماقبلنه عامل و مسلط قبلنه مز پس ماقبلنده اولان اسم
ابتدائیت اوزره مرفوع قلنور (زیدانی ضربته) و (عمرو لیتک تضربه)
و (زیدکم ضربته) و (زیداضربه) و (زیدان ضربته یضربک) و (زید
هلاضربه) و (زیدالاتضربه) و (هندالارجل یضربها) و (زیدلعمر و
ویضربه) کی و واجب التصدر کلمه ینه بولندی جملنه نک صدرنده اولمغله
بر اسم منصکره کلمی محل صدارت دکلدیر واجب التصدر اولان کلمه ان
واخواتی و کم استفهامیه و حرف استفهام و حروف نفی دن ماوان و حروف
شرط و حروف تحضیض و الالعرض و الا لاتمنی و لام ابتدائی مثالی
کفایت مقداری ثبت اولندی و هر نقدر حروف مشبهه بالفعلدن ان مفتوحه
واجب التصدر دکل ایسه ده حرف مصدر اولمغله مابعدی ماقبلنده کذا عامل
اوله مدیغندن تسلیط ممکن اولمز .

و کذا قید مز بور ایله مابعدنده فعل تعجب و یا افعیل تفضیل بولن
اسمدن احتراز واردر زیرا فعل تعجبک و فعل تفضیلک معمولی اوزر لرینه
تقدیم اولنه رق تصرف اولنه مز (زید ما احسنه) و (زید احسن به) و زید
انت اکرم علیه ام عمرو کی (زید) ابتدائیت اوزره مرفوعدر .
و (کذا بعدالاسم) فعل و یا شبه فعل برکله نک مضاف الیهی واقع اولمقدن

احتراز واردر زیرا مضاف الیه مضافک ماقبلنده عامل اوله من زید حین
تضربه میوت کبی (زید) ینہ ابتدائیت اوزره مرفوعدر .
و (کذا بعد الاسم) (اسم فعل) واقع اولمقدن احتراز واردر زیرا اسم فعل
ماقبلنده عامل اوله من (زید هاته) کبی (زید) کذا ابتدائیت اوزره
مرفوعدر .

و کذا صله وصفات واقع اولمقدن احتراز واردر زیرا صله وصف
موصول و موصوفده عامل اوله من (ایهم اضربه) کبی که (ای) اسم موصول
اوله و رجل لقیته کریم کبی و کذا صله موصولک وصف موصوفک ماقبلنده
عامل اوله من که ظاهر در (زید من يضربه خیر) و (زید رجل يضربه
موفق) کبی .

و (کذا جواب قسم) واقع اولمقدن احتراز واردر زیرا جواب قسم ماقبل
قسمده عامل اوله من زید والله لا اضربه کبی .
و کذا (الا) دنسکره (واقع اولمقدن احتراز واردر زیرا (الا) مابعدنده
اولان ماقبلنده عامل اوله من مارجل الاعطیته کبی و عليك التفحص والاعتبار
شو ذکر اولنا نلک جمله سنده اسم منبور ابتدائیت اوزره مرفوعدر .

درس ۷۲

اشبو بیانلریز لایقیله اذعان اولندی ایسه خفی اولیه که اضمار علی شریطه
التفسیر بایندن اولسی ظن اولسان اسم بش احتمالدن خالی دکلدر که یا اسم
منبورده رفع واجب و یا مختار اولور و یا نصب واجب و یا مختار اولور و یا رفع
و نصب جائز اولوب برینی آخر اوزره اختیار و ترجیحده بوجه رجحانیت
اولمز بلکه متکلم هر ققیسنی دیلر ایسه اختیار ایده بیلور و رفع تقدیرنده
اسم ابتدائیت اوزره مرفوع اولوب هر حالده اضمار علی شریطه التفسیر
بایندن اولماش اولور و اما نصب تقدیرنده اضمار علی شریطه التفسیر بایندن
اولور .

(اما رفع واجب اولمق) تسلیط ممکن و موافق مصلحت اولیوب درس
سابقده اضمار علی شریطه التفسیر بایندن اخراج ایدیلان محملرده در که مانحن

فهمزدن اوله من و دخی بعض نصب تقدیرنده معنای مقصود فوت اولمغه
کذا رفع لازم اولور .

(کل شیء فعلوه فی الزبر) آیت کریمه سنده اولدینی کی که (کل شیء) اگر
منصوب قیلنسه اضمار علی شریطة التفسیر بایندن اولوب فعلوا کل شیء
فی الزبر تقدیرنده اولور که شو تقدیرده ا کر (فی الزبر) (فعلوا) یه متعلق
اولسه معنا فاسد اولور زیرا (زبر) یعنی صحائف اعمال افعال عبادک محل
وقوعی اولمق لازم کلور حالبوکه افعال عباد صحائف اعمالده ایشلمش اولیوب
بلکه کرام الکاتین ملائکه لری عبادک افعالی آنده کتب ایدر لر و ا کر
(فی الزبر) شیئه صفت قیلنسه زبرده کائن هر برشی عبادک مفعولی اولسنی
افاده ایدر - بوا یسهینه خلاف ظاهر در بلکه مقصود اولان عبادک کرک خیر
و کرک شر هر ایشلدک لری (زبر) ده کائن وثابت اولسیدر نته کیم دیگر
آیت کریمه ده (وکل صغیر وکیر مستطر) واقع اولمشدر پس (کل شیء) ده
رفع لازم اولوب ابتدائیت اوزره مرفوع و (فعلوه) شیئک صفی و
(فی الزبر) ظرف مستقر اولوب مبتدایک خبریدر (امارفع مختار اولمق)
ایکی موضعه در (موضع اول) نصبی ترجیح ایلر برقرینه اولسه رفع
صورتنده کلام حذفدن سالم اولمغه رفع اختیار اولنور (زید ضربته) کی
(موضع ثانی) رفع و نصبی مرجح قرینه لر بولنور لکن رفعی مرجح قرینه
اقوی اولور ایسه کذا رفع اختیار اولنور مثلاً اسم مزبور (اما) کلمه سندن
صکره واقع اولوب و ما بعدنده فعل مشتغل عنه امر ونهی ودعا کی طلبی
اولیوب بلکه اخباری اولسه مثلاً (لقیتم الیوم واما زیدفا کرمته) کی ماقبلنده
جمله فعلیه اوزره عطف اولمق قرینه نصب در و (اما) کلمه سی قرینه رفع در
لکن جمله اسمیه نک فعلیه اوزره عطف اولنسی کثیر الوقوع اولوب
اماد نصکره ایسه غالباً آنحق مبتدا واقع اولور و مع هذا رفع تقدیرنده کلام
حذفدن سالم بولمغه پس قرینه رفع اقوی و رفع مختار اولور و مثلاً
(اذا) ی مفاجاة و نصکره واقع اولسه (خرجت فاذا زید یضربه) کی
(اذا) ی مفاجاة غالباً جمله اسمیه به داخل اولمغه رفعی مرجح اقوای
قراشدن بولندیغندن کذا رفع مختار اولور .

واما نصب مختار اولوق اون موضعدهدر .

(اولکیسی) اسم مزبورك بولندیفی جمله ماقبلنده بر جمله فعلیه اوزره عطف اولنسه نصب مختار اولور اشبو عطفده مثلاً معطوف و معطوف علیه جمله فعلیه اولوق کبی ینلرنده بر مناسبت وجهت جامعهیه مبنی اولور (خرجت فزیداً لقیته) کبی .

(ایکنجیسی) اسم مزبور حرف نفیدن یعنی ما و لا و ان کلهلرندنصکره واقع اولسه هر تقدیر کاه اسم اوزره داخل اولور لر ایسهده فقط اکثر (فعل) نفی اولنه جغندن فعل اوزره دخولاری کثیر وغالب اولغله اسم مزبورده نصب مختار اولور (مازیداً ضربته) و (لازیداً ضربته ولا عمرواً) و (ان زیداً ضربته الا تأدیاً) کبی واما حروف نفی دن لم ولما ولن انجق فعل مضارع اوزره داخل اولوب وضعیف العمل ایدوکلرندن معموللرینی هرکز حذف و تقدیر جائز اولماغله شو جمله دن خارجلردر .

(اوچنجیسی) حرف استفهامدنصکره واقع اولسه کذا نصب مختار اولور . (ازیداً ضربته) و (هل زیداً ضربته) کبی واما (ازید ذهب به) کیلر هر تقدیر بادئ نظرده اضمار علی شریطة التفسیر بایندن کوریلور وه اسم همة استفهام دنصکره واقع اولغله نصب مختارضن اولنور ایسهده لکن تعمیق ذهن ایدلر کده هرکز اشبو بایدن دکلر زیراً (ذهب به) مجهول صیغه سیله در و مناسبی مجهول صیغه سیله (اذهب) درنه کندی ونه مناسبی زید اوزره تسلیط اولنسه منصوب قیله مز پس (زید) ده رفع واجب اولوب ابتدائیت اوزره مرفوعدر و (ذهب به) جمله سی خبریدر .

(دردنجیسی) (اذا) ی شرطیه دنصکره واقع اولسه که (مجازاة فی الزمان) دالدر دالدر کذا نصب مختار اولور اذا عبدالله تلقاه فا کرمه کبی .

(بشنجیسی) حیث دنصکره واقع اولسه که (مجازاة فی المكان) دالدر کذا نصب مختار اولور حیث زیداً تجدد، فا کرمه کبی .

(التنجیسی) اسم مزبور دنصکره ضمیر و یا متعلقنده عمل ایله مشغول امر

و یا نهی اولسه کذا نصب مختار اولور (زیداً اضر به) و (زیداً لاتضر به) کبی .
 شو موضع لرده نصب مختار اولسی زیرا شو موضع لرده وقوع فعل کثیر در .
 خفی اولیه که اشبو موضع سادسه نظراً (الزانیة والزانی فاجلدو کل واحد
 منهما) آیت کریمه سنده (الزانیة) و (الزانی) ده نصب مختار اولق ض
 اولور . حالبو که جمیع قرارفع اوزره اتفاق ایلمش لر در نصب ایله قر آئت
 آنحق روایت شاده ده واقعدر . شواشکالی حل وتوجیه ده (مبرد)
 (الزانیة) و (الزانی) ده اولان الف لام موصوله اولوب فی الحقیقه
 مبتدادر ومعنای شرطی متضمن در وصله سی اولان (زانیه) و (زانی)
 شرط کیدر پس خبر جزا مثابه سنده اولمغله (فاجلدوا) ده اولان فامعنای
 شرطه مرتبط در که مضمون جزایه سببیتنه دالر بوکی فانک حیزنده
 بولنان ایسه ماقبلنده عامل اوله میه جفندن تسلیط ممتنع اولوب اشبو کلام
 اضمار علی شریطة التفسیر بایندن دکدر پس (الزانیة) ابتدائیت ایله
 مرفوع و (الزانی) الزانیة اوزره معطوف در و (فا) جوابیه و (اجدوا)
 جمله سی مبتدانک خبریدر دیدی و (سیبویه) آیت کریمه ایکی جمله در که
 (الزانیة) مضاف تقدیر یله مبتدادر و (الزانی) الزانیة اوزره معطوف در
 و خبر محذوف در تقدیر کلام حکم الزانیة و الزانی فیما تلی علیکم در و (فاجلدوا)
 جمله سی بر شرط مقدرك جوابیدر که (ان ثبت زناها فاجلدوا) تقدیرنده در
 آیت کریمه ایکی جمله اولدقده بر جمله نك جزئی جمله آخرک جزئنده شامل
 اوله میه جفندن تسلیط ممتنع اولوب آیت کریمه کذا اضمار علی شریطة التفسیر
 بایندن اوله مز دیدی .

(یدنجیسی) اسم مز بور امانصکره واقع اولوب وما بعدنده فعل مشتغل
 عنه طلبی اولسه کذا نصب مختار اولور اما زیداً فاضر به واما زیداً فلا تقتله
 کبی زیرا شو تقدیرده اسم مز بور مرفوع قیلنسه طلبک خبر واقع اولسنی
 اقتضا ایدر ومثلاً اما زیداً فمقول فی حقه اضر به واما زیداً فمقول فی حقه
 لا تقتله تقدیرنده قیامق کبی بعید تاویل لره صایمق لازم کلور

(سکنزنجیسی) رفع تقدیرنده فعل مشتغل عنه صفته ملتبس اوله رق خلاف
 مقصودی ایهام ایدوب نصب تقدیرنده ایسه التباس وایهام اولسه

نصب مختار اولور (اناکل شیء خلقناه بقدر) آیت کریمده اولدینی کبی
 (کل شیء) منصوب اولوب مقدر برفعک مفعول بهیدرکه (خلقناه) آنی
 مفسردر و (بقدر) ظرف مستقر اولوب (خلقناه) ده اولان (ضمیر) دن
 ویا (کل شیء) دن حالدیر واکر کل شیء ابتدائیت اوزره مرفوع قیلنوب
 و (خلقناه) جمله سی خبر قیلنسه صورت نصیده اولان معنای مقصوده
 موافق اولور ایسه ده فقط (خلقناه) (کل شیء) ک صفتی اوله رق (بقدر)
 مبتدآنک خبری اولمغه دخی احتمالی اولورکه معتزله نک رایی اولوب خلاف
 مقصود مزی ارئه ایدر پس کل شیء منصوب قیلنمق مختار اولورکه قراءه
 سبعه ده نصب اوزره وارد اولمشدر .

(طقوزنجیسی) اسم مزبور مشتمل اولان کلام بر جمله فعلیه اسفهامیه جوابنده
 واقع اولسه مثلاً (رأیت احداً) سویلیان کیمسه نک جوابنده (زید آرایته)
 دنیلدکده اولدینی کبی که جواب وسؤال ایکیسی دخی جمله فعلیه اوله رق
 بری برینه موافق اولسون ایچون اسم مزبورده نصب مختار اولور .
 (اونجیسی) اسم مزبور معناده فاعل اولان براسمدن صکره کلسه امام
 کساتی عنندنده کذا نصب مختار اولور زید هنداً یضربها کبی (زید) هر نقدر
 لفظاً مبتدا ایسه ده (هنداً) منصوب قیلنمق اولادر زیرا کانه (یضرب زید
 هنداً) دینمش کییدر .

درس ۷۴

(اما نصب واجب اولمق ایکی موضعه در .

(اولکیسی) اسم مزبور اکر حرف شرطدن (ان) ویا خود (لو) دن
 صکره واقع اولور ایسه در ان زیداً ضربته ضربک ولوعمر واً اکر مه یکر مک
 کبی ودخی حرف شرط معناسنی متضمن اولان کله لردن صکره واقع اولسه
 نصب واجب اولور متی زیداً تجده فا کر مه واین زیداً تجده فا کر مه و حیثما
 زیداً تلقاه فا کر مه کبی .

(ایکنجیسی) اسم مزبور حرف تخصیصدن صکره واقع اولسه کذا نصب
 واجب اولور حروف تخصیض هلاوالا ولولا ولومادر .

هلا زیداً ضربته والا عمرواً اکرمته ولولا بکراً اخرجه ولوما خالداً اجلسه
کبی شو حرفلر دینکر واقع اسم مز بورده نصب واجب اولمسی زیراشو حرفلر
لفظاً ویا تقدیراً هر حالده فعل اوزره داخل اولورلر .

(اما رفع و نصب جائز اولمق) یعنی رفع و نصب قرینه لری بری برینه مساوی
اولوب احدهما نك آخر اوزره بروجه ترجیحی اولمیه رق متکلم بلا تفاوت
هر قغیسنی دیلر ایسه اختیار ایده یلمک اسم مز بوری مشتمل اولان جمله
بر جمله اسمیه اوزره عطف اولنوب واول جمله اسمیه ده خبر جمله فعلیه
اولدقده در (زید قام و عمرواً اکرمته عنده) کبی (زید) مبتدادر و (قام)
فعل ماضیدر فاعلی تحتنده مستتر در که زیده راجع (هو) در اشبو جمله
فعلیه صغری محلاً مرفوع مبتدایک خبریدر . مبتدایک خبره جمله اسمیه
کبری در . لا محل لها من الاعراب (واو) عاطفه در (عمرواً) لفظاً
منصوب مقدر بر (اکرمت) نك مفعول بهیدر که (اکرمته) جمله سی آتی
مفسردر جمله فعلیه محلاً مرفوع جمله فعلیه صغری یعنی قام اوزره
معطوفدر و (عند) اکرمت نك مفعول فییدر که زیده راجع ضمیره
مضاف اولمشدر .

ویا خود عمرو لفظاً مرفوع مبتدادر و اکرمته جمله سی خبریدر جمله اسمیه
لا محل لها من الاعراب جمله اسمیه کبری اوزره که (زید قام) جمله سیدر
معطوفدر و عند کذا اکرمت نك مفعول فییدر که عمره راجع ضمیره مضافدر .
(شو ترکیب) ملاحظه اولندقده صوره رفعه جمله اسمیه اولوب جمله
کبری اوزره عطف اولنور که اودخی اسمیه در و صورت نصیده جمله فعلیه
اولوب جمله صغری اوزره عطف اولنور که اودخی فعلیه در . پس کرك رفع
و کرك نصب صورتنده مناسبت حاصل اولوب برینک آخر اوزره رجحانیتی
اولماغله رفع و نصبدن هر برینی اختیار ایتک جائز اولور واکر صورت
رفعه حذفدن سلامت رجحانیتی واردر دینور ایسه جمله صغری قریب
اولماغله قریب اوزره عطفک اولی اولمسیده نصبی مرجحدر دیرز واکر
آراده بر فاصله اولمدینی جهتله جمله کبری دخی قریبدر دینور ایسه
جمله کبری نك قریبی باعتبار المنتهی در . واما باعتبار المبتدا جمله صغری

اقرّب در دیرز شو تقدیرده احدھانك آخردن زائذ اوله رق رحجانیتی
اولمدینی امر باهر و تساوی امرین ظاهر اولور .

درس ۷۵

(الموضع الرابع التحذیر) مفعول بهك عاملی وجوبا حذف اولنان موضعلردن
دردنجیسی تحذیر بابیدر تحذیر برکیسهی برشیدن صقندر مق و قچندر مق
درکه اصطلاح نحاتده ایکی قسم اوزرده در (قسم اول) هر بر محذردکه (بعد)
ویا (نح) ویا (حذر) کبی بر فعل امرك مفعول بهی اولوب وما بعدنده
حرف عطف ویا من جارة ظاهره ویا مقدره ایله محذر منه ذکر اولنور
شو مفعولك عاملی وجوباً محذوفدر (ایك والاسد) و (ایك وان تحذف)
و (ایك من ان تحذف) و (ایك ان تحذف) کبی شو مثاللرده (ایا) ضمیر
منصوب منفصل اولوب محلاً منصوب مقدر (بعد) فعل امرینك مفعول
بهیدر وكاف مفعولك تذکیر و افراد و خطابنه دال حرف در (مثال اولده)
(واو) عاطفه در (الاسد) لفظاً منصوب (ایك) نك محله معطوفدر
و (مثال ثانیده) واو کذا عاطفه در و (ان تحذف) جمله سی تأویل مفرد
وحکم مصدرده اوله رق محلاً منصوب ایك نك محله معطوفدر و (مثال
ثالث) ده من حرف جر در (بعد) فعل امرینه متعلقدر و (ان تحذف)
جمله سی تأویل مفرد و حکم مصدرده اوله رق محل قری من ایله محلاً مجرور
و محل بعیدی محلاً منصوب (بعد) فعل امرینك مفعول به غیر صریحیدر .
و (مثال رابع) ده (ان تحذف) جمله سی تأویل مفرد و حکم مصدرده
محل قری محلاً مجروردر من مقدره ایله و محل بعیدی محلاً منصوب (بعد)
فعل امرینك مفعول به غیر صریحیدر (مثال اولك مفادی) نفسکی واسدی
بعید ایت که یعنی نفسکی آندن اوزاق ایله و حذرایت دیمکدر .

(مثال ثانینك مفادی) نفسکی و فعل خذنی بعید ایت که یعنی خذف
ارنبدن حذر ایله دیمکدر خذف طوشانی عصا ایله ضرب و صید ایتمکدر که
نهی اولنشد و بعضیلر ایکی پارمق آراسنه قیصدیر یله رق رمی اولنان طاش
ایله که اکا فسکه طاشی دیر لر اویلاجه آتوب طوشانی صید ایتمکدر دیدیلر که

بونك دخى حقنه نهى واردر (مثال ثالث و رابع مفادى) نفسكى حذف
ارنب دن بعید ايله ديمكدر (قسم ثانى) هر بر محذر منه دركه مكرر واقع
اولوب (بعد) ويا (اتق) كې بر فعل امر ك مفعول بهيدر شو مفعولك
دخى عاملى و جواباً محذوف در .

(الطريق الطريق) و (نفسك نفسك) كې اولده (الطريق) لفظاً منصوب
مقدر (اتق) فعل امر ينك مفعول بهيدر و ايكنجى (الطريق) اولكى ايچون
تأكيد لفظى در طريقدن طريقدن حذر و اتقا ايله ديمكدر كه يولده حيدود ويا
جانور لر چوق اوله رق آندن تحذير و وقايه ايلمكدر و (مثال ثانى) ده
نفسك مقدر (بعد) فعل امر ينك مفعول بهيدر ايكنجى نفسك كذا
تأكيد در نفسكى نفسكى بعید ايله ديمكدر كه تهلكه دن تحذير و وقايه در . اشبو
باب تحذير ده عاملك حذف اولمى وقت طار اولديغنددر زيرا عاملى
ذكر ايدنجيه دكن تهلكه ده واقع اولمى محتملدر پس سرعتله تحذير ايچون
عامل محذوف در .

درس ۷۶

(الموضع الخامس الاغراء) مفعول بهك عاملى و جواباً حذف اولنان
موضعلردن بشنجيسى اغرا بابى در (اغرا) بر كيمسه يى بر شئيئه ترغيب
و تشويق ايلمكدر اصطلاح نحسات ده كذا ايكي قسم اوزره در (قسم اول)
تشويق ايديلان شخص اوزره كندينه تشويق اولنان شى معطوف اوله رق
واقع اولور (نفسك والعلم) كې (نفسك) و جواباً مقدر و محذوف (الزم)
فعل امر ينك مفعول به غير صريحيدر كاف خطابه مضاف اولمشدر و (العلم)
(نفسك) اوزره معطوف اولمشدر مفادى نفسكه و علمه لازم اول يعنى
نفسكى علمه ملازم قيل و اكا مداوم و طالب اول ديمكدر (قسم ثانى)
كندينه تشويق اولنان مكرر اوله رق واقع اولور . شاعرك

اخاك اخاك ان من لا اخاله كساع الى الهيجاء بغير سلاح

شعرنده اخاك اخاك كې اولكى (اخاك) كذا مقدر (الزم) فعل امر ينك

مفعول به غیر صریحیدر کاف خطابه مضاف اولشدر وایکنجی (اڤاك)
 تأکید لفظی در (مفادیت) برادرکه لازم یعنی صاحب وراغب اول زیرا
 برادری اولیان کیمسه بلا سلاح محاربه به سعی ایلان کیمسه کیدر دیمکدر
 اشیو باب اغراده دخی عاملک وجوباً حذف اولنسی وقت طار اولوب
 تشویق واغراده تعجیل مقصود اولدیغیچوندر وخی اولمیه که باب مدح و ذم
 و باب ترحم ده دخی عامل وجوباً محذوفدر مثلاً بسملة شریفه ده الرحمن
 والرحیم لاجل المدح منصوب اوقنسه لر وجوباً محذوف و مقدر براغنی به
 مفعول به واقع اولور لر و اگر تعوذده الرحیم لاجل الذم منصوب اوقنسه
 کذا وجوباً مقدر براغنی به مفعول به واقع اولور و مثلاً ترحم وشفقت
 معرضنده اڤاك دینسه اڤاك مقدر بر (الزم) فعل امرینک مفعول بهیدر که
 برادرکه لازم اول یعنی اکا شفقت و مرحمت قیل دیمکدر و یاخود ارحم اڤاك
 تقدیرنده قیلرز وعلیک الاعتبار .

درس ۷۷

(المفعول فيه) منصوباتک اوچنجیسی مفعول فيه در که هو مافعل فيه فعل
 مذکور دینهرک تعریف اولور یعنی مفعول فيه بر زمان و یا مکانک اسمیدر که
 آنده تضمناً و یا مطابقةً مذکور بر حدث ایشلنمش در ضربت يوم الجمعة
 قولزده يوم کبی که ضربت فعلنک مضمونی اولان حدث ضرب آنده
 ایشلنمش در و اعجبنی ضربک زیداً يوم الجمعة قولزده يوم کبی که (ضربک)
 قولزده مدلول ضرب آنده واقع اولشدر اشیو مثاللرده (دال علی الحدث)
 اولان یعنی عامل لفظاً مذکور اولمغله حدث حقیقةً مذکوردر وکاه حکماً
 مذکور اولور که عامل مقدر اولدقددهدر .

وخی اولمیه که مفعول فيه ایکی قسمدر (بر قسمی) حروف جارهدن فی و فی
 معناسنده اولان ایله مجرور اولوب محلاً منصوب اولهرق عاملنه مفعول
 فيه قلنور صلیت فی المسجد و صلیت بالمسجد کبی . و (بر قسمی) کننددن
 فی قیاساً حذف اولهرق منصوب اولور که اوچ محلهدر .
 (اولکیسی) مفعول فيه ظرف زمان مبهم اولسه آنده قیاساً (فی) حذف

اولنوب مفعول فيه منصوب قلنور ظرف زمان مبهم بر مقدار ايله تعيين اولمياندر (زمان) و (حين) کي پس سرت حينا و تحيرت زماناً قوللر مزده (حينا) و (زمانا) لفظاً منصوب مفعول فيه اولوب (في) قياساً محذوفدر ظرف زمان مبهم دن (في) نك قياساً حذف اولنسي زيرا زمان مبهم مفهوم فعلك جزئي اولمغله فعلك زمان مبهمي بلاواسطه جار منصوب قلمسي صحيح اولور نته کيم مفعول مطلق حدث اولوب فعلك بر جزئي ده حدث اولمغله فعل مفعول مطلق بلاواسطه منصوب قلمشدر .

(ايکنجيسي) مفعول فيه ظرف زمان محدود اولسه کذا حرف جر اولان في کله سي قياساً محذوف اولوب مفعول فيه منصوب اولور . ظرف زمان محدود بر مقدار ايله معين اولاندر مثلاً يوم و شهر کي که يوم يکرمي درت ساعت و شهر اوتوز کون اولمغله معين در پس سرت يوما وصمت شهرآ قوللر مزده يوما و شهرآ لفظاً منصوب مفعول فيه اولوب وفي قياساً محذوفدر ظرف زمان مبهم دن (في) نك قياساً حذف اولنسي زمانيتده زمان مبهمه اشتراکندن ايجوندر .

(اوچنجيسي) مفعول فيه ظرف مکان مبهم اولسه کذا (في) قياساً محذوف اولوب و مفعول فيه منصوبدر ظرف مکان مبهم دنيلان (مائتله اسم بسبب امر غير داخل في مسماه) دينهرك تعريف اولنور يعني مسماسنده غير داخل بر شي سبيله کنديچون بر اسم ثابت اولان شيدر ديمکدر (امام وقدام وخلف و يمين و يسار و شمال و فوق و تحت) کي بونلره جهات ست دينلور و دخی (عند) و (لدی) و (وسط) بسکون السنين و بين و ازاء و حذاء و تلقاء کي و دخی مقادير مسوچه که فرسخ و ميل و بریددر بونلر دخی ظرف مکان مبهمده داخلدر شوز کر اولنانلرک تعريف مزبورده داخل اولنسي زيرا مثلاً (جلست امام زيد) ديندکده (زيد) ک موافقه سنده اولان مکانک امام تسميه قلنسي زيدک وجهي مقابلنده اولديغندندر (زيد) ايسه اولمکانک مسماسنده داخل اولمغله اگر بر جانب آخره تحول ايلسه اول مکندن امام اسمي زائل اولور و مثلاً جلست عندک ديندکده مخاطبک حولنده و حايه سنده اولان مکانه (عند) تسميه اولنسي مخاطبک حولنده

و یا حایه‌سندۀ اولدیغنددر مخاطب ایسه اول مکانک مسمی‌سندۀ داخل اولامغله اگر مخاطب اول مکاندن کیتسه مکان مزبوردن عند اسمی زائل اولور و مثلاً (فرسخ) که اون ایکی بیک خطوه مقداری مسافیه دینور و (میل) که درت بیک خطوه مسافیه و برید که اون ایکی میله دینور خطوه ایسه اشبو مسافه‌لرک مسافسندۀ داخل دکلدر . انجق بر محله مساحه ایله تقدیر و اعتبار اولنورلر . اشبو ظرف مکان مبهمدن بریسی مفعول فیہ واقع اولسه (فی) قیاساً محذوف اولوب و مفعول فیہ منصوب اولور لکن شو حکمدن جانب و جهت و وجه و خارج الدار و داخل الدار و جوف البیت کله لری سماعاً مستنادرکه مثلاً اکت جانب الدار دینر بلکه اکت فی جانب الدار دینور و دخی استقرار معناسنه اولیان هر اسم مکان مثلاً مقتل و مضرب کبی و هر اسم مکان که مثلاً مقام و مکان کبی استقرار معناسنه اولوب لکن عاملی استقرار معناسنه اولسه بونلر قیاساً مستثنی‌درکه مثلاً اکت مضرب زید و اکت مقامک دینر بلکه اکت فی مضرب زید و اکت فی مقام زید دینور و لکن استقرار معناسنه اولان اسم مکانک عاملی دخی استقرار معناسنه اولسه شو تقدیرده (فی) حذف اولنق جائز اولور قت مقامک و قعدت مکانک کبی ظرف مکان مبهمدن (فی) قیاساً حذف اولنسی صفت ابهامده زمان مبهمه مشارک اولدیغندن ایچونددر .

درس ۷۸

واما مفعول فیہ ظرف مکان محدود اولسه ظرف مکان محدودک نه ذاتا و نه صفة زمان مبهمه مشارکتی اولامغله بوندن (فی) حذف اولنق جائز اولمز ظرف مکان محدود دنیلان (ما ثبت له اسم بسبب امر داخل فی مسماه) دینه‌رک (تعریف اولنور یعنی مسافسندۀ داخل برشی سببیه کنیدیچون بر اسم ثابت اولان شیدر دیمکدر مثلاً (دار) کبی که خانه دیمکدر اکادار دینس اوطه‌لری مشتمل اولدیغنددر اوطه‌لرایسه دارک مسافسندۀ داخلدر و مثلاً (بلده) کبی که مملکت دیمکدر بلده تسمیه‌سندۀ سبب برطاقم خانه‌لری مشتمل اولدیغنددر خانه‌لرایسه بلده، مسافسندۀ داخلدر و قس علی هذا

پس مثلاً (صلیت داراً) دیک جائز اولمز بلکه (صلیت فی الدار) دینور
 لکن دخل و نزل و سکن کلمه لرند نصکره واقع مکان محدوددن استعماللری
 کثیر اولدیغندن و مفعول به شدت مشابهتندن ایچون حذف و ایصال طریق
 اوزره (فی) حذف اولتمق جائزدر دخلت الدار و نزلت الحان و سکنت البلد
 کی نحاتدن بعضیلر شو فاعللر د نصکره اولان ظرف مکان محدودک مفعول فیه
 اولیوب بلکه مفعول به اولسنه ذاهب اولدیله ایسه ده لکن بونلر لازم اولغله
 مفعول بهی منصوب قیله مزله دنیلدی و کنبدیلردن صکره اولان مکان
 محدودده گاه (فی) حرفک ذکر اولنسی و ظرف مکان ایله ظرف زمانک
 غیری واقع اولسه هر حالده (فی) ذکر اولتمق لازم اولسی دخی فعل لازم
 اوللرینی مؤیددر مثلاً دخلت مذهبا دیک جائز دکلدر بلکه دخلت فی مذهب
 دینور و بومثللو زمان و مکان اولیان مفعول فیه مجازدر که مظهر و فک ظرفده
 تمکن ایلمسی کی (فی) نک مدخولنده برتمکن تصور ایلمکله تکمیل و تعمیر
 اولنور و نزل و دخل نک مصدرلری فعول وزننده دخول و نزول اولوب
 فعول وزننده اولان مصدر ایسه غالباً مصادر لازمه دن واقع اولسی
 و (سکن) کلمسی (و سکنتم فی مساکن الذین ظلموا انفسهم) آیت کریمه سنده
 فعل لازم اوله رق وارد اولسی دخی فعل لازم اوللرینی مرجعدر (فاضل
 جامی) بعض نحاتک ذهابلرینی یعنی کنبدیلر د نصکره ظرف مکان محدودک
 مفعول به اولسنی اختیار ایلیوب برفعک مفعول فیهی طلب ایلمسی معناسی
 تمام اولدقدن صکره در و مثلاً دخلت الدار قولزده معنای دخول ایسه
 (دار) ذکر اولنقسزین تمام اوله مز پس (الدار) مفعول به اولوب مفعول فیه
 بوندن صکره کلور که مثلاً دخلت الدار فی البلد دینور دیشدر لکن فاضل
 جامی به جواباً مثلاً دخلت قولزده معنای دخول عقلاً (برمدخل ما)
 ایله تمام اولور نته کیم جلست قولزده معنای جلوس عقلاً بر (مجلس ما)
 ایله تمام اولشدر بوقدر ایله ایسه فعل عرفاً متعدی عد اولنمز دنیلمشدر .
 و خفی اولیه که مفعول فیهک عاملی دخی گاه محذوف اولور نته کیم
 (متی سرت) یعنی نه زمان کیتدک سویلایان کیمسه نک جوابنده
 یوم الجمعة دیندکده اولدیغی کی که سرت یوم الجمعة تقدیرنده در و دخی مفعول

به ده اولدینی کبی مفعول فیهک دخی عاملی گاه علی شریطة التفسیر مضمهر قیلنور
یوم الجمعة صمت فیه کبی مفعول به ده اضمار علی شریطة التفسیر باینده جاری
اولان بونده دخی جاری اولور .

درس ۷۹

(المفعول له) منصوباتک دردنجیسی مفعول له درکه هو مافیل لاجله فعل
مذکور دینهرک تعریف اولنور یعنی مفعول له بر شیتک اسمیدرکه آنی
تحصیل ایتک ووجوده کتورمک ایچون ویاخود آنک وجودی سببیه
حقیقه ویا حکماً مذکور بر حدث ایشلمش در ضربت تأدیبا قولمزده تأدیبا
کبی که (حدث ضرب) آنی تحصیل ایچون ایقاع اولمشدر وبونوع مفعول
له (مفعول له تحصیلی) دینور وقعت عن الحرب جیناً قولمزده جیناً
کبی که قعود عن الحرب جین دن نشأت ایشدر وبونوع مفعول له (مفعول
له حصولی) دینور شو مثاللرده (دال علی الحدث) یعنی عامل مذکور
اولمله حدث حقیقه ذکر اولمشدر .

واما حکماً مذکور اولسی عامل مقدر اولدقدده در نته کیم (لم ضربت زیداً)
یعنی زیدی نه ایچون ضرب ایتک سویلیان کیمسه جوابنده تأدیبا دیندکده
اولدینی کبی که (ضربت تأدیبا) تقدیرنده در .

خفی اولیه که مفعول له دخی ایکی قسمدر (قسم اول) حروف جاره دن
لام تعلیل و لام تعلیل معناسنه اولانلر ایله مجرور اولوب محلاً منصوب
مفعول له قیلنور جئتک لاسمن و (کیمه عصیت) قوللرمزده لاسمن
و کیمه کبی .

وحروف جاره دن با و من وفی دخی گاه لام تعلیل معناسنه وارد اولوب
مدخوللری مفعول له قیلنور نته کیم خاشعاً متصدعاً من خشية الله قول
شریفنده من ودخی فبظلم من الذين امنوا قول شریفنده با و (ان امرأة
دخلت النار فی هرة) حدیث شریفنده (فی) لام تعلیل معناسنه اولوب
مدخوللری مفعول له در لکن فی وفی معناسنده اولانلرک مدخولی مفعول
فیه قیلنمقی ولام ولام معناسنده اولانلرک مدخولی مفعول له قیلنمقی ابن

حاجب و برکوی رحمهما اللہک مذہبدر جمهورک مذہبی بر متعلق اقتضا
ایدن هر بر حرف جرک مدخولی مفعول به در و مفعول فيه حروف جارہدن
(فی) تقدیر اولہرق و مفعول له حروف جارہدن لام تقدیر اولہرق
منصوب اولانلردر .

(قسم ثانی) حروف جارہدن لام حذف و تقدیر اولہرق منصوب بولنان
مفعول له در و مفعول له دن لام حذف اولنمق شروط ثالثہک اجتماعی
عندندہ در (شرط اول) مفعول له حدث اولمیدر پس جئک للسمن
قولزده مفعول له عین اولمغله لام حذف اولنمز (شرط ثانی) مفعول له
واقع اولان حدث مفعول له ایله معال اولان فعلک فاعلینک فعلی اولمیدر
یعنی (فاعلیری متحد اولمیدر) پس اکر متک لا کرامک قولزده (فعل
معال به) ک فاعلی ضمیر متکلم و مفعول لہک فاعلی ضمیر مخاطب اولوب
فاعلیری متحد اولمغله لام حذف اولنمز (شرط ثالث) مفعول لہک
زمان و جودیله (فعل معال به) ک زمان و جودی متحد اولمی و یا خود
برینک و جودی زمانی آخرک و جودی زمانندن بعض اولمیدر پس
(اکر متک لوعدی امس) قولزده مفعول لہک زمان و جودی دون کیجہ
و فعل معال بہک زمان و جودی الان اولوب وجودده مقارنت بولنمغله
لام حذف اولنمز . و اما شروط ثالثہ مذکورہ تحقیق ایلدکده مفعول له
مفعول مطاقہ مشابہ اولہ جغندن (فعل) مفعول مطلق بلا واسطہ جار
منصوب قیلدینی کی مفعول لہی دخی منصوب قیلیمی جائز اولور و شو
جہتله لام حذف اولہرق مفعول له منصوب قلنور (ضربت زیداً تأدیباً)
قولزده تأدیباً کی کہ (تأدیباً) لفظاً منصوب (ضربت) نک مفعول
لہیدر و وجود ضرب و وجود تأدیب زمانلری متحد اولوب لیکن تأدیب
ذاتاً ضرب اوزرہ مترتب و آندن حاصلدر و (قعدت عن الحرب جیناً)
قولزده جیناً کی کہ (جیناً) لفظاً منصوب (قعدت) نک مفعول لہیدر
و جربدن قعود ایلمک یعنی چکلمک زمانی زمان جیندن بعض اولوب
مقارندر خوفندن ایچون جربدن اوتوردم یعنی چکلمدیمکدر و وجود
ایله مراد واقعده و یا قصد فاعلده اولمقدن اعم اولمغله (شهدت الحرب)

ایقاعاً للصالح قولزده لام حذف اولنه رق ايقاعاً للصالح مفعول له قیلنمق صحیح اولمشدر وخفی اولمیه که نجاتدن (زجاج) لام جاره حذف وتقدير ایدیلمکله منصوب اولان مفعول لهی مفعول مطلق عدادینه داخل قلمشدر مثلاً (ضربت تأديباً) ادبت بالضرب تأديباً و (قعدت عن الحرب جيناً) جينت في القعود عن الحرب جيناً و ياخود (ضربت تأديباً) قولمز ضربت ضرب تأديب و (قعدت عن الحرب جيناً) قولمز قعدت قعود جين تقدير نده در ديمشدر لکن برنوع ديگر برنوعله تأويل اولنه بيلمکله حقیقه اول نوعده داخل اولمق لازم کلز مثلاً جائی را کباً قولزده (حال) قلنان (را کباً) کله سی جائی زید وقت الركوب ديمکله تأويل اولنه بيلمک تصوريله (را کباً) کله سی مفعول فيه اولمق یعنی حال مفعول فيه داخل اولمق لازم کلز دينه رک ذهاب زجاج رد اولمشدر .

درس ۸۰

(المفعول معه) (منصوباتك) بشنجیسی مفعول معه در که (هو المذکور بعد الواو لمصاحبة معمول فعل لفظاً او معناً دينه رک تعريف اولنور یعنی مفعول معه بر فعل لفظی و یا معنوی نك معمولنه اول فعله مصاحب و مشارك اولديغی افاده ایچون مع مناسنه اولان واودنصرکه ذکر اولنان بر مفعولدر .
(مفعول معه) نك مصاحب اولديغی (معمول فعل) ده (کاه فاعل) اولور استوی الماء والخشبہ کي صوتخته ايله برابر اولدی ديمکدر که استواده (مفعول معه) اولان خشبه نك فاعل فعل اولان (ماء) ه مشارك و مصاحب اولديغی مفیددر و (کاه مفعول) اولور (کفالك وزيداً درهم) کي زید ايله سکا بر درهم کافیدر ديمکدر که بر درهمك کافی اولمسنده مفعول معه اولان زيدك مفعول فعل اولان مخاطبه مصاحب و مشارك اولديغی مفیددر .
و مفعول معه نك معمول فعله مصاحبتی (یا زمان واحده) اولور (سیرت وزيدا) کي که زید ايله معاً سير ايتدك یعنی يوريدك کيتدك ديمکدر که مفعول معه اولان زيدك متکلمه سیرده مصاحبتی بر زمان واحده در . و یا (مکان واحده اولور) (لو ترک الناقة و فصلها الرضعا) کي که دیشی دوهی

یاوروسیه ترک ایلسهك یعنی بر محله بر اقس اولسهك آناسنی امر دیمکدر
مفعول معه اولان فصیلک بر محله ترک اولنمقده ناقهیه مصاحبتی مکان
واحدده در .

و (بیلیمیدرکه) مفعول معهك عاملی تعریف مذکورده اراء اولنمقده
اوزره کاه لفظی وکاه معنوی اولور شو جهته مفعول معه دن ایکی قسم
اوزره بحث ایده جکز (قسم اول) عاملی لفظی اولانلردر امثله سابقهده
اولدینی کی . خفی اولیه که مفعول معه قبلنده اولان (واو) فی الاصل
عاطفه در . و بر جهت جامعیه مقتضی اولدیغندن واوده معنای جمعیت
متصور اولوب وشومعنانك معنای معیته مناسبتی ایسه غیر منکر در ومع هذا
(واو) ده اختصار بولندیغندن مفعول معهده واو مع موضعنه وضع اولنمشدر
شو جهته (عاملی لفظی وعطف جائز) اولان محله اصلنه رعایه واوی
عاطفه قلوب مابعدنی ماقبلنده اولان فعلك معمولی اوزره عطف ایلمك
ویا خود واوی عاطفه قلمیوب مابعدنی مفعول معه قلمق یعنی شو ایکی
وجه جائز اولور (جئت اناوزید) و (جئت اناوزیداً) کی ضمیر متکلم
بر ضمیر منفصل ایله تأکید اولنمقده اوزرینه عطف جائز اولدیغندن مثال
اولده واو عاطفه قلوب و (زید) مرفوع اوله رق ضمیر متکلم اوزره عطف
اولنمشدر و مثال ثانیه واو عاطفه قلمیوب بلکه مع مناسسته اوله رق و
(زیداً) لفظاً منصوب مفعول معه قلممشدر . و اما عطف جائز اولیان
محله وجوباً نصب متعین اولور (جئت وزیداً) کی ضمیر متکلم بر منفصل
ایله تأکید اولنمقده اوزرینه عطف ممتنع اولنمشدر پس (زیداً) لفظاً
منصوب جئت فعلك (مفعول معه) سیدر واشبو مذکور ابن حاجب
عندده در لکن جمهور نجات مع قبیح عطفی دخی تجویز ایلدیلر .

(قسم ثانی) عاملی معنوی اولاندر (مالك وزیداً) کی (زید) ایله سنك
ایچون نه وارددر یعنی زید ایله نه ایشلیورسك دیمکدر (زیداً) لفظاً منصوب
مالك دن منقهم معنای فعلك (مفعول معه) سیدر که (ما تضع) در .
ودخی (ما شانك وعمرؤاً) کی عمرو ایله شانك ندر یعنی عمرو ایله
نه ایشلیورسك دیمکدر که عمرواً لفظاً منصوب اولوب ما شانك دن منقهم

معنای فعلک مفعول معه سیدر که پنه ماتضع در بوتوجیه اکثر نحات
عندنده در .

واما سیدویه شو مثالدرده زید و عمرو بر مصدر مقدر ایله منصوبدر دیدی
(مالک وزید) قولزی مالک وللاستک زیداً و ماشانک و عمرواً قولزی
ماشانک و شان ملاستک عمرواً تقدیرنده کوردی . و نحات دن . اندلسی .
مقدر کان ایله منصوب ایدلمسنی دخی ارانه ایدوب ما کانک وزیداً و ما
کان شانک و عمرواً تقدیرنده اولسنی تجویز ایلدی و سیراقی و ابن خروف
مقدر بر لابس فعلیله منصوبدر و و او اکا دالدر و معنای مثال مالک لابس
زیداً و ماشانک لابس عمرواً در دیدیلر بونلره کوره و او لابس مقامنده
قائم اولوب اسمک و او ایله منصوب اولسی لازم کلور تفصیل بحث شیشخ
رضی ده در .

و خفی اولیه که (عامل) معنوی اولوب و (عطف) جائز اولان محله محل
آخر و اریکن بلا حاجة عامل مغوینک عملنه حمل ایلمک غیر موجه اولغله
ابن حاجب حضر تلی عطف تعین ایدر دیدی و جمهور نحات عطف مختار
و نصب جائدر دیدیلر مالزید و عمرو کی و اما عطف جائز اولدقده نصب
تعین ایدر (مالک وزیداً) و (ماشانک و عمرواً) کی زیراً ضمیر مجرور
اوزره من غیر ضرورة بلا اعاده الجار عطف جائز دکلدر .

لکن کوفیلر بلا اعاده الجار عطفی جائز کوردکلرندن شو مثالدرده عطفی دخی
تجویز ایلدیلر و اندلسی اگر مصاحبت اوزره نص ایلمک قصد اولنمزیسه
مع الضعف عطف جائدر دیدی نته کیم قراءت حمزده تساء لون به
والارحام آیت کریمه سنده الارحام جرایله واقع اولوب ضمیر مجرور
اوزره معطوف بولنمشدر .

و غفلت اولنیه که مفعول معنک عاملنده بش مذهب وارددر .

(او ایکسی) جمهورک مذهبیدر که عاملی آراده مع معناسنه اولان و او
توسط ایدرک فعل و یا خود معنای فعلدر دیدیلر نته کیم بیان اولندی .
(ایکنجیسی) کوفیلر مذهبیدر که علی الخلاف منصوب اولوب عاملی
معنویدر دیدیلر .

(اوچنجیسی) ز جاك ذهائیدر که بعدالواو مقدر بر فعل ایله منصوبدر مثلاً جاء البرد والطيالسه قولمز جاء البرد ولابس الطيالسه تقدیرنده دریدی مثال مذکورده (برد) بانك ضمیله برده نك جمعیدر برده خرقة معناسنه در وطيالسه طیلسانك جمعیدر طیلسان برنوع بیونه صاریلور شالدر . (مثال مذکورک مفادی طیلسانلر ایله خرقة لر کلدی دیمکدر .

(دردنجیسی) عبدالقاهرک ذهائیدر که واو ایله منصوبدر دیدی .
(بشنجیسی) اخفشك ذهائیدر که ظرفیت اوزره منصوبدر زیرا واو مع معناسنه اولوب مع ایسه ظرفیت اوزره منصوبدر لکن واو حرف اولوب اعرابه قابل اولماغله اعرابی مابعدینه ویریلمش پس واو مابعدنده اسم ظرفیت اوزره منصوب اولمشدر دیدی هر برینك دلیل ودعوالری ولایم کلان جوابلری شیخ رضی ده بیان اولمشدر .

درس ۸۱

(الحال) منصوباتك التجیسی حالدر حال بر فاعل ویا مفعولك فاعل ومفعول اولملری حیثیله هیئت لرینی بیان ایلان شیدر که (هو مایین هیئة الفاعل اوالمفعول به لفظاً او معنأ) دینهرك تعریف اولنور حالی کوزلجه فهم ایتك حاله متعلق اون بجه دقت ایلمله حاصل اولور .

(بحث اول) بیان اولندیغی اوزره حال بر فاعل ویا مفعولك هیئتی بیان ایلر اشیو فاعل ومفعولده ایکی قسم اوزره تصور اولنور که یعنی فاعل ومفعول اولملری (یالفظ ومنطوق کلام) اعتباریله اولوب حقیقه ویا حکماً ملفوظ اولورلر (ضربت زیداً قائماً) قولمزده اولدیغی کبی که ضمیر متکلمك فاعلیتی وزیدك مفعولیتی لفظ ومنطوق کلام اعتباریله اولوب وحقیقه مافوظلردر وقائماً لفظاً منصوب فاعلدن ویا مفعولدن حالدر که قرینه مقام ایله معلوم اولور (مفادی) زیدی ضرب ایتدم قائم اولدیغی حالده ویا قائم اولدیغم حالده دیمکدر واکر قائماً محلنده قائمین ذکر اولنسه ایکسندن حال اولور که بن زیدی ضرب ایتدم ایکمزده قائم اولدیغمز حالده دیمك اولور . (و زید فی الدار قائماً) قولمزده اولدیغی کبی که (قائماً) (فی الدار) ده مستتر

ضمير فاعل دن حالدر (ضمير مستتر مزبورك) فاعلتى ايسه لفظ و منطوق
 كلام اعتباريله اولوب حكماً ملفوظدر . (وياخود) (فاعل و مفعول
 اولملى لفظ و منطوق) كلام اعتباريله اوليوب فحوای كلامدن منفهم معنا
 اعتباريله اولور كه معناً فاعل و يا مفعول اولور لر . (هذا زيد قائماً) قولزده
 اولدينى كى كه قائماً معناً مفعول اولان زيددن حالدر زيرا (زيد) هژادن
 منفهم معنای اشارت و يا تنبيه اعتباريله كانه مفعولدر كه اشیر الى زيد و يا
 انبه على زيد منزلدهدر لكن متكلم اشارت و تنبيه ايله نفسندن خبر و ير مك
 صد دنده اولديغندن نظم كلامده بر اشیر و يا انبه مقدر ديك اوليوب
 آنحق فحوای كلامدن اشیر و انبه معناسى مستتبطل اولغله زيد شو و معنا
 اعتباريله مفعولدر ديكدر و بعض زيد معنای اشارت اعتباريله و ذا معنای
 تنبيه اعتباريله حكماً مفعول اولوب (قائماً) كلمه سنك هر برندن حال قيلنمسی
 دخى تجويز اولنور .

(بحث ثانى) حال هيئتى بيان ايدر دينلان فاعل و مفعول حقیقه و يا حكماً
 فاعل و مفعول اولمدن اعملردر شو جهتله (حال) (مفعول معه) دن حال
 واقع اولانه دخى صادقدر (استوى الماء والخشبۃ ساكنة) و (كفاك وهنداً
 درهم قانعة) قولزده اولدينى كى و دخى مفعول مطلقدن حال واقع اولانده
 صادقدر (ضربت الضرب شديداً) قولزده اولدينى كى كه احدثت الضرب
 منزلده اولغله الضرب حكماً مفعول به اولوب و شديداً حال واقع اولمشدر .
 و دخى مضاف اليه دن حال واقع اولانده صادقدر و خفى اوليه كه مضاف
 اليه دن حال و قوعى اوچ وجه اوزرهدر (وجه اول) مضاف اليه مضافك
 فاعلى و يا مفعولى اولديغندهدر لكن شو تقديرده مضاف اليه دن حال واقع
 اولان حقیقه فاعل و يا مفعولدن حال واقع اولمش اولور ضربى زيداً قائماً
 قولزده اولدينى كى (وجه ثانى) مضاف فاعل و يا مفعول اولوب مضافى
 حذف ايله (مضاف اليه) ي مضاف مقامنده قائم قيلمق صحيح اولديغندهدر .
 شو تقديرده مضاف اليه كانه فاعل و يا مفعول اولمش اولغله كندندن حال
 و قوعى صحيحدر (بل ملة ابراهيم حنيفا) قول شريفنده اولدينى كى كه
 (ملة) لفظى (ابراهيم) كلمه سنه مضاف اولمشدر و مقدر بر فعلك مفعول

بهیدر بل نبتع ملة ابراهيم حنیفاً تقدیرنده در و (حنیفاً) لفظی ابراهیم دن
 حالدر مضافی حذف ایله بل نبتع ابراهیم حنیفاً دیمک معناً صحیحدر . واعجینی
 ذات زید حکماً قولمزده اولدینی کی والامر معلوم . (وجه ثالث) مضاف
 فاعل ویامفعول اولوب مضاف الیه دن جزء اولدقده در شو تقدیرده هر نقدر
 مضاف الیهک مضاف مقامنده قیامی صحیح اولسه دخی لکن مضاف مضاف
 الیه دن جزء اولمغله مضاف الیه دن حال واقع اولان کانه مضافدن حال واقع
 اولمش منزلنده در مضاف ایسه فاعل ویامفعول بولندیغندن کانه حال فاعلدن
 ویامفعولدن حال واقع اولمش اولور (ان دابر هؤلاء مقطوع مصبحین)
 قول شریفنده اولدینی کی که (دابر) هؤلاء کله سنه مضاف اولمشدر و
 (مقطوع) لفظنده مستتر ضمیرک مرجعی اولمغله نائب فاعل حکمنده در
 و مضاف الیهک جزئدر زیرا برشیئک دابری دیمک اول شیئک اصل
 واساسی دیمکدر و برشیئک اصلی اول شیدن جزءدر پس مصبحین . هؤلاء
 کله سندن حالدر که کانه نائب فاعلدن حال واقع اولمشدر وضربت راس الفرس
 صاهلاً قولمزده اولدینی کی والامر معلوم .

درس ۸۲

(بحث ثالث) حالک عاملی اوج قسم اوزره در که ملفوظ ویامقدیر اوله رق
 یافعل اولور ویاخود شبه فعل اولور ویاخود معنای فعل اولور که تصریح
 ویاتقدیر اولنمیوب معنای کلامدن مستنبط اولور قسم اول ضربت زیداً قائماً
 ومتعلق (فعل) تقدیر اولنه رق زید فی الدار قائماً قوللرمزده اولدینی کی
 قسم ثانی زید ذاهب را کباً وزید مضروب قائماً وزید حسن ضاحکاً واعجینی
 ضرب زید قائماً قولمزده ومتعلق (اسم فاعل) تقدیر اولنه رق زید فی الدار
 قائماً قولمزده اولدینی کی قسم ثالث (هذا زید قائماً) و (یازید قائماً) و (لیتک
 عندنا مقیماً) و (لعله فی الدار قائماً) و (کانه اسد صاهلاً) قوللرمزده اولدینی
 کی زیرا شو ومثالرده هذادن اشیر وحرف ندادن ادعوا ولیتدن اتنی
 ولعلدن اترجی وکاندن اشبه معناری مستباندر .

ذوالحال متعلق حاله راجع ضمیره مضاف اولسه کذا حالی تقدیم واجب
 اولور (لقینی شاتم زید اخوه) کبی که شاتم زید حال اوله .
 خفی اولیه که حال بالاتفاق عامل معنوی اوزره تقدم ایده من بوراده عامل
 معنوی ایله مراد مرور ایله یکی اوزره تصریح و تقدیر اولنمقسنین فحوای
 کلامدن استنباط اولنادر حالک عامل معنوی اوزره تقدم ایده مامسی
 زیرا عامل معنوی نیک عملی ضعیف در فقط زید قائماً کعمرو قاعداً نحو نه
 حال عامل معنوی اوزره مقدمدر زیرا کاف تشبیه بری مشبه و دیگری
 مشبه به ده بری برینه متماثل ایکی حالتیه دلالت ایدر که لاجل التصریح
 هر بری بر حال وزمانله تقيید اولنه یلور . نته کیم مثال مذکورده اولدینی
 کبی (زید) کافدن منفهم معنای تشبیه اعتبار یله فاعل و عمرو مفعول اولوب
 هر بری بر حال ایله تقيید اولنش و هر برینک حالی ککنندی جنبه
 وضع ایدلمشدر شو اجلدن حال اولی بالضرورة عامل معنوی اوزره مقدم
 بولنمشدر که کاف تشبیهدن منفهم معنای تشبیهدر مفاد مثال زید قائماً
 یشبه عمرواً قاعداً در یعنی قائم اولدینی حالده زید قاعداً اولدینی حالده عمرو
 کیدر دیمکدر و اما عاملی فعل متصرف و یا اسم فاعل و یا اسم مفعول اولور ایسه
 بر مانع اولدقدمه بونلرک اوزرینه تقدم ایده یلور زیرا بونلرک عملی قویدر
 و اما صفت مشبهه و مصدر و اسم تفضیل و اسم فعل و فعل تعجب ایسه تقدم
 ایده من زیرا عمللری ضعیف در و کذا عاملی صلۀ الف لام و یا صلۀ حرف
 اولدقدمه مطلقاً تقدم ایده من و اما عاملی (زید فی الدار قائماً) و (زید فوقک
 قائماً) قوللر مزده اولدینی کبی فعل و یا اسم فاعل تقدیر یله ظرف اولور ایسه
 ظرفک عملده ضعیف اولسنه بناءً (سیدویه) کذا حال تقدم ایده من دیدی
 و اما (اخفش) عمل ظرفک عندنده قوی اولسنه بناءً مبتدائک حال
 اوزره مقدم اولسی شرطیه حالک تقدمنی تجویز ایتدی (زید قائماً فی الدار)
 کبی و اما مبتدا مؤخر اوله رق تقدم حالی منعده (سیدویه) موافق اولدی
 پس (قائماً زید فی الدار) و (قائماً فی الدار زید) بالاتفاق جائز دکدر .
 و خفی اولیه که حال ذوالحال مجرور اوزره دخی تقدم ایده من مجرور اولسی
 کرک اضافت و کرک حرف جرایله اوله زیرا مضاف الیهک مضاف اوزره

و مجرورك جار اوزره تقدیمی جائز اولمدينی کبی تابعلرینک دخی تقدیمی جائز
اوله من شود کر اولنان سیبویه و اکثر نحاک بیانیدر و اما ابن (کیسان)
و (ابوعلی) و (ابن برهان) و سائر بعض نحاک بر جار ایله مجرور اولان
ذوالحالده حالک تقدیمی تجویز ایلدیلر زیرا حرف جر همزه و تضعیف کبی
اسباب معدیه فعلدن اولمغه فعلک بعض حروف و جزئی مثابه سنده درکه مثلاً
(ذهب را کبة بهند) دینلسه کانه (اذهبت را کبة هندا) دینلمش اولور
پس حروف جر ایله مجرور اولان بحسب الحقیقه غیر مجرور دیمکدر که
اضافته مجرور اولان بویله دکدر و قرآن عظیم الشانده (وما ارسلناک الا کافه
للناس) آیت کریمه سیله استدلال ایلدیلر که (کافه) لفظی (للناس) ده اولان
(ناس) کلمه سندن حال واقع اولوب و اوزرینه مقدمدر و (ناس) لامله
مجروردر دیدیلر لکن شواستدلالرینه جواباً (کافه) کاف خطابدن حالدر
و (تا) مبالغه ایچوند و یاخود بر مصدر مقدرک صفتیدر که ارسالة کافه
دیمکدر و یاخود (کاذبه) و (عافیه) کبی مصدر اولوب مفعول له درکه و
(ما ارسلناک یا محمد لشیء الا لیکف الناس و تحثم) دیمکدر دینلمشدر.

درس ۸۴

(بحث سابع) جمهور نحاک عندنده حال بر شیئک هیئت و صفتنه دلالت ایدر
و ذوالحاله مرتبط اولمق ایچون همیشه مشتقاتدن اولمیدر لکن (ابن حاجب)
رحمه الله کرک مشتق و کرک جامد اوله هر بر هیئت و صفته دلالت ایلیان حال
واقع اوله بیلور بیوردیلر عربک (هذا بسرأ اطیب منه وطباً) قولنده بسرأ
و رطباً کبی که بالاتفاق حال واقع اولمش و جامدلردر زیر ابسريت و رطیت
هیئتنه دلالتلری وارددر بسر بانک ضمی و سینک سکونیه هنوز طاتلولمش
خورما قوریغنه دینور و رطب رانک ضمی و طانک فتحیه نضج بولمش تازه
خورمایه دینور (مفاد مثال) شومشار الیه خورما بسر اولدینی حالندن
رطب اولدینی حالده کوزل و اطیبدر دیمکدر (جمهور) (بسرأ) و (رطباً)
کلمه لرینی مبسر و مرطب ایله تأویل ایلدیلر و خفی اولیه که شومثاک ترکیبنده
اوچ مذهب وارددر (مذهب اول) (سیبویه) و (مازنی) و (فارسی) و

(ابن گسان) و (ابن حنی) و سایر بعض محققین نجات (بسرأ) اطمینان
مستتر ضمیر مفضل دن و (رطباً) منوره اولان ضمیر مفضل علیه دن حاله
وایکسندده دخی عامل اطمینان در بدیلر شو صورتده بسرأ اسم تفضیل اوزره
تقدم ایش و حالبوکه آنفا اسم تفضیلک عملی ضعیف اولوب حالک تقدیمی جائز
اولمز دینلمش ایدده لکن شو ترکیب نحو نونده مستثنا طوتلمشدر زیر اشی
واحد اعتبارین مختلفین ایله یکی حال تعلق ایله سه هر بری کنیدنک تعلق
ایله یکی اعتبار ایله متعلق نزدینه وضع اولتمق لازم کلور.

بوراده شیء واحد هذا ایله مشارالیه خور مادر کنیدن یکی حال تعلق ایلمشدر که
(بسرأ) و (رطباً) در لکن بسریت حالک تعلق مشارالیهک مفضل اولسی
اعتبار ایله در و هر تقدیر مفضل اطمینان مستتر ضمیر ایدده فقط ضمیر مستر
عدم منزله اولوب و مشارالیه دن عبارت بولمغه کانه مشارالیه ضمیر
مقامنده قائم اولوب و شو حیثیه مفضلدر پس حالی کنیدی غندنده وضع
اولتمش و حال اسم تفضیل اوزره بالضروره مقدم اولمشدر و رطبیته حالک
تعلق مفضل علیه اولسی اعتبار ایله در مفضل علیه منه ده اولان ضمیر بارز
مجرور در که بوده مشارالیه راجعدر پس (رطباً) ده منه ضمیری غندنده
وضع اولتمشدر و مع هذا (زید احسن قائماً منه قاعداً) ترکیبده برابرس
کورلما مکه شو تقدیم واجب اولمدینی ذات فطنه غیر حقی در (مذهبائی)
ابوعلی و اتباعی اسم تفضیلک عملی ضعیف اولمدیغدن اوزرینه حالک تقدم
ایلمسی لازم کلامک همچون بسرأ کله سنده عامل (هذا) دن متفهم معنای
اشارت و یا معنای تیه در بدیلر لکن عامل حال (حال) ایله مقید اولور
و حالبوکه شو مقامده مشارالیه و منه علیه قریابس اولسیده محتمل و محیددر
شو صورتده ایسه نه اشارت و نه تیه بسریت ایله مقید ایدده من و برده
(هذا) موقعنده (بسرأ) ده عامل اوله به حقی بر اسم وضع اوله رقی
مثلاً (قرة نخانی بسرأ اطمینان منه رطباً) دیمک بلا شک محیددر شو جهتله
اشو ذهاب رد اولتمشدر.

(مذهب ثالث) مجرد و (ابن سراج) و (سیرافی) و بعض قولنده فارسی
کرکه (بسرأ) و کرکه رطباً ده عامل ثبت معناسنه بر مقدر کان در تقدیر

کلام (هذا اذا كان بسراً طيب منه اذا كان رطباً) در دیدلر لکن اشبو
 ذهابده اذا کلمه سی مضاف الیه برابر حذف اولمق و (کان) ده اصل
 اولان ناقصه اولمق ایکن تامه قیاسمق کبی وسائر کونه تکلف وتعسف
 وارد در دینه رک رد اولمشدر . .

(بحث ثامن) حال بعض جمله اولور زیرا حال مفردة صاحبك هیئت
 وصفته دلالت ایلدیکی کبی جمله دخی دلالت ایدر . لکن حال ذوالحال دن
 خبر منزله و حالی ذوالحال اوزره اجرا ایلماک حال ایلله ذوالحال اوزره
 حکم ایتماک قوه سنده اولمغله حال واقع اولان جمله نك خبریه اولمسی لازمدر
 زیرا جمله انشائیة ایلله برسنه اوزره حکم ایلماک صحیح اولمدیغدن خبر
 منزله اولان حال جمله انشائیة اوله مز و (حل) خبر منزله اولمسی
 جهته خبرك تعددی جائز اولدیغی کبی حال دخی تعددی جائزدر (جائنی
 زید را کباً ضاحکاً) کبی

وحنی اولیه که (حال) کرك مفرد و کرك جمله اوله یا منتقله اولور حال
 منتقله صاحبه ثبوتی عارضی اولوب تجدد و انقضا اوزره بولنادر جائنی
 زید قائماً و جائنی زید یرکب و جائنی زید و هو ضاحک کبی و یا مؤکده اولور
 حال مؤکده صاحبده طبعی و خالق بر هیئته دلالت ایدوب صاحبی طور دقچه
 غالباً زائل و منتقل اولیوب ثابت اولاندر .

(جائنی ابی عطوفاً) و (جائنی ابی یرحم) و (جائنی ابی و هو شفیق) کبی
 و بعض حال تعدد ایلوب اول مرتبه ده بولنان ثانیة توطه اولور که اولکنه
 حال موطئه دینور و کاه ثانی دخی کالاول حال اولور که ثانی به حال مترادفه
 دینور و کاه ثانی حال اولده مستتر ضمیر دن حال اولور که ثانیة حال متداخله
 دینور راشد اهدا مهدیاو جئت مسبحا مهیلاً و سرت اضحک متبسما قولر مزده
 اولدیغی کبی ،

(بحث ناسع) حال جمله اولدقه جمله ده استقلال اولمغله کندینی صاحبیه
 ربط ایدر بر رابطه محتاجدر و یا علیدر که رابطه (ضمیر) و (واو) در

و ضمیر رابط متکلم و مخاطب و غائبین اعمدر و جمله یا اسمیه و یا خود فعلیه اولوب و فعلیه اولدقده (قعل) یا مضارع مثبت و یا مضارع منفی و یا ماضی مثبت و یا ماضی منفی اوله جغندن جمله واقع اولان حال بش قسم اوزره تصور اولنور (قسم اول) حال جمله اسمیه اولسه جمله اسمیه نك استقلالی پك قوی و شدید اولوب بونده رابطه پك قوی اولمق مناسب اولمغله اکثر ربطی و او و ضمیر یله اولور (جئت وانا راكب) و (جئت وانت راكب) و (جاء زید وهوراكب) کبی .

و کاه یالکیز و اوایله ربط اولنور زیرا (و او) اول امرده ربط و جمعه دال اولمغله کنه دایله اکتفا اولنه بیلور و شیخ رضی یالکیز و او ایله ربط کثیرا لوقوعدر دیشدر نته کیم کنت نیا و آدم بین الماء و الطین حدیث شریفنده اولدینی کبی و کاه یالکیز ضمیر ایله دخی ربط اولنور و اشبو ضمیر حال واقع اولان جمله نك اول و وسط و آخرنده بولنه بیلور جائنی زیدهوراكب و (کلمه فوه الی فی) و جائنی زیدراكب هو کبی لکن ضمیرك ابتداده بولمنسی لازم اولدینی جهتله (اول امرده ربطه دلالت خاصه سنی پك حائز اولدیغندن یالکیز ضمیر ایله اکتفا ضعیفدر .

و خفی اولیه که مؤکدایله مؤکد بیننده شدت اتصال بولندیغندن و اوک آرالینه دخولی غیر جائز اولمغله حال مؤکده و اوایله و یا خود و او و ضمیر ایله ربط اولمیوب حال مؤکدهده رابط آنحق ضمیردر قرأت کتاب الله هو الحق قولزده اولدینی کبی .

(قسم ثانی) حال جمله فعلیه و فعلده مضارع مثبت اولسه ربطی آنحق ضمیر ایله در زیرا مضارع مثبت لفظاً و معنأً اسم فاعله مشاهددر حال واقع اسم فاعل ایسه مثلاً جائنی زید را کباً قولزده اولدینی کبی و اودن مستغنی اولوب آنحق ربطی ایچنده مستتر ضمیر ایله در پس حال واقع اولان مضارع مثبتده دخی رابط یالکیز ضمیردر (جائنی زید یسرع) کبی و برده حال واقع اولان مضارع مثبت (عاملنه) مقارن غیر ایله قائم بر صفتك حصولنه دلالت ایلمکده حال مفرده کیدر احوال مفردهده ایسه کرک اسم فاعل و کرک غیری اوله رابط آنحق ضمیردر و اما بعض عربك قمت و اصلك وجهه قولنده (و اصلك) و شاعرک

فلما خيشت انظافيرهم نجوت وارهم مالكا

شعر نده (وارهنم) ترکیلی که بولر جمله فعلیه وفعله مضارع مثبت اولوب حال واقع اولمش ومع هذا و اوایله ربط اولنمش کورتمکده ایسه ده بولر برار مبتدای محذوف خبری اولوب تقدیر کلام (و انا اصك) و (انا ارهنم) در پس حال واقع اولان جمله اسمیه اولغله اشكال یوقدر و بعضلر مبتدا تقدیر ایلمیوب اولکنه شاذ وایکنجی به ضروره شعریه دن ایچوندر دیو جواب ویردیله و (عبدالقاهر) واو حالیه اولمیوب عاطفه در مابعدی ماقبلنه معطوفدر (قت واصك) قولزده قت وصکت و (نجوت وارهنم) قولمز (نجوت) و (رهنت) دیکدر زمان ماضیده واقع اولان الآن حاضر فرض اولته رق حکایه ایچون ماضی لفظندن لفظ مضارعه عدول اولمشدر دیدی وخفی اولیه که مضارع مثبت اوزره (قد) کلهمسی داخل اولور ایسه اکثر نحات شو تقدیرده و اوایله دخی ربط اولنور دیدیلر (لم تؤذونی وقد تعلمون انی رسول الله الیکم) آیت کریمه سنده اولدینی کی که (وقد تعلمون) حال اولوب و واو رابطه بولنشدر لکن بعض محققین (وانتم قد تعلمون) تقدیرنده قیلهرق کذا جمله اسمیه ایله تأویل ابیدیلر (قسم ثالث) حال جمله فعلیه وفعل مضارع منفی اولسه (واو) و (ضمیر) ایله ویالکز (واو) ویالکز (ضمیر ایله) دخی ربط اولنور (جانی زید وما یتکلّم غلامه) و (جانی زید ما یتکلّم غلامه) و (جانی زید وما یتکلّم عمرو) کی (قسم رابع) حال جمله فعلیه وفعل ماضی مثبت اولسه کذا واو و ضمیر ایله ویالکز واو ویالکز ضمیر ایله دخی ربط اولنور لیکن بصریلر (فعل ماضی) زمان ماضی ده استفا و انقضایه دلالت ایتمکه زمان فعلنک زمان حاله مقارتی غیر ظاهر بولندیغندن حال واقع اولان ماده نک زمانی فعلنک ذوالحالذن صدور و یا ذوالحال اوزره وقوعی زمانسه تقریب الیمک ایچون یعنی (تجاوزاً قریبت ومقارنته دلالات ایتمک ایچون) زمان ماضی بی زمان تکلمه مقربه اولان ظاهره ویا مقدره (برقد) کلهمسنگ داخل اولمنی

دخی شرط ایلدیار جائنی زید وقد خرج غلامه و جائنی زید قد خرج غلامه و جائنی زید وقد خرج عمرو کبی فقط (سیبویه) و (مبرد) قد کلهسی مطلقاً ظاهر اولمیدر دیدیلر واما کوفیلر (قد) کلهسنک دخولی شرط لازم دکلدر دیدیلر پس (اوجاؤکم حصرت صدورهم) آیت کریمه سنده (حصرت صدورهم) جملهسی حال اولوب عند اکثر البصرین قد کلهسی مقدردر تقدیر کلام (قد حصرت صدورهم) دیمکدر. (سیبویه) بر موصوف مقدرک صفتیدرکه حال واقع اولان اودر تقدیر کلام (قوماً حصرت صدورهم) دیمکدر دیدی. مبرد حال دکلدر جمله دعائیه در دیدی واما کوفیلر (قد) کلهسنک دخولی شرط ایلمدکلرندن آنلره کوره بر اشکال یوقدر.

واما حال واقع اولان ماضی منفی و مضارع منفی زماننک زمان عامله مقارنتده شبهه یوقدر زیرا نفی ده اصل اولان استمرار اولمغله بلاشک زمان عامله مقارن اولور و مضارع مثبت دخی تجدد دال بولنمغله مقارن اوله جفنده شبهه یوقدر.

(قسم خامس) حال جمله فعلیه و فعل ماضی منفی اولسه کذا یا و او و ضمیر و یا یا لکمز ضمیر و یا یا لکمز و او ایله ربط اولنور (جائنی زید و ماخرج غلامه) و (جائنی زید لم تخرج غلامه) و (جائنی زید ولما یخرج عمرو) کبی خفی اولیه که (لم) و (لما) داخل اولدقلری مضارعک معناسنی ماضی به نقل ونفی ایلدکلری جهته بونلرک مد خولی ماضی منفی قیلندندر.

درس ۸۶

(بحث عاشر) حالک عاملنی برقرینه حالیه و یا مقالیه بولندقدده حذف ایلمک جائز اولور سفر و عزیمت اوزره اولان برکیمسهیه راشداً مهدیادیندکده اولدینی کبی که سر راشداً مهدیاً تقدیرنده در. منتهی عزیمت اولان مخاطبک حالی قرینه سیله عامل حذف اولنمشددر. مفاد مثال عزیمت ایت رشده بولیجی و هدایت اولنمن اولدیغک حالد دیمکدر. نته کیم ترکجده (سلامتله سلامتله دیرلرکه سلامتله کیت و مولانک حرز و اما سنده اول دیمکدر.

تعدد حالی تجویز ایتمیانلر (مہدیاً) کلمہ سی راشداً ایچندہ مستتر ضمیردن
 حالدر حال متداخلہ در دیدیلر و بعضیلر راشداً و مہدیا بر مفادده اولوب
 حال مترادفہ اولسنہ ذاہب اولدیلر و برقرینہ مقالیه بولندیغی ایچون حالک
 عاملنی حذف ایلمک مثلاً (کیف جئت) یعنی نصل کلک سویلیان کیمسہ نک
 جوابندہ (را کبا) دیندکده اولدیغی کبی کہ جئت را کبا دیمکدر اشبو قرینہ
 مقالیه ایله عامل حذف اولنشدر و نتہ کیم ۱ ایحسب الانسان ان لن نجمع عظامه
 بلی قادرین) آیت کریمہ سندہ (قادرین) حال واقع اولوب قرینہ مقالیه دن
 ایچون عامل حذف اولنشدر تقدیر کلام (بلی نجمعها قادرین) دیمکدر
 وبعض حالک عاملی وجوبا حذف اولنور بوده انحق بعض حال مؤکده ده
 درکہ ماقباندہ بر جملہ اسمیہ نک مضمونی مؤکد و مقرر اولوب و اول
 جملہ اسمیہ ده کسندہ عمل ایتکہ صالح بر جزء بولمیه (زید ابوک عطوفا)
 کبی (عطوفا) حالدرکہ عاملی حذف اولنشدر تقدیر کلام (احقه عطوفا)
 دیمکدر (احقه) همزه نک فتحی و حانک ضمیله (حقت الامر) ماده سندن
 ثلاثین فعل مضارع نفس متکلم و حده در و یا حود افعال بایسندن فعل
 مضارع نفس متکلم و حده در پدرک اوغلنه شفقت و عطوفتی ظاهر
 اولوب ذکر اب عطوفتی مشعر اولمغله شوق قرینہ ایله روما للاختصار
 وجوبا عامل حذف اولنشدر (مفاد مثال) زید پدرکدر سکا عطوف
 و شفیق اولدیغی حالده بن اذعان و تیقن ایلدم دیمکدر . صاحب مفتاح
 اشبو مثالده (یحیی) تقدیر ایدیللمسنی اختیار ایلدی یحیی ایکنجی بایدن
 فعل مضارع در ییل و یعطف معناسندہ در و بعضیلر مضارع مجهول صغہ سیله
 یحق تقدیر ایلدیلر . و بعضیلر جزء جملہ یی و یا جملہ دن منفہم بر معنایی عامل
 قیلدیلر کہ بولنردن (زجاج) اشبو حالده عامل خبردر . زیرا مسمی ایله
 مؤلدر (زید ابوک) قولمز (زید مسمی بابیک) دیمکدر دیدی و (ابن
 حروف) عامل مبتدادر . زیرا معنای تنبیہی متضمندر دیدی و (شیخ)
 رضی بونلرک ذہابی رد ایله اولی اولان ابن مالکک ذہابیدرکہ عامل
 (زید ابوک) جملہ سندن منفہم اولان معنادر . زیرا کانه (یعطف علیک)
 ابوک عطوفا) دیمکدر دیدی .

واما حال مؤکده برجهانک مضمونتی مؤکد اولیوب بعض اجزاسنی مؤکد اولسه عاملی حذف ایلمک واجب اولمز (انا ارسلناک للناس رسولا) آیت کریمه سننده اولدینی کی وکذا مضمونتی مقرر ومؤکد اولدینی جمله اکر فعلیه اینسه عاملنی حذف ایلمک واجب اولمز . نته کیم صاحب کشافک بیان ایلدیکی اوزره (شهد الله) آیت کریمه سننده قائماً بالقسط کی (شهد) نک فاعلندن حالدن .

وکذا مضمونتی مؤکد ومقرر اولدینی جملهده کندنده عمل ایتیه صالح براسم اولسه عاملی مذکور اولمغله حذف واجب اولمز الله شاهد قائماً بالقسط قولمزده اولدینی کی فاعلبر ان کنت من الاولی الابصار

درس ۸۷

(التمييز) منصوباتک یدنجیسی تمیزدر تمیز لفة برشیئک ابهامنی ازاله ایله غیرندن فصل وتعیین ایلمک معناسنه اولوب بوراده اسم فاعل معناسنه درکه مراد متکلمی تمیز وتعیین ایدیجی دیمکدر تمیزک تعریفنده (ما یرفع الابهام من ذات مذکوره اوه مقدره) دینه رک تعریف اولنورکه تمیز برذات مذکوره ویامقدره دن بحسب الوضع مستقر وثابت اولان ابهامی رفع وازاله ایدر براسم نکرده در دیمکدر (حال) ذوالحالذنو (صفت) موصوفدن ابهامی رفع ایدر ایهده لکن ذاتدن ابهامی رفع ایلمیوب بلکه وصفندن رفع ایلدکرنندن و (بدل) مبدل منه دن ابهامی رفع ایدر اولمیوب بامکه بر مبهمی ترکله آتک یرینه بر معنی ایراد ایلمک قیلندن اولدیغندن و (عطف بیان) متبوعندن مثلاً (ابو حفص عمر) قولمزده عمر کله سی ابو حفص دن ازاله ابهام ایلمیوب آتجق عدم اشتهارندن ایچون (ابو حفص) ده خفا اوله رق شو وخفای ازاله ایلدیکنندن ومثلاً (رأیت عینا جاریه) قولمزده (جاریه) کله سی (عین) لفظندن مراد پیکار اولدیغنی تعین ایله ابهامی رفع ایلمده ایهده لکن شو ابهام عین (لفظ مشترک) اولدیغندن موضوع لهک تعددی اعتباریه استعمالدن نشأت ایلمیوب بحسب الوضع مستقر بر ابهام اولدیغندن شو جمله حد تمیزدن خارج اولوب بویکیلر ایله اشکال وارد اولمز .

تمیز یا ذات مذکوره و یا ذات مقدره در ابهامی رفع و ازاله ایلیه جکندن
 تمیزدن یکی قسمله بحث ایده جکر (قسم اول) ذات مذکوردهن یعنی بر
 اسم مبهم تامك مدلولندن ابهامی رفع ایلیان تمیزدر بونده عامل اسم مبهم
 تام درکه فاعلیله تمام اولمش فعل تامه مشاهددر و مابعدنده تمیزی گانه مفعول
 مقامندهدر . ویلمیلیدرکه اسم مبهم تامك تمامیتی بش شیئك بریلهدر .
 (اولکیسی) آخرنده لفظا و یا تقدیراً تنوین ایله تمام اولور (رطل زیتا)
 و مثاقیل ذهباً واحد عشر رجلاً کبی (ایکنجیسی) نون تنیه ایله تمام اولور
 (منوان سمنا) کبی (اوچنجیسی) نون شبهه جمعه تمام اولور (عشرون
 درهماً) کبی و اما آخرنده نون جمع بولنان مثلاً (الاکسرین اعمالاً) و (حسنون
 وجهاً) قولمزده اولدینی کبی بونلرک مابعدنده تمیز نسبتدن رفع ابهام ایدرکه
 شو و قسمدن اوله مز بلکه قسم ثانی ده شبهه جمعه داخلددر (دردنجیسی)
 اضافتله یعنی برکله آخره مضاف اولمق ایله تمام اولور (ملوء عسلاً) کبی
 (بشنجیسی) کندی نفسیله تمام اولورکه بوده مرجعی اولیان ضمیر مبهمده
 واسم اشارده اولور ضمیر مبهم غالباً مواضع مدح و تعجب کبی مبالغه
 و تفخیم موقعلرنده بولنور (ربه رجلاً) و (یاله رجلاً) و (نعم رجلاً)
 قوللرمزده اولدینی کبی زیرا (رب) نکره یه مختص اولمغله ضمیر رب ایله
 برمعین مراد اولنه مز و (یاله رجلاً) ده (لام) تعجب ایچونددر حضرت
 امام علی رضی الله تعالی عنه و کرم الله وجهه اقدمزک (یاله مرأماً مابعدده)
 قولنده اولدینی کبی و ضمیر لاجل التفخیم مبهمدر و اگر معین اولسه ایدی
 افاده مرآمده قاصر اولور ایدی و (نعم رجلاً) قولمزده دخی رجلاً نعمده
 اولان ضمیر مستترک تمیزی اولوب و ضمیر مزبور مبهمدر بنفسه تمام
 اولمشدر و اگر معین اولسه نعم الرجل دینلور ایدی واسم اشاره علی رأی
 (ماذا اراد الله بهذا مثلاً) قول شریفنده اولدینی کبی اشته اسم مبهم ذکر
 اولنان امور خسهدن بریله تمام اولورکه یعنی شو حالده آخر برکله یه اضافتی
 متمتع اولور پس اسم مبهم امور خسهدن بریله تمام اولدقد فعل تامه مشابه
 اولورکه فعل تام دخی فاعلیله تماماً اولمش و فاعلی کنندنصکره بولنمش و مضمیر
 و مظهر اوله رق کورلمشدر شو تقدیرده اسم مبهم تامك مابعدنده

تمیزی مفعوله شبیه اولغله اسم مبهم تمیزین ناصب و آمده عامل اولمشدر .

درس ۷۱

خفی اولیه که اسم مبهم تام اکثر کندیلله برنسنه نك قدر و عیاری تعیین اولنان اسم اولورکه . عدد . وزن . کیل . ذراع . مقیاس . یعنی اشبو مقادیر خمسهدن بولنور عشرون درهما ورطل زیتا و قفیزان بر اودراع ثوبا و علی التمره مثلها زبدا قوللر مزده اولدینی کی و گاه غیر مقدار اولور خاتم حدیداً کی مقدار واقع اولاندن آخرنده لفظاً و یا تقدیراً تنوین و یا نون تنیه بولنسانلرک تمیزلرینه مضاف اولملری جائزدر رطل زیت و مثاقیل ذهب و منواسمن کی و اما بونك غیرنده جائز دکلدز زیرا برنسنهیه مضاف اولان بر کره دخی دیگر برکلهیه مضاف اولسی ممنوع اولغله (اضافله تمام اولان) تمیزینه مضاف اوله من و آخرنده (نون شبیه جمع) اولان بعض تمیزینك غیرینه مضاف اولور مثلاً (عشریك) کی و اگر تمیزینه دخی مضاف اولسه بعض صورتده التباس لازم کلور ایدی مثلاً عشری رمضان قولمزده مراد رمضان یکر می کونمیدر و یا خود یکر منجی کونمیدر اشتباه اولنور ایدی پس لاجل الاطراد التباس بولنمیان محللر دخی صورت التباسه حمل اولنوب تمیزینه اضافتی موجه کورلماش و آنحق مع قله واقع ایهده النادر کالعدم قیاندن بولنمشدر .

و نفسیله تمام اولان یعنی ضمیر واسم اشاره نك دیگر کلهیه اصلاً مضاف اولیه جقلری ظاهر در و اما غیر مقدار واقع اولانك تمیزینه اضافتی اکثر در خاتم حدید کی و خفی اولیه که اسم مبهم تامك تمیزی قلیل و کثیره شامل اجزاسی متماثل بر جنس اولور ایهه مثلاً ماء غسل سمن بر تمر حدید کی شوتقدیرده تمیزك مفرد اولسی واجب در مکرکه انواع و یا مراتبی بیان ایلنك قصد اولنه و اما وجه محرر اوزره جنس اولمدقده مقتضای حاله کوره مفرد و تنسیه و جمع اوله رق ایراد اولنه بیلور غندی عدل ثوباً او ثوبین او انوباً کی .

(قسم ثانی) بر جمله و یا شبه جمله و یا اضافه کائن نسبت ده ملحوظ ذات مقدره دن ابهامی رفع ایلیاندر بونده عامل متقضای مقامه کوره یا فعل و یا شبه فعل و یا معنای فعلدر ذات مقدره دکدر و بیلمیدر که اشبو ذات مقدره عبارده بالفعل مقدر و جزء معدود اولیوب آنجق سامع کندی نفسنده تقدیر و ملاحظه ایدر .

(جمله ده کائن نسبت ده ملحوظ ذات مقدره دن ابهامی رفع ایلیان تمیز) مثلاً (طاب زید نفساً) قولزده اولدینی کی که (طاب شیء زید) مفادنده اولوب نفساً اشبو نسبت ده ملحوظ شیء زید دن ابهامی رافعدر زیرا سامع شوکلامی ایشدکده زیدک برشیء خوش اولدینی بیلوب لکن خوش اولان کندی نفسی و یا وجهی و یا علم و کمال و ابو یتیدر و یا خود پدر و مادری و دار و عقاری کی متعلقاتندن بریمیدر بیله من پس (نفساً) دیندکده خوش اولان نفس زید اولدینی معلوم اولوب ابهام مرتفع اولور بونده طیبک زیده اسنادی حقیقتدر و اگر وجهاً دینسه طیب اولان وجه زید اولوب طیبک زیده اسنادی جزئیت کلیت علاقہ سیله مجاز اولور و اگر مثلاً (علماً) دینسه طیب اولان علم زید اولوب طیبک زیده اسنادی حالت محلیت علاقہ سیله مجاز اولور و اگر مثلاً داراً دینسه طیب اولان دار زید اولوب طیبک زیده اسنادی مالکیت مملوکیت علاقہ سیله مجاز اولور فاعبر ان کنت من اهل الاعتبار .

و (بر شبه جمله ده کائن ابهامی رفع ایلیان تمیز) مثلاً (الحوض ممتلیء ماء) والارض مفجرة عیونا وزید طیب ابا و بکر افضل داراً قولر مزده اولدینی کی که الحوض ممتلیء شیء ماء والارض مفجرة شیئها عیونا وزید طیب شیء ابا و بکر افضل شیء داراً مفادنده اولوب مابعد لرنده ذکر اولنان تمیز لر اراة اولنان ذات مقدره لرك تمیزیدر خفی اولیه که شبه جمله ایله مراد اسم فاعل و اسم مفعول و صفت مشبیه و اسم تفضیل ترکیب لریدر زیرا بونلر فاعلر یله بیله جمله اولیوب بلکه مرکب ناقص لردر که شبه

جمله در لر و بعضی افعال مقارن مصدری دخی الحاق ایلدیلر شو تقدیرده ترکیب مصدرده اولان نسبتده ملحوظ ذات مقدرده دن واقع تمیزه شبه جملهده کائن نسبتده و یا اضافیده کائن نسبتده ملحوظ ذات مقدرده دن تمیزدر دینه بیلور لکن بعض افعالده جر ملحوظ اولور ایسه تمیز اضافیده کائن نسبتده ملحوظ ذات مقدرده دن واکر آنحق رفع ملحوظ اولور ایسه تمیز شبه جملهده کائن نسبتده ملحوظ ذات مقدرده دن تمیزدر دینه رک فرق اولنور وفاضل جامی حسبک رجلاً ویالزید فارساً قولزده اولدینی کبی هرکنندن معنای فعل منفهم اولان اسم ویا حرفی دخی شبه جملهدن عد ایلمشدر فقط فاضل عصام قبول ایلما مشدر پس فاضل عصام عندنده ترکیب مز بورده (رجلاً) کاملاً فی الرجولية تأویلنده کاف خطابدن حالدر و (فارساً) دخی کذا زید ایچون حال قلنور و موجه اولان دخی بودر .

و (براضافیده کائن نسبتده ملحوظ ذات مقدرده دن ابهامی رفع ایلان) اعجینی طیه ابا قولزده اولدینی کبی که اعجینی طیب شیئه ابا مفادنده اولوب (ابا) ارئه اولنان ذات مقدرده دن تمیز واقع اولمشدر .

و کذا (لله دره فارساً) قولزده اولدینی کبی که (لله در شیئه فارساً) مفادنده اولوب (فارساً) صفت مشتقه اوله رق ارئه اولنان ذات مقدرده دن تمیز واقع اولمشدر لکن صاحب کشاف (لله دره فارساً) قولزده ابهامی اضافیده کورمیوب ضمیرده کورمشدر (ربه رجلاً) قبیلندن قیلمشدر شو تقدیرده قسم اولده داخل اولوب بوراده مانحن فیه مزدن اوله من مثال مز بورده (در) دالك فتیح و رانك تشدیدله سود معنانه اولوب (سود) ذاتنده شرف و محض خیر اولغله بوراده خیر و مکافات مراد اولنور (و) فارس فراست یعنی اسب سوار لکده حذاقت و مهارتی اولانه دینور (مفاد مثال) فارس اولمی جهتیله خیر و مکافات الله ایچوندر دیکدرکه کانه شو عملنك مقابله مکافات عهدۀ بشردن خارج اوله رق مکافاتی رب المجازاته حواله ایله خیر دعادر خفی اولمیه که کرك (جمله) ده و کرك (شبه جمله) ده و کرك (اضافت) ده کائن نسبتده ملحوظ شیئ مقدرک

عبارده منسوب الیهی بولان کله یه مثلاً (طاب زید نفساً) قولزده (زید) ه منتصب عنه دینور که تمیز کنندن ایچون منتصب اولمش یعنی ایراد اولنش دیکدر و بوندن (زید) تمیزده ناصب دیک چیقمیوب فقط شی زیدک ابهامی ایراد تمیزه سبب اولغله شو جهتله تجوزاً (زید) ه منتصب عنه دینامشدر .

درس ۹۰

معلوم اوله که (جمله) و (شبه جمله) (واضافت) ده کائن نسبتده ماحوظ ذات مقدره دن ابهامی رفع ایلان تمیز اوج حالدن خالی دکلدر (۱) تمیز بامنتصب عنه خاص اولور مثلاً (طاب زید نفساً) و (زید طیب نفساً) و (اعجینی طیبه نفساً) قولزده اولان نفساً کله سی کی (۲) و یا منتصب عنک متعلقنه راجع اولور . مثلاً (طاب زید داراً) و (زید طیب داراً) و (اعجینی طیبه داراً) قوللرمزده اولان داراً کله سی کی (۳) و یا خود تمیز شو ایکی جهته محتمل اولور مثلاً (طاب زید ابا) و (زید طیب ابا) و (اعجینی طیبه ابا) قولزده اولان ابا کله سی کی زیر ابا قولزدن منتصب عنک ابی مراد اولنق و یا منتصب عنه کنندسی اب اولق احتماللری متصوردر که مثلاً (طاب زید ابا) قولزده تمیز منتصب عنه مختص ایسه مفادی زید پدر اولسی جهتله خوش اولدی دیکدر که کنندینک خوش اولدیغنی مفیددر . و تمیز منتصب عنک متعلقنه راجع اولدقده زید پدری جهتله خوش اولدی دیکدر که پدرینک خوش اولدیغنی مفیددر .

شوبسطمز معلوم اولدی ایسه خفی اولیه که اشبو تمیز اکر (اسم) یعنی غیر صفت اولور ایسه یا منتصب عنه و یا منصب عنک متعلقنه و یا شو ایکی جهته محتمل اولور و بونده تمیز (افراد) و (تشیه) و (جمع) دن هر قنغیسی مقصود اولور ایسه مقتضای حاله (موافق ایراد اولنور) (طاب زید ابا) و (طاب الزیدان ابون) و (طاب الزیدون آباء) کی وگاه منتصب عنه ده متصور بر معنا جهتله وجه مذکور اوزره ایراد اولنور که مثلاً (طاب زید ابا) دینور زیدک (اب) اولسی و یا زیدک بر آبی مراد اولنور

ایسه و (طاب زید ابوین) دینور زیدك براب و برجدی مراد اولنور
ایسه و (طاب زید آباء) دینور زیدك اب وجدلری مراد اولنور ایسه
لکن تمیز قلیل و کثیره واقع جنس اولور ایسه شو تقدیرده مفرد کتورلمسی
واجب اولور . طاب زید علما و طاب الزیدان علما و طاب الزیدون علما
کی فقط انواعی بیان مقصود اولور ایسه شو تقدیرده تشیه و یا جمع اوله رق
ایراد اولنور (طاب الزیدان) علمین و (طاب الزیدون) علوما کی .

واکر تمیز صفت اولور ایسه مثلاً ولله دره فارسا قولزده اولدینی کی شو
تقدیرده تمیز منتصب عنیه افراد و تشیهده و جمعهده مطلقاً موافق اولوب
و آنحق منتصب عنیه خاص اولور . زیرا صفت بر موصوفی مستدعی
اولوب موصوفیه (مذکور) اولان اولادز و صفتك موصوفیه مطابقتی
ایسه لازمدر . لکن اشبو تمیز حال قیلنمیه دخی صالحدر فقط (لله دره
من فارس) دیمك صحیح اولوب من جاره نك ایسه حال اوزره زائد
قیلنه مامسی ملاحظه اولندقدده تمیز قیلنمق جهتتایید ایلر .

درس ۹۱

خفی اولیه که قسم اول یعنی ذات مذکورده دن ابهامی رفع ایلان تمیز
هر تقدیر مفعول منزلنده ایسهده لکن عاملنك اوزرینه بالاتفاق تقدم ایده من
زیرا عاملی اسم جامد اولوب فعله مشابهتی ایسه ضعیف اولدیغندن عملی
ضعیفدر . پس ماقبلنده عمل ایلیه من و اما قسم ثانی یعنی ذات مقدرده دن
ابهامی رفع ایلان تمیز جمهور نحات غننده کذا عاملنه تقدم ایده من زیرا
اشبو تمیزك عاملی فعل و یا شبه فعل و یا معنای فعلدر و اشبو تمیزکنندی معناده فاعل
حکمنده در مثلاً (طاب زید نفسا) قولمز طاب نفس زید و (زید طیب ابا)
قولمز (زید طیب ابوته) و اعجینی طیبیه ابا قولمز اعجینی طیب ابوته مفادنددر
وگاه (فعل) لازم قیلنمق طریقله تمیزك فاعلیتی ارأه اولنور و (فجزنا
الارض عیونا) ده اولدینی کی که (فعل) لازم قیلنمق انفجرت عیونها
ترکیبی تصور اولندقدده عیونك معناده فاعل ایدوکی بیانور و گاه تمیزك
فاعلیتی (فعل) متعدی قیلنمق طریقله ارأه اولنور (امتلاء الاناء ماء)

قولزده اولدینی کی که (ملأء الماء) دیندکه (ماء) که معناده فاعل ایدوکی
 بیانور . (فاضل جامی) فعلی متعدی قلمغه حاجت اولیوب (امتلاء ماء
 الاناء) ترکیبی تأمل اولندقدده دخی بونده تمیزک معنأ فاعلیتی ادراک
 اولنه بیلور دیدی پس اشبو تمیز معنأ فاعل منزلنده اولدقدده فاعلک عاملی
 اوزره تقدیمی آیه جائز اولدینی ظاهر در . لکن (مبرد) و (مازنی)
 برسنه برشیء منزلنده اولمغه جمیع احکام ده اکا نمائل اولمسی لازم دکلر
 دیدیلر شو جهته ذات مقدره دن ابهامی رفع ایلیان تمیزک عاملی اگر فعل
 ویا اسم فاعل ویا اسم مفعول ایسه بونلر عملده قوی اولمسی جهته تمیزک
 بونلرک اوزرینه تقدیمی تجویز ایلدیلر . وشاعرك

اتهمجر سلمی بالفراق حیها وما کاد نفساً بالفراق تطیب

شعر نده مصراع ثانی ایله استدلال ایتدیلر که (نفساً) مؤخر (تطیب)
 فعلنک (سلمی) یه اولان نسبتده ملحوظ ذات مقدره دن ابهامی رفع ایلمکله
 تمیز واقع اولوب و عاملی اولان (تطیب) اوزره مقدم بولنمشدر دیدیلر .
 لکن شو توجیه لری عامل تا ایله تطیب اولوب سلمی یه راجع ضمیر مؤنث
 واریسه در زیرا کاد مذکر اولدیغندن شو تقدیرده (کاد) ده ضمیر شان
 اولوب و (نفساً) تطیب جمله سنده اولان ذات مقدره دن تمیز و عاملی اوزره
 مقدم اولمش اولور . واما نسخه صحیحه ده تطیب اولیوب یطییدر (یطیب) ده
 ایسه حیبه راجع ضمیر مذکر واردر شو تقدیرده (کاد) ده حیبه راجع
 ضمیر مذکر اولوب و (نفساً) کاد جمله سنده کائن نسبتده ملحوظ ذات
 مقدره دن تمیز اوله رق و عاملندن مؤخر اولمش اولور . (مفادیت) شاعر
 محبوبه سی سلمی بی فراقه راضی اولیه جفی ایله ثنا ایدوب دیور که سلمی
 محبوبندن آریله رق هجرت ایدر وشو فراقه راضی اولور می حالبو که سلمی نک
 نفسی شو فراقدن خوشنمغه قریب دکلر ویا خود نفس حیث شو آریلقدن
 خوشنوب رضا داده اولمغه قریب دکلر دیکدر .

(المستتی) منصوباتك سكرنجیسی مستتی در (مستتی) لغة عربك بر
 كیمسهی برنسنه دن صرف و منع ایلدكرنده (ثنیت فلاناً عن الامر)
 قوللرندن مأخوذ اوله رق استفعال بابندن اسم مفعولدر واصطلاح نحاطده
 مستتی منه دن مصروف اولان اسم دركه (مشترك معنوی) قیلانلر (ادات
 استنادن (الا) وبومعناده اولانلردن صكره واقع اسمدر (دیوب بعده متصل
 ومنقطع قسملرینه تقسیم ایلدیلر و (مشترك لفظی) قیلانلر (ما یطلق علیه
 لفظ المستتی) یعنی كندینه مستتی لفظی اطلاق اولان اسم ایکی قسم
 اوزرینه در بر قسمی استثناء متصلدركه (هو المخرج عن متعدد لفظاً او تقدیراً
 بالاواخواتها) دینرك تعریف اولنور و بر قسمی استثناء منقطعدركه
 (هو المذكور بعد الاواخواتها غیر مخرج عن متعدد) دینرك تعریف
 اولنور دیدیلر شوایکی قسمدن هر بریچون احكام مخصوصه اولمغله احدها
 آخردن آریله رق ذهنه وفهمه قریب اولمغیچون هر برندن آریجه بحث
 ایده جكر و مستثنای منقطعك بحثی مستثنای متصله نسبتله قلیل اولمغله
 اولاً مستثنای منقطع دن بحث ایلیه جكر (المستتی المنقطع) مستثنای
 منقطع (الا) كله سندن وصف اولمیان (غیر) و غیر معناسنه (بید)
 لفظلرندن صكره واقع اولوب ماقبلنده بر متعدددن مخرج اولمیاندر
 مثلاً (جاءنی القوم الا حماراً) قولزده (حماراً) كبی مفاد مثال بكا قوم
 كلدی آنجق حمار دكل یعنی حمار كلدی دیمكدركه حمار عدم حیثت ایله قومدن
 مستتی اولمشدر لكن حمار افراد قومدن اولیوب مفهوم حمار مفهوم قومده
 داخل اولمیا مغله بر متعدددن مخرج دكلدر و بیلمیلیدر كه بر متعدده عدم
 دخولی كاه باعتبار المرام معلوم اولور مثلاً ایچلرنده (زید) اولمیان بر جماعته
 اشارت ایدرك جاءنی القوم الا زیداً دینلده اولدینی كبی (بكاشو قوم كلدی
 لكن زید دكل) یعنی زید كلدی دیمكدركه عدم حیثت ایله زید قومدن
 مستتی اولمشدر (زید) ایسه قومده داخل اولدینی باعتبار المراد معلوم
 اولمغله متعدددن مخرج دكلدر .

خفی اولیه که مستثنای منقطع (الا) کلمه سندنصکره واقع اولوب و مستثنی منه مذکور ایسه وجوباً منصوب اولور کرک کلام موجبده اوله امثله سابقهده اولدینی کی و کرک کلام غیر موجبده اوله (ما جاء فی القوم الا حماراً) قولزده اولدینی کی و امام مستثنی (مستثنی منه) دن بدل واقع اولمق مستثنای منقطعده جائز دکلدر زیرا بدل واقع اولسه انحق بدل غلط اولور بدل غلط ایسه کلام فصاحده واقع دکلدر لکن بنو قیم مستثنای منقطعی ایکی قسمه تقسیم ایدوب اگر مستثنای منقطعك ماقبلنده براسم بولنور واسم مزبوری حذفیه مستثنای منقطعی مقامنده قائم قیلمق صحیح اولور ایسه بونده مستثنی نك مستثنی منه دن بدل قیلنمسنی تجویز ایلدیلر ما جاء فی القوم الا حماراً قولزده اولدینی کی که (حماراً) مستثنای منقطع و منصوبدر قوم دن بدل قیلنهرق مرفوع ایدیلیمسی دخی جائزدر دیدیلر و اگر ماقبلنده وجه مذکور اوزره براسم اولمزایسه بدل جائز اولما مقده ذهاب اوله یعنی بصریلر مذهبه موافقت ایلدیلر (لا عاصم الیوم من امر الله الا من رحم) آیت کریمه سننده اولدینی کی مفاد شریفی بوکونده مولی نك امر قهر و عذابندن برعاصم و اسرکیجی یوقدر انحق کندینه رحم اولنسان معصوم و مرحوملر واردر دیمکدر (من رحم) یعنی کندینه رحم اولنسان معصوم اولوب عاصمده داخل اولماغله مستثنای منقطع اولمشدر و بدل جائز اولماغله واجب النصبدر دیدیلر.

و (بیلملیدر که) اگر مستثنی منه محذوف اولور ایسه مستثنای منقطع علی حسب العوامل معرب اولور و (مستثنای مفرغ) دینلور که (مفرغله) دیمکدر زیرا مستثنی منه حذف اولندقدده مستثنی آنك مقامنده قائم اولوب علی حسب العوامل معرب اولمغله کانه (عامل) مستثنای منقطع دن ایچون مستثنی منه دن فراغت ایلمشدر لکن مستثنی منهك حذف بعد الحذف معنائك استقامت دن خروج ایلما مسنه متوقفدر کلام غیر موجبده (معنا) بعد الحذف غالباً استقامتدن آیریلمدیغندن و کلام موجبده استقامت دن خروجی غالب بولندیغندن اشبو (مستثنای مفرغ) غالباً کلام غیر موجبده واقع اولور ما جاء فی الاحمار و ما رأیت الاحماراً و ما مررت بالبحمار کی.

واما مثلاً . جاء في الاحمار . دينسه حماردن بشقه هر شيك متكلمه كلديكي افاده ايدر نو ايسه ممتنع اولمغله فاسددر واما (مستثنى منه) دن بعض معين مراد اولنه رق يعني بر جماعت معينه قصد اولنور ايسه وشو مراد اوزرده قرينه بولنور ايسه شو تقديرده صحيح اولور لكن تكلفدر واما مستثنای منقطع غير وغير معناسنه اولان بيد لفظند نصكره واقع اولور ايسه (اضافت) حسييله مجرور اولوب مستثنانك حق اولان نصب غير و بيد لفظلرنده جاری اولور . وييلمليدركه مستثنای منقطعده ادات استثنا آنجق (الا) و (غير) و (بيد) لفظلري اولوب فقط (الا) و (غير) مستثنای منقطعه خاص دكلردر لكن بيد آنجق مستثنای منقطعه خاص در و بعض بيد على معناسنه يعني استعمالا ايچون اولور ومع معناسنه دخی كلور وكهتر طعامه دخی دينور و (انا افصح العرب بيد اني من قریش) حديث شريفده (من اجل) معناسنه در شو صورتلرده ادات استثنان دكلدر .

درس ۹۳

(المستثنى المتصل) مستثنای متصل الا ويا خود خلا و عدا و ما خلا وما عدا و ليس ولا يكون وحاشا وسوى وسوى وصف اوليان غير لفظلرندن صكره واقع اولوب بر متعدددن مخرج اولاندر و (متعدد) باعتبار الجزيات ويا باعتبار الاجزاء متعدد اولمقدن اعمدر (جاءنى القوم الا زيدا) و (اشتریت العبد الا نصفه) قولمزده اولدينى كى مثال اولك مفادى (بكا قوم كلدى لكن زيد دكل) يعني زيد كلدى ديمكدر كه زيد عدم محيىت ايله قومدن مستثنى اولمشدر و زيد باعتبار المفهوم قومده داخل وقومك جزئياتنددر وباعتبار الحكم والمراد قومدن مخر جدر ومثال ثانينك مفادى (بن شو عبدى اشترا ايلدم لكن نصفى دكل) يعني نصفى اشترا ايلدم ديمكدر كه (نصف عبد) اشترا اولنما مغله (عبد) دن مستثنى اولمشدر و (نصف عبد) باعتبار المفهوم عبده داخل و (عبد) ك اجزاسنددر وباعتبار الحكم والمراد آندن مخر جدر .

خفى اوليه كه (مستثنای متصل) الا كلمه سند نصكره واقع اولوب ومستثنى منه

مذکور اوله رق کلام موجب ده اولور ایسه و جواباً منصوب اولور سبقت
ایدن مثاللرده اولدینی کی. (کلام موجب ایله مراد من) مثبت اولان یعنی
صریحاً و یامؤلاً نفی و نهی و استفهامدن خالی بولنان کلامدر. و اگر (مستثنای
متصل) الا کلمه سندن صکره واقع اولور. و مستثنی منه مذکور اوله رق
کلام غیر موجبده بولور ایسه شو تقدیرده استثنائیت اوزره منصوب اولسی
جائز اولور. لکن مستثنی منه دن بدل قلمسی دخی مختار اولور. و (بدل
مختار اولسی) زیرا مستثنانک منصوب قیلنمسی بعد تمام الکلام ورود
ایلمکده مفعوله شبیه اولدیغنددر. و اما (بدل) کندسی بالفعل اعرابه
مستحقدر. پس بدل قیلندقد رفعا و نصبا و جرأ متبوعنه تابع قیلنوب
مثلاً (ما جاءنی القوم الازید) و (مارأیت القوم الازیداً) و (ما مررت
بقوم الازید) دینور. و اگر (مستثنا منهک) لفظندن بدل قیلنمق متعذر
اولور ایسه محله حملاً بدل قیلنور. زیرا بدل مختار اولغله مهمما ممکن مختار
اولانی اجرا ایلمک موجهدر. نته کیم مثلاً (ما جاءنی من احد الازید)
و (لا احد فی الدار الا عمرو) و (ما زید شیئاً الا شیء) قوللر مزده اولدینی
کی شو مثاللرده (مستثنی) نک (مستثنی منه) ک لفظندن بدل قیلنمسی
متعذر اولغله محله حملاً بدل قیلنور. زیرا بولرده (الا) ایله نفی منتقص
اولغله (الا) دن صکره کلام مثبت اولمشدر (من) جاره استغراقیه ایسه بعد
الاثبات زائد اولمز و (ما) و (لا) کله لری ایسه نفی ایچون اولدقلرنده عامللر در
بعد الاثبات ایسه عامل اوله مزلر بدل ایسه تکریر عامل قوه سنده اولغله
(مثال اولده) (زید) مستثنی منه اولان احد لفظندن بدل قیلنسه بعد
اثبات الکلام (الا) کله سی بعدنده (زیدک) ک اوزرینه من زائد قیلنمق
لازم کله رک جائنی من زید قوه سنده اولور ایدی بعد الاثبات ایسه من زائد
اوله مز و (مثال ثانی) ده (عمرو) مستثنی منه اولان احد لفظندن بدل
قیلنسه بعد اثبات الکلام (لا) کله سنک (الا) دن صکره (عمرو) لفظنده
عامل اولسی لازم کلور ایدی (لا) کله سی ایسه بعد الاثبات عمل ایده من
و مثال ثالثده (شیء) مستثنی منه اولان (شیئاً) لفظندن بدل اولسه کذا

بعد اثبات الکلام (ما) کلمه سنک الادنصرکه (شیء) لفظنده عامل اولسی
لازم کاور ایدی (ما) کلمه سی ایسه بعد الاثبات عمل ایده من.
ومستتی منه دن ذکر اولندیفی اوزره بدل متعذر اولدقده مثال اولده (زید)
مستتی منه اولان (احد) ک محله حملاً لفظاً مرفوع اولوب (احد) دن
بدلدر (احد) ک محلی ایسه فاعلیت اوزره مرفوعدر ومثال ثانیده
(عمر و) مستتی منه اولان (احد) ک محله حملاً لفظاً مرفوع اولوب
وآندن بدلدر (احد) ک محلی ایسه ابتدائیت اوزره مرفوعدر و (مثال
ثالث) ده (شیء) مستتی منه اولان شیئاً لفظنک محله حملاً ایسه لفظاً
مرفوع اولوب و آندن بدلدر محلی ایسه خبریت اوزره مرفوعدر.

واما (لیس زید شیئاً الاشیئاً) قولزده مستتی مستتی منه ک لفظندن بدل
قینورزی راهر نقدر نفی (الا) کلمه سیله منتقض اولوب الادنصرکه کلام مثبت
اولمش ایسه ده لیس نک عملی نفی ایچون اولیوب بلکه فعلیتندن ناشی
اولمغله انتقاض نفیک لیس کلمه سنک عملنده بر اثری اولیه جقندن الا
کلمه سندن صکره عملنه بر مانع یوقدر شو جهته (لیس زید الا قائماً) ترکیبی
جائز اولوب (مازید الا قائماً) ترکیبی ممتنع اولمشد.

درس ۹۴

بیلملیدرکه اگر مستتی مستتی منه اوزره مقدم اولور ایسه بدلاک مبدل
منه اوزره تقدیمی جائز اوله میه جقندن بدلیت احتمالی بولنماغله مطلقاً نصبی
واجب اولور جائنی الازیداً القوم و (ما جائنی الازیداً احد) کی.

وبیلملیدرکه اگر مستتی منه حذف اولور ایسه مستتی علی حسب العوامل معرب
اولور و (مستثناء مفرغ) دینلور و بعد الحذف استقامت معنا کلام غیر موجبده
غالب و کلام موجبده نادر اولمغله اغلب حالده کلام غیر موجبده واقع اولور.
ما جاءنی الازید و ما رأیت الازیداً و ما مررت الازید کی و اما معنا مستقیم
اولدقده کلام موجبده دخی بولنور مثلاً (قرأت الا یوم الجمعة) قولزده
اولدینی کی که (بن اوقیدم آنحق یوم جمعه ده دکل) یعنی آنحق یوم جمعه ده
اوقیدم دیکدر متکلم یوم جمعه دن ، اعدا جمیع ایام دنیاده قرأنتی قصد

ایلمیوب بلکه مرادی یا ایام اسبوع و یا خود ایام شهر اوله جغندن شو
تقدیرده ایسه استقامت معنا ظاهر در خفی اولیه که شو در سر میزدن مستبان
اولدینی اوزره ادات استئادن اولان (الا) کله سندن صکره مستتی اگر
مستتی منه محذوف ایسه علی حسب العوامل معرب اولور و عاملی فعل
متقدمدر . و اگر مستتی منه مذکور اولور ایسه نصب جائز و بدل مختار
اولق آنجق کلام غیر موجبده اولوب و مستشای متصله خالصدر و بدل
اختیار اولدقدده عاملی مبدل منهک عاملیدر که بر اشکال یوقدر .
و شو مذکورک یعنی (استئای مفرغ) و (اختیار بدل) صورتلرینک
غیرنده مستتی مطلقا منصوبدر .

و بیلمیدر که استثنائیت اوزره منصوب اولان مستتی نک عاملنده اختلاف
اولمشدر (جمهور نحات) (الا) کله سنک توسطیله فعل متقدم و یا معنای
فعل در دیدیلر زیر فعل یا معنای فعلک منسوب الیه لرینه (مستتی) نک
دخی بر نسبت و تعلق اولغله (مستتی) نک فعل و یا معنای فعله شو جهته
تعلق معنویسی وارد و حالبو که بعد تمام الکلام اتیان اولغله مفعوله
مشاهددر .

و (بعضیلر) منادی مقدر برادعو ایله منصوب اولدینی کی مستتی دخی
متکلم وحده صیغه سیله بر مقدر (استتی) فعلیله منصوبدر دیدیلر و امام
سیوطی نکتنده (هذا هو الذی اختاره) دیمشدر .
و (زجاج) و (مبرد) (الا) کله سی (استتی) فعلی مقامنده قائم اولغله
معنای استثنای حامل اولوب الا کله سی عاملدر دیدیلر و مغنی الیبده
وهو الاصح دینلمشدر .

شوا یکی ذهاب اخیره کوره مستتی مفعول به اولق اوزره منصوبدر .
و ائمه (نحاتدن کسائی) مستتی (الا) کله سندن صکره مقدر بر ان (مشدده
مکسوره نک اسمی اولق اوزره منصوبدر و خبری محذوفدر مثلاً (جاءنی القوم
الازیداً) قولمز (جاءنی القوم الا ان زیداً لم یجئ) تقدیرنده در دیمشدر .
و (اخفش) (الا) کله سی ان مشدده مکسوره ایله (لاء) عاطفهدن
مرکبدر نون ثانیه حذف اولنوب نونک لامه قرب مخرجی اولغله نون

اولی لا کله سنک لامنه ادغام اولمشدر پس (الا) کله سنک نصره (منصوب اولان اسم ان کله سیله منصوب اولور والا کله سنک ماقبلنه تابع قلان اسم (لاء) عاطفه ایله تابع قیلنور دیشدر فقط شو ذهاب و جوه کثیره ایله تزییف اولمشدر .

و (بعضیلر) بعد تمام الکلام ورود ایلمکله مفعوله شبیه اولمشدن منصوبدر نته کم اسم مبهم تامک تمیزی دخی شو جهتله منصوب قیلنمشدر دیدیلر (والبحث فی المطولات) .

درس ۹۵

خفی اولیه اگر مستثنی خلا و عدا و ماخلا و ماعدا و لیس و لایکون لفظلرند نصره واقع اولسه وجوباً منصوب اولور زیرا خلا و عدا فعلدر . فی الاصل (خلا) کله سی فعل لازمدرکه مفعوله من واسطه سیله تعدی ایدر عربک (خلت الدار من الانیس) قوللری کبی و بعض جاوز معناسی تضمین ایدرکه متعدی اولور وگاه (من) حذف اولنوب و فعل مفعولنه متصل قلنوب بنفسه متعدی اولور باب استثناءه تضمین و حذف و ایصال التزام اولنسی مابعدلری (الا) کله سیله مستثنی اولان کبی منصوب بولنسون ایچونددر .

واما (عدا) جاوز معناسنه فعل متعدیدر باب استثناءه خلا و عدانک فاعللری تحتارنده مستتردر فعل متقدمک مصدرینه و یا فعل متقدمدن اسم فاعله راجعدر و ما بعدلرنده مستثنی مفعول بهلری اولغله منصوبدر و شو جمله حالیت اوزره منصوبدر و (قد) کله سی ظاهر اولماسی باب استثناءه اصل اولان (الا) کله سنه مشابهلری زیاده جه اولسون ایچونددر مثلاً (جاءنی القوم خلا زیداً) قولمز (جاءنی القوم خلا محیهم) او (الجائی منهم) زیداً تقدیرنده درکه بکا قوم کلدی حالبوکه کملری و یا کلنلری (زید) دن خالی اولدی مفادنده اولوب یعنی زید کلدی دیمکدر و (جاءنی القوم عدا زیداً) قولمز جاءنی القوم عدا محیهم (او) الجائی منهم زیداً تقدیرنده درکه مفادی معلومدر .

وما خلا وما عدا لفظ لرنده ما مصدریه در که افعاله مختص در و خلا و عدا ذکر اولدینی اوزره فعللر در باب استناد فاعلاری تحتلرنده مستدر فعل متقدمک مصدرینه و یا خود فعل متقدمدن اسم فاعله و یا خود (مستثنی منه) راجعدر و ما بعد لرنده مستثنی مفعول بهلری اولمغله منصوبدر و شوجمله تأویل مصدرده (وقت) تقدیر یله ظرفیت اوزره منصوبدر و (یا خود) مصدر اسم فاعل معناسنه اخذ اولنه رق حال قلنور مثلاً جائنی القوم ما خلا زیداً قولمز (جائنی القوم خلوزید) (ای) وقت خلوهم من زید (او) وقت خلو محییهم من زید (او) وقت خلوا جائی منهم من زید تقدیرنده در و یا خود جائنی القوم خالیاً من زید او خالیاً محییهم من زید او خالیاً الجائی منهم من زید تقدیرنده در مفاد مثال بکا قوم کلدی زیددن خالی اولدقلری وقتده و یا کلملری و یا کلنلری زیددن خالی اولدینی وقتده دیمکدر و یا خود بکا قوم کلدی زیددن خالی اولدقلری حالده و یا کلملری و یا کلنلری زیددن خالی اولدینی حالده دیمکدر که قوم کلوب لکن زیدک کلدیکنی مفیددر و (جائنی القوم ما عدا زیداً) قولمزده دخی بوقیاس اوزره تقدیر و توجیه تأمل اولندقدده ظاهر در .

ولیس ولایکون افعال ناقصه دندر اسملری باب استناد و جواباً اضمار اولنور فعل متقدمدن اسم فاعله راجعدر و ما بعد لرنده مستثنی خبرلری اولمغله منصوب اولوب و جملهلری حالت اوزره محلاً منصوبدر مثلاً (جائنی القوم لیس زیداً) قولمز جائنی القوم لیس الجائی زیداً تقدیرنده در که بکا قوم کلدی حالبو که کلان زید دکلدر دیمکدر .

ولیس یرنده لایکون ثبت اولنسه کذا تقدیر و توجیه بویله در .
(خفی اولیه که) شوکلهلر مستثنای متصلدن غیر مفرغه مختص لردر وادات استنادن اولان (الا) کلهسی مقامنده قائم بولندقلرندن هرکز تصریف اولنملر و ما بعد لرنده مستثنی مفعول به و یا خود خبر اولیق اوزره منصوب اولوب استثنائیت اوزره منصوب اولدیغندن مانحن فیه مزدن دکل ایسه لرده فقط باب استناد تکمیللاً للبحث ذکر اولنورلر .

لکن بعض متأخرین نجات بونلر باب استناد مستعمل اولدقلرنده (الا)

معناسنده اولور لر توجیه کلامده بر طاقم تکلفات ارتکابه حاجت یوقدر دیدیلر .

واقعا اولیه ایسهده لکن نحاتک توجیه مذکور لری اصلارینه مجرد رعایت و تطبیق مقام ایله تمرین مبتدیان خام و تفهیم مرام و مابعد لرنده مستثنی نك وجوباً منصوب اولسنك وجهی افهام ایچوندر فافهم

درس ۹۶

واکر مستثنی حاشا لفظندنصکره واقع اولسه عندالا کثر حاشا حرف جر اولغله مستثنی مجرور اولور واما عند الاقل حاشا فعل اولغله خلا وعدا حکمندهدرکه مابعدنده مستثنی منصوب اولور مثلاً (ضرب القوم عمرواً حاشا زیداً) دیرسک برأ الله زیداً عن ضرب عمرو وبعضیلر خلا وعدانک دخی حرف جر اولسنه ذاهب اولدقلرندن بونلره کوره خلا وعدادنصکره دخی مستثنی مجروردر واکر مستثنی غیر لفظندنصکره واقع اولسه اضافتله مجرور اولور واعرایی غیر لفظی اوزره جاری اولوب پس غیر لفظی (الا) ایله مستثنی اولان حکمنده اولور لکن غیر لفظنک ادات استنادن اولسی مجرد ماقبلنک مابعدینه مغایر اولسنده (الا) اوزره حمل اولدیفندن اولوب ادات استثنا اولیهرق صفت واقع اولسی اکثردر جائی رجل غیر زید ورایت رجلاً غیر زید ومرت برجل غیر زید کبی .

واکر مستثنی فتح ویا ضم سین ایله وقصر یله (سوی) ویاخود فتح ویا کسر سین ایله ومدیله (سواء) لفظندنصکره واقع اولسه کذا اضافتله مجرور اولور فقط (سوی) و (سواء) سیدویه عندنده لازم الظرفیت اولوب قصر یله سوی تقدیراً ومدیله سواء لفظاً ابتدا منصوبلردر زیرا فی الاصل مکان معناسنه درلر بعده برنسنه دن بدل مفاد ایچون وبعده استثنا ایچون استعاره اولدیلر پس جائی القوم سوی زید او سواء زید قولمز جائی القوم مکان زید مفسادنده درکه بکا زیدک یرینه یعنی اکا بدل قوم کلدی دیمکدرکه بکا قوم کلدی لکن زید کلدی مقامنده مستعملدر .

لکن کوفیلر بونلری لازم الظرفیت کور مدکلرندن بعض (غیر) معناسنده

اولوب ظرفیت دن خروج ایدرلر و کندیلرده رفعا و نصبا و جراً تصرف
جائز اولور دیدیلر و شاعرك .

فلما صرح الشرفامسى وهو عريان ولم يبق سوى العدوان دناهم كادانوا

شعرنده مصرع ثانیده و (لم يبق سوى العدوان) قوليله استدلال ایلدیلر که
سوی غیر معناسنه اولوب و تقدیراً مرفوع لم يبق فعلنك فاعلیدر (مقادیبت)
وقتا که شریعی سیف قاطع آچیقنوب و عریان اولدیغی حالده اخشاملدی
یعنی قینندن چیقاریلوب جیلاق اولدی وعداوتدن غیرى برشى قالمدی
پس آنلر بزه جزا ایلدیکی کبی بزه آنلره جزا ایلدك دیمکدر .

واما نحاحات دن (اخفش) سوی و سواء کلمری لازم الظرفیت اولدقلرندن
هر نقدر ظرفیت دن اخراج اولنسه لرده ینه نصب اوزره بولورلر دیمشدر
نته کیم (لقد تقطع بینکم) آیت کریمه سنده بین کلمه سی لازم الظرفیت اولمغه
هر نقدر تقطع فعلنك فاعلی ایسه ده نصیله اوقتمشدر .

درس ۹۷

خفی اولیه که (غیر) لفظی بعض ادات استنا اولان (الا) کلمه سی اوزره
حمل اولنوب ادات استنادن اولدیغی کبی ادات استنادن (الا) کلمه سی دخی
بعض استنا متعذر اولان محالرده (غیر) لفظنه حمل اولنهرق (غیر)
معناسنه اوله رق صفت اولور .

فقط (الا) کلمه سی حرف اولوب اعرابه قابل اولما مغه موصوفك اعرابه
موافق اوله رق اعرابی مابعدنده اولان اسم اوزره جاری اولور .
واستثنا متعذر اوله رق (الا) کلمه سی غیر معناسنه صفت قیلنمی غالباً مثلاً
رجال وقولم ورهط کبی افراد متعددی دال والف لام عهد واستغرا قیله
غیر معرف اولان یعنی نکره و غیر محصور بولسان برکله دن صکره واقع
اولدقده در . (جاءنی فوارس الازید) و (جاءنی قوم الازید) عهد واستغراق
ایچون اولیه رق الف لامیه مثلاً (جاءنی الرجل الازید) کبی

شومثالرده (الا) کلمه سی غیر معناسنه صفت اولوب واستثنا متعذر در زیرا
(الا) کلمه سنک مابعدنده اولان (زید) ک الا کلمه سنک ماقبلنده داخل
اولوب اولدینی نامعلومدر .

ونته کیم (لوکان فیهما آلهة الا الله لفسدتا) آیت کریمه سنده اولدینی کبی که
الا غیر معناسنه صفتدر ولفظة جلاله نك یقینا (آلهه) ده عدم دخولندن
ایچون شرط استثنا بولمیوب استثنا متعذر اولمشدر . آیت کریمه نك مفادمنینی
ا کر یرده وکوکده الله عظیم الشانک غیری اله لر اولسه ایدی یروکوک
فساده کیدر یعنی انتظامدن حیقشر ایدی دیمکدر جناب مولانک غیری
اله اولمدقه النهه نك عدم تعددی ضروریدر . زیرا تعداد مغایرتی استلزام
ایلر واکر آیت ککریمه ده الا کلمه سی استثنا ایچون اولسه مفادی یرده
وکوکده الله عظیم الشان ایچلرندن مستثنی اوله رق اله لر اولسه ایدی
یر وکوک انتظامدن حیقشر لر ایدی دیمک اولور بوا یسه ایچلرندن مولای
متعال مستثنا اولیه رق اله لرک وجودینی موهم اولوب آیت کریمه دلیل
وحدانیت اوله مز ایدی . اشته آیت کریمه ده شو جهتله دخی استثنا
متعذر در . خفی اولیه که بعض (الا) کلمه سی جمع منکور غیر محصوردن
صکره واقع اولوب فقط استثنا متعذر اولمز . نته کیم شاعرك قدرای
ناراً رجال فی الدجا راقبا الاجبانا مرتجا شعرنده اولدینی و بعض جمع
منکور غیر محصورک غیرندن صکره واقع اولوب واستثنا متعذر اولور
جانی مائة رجل الازید کبی غیر زید دیمکدر و خفی اولیه که سیویه مع صحت
الاستثناء الالبک صفت وقوعنی تجویز ایلمش ومثلاً ما اتانی احد الازید
قولزده استثنا متعذر اولیوب صحیح ایکن (الا) غیر معناسنه صفت اولوب
مابعدنده زید مرفوع قیلنمق چاژدر دیمشدر واکثر متأخرین سیویهک
اشبو رایی قبول ایلدیلر وعمر وبن معدی کربک

وکل قرینه قرنت باخری وان حیث بها ستفترقان
وکل اخ مفارقه اخوه لعمرأ بیک الا الفرقدان

شعرنده الا الفرقدان قولیه استدلال ایلدیلر که الا غیر معناسنه صفتدر

موصوفی کل اخدر و حالبوکه استئنا متعذر اولیوب صحیحدر واکر مع القطع النظر عن النظم استئنا قلنسه الا لفرق دین دینور ایدی . زیرا کلام موجب تامده الادنصکره مستئنا منصوبدر لیکن بوکا شاذدر دینهرک جواب ویرلمشدر (مفادیت) شو دنیاده هر بر نفس مقرونه که آخر بر نفسه مقارن ورفیق اولمشدر . البته انلر قریباً مفترق اولورلر که یعنی محبت ورفاقتلرینه البته بر زوال و انتها که جکدر وهر برادر آندن مفارقت ایلیان برادریدر که یعنی بر آراده پایدار اوله منزلر بقاء پدر که قسم ایدرم که شو ذکر اولنسان حالت بیان اولندیغی وجه اوزره انحق فرقدان دینلان ایکی یلدز مستئنادر که انلر دنیا طور دجقه برابر کز لر وبری برندن آیر یلمز لر دیمکدر .

درس ۹۸

(خبر کان و اخواتها) منصوباتک طقوزنجیسی کان و اخواتک یعنی افعال ناقصه نک خبریدر که (هوالمسند بعد دخولها) دینهرک تعریف اولنور یعنی کان و اخواتندن برینک دخولندن صکره مسند واقع اولان کلهدر دیمکدر کان زید قائماً قولزده قائماً کبی و بونک حکمی مبتدآنک خبری کبی در که مفرد و جمله و معرفه و نکره واقع اولور . و واحد و متعدد و محذوف و مذکور اولور ، و جمله اولدقده اسمنه کنندیغی ربط ایده جک بر ضمیره محتاجدر و اسمی نکره و کنندیغی ظرف اولدقده و جواباً مقدم اولور کان فی الدار رجل کبی حاصلی خبر مبتداده ذکر اولنان احوال بونده دخی جاریدر لیکن کان بابینک خبری معرفه و یا نکره مخصوصه اولدقده هر تقدیر اسمی دخی کذا معرفه و یا نکره مخصوصه اولسهده اعراب ایکیسنده و یا برنده لفظی بولندجقه اسمنک اوزرینه تقدیمی جائزدر (کان المنطلق زید و کان الفتی زید) و کان هذا زید قوللر مزده اولدیغی کبی و اما مبتدا ایله خبر معرفتین و یا خود متساویتین فی التخصیص اولسهلر مبتدآنک تقدیمی واجبدر که شو حکمده کان بابینک خبری خبر مبتدادن ممتاز اولمشدر . زیرا مبتدا ایله خبر اعراب رفعده متفق اولدقلرندن صورت مذکورده

دفع التباس ایچون، مبتدای تقدیم واجب در واما کان بابنک اسمی مرفوع
و خبری منصوب اولغله التباس اولیوب اسمنی تقدیم واجب دکلدر شو
جهتله اگر کان بابنک اسم و خبرنده اعراب لفظاً متقی اولسه دفع التباس
ایچون اسمنی تقدیم واجب اولور کان موسی الفتی وکان الفتی هذا وکان
هذاذاک کی .

(و خفی اولیه که) افعال ناقصه دن کان کثرت استعمالندن ایچون بعض
جوازا حذف اولنور بوده اکثر ان ولو وصلیه و شرطیه لردنصکره وقوع
بولور لارتحان وان راجلاً و لندرکن زیداً و لوفارساً کی که لارتحان وان
کنت راجلاً و لندرکن زیداً و لوکان فارساً تقدیرنده در ودخی لافعلن کذا
ان خیراً و لاحذرن منه لوشرأ کی که لافعلن کذا ان کان خیراً و لاحذرن
منه لوکان شرأ تقدیرنده در کان مع اسم حذف اولمشدر زیرا ان و لولفظاً
و یا تقدیراً فعل اوزره داخل اولور لر شو جهتله وقرینه مقام ایله کان
محدوف ایدوکی ظاهر در .

وهرقنی ترکیب که ان شرطیه ایله مصدر اولوب وبعده براسم وبعده فاء
جزا ایله مصدر براسم ذکر اولنه بونده درت وجه جائزدر مثلاً الناس
مجزیون باعمالهم ان خیراً فخیر کی وان شرأ فشر کی (وجه اول) اولکنک
نصبی وایکنجینک رفعیدر ان خیراً فخیر کی تقدیر کلام ان کان عمله خیراً
فجزاؤه خیردر اولکی مع اسمیه محدوف برکان نک خبری اولمق اوزره
منصوب وایکنجی مبتدای محذوفک خبری اولمق اوزره مرفوعدر (وجه
ثانی) ایکسینک دخی نصیدر (ان خیراً فخیراً) کی تقدیر کلام ان کان
عمله خیراً فکان جزاؤه خیرآدر ایکسی دخی مع اسمیه محدوف برکان نک
خبری اولمق اوزره منصوبلردر (وجه ثالث) ایکسینک دخی رفعیدر ان
خیر فخیر کی تقدیر کلام ان کان فی عمله خیر فجزاؤه خیردر اولکی مع
خبره محدوف برکان نک اسمی اولمق اوزره وایکنجی مبتدای محذوفک
خبری اولمق اوزره مرفوعلردر .

وجه رابع اولکنک رفعی وایکنجینک نصیدر ان خیر فخیراً کی تقدیر
کلام ان کان فی عمله خیراً فکان جزاؤه خیرآدر اولکی مع خبره محدوف

بر کان نك اسمی اولق اوزره مرفوعدر وایکنجی مع اسمه محذوف
بر کان نك خبری اولق اوزره منصوبدر اشبو و جوه اربعه دن الك اقواسی
وجه اول والك اضعفی وجه رابعدرکه حذفك کثرت و قلتنه کوره درجه
ضعف و قوتلری بیلنور و (ان شراً فشر) ده دخی اشبو و جوه اربعه
جاریدر . تأمل

ویلملیدرکه هر قننی محله کان حذف اولنوب و آندن عوض زائده بر
(ما) لفظی کتور لسه عوض ایله معوض عنه یینی جمع ایلمك لازم کلامك
ایچون بعد اتیان العوض کان نك حذفی واجب اولور (اما انت منطلقاً
انطلقت) کبی اصلی (لان کنت منطلقاً انطلقت) در ان مصدریه وان
مشدده مفتوحه دن لام جاره نك حذفی قیاسی اولغله بوراده ان مصدریه دن
لام حذف اولمشدر بعده لاجل الاختصار کان حذف اولنوب و ضمیر
متصل منفصل اولمشدر زیرا بحثنده کله جکی اوزره ضمیر متصلک عاملی
حذف اولندقدده ضمیر متصل بالضروره منفصل قلنور پس حذف اولنان
کان دن عوض اوله رق زائده بر (ما) لفظی کتور لمش ونونك میمه قرب
مخرجی اولغله ان مصدریه نك نونی میمه قاب اولنوب و (ما) لفظنك میمنه
ادغام اولمشدرکه (اما انت منطلقاً انطلقت) اولمشدر . شو تقدیرده اما
انت منطلقاً جمله سی تأویل مفرد و حکم مصدرده اوله رق لام مقدره ایله
مجرور اولوب محلاً منصوب انطلقت فعلنك مفعول لهیدر و شو توجیه
(اما) کله سی همزه نك فتحیه اولدقدده در .

واما کسر همزه ایله اولدقدده لام مقدر اولیوب اصلی (ان کنت منطلقاً
انطلقت) درکه کان حذف اولنوب و ضمیر متصل منفصل اولمشدر و حذف
اولنان کان دن عوض اوله رق زائده بر (ما) لفظی کتور یلوب و ان
شرطیه نك نونی (ما) لفظنك میمنه ادغام اولمش اما انت منطلقاً انطلقت
اولمشدر بوکا کوره اما انت منطلقاً جمله سی فعل شرط و انطلقت جمله سی
جزاء شرطدر .

(اسم باب ان)

منصوباتك اونجیسی ان بابنك اسمیدرکه (هوالمسند الیه بعد دخولها) دینهرک معروف در ان زیداً قائم قولزده زیداً کی و بونك حکمی مبتدآنك حکمی کیدر فقط بونك حذفی جائز اوله من مکرکه ضروره شعریه دن ایچون اوله و برده خبری هر نقدر معرفه اولسه ده کنندینك صرف نکره واقع اولسی جائزدر

درس ۹۹

(اسم لانی الجنس) منصوباتك اون برنجیسی لانی الجنسك اسمیدرکه (هوالمسند الیه بعد دخولها) دینهرک معروف در خفی اولیه که لانی الجنسك مدخولی اوچ قسم اوزه در قسم اول معرب و لانی الجنس ایله منصوب درکه لانی الجنسك اسمیدر فقط بوده اوچ شرطك وجودی عندنده در شرط اول لانی الجنسی ولی ایتملی یعنی انك عقبنده واقع اولوب آراده برشی آخر ایله فصل واقع اولماملیدر شرط ثانی ومع هذا نکره اولملیدر شرط ثالث ذکر اولنسان شرطین ایله بیله مضاف ویاخود مضافه مشابه اولملیدر (شبیه مضاف) ایله مراد مابعدنده برشیده عامل اولوب وتمامیتی اول شی ایله اولان اسمدر

اشبو شروط ثلثه نك وجودی عندنده (لا) نك اسمی لفظاً ویا تقدیراً منصوب اولور (لا غلام رجل . ولا فتا عمر و حاطر) و (لا عشرین درهما لك) و (لا خیراً من زید عندك) قوللرمزده اولدینی کی قسم ثانی لانی الجنسك دخولندن اول حالت نصبده حرکه و حرف دن نه ایله منصوب ایسه لانی الجنسك دخولندنصکره ینه اول حرکه ویا حرف اوزره یعنی علی ماینصب به مبنی قیلنور و محلاً منصوب لانی الجنسك اسمیدر دینور واشبو علی ماینصب به مبنی قیلنه جق (مدخول لا) نك شرطی كذا اوچدرکه لانی الجنسك متصل اولمی یعنی آنی ولی ایتملیدر و نکره اولملیدر و برده مفرد اولمی یعنی مضاف و مضافه شبیه بولنماملیدر بو بایده دخی مفرد شو جهتله تشیه و جمعه شاملدر لارجل فی الدار و لا غلامین لزید و لامسلمین

فی البلدة ولا مسلمات فیها قوللرمزده اولدینی کی خفی اولیه که نصبی الف
ایله اولان اسماء سته معتله همیشه مضاف بولدقلرندن لالنی الجنسک مدخولی
اولورلر ایسه قسم اولده داخل اولورلر مثلاً لا ابازید ولا اخاعمر و حاطر
کی اشبو قسم ثانیده علی ماینصب به مبنی قیلنه جق لفظ مفرد ایسه فتح
وتثنیه و جمع ایسه یا و جمع مؤنث سالم ایسه کسر اوزره منصوب اولور اشبو
قسمک مبنی اولسی من جاره استغراقیه بی متضمن اولدیغنددر مثلاً لارجل
فی الدار قولمز لامن رجل فی الدار مفادنده در و برده مثلاً لارجل فی الدار
قولمز حقیقه و یا تقدیراً هل من رجل فی الدار کی بر استفهام جوابنده
واقع اولسی ملحوظدر که شو قسمده من جاره استغراقیه کانه هر حالده
وار ایشده لاجل التخیف حذف اولمش قوه سنده در اشته مبنی اولسی
حرفی متضمن اولسندن ایلری ککشددر و علی ماینصب به مبنی قیلنمی
فی الاصل مستحق اولدینی حرکه و یا حرفه بناسی موافق اولسون ایچون در
واما قسم اولک یعنی مضاف و یا مضافه شیه اولانک مبنی قلنامسی اسمده
اصل اولان اعراب اولوب و اضافت جانب اسمیتی مرجح اولدیغنددر
خفی اولیه که اسماء سته دن (ذو) نك ماعداسی کاه مفرد و غیر معتله واقع
اولورلر که لالنی الجنسک مدخولی اولدقلرنده قسم ثانیده داخل اولورلر
لاب لزید ولا اخ له کی . و معلوم اوله که لاب لزید ولا غلامین له ولا
مسلمین له قوللرمز امثالی معنای اختصاصی مفید اولمقده مضافه مشابه
اولدقلرندن کاه مثلاً لاب لزید قولمزده الف ایله لا ابالزید و غلامین له
ولا مسلمین له قوللرمزده تثنیه و جمع نونلری اسقاط اولنوب لا غلامی له
ولا مسلمی له دینور که معرب اولورلر

و شو صروده تراکیب مذکورده اولان لامه لام اضافت دینور لکن
شو حالده حقیقه مضاف دکلددر زیرا اضافت تقدیرنده معنا فاسد اولور
چونکه بلا اضافت مثلاً لا ابالزید ولا غلامی له قوللرمز ایله مراد جنس
اب و جنس غلامینک ثبوتی زیددن نفی ایلمکدر شو حالده (لزید) و (له)
ظرف مستقر اوله رق خبر اولور
آریجه تقدیر خبره احتیاج مس ایلمز و اما حقیقه مضاف اولورلر ایسه

شو تقدیرده لام زائده اولمش اولور و ترکیب مزبور لر لاابازید و لاغلامیه دیمک اولور شو تقدیرده برخبر تقدیرینه احتیاج مس ایلر و خبرلری بلاقرینه حذف اولنق لازم کلوب لاابازید موجود و غلامیه موجودان دیمک اولور

حالبوکه لاابا لزید و لاغلامی له ایله مراد جنس اب و غلامینک زیده ثبوتی نفی اولوب یوخسه اب معلوم و یا غلامین معلومینک وجودنی نفی اولمامغله فرق و فساد معنی ارباب ذکایه غیر خفی در واشو رأی شیخ ابن حایب حضر تلیسینکدر .

واما جمهور نحات عندنده لاابا لزید و لا غلامی له و لامسملی له قوللریمز فی الاصل لاابا زید و لاغلامیه و لامسملیه اولوب اضافنده مقدر اولان لامی تاکید ایچون بین المضاف و المضاف الیه برلام ادخال اولنه رق لاابا لزید و لا غلامی له و لامسملی له اولمشدر پس حقیقه مضاف لردر دیدیلر حالبوکه اضافه تقدیرنده فساد معنا بیلندی .

درس ۱۰۰

(قسم ثالث) لالنفی الجنس مکرر واقع اولوب رفع و تکرری واجب اولان مدخولیدر اشبو رفع و تکریرده مدخول لایا معرفه اولدقده و یا خود آراده برشی ایله فصل اولنه رق لالنفی الجنس ولی ایتمدکده در اشبو قسم التی وجه اوزره متصوردر .

(اولکیسی) مدخول لامعرفه و مفرد اولمقدر لازید فی الدار و لاعمروکی .
(ایکنجیسی) مدخول لامع الاضافه معرفه اولمقدر لاغلام زید و لاعمرو کی .

(اوچنجیسی) مدخول لامعرفه و مفرد اولوب فقط لالنفی الجنسی ولی ایتیموب آراده فصل واقع اولمقدر لافی الدار زید و لاعمروکی .

(دردنجیسی) مدخول لامع الاضافه معرفه اولوب فقط لالنفی الجنسی ولی ایتیموب آراده فصل واقع اولمقدر لافی الدار غلام زید و لاعمروکی .

(بشنجیسی) مدخول لانکره و مفرد اولوب لای ولی ایتیمهرک آراده فصل واقع اولمقدر لافی الدار رجل و لا امرأه کی .

(التنجیسی) مدخول لامع الاضافة نكرة اولوب لای ولی ایتیهرك اراده فصل واقع اولمقدر لای الدار غلام رجل ولا امرأة کبی .

اشبو قسم ثالثده لالنی الجنس عامل اولیوب مابعدنده اسم ابتدائیت اوزره مرفوعدر و (خبر) مبتدأ نك اولوب لالنی الجنسك دكلدر زیرا لالنی الجنس ضعیف العمل اولمغله معرفده تأثیر ایلیمز و مفصولده دخی مع الفصل مؤثر اولمزمز . و (یلملیدرکه) اسم مزبورك تکریری ایله مراد تکریر شخص یعنی ثانی عین اول اولمق دكلدر بلکه مطلقاً بر تکریر درکه تکریر نوعیدر . و (شو تکریرك واجب اولمسی) زیرا مثلاً معرفده (لازید فی الدار ولا عمرو) قولمز حقیقه و یا تقدیراً ازید فی الدار ام عمرو کبی براسـتفهام جوابنده و مثلاً نکرده لای الدار رجل ولا امرأة قولمز کذا حقیقه و یا تقدیراً ارجل فی الدار ام امرأة کبی براسـتفهام جوابنده واقع اولمغله جواب سؤاله مطابق اولسون ایچون سؤالده اولدینی کبی جوابده دخی تکرار ملترمز اولمشدر و (معرفه) ده لزوم تکریره بر دلیلده بودرکه لالنی الجنس نفی آحاد ایچون وضع اولمشدر بوا یسه آنجق اجناس اوزره دخولنده متصور اولور پس معرفه اوزره داخل اولدقده بونده آنجق نفی مفرد متصور اولوب نفی آحاد بولنما مغلله معنای موضوع لهی فوت اوله جفتدن جبراً لمافات تکریر التزام اولمشدر .

واما عربك (قضية ولا ابا حسن لها) قولاری که ابا حسن لالنی الجنسك مدخولی اولوب و معرفه در و مع هذا تکریر بولنما مشدر بونی بر نکره ایله تأویل ایدرز مثلاً (مثل) لفظی تقدیر ایله قضية لا مثل ابی حسن لها تقدیرنده کوریرز مثل لفظی ایه ایهامده توغلندن اضافتله تعرف ایده مامکله همیشه نکره در پس قسم اول منزلنده اولور .

ویا خود (ابا حسن) ی فیصل بین الحق والباطل ایله تأویل ایدرز قضية لا فیصل بین الحق والباطل لها قومه سنده کوریرز که قسم ثانی منزلنده اولور . (ابا حسن) حضرت امام علی رضی الله تعالی عنه و کرم الله وجهه افندمرك کنیه سیدر بین الصحابه بر امر مهم واقع اولور و حضرت حیدر کرار بولنمیهرق متحیر بولندقلرندم (قضية ولا ابا حسن لها) دیرلر ایدی یعنی

شور بر قضیه در که آنکی چون بر ابوالحسن یوقدر یعنی آئی حل ایتیه مقتدر
 وحق ایلله باطل یتنی فصل ایلر بوراده بر ذات یوقدر دیمکدر پس بین
 العرب والعجم ضرب مثل اولوب ینلرنده بر امر مهم واقع اولور و آئی
 حل ایدر بر ذات بولنیه رق عاجز و متحیر قالنور ایسه ضرب مثل ایدر لر .

درس ۱۰۱

حق اولیه که سبقت ایدن در سار مزدن فهم اولنه جنی اوزره لالنی الجنسک
 اسمی اولان ایکی قسم در که بر قسمی معرب و بر قسمی علی ماینصب به مبنی در .
 لالنی الجنسک معرب اولان اسمک توابی بالاتفاق معرب در که (صفی)
 لفظنه حمل اولند قدده لفظاً منصوب و محله حمل اولند قدده لفظاً مرفوع اولور
 لاغلام رجل ظریفاً و ظریف کبی و (تأکید) لفظنه تابع اولوب انحق
 منصوب در لاغلام رجل غلام رجل کبی و (معطوف) نکره ایسه لفظنه
 و محله حمل و عطف اولنه بیلور لاغلام رجل وامرأة و امرأة ولاغلام
 رجل و غلام امرأة و غلام امرأة کبی و اگر معرفه ایسه لالنی الجنس معرفده
 عامل اوله میه جغندن آنحق محله حمل و عطف اولنوب مرفوع اولور
 لاغلام رجل و عمر و لاغلام عمرو و الفرس کبی و (عطف) بیان تأکید
 کبی در و (بدل) معطوف کیدر .

واللنی الجنسک مبنی اولان اسمک توابی اگر تابع صفت اولوب وصفده
 مفرد اولور و بلا فاصله متبوعی ولی ایلر و اول مرتبه ده بولنور ایسه
 متبوعی کبی فتح اوزره مبنی اولسی و متبوعک لفظنه و یا محل قرینه حملاً
 معرب اوله رق منصوب قلنمسی و محل بعیدینه حملاً معرب اوله رق مرفوع
 ایدیلمسی یعنی شو اوچ وجه جائزدر لارجل ظریف و ظریفاً و ظریف
 کبی و اما صفی مفرد اولیوب مضاف و یا مضافه مشابه بولنسه و یا خود متبوعی
 ولی ایتیموب مفصول اولسه و یا خود صفی متعدد واقع اولوب صفت اولک
 ماعداسی بولنر معرب اولوب متبوعک لفظنه حملاً منصوب و محله حملاً
 مرفوع اولور لر لارجل حسن الوجه و حسن الوجه و لارجل فی الدار ظریف
 و ظریفاً و لارجل ظریف کریم و کریماً کبی .

و (اکر تابع معطوف) ایسه شو صورتده اکر معطوف نکره اولوب ولا
لنی جنس اعاده اولنماش ایسه معرب اولوب متبوعنک لفظنه حملاً منصوب
ومحلنه حملاً مرفوع اولور نته کیم شاعرنک .

ولاب وابناً مثل مروان وابنه اذا هو بالمجد ارتدى وتأزراً

شعر نده واقع اولدینی کی که وابناً لفظاً منصوب اوله رق لانی جنسک اسمی
(اب) اوزره معطوفدر ومحلنه عطف اوله رق (وابن) دیمک دخی
جائزدر (مفاد شعر) مروان ومخدومی ردالینی کینوب وقوشاندقلرنده
مروان کی بریدر ومخدومی کی برمخدوم یوقدر دیمکدرکه شبحالده عذیم
المثل اولملریله مدح وثنادر واکر (معطوف معرفه اولور ایسه) انحق
متبوعنک محلنه حملاً مرفوع اولور لاغلام لك والفرس کی. و (اکر معطوف
نکره اولوب) ولانی جنس اعاده اولنور ایسه مثلاً (لاحول ولاقوة
الابالله) قول شریفنده اولدینی کی شـو ترکیب نمونده بش وجه جائزدر
(وجه اول) کرك (لاحول) وکرك (لاقوة) ده اولان (لا) کلمه سی
نی جنس ایچون اولان (لا) اولوب (حول) و (قوة) لانی جنسک
اسمی اوله رق فتح اوزره مبنی اولمیدر (لاحول ولاقوة الابالله) کی
ثانی اول اوزره عطف مفرد علی المفرد ویاخود عطف جمله علی الجملة قیلند
اوله رق معطوفدر لاحول ولاقوة موجود الابالله ویاخود لاحول الابالله
ولاقوة الابالله تقدیرنده در .

(وجه ثانی) اولکی (لا) کلمه سی نی جنس ایچون اولان (لا) اولوب اسمی
فتح اوزره مبنی وایکنجی (لا) کلمه سی تأکید نی ایچون زائد اولوب
ومدخولی اولکی لا کلمه سنک اسمنه معطوف اوله رق لفظنه حملاً معرب
ومنصوب اولمیدر زیرا فتحه بنا اعراب نصبه مشابه اولغله اکا محمول
اولان منصوب اولور (لاحول ولاقوة الابالله) کی .

(وجه ثالث) اولکی (لا) نی جنس ایچون اولان (لا) اولوب اسمی فتح
اوزره مبنی وایکنجی (لا) تأکید نی ایچون زائد اولوب ومدخولی اولکی

(لا) نك اسم منه معطوف اوله رق و محلنه حملاً معرب و مرفوع اولم سیدر
(لاحول ولاقوة الابالله) کبی .

(وجه رابع) ابغیر الله حول و قوۃ دیو بر استفهام جوابنده واقع اولمی
ملاحظه سیله جواب سؤاله مطابق اولمی اوزره ایکیسی دخی مرفوع
اولم سیدر (لاحول ولاقوة الابالله) کبی .

(وجه خامس) اولکی (لا) کله سی لیس یه مشابه بولنان (لا) اولوب اسمی
مرفوع و ایکنجی لا کله سی نفی جنس ایچون اولان لا اولوب اسمی فتح
اوزره مبنی اولم سیدر (لاحول ولاقوة الابالله) کبی اشبو وجه لردن اک
اقواسی وجه اولدر واک ادناسی وجه خامس در .

و (اگر تابع تأکید لفظی) و یابدل اولوب مفرد و نکره اولسه لر متبوعا رینه
مناسبة فتح اوزره مبنی اولور لر (لاماء ماء بارداً) و (لارجل صاحب لی)
کبی و (اگر) معرفه اولور لر ایسه ایکی وجه یعنی رفع و نصب جائز اولور
(لاماء ماء و ماؤک) و (لارجل صاحبک) و (صاحبک) کبی .

و (اگر تابع تأکید) معنوی و یاعطف بیان ایسه کذا رفع و نصب جائز در
(لارجل نفسه) و (نفسه) و (لارجل اباعبدالله) و ابوعبدالله) کبی .

و (اما لالنی الجنسک) مدخول شدن قسم ثالثک توابعی لفظنه تابع اولوب
مرفوع اولور لر تدبر و العهدة علیک .

و معلوم اوله که لالنی الجنس اوزره همزه استفهام داخل اولغله معموله نده
عمانی منع و تغییر ایلمز بلکه معمولی معرب ایسه معرب و مبنی ایسه مبنی
اوله رق علی حاله الاولى باقی قالور و اشبو همزه مقام استفهام ده حقیقه واقع
اولور الاغلام رجل فی الدار و الارجل فی الدار کبی و کاه مجازاً مقام عرض ده
استعمال اولنور که شیخ ابن حاجب و بعض نحاک رأیدر الا نزول عندی
کبی لکن اندلسی مقام عرض ده مستعمل (الا) کله سی مرکب اولیوب
(ان) و (لو) و حروف تحضیض کبی آریجه بر حرف در لفظاً و یا تقدیراً
فعل اوزره داخل اولور و اضمار علی شریطة التفسیر باینده مابعدنده اسم
و جواباً منصوب اولور دیدی الازیداً تکرمه کبی .

و کاه مجازاً مقام تنی ده استعمال اولنور (الاماء اشربه) کبی و خفی اولیه که

لانیفی الجنسک اسمی وجود قرینه عندند خبری ذکر اولنان بر ترکیبده
چوق کره حذف اولنور لاعلیک کبی که لابس علیک دیکدر ونته کیم خبری
وجود قرینه عندند اسمی ذکر اولنان بر ترکیبده حذف اولنور لامثل زید
کبی که لامثل زید موجود دیکدر واما اسمی و خبری ایکسی دخی حذف
اولنق جائز دکلدر .

درس ۱۰۲

(خبر ما ولا المشبهتین بلیس) منصوباتک اون ایکنجیسی لیس یه مشابه اولان
(ما) و (لا) کله لرینک خبریدر که هوالمسند بعد دخولها دینه رک معرف در
(مازید قائماً) و (لارجل حاضرّاً) قوللرمزده قائماً و حاضرّاً کبی و لیس یه
مشابه (ما) و (لا) نک اعمالی لغة حجازیه در که کتاب منزل دخی اشبو
لغة اوزره واردر (ما هذا بشرّاً) و (ما هن امهاتهم) کبی واما لغة بنی تمیمده
(ما) و (لا) عامل قیلنمیوب مابعدنده اولان اسم و خبری مبتدا و خبر
اولق اوزره مرفوع قیلرلر .

و خفی اولیه که لغة حجازیه ده ما اولانک عملنک شرطی کنیدیلا ایله اسملرینک
بنی (ان) ایله فصل اولنماملیدر اشبو (ان) عند البصرین تأکید نفی
ایچون زائده اولوب وعازله تسمیه قیلنور وعند الکوفین نافیه در و مؤکد
نفی در یعنی زائده دکلدر و دخی ما ولا ایله اسملرینک بنی خبرلریله و خبرلرینک
متعلقاتیله دخی فصل اولنماملیدر و دخی نفی الا ایله منتقض اولماملیدر .

و (لا) کله سنده اسمنک نکره اولسی دخی شرط قیلنمشدر اشبو شرطلر
بولنمدقده عمل ایده منزلر (ما ان زید قائم) و (لان زید حاضر) و (ما قائم
زید) و (لا حاضر زید) و (مازیداً عمرو ضارب) و (لا بکراً رجل
ضارب) و (مازید الا قائم) و (لارجل الا حاضر) و (لازید حاضر)
کبی و معلوم اوله که (ما) و (لا) نک خبری اوزره (الا) کبی بعد النفی
مفید ایجاب اولان بل و لکن ایله برکله عطف اولنسه معطوف ده رفع
واجب اولور (مازید مقیماً بل مسافراً) و (ماعمر و قائماً لکن قاعد)
و (لارجل حاضرّاً بل غائب) و (لافرس ناطقاً لکن صاهل) کبی .

المجرورات

معمول مجرور (هو ما اشتمل على علم المضاف اليه) دینهرك تعریف
اولنور یعنی معمول مجرور مضاف الیه علامتی اولان (کسره) (فتحه) (یا)
حرفندن برینی مشتمل اولان (یعنی لفظاً ویا تقدیراً ویا محلاً شو علامتلردن
بریلہ موصوف بولنان) اسمدر دیمکدر بیلملیدر که معمول مجرور ایکی
قسم اوزره در بر قسمی حرف جر ایله مجرور در مررت بزید قولزده
زید کبی که با ایله مجرور در و ما قبلنده مضمون فعل حرف جر واسطه سیله
(زیده) نسبت اولمغله زید لفظاً حرف جر واسطه سیله مضاف الیه
اولمشدر و بر قسمی اضافتله مجرور در که بوده ایکی قسم اوزره در بر قسمنه
اضافت معنویه و بر قسمنه اضافت لفظیه دنیلور .

درس ۱۰۳

(اضافت معنویه) اضافت معنویه نك علامتی (مضاف) معمولنه مضاف
اولمش بر صفت اولمالیدر بلکه یا هر کز صفت اولمالی غلام زید وخاتم
فضة کبی و یا خود صفت اولور ایسه ده معمولنك غیرینه مضاف اولمش بر
صفت اولملیدر ضارب البلد و کریم المصر و مظلوم الناس کبی .

خفی اولمیه که اضافت معنویه اوج قسم اوزره در .

(قسم اول) اضافت بمعنی اللام و اضافت لامیه تسمیه اولنور که بونده
مضاف ایله مضاف الیه بیننده حروف جاره دن بر لام مقدر و مراد اولور
اشبو اضافت لامیه مضاف الیه مضافه مباین اولدقده و یا خود مضاف الیه
مضافدن مطلقاً اخص بولندقده و یا خود مضاف الیه مضافدن من وجه اخص
اولوب و مضافك اصلی اولدقده در (غلام زید) و (علم الفقه) و (فضة
خاتم) کبی غلام لزید و علم للفقه و فضة لخاتم مفادنده در و بیلملیدر که
بر محله اضافت لامیه نك تحقق ایلمسند البته تصریح لام صحیح اولمق
شرط لازم دکدر مثلاً علم الفقه قولز نخونده مسموع اولمیوب و صحیح دخی
دکدر بلکه مدلول لام اولان اختصاصی مفید اولمی کافی در .

(قسم ثانی) اضافت بمعنی من و اضافت بیاویه تسمیه اولنور که بونده مضاف ایله مضاف الیه بیننده حروف جارهدن (من) کلهسی مقدر و مراد اولور . اشته اضافت بیاویه مضاف الیه مضافدن من وجه اخص اولوب و مضافک اصلی اولدقده در (خاتم فضا) کبی که خاتم من فضا دیمکدر فضا خاتمندن من وجه اخص اولوب و خاتم فضه دن معمول بولمغله فضه خاتمک اصلیدر . و بعض اضافت بیاویه مضاف الیهی مضاف اوزره حملک صحتیه بیان اولنور که مثلاً (خاتم فضا) قولزده اضافتک بیاویه اولدینی خاتم هو فضا دینه بیلمکله افاده اولنور .

(قسم ثالث) اضافت بمعنی فی تسمیه اولنور که بونده مضاف ایله مضاف الیه بیننده حروف جارهدن فی کلهسی مقدر و مراد اولور اشیو اضافت بمعنی فی مضاف الیه مضافه مباین و مضافک ظرفی اولدقده در ضرب الیوم و کریم المصر کبی که ضرب فی الیوم و کریم فی المصر دیمکدر لکن اضافت بمعنی فی قلیل اولوب و اکثر نجات مضاف الیهک مضافده واقع و یا کائن اولمسی ملاسه سیله بونی اضافت بمعنی اللامه رد ایلدیلر . اشیو تعریف و تقسیم اولنان اضافت معنویه (مضاف) دن تنوین و تنوین مقامنده قائم بولنان نون تنیه و نون جمع و نون شبه جمع لاجل الاضافة خذف اولنه رق لفظاً تخفیف افاده ایلر و مع هذا اگر مضاف الیه معرفه ایسه مضاف ایچون تعریف افاده ایدر غلام زید کبی . و اگر مضاف الیه نکره ایسه مضاف ایچون تخصیص افاده ایدر غلام رجل کبی و بیلمیلیدر که اضافت معنویه نکره شرطی اگر مضاف معرفه ایسه لاجل الاضافة آنی تعریفدن تجرید ایلمیلیدر یعنی مضاف معرف باللام ایسه لام تعریفدن تجرید ایدرک و اگر علم ایسه (شخص مسمی بهذا الاسم) اعتباریه نکره قیلهرق بعده مضاف قیلملیدر زیرا اگر معرفه تعریفدن تجرید اولمیه رق مضاف قیلنسه نکره مضاف اولدقده اعلی دن ادنی به تنزل ایلمسی لازم کلور زیرا شو تقدیرده اضافتک افاده ایله جکی تخصیص در حالبوکه مضاف شرف تعریف ایله مشرف اولمغله اعلای حالده در مع حصول الاعلی ادنی طلبده ایسه بر فائده اولیوب و احتیاج یوقدر پس اضافت عبث اولور ایدی .

و معرفیه مضاف اولدقده شـو تقدیرده اضافتک افاده ایلیه جکی تعریفدر
حالبوکه مضاف معرفه اولمغله تحصیل حاصل لازم کلور ایدی .

و اما کوفیلرک الثلاثة الا ثواب نحوینی یعنی عدد معرف باللامک تعریفدن
تجريد اولمیهرق معدودینه مضاف اولسنی تجویزلی قیاسا و استعمالاً
ضعیفدر (قیاساً ضعیف) اولسی زیرا تحصیل حاصل لازم کلورکه آنفاً
بیلندی و استعمالا دخی ضعیف اولسی زیرا کلام فصحاءه تعریفدن تجريد
اولنهرق مضاف قیلنمشدر نته کیم ذی الرمه شاعرك .

ایا منزلی سلمی سلام علیکما هل الاذنم اللاتی مضین رواجع
وهل يرجع التسليم اویکشف عما ثلث الاثانی والديار البلاقع

شعرنده ثلث الاثانی قولنده تعریفدن تجريد ایلیهرك مضاف قیلنمشدر
(اثنای) اثنیه نك جمیدر اثنیه اولنده همزه نك ضمی و ثانیك سکونیه اوجاق
طاشنه دینورکه قزان برقاچ اثنیه اوزرینه وضع اولنور و دیار دارك جمیدر
و (بلاقع) دیارك صفتی اولوب (بلقع) لفظنك جمیدر بلقع اولنده بانك
ضمی و لامك سکونیه صودن و اوتدن خالی محله دینورکه آنده انسان
و حیوانات دخی اولمز (مفاد شعر) ذوالرمه شاعرك محبوبه سی سلمی رفع
خیام ایدرك کتدکده براقش اولدینی صیفی و شتوی ایکی منزله رینه ندا
ایلیوب دیورکه ای سلمی نك ایکی منزله ری سزك اوزریکزه بندن سلام
اولسون سلمی نك شو منزله رده کچورمش اولدینی زمانلر آیا بردخی رجعت
ایدرلرمی و آیا محبوبه کیدرك قالمش اولان اوج اوجاق طاشی و دیار خالیات
ارجاع سلام ایدر و یاخود عمای قلب و حزن و کدورتی کشف و ازاله
ایلمی یعنی ایلمز و بردخی لقاسیله مشرف اولمدقجه قلب اندوهناك فرحیاب
اولمز دیمکدر .

واما علیه الصلاة والسلام افندمنزك (بالالف الدینار) قول شریفنده
الدینار لفظنك مجرور اولسی (الالف) دن بدل واقع اولدیغنددر اضافتله
دکدر پس طرف کوفین دن بونکله احتیاج اولنه من فافهم .

(اضافت لفظیه) اضافت لفظیه نك علامتی اضافت لفظیه ده (مضاف)
معموله مضاف اولان صفت اولمیدر زید ضارب عمرو و زید مضروب
الغلام و زید حسن الوجه قولر مزده ضارب زید و مضروب الغلام
و حسن الوجه کبی (ضارب زید) قولمزك اصلی (ضارب زیداً) ایدی
ضارب لفظندن تنوین حذف اولنوب مفعولی اولان عمروه مضاف
اولمیدر و (مضروب الغلام) قولمزك اصلی (مضروب غلامه) ایدی
(غلامه) لفظندن ضمیر حذف اولنوب (مضروب) ده مستتر قیلنمش
و آندن عوض (غلام) لفظنك اولنه بر الف لام کتورلمش و مضروب
لفظندن تنوین حذف ایدیلوب نائب فاعلی اولان (غلام) لفظنه مضاف
قیلنمش در

و (حسن الوجه) قولمزك اصلی حسن وجهه ایدی (وجهه) لفظنده
اولان ضمیر کذا حذف اولنوب صفت ده مستتر قیلندی و آندن عوض
اوله رق بر الف لام کتورلدی و (حسن) لفظندن تنوین حذف اولنوب
فاعلی اولان (وجه) لفظنه مضاف قیلندی. (اشبو اضافت لفظیه) معناده
بر تعریف و تخصیص افاده ایلمیوب آنجق لفظاً بر تخفیف افاده ایدر که شو
جهتله اضافت لفظیه دینلمشدر

و اشبو تخفیف کاه یالکز مضاف دن حقیقه و یا حکماً تنوینی و یاخود
تنوین منابنده اولان نون تثنیه و نون جمعی حذف ایلنکله حاصل اولور
(ضارب زید) و (ضوارب عمرو) و (ضارب زید) و (ضاربوا زید)
قولر مزده اولدینی کبی

و کاه یالکز مضاف الیه دن ضمیری حذف و صفت ده مستتر قیلنمله اولور
(القائم الغلام) قولمزده اولدینی کبی که اصلی (القائم غلامه) ایدی
و التوجیه معلوم

و کاه مضاف دن حذف تنوین ایله و مضاف الیه دن ضمیری حذف و صفت ده
مستتر قیلنمله تخفیف هم مضاف و هم مضاف الیه ده واقع اولور (زید

ضارب الخدام) و (مضروب الغلام) و (حسن الوجه) قولار منزه اولدینی
کی که توجیهی معلومدر

خفی اولیه که اضافت لفظیه مفید تعریف اولماغله (مررت برجل حسن
الوجه) قولمزد (حسن الوجه) نکره اولان رجل لفظنه صفت قیلنمسی
جائز اولمشدر واما (مررت بزید حسن الوجه) ترکیبی که (حسن الوجه)
معرفه اولان زیدک صفی اوله تجویز اولنماشدر و بیلملیدر که اضافت
لفظیه لفظاً مفید تخفیف اولدینی جهته (الضارب زید) و (الضارب زید)
ترکیبلی اولکیده نون تشبیهک وایکنجیده نون جمعک حذفله تخفیف
حاصل اولغله جائز کورلمشدر واما (الضارب زید) ترکیبی الضارب
لفظندن تنوین الف لامیله ساقط اولوب اضافتله بر تخفیف حاصل اولغله
تجویز اولنماشدر

لکن (فراء) (الضارب زید) ترکیبده الف لامک بعدالاضافه داخل
اولسنی ملاحظه ایله (الضارب) لفظندن تنوین اضافتله ساقط اولوب
شو وجهله تخفیف حاصل اولمشدر دیهرک اشبو ترکیبی تجویز ایتمشدر
و جائز که شو وجهله استناد ایلمش اوله (وجه اول) اغشی نام شاعرك
بر محسنک مدحنده سویلدیکی

(الواهب المائة الهجان وعندها عودا یزجی خلفها اطفالها)

شعرنده مصرع اولده (وعندها) قولی (المائة) لفظی اوزره معطوف
اولغله باعتباراً اعطف معنا (الواهب عندها) دیمک اولور (الواهب
عندها) ترکیبی ایسه الضارب زید قیلندندر (مفاد شعر) معدوح یوز
بیاض دوهلری واول دوهلرک عبدینی یعنی راعیسنی هبا واحسان ایلجیدر
اول دوهلر حدیثات التناج اولوب عبدله اول دوهلرک یاوریلرینی سوق
ایدیجی اولدینی حالده دیمکدر (وجه ثانی) الضارب الرجل ترکیبی بالاتفاق
جائز اولوب ومع هذا مفید تخفیف دکلدز (وجه ثالث) معرف باللام

اولان صفت ضمیره مضاف اوله رق یعنی (الضاربك) و (الضاربي)
و (الضاربه) ترکیبی دخی جائزدر و مفید تخفیف دکلدر

اشبو وجوه ثلثه دن (وجه اوله جواب ویریلدی) که (وعبدها) لفظی
جائز که (الماء) لفظنک محلی اوزره معطوف اوله یعنی مجرور اولیه
ویا خود (الماء) لفظی اوزره هرگز معطوف اولیه بوب مفعول معه اوله
و بزده بعض معطوف علیه ده جائز اولیه حق بر کیفیتی معطوف محتمل
اوله بیلور نته کیم یازید والحاترث نخونده (الحاترث) ده رفع و نصب جائز
اولوب حالبو که معطوف علیه اولان (زید) لفظی آنحق علی مایرفع به
مبنی در و نته کیم (رب شاة و سخلتها) قولزده (سخله) لفظی ضمیره
مضاف اولمغله معرفه اولوب (رب) کلمه سنک مدخولی اولان (شاة)
لفظنه معطوفدر شو ترکیب ایسه جائزدر حالبو که رب تقلیل ایچون
موضوع اولدینی جهته آنحق نکره اوزره داخل اوله بیله جکندن رب
سخلتها دینسه جائز دکلدر (سخله) کچی و قیون یاورینسه دینور

و (وجه ثانی به جواب ویریلدی) که (الضارب الرجل) نحوی هر تقدیر مفید
تخفیف دکل ایسه ده لکن (الحسن الوجه) اوزره حمل اولنمشدر الحسن
الوجه ترکیبیده ایسه مضاف الیه دن حذف ضمیر ایله تخفیف حاصل اولمغله
جائز و مختاردر (الضارب الرجل) ترکیبنک (الحسن الوجه) ترکیبینه
حمل اولنمسی زیرا ایکینسده دخی مضاف (صفت و معرف باللام) و مضاف
الیه (جنس و معرف باللام) واقع اولنمشدر و (اما الضارب زید) ترکیبی
بویله اولمغله (الضارب الرجل) ترکیبینه قیاس اولنمق قیاس مع الفارق
اولوب جائز دکلدر.

و (وجه ثالثه جواب ویریلدی که) الضاربك ترکیبی (ضاربك) ترکیبینه
حمل اولنهرق تجویز اولنمشدر (ضاربك) ترکیبی مفید تخفیف دکل ایسه ده
بالاتفاق جائزدر زیرا لام تعریفدن تجرید اولنهرق مفعولانه وصل اولنان
براسم فاعلک مفعولی ضمیر متصل اولور ایسه مفعولانه اضافتی التزام اولنوب
تحقق تخفیفه نظر اولنما مشدر.

و ضاربك ترکیبیده اضافتک مفید تخفیف اولمدینی زیرا ضارب قولندن

تنوین مجرد ضمیره متصل اولسی جهته ساقط اولوب اضافته دکلدر واکر
اضافته ساقط اولمش اولسه (ضارب زید) قولزده قبل الاضافة (ضارب
زیداً) دنیله یکی کی اضافته ده ضاربك قولزده دخی قبل الاضافة آخر
صفتده تنوینله (ضاربك) دینه بیامیلیدی حالبوکه بومتصور دکلدر .

وجائزدرکه (ضاربك) ترکیبنک اصلی (ضارب ایاك) اولق تصور اولنه
شو تصور کوره ترکیب مذکورده اضافت مفید تخفیف اولمش اولور زیرا
اصلی ضارب ایاك اولوب اضافت مقصود اولدقده بالضرور (ضارب)
لفظدن لاجل الاضافة تنوین حذف اولنور وضمیر منفصل متصل قیلنور
وهر حالده ضاربك ترکیبنک جوازنده شک یوقدر و (مضاف) اسم فاعل
اوله رق ضمیر متصله مضاف بولمقده (الضاربك) ترکیبی ضاربك کی
اولغله شو ترکیب اوزره حمل اولنه رق تجویز اولمشدر .

واما (الضارب زید) ترکیبی هرکنز بوبایدن اولماغله بوکا قیاس اولنق
قیاس مع الفارق اولوب جائز دکلدر فافهم .

درس ۱۰۵

خفی اولیه که صفتک موصوفه اضافتی وموصوفک صفتیه اضافتی ترکیب
وصفیدن منفهم معنا علی حاله باقی قالمغله بیله جائز دکلدر زیرا ترکیب وصفی
وترکیب اضافی هیئتلری یکدیگره مغایر اولوب ومعنای دخی بشقه درکه
بری آخرک مقامنده قائم اوله من شوذ کر اولنان بصریلرک ذهابیدر .

واما کوفیلر تجویز ایلیوب موصوفک صفتیه مضاف اولسنه عربک (مسجد
الجامع) و (جانب الغربی) و (صلوۃ الاولی) و (بقلة الحمقاء) قوللرینی
ایراد ایلدیلرکه (المسجد الجامع) و (الجانب الغربی) و (الصلوۃ الاولی)
و (البقلة الحمقاء) مفادنده در جامع اولان مسجد وغربی اولان جانب
واولکی صلوۃ واحق اولان بقله دیمکدر دیدیلر (بقلة الحمقاء) سموزاوتنه
اطلاق اولنورکه اکثر صویولارنده و آیق آلترلنده نابت اولدیغندن حمقه
نسبت اولمشدر وصفتک موصوفه مضاف اولسنه و عربک (جرد قطیفة)
و (اخلاق ثیاب) قوللرینی ایراد ایلدیلرکه (قطیفة جرد) و (ثیاب
اخلاق) مفادنده در .

(قطیفه) قدیفه دنیلان تویسنز برنوع قاشدر و (جرد) اجر دك جمعیدر
اجر د توی دن مجرد اولان شیئه دینور و (ثیاب) ثوبك جمعیدرو
(اخلاق) خلق لفظنك جمعیدر خلق اسكمش نسنهیه دینور پس جرد
قطیفه تویسنز قدیفه و (اخلاق ثیاب) اسکی ثوب لر دیمكدر دیدیلر .

لیکن بصریلر بونلری تأویل ایلدیلر مثلاً (مسجد الجامع) مسجد الوقت
الجامع دیمكدر نظم کلامده الوقت لفظی مقدر اولوب الجامع آنك
صفیدر حقیقه مسجد لفظنك صفی اولیوب و مسجد لفظنه مضاف دخی
دكلدر و یاخود (الجامع) لفظی الوقت لفظی مقامنده قائم قیلنمش اوله رق
(مسجد) لفظی الجامع لفظنه مضاف ایدیلمشدر دینور شوتقدیرده الجامع
صفات غالبه منزلنده اولور صفات غالبه لعلاقة موصوفنك غیرینه صفت
قیلنان صفات مجازیله ردر قرآن عظیم الشانه صفت قیلنان حکیم و عظیم کی .

و مثلاً (جرد قطیفه) ترکینك تأویلنده جرد یالکز بر اسم غیر صفت
اعتبار ایدیلر ك جنس مبهم حکمنده قالب قطیفه و غیر قطیفه اولمغه
محمل بولمغله شو جهتله كسب تخصص ایچون قطیفه لفظنه مضاف
قیلنمشدر دینور نته کیم خاتم فضا قولزده دخی خاتم بر جنس مبهم اولوب
فضه و فضه نك غیری اولمغله محتمل ایکن فضهیه اضافتله تخصص ایلمشدر
وقس علیه .

و خفی اولیه که لیث واسد و حبس و منع کی الفاظ مترادفه نکدخی بری برینه
اضافتی جائز دكلدر مثلاً (لیث اسد) و (جس منع) دنیلمز و دخی
انسان ایله ناطق کی (لفظین متساویین) کده بری برینه اضافتی جائز اولمز که
انسان ناطق دینمز زیرا مثلاً رأیت لیث اسد دینسه (رأیت لیثاً) ترکینك
افاده ایلیه جکی معنادن زائد اوله رق برشیء مفید اولمغله شو و اضافتک بر
فائده سی اولیوب عبث اولور و کذا اخض مطلقك مطلقاً اعمه اضافتی عدم
فائده دن ایچون جائز دكلدر مثلاً جمعة الیوم دینلمز بلکه یوم الجمعة دینور .
و بیلملیدر که عربلر ك بر کیمسه نك لقب مشهورینه مفرد اولان اسمنی مضاف

قیله رق مثلاً (سعید کرز) قولاری ماولدرکه اسم ایله ذات مسمی یعنی مدلول
ولقب ایله دال علی المسمی مراد اولنور مثلاً (سعید کرز) مدلول هذا للفظ
یعنی کرز دینلان سعید نام کیسه دیکدر واما (اسم) مثلاً عبدالله کبی مفرد
اولیوب اضافتله ایسه لقب خبر ویا عطف بیان قیلنور فافهم.

درس ۱۰۶

خفی اولیه که عرف نحاتده آخرنده حرف علت بولمیان اسمیه اسم صحیح
دینور ثوب ودارکی و آخرنده ماقبلی ساکن (واو) ویاخود (یا) بولنان
اسم دخی اسم صحیح ملحق عد اولنور دلوضی کبی.

پس اسم صحیح و اسم صحیح ملحق اولان برکله اگر یاء متکلمه مضاف
قیلنسه آخری مکسور قلنور و یاء متکلم مفتوح ویاخود ساکن اوقونور ثوبی
وداری وضیی ودلوی کبی.

و آخرنده حروف عله دن (الف) بولنان برکله مثلاً (عصا) کبی یاء متکلمه
مضاف قیلنسه الف علی حاله ثابتدر (عصای) کبی ولکن عربدن (هذیل)
قیله سی تنیه نك غیرنده یایه قلب و یاء متکلمه دغم ایدر لر مثلاً (عصا)
کله سی یاء متکلمه مضاف قلند قدده (عصی) دیز لر و برکله یاء متکلمه مضاف
قلند قدده حرف آخری (یا) اولسه کذا آخرنده اولان (یا) یاء متکلمه
ادغام اولنور مثلاً رایت مسلمین قولزده (مسلمین) یاء متکلمه مضاف
قیلنسه لاجل الاضافه نون ساقط اولوب آخرنده یاجر فی قالور ویای متکلمه
ادغام اولنور رق رایت مسلمی دینور. و برکله یای متکلمه مضاف قیلند قدده
حرف آخری واو واقع اولسه واو یایه قلب اولنوب ویای متکلمه ادغام
اولنور وواوک ماقبلنده اولان حرف مضموم ایسه واو یا حرفنه قلب
اولندیغندن یا حرفنه مناسبه مکسور قیلنور مثلاً جائی مسلمون قولزده
مسلمون یای متکلمه مضاف قیلنسه لاجل الاضافه نون ساقط اولوب
آخرنده واو قالور وکله ده واو ویاجمع اولوب اولی ساکن اولغله واو یایه
قلب ویای متکلمه ادغام اولنور و ماقبل یاده میم مضموم قالمغله یایه مناسبه
مکسور قیلنور که جائی مسلمی دینور. و (اگر ماقبل یا مفتوح) اولسه

مثلا تشبیهه حالت نصیده مسلمان کلهسی کبی که یای متکلمه مضاف قیلنسه
 مسلمی دینور میمک فتحیه . و جمع مذکر سالمده حالت رفیده مصطفون
 کلهسی کبی که اصلی مصطفیون ایدی اعلال اوله رقی و اجتماع ساکنین دن ایچون
 یا حذف اولوب مصطفون قالمشدر و اوک ماقبلی اولان فا حرفی مفتوحدر
 اشبو مصطفون کلهسی یای متکلمه مضاف قیلندقدده نون ساقط اولوب
 و واو یایه قلب ویای متکلمه ادغام اوله رقی مصطفی دینور (فانک) فتحیه
 زیرا قتحه خفیف اولمغله علی حالها ابقا اولنور .

خفی اولیه که اسماء سته نک یای متکلمک غیرینه اضافتری کیفیتی مرور ایلدی
 یای متکلمه مضاف قیلنسه لر اخ و اب کله لرنده اخ و ابی دینور که لام الفعل
 محذوفلری اعاده اولماز و لکن (امام مبرد) شو ایکی کلمده لام الفعل
 محذوفلرینک اعاده اولمنسی تجویز ایلدی بونلرک اصللری آخر لرنده واو
 ایله اخو و ابودر یای متکلمه مضاف قیلندقلرنده (امام مبرد) لام الفعل لرینی
 اعاده و یا حرفه قلب و یای متکلمه ادغامله ابی و اخی دینامسنی تجویز
 ایلدی و شاعرك .

قدر احلك ذالحجاز وقدارى و ابى مالك ذوالحجاز بدار

شعرنده مصرع ثانی صدرنده (وابی) قولیه استدلال ایلدی که ابی بانک
 تشدیدیه بولنمشدر (ذوالحجاز) دینلان مکة مکرمه ناحیه لرنده بر مکاندر
 آنده عرب سنده بر کره تجمع ایدرک تبایع و تفاخر ایدرلر ایدی
 (سفاد بیت) الله عظیم الشانک تقدیر و قضای سنی ذوالحجاز دینلان مکانه
 انزال واسکان ایلدی حالبوکه شو وجهله ظن ایلر و پدرمه قسم ایدر مکه
 ذوالحجاز دینلان مکان سنک دارک دکدر (ابن حاجب) اشبو استدلاله
 جواب و یروب بیورمشلردر که بیتده اولان (ابی) مفرد اوله رقی یای
 متکلمه مضاف اولیوب بلکه جمع مذکر سالم اوله رقی یای متکلمه
 مضافدر که اصلی (ایین) ایدی یای متکلمه مضاف قیلندقدده لاجل الاضافة

نون ساقط اولوب و آخرنده قالان یایای متکلمه ادغام اولسه رق ابی اولمشدر شو تقدیرده و (ابی) پدرلریمه قسم ایدرمکه دیمک اولور زیرا اب لفظنک جمعده آباء دینلدیکی کبی جمع مذکر سالمده حالت رفعده ابون و حالت نصب و جرده این واقع اولمشدر . نته کیم شاعرك

فلما بتین اصواتنا بکین وفدیننا بالایننا

شعرنده (بالایننا) کبی که آخرنده الف اشباعیه وزن شعر ایچون کتور یلمشدر (این) اب لفظندن جمع مذکر سالمدر (مفاد بیت) وقتا که صوتلریمز نسالره ظاهر اولدقده آغلدیله و پدرلرینی بزه فدا ایتدیله یعنی پدرلریمز سزه فدا اولسون دیدیله دیمکدر .

واسماء سته دن (حم) و (هن) لفظلری یای متکلمه مضاف قیلندقدده حمی وهنی دینور شو لفظلرك بالاتفاق لام الفعللری رد اولمز .

واسماء سته دن (م) لفظی که اصلی فوه ایدی فوز وزننده آخرندن ها حذف اولنه رق فو قالمش و (واو) طرفده واقع و ماقبلی مفتوح اولمغله الفه قلب اولنه رق فا اولمشدر شو صورتده (عصا) و (رحا) کله لرینه تنوین لاحق اولدینی کی بوکا دخی تنوین لاحق اولوب و (الف) اجتماع ساکنیندن ایچون حذف اولنسه کله برحرف اوزره قاله جغندن (الف) مقلوبه و یاخود ابتداء (واو) میم شفوی یه ابدال اولنه رق م اولمشدر . اشبو (م) لفظی یای متکلمه مضاف اولدقدده (میم) مبدل عنه اولان (واو) ه رد اولنور و (واو) یایه قلب ویای متکلمه ادغام اولنه رق تشدید یا ایله فی دینور که بودها اکثردر و کاه میم بقا اولنه رق فی دخو دینور . خفی اولیه که بونلر اضافندن قطع اولندقدده احوال ثلثه ده حرکات ثلثه ایله معرب اوله رق اخ و اب و حم و هن و م دینور ماقبللرینک فتحیه فقط فده ماقبلنک کسر و ضمیله دخی اوقنور . فقط افصح اولان ماقبلنک فتحیه اوقونمقدر و حم لفظنده آخرنده همزه ایله حموه و و او ایله حمو و الف ایله حما دخی لغتدر .

جاء في حم وحمؤ وحموا وحماء ورأيت حمأ وحمئاً وحمواً وحماء ومررت بحم وحمأ وحمؤ وحماء دينور شولغتلرده اضافتله دخي جائزدر وهن لفظي دخي اضافتله و اضافتسز مستعملدر مثلاً جاءني هن وهنك ورأيت هنا وهنك ومررت بهن وهنك دينور .

واما اسماء سته دن ذولفظي هرگز ضميره مضاف اولمز آنحق اسم جنسه مضاف اولور زيرا (ذو) کله سي برسنه يي براسم جنسه متصف قيلمق ايجون وضع اولمشدر مثلاً جاءني رجل ذوالمال ورأيت رجلاً ذالمال ومررت برجل ذي المال دينور واما شاعرك (انما يعرف ذا الفضل من الناس ذووه) قولنده (ذووه) كه اصلي (ذوون) در ذونك جمع مذکر سالميدر كه ضميره مضاف اولمشدر بوكا شاذ واقع اولمشدر دينهرك جواب ويرلشدر . مفاد شعر ناسدن اهل فضل اولانلرك قدر و قيمتي ينه فضل وكمال اصحابي بيلور وتقدير ايلر ديمكدر .

درس ۱۰۷

خفي اوليه كه مضاف ايله مضاف اليه بيننده فصل انحق يدي شيله مسموع اولمشدر اوچ دانه سي شعر وغير شعرده واقعدركه آنلر مضافك مفعولي وظرفي و برده قسمدر (بين المضاف والمضاف اليه) مضافك مفعوليله فصل قرائت ابن عامرده (زين للمشرکين قتل اولادهم شرکهم) قول شريفنده اولديني کي كه (اولاد لفظنك نصبي و شرکاء لفظنك جريله اوتمشدر كه مضاف اولان قتل ايله مضاف اليه اولان شرکاء بيننده مفعول مضاف اولان (اولاد) لفظيله فصل واقع اولمشدر مضافك ظرفيله فصل عليه الصلوة والسلام افندمرك (وهل اتم تاركوا بي صاحبي) قول شريفلرنده اولديني کي كه (تاركوا) لفظنك اصلي تاركون اولوب اسم فاعل اولان تارك لفظنك جمع مذکر سالميدر كه صاحبي لفظنه مضاف اولغله لاجل الاضافة نون ساقط اولمشدر و بين المضاف والمضاف اليه مضافك ظرف مستقري اولان (بي) ايله فصل واقع اولمشدر ونته کيم بعض کملك (ترك يوماً نفسك وهواها سعی في رداها) قولنده اولديني کي كه مضاف اولان (ترك) لفظيله

مضاف الیه اولان (نفسک) لفظنک بیننده مضافک ظرفیه یعنی یوم الفظیله فصل واقع اولمشدر مفادی نفسکی بر کون هوا وهوسیله بر اقق نفسنی هلاک اتمده سعی ایلمکدر دیمکدر که کشی به نفسنی ضبط ایدرک کندی هواسی اوزره بر اقامق ایچون نصیحت در و (بین المضاف والمضاف الیه قسم اینه فصل) (هذا غلام والله زید) قولزده بولندی کبی که هذا غلام زید والله دیمکدر والامر معلوم .

واما مضاف ایله مضاف الیه بیننده فصل واقع اولان یدی شی دن درت دانهسی آنجق ضروره شعریه به خاصدرکه آنلر مضافک غیری بر لفظک معمولی ومضافک فاعلی ونعتی و برده ندادر .

مضافک غیری بر لفظک معمولیه فصل نته کیم شاعر جریرک :

(تسقی امتیاحاً ندی المسواک ریقته)

شعرنده واقع اولدینی کبی که مضاف اولان ندی لفظیه مضاف الیه اولان ریقۀ لفظی بیننده (تسقی) فعلنک مفعول ثانسی اولان (المسواک) ایله فصل واقع اولمشدر تقدیر کلام تسقی ندی ریقته المسواک دیمکدر (امتیاح) اجوف یائی اوله رق افتعال بابندن مصدر در استیاک معاسنه در و (ندی) یغموره و یا شلغه دینور و (ریق) آغزده اولان صویه یعنی توکر که دینور و (تسقی) ده مستتر اولان ضمیر فاعل و ریقته ساده اولان ضمیر مجرور بیت سابق ده اولان ام عمره راجع در مفادیت ام عمر مسواک کنجی اولدینی حالده اغزینک صوینی مسواکه ایچوریر دیمکدر . ومضافک فاعلیله فصل نته کیم شاعر جریرک :

ما ان وجدنا للهوى من طب ولا عدمننا قهر وجد صب

شعرنده مصرع ثانیده واقع اولدینی کبی که (وجد) مرفوع اولوب مضاف واقع اولان (قهر) ک فاعلیدر مضاف ایله مضاف الیه اولان صب لفظی

بیننده فاضل اولمشدر مفاد شعر بز عشق و محبتہ نہ بر علاج بولدق وئدہ
وجد و محبتک یجازہ عاشقی قہر ایللمسنی یوق ایدہ بیلدک دیمکدر .
و (نعت مضاف ایلہ فصل) نتہ کیم حضرت معاویہ نک :

نجوت وقد بل المرادی سیفہ من ابن ابی شیخ الابطاح طالب

شعر نندہ مصرع ثانیہ اولدینی کبی کہ تقدیری من ابن ابی طالب شیخ الا
باطح دیمکدر (مرادی) دنیلان حضرت امام علی رضی اللہ تعالیٰ عنہ و کرم اللہ
وجہہ افندمزی شہید ایلان ابن ملجم ملعونک لقییدر و اباطح بطحانک
جمعیدر بطحا مکہ مکرمہ ارضہ دینور مفاد شعر خوار جدن اوچ کیمسہ
بری حضرت حیدر کراری و بری حضرت معاویہ بی و بریسی مصردہ
عمر و ابن العاص حضرت تلرینی قتل ایلیمک اوزرہ اتفاق ایلوب ابن ملجم
ملعون منوی ضمیرینہ نائل اولہرق دیکر لر نائل اولہ مدقلرندہ اشبو شعری
حضرت معاویہ دیمشدرکہ بن خلاص اولدم حالبوکہ (مرادی) دنیلان
ملعون ارض مکہ نک شیخی واک اشرفی اولان ابی طالبک مخدوم صاحب
الغز و اشرفدن سیفنی یشارتدی دیمکدر و مضاف ایلہ مضاف الیہ بیننی
ندا ایلہ فصل نتہ کیم شاعرک .

کان بر ذون ابا عصام زید حماردق باللجام

شعر نندہ واقع اولدینی کبی کہ مضاف اولان بر ذون ایلہ مضاف الیہ اولان
زید بینندہ منادی اولان ابا عصام ایلہ فصل اولمشدر تقدیر کلام کان
بر ذون زید یا ابا عصام حماردق باللجام دیمکدر (بر ذون) بانک کسریلہ
اوزرینہ سمر اوریلان اسبہ دینور مفادیت کانه یا ابا عصام زیدک بار کیری
کندینہ کم اورلمش حمار کیدر دیمکدرکہ زیدک اسبنی ذم ایلور .

مخفی اولیہ کہ قیام قرینہ عندندہ کاه مضاف حذف اولنوب اعرابی مضاف

اليه اعطا اولنور نته کيم واسئل القرية آيت کریمه سنده اولدینی کبی که اصلی
 واسئل اهل القرية ایدی وکاه مضاف الیه مجرور اوله رق علی حاله باقی قالور
 لکن بویله واقع اولمق نادر در نته کیم بعض قرائت ده (یرید الاخرة)
 آیت کریمه سنده اولدینی کبی که الاخرة جرایله اوقمشدر (یرید ثواب
 الاخرة) دیمکدر. و بعض مضاف الیه حذف اولنور که شو تقدیرده اکر
 مضاف اوزره مثل محذوفه مضاف اولان عطف اولنور ایسه ویاخود
 مثل محذوفه مضاف اولان تکرر ایله ایسه شواکی صورتده مضاف علی
 حاله باقی قالور شق اول نته کیم شاعرك :

يامن رأى عارضا اسر به بين ذراعى وجبهة الاسد

شعرنده مصرع ثانیده اولدینی کبی که تقدیر کلام (بین ذراعی الاسد وجبهة
 الاسد) در (ذراعی) لفظنک اصلی ذراعیندر تشبیه صیغه سیله (الاسد) ه
 مضاف اولمغله نون ساقط اولوب (ذراعی الاسد) اولمشدر. پس مضاف
 الیه اولان (الاسد) حذف اولنوب وجبهة الاسد ذراعی اوزره معطوف
 اولمغله مضاف اولان ذراعی علی حاله باقی قالمشدر که ساقط اولان نون
 اعاده قیلنا مشدر (ذراعی الاسد) دنیلان ایکی یلدزدر وجبهة الاسد
 دنیلان درت یلدزدر که بونلر منازل قردندر و مصرع اولده عارض سحاب
 معناسنه در واسر بناء مجهول صیغه بی اوزره نفس متکلم وحده در (مفاد
 شعر) ای شول کیمسه که (ذراعی الاسد) ایله (جبهة الاسد) بیننده
 بر سحاب کوره رك آتی بکانبشیر اتمکله انکله مسرور قیلنیورم دیمکدر
 و شق ثانی نته کیم شاعرك یاتیم تیم عدی لا ابالکم شعرنده واقع اولدینی کبی که
 یوقار یلرده بحثی مرور ایلدی.

واما شو ذکر اولنان ایکی صورتک غیرنده مضاف اکر غایتدن یعنی جهات
 سندن بریسی اولیوب وحسب ولاغیر ولیس غیر لفظلری دخی دکل ایسه
 مضاف الیه دن عوض اوله رق مضافه برتنوین ویریلور و مضاف علی حسب
 العوامل معرب قیلنور وکلا آتیناه و حیث و یومئذده اولدینی کبی واکر

غایتدن بریسی ویاخود حسب ولاغیر وایس غیر لفظلرندن بری اولوب
ومضاف الیه منویاً حذف اولمش ایسه مضاف ضم اوزره مبنی قینور
واما مضاف الیه نسیا منسیا محذوف اولوب ویاخود مضاف الیه دن عوض
اوله رق مضافه بر تنوین ویریلور ایسه مضاف شو صورتده دخی علی
حسب العوامل معرب اولور بوندن اشاغیده مبحث مبنیده دخی بحث
توارد ایده جکدر وعلیک التدبر والاعتبار .

التوابع

درس ۱۰۹

خفی اولیه که بالاصاله معمول اولنلر منفهم اولدی ایسه بالاصاله معمول
اولنلره تبعیتله معمول اولنلرکه (معمول بالتبعیه) دینور بش دانه در
(صفت) (عطف بالحروف) (تأکید) (بدل) (عطف بیان) در
بونلردن هر برینه تابع و جمله سنه بردن توابع دینور ایچنده بولندیغمز اشبو
مطلب مطلب اسم اولمغله بو راده اقسام اسمدن اولان مرفوعات ومنصوبات
ومجرووراتک توابعندن بحث ایلیمه جکدر .

توابع اسمک تعریفنده ابن حاجب حضر تلری (کل ثان باعراب سابقه من
جهة واحدة) بیور مشدر یعنی (تابع) سبقت ایدن متبوعنه نسبتله مرتبه
ثانیه ده یعنی آندن رتبه متأخر اولان کلمه درکه ایکیسنده دخی اعرابی
اقتضا ایدن بر معنا اوله رق اعرابلری جهت واحده معینه دن ناشی اولدینی
حالده نوع اعرابده سابقنک اعرابنه ملتبس اولمشدر که ایکیسنک دخی
اعرابی بر جنسنددر دیمکدر .

مثلاً (جاءنی زید العالم) قولزده (زید) موصوف اولمغله متبوع و (العالم)
زیدک صفتی اولمغله تابع و هر ایکیسنده دخی اعراب رفع اولوب ومقتضی
اعراب حیثتک زید عالمه نسبت ویریلمسندن حاصل زید عالمک فاعلیتدر
زیرا قصد متکلمده زیده نسبت اولنان حیثت مطلقاً زیده اولیوب بلکه
تابعیه ملحوظ یعنی علم ایلیمه متصف زیده در .

(تابع ومتبوعک اعرابی بر نوع واحدن اولسی) قیدیه مرتبه ثانیه ده

بولنه رفق فقط اعرابی سابقك اعرابی نوعندن اولیـ انلر مثلاكان وان
بابلرینك خبرلری کیلر خروج ایتشدرد .

و (تابع ایله متبوعك اعرابلری جهت واحده معینه دن ناشی اولسی) قیدیه
مبتداتك خبری وظننت واعطیت بابلرینك ایکنجی مفعوللری خروج
ایلمشدر . زیرا مبتدا ایله خبرده عامل هر نقدر معنای ابتدا یعنی هر برینی
لاجل الاسناد عوامل لفظیه دن تجرید ايسـ ده فقط لاجل الاسناد عوامل
لفظیه دن تجرید برمسند الیه اقتضا ایتسی جهتله مبتدای و برده مسند اقتضا
ایتسی جهتله خبری رافع بولمـ شدرد و (ظننت) بابی برمظنون فیه اقتضا
ایلمسی جهتله مفعول اوانی و برمظنون اقتضا ایلمسی جهتله مفعول ثانینسی
ناصب اولمشدر واعطیت بابی براخذ و برماخوذ اقتضا ایلمکله مفعول اولنی
معنا آخذ اولسی جهتله و مفعول ثانینسی مأخوذ اولسی جهتله منصوب
قیلمـ شدرد و قس علیه . و خفی اولیه که تابع متبوعـ نه نوع اعرابده یعنی رفع
ونصب و جر و جزمده موافق اولمیدر یو خسه صفت اعرابده موافقت
لازم دکلدر پس جائزدرکه تابع و متبوعك اعرابی ایکسی دخی لفظی اوله
جاءنی زید العالم قولمـ زده اولدینی کی و جائزدرکه ایکسی دخی تقدیری
اوله جاءنی الفتی القاضی قولمـ زده اولدینی کی و جائزدرکه ایکسی دخی محلی
اوله ضربت انت قولمـ زده اولدینی کی .

و جائزدرکه متبوعك اعرابی لفظی و تابعك اعرابی تقدیری و یاخود محلی
اوله جاءنی زید الفتی و (جاءنی زید الذی اکرمنی) قولمـ زده اولدینی کی
و یاخود تابعك اعرابی لفظی و متبوعك اعرابی تقدیری و یاخود محلی اوله
جاءنی موسی العالم و جاءنی هؤلاء الرجال قولمـ زده اولدینی کی و جائزدرکه
متبوعده اولان اعراب اعراب حقیقی اوله امثله مذکورده اولدینی کی
و یاخود اعراب حکمی اوله مثلا یزید العاقل قولمـ زده اولدینی کی زیرا اشبو
قولمـ زده زید مقدر ادعو کله سنك مفعولی اولمـ غله حقیقه اعرابی نصبدر
لکن منادای مفرد معرفه اولمـ غله ضم اوزره مبنی قیلنشدر شـ و صورتده
زیدك ضمی حقیقه اعراب دکلدر لکن اعراب حکمنده اولمـ غله صفتی اولان

العاقله ضم و نصب جائز کورلمشدر و یاخود جائزدرکه متبوعده اولان
اعراب اعراب وهمی اوله شاعرك .

وبدالی انی لست مدرك مامضى ولاسابق شيئاً اذا كان جائئاً

شعرنده اولدینی کی زیرا شعر مذکورده مدرك لفظی هر تقدیر لفظاً
منصوب لیس نك خبری ایسهده فقط لیس نك خبرنده اکثر بر حرف جر
زیاده قیلنور مثلاً لیس زید بقائم قولمزده اولدینی کی شوجهتله مدرك
لفظنده جرایله اعراب توهم اولنهرق (سابق) لفظی جرایله مدرك اوزره
عطف اولمشدر شو تقدیرده تابع متبوعنده توهم اولنان اعرابه تابع بولمشدر.

درس ۱۱۰

(بحث النعت) توابع خمسهدن اولکیسی صفتدر (صفت) تعبیری بری
(عام) دیگری (خاص) ایکی اعتبار اوزره اطلاق اولنور (باعتبار العام
صفت) هر برکننده معنای وصفیت بولنان لفظه اطلاق اولنور كرك تابع
واقع اولوب و كرك اولیه شواعتباره كوره (زید قائم) و جائنی زید راكباً
قوللرمزده خبر و حاله دخی صادق اولور و باعتبارالخاص صفت تابع یدل
علی معنی فی متبوعه مطلقاً دینمکه معرفدرکه بوراده . انحن فیهمزدور و بعض
نعت دخی اطلاق اولنور متبوعیه بر لکنده هیئت ترکیبیه سیله متبوعنده
مطلقاً بر معنایه دلالت ایلیان تابع در .

اشبو صفت بعض فعلیه اولور جائنی زید قائم قولمزده اولدینی کی و بعض
مدرك بالبصر اولور که صفت جلیه دینور جائنی زید طویل قولمزده اولدینی
کی و بعض مدرك بالبصر اولیان هیئت اولور که صفت عزیزیه و طبیعیه
دینور جائنی زید کریم قولمزده اولدینی کی و بعض نسبیه اولور جائنی زید
هاشمی قولمزده اولدینی کی .

صفتك فائده سی نکردهده تخصیص افاده ایلر رجل عالم قولمزده اولدینی کی
و معرفدهده توضیح افاده ایلر زید الظریف قولمزده اولدینی کی (تخصیص)

نکرانده تقلیل اشتراك و (توضیح) معارفده رفع احتمالدن عبارتدر
 وبعض مجرد ثنا ایچون اولور (بسم الله الرحمن الرحيم) ده (الرحمن)
 والرحيم کبی وبعض ذم ایچون اولور (اعوذ بالله من الشيطان الرجيم) ده
 الرحيم کبی و بعض ترحم ایچون اولور زيد الفقير قولمزده اولدینی کبی
 و بعض تأکید ایچون اولور نفخة واحدة وذهب امس الدابر قوللرمزده
 اولدینی کبی لکن شومذکور موصوف قبل الوصف مخاطب عننده معلوم
 اولدقدهدر شو تقدیرده ینه تخصیص ویاخود توضیح قیلندن اولمش اولور.

درس ۱۱۱

خفی اولمیه که صفتك تعددی جائزدر جائنی الرجل العالم الفاضل قولمزده
 اولدینی کبی و بیلملیدر که صفتلر غالبا مشتقاندن واقع اولور شو جهتله اکثر
 نحات صفتده اشتقاقی شرط توهم ایلیوب و غیر مشتقندن صفت واقع اولنلری
 مشتق ایله تأویل ایلدیلر لکن (ابن حاجب) رحمه الله مادامکه بر غیر مشتقك
 وضعی متبوعنده بر معنایه دلالت ایلمك غرضیچون اولدقده صفت وقوعنده
 مشتقندن فرقی یوقدر بیوردیلر شو (دلالت) بعض جمیع استعمالانده اولور
 (تیمی) و (ذیمال) لفظلرینك وضعی کبی که همیشه (تیمی) بر ذاتك تمیم
 قبیله سنه نسبتی اولدیغنه و (ذومال) بر ذاتك صاحب مال اولدیغنه دلالت
 ایلیوب جمیع استعمالاتده مثلا (مررت بر رجل تیمی اوزیمال) قوللرمزده
 صفت واقع اولمشلردر و یاخود بعض استعمالاتده واقع اولور مررت
 بر رجل ای رجل قولمزده ای رجل کبی شو ترکیب نخونده کمال رجولیه
 دلالت ایلمسی اعتباریله صفت وقوعی صحیح اولمش و مثلا ای رجل عندك
 قولمزده شو معنایه دلالتی اولمامغله صفت واقع اوله مامشدر و مررت بهذا
 الرجل قولمزده (الرجل) کبی که شو ترکیبده هذا بر ذات مبهمیه والرجل
 ذات معینیه دلالت ایلیوب خصوصیت ذات معینیه ایسه ذات مبهمده
 حاصل معنا منزله اولمغله صفت واقع اوله یلیوب دیگر موضعلرده شو
 معنایه دلالتی اولمامغله صفت واقع اوله مامشدر و (مررت بزید هذا)
 قولمزده هذا کبی شو ترکیبده هذا ذات زیدده حاصل مشارالیه اولمق

معناسته دال اولمغله صفت واقع اولوب شومعنايه دلالتی اوله میان مواضع اخرده صفت وقوعی غیر صحیح در .

ودخی معلوم اوله که حقیقه نکره واقع و یا خود الف لام عهد ذهنی ایله معرف اوله رق حکماً نکره واقع (برمفردی) جمله خبریه ایله متصف قیلمق جائزدر و شو تقدیر ده لاجل الربط اول نکره یه راجع بر ضمیر لازمدر جائنی رجل قام ابوه قولمزده اولدینی کی و بعض وجود قرینه عننده حذف اولنور (واتقوا یوماً لاتجزی نفس عن نفس) آیت کریمه سنده اولدینی کی که لاتجزی فیه دیمکدر .

وبیلنمسی لازمدر که نکره حکمیه جمله ایله وصفلنور ایسه انجق جمله فعلیه مضارعیه ایله وصفلنور شاعرك ولقد امر علی الیئم یسبنی قولنده اولدینی کی نته کیم مفردات دن اوزرینه لامک دخولی ممتنع اولانله وصفلنور مررت بالرجل مثلك و مررت بالرجل خیر منك قولار مزده اولدینی کی .

وبیلملیدر که جمله معرفه و نکره اوله من زیرا تعریف و تنکیر عوارض ذاتندر شو تقدیرده (نکره) نك جمله خبریه ایله وصف لئمی نکره ایله تأویلی صحیح اولسی جهتله نکره یه مناسبتی بولندیغندندر که مثلاً (قام رجل ذهب ابوه) قولمز قام رجل ذاهب ابوه منزلنده در .

درس ۱۱۲

خفی اولیه که صفت ایکی حالدن خالی اولمز یا موصوف ایله قائم بر حال اولور مررت برجل حسن قولمزده حسن کی (حسن) ذات رجل ایله قائم بر حال در و یا خود موصوفک متعلقنک حالی اولور که یعنی متعلق سببیه حاصل بر صفت اعتباریه اولور (مررت برجل حسن غلامه) قولمزده حسن کی حسن غلامه قائم اولوب و غلام رجلک مملوکی اولمغله رجلک متعلقدر و مررت برجل حسن وجهه وزید الحسن نفسه قولمزده حسن دخی شق ثانی قیلندندر که کوزلجه فهمی ذهن متوقده غیر خفیدر .

(قسم اول) یعنی وصف بحال الموصوف دلالت تضمینیه لکله متبوعنده مطلقا بر معنایه دلالت ایدر و امور عشرده یعنی رفع و نصب و جر و تعریف و تنکیر و افراد و تشیه و جمع و تذکیر و تأنیث ده موصوفه تابع اولور و هر بر ترکیبده اشبو امور عشردن درت دانه سی تحقیق ایلر .

(قسم ثانی) یعنی وصف بحال متعلق الموصوف دلالت التزامیه لکله متبوعنده مطلقا بر معنایه دلالت ایدوب و امور عشردن بش اولکننده یعنی رفع و نصب و جر و تعریف و تنکیرده موصوفه تابع اولور . و هر بر ترکیبده شو بش دانه دن ایکسی تحقیق ایلر . و امور عشردن بش باقی قالانده فعل کییدر . فعل کبی اولسنی آکلق ایچون فعلک اولجه برنبذه حالتی بیان ایلیم (برفعلک) فاعلنه نظر اولنور مفرد و یاخود تشیه و یاخود جمع ایسه اول فعلک افراد و غیبتی واجب اولور . و اگر مذکر ایسه تذکیری واجب اولور . و اگر مؤنث حقیقی و آدمی دن اوله رق مفرد و یاخود مثنی اولوب فعلنه متصل و فعل دخی افعال متصرفه دن ایسه تأنیثی واجب اولور . و دخی جمع مذکر مکسر عاقله راجع ضمیرک غیری هر بر مؤنثه راجع ضمیره اسناد اولنان فعلک دخی تأنیثی واجب در . و شوایکینک غیرینه یعنی بر مؤنث غیر حقیقی به . و یاخود آدمین دن اولیه رق مؤنث حقیقی به . و یاخو آدمین دن جمع صیغه سی اوزره اوله رق مؤنث حقیقی به . و یاخود فعلنه غیر متصل مفرد و یا مثنی اوله رق آدمین دن مؤنث حقیقی به . و یاخود جمع مذکر مکسر عاقل ضمیرینه . اسناد اولنان فعلک تذکیر و تأنیثی جائزدر . اشته و (صف بحال متعلق الموصوف) ده دخی امور خمسة باقیده وجه مذکور اوزره نظر و عمل ایدرسک فاعلی مفرد و یاخود تشیه و یاخود جمع ایسه صفتک افرادی واجبدر و فاعلی مذکر ایسه تذکیری و مؤنث حقیقی مذکور ایسه و یا صفت ضمیر مؤنثه مسند ایسه تأنیثی واجب و شو صورتلرک غیرنده تذکیر و تأنیثی جائزدر و اشبو قسم ثانینک خمسة باقیده فعل کبی اولسنندن ایچون (قام رجل قاعد غلما نه) ترکیبی حسن کورلمشدر نته کیم یقعد غلما نه دینک دخی مستحسندر و قام رجل قاعدة غلما نه و یقعد غلما نه دخی دینور لکن (قام رجل قاعدون غلما نه) ترکیبی ضعیفدر زیرا اشبو ترکیب قام رجل

يقعدون غلمانہ منزلندہ اولوب حالبوکہ بيسان اولنديغى اوزره فاعل مفرد
وياثنيه وياجمع اولسه عاملك افرادى واجيدر .

فقط قام رجل قعود غلمانہ ترکیبی من غیر حسن جائز کورلمشدر زیرا
قعود هر نقدر قاعدون کبی (قاعد) ک جمعى ايسه ده لکن جمع مکسر اولوب
فعله مشابه اولان براسم ايسه جمع تکسير ايله فعله موازنت ومناسب بدن
خروج ايله جکندن شو ترکیب قام رجل يقعدون غلمانہ منزلندہ کورلماشدر

درس ۱۱۳

خفی اولیسه که موصوف صفتندن اعرف ویاخود تعریفده اکا مساوی
اولمیدر (مضمرات) اعرف معارف اولوب محتاج ایضاح اولماغله موصوف
واقع اوله مزلر واعرف معارف بولندقلرندن ومعنای وصفیه یعنی برذات ايله
برمعنائک قیامنه دالئلری اولدیغندن صفت دخی اوله مزلر .

وبیلمیدر که موصوف صفتندن اعرف اولمق ویاخود تعریفده صفتنه
مساوی بولمق لازم اولدیغندن (معرف باللام) اولان کله ینه معرف باللام
ایله ویاخود معرف باللامه تعریفده مساوی اولدیغندن اسم موصول ايله
وصفونور (جاءنی الرجل الفاضل) و (جاءنی الرجل الذی کان عندنا) امس
کبی ویاخود معرف باللام مثله بالواسطه ویاخود بلاواسطه مضاف اولان
کله ايله وصفونور (جاءنی الرجل صاحب الفرس) و (جاءنی الرجل صاحب
لجام الفرس) کبی لکن (باب هذا) یعنی اسماء اشاره آنجق معرف باللام
ایله وصفونورلر ودخی اسم موصول صله سیله (ذواللام) منزلندہ اولمغله
ذواللامه حملاً اسم موصول ايله دخی وصفونور لکن کندی مثلیله یعنی اسم
اشاره ايله وصفونمز زیرا اسماء اشاره ده بحسب اصل الوضع ابهام اولمغله
جنسنى بیان ایلمک اقتضا ایدر که بوده کندی مثلیله اوله مز و مضاف الیه دن
اکتساب تعریف ایلیان مضاف ايله دخی بیان لایق اوله مز که بر مستعیردن
استعاره ایلمک کیدر (شوصورته) بر اسم اشاره آنجق معرف باللام
ویاخود اسم موصول ايله وصفونور مررت بهذا الکرم ومررت بهذا الذی
کرم کبی .

اشته ذواللام ايله وصفلنمسی جنسنى بيان ايله رفع ايهام ايجون ملتزم اولمغله
مررت بهذا الابيض ترکیبی ضعیفدر زیرا (الابيض) هر تقدیر ذواللام
ایسهده لکن عام اولوب برجنسه مخصوص اولمامغله آنکه جنس مبهم تین
ایلیه مرفقط مررت بهذا العالم ترکیبی حسن درکه هیچ اولمز ایسه العالم
دینمکه مشار الیهک انسان و بلکه رجل اولدیغنی تعیین ایلر .

درس ۱۱۴

(بحث العطف) توابعك ایکنجیسی عطفدر لغة عطف الوسادة اذا
تھاها ماده سندن مصدر اولوب برسنهیی ایکی قات ایلمک معناسنه ودخی
میل و اماله مغالرینه کلورکه معنای اصطلاحیسنه وجه مناسبتی اولی الابصاره
غیر خفی در و (اصطلاح نحوین) ده عطف (تابع مقصود بالنسبة مع
متبوعه يتوسط بيته و بین متبوعه احد الحروف العشرة) دینمکه معرفدر
یعنی عطف برتابعدرکه کلامده واقع اولان نسبت ايله متبوعيله بیله
مقصودلردرکه یامعطوف و معطوف علیہک بر شیئه نسبت اولنملری قصد
اولنشددر زید قائم و قاعد کی قیام و قعودک زیده نسبتی مقصوددر و یاخود
برشیئتک معطوف و معطوف علیہه نسبت ویرلسی قصد اولنشددر جاءنی زید
و عمرو کی حیثیتک زید و عمروه نسبتی مقصوددر .

ودخی تابع ايله متبوع یعنی معطوف ايله معطوف علیه بیننده حقيقة عطف
ایچون اولان اون حرفدن بریسی توسط ایلرکه آنلر (واو) (فا) (ثم)
(حتی) (او) (اما) (ام) (لا) (بل) (لکن) در تفصیلی انشاء الله
مبحث حرفده کلور .

خفی اولیه که اسملر یکدیگری اوزره عطف اولنمقده درت قسم اوزره
تصور اولنورکه اسم ظاهر اسم ظاهر اوزره مضمیر مضمیر اوزره اسم ظاهر
مضمیر اوزره مضمیر اسم ظاهر اوزره عطف اولنمقددر بونلردن بعضیلرینک
یکدیگری اوزره عطفده بعض شرطلر وارددرکه مفید و مختصر اوله رق
زپرده بیان اولنه جقددر .

اگر ضمیر مرفوع متصل اوزره برکله عطف اولنور ايسه اولجه برضمير منفصل ايله تآکيد اولنوب ثانياً اوزرينه عطف اولنور ضربت انا وزيد وعمر و ضرب هو و غلامه قوللر مزده اولديني کي زيرا ضمير مرفوع متصل اتصالي اولان کله دن انفصالي جائز اولماغله لفظاً جزء کي اولديني و فاعل اولوب فاعله فعلندن جزء کي اولماغله معنا دخی جزء کي بولنديني جهتله اوزرينه بلا تآکيد عطف اولنمق برکله نك بعض حروفی اوزرينه عطف ايلمک کي در لکن اولجه تآکيد اولنبدقده متصل اولديني کله دن جواز تفردی مفهم اولوب برنوع استقلال تحصيل ايدر که من حيث الحقيقه منفصل ايدو کي اکلاشييلور شو صرده اول ضمير منفصل مؤکد اوزره عطف اولنمق وارد خاطر ايسه ده لکن معطوف معطوف عليه حکمنده اولماغله معطوفك دخی تآکيد اولمسی لازم کلور که باطلدر .

واگر ضمير مرفوع منفصل اوزره عطف اولنور ايسه (ما ضربت الا انت وزيد) کي جزئيت لفظيه بولماغله و اگر ضمير منصوب متصل اوزره عطف اولنور ايسه (ضربتك وزيدا) کي جزئيت معنويه بولماغله بولمدره بر منفصل ايله تآکيده حاجت يوقدر و بيلمليدر که ضمير مرفوع متصل ايله معطوفی بيني حرف عاطفدن اول و يا صکره فصل اولنور ايسه تآکیدی ترك جائز اولور ضربت اليوم وزيد قولمزدده و دخی ما اشرکننا ولا آباؤنا قول شريفنده اولديني کي و بعض مع وجود الفصل دخی تآکيد اولنور فککبو افيا هم والغاوون آيت کریمه سنده اولديني کي .

واگر ضمير مجرور متصل اوزره برکله عطف اولنور ايسه خافض يعني جار کرک حرف و کرک اسم اولسون اعاده اولنور ضربت بك وزيد و المال بيني و بين زيد قوللر مزده اولديني کي زيرا مجرورك جارينه اتصالي فاعلك فعلنه اتصالنندن اشددر زيرا فاعل ضمير متصل اولمدقده فعلندن انفصالي جائزدر مجرورك جارندن انفصالي ايسه اصلاً جائز دکدر شو جهتله جار مع المجرور کله

واحدہ منزلندہ بولمغلہ بلا اعادۃ الجار عطف ینہ برکلمہ نک بعض حروف
اوزرہ عطف کبی اولور بوايسہ تجویز اولنہ من مجرور ایچون ضمیر منفصل
بولنمديغندن ضمیر مرفوعی استعارہ ده اقوایی ادنی مقامندہ اقامہ دیمک
اولہ خغندن برنوع ابتذال و مذلت بولنديغندن ہر حالہ عامل اولی اعادہ دن
بشقہ بر جارہ متصور اولہ من شونیدہ بیللمیدر کہ بورادہ و اوایلہ عطف
اولنان جار مع المجرور اولہ رق جار مع المجرور اوزرہ می عطف اولنمشدر
یوخسہ معطوف یالکز مجرور اولہ رق مجرور اوزرہ می عطف اولنمشدر
یعنی مثلاً مررت بک و بزید قولزده معطوف بزید اولہ رق بک اوزرہ می
عطف اولنمش و یا خود معطوف یالکز زید اولوب ضمیر مجرور اولان کاف
اوزرہ می معطوف بولنمشدر و بردہ شق ثانیدہ مجرور ک جری اعادہ اولنان
جار ایلہ میدر یوخسہ اولکی جار ایلہ می مجرور اولنمشدر بو خصوصہ
اختلاف اولنمشدر مقرون تحقیق اولان معطوف آنحق مجرور اولان کلمہ در
نتہ کیم شیخ رضی النظر المستقیم یقتضی ان القول بالثانی اولی دیمشدر زیرا
المال بینی و بینک قولزده معطوفک آنحق مجرور ایدوکی متعیندر زیرا بین
لفظی امور نسبہ دن اولوب ذاتا ایکی طرف اقتضا ایدہ جکندن ایکنجی بین
ایچون بر معنا اولیوب عدم منزلندہ در مجرد علت مذکورہ دن ایچون اعادہ
اولنمشدر و مررت بک و بزید قولزده دخی بآء ثانینک ینہ علت مذکورہ دن
ایچون اعادہ اولندیغنی معلوم اولمغلہ ہر حالہ معطوفک) یالکز مجرور اولسنہ
حکم اولنحق اول اولور وشو صورتدہ اول اولان معطوف مجرور ک جری
اعادہ اولنان جارہ حمل اولنمقددر نتہ کیم شیخ رضی شرحندہ والاوی ان یحیل
جرہ علی العامل المتکرر اذلیس باقل من الحروف الزائده نحو کفی بزید
فلنہا لاتلغی مع زیادتها دیمشدر .

و بعضیلر جر معطوف عامل اول ایلہ اولوب عامل ثانینک وجودی بر امر
لفظیدن ناشی اولمغلہ عدم منزلندہ در دیدیلر نتہ کیم لا ابالزید قولمز نحو ندہ
سبویہ زیدک جری اضافتہ اولوب لام ظاہرہ ایلہ دکلدر دیمشدر کہ اشبو
ذہابی مقویدر لکن اقوی اولان شیخ رضینک اختیار ایلدیکیدر شو بیان
اولنان بصر یلرک ذہابیدر کہ ضمیر مرفوع متصل اوزرہ عطف اولندقدہ

بر ضمیر منفصل ایله تا کید ایدر لر و بلا تا کید و لافصل عطفی دخی علی قبیح جائز کورر لر و ضمیر مجرور متصل اوزره عطف اولندقده حال سعه واختیارده اعاده جاری لازم کورر لر و حال اضطرارده ترک اعاده بی دخی تجویز ایدر لر لکن کوفیلر ضمیر مرفوع متصل اوزره بلا تا کید و لافصل عطفی من غیر قبیح جائز کوردکلری کبی ضمیر مجرور متصل اوزره بلا اعاده جار عطفی دخی مطلقاً تجویز ایدوب (فاذهب فبابك والايم ، من عجب) شعر یله و دخی (تساء لون به والارحام) آیت کریمه سیله استدلال ایدر لر که شعر مذکورده (والايم) (بك) ده اولان ضمیر مجرور اوزره و آیت کریمه ده (والارحام) (به) ده اولان ضمیر مجرور اوزره بلا اعاده جار عطف اولمشدر دیر لر لکن شعر مذکورده و او عاطفه اولیوب بلکه مصاحبت ایچوندر که (والايم) (مفعول معه) در و یاخود عطف ایچون اولوب ضروره شعر یه دن ایچون واقع در و آیت کریمه ده جرایله والارحام قراءت حمزه اولوب حمزه ایسه کوفی در و یاخود جائز که و او قسم ایچون اوله و یاخود الارحام نصب ایله و قنوب جرایله مجرور ک محلی اوزره معطوف اوله دینه بیلور .

درس ۱۱۶

خفی اولیه که معطوف علیه ماقبلنه نظراً جائز و ممتنع اولان احوال عارضه ده اول احوال عارضه بی مقتضی اولان معنا (معطوف) ده متنی اولماق شرطیله (معطوف) معطوف علیه حکمنده در که (معطوف علیه) ده ماقبلنده اولان (عامل) رفع و نصب و جردن قنغیسنی اقتضا ایدرایسه اول اعراب معطوف ده دخی بولنور و معطوف علیه جمله اوله رق ماقبلنه عائد بر ضمیری مشتمل ایسه اول ضمیر (معطوف) ده دخی اولور (الذی قام ابوه و قعد اخوه زید) قولزده اولدینی کبی .

(معطوف علیه ماقبلنه نظراً عارض اولان احوالده معطوف معطوف علیه حکمنده در) دیمکه معطوف علیه من حیث نفسه عارض اولان احوال دن احتراز ایدرز مثلاً معرب و مبنی اولق و تعریف و تنکیر و افراد و تشیه و جمع کبی که بونلرده معطوف معطوف علیه حکمنده اولق غیر لازمدر .

و (معطوف عليه ماقبله نظراً عارض اولان احوالی مقتضی اولان معنا (معطوف) ده (منتفی اولماق شرطيله) ديمکله يارجل و الحارث قولمز مثلندن احتراز ايلرزکه (الحارث) (رجل) اوزره معطوف اولوب الف لامله معرف در (رجل) ايسه لامدن مجرد اولمغله بونده معطوف معطوف عليه حکمنده اولماشدر .

زيرا ايکي ادات تعريفک جمعی جائز اولما مغلّه حرف ندا ايله الف لامک جمعی جائز اوليوب (يارجل) ده رجل لامدن مجرد اولمشدر (الحارث) ده ايسه نومعنا غير موجود اولمغله معرف باللام بولنمشدر .

ودخی بياملیدر که افراد و تعريف ده معطوف معطوف عليه مائل اولدقده معطوف عليه کړک ماقبله و کړک نفسنه نظراً عارض اولان احوالده (معطوف) معطوف عليه حکمنده در شواجلدن (يازید و عمرو) قولمزده معطوف عليه اولان (زید) مفرد و معرفه اوله رق ضم اوزره مبنی اولدینی کبی (معطوف) اولان (عمرو) دخی مفرد و معرفه اولمغله ضم اوزره مبنی بولنمشدر .

واما (يازید و عبدالله) قولمزده (زید) مفرد و معرفه (عبدالله) ايسه مضاف اولوب (زید) ه مائل اولما مغلّه زید ضم اوزره مبنی اولوب (عبدالله) ايسه منصوب اوله رق معرب بولنمشدر که بناسی ممتنع اولمشدر .

اشته معطوف معطوف عليه حکمنده اولدینی اجلدن (مازید بقائم و لا ذاهب عمرو) و (مازید قائماً و لا ذاهب عمرو) قوللر مزده (ذاهب) لفظنده آنحق رفع جائز اولمشدر زيرا مثال اولده ذاهب مجرور او قنسه قائم اوزرینه و مثال ثانی ده منصوب او قنسه قائماً اوزرینه معطوف اولسی لازم کلور ایدی که (زید) ک خبری اولور ایدی حالو که (زید) ک خبری اولسی صحیح دکلدر .

زيرا (قائم) ده مستکن (زید) ه عائد اولان ضمیر (ذاهب) ده یوقدر پس ذاهب خبر مقدم اولوب عمرو مبتدای مؤخر بولنش وشو ترکیب جمله یی جمله اوزره عطف قیلندن اولمشدر نحاتک (الذی يطير في غضب زيد الذباب) ترکیبی تجویز ایلملری (فا) نک عاطفه اوليوب فاء سببیه اولدیغندندر شو

تقدیرده (یغضب) یطیر اوزره معطوف اولوب حالبوکه (یطیر) ده موصوله
عائد ضمیر بولنوب یغضبده یوقدر ومع هذا شو ترکیب جائزدر دینه رک
اعتراض اولنه من (معنای ترکیب) شول نسنه که اوچار واول سببله زید
غضب ایلر سینک دنیلان حیواندر دیمکدر .

درس ۱۱۷

خفی اولیه که برعاملک (بر) ویا (ایکی) ویا (دهها زیاده) معموللری اوزره
برحرف عطف ایله (عطف) بالاتفاق جائزدر (حسن زید و بکر) و (ضرب
زید عمرو و ابکر خالد) و (اعلم زید عمرو و ابکر آفاضلاً و خالد بشرأ محمدأ علماً)
کبی . واما اوچ و اوچدن زیاده عامللر معموللری اوزره برحرف ایله عطف
بالاتفاق جائز دکلدرد . واما عاملین (مختلفین) ک ایکی معموللری اوزره بر
حرف عطفله ایکی اسمی عطف مختلف فیه در که بونده درت مذهب
واردرد .

(مذهب اول) نجاتدن سبویه هرکز تجویز ایلمامشدر زیرا حرف
واحدک عاملین مختلفین مقامنده قائم اوله بیلیمک اقتداری یوقدر بعضیلر
بورائی جمهوره نسبت ایلمشدر .

(مذهب ثانی) نجاتدن برجماعتک مذهبیدر که ابن حاجب و استاذی
(اعلم شتمری) دخی بوجامعتدندر وبعض محققین جمهوره اسناد اولمغه
بومذهبی احق والیق کورمشلردر بونلرک ذهابی عطف مذکور علة
منبوره دن ایچون کذا جائز دکلدرد آنجق مجرور تقدم ایدر ایسه شو
صورتده جائزدر (فی الدار زید والحجرة عمرو) و (ان فی الدار زیدا
والحجرة عمرو) قولمزده اولدینی کبی اشبو جوازی (اعلم) آخرکلامک
اولنه خبرلر مخبر عنملری اوزره مقدم بولمقده استواسیله تعلیل ایدوب
(فی الدار زید و عمرو والحجرة) ترکیبئی تجویز ایتماش و لکن ابن حاجب
شو تعلیل (زید خرج غلامه و عمرو اخوه) مثلتک دخی استواء طرفین
بولندیغندن جوازیی استلزام ایلدیکندن راضی اولیوب آنجق صورة
سماع اوزره اقتصار ایلمشدر زیرا مخالف قیاس اولان آنجق مورد سماع
اوزره اقتصار اولنور .

(مذهب ثالث) اخفشك رأييدركه عطف مذکور جائز اولیوب آنجق
 احد عاملین جار اوله رق و (معطوف مجرور) حرف عاطفی ولی ایله کده
 كرك جار تقدم ایدوب و كرك تأخر ایلیه و یاخود (لا) کله سیله منفصل
 اولدقده شوصورتلرده جائزدر دیشدر (فی الدار زید والحجرة عمرو) و
 (زید فی الدار والحجرة عمرو) و (ماكل سوداء تمرة ولا بیضاء شحمة) و
 (ما فی الدار زید ولا الحجرة عمرو) و (ما زید بقاءم ولا قاعد عمرو)
 قوللر مزده اولدینی کی .

(مذهب رابع) (فرا) نك ذهابیـدرکه عطف مذکور مطلقاً جائزدر
 واشبو جوازه شاعرك .

اكل امری تحسین امرأ و نار توقد باللیل ناراً

شعر یله استدلال اولنمشدرکه (نار) (كل) لفظنك مضاف الیهی اولان
 (امری) اوزره و (ناراً) (تحسین) فعلنك مفعول ثانسی اولان
 (امرأ) اوزره بر حرف عطفله معطوفدر (تحسین) نك مفعول اولی
 كل امری در و (توقد) نك اصلی تتوقددر (تلظی) ده اولدینی کی احدی
 التائین حذف اولنمشدر (معنای شعر) آیا هر آدمی آدم و کیجده هر
 علولنان آتشی آتشی ظن ایدرسك دیمكدر اشبو شعره جانب سبویه
 و جمهوردن ضرورة شعریه اوزره محمول اولق اوزره جواب ویرلشدر
 و دخی كرك اشبو شعره و كرك (فی الدار زید والحجرة عمرو) و (ماكل
 سوداء تمرة ولا بیضاء شحمة) نحوینه حرف جر و مضاف تقدیر یلده
 جواب ویریلورکه شعر مذکورده (و نار) و كل نار و مثاللرده (والحجرة)
 و فی الحجرة (ولا بیضاء) و لا كل بیضاء تقدیرنده در دینلور شـوصورتده
 شعر مذکور بر عاملك معمولین مختلفینی اوزره عطف قیلندن و مثالین
 مذکورین عطف جمله علی الجملة قیلندن اولوب متنازع فیه دن اوله مز .
 فافهم وقس فاعتبر

(بحث تأکید) توابع خمسة نك اوچنجیسی تأکیددر (تأکید) متبوعك منسوب و یاخود منسوب الیه اولمقدمه حال و شاتی سامع عندنده ثابت و مقرر قیلان و یاخود متبوعك كافه افرادینه شامل اولدیغی ارئه ایلان برتابع اولوب (تابع یقرر امرالمتبوع فی النسبة او الشمول) دینمکه معرفدر بوده ایکی قسم اوزره در که یا لفظی و یاخود مغوی اولور .

(تأکید لفظی) لفظ متبوعی حقیقه و یا حکماً تکریر ایلیمکه حاصل اولوب جمیع الفاظده یعنی اسماء و افعال و حروف و جمله لرده و مرکبات غیر اسنادیده جاری اولور (ضرب زید زید) و (ضرب ضرب زید) و (ان ان زیداً قائم) و (ضرب زید ضرب زید) و بعابك بعابك کبی حقیقه تکریر لفظ اشبو امثله مذکورده واقع اولوب و حکماً تکریر لفظ بر ضمیر متصل تأکید اولنه رق مثلاً ضربت انت قولمزده اولدینی کبی اشبو (تأکید) سامع دن سهو و غفلت ضررینی دفع و یا سامعك غلط متکلمی توهم ایلیمسنی رفع و یاخود (زید قتیل قتیل) و ضرب الامیر الامیر قولمزده اولدینی کبی منسوب و یا منسوب الیه ده معنای مجازی مراد اولمق توهمنی ازاله ایلیمک کبی فائده لری مفیددر .

واما (تأکید مغوی) بر طاقم الفاظ معدوده ایله حاصل اولور که آنلر نفسه و (عینه) و (کلاهما) و (کله) و (اجمع) و (اکتع) و (ابتع) و (ابضع) در و ابضع موقعنده ضاد معجمه ایله (ابضع) دخی وارددر بونلر سکنز کله اولوب و اوچ قسم اوزره استعمال اولمشلردر که (نفسه و عینه) واحد و مثنی و مجموع و مذکر و مؤنثه عام و شامل اولوب دفع سهو و غفلت و رفع و هم غلط و (منسوب الیه) ده مراد معنای مجازی اولیوب بلکه حقیقت اولمق نکته لرندن ایچون تأکید واقع اولورلر و اقتضای مقامه کوره صیغه و ضمیرلری مختلف اولور که مثلاً (جاءنی زید نفسه) و (هند نفسها) و (الزیدان) او (الهندان انفسهما) اونفساهما علی مانقله ابن کيسان عن بعض العرب و الزیدون انفسهم و الهندات انفسهن دینور و عینه دخی بوکا قیاسله بیلنور و (کلاهما) آتیق مثنی ده مستعمل اولوب مؤنثه

کلتاها دینور (جاء فی الر جلان کلاها) و (المرأتان کلتاها) قولزده اولدیغی کبی و (کله) و (اجمع) و اخواتی تشیه نیک غیرنده مفرد و جمعه استعمال اولنور لر آنجق اقتضای مقامه کوره (کله) ده اختلاف ضمیر و اجمع و اخواتنده اختلاف صیغه واقع اولور که مثلاً قرأت الکتاب کله و الصحیفه کله و اشتریت العید کلهم و الجواری کلهن و اخذت المال اجمع اکتع و اشتریت الجاریه جمعاء کتعاء و جاء فی القوم اجمعون اکتعون و (النساء جمع کتّع دینور اشبوا کتّع و اخواتی هکذا تصرف اولنوب (اجمع) یه تابعدر که آنسز ذکر اولملری ضعیفدر و اوزرینه تقدملری اصلاً جائز دکدر .

و بیلملیدر که (کل) لفظیه آنجق بر (ذواجزا) تأکید اولنور که حساویا حکماً قسمت و افتراقی صحیح اولمیدر (اکرمت القوم کلهم) و (اشتریت العید کله) کبی شو اجلدن (جاء فی زید کله) ترکیبی جائز دکدر . زیرا حکم حیثیت ده نه حساونه عقلاً (اجزاء زید) ک افتراقی صحیح اوله من . اشبو (کلاها) و (کله) و (اجمع) و اخواتیه متبوعک افرادینه شمولی بیان و تقریر اولنور که نسبت بمض افراده اولمسی توهمنی ازاله ایدیلور . و بیلملیدر که اگر بر ضمیر مرفوع متصل نفس و یا خود عین ایله تأکید اولنور ایسه (اولاً) بر منفصل ایله تأکید اولنوب نایا بونلر ایله تأکید اولنور (ضربت انت نفسک) کبی زیرا ضمیر منفصل ایله تأکید اولنسه (ضمیر مستکن) دن تأکید وقوعنده (نفسه) و یا خود (عینه) فاعله ملتبس اولور ایدی مثلاً (زید اکرمنی هو نفسه) قولزده اکرمنی ده اولان ضمیر مستکن (هو) ایله تأکید اولنسه (نفسه) لفظی تأکید اولمغه احتمالی اولدیغی کبی فاعل اولمغه دخی احتمالی اولوب التباس واقع اولور ایدی و اگر چه ضمیر بارزدن تأکید وقوعنده التباس یوق ایسه ده بوده صورت التباسه محمولدر .

و (اما ضمیر مرفوع متصلک) بر منفصل ایله تأکید اولنمقسزین (کل) و اجمعین ایله تأکید اولنمسی جائزدر القوم جاؤ کلهم اجمعون کبی زیرا

كل واجعينك عاملی ولی ایلماری نفس وعین کبی کثیر الوقوع اولیوب
بلکه قلیل اولمغه فاعله التباسلری یوقدر .

و (اما ضمیر منصوب و مجرور) ك ودخی ضمیر مرفوع منفصلک بر منفصل
ایله تأکید اولمقسزین نفس وعین ایله تأکید اولملری کذا عدم التباسدن
ایچون جائزدر ضربتک نفسک و مررت بک نفسک وانت نفسک
قائم کبی .

درس ۱۱۹

(بحث بدل) توابع خمسةك دردنجیسی بدلدرد (بدل) لغة خلف
معناسنه در و (اصطلاح نحو یین ده) تابع مقصود بمانسب الی المتبوع
دونه (دینمکه معرفدر یعنی بدل بر تابع درکه متبوعنه یعنی مبدل منه
اولان نسبتله مقصود کندی اولوب متبوع دکلدر بلکه متبوعنه نسبت
کنندینه نسبت اولمغه بر مقدمه و تمهیددر .

مثلا (جاءنی زید اخوك) قولمزده (اخوك) زیددن بدل واقع اولوب
(زید) اخ مخاطبدن عبارتدر و (زید) ه اولان نسبت محیثت ایله مقصود
اخ مخاطب اولوب (زید) ه نسبت اخ مخاطبه نسبته بوسیله در .

نعت و تأکید و عطف بیانده متبوع ابتداء مقصود بالنسبة اولمغه
(مقصود بمانسب الی المتبوع) قیدیه مخرجلدر و عطف بالحروفده (تابع)
مع متبوعه مقصود اولمغه (دونه) قیدیه خارجدر . و حرف اضراب
اولان (بل) لفظیه واقع معطوفك متبوعی ابتداء متكلمك مقصودی
اولوب مؤخرأ سهوینی بالتفرس بل لفظیه اعراض و معطوفی قصد ایلمکه
تابع و متبوع ایکسی دخی مقصودلر دیمك اولوب کذا شو تعریفدن
خروجنده اشکال یوقدر و اما (الا) کله سندن صکره واقع بدل شو
تعریفده داخلدر . زیرا تعریف مذکورده مأخوذ اولان نسبت بطریق
الاثبات و یاخود بطریق النفی اولمقدن اعم اولمغه مثلا (ماقام احدالایزید)
قولمزده واقع اولان (نسبت قیام) مبدل منه اولان (احد) ه نفاویریلمش
وبدل واقع اولان زیده بطریق الاثبات ویریلوب قیامك بعینه تابع واقع

اولان زیده نسبتی مقصود بولمشد پس (زید) ه (تابع مقصود بما نسب الی المتبوع) تعریفی صادق کلمشدر .

(خفی اولیه که) بدل درت قسم اوزره بولمشد زیرا (بدل) مبدل منهک یاعینی واقع اولوب و یا خود عینی واقع اولمز عینی واقع اولور ایسه بدل کل من الکل در عینی واقع اولمز ایسه ینه ایکی احتمالدن خالی دکلدیر یا مبدل منه اجنبی اولوب و یا خود اجنبی اولمز اجنبی واقع اولور ایسه بدل غلطدر اجنبی واقع اولمز ایسه بوده یا مبدل منهک بعضی واقع اولور و یا بونک غیری اولور (شق اول) بدل بعض من الکل و (شق ثانی) بدل اشتمالدرکه مفتاحده وجه حصر شو و جهله بیان اولمشددر (بدل کل من الکل) ده بدلك مدلولی مبدل منهک مدلولی اولور که ذاتاً متحد اولور لر (جائی زید اخوک) قولمزده اولدینی کی اما مفهومی مترادف اولمق لازم دکلدیر .

(بدل بعض من الکل) ده بدلك مدلولی مبدل منهک مدلولندن من حیث الخارج جزء واقع اولور ضربت زیداً رأسه قولمزده اولدینی کی .
(بدل اشتمال) ده بدل ایله مبدل منه یننده ذکر اولنان کلیت و جزئیت ملائسه سنک غیری اوله رق بر ملائسه و اتصال معنوی بولنور که مبدل منه و یریلان نسبت اجمالاً ملائسی بولنان بدله نسبتی اقتضا ایدر و شو جهله مبدل منه ذکر اولند قدده نفس سامع بدلك ذکر ینه منتظر و مشتاق اولور .
واشبو بدل اشتمالده کاه بدل مبدل منهی مشتمل و انتقالیله منتقل اولور (سلب زید ثوبه) قولمزده اولدینی کی و کاه (مبدل منه) بدلی مشتمل و محیط اولور کرک معاً انتقال بولنسون (اعجیبی زید علمه) قولمزده اولدینی کی و کرک معاً انتقال بولنسون (یسألونک عن الشهر الحرام قتال فيه) آیت کریمه سنده اولدینی کی .

و خفی اولیه که مبدل منه بدلك جزئی واقع اولان ماده لر دخی بدل اشتمالده داخلدر آنفا مرور ایلان وجه حصر دن دخی منفهم اولور (نظرت الی القمر فلکه) و (رأیت درجه الاسد برجه) قولمزده اولدینی کی بعضیلر بوئی قسم خامس عد ایله (بدل کل عن البعض) تسمیه قیلدیلر ایسه ده عند المحققین قلة و ندرتندن ومع هذا کلام عربده بولمیب و شو مثاللرک مصنوع

بولمىسندن ايچون اعتداد اولنماشدر واما (بدل غلط) دنيان اوچ قسم
اوزره در يامبدل منه قصداً ذكر اولنوب بعده ايهام غلط ايليه رك وادنى دن
اعلايه ارتقا ايدرك ايراد بدل قيلرسك بوكا (بدل بدأ) دينور و كلام
فصحاده بولنور (جيبي نجم شمس) قولزده اولدينى كي ويا مبدل منه
ذكرده غلط وخطا ايدوب صوابى قصدايله ايراد بدل قيلرسك بوكا بدل
غلط دينور ويا مبدل منه سهواً لسانه سبقت ايدوب صحيحى قصدايله همان
ايراد بدل قيلرسك بوكا بدل نسيان دينور بدل غلط و نسيان كلام فصاحده
واقع اولمز انجق غلط ويا نسيان وقوعنده بل لفظيله اضراب ايدرلر مثلاً
جاءنى زيد حمار دينمز بلكه جاءنى زيد بل حمار دينور .

درس ۱۲۰

خفى اولميه كه بدل مبدل منه افراد وثنيه وجمع و تذكر و تانيث ده موافقت
ايلمليدر لکن تعريف و تنكيرده موافقت غير لازمدر شو و اجلدن بدل
و مبدل منه كاه ايكيى دخى معرفه اولور (جاءنى زيد اخوك) و (رأيت
زيداً رأسه) و (اعجبنى زيد علمه) و (جاءنى زيد حماره) كى وكاه نكره
اولورلر (جاءنى رجل غلام لك) و (رأيت رجلاً رأساً له) و (اعجبنى
رجل علم له) و (جاءنى رجل حمار له) كى وكاه تعريف و تنكيرده
مختلفين اولورلر كه يا بدل معرفه و مبدل منه نكره اولور جاءنى رجل غلام
زيد كى و يابدل نكره و مبدل منه معرفه اولور و شوصورتده (مقصود) اولان
بدل غير مقصود اولان مبدل منه دن انقص اولسون ايچون جبراً للنقصان
بدل ايچون برنعت ايراد ايلمك واجب اولور (بالناسية ناصية كاذبة) آيت
كريمه سنده و (رأيت الرجل راساً كبيراً له) و (اعجبنى الرجل علم نافع له)
قوللر مزده اولدينى كي .

ويلمليدر كه بدل و مبدل منه كاه ايكيى دخى اسم ظاهر اولورلر امثله
مذكوره ده اولدينى كي وكاه ايكيى دخى ضمير اولور (الزيدون لقيتهم
اياهم) قولمزده اولدينى كي وكاه مختلفين اولورلر كه يا (بدل اسم ظاهر
و مبدل منه ضمير اولور) واشبو ضمير اكر ضمير غائب اولور ايسه

آنده بدل کل جاری اولور زیرا ضمیر غائب ایله اسم ظاهر متساویاندر
(اخوك ضربته زيدا) قولزده اولدینی کبی واکر ضمیر متکام ویاخود
ضمیر مخاطب اولور ایسه آنده (بدل کل) جاری اوله من واما دیگر
بدلار جاری اولور (اشتريتك نصفك) و (اشتريتني نصفی) و (اعجبتني
علمك) (وعجبتك علمي) و (ضربتك الحمار) و ضربتني الحمار قوللرمزده
اولدینی کبی .

و یا بدل ضمیر و مبدل منه اسم ظاهر اولور (ضربت زیداً اياه) قولزده
اولدینی کبی فافهم

درس ۱۲۱

(بحث عطف بیان) توابع خمسة نك بشنجیسی عطف بیاندرکه (صفت) ك
غیری اولوب و متبوعنی ایضاح ایدر براعرابی نك (اقسام بالله ابو حفص
عمر . مامسها من نقب ولادبر . اغفر له اللهم ان كان فجر) قولنده عمر لفظی کبی
کنیه حضرت فاروق اولان (ابو حفص) دن عطف بیان واقع اولوب
آنی موضعدر شوشعرك قائلی اولان (عرب) ك وطنی بمید و ناقة سی
علتلی وضعیف اولمغله حضرت عمر رضی الله تعالی عنه دن بر ناقة قویه
احسان اولمسنی طلب ایدر و جانب حضرت فازوقدن مع القسم تکذیب
اولنه رق رد ایدیلدکده ناقة سنی اوکنه قاتوب کیدر ایکن اشبو شعری
سو یلمشدر . (مفادی) یعنی حضرت ابی حفص عمر رضی الله تعالی عنه
حقه قسم ایلدی که ناقة یی (نه جرب) ونه ریش پشت دنیلان علت مس
ایتمامشدر یارب اکر قسمنده حاث اولدی ایسه عفو ایله دیمکدر بعده
حضرت عمر افندمن اعرابی یه ایریشهرك تصدیق و ممولنی اسعاف ایلمشدر .
اشبو عطف بیانك (بدل) دن معنا فرقی تعریف بدل ایله ظاهر درکه
مثلا (جاءني اخوك زيد) دیندکده اسنادك ابتداء اولکنه اولسی قصد
اولنوب ثانینك آنی ایضاح و تميم ایچون کتورلمسی ملاحظه اولنور ایسه
ثانی یعنی (زيد) عطف بیاندر واکر اسنادك ثانی یه اولسی قصد اولنوب

اولکنک مجرد ثانی ایچون بر مقدمه و تمهید اولسی ملاحظه اولنور ایسه
ثانی بدلدرد .

و (لفظاً فرقی) مثلاً کسندینه بر صفت معرف باللام مضاف قیلنمش اولان
بر معرف باللامدن عطف بیان واقع اولان بر محله ظاهر درر جاء فی
الضارب الرجل زید قولزده اولدینی کبی (زید) (الرجل) دن عطف
بیان اولوب بدل دکلدرد . زیرا بدل قیلنسه بدل تکریر عامل حکمنده
اولغله الضارب زید دیمک اولور ایدی شو ترکیب ایسه یوقاریلرده مرور
ایلدیکی اوزره جائز دکلدرد و دخی فزارالاسد نام شاعرك

انا ابن التارك البکری بشر علیه الطیر ترقه و قوعا

شعرنده (انا ابن التارك البکری بشر) قولنده اولدینی کبی که (بشر) لفظی
البکریدن عطف بیان اولوب بدل دکلدرد و اگر بدل قیلنمش اولسه ذکر
اولدینی اوزره (انا ابن التارك بشر) تقدیرنده اولور که الضارب زید
ترکیبی قیلندن اولور ایدی شو ترکیب ایسه جائز دکلدرد مفاد شعرین
بر بشر بکری بی مقتولا تارك اولان شجیع بر پدرك مخدومیم حالبو که
اول بکری نک اوزرینه دوشیجی اولدقلری حالده یعنی بکری نک روحی
چیقه رق اوزرینه دوشملری ایچون قوشلر مترقبردرد دیمکدر که شجیع
بر بکری بی شو حالده مقتولا تارك اولان بر پدرك اوغلی اولسی جهته
تمدح و تفخردرد .

عطف بیانک بدلدن لفظاً فرقی یازید الحارث قولمز نمونده دخی ظاهر درر که
الحارث عطف بیاندر بدل اولسی جائز دکلدرد زیرا بدل تکریر عامل
حکمنده اولغله یا الحارث دیمک منزلنده اولور ایدی یا الحارث ترکیبی ایسه
اصلاً جائز دکلدرد و دخی یا غلام زید ترکیبده دخی فرقلری واردر که
غلام منادای مفر معرفه اولوب علی مایرفع به مبنی در و زید عطف بیان
قیلندقدده (زید) ده منادانک لفظنه حملاً رفع و محله حملاً نصب جائزدر
واما بدل قیلنور ایسه مناداده بدل منادای مستقل حکمنده اولغله (زید) ده
آنحیق ضم متصور اولور فافهم و قس فاعتبر

﴿ مبحث المبنی من الاسم ﴾

اسم بدن معرب اولئر بیان و معرب واعرابك تعريف واقسامی عیان
قیلندی ایسه مبنی دن دخی برنجیه درس لر ایله بحث ایلملیز .

درس ۱۲۲

مبنی لغتده برنسنه بنا اولمش و ثابت قیلنمش معناسنه در . و معنای
اصطلاحیسنده شیخ ابن حاجب حضرتلری تعريف معربده (ترکیبده
بولنق) و (مبنی اصله بر مناسبتی اولماق) قیدلرینی ثبت ایلمکله اصطلاحاً
تعريف مبنی ده شوایکی قیدك انتفاسیله (المبنی ماناسب مبنی الاصل او وقع
غیر مرکب) بیورمشدر تعريف مزبورده اولان (او) کلهسی مانعة
الحلوی چون اولوب یعنی (مبنی) مبنی اصله بر مناسبتی بولن ان و یا خود
عاملی بر لکده تحقق ایده جك صورتده ترکیبده بولن یاندر بوکا کوره هرکز
ترکیبده بولن یان اسماء معدوده مثلاً زید عمرو بکر کی و عاملی بر لکده
تحقق ایتمه رك ترکیبده بولن انلر مثلاً غلام زید ترکیبده غلام کی بولنر
مبنی اولورلر فقط درس تاسعده کچدیکی اوزره علامه زحشری عننده
و برکوی حضرتلرینك دخی مختاری اولان معربده مجرد اعرابه استحقاقه
صلاحیت شرط اولمغله كرك اسماء معدوده و كرك غلام زید نحو بنده (غلام) ك
اعرابه استحقاقه صلاحیتی بولمغله معرب اولورلر و برده شو و تعریفده
(مبنی الاصل) لفظی ذکر اولمغله (مطلق مبنی) ی اولجه بیلمیانه تعريف
اوله مز شو جهتله تعريف مزبور (مطلق مبنی) نك تعريفی اولمیوب مطلقاً
مبنی نك تعريفنده (ماكان حرکتیه و سكونه و حرفه لا بعامل) دینور یعنی
(مبنی) آخرینك حرکتیه و یاسکونی و یا علامت اعراب طرزنده بر حرفی
هرکز بر عامل سبیلله اولیان کله در .

اشبو مبنی مصطلحه مبنی دینلمسی مع اختلاف العوامل بر حالت اوزره
ثابت و لازم اولدیغندندر .

و خفی اولیه که مطلقاً مبنی یکی قسمدر (قسم اول) مبنی اصلدر که بناده اصل اولوب دیگر مبنی لر کندینه مجرد بر مناسبت و مشابهنیدن ایچون کسب بنا ایلهرک تفرع ایشمدر و مبنی اصل درت داندر اولکیسی حرفدر که هرکز معمول اولیوب بناده اصل اولده کماله ایرمشدر ایکنجیسی فعل ماضی در که مطلب فعلده کاور اوچنجیسی امر بغیر اللام در که عندالبصرین مبنی در و اما عندالکوفین لام مقدره ایله محزوم اولغله معربدر بودخی آنده بیلنور دردنجیسی جمله در بونلرک وجه بناسی (حرف) و (ماضی) و (امر بغیر اللامک) معنای مطابق مستقله عدم دلالترندن ایچون اوزرلرینه معانی مقتضیه للاعرابک یعنی فاعلت و مفعولیت و اضافتک ورود ایلمامسی و (ماضی) ده فعل مضارعده اولان اسمه مشابهن تامة نك دخی مفقود بولنمیدر و (جمله) نك کمال استقلالندن ایچون دیگره ارتباطه حاجتی اولماغله معانی مزبورده آنک اوزرینه دخی ورود ایده مامسیدر .

(قسم ثانی) مبنی عارض در که مبنی اصله بر مناسبت و مشابهنی بولنغله کندینه بنا عارض اولمش اولانلردر بونلر دخی ایکی قسمدر بر قسمی مبنی عارض لازمدر که (ما لاینفک عن البناء) مبنی (بنادن هرکز منفک اولیان مبنی لر) دینمکه معرفدر بونلر (مضمرات . اسماء اشارات . موصولات . اسماء افعال . و ما کان علی وزن فعال . اصوات . بعض مرکبات . بعض کنایات . بعض حروف) در و بر قسمی مبنی عارض غیر لازمدر که (ما لاینفک عن البناء) یعنی بنادن منفک اوله بیلان مبنی لر دینمکه معرفدر بونلر (اضافهدن قطع) اولنوب (مضاف الیه) لری نیتده کوزه دیلان (ظرفلر) و (منادای مفرد معرفه) و (مفرد و نکره اوله رق) (لا) لئی الجنس متصله و غیر مکرره اولان لائی الجنسک اسمیدر و دخی آخزینه نون تأکید و نون جمع مؤنث متصل قلنان فعل مضارعدر که بوندن مطلب فعلده بحث اولنور .

درس ۱۲۳

خفی اولیه که ذکر اولتان اشبو مبنی عارض لردن هر برینک بناسنده مبنی اصله بر نوع مشابهن و مناسبت علت اولمشدر مثلاً (مضمرات) متکلم

و مخاطبه حضوره و غائبه تقدم ذكره محتاج اولمغله احتياج الى الغيره
 حرفه مشابه لردر و بعض بر حرف و بعضیسی ایکی حرف اوزره بولندقلری
 جهتله دخی و ضعا حرفه مشابهتلی موجوددر مثلاً ضربت قولمزده
 اولان تا و ضربنا قولمزده اولان ناکی و ایکی حرفدن اکثر بولنلاندده
 اطراداً للباب بولنل اوزره محمولدر دینور (و اسماء اشارات و موصولات)
 بر صله و یاضفت و بوکی نسبه احتیاجی بولنقدده حرفه مشابهلردر و بولنلده
 حرفه مشابهت وضعیه دخی وارددر و (اشارت) بنی و نهی و تمنی و ترجی
 معناری کی بر معنا اولمسنه و شومعناله دال اولمق اوزره حرفلر بولنمسنه
 باقیلور ایسه اسم اشارهده حرفه مشابهت معنویه دخی بولنور و اسماء موصوله
 ایسه حرف موصول معناسنه ملتبس اولدیغندن آنلرده دخی مشابهت معنویه
 غیر منکردر و (اسماء افعال) ماضی و امر معنارینی حائر اولدیغندن مبنی
 اصله مناسبتهلری درکاردر و مع هذا کنیدلر عامل اولوب دیگر بر عامل ایله
 متأثر اولساملری جهتله حرفه دخی مشابهتلی وارددر و فعال و زننده
 اولنلردن بر قسمی امر معناسنی حائردر مثلاً نزال کلهسی انزل معناسنه در
 و صفت و علم اولان دیگر قسملر کده امر معناسنه اولان فعالیه مشاکتلی
 وارددر و (اصوات) انتقای ترکییدن ایچون و برده محکوم علیه و به
 اوله مامقده حرفه مشابهتلی بولندیغندن مبنی لردر و بعض مرکبات بر حرفی
 متضمن اولدقلرندن و یا خود بو حکمده بولندقلرندن مبنی لردر و (بعض کنایات)
 بولنلردن (کم) ایکی حرف اوزره اولمغله و ضعا حرفه مشابه اولدینی جهتله
 مبنی در و (کذا) کلمه سنده ذا مشابهت وضعیه سندن ایچون اصلاً مبنی اولمغله
 فی الحال دخی بناسی اوزره قالب کذا مبنی در و (کیت) و (ذیت) ایله
 بر جمله و کلامدن کنایه اولنه جغندن جملهیه مناسبتلرندن ایچون مبنی لردر
 و اسماء استفهامدن بعضیسی مثلاً من و ما کی مشابهت وضعیه دن ایچون و
 دیگر لرده بولنلره حملاً مبنیلر در و همزه استفهام معناسنی متضمن اولدقلرندن
 حرفه مشابهت معنویه لری دخی اشکاردر و اسماء شرط ان شرطیه معناسنی
 متضمن اولدقلرندن مشابهت معنویه دن ایچون و کذا بعضیسنده مشابهت
 وضعیه دخی بولندیغندن هر حالده مبنی لردر .

و (بعض ظروف) بولردن (امس) حرف تعریفی متضمن در وشو جهتله همیشه معرفه ایله توصیف اولنور و (قط) و (عوض) حرفی متضمن اولدقلرندن و (مذ) و (منذ) حرف اولان مذو منذیه لفظاً موافق اولدیغندن و (اذا) شرطیه اولدقده ان شرطیه بی متضمن اولدیغندن و مفاجأة ایچون اولدقده اذا شرطیه مشاکل بولندیغندن و حتی مفاجأة ایچون اولدقده بمضیلر حرفیتنه حکم ایلدیکندن و (اذ) کله سنده ایکی حرف اوزره اولغله مشابعت وضعیه بولندیغندن مینیلردر و ظرف اولان اسمای استفهامیه و شرطیه نك وجه بنالری ایسه ماسبقدن معلومدر و (حیث) مضمون جملهیه مضاف اولدیغندن مضاف الیه نه مناسببتندن اکتساب بنا قیلر و لدی ولدن و سائر بونده اولان لغتلر ابتدا مفادنی مشعر اولملریله من معناسنی متضمن اولدقلرندن مینیلردر مثلاً (جئت لدن طلوع الشمس) دینور طلوع شمس عننده و ابتداسنده کلام دیمکدر و بونده اولان لغتلردن بعضسنده مثلاً لدکی مشابعت وضعیه اولغله دیگر لرینکده کندنده مشابعت وضعیه بولنانه حمل ایله وجه بنالرینی توجیه ایلکم دخی ممکن در و اسم اوله رق مثل معناسنه اولان کاف و جانب معناسنه اولان عن کله لری حرف اولان کاف و عن کله لرینه مشاکل اولغله بنالری شبهه دن و ارسته در و اسم اوله رق فوق معناسنه اولان علی کله سنک دخی بناسی محتاج بیان دکدر .

و مبنی عارض غیر لازم دن (مضاف الیه لری منویا) حذف اوله رق اضافندن قطع اولانان ظرفلر مضاف الیه محذوفلرینه احتیاجلرندن ایچون احتیاج الی الغیرده حرفه مشابعتلری بولنغله مینیلردر و (منادای مفرد معرفه) ادعوك منزله اولوب کاف خطاب موقعنده بولنغله کاف خطاب ایسه کرك مشابعت وضعیه سنندن و کرك حرف خطابه مشاکلتندن ایچون مبنی اولغله منادای معرفه دخی مبنی بولمشدر و (لانی الجنسك مبنی اولان) اسمك وجه بناسی من استغراقیه بی متضمن اولمسیدر و بر جملهیه و یا جملهیه مضاف اذ کله سنه مضاف اولان ظرفلرک مبنی قلندقلرنده وجه بنالری بالواسطه و یا بلا واسطه مضاف الیه لرینه اتسابلریدر .

ولالنفی الجنسک مدخولندن قسم ثالث مبنی قلندقدّه وجه بناسی ینه من
استغراقیه بی متضمن اولسی ملاحظه سیدر ولالنفی الجنسک مدخولندن قسم
مبنی نک صفتک بناسی موصوفه مناسبه در .

بونلرک کافه سندن آشغی ده انشاءالله دروس عدیده ایله بحث ایلیه جکزشو
درس لر مزدن مستبان اولان بر مبنی نک سبب بناسی مبنی اصله بروجه ایله
مناسبتی و یا خود ترکییده بولنما سیدر و وجوه مناسبت برنجه نوع اوزره درکه
وضعا حرفه مشابّهت و حرفه و یا فعله مشاکلت و حرفی و یا معنای حرفی
متضمن اولمق و معنای فعلی متضمن اولمق و مبنی اصله مناسب اولانه مناسبت
و مقارنت و افتقار الی الغیر و بویکی بر صفتده حرفه مشابّهتدن عبارتدر نته کیم
بو معنایی اشعار ایلمک اوزره بیت .

وضعا و یا معنای و یا وصفا مشابه اولسه یا

اولسه مشاکل یا مقارن مبنی به مبنی دیها

دینامشدر و بعض نجات وجه بنایی مجرد حرفه مشابّهت قیلمشدر درکه
سیبویه دخی شو جمله دندر و ابن مالک دخی الفیه سنده بوجهی اختیار
ایلمشدر نته کیم بیورر لر .

والاسم منه معرب و مبنی ل شبه من الحروف مدنی

یعنی اسم ایکی قسم اوزره اولوب بر قسمی معربدر و بر قسمی کنندنی
حروفه تقریب ایلیان مشابّهتدن ایچون مبنیدر .

کالشبه الوضعی فی اسمی جئتنا والمعنوی فی متی وفی هنا

یعنی حروفه مقرب اولان مشابّهت جئتنا کله سنده ایکی اسمده یعنی ضمیر
متکلم وحده اولان (ت) و ضمیر متکلم مع الغیر اولان (نا) ده بوانسان

مشابهت وضعیه کبی که (ت) بر حرف واحد او زره و (نا) ایکی حرف او زره بولندیغندن حرفه وضعاً مشابهلردر واسم استفهام واسم شرط دخی اوله ییلان (متی) ایله اسم اشاره بولنان هنا لفظنده اولان مشابهت معنویه کبی که متی اسم استفهام اولدقده همزه استفهام معناسنی واسم شرط اولدقده ان شرطیه معناسنی متضمندر و هنا اسم اشاره اولوب (اشارت) ایسه نفی ونهی و متی و ترجی بوکبی معنالدن بر معنادر شو معناله دال حرفلرک وجودینه باقیلور ایسه اشارت ایچون دخی بر حرف وضع اولمق لازم کلور ایدی شو جهتله کانه هنا بر حرف غیر موجودک معناسنی متضمن اولوب شومشابهت معنویه ایله مبنی قلنمشلردر .

وکنیابة علی الفعل بلا تأثر وکافتقار اصلا

ودخی حرفه مشابهت فعل منابنده نائب اوله رق بر عاملدن متأثر اولماق کبی درکه مثلاً اسماء افعال کیمسی فعل ماضی و کیمسی فعل امر مقامنده اولوب و بر عامل ایله متأثر دکلردر نته کیم حرفلر دخی هرکز بر عامل ایله متأثر اولزلر و اما (مصادر) مثلاً ضرب بازیداً قولزده ضربا کبی فعل منابنده بولنورلر ایسه ده لکن عامل ایله متأثر اولدقلردن مبنی اولیوب معربلردر و دخی حرفه مشابهت احتیاج الی الغیر کبی که بودخی وجوه بناصره سندن تأویل و تحکیم اولنمشدر مثلاً اسماء موصولده اولدینی کبی که صلهیه محتاج اولمغله احتیاج الی الغیرده حرفه مشابه اولوب مبنی بولنمشلردر . زیرا حرف دخی بر متعلقه محتاج اولمغله غیره احتیاجی درکاردر شو بیاندن مستبان اوله جفی اوزره مبنی عارضده وجه بنا حرفه مشابهت اولوب وشو مشابهتده درت قسم اوزره تصور اولنمشدر فافهم واعتبر

درس ۱۲۴

(المضمورات) مبنی عارض لازمندن بری مضمراتدر وجه بناسی فاضل هندی و عبدالرحمن جامی عندنده مختار اولان آنفا ذکر اولندیغی اوزره

احتیاج الی الغیرده حرفه مشابه بولملریدر وفاضل عصام عندنده مختار اولان حرفه وضعا مشابهت و مشابهتدر زیرا مثلاً ضربت قولزده (ت) و ضربك قولزده (ك) ضمیر اولوب (ت) ایسه ضمیر اولیهرق مثلاً تأنیته دال حرف دخی اولور و (ك) ایسه حرف خطاب اولهرق دخی کلور که شو صورتده ضماؤك بر قسمی حرف لفظی اوزره بولمنش اولهرق حرفه وضعا مشابه اولوب مبنی اولورلر و سائر قسملرده مثلاً انا و انما و نحن کبی قسم مذکورده حملاً مبنی اولورلر و (فاضل برکوی) عندنده مختار اولان ضماؤك مبنی اولملری کندیلرده موجب اعراب بولندیغی جهتله در زیرا اسملرده مقتضی اعراب صیغه واحده اوزره معانی مختلفه نك توارد ایلمسیدر مضمرا تك ایسه معانی مختلفه توارد ایلدیجه ماده و صیغه لری مختلف اولور کورلمز میکه مرفوع و منصوب و مجرور دن هر بریچون آریجه ضمیرلر وارد شو جهتله اعرابك دلالتدن مستغنی لردر شو بیانمز منفهم اولدی ایسه مضمرا تك بیاننه کیریشهلم.

خفی اولیه که مصمرات بریجه اعتبار ایله تقسیم اولنشددر باعتبارالوضع ضمیر متکلم و ضمیر مخاطب و ضمیر غائب قسملرینه آیریلمشدر (ضمیر متکلم) بر متکلم نفسندن حکایه ایتک ایچون وضع اولناندر (یای متکلم) و (انا) و (نحن) و ضربت و ضرب بناده اولدیغی کبی (ضمیر مخاطب) بر حاضره توجیه خطاب اولنق ایچون وضع اولناندر انت و ایاك و تنیه و جعلری کبی و ضربك و ضربت و ضربت ده اولدیغی و تنیه و جعلرنده بولندیغی کبی (ضمیر غائب) ذکر ی تقدم ایدن بر غائب دن حکایه ایچون وضع اولناندر هو و هی و ایاه و تنیه و جعلری کبی و ضرب و ضربت ده مستتر اولهرق بولندیغی و تنیه و جعلرنده اولدیغی کبی.

ویلملیدر که تقدم ذکر لفظاً و معناً و حکماً یعنی شواوچ جهتله اوله بیلور . (لفظاً تقدم ذکر) دخی یا (تحقیقا) اولور (ضرب زید غلامه) قولزده اولدیغی کبی که (غلامه) ده اولان ضمیر حقیقه تقدم ایلیان (زید) . راجع در .

ویا (تقدیراً) اولور (ضرب غلامه زید) قولزده اولدیغی کبی (غلامه) ده

اولان ضمير هر نقدر مؤخر زیده راجع ایسه ده (زید) فاعل اولوب حق تقدم اولمغله تقدیراً مقدم نزلنده در .

و (معنأ تقدم ذکر) دخی یا مفهوم لفظدن مستبان اولور (اعدلوا هو اقرب للتقوی) قول شریفنده اولدینی کی (هو) ضمیری (اعدلوا) دن منضم مصدری عدله راجعدر و یا خود سیاق کلامدن مستبان اولور (ولا یویه) قول شریفنده اولدینی کی که ذکر میراث تقدم ایلمکله (ضمیر) سیاق کلامدن منضم مورثه راجعدر .

و (حکما تقدم ذکر) ضمیر شان و ضمیر قصه ده و (نعم رجلا زید) نحو نده نعمه مستتر اولان ضمیرده و (نعمه رجلاً زید) و (ربه رجلاً زید) نحو نرنده اولان ضمیرده اولدینی کی مرجعاری حکما تقدم اتمش قوه سنده در و بو کی ابهام مرجع ایسه یا تعظیم قصه یی اشعار و یا مؤخرأ تفسیر اولمغله نفس ده اوقع بولمنسی ازار کی نکته لردن ایلر و کلور .

و بیلماید که (مضمرات) ماقبلی اعتبار یله ده ایکی قسمه تقسیم ایدیلور که یا منفصل اولور (ضمیر منفصل) بنفسه مستقل اوله رق ماقبلنده برکله یه محتاج و آندن جزء کی اولمز و یا متصل اولور (ضمیر متصل) بنفسه مستقل اولیوب ماقبلنده بولنان عاملنه محتاج و آندن جزء قیلندن اولور .

و (مضمرات) باعتبار الاعراب دخی اوچ قسمه تقسیم اولور که ضمیر مرفوع ضمیر منصوب ضمیر مجرور دینلور ضمیر مرفوع و منصوب دن هر بری متصل و منفصل دخی اولور لیکن ضمیر مجرور همیشه متصلدر زیرا اتصال اصل اولمغله بلامانع آندن عدول جائز اوله منضم مجرورده مانع اتصال ایسه بولمامشدر پس شو جهله مضمرات بش قسم اولمش اولور .

درس ۱۲۵

(قسم اول) ضمیر مرفوع متصلدر کړك معلوم و كړك مجهول اوله ضرب ضربا ضربوا ضربت ضربتا ضربن ضربت ضربتما ضربتم ضربتا ضربتن ضربت ضربه باده بولنان ضمیر لر کی و معلوم اوله که استعار ضمیر

خاصه (مرفوع متصل) قسمند در فعل ماضی ده غائب و غائبه ده مستتر در
 زید ضرب و هند ضربت قولار مزده اولدینی کبی واما اگر اسم ظاهره
 مسند اولور لر ایسه اولوقت کندیلرده ضمیر مستراولمز بلکه فاعلاری اول
 اسم ظاهر اولور ضرب زید و ضربت هند کبی و دخی کرک مثبت و کرک
 منفی اوله فعل مضارعده نفس متکلم و مخاطبند مستتر در اضرب و نضرب
 و تضرب امر حاضر اولان و اضرب کبی و قس علیه و غائب و غائبه سنده
 دخی اسم ظاهره مسند دکلر ایسه مستتر در (زید یضرب) و (هند تضرب)
 و امر غائب اولان لیضرب و لتضرب کبی و قس علیه و کذا اسم ظاهره
 مسند اولدقجه صفتلرده دخی هر حالده ضمیر مستتر در (زید ضارب)
 و (عمرو و بکر ضاربان) و (زید و عمرو و بکر ضاربون) کبی و قس علیه
 و خفی اولیه که افعالده تشبیهلرده ضمیر (الف) در و جمع مذکر لرده
 (واو) در (ضربتم) کله سنک اصلی ضربتموا اولوب و او حذف اولمش
 و میم ساکن قلمشدر و جمع مؤنث لرده نوندر و (فعل) مضارعک مفرد
 مؤنث مخاطبه سنده عندالعامه (یا) در فقط عند الاخفش (یا) علامت
 خطاب اولوب فاعل مستتر در اما اسملرک نشیهلرنده الف علامت تشبیه و جمع
 مذکر سالملرنده و او علامت جمع اولوب ضمیر دکلر در .

و بیلملیدر که فعللرده ضمیر مستترده ضمیر غائبدن هو و غائبه دن هی و مخاطبدن
 فتح تا ایله انت و مخاطبه دن کسر نا ایله انت و متکلم و حده دن (انا) و
 متکلم مع الغیردن نحن ایله تعبیر اولنور و اسملرده (ضمیر) مستتر اولدقده
 مقتضای حاله کوره مفرد مذکرده هو و انت و مفرد مؤنثده هی و انت
 و تشبیهلرده هما و انتما و جمعلرده هم و اتم ایله تعبیر اولنور .

درس ۱۲۶

(قسم ثانی) ضمیر مرفوع منفصلدر که هو هاهم هی هاهن انت انتما اتم
 انت انتما انتن انا نحن در (هو) و (هی) عند البصرین (واو) و (یا)
 اصل کله دن اوله رق فتح اوزره مبنی لدر و عند الکوفین (هو) ضم اوزره
 و (هی) کسر اوزره مبنی اولوب (واو) و (یا) اشباعله حاصلدر و (هما)

کله سنک تشیه مذ کرده اصلی هو و تشیه مؤنث ده هی در علامت تشیه اوله رق
آخر لینه الف کتور لمکله (هوا) و (هیا) اولور فتحه میم قوی اوزره
واقع اولسون ایچون (واو) و (یا) میمه قلب اولنور و میم شفوی
اولوب ماقبلنده ضم مناسب اولمغله تشیه مؤنث ده ها مضموم قلنور
(ها) دینور و (هم) کله سنک اصلی هو در علامت جمع اوله رق آخرینه
بر واو کتور لمش و اکا تبعیتله (هو) بک واوی دخی مضموم قیلنمش
(هووا) اولمش پس واوین جمع اولماق ایچون واو اول میمه قلب
اولنمش (و آخری واو ماقبلی مضموم) کلام عربده هودن غیری براسم
بولنماش اولمغله واو حذف اولنوب و میم اوزره ضمه ثقیل اولمغله ضمه
دخی کیده ریلوب هم قالمشدر و بیلملیدرکه (هو) کله سنک حرفی قلیل
اولدیندن واو حذف اولنه من اما بر آخر کله یه متصل اولدقده حذف
اولنور و اولوقت ضمیر منصوب و یا مجرور اوله رق بولنور (ضربه) و
(انه) و (له) کی .

و (هن) کله سنک اصلی هی در علامت جمع اوله رق بر نون کتور لمش و
حرف یا دخی نونه قلب اولنورق بولر بر برینه دغم اولنمش و ها مضموم
قلنه رق هن اولمشدر و فیه وجه آخر و (انت) کله سی مذ کرده فتح تا
و مؤنث ده کسر تا ایله در عند البصرین (انت) ده (ان) ضمیر مرفوع
(تا) حرف دال علی تذکیر الفاعل ان کان بالفتح و تأنیثه ان کان بالکسر
و علی خطابه و عند الکوفین (تا) ضمیر مرفوع دال علی ماذکر و (ان)
ان عماد و عند المبرد مجموعی بردن ضمیر در اتم انما انتن ده دخی بوقیاس
اوزره رای تگون ایلمشدر .

و (اتما) کله سنک اصلی تشیه مذ کرده فتح تا ایله انت و تشیه مؤنث ده
کسر تا ایله انت در علامت تشیه اوله رق آخرینه بر الف کتور یلور و تأنیثده
تای مکسوره دخی الفه تبعیتله مذ کرده اولدینی کی مفتوح قلنور (اتما)
اولور الف اشباعه التباس لازم کلامک ایچون قبل الالف بر میم کتور یلورک
میم شفوی اولمغله اکا تبعیتله ده ماقبلی مضموم قلنه رق اتما اولور .
و (اتم) کله سنک اصلی انت در آخرینه جمع مذکر علامتی بر واو

کتوریلور (انتو) اولور واوه تبعیتله (تا) مضموم قلنور (انتو) اولور
وتشیه اطراداً بریم کتوریلور انتو اولور پس (همو) ده اولدینی کی
اعلال اوله رق اتم اولور .

و (انتن) کله سنک اصلی کسر تا ایله انت در آخرینه جمع مؤنث علامتی
اوله رق برنن کتوریلور وتشیه اطراداً نونک اولنه بریم کتوریلوب
وماقبلی مضموم قلنور انتن اولور میمک نونه قرب مخرجی بولمغله نونه
قلب اولنور ونونلر بر برینه دغم ایدیلدکده انتن اولور وفیه وجه آخر و
(انا) کله سی عند البصرین فتح اوزره مبنی در (الف) اصل کله دکدر
بلکه فتحه بی بیان ایچون کله در زیرا الف اولسه عند الوقف فتحه زائل
اوله رق ان مصدریه ملتس اولور ایدی و (عند الکوفین) سکون اوزره
مبنی اولوب الف اصل کله دندر و (نحن) ضم اوزره مبنی ضمیر متکلم
مع الغیردن عبارتدر شو محله ده آنجق مع الاختصار بوقدر بیان ایده بیلور
وخفی اولیه که بونلرک جمیعده علامت تشیه وجمع وزوائد اصل ضمیردن
خارج و برلکده متصرف و معنودر .

درس ۱۲۷

(قسم ثالث) ضمیر منصوب متصلدر بوده یافعله ویا فعلک غیرینه متصلدر
فعله متصل اولان مثلاً ضربه ضربهما ضربها ضربها ضربهن
ضربک ضربکما ضربکم ضربک ضربکما ضربکن ضربنی ضربنا وفعلاک
غیرینه متصل اولان مثلاً انه انهما انهم انها انهما انهن انک انکما انکم
انک انکما انکن انی اناده اولدینی کی ماسبق تأمل اولنور ایسه بونلرک
دخی اساس تشیه وجمع و غیریلری چیقاریله بیلور (ضربی) و (انی) ده
ضمیر متکلم (یا) در اولنده بولنان نونه نون وقایه دینلورکه آتی ده بیانی
کلور و ضربنا و اناده ضمیر (نا) در .

(قسم رابع) ضمیر منصوب منفصلدرکه ایاه ایاها ایاهم ایاها ایاها ایاهن
ایاک ایاکا ایاکم ایاک ایاکا ایاکن ایای ایا نا در بونلرده ضمیر علی ما هو المختار
(ایا) ماده سیدر متباقی غیبت و خطاب و متکلمه و افراد و تشیه و جمعه و تذکیر
و تانیثه دالدر .

(قسم خامس) ضمیر مجرور متصل در بونکده اتصال یا اضافت جهتیه اسمیه
 و یا خود حرف جر در متصل بالاسم مثلاً غلامه غلامهما غلامهم غلامها
 غلامهما غلامهن غلامك غلامكما غلامکم غلامك غلامكما غلامکن غلامی
 غلامنا قوللر مزده اولدینی کی و متصل بالحرف مثلاً لهما لهم لها لهما لهن
 لك لکما لکم لك لکما لکن لی لنا قوللر مزده اولدینی کی عادت نجات
 اعرف معارف اولسی جهتیه اولاضمیر متکلمدن بدا ایدوب و ثانیاً بعد المتکلم
 اعرف اولدیغندن ضمیر مخاطب و ثالثاً ضمیر غائی ذکر ایدر لر ایهده ذهنه
 خاجان کلامك اوزره بزطوغریدن طوغری به ثبت ایلدك و خفی اولیه که
 قیاساً متکلم و مخاطب و غائبدن هر بری مفرد و تنثیه و جمعبری و مذکر
 و مؤنث اوللری جهتیه التیشیر ضمیر اقتضا ایدر ایهده فقط متکلم و حده
 ضمیری مذکر و مؤنث بیننده و متکلم مع الغیر ضمیری تنثیه مذکر و مؤنث
 و جمع مذکر و مؤنث بیننده مشترک قیلنه رق شو جهتیه متکلمده ایکی لفظله
 اکتفا ایلدی و مخاطبده تنثیه ضمیری مذکر و مؤنث بیننده مشترک قیلنوب
 بر لفظله و (غائب) دخی مخاطبه حمل اولنه رق آنک دخی تنثیه مذکر
 و مؤنثدن بر لفظله تعمیر اولندی شو تقدیرده اقسام خمسۀ مذکورده دن
 هر بری اون ایکی ضمیر و اون سکر معنادن عبارت اولوب مجموعی آلتش
 ضمیر و طقسان معنا اولور ضماثر بیاندی ایه بونلرک اوزرینه نیجه احکام
 و مسائل تفرع ایلمشدر . مثلاً استتار ضمیر کی که مرفوع متصله خاصدر
 نته کیم ذکر اولندی و مانع اتصال قاچ دانه اولدینی و انفصال و اتصال
 موقعلری و ضمیر شان و قصه مسئلهلری کی شو جهتلردن دخی تزیداً
 للفائده بحث ایتمایز .

درس ۱۲۸

خفی اولیه که (اتصال) ده اختصار اولغله اتصال اصلدر شو جهتیه بر
 ضمیری متصل کتورمک متعذر اولدقجه منفصل اوله رق کتورلر و (مانع
 اتصال) آلتی دانه در .

(اولکیسی) بر ضمیر عاملنک اوزرینه مقدم اولور ایه اتصال عاملک

آخرینه اوله جغندن بالضروره ضمیر منفصل اولور (اياك نعبد) قول شریفده اولدینی کبی (اياك) ضمیر منصوب منفصلدر لاجل افاده الاختصاص والاهتمام عاملك اوزرینه مقدم اولمشدر .

(ایکنجیسی) برضمیر ایله عاملی بینی لغرض فصل اولنور ایسه انفصال اتصاله منافی اولمغله بالضروره ضمیر منفصل اولور (ماضربك الا انا) قولزده اولدینی کبی (انا) ضمیر مرفوع منفصلدر عاملی اولان ضربك ایله کندی بینی تخصیص غرضیله (الا) کله سیله فصل ایدیلمشدر .

(اوچنجیسی) برضمیرك عاملی حذف اولنور ایسه متصل اوله جنی قالمامغله بالضروره منفصل اولور (اياك والشر) قولزده اولدینی کبی (اياك) ضمیر منصوب منفصل در عاملی حذف اولمشدر (اتق نفسك والشر) دیمکدر .
(دردنحیسی) برضمیرك عاملی معنوی اولور ایسه اتصال ممکن اوله میه جغندن (ضمیر) بالضروره منفصل اولور (انا زید) قولزده اولدینی کبی (انا) ضمیر مرفوع منفصلدر کلامده مبتدا واقع اولمغله عاملی معنویدر .

(بشنجیسی) برضمیرك عاملی حرف و ضمیر من حیث العمل مرفوع اوله جق ایسه ضمیر مرفوع حرفه متصل اوله میه جغندن بالضروره منفصل اولور (ما انت قائماً) قولزده اولدینی کبی (ما) کله سی لیسیه مشابه حروف نافیه دن وانت ضمیر مرفوع منفصل اولوب محلاً مرفوع اسمیدر وقائماً لفظاً منصوب خبریدر .

(التنجیسی) برضمیره صاحبك غیری اوزره جریان ایلمش برصفت اسناد اولنور ایسه صاحبی تعین ایتسون ایچون ضمیر منفصل اولور زیرا منفصل کتورانه بعض صورتلرده صفتك صاحبی ایله غیری فرق ایدیامیهرك التباس لازم کلور ایدی مثلاً (زید عمرو ضارب هـو) قولزده اولدینی کبی (زید) مبتدای اول (عمر) مبتدای ثانی (ضارب) اسم فاعل مفعولی اولان ضمیره مضاف و ضمیر مزبور عمروه راجعدر (هـو) ضمیر مرفوع منفصل (ضارب) ك فاعلیدر زیده راجعدر اسم فاعل مع فاعله مرکب ناقص اولوب لفظاً مرفوع مبتدای ثانینک خبریدر مبتدای ثانی مع خبره جمله اسمیه صغری اولوب محلاً مرفوع مبتدای اولك

خبر یدر و مبتدای اول مع خبره جمله اسمیه کبری اولوب لامل لها من الاعراب جمله سی ابتدائیه در اشبو مثاله صفت ضارب در عمرو اوزره جاری اولمش حالبوکه صاحب ضرب زید در ضمیر مرفوع منفصل اولان (هو) یه اسناد اولمشدر واکر اشبو ضمیر منفصل کتور یلمیوب (زید عمرو ضارب) دینسه که ضارب کلمه سنک ایچنده مستتر قیلنسه ضمیر مستتر مزبور (زید) ه می راجعدر و یاخود عمرو ه می راجعدر التباس لازم کلور ایدی و بلکه عمرو قریب اولغله عمرو ه راجع اولسی متبادر اولور ایدی و اما ضمیر مزبور خلاف ظاهر اوله رق منفصل کتور لسه اتصالدن انفصاله البته برنکتهدن ایچون عدول ایدیه جکندن قریب اولان عمرو ه راجع اولمیوب بعید اولان زیده راجع اولدیغنی ارئه و تعیین ایدر و هر نقدر بعض صورتده مثلاً (هند زید ضارب ه) قولزده ضارب ه مؤنث اولغله صاحبی هند اوله جفی ظاهر ایدو کندن التباس یوق ایسه ده بوده صورت التباسه محمولدر دینه بیلور خفی اولیه که شیخ رضی مثال مذکور نخونده صفت ضمیر مرفوع منفصله مسند اولمیوب بلکه ضمیر مرفوع منفصل صفتده مستتر ضمیری تأکیددر دیمشدر .

درس ۱۲۹

معلوم اوله که ایکی ضمیر مجتمع اولسه یا ایکسی ده مرفوع و یا ایکسی ده مجرور و یا ایکسی ده منصوب و یاخود بریسی مرفوع دیکری مجرور و یا منصوب و یا بریسی مجرور دیکری منصوب اولق احتمالی تخیل اولنور اما ایکسی ده ضمیر مرفوع اولق ثانی اولک عینی وانی مؤکد اوله رق واقع اولور و ثانی ده انفصال واجب اولور (ضربت انت نفسک) قولزده اولدیغنی کبی و اما ایکسی ده ضمیر مجرور اولق هرکز متصور اولمز زیرا ضمیر مجرور واجب الانفصال اولوب هربری جاره و یا مضافه متصل بولنه جغندن شو حالده اجتماع ضمیرین مجرورین تصور اولنه مز و اما بری مرفوع دیکری مجرور اولق (طرداً) اوله میوب (اما عکساً) یعنی اولکی ضمیر مجرور

اولور ايسه بوواقع در وئائي ده انفصال واجيدر (زيد عمرو ضاربه هو)
و (هند زيد ضاربه هي) قوللر مزده اولديني كي واما بري مرفوع
ديكري منصوب اولور ايسه اول مرتبه ده بولنان مرفوع ايسه ضمير مرفوعك
فعله شدت اتصالي اولمغله فعلدن جزء كي اولديغندن اراده برفصل واقع
اولمش اوليه رق ضمير منصوب دخي كالاول وجوبا متصل اولور (اكر متك)
قولمزده اولديني كي واكر اول مرتبه ده بولنان ضمير منصوب ايسه ثاني ده
انفصال واجيدر زيد عمرو يضربه هو قولمزده اولديني كي . واما بري
مجرور وديكري منصوب وياخود ايكي سي ده منصوب اولور ايسه (اكر)
معرفه لكده بري برينه مساوي ايسه لر مثلا ايكي سي دخي ضمير غائب اولمق
كي شو تقديرده ايكي سي دخي متصل قيلند قدده هر قنغيسي تقديم اولنسه كلمه
واحدده حكمنده اولان برفلظده بلامرجح احد المتساويين آخره تقديم
اولمق لازم كله جكنندن بر كلمه آخر حكمنده اولسون ايچون ضمير ثاني
وجوبا منفصل قيلنور (اعجيني اعطاؤه اياه) و (اعطيته اياه) قوللر مزده
اولديني كي . واكر بري برينه مساوي اوليوب احدها آخردن اعرف
ايسه شو حالده اكر اعرف تاخير اولنمش ايسه شو صورت ده ايكي سي دخي متصل
قيلند قدده كلمه واحدده حكمنده اولان برفلظده اقصى اقوايه تقديم لازم
كله جكنندن بوايسه كويه اولمغله ضمير ثاني كذا كلمه آخر حكمنده اوله رق
جاي معذرت اولمق اوزره وجوبا منفصل قيلنور . (اعطاؤه اياك)
و (اعطيته اياك) قوللر مزده اولديني كي (سيويه) دن تجويز اتصال
ايله اعطيه توك دخي منقولدر واكر اعرف تقديم اولنمش ايسه ضمير ثاني بي
متصل ومنفصل كتور مكده مخيرز . ضمير متصل فعلدن جزء كي عدايدوب
فعل ايله ضمير ثاني بيننده فصل واقع اولمامسي ملاحظه سيلاه متصل كتور يرز
(اعطيتكه) و (ضربيك) قوللر مزده اولديني كي . وهر نقدر فعله متصل
ايسه ده ينه في الجملة فصل اولمسي ملاحظه سيلاه منفصل ده كتوره بيلورز
(اعطيتك اياه) و (ضربني اياك) قوللر مزده اولديني كي وخفي اوليه كه
بري مجرور ديكري منصوب اولسه بونده دخي هر حالده مجرور مقدمدر تامل .

خفی اولیه که کان واخواتنک خبری اگر ضمیر اولور ایسه مختار اولان اول
ضمیر منفصل کتور لمیلدر نته کیم کان زید قائما و کنت ایاه دینور و اما کان
زید قائما و کنتسه دیمک دخی جائزدر زیرا (خبر باب کان فی الاصل خبر
مبتدا در بر مبتدائک خبری ایسه ضمیر اولدقده منفصل اولسی واجبدر
ودیکر بر جهتلهده باقیلور ایسه (خبر باب کان) فی الحال مفعوله شبیه در ضمیر
مفعول ایسه زیدا ضربته نخونده واجب الاتصال در مفعوله شبیه اولانده
وجوبه قائل اولماز ایسه هله جوازه شبههده قالمز لکن فی الاصل خبر مبتدا
اولسی جانبته رعایت فی الحال مفعوله مشابهتی جهتنه رعایت دن اولی بولمغله
انفصال مختار اولور .

و بیلمیلدر که استعمالاً اکثر اولان (لولا) کله سندن صکره واقع
ضمیر مرفوعک منفصل اولسی و (عسی) کله سندن صکره واقع ضمیر
مرفوعک متصل بولمسیدر زیر لولا دن صکره واقع اولان مبتدا اولمغله آنده
انفصال و عسی دن صکره کلان فاعل اولمغله آنده اتصال اولی اولور پس لولا
هو لولاها لولا هم دیو تصریف ایدرسک لولا انا لولا نحن یه منتهی اولانه
دکن و عسی کله سنده عسی عسیا عسو عست عستا عسین عسیت عسیما
عسیتم عسیت عسیما عسین عسیت عسینا دینور . و (بعض لغتده) لولا
و عسی یه ضمیر مرفوعک غیری متصل اوله رق لولاک و عساک کلشدر
(اخفش) ضمیرده تاویل و تصرف ایدوب (لولاک) ده ضمیر مجرور
ضمیر مرفوع موقعنده واقعدر ضماژدن بعضیسی ایسه یکدیگرینک موقعنده
واقع اولور نته کیم (ما انا کانت) قولمزده انت ضمیر مرفوع ایکن ضمیر
مجرور موقعنده واقع اولمشدر و (عساک) ده ضمیر منصوب مرفوع
موقعنده کتور لمشدر دیمشدر و (سیبویه) نفس (لولا) و (عسی) ده
تاویل و تصرف ایدوب (لولاک) ده لولا حرف جر در و (عساک) ده
عسی (لعل) یه تقارب معنارندن ایچون محمولدر دیمشدر لولا و عساده
دخی لولای و عسای یه منتهی اولانه دکن اختلاف و توحیه وجه مذکور
اوزره در .

و بیامیدر که ضمیر متکلم اولان (یا) اکر فعل ماضی نك آخرینه و یا خود نون اعرابدن خالی اولدینی حالده فعل مضارعك آخرینه متصل اولسه یای متکلم ماقبلنك کسرینی اقتضا ایده جکندن هم اشبو کسره بی وهم فعل ماضینك آخرینك فتحه سنی و آخر مضارعك ضمه سنی و قایه ایچون یای متکلمك اولنه بر نون مکسوره کتورمك لازم اولور و بوکا نون و قایه دینلور ضربنی و یضربنی کی .

واما آخرنده نون اعراب بولنان فعل مضارعه و یا خود (لدن) و (ان) و (ان) و (کان) و (لکن) و (لعل) یه متصل اولسه (لدن) کله سنك آخرینك سکونی و متباق نك حرکات بنائیه لرینی حفظ و وقایه ایچون یه بر نون و قایه کتورمك و یا خود اجتماع نوناندن احتراز ایله کتورمامك بیننده مخیرز (لعل) کله سنك آخری هر نقدر لام ایسه ده فقط نونه قرب مخرجی اولمغله نون و قایه کتورلسه حکماً اجتماع نونین لازم کلور شو جهتله و برده حرفی کثیر بولمغله (لعل) ده مختار اولان نون و قایه یی کتورمامکدر .

واما (لیت) کله سنده حرف آخری نون اولیوب و نونه مخرجاً قریب دخی اولمامغله نون و قایه یی کتورمك مختاردر و (من) و (عن) ده و حسب معناسنه اولان (قد) و (قط) ده آخرلرینه یای متکلم متصل اولدقده حرفلری قلیل بولندیغندن و برده آخرلرینك سکونی حفظ ایچون نون و قایه کتورمك مختاردر لیتی و منی و عنی و قدنی و قطنی کی .

درس ۱۳۱

و خفی اولیه که نحاتك ضمیر فصل و عماد و ضمیر شان و قصه تسمیه ایلدک لرینی دخی بیامیدر اما (ضمیر فصل) نواسخ مبتدا و خبر تسمیه اولنان عامللرک کرك دخولدن اول و کرك صکره مبتدا ایله خبر بیننده کتور یلان بر صیغه مرفوع منفصلدر زید هو القائم و کان زید هو القائم قولزده اولدینی کی مبتدایه افراد و تنبیه و جمع ده و تذکیر و تانیثده و تکلم و خطاب و غیبت ده مطابق اولسی لازمدر (الزیدان ها القائمآن) و (الزیدون

هم القائمون) و (كنت انت الرقيب) و (كنت انا القائم) و (كنتما اتما القائمین) و (كنتم انتم القائمین) و (الهند هي القائمة) و (الهندان هما القائماتان) و (الهندات هن القائمات) و (كنت انت القائمة) و (كنت انا القائمة) و (كنتما اتما القائمین) و (كنتن انتن القائمات) قولار مزده اولديني كبي (ضمير فصي) كيتورمكن غرض مابعدى خبر اولوب صفت اولمديغنى فصل وتعيندر وكتورلمسك شرطى خبر معرفه اولمق وياخود (افعال من كذا) بولمقدر امثله سابقه و (زيد هو افضل من عمرو) و (كان زيد هو افضل من عمرو) قولار مزده اولديني كبي ضمير فصي خليل وبصريلر عندنده اعرابدن محلى يوقدر زيرا رفع التباسدن عبارت غير مستعمل برمعنايه دلالت ايلديكي جهته حرفدر . صورت ضميرده بولنديغندن مجازاً ضمير تسميه ايديلمشدر وبعض صورتده خبر ايله نعت يئنى فصل ايلديكندن ضمير فصل ديلمشدر وهر نقدر بعض صورتده مثلاً مبتدا ضمير واقع اولوب وياخود خبر افعال من كذا اولسه التباس يوقايسهده بوده صورت التباسه محمولدر .

واما كوفيلر عندنده ضمير مزبور اسم اولوب مبتدائي تا كيد انچون كمشدر ديديلر ومابعدى خبر اولمقده ضبط وحفظ ايلديكي اجلدن عماد البيت مشابهسند اولديغندن (ضمير عماد) تسميه ايلديلر وبعضيلر صيغه مزبوره اسمدر وكلامده اعرابدن محلى اولوب مبتدائى نايدر ومابعدى خبر يدر وجملهسى مبتدائى اولك خبر يدر ديديلر شو ذهاب آنجق امثله مذكوره نحونده جارى اولور وهر نقدر بعض بصريين صيغه مزبوره اسمدر اعرابدن محلى يوقدر ديو ذهاب اولديلر ايسهده اسمدر دائماً معمول اولسى جهته امتحانده اشبو ذهاب بك مرجوح اولوب بين الاسما نظيرى يوقدر ديلمشدر ومذهب كوفيين دخی مضمرك مظهره تا كيد اوله مامسيله تضعيف اولمشدر .

وحتى اوليه كه ضمير فصل بعض حال ايله ذوالحال يئنده دخی واقع اولور جاءنى زيد هو را كبا واعجبنى هو ضاحكاً قولار مزده اولديني كبي لكن نادر در شو جهته مبالات اولنماشدر مذهب ثالث بونده جارى اوله مز .

واما (ضمير شان و قصه) دنیلان بر جمله اولنده بولنان ضمیر در که اول جمله ایله تفسیر اولنور لیکن مفهوم کلام مذکر و یا مؤنث اولدن خالی اولماغله مقام مقام تذکیر اولوب ضمیر مزبور مذکر ایسه ضمیر شان واکر مقام تأیث اولوب ضمیر مزبور مؤنث ایسه ضمیر قصه دنیلور .

خفی اولیه که مفهوم کلام مذکر اولدقده ضمیر شان و مؤنث اولدقده ضمیر قصه دینلمسی بعضیلره کوره لفظی مذکر اولان شان قصه یه و یا لفظی مؤنث بولنان قصه یه راجع اولدیغندن اولیوب بلکه تذکیر و تأیث ده مفهوم کلامه مطابقته رعایت ایچوندور و بعضیلره کوره متصور فی الذهن اولان شان و یا قصه یه راجع اولدیغندور قضا برزاده بوکا حق ویر مشدر کوفیلر مرجعلرینک مجهول اولسنه ذهابلری ذهاب اولی و بصریلرک مرجعلرینک معلوم فی الذهن اولسنه ذهابلری ذهاب ثانی بی مرجحدور .

ضمیر شان و قصه نک خواصندندر که انحق جمله ایله تفسیر اولنورلر . و جمله مفسره ده کندیلره راجع ضمیر بولمز . و کندیلر اوزره برسنه عطف اولنمز . و برسنه ایله تأکید اولنمز . و کندیلردن بدل واقع اولمز . و همیشه فی الاصل و یا فی الحال مبتدا اولورلر . و انحق ضمیر غائب اولورلر . و الذی ایله کندیلردن خبر ویرلر . و تنیه و جمعلری جائز اولمز . و سائر تفسیر اولانلر کی اولیوب اعرابدن محملری واردور . و بعض کره ضمیر متصل اولوب مستتر و بارز دخی اولورلر کان زید قائم وانه زید قائم کی . و بعض ضمیر منفصل اوله رق بولنورلر هو زید قائم کی . و حذف اولملری پک قلیلدر . ضمیر مرفوع اولدقلرنده عمده اولغله هرکز حذف اولنمز . واکر ضمیر منصوب اولورلر ایسه فضله اولدینی اجلدن حذف اولنه یلور ایسه ده مقصود اولان بر ضمیری بلا دلیل حذف ایلمک اولدیغندن ضعیفدر و مع الضعف حذف اولنمی .

ان من یدخل الكنيسة يوماً یلق فیها جاذراً وضباً

شعر نده اولدینی کی که انه تقدیر نده در واما (ان مشدده مفتوحه) تخفیف

اولندقدده وجوبا محذوف و مقدر بر ضمیر شانده عمل ایدر زیرا (ان مکسوره مخففه نك مثلا (وان كلا لما لیوفینهم) قول شریفنده اولدینی کبی ملفوظده عملی کوریلوب ان مفتوحه نك فعله شبهی اقوی ایکن تخفیف اولندقدده عملی کوریلمامسی انقصك اقوایه رجحانیتی ایجاب ایده جکندن ایتماك اوزره بر ضمیر شان مقدرده همیشه عمل ایتسی تقدیر اولنور و ضمیر شانی اظهار ایلماك مطلوب اولان تخفیفی فوت ایده جکندن اظهار اولنمیوب ان مفتوحه مخففه یه مخصوص اوله رق بنیه الاضمار حذفی لازم اولور .

درس ۱۲۰

(مبحث اسماء الاشاره) مبنی عارض لازم بدن بر یسی دخی اسماء اشاره در وجه بنالری بعضیلرینه کوره اسماء استفهام همزه استفهام معناسنی متضمن اولدینی کبی اسماء اشاره دخی بر معنای اشارتی متضمن در یوقاریده مرور ایلدیکی اوزره (معنای اشارت) نفی ونهی و تمنی و ترجی کبی معناله قیاسله کندیچون بر حرف وضع اولمغه شایسته اولمغه اسماء اشاره کانه معنای حرفی متضمن در ومع هذا معنای اشارت بر مشار الیه احتیاجی جهتله غیر مستقل بولندیغندن بر معنای حرفیدر حاصلی بونلره کوره وجه بنا حرفه مشابته معنویه در . (فاضل جامی) و دیگر لرینك اختیاری اسماء اشاره ابهامی رفع ایدیچی بر قرینه یه مثلا اشارت حسیه یه و یا خود (هذا الزجل) ده اولدینی کبی بروصفه محتاج اولمغه احتیاج الی الغیرده حرفه مشابه بولنمسیدر . و (بعضیلرینه کوره) اسماء اشاره دن بعضیسی مثلا (ذا) کبی ثنائیه اولوب وضعی وضع حرف کبی اولسی و وضعی حرف کبی اولیانلر دخی بونك اوزرینه محمول بولنمسیدر دیدیلر جمله سنك مرجع کلاملری حرفه مشابته و مناسبتدر .

اسماء اشاره عند النحات (ما وضع لمشار الیه) دینمکله معرفدر یعنی اشارت حسیه ایلر بر مشار الیه وضع اولنان اسملردر دیمکدر شو جهتله ضمیر غائب و امثالی ایلر اعتراض اولنه من زیرا آنلرك معنالرینه اشارتلی مثلا (هو)

ضمیرینک معناسی اولان مفرد مذکر غائبه اشارتی حسا اولیوب بلکه ذهناً بولمیشدر و هر تقدیر (ذلکم الله ربکم) آیت کریمه سنده (ذلکم) اسماء اشاره دن اولوب (اشارت) امر حسی یه دکل ایسه ده بوده مجاز اولوق اوزره حمل اولنور . (اسماء اشاره دن) مفرد مذکر ده (ذا) و تشیه سنده حالت رفیده (زان) و حالت نصب و جر ده (ذین) دینور بونلر شو وجه اوزره وضع اولمیشدر (الف) و (یا) علامت اعراب دکلر پس معرب صورتنده بولملری اتفاقی اولوب علة بنا موجود اولغله قصدی دکلر جمهور نجات ذکر ایله یکمز وجه اوزره ذاهب اولمیشدر .

ویلملیدر که بعض لغتده تشیه ده جمیع احوالده الف ایله (زان) دینمیشدر حق سبحانه و تعالیٰ نک ان هذان لساحران قول شریفی دخی بولغت اوزره وارد اولمیشدر .

واما بعض نجات و امام برکوی دخی امتحاننده اسماء اشاره و موصولاتک تشیه لرینی بنادن بالاس تشنا معربدر دیدیلر و معرب اولمیشده لفظ تشیه کرک منبی و کرک معرب اولان جمیع اسمده حالت رفعه الف و نون و حالت نصب و جر ده یا و نون ایله اولوب برقیاس مطرد عام اوزره اولغله من جهة الاعراب جمله سی سیاق واحد اوزره بولنش و بولنسی جهته معرب قیلنمیشدر دیدیلر نته کیم تراکیب عدیدین (اثنی عشر) ترکیبده دخی جزء اول معربدر که ذهاب لرینی مقویدر .

اسماء اشاره دن مفرد مؤنث ده (تا) و تشیه سنده حالت رفعه ده (تان) و حالت نصب و جر ده (تین) دینور بونده دخی کلام زان و ذین ده اولدینی کی در و بعض مفرد مؤنث ده الف یاه قلب اولنه رق (تی) دینور و دخی مفرد مؤنث ده ذی دخی وارد اولمیشدر و بعض قبل الاخر برها دخی کتوریلوب (ذهی) و (تهی) دینور فقط بعضیلر (تا) دن غیرینک تشیه لری کلامکله مفرد مؤنث ده اصل (تا) در دیدیلر و بعضیلر (ذا) لفظنه مناسبتدن ایچون مفرد مؤنث ده اصل (ذی) در دیدیلر و بعضیلر (تا) و (ذی) ایکیسی دخی اصلدر دیدیلر لکن مؤنث ده (تا) کلمه سنک غیرندن صیغه تشیه کلامسی (تا) کلمه سنک اصل اولمینی مرجحدر .

اسماء اشاره دن جمع مذکر و مؤنث ده بر لفظ اوله رق مدوقصر ايله (اولاء)
 کلمشدر لکن صورت قصرده همزه یرنده یا کتب اولنور شوبسطمز بیاندی
 ایسه اسماء اشاره بش نوع اولش اولور که مفرد مذکر و تشیه مذکر و مفرد
 مؤنث و تشیه مؤنث و جمع در و بعض اولارینه تنیها لامش ارایه برها لفظی
 الحاق اولنور مثلاً (هذا هذان هذين هاتا هاتان هاتين هؤلاء) کبی
 و مذکر و مؤنثه خطاب عندنده اخرلرینه بر حرف خطاب کتوریلور حرف
 خطابده افراد و تشیه و جمع و تذکر و تأیث اعتباریله الی عدد اولق اقتضا
 ایدر ایسه ده (خطاب تشیه) مذکر و مؤنث بیننده مشترک بولندیغندن بش
 دانه قالور اشبو بش دانه بش نوع اسماء اشاره یه متصل قیلندقدده حاصل
 ضرب یکر می بشه بالغ اولور مفرد مذکر ده ذاك ذاکا ذاکم ذاک ذاکا
 ذاکن دینور و تشیه مذکرده ذانک ذانکما ذانکم ذانک ذانکما ذانکن دینور
 و مفرد مؤنثده تانک تانکما تانکم تانک تانکما تانکن دینور و تشیه مؤنثده تانک تانکما
 تانکم تانک تانکما تانکن دینور و جمع مذکر و مؤنثده اولئک اولئکما اولئکم
 اولئک اولئکما اولئکن دینور و اما (تا) نک غیری مفرد مؤنث لفظلرینه
 حرف خطابک دخولی (قی) ده واقعدر مثلاً تیک تیکما تیکم دینور و الی
 اخره تصرف اولنور دیکر لرده معروف دکلدر هر نقدر ز محشری (و مالکم
 ذیک) یی ایراد ایلیمش ایسه ده صحاح ده لایقال ذیک فانه خطأ دینمشدر .
 و خفی اولیه که (ذا) ایله قریبه اشارت اولنور آخرنده حرف خطاب
 اولمدجه جمله سی بویله در و (ذاک) ایله نه قریب و نه بعید بر متوسطه اشارت
 اولنور بلالام آخرنده حرف خطاب اولئلرک جمله سی بویله در تانک و مخفقتین
 اوله رق ذانک و تانک و اولالک کبی و (ذلک) ایله بعیده اشارت اولنور آخرنده
 مع اللام حرف خطاب اولانلرک جمله سی بویله در تلک و مشدیتین اوله رق
 ذانک و تانک و اولالک کبی اشبو لامه لام تبعید تسمیه اولنور و مشددتین
 اولان ذانک و تانک ده مدغم فیه اولان نون ثانی لام تبعیددن منقابه در .
 و بیلملیدر که ضمها و تخفیف نونله هنا و فتحها و تشدید نونله هنا و کسرها
 و تشدید نونله هنا و ثمه کلملری دخی اسماء اشاره دن اولوب خاصه مکان
 حقیقی حسی ده استعمال اولنور لر و مکانک غیرنده دخی بولنور لر ایسه ده علی

سبیل التشیه مجاز اولمش اولور واما بونلرك غيرى اسماء اشاره مكان ومكانك
غيرنده استعمال اولنورلر .

درس ۱۳۳

(مبحث الموصولات) مبنى عارض لازمى دخی موصولاتدر وجه
بناسى بر صله وعائده محتاج اولمغله احتياج الى الغيرده حرفه مشابه
اولمسيدر وحرفه مشابهت وضعيه ومعنويه دخی ملاحظه اولنه بيلور
(موصول) لغتده كندينه برسنه وصل اولمش اولان شى در واصطلاح
نجاتده (ما لا يتم جزء الا بصلة وعائد) دينمكه معرفدر يعنى كلامده تمام
بر جزء عد اولمقدده بر صلهيه وصله دروننده بر ضميره محتاج اولوب من
حيث جزئيه اول صله وعائدىز تمام اوله ميان اسمدر ديمكدر مثلا
(جاء فى الذى قام ابوه) ديديكمزده (الذى) اسم موصولدر (جاء) فعلنك
فاعليدر لكن فعل مذكوره فاعل وتمام بر جزء اولمقدده بر صلهيه كه (قام
ابوه) جمله سنه محتاجدر وصله ده موصوله عائد بر ضمير وارددر كه (ابوه) ده
اولان ضميردر موصول صله سنى الدقه فعل مز بوره فاعل وكلامده
جزء اولمقدده ارتق آخر بر كنهك انضمامنه حاجت قالمديغندن جزئيه
تام اولمش اولور .

ومحل دقتدر كه (صله سز جزء تام اوله مز) دينلوب مطلقا جزء اوله مز
دينلمدى زيرا موصول مع صله بر مركبـدن جزء واقع اولدقه يالكنز
موصول دخی فى الجملة جزء اولمش اولور .

موصول بيلندى ايسه (صله يى دخی بيلمليدر) (صله) لغتده برسنه يى
برسنه اولشـديرمق وبتشديرمك معناسنه وشو معنادن اسم اوله رق
برسنه بتشديريلوب واكنلان شينه دينور واصطلاحده (جمله متصله
باسم لا يتم جزء الا مع هذه الجملة مشتملة على عائد اليه) دينمكه معرفدر كه
تعريف موصولدن دخی مستباندر يعنى (صله) بر جمله در براسمه
متصلدر كه اول اسم كلامده جزء تام اوله مز آنحق اشبو صله دينلان
جمله ايله جزء تام اولور و بر ضميرى مشتملدر كه اسم مز بوره راجعدر

مثال من بورده (قام ابوه) جمله سی کی که اسم موصول اولان (الذی) نك
 صله سیدر و (الذی) یه متصدر (الذی) صله سز کلامده جزء تام اوله من
 و (الذی یه) راجع بر ضمیری مشتملدر نته کیم ایضاح اولندی.

و خفی اولیه که صله جمله خبریه اولور مثال من بورده اولدینی کی و بعض
 جمله خبریه معناسنده بر اسم اولور اسم فاعل و اسم مفعول کی و اسم
 موصول عائدی آنحق ضمیر اولور.

و یلمایدیر که اسم فاعل و اسم مفعول اوزره داخل اولان الف لام عند الما زنی
 و الاخفش حقیقه حرف تعریفدر اسم موصول دکلدر اسم موصول اولسه
 امراب بالذات آنك حق اولوب مدخولی اولان صفتده جاری اولمزایدی
 دیو احتیاج ایلدیلر و عهد ذهنی مثابه سنده اولوب آنکله معرف اولان نکره
 ایله موصوف اوله بیلور دیدیلر حق سبحانه و تعالی نك (المستضعفین من الرجال
 و النساء و الولدان لایستطیعون) قول شریفنده (لایستطیعون) جمله سی
 (المستضعفین) یه صفت قیلندیغنده اولدینی کی جمله ایسه نکره حکمنده در
 فقط (الرجال و النساء و الولدان) ایچون دخی صفت اولسی جائزدر.

و اما (عند الجمهور) اسم فاعل و اسم مفعول اوزره داخل اولان الف لام
 هر تقدیر حرف تعریف صورتنده ایسه ده حقیقه حرف موصول اولوب
 اسم موصول منزلنده در اسم موصول منزلنده اولسنه اسم فاعل و اسم
 مفعول آنکله اولدقده اکا اعتماد ایدوب عمل ایتسی دلیلدر و اگر اسم
 موصول منزلنده اولسنه اسم فاعل و اسم مفعول اکا اعتماد ایله عمل
 ایده منزل ایدی دیو احتیاج ایتدیلر و اسم موصوله دخی بعض عهد
 معامله سی اولوب نکره کندنینه صفت واقع اوله بیلور دیدیلر نته کیم
 (صراط الذین انعمت علیهم غیر المغضوب علیهم) قول شریفنده اولدینی
 کی که (غیر المغضوب) (الذین) نك صفتدر غیر ایسه ایهامده توغلندن
 ایچون اضافت ایله کسب تعریف ایده میه جکندن نکره در.

(الف لام) مذکور مفرد مذکره الذی و مفرد مؤنثه الی معناسنه
 اولوب تنسیه و جمعده دخی بونلرک تنسیه و جمعری معناسنده در و مدخولی
 فی الاصل جمله فعلیه اولق اوزره متصور اولوب فقط حرف صورتنده

اولان برشیئتک فعل اوزرینه دخولی کریه کورلدیگندن جمله فعلیه لکدن اسمیه انتقال اولمش وشو جمله اعرابی بعدینه ویرلمشدر پس مدخولی وصله سی قیلنان اسم فاعل واسم مفعول معنا جمله خبریه دیمک اولور .

مثلاً (جاء فی الضارب زیداً) قولمزک اصلی (جاء فی الذی ضرب زیداً) در الذی اسم موصول و (جاء) فعلنک فاعلی اولغله معمول وصله سی اولان ضرب زید جمله منته ضرب فعل ماضی اولغله غیر معمول ایکن (الذی) الف لام صورتنه و ضرب اسم فاعل یعنی ضارب شکلنه تحویل اولندقدہ اعراب حکم لفظی اولدیغندن جانب لفظ ترجیح اولنه رق امر برعکس اولمشدرکه جزء اولک اعرابی جزء ثانییه ویرلمش پس جزء ثانی معمول و جزء اول که الف لامدر غیر معمول اولمشدر و بعضیلر مثال مذکورک اصلنده جاء فی الذی يضرب زیداً دیدیلر بودخی صحیحدر صورت اول ماضی و صورت ثانی حال ویا استقبال معناسنه اولسی ملابسہ سیله در .

و (جاء فی المضروب غلامه) قولمزک اصلی (جاء فی الذی ضرب غلامه) ویاخود جاء فی الذی يضرب غلامه در علی صیغه المجهول فقس واعتبر .

وخی اولیه که اسم موصول منزلنده اولان الف لامک وصله سی آنحق حدوث معناسنه اولان اسم فاعل واسم مفعولدر کړک بالمبالغه وکړک بلا مبالغه اوله واما (المؤمن) و (الکافر) لفظلری کبی ثبوت معناسنه اولنلر صفت مشبهه حکمنده اولوب آنلرده وصف مشبهه ده وخی اسم تفضیلده بولنان الف لام بالاتفاق حرف تعریفدر وشیخ رضی اختلاف نحوات عهد ایچون اولیان الف لامده در واما عهد ایچون اولان بالاتفاق حرف تعریفدر دیمشدر فقط فاضل عصام قبول ایتیوب شیخ رضی نک اشبو قولی آنحق اسم موصول هرکز عهد ایچون کلامش اواسه اولوقت تمام اولورایدی حالوکه خلاصه تحقیق اقسام اربعه تعریف اسم موصولده دخی جاریدردیمشدر خذهذا وکن من الشاکرین .

(اسماء موصوله) دن مفرد مذکرده الذی وتشبیه مذکرده حالت رفعده

الذان وحالت نصب وجرده الذين وجمع مذکرده الذين دینور ومفرد مؤنثده التي وتثنية مؤنثده حالت رفعده التان وحالت نصب وجرده التين وجمع مؤنثده التين دخي اللاتي اللواتي اللوا دینور واما ضم اول ايله على وزننده (اولی) جمع مذکر ومؤنثده مشترك اولوب فقط جمع مذکرده اشهردر واما همزه و (یا) ايله (الائی) وکسر همزه ايله بلایا (الاء) وکسریا ویاخود سکون یا ايله (الای) دخي جمع مذکر ومؤنثده مشترك اولوب جمع مؤنثده اشهردر (اسماء موصوله) نك دخي تثنيه لرنده معرب ومبنى اولسنده اختلاف اسماء اشاره نك تثنيه لرنده اولديني کي در نته کيم اسماء اشاره درسنده مرورایتدی.

وبیلمایدركه عقلائك غیرنده مستعمل اوله رق (ما) وعقلاده مستعمل اوله رق (من) دخي اسماء موصوله دندر مفرد ومثنی ومجموع ومذکر ومؤنث بیننده مشترک لردر (ما) لفظی کاه حرف اولور که کافه ویا نافیة اولدیغنده در شوصورتلرده موصوله اوله من وکاه اسم اولور که اشته موصوله اولسی اسم اولديني تقدیرده در اسم اولديني تقدیرده دخي همیشه موصوله اولیوب بلکه بعض موصوله اولور (عرفت ما اشتريته) کي وبعض استفهامیه اولور (ما عندك) و (ما فعات) کي وبعض شرطیه اولور (ما تضع اصنع) کي وبعض موصوفه اولور وموصوفه اولدقده صفتی یا مفرد اولور (مررت بما عجب لك) کي ای بشي يعجبك ديمکدر ویا جمله اولور شاعركه.

ربما تکره النفوس من الامر فرجة له کحل العقال

شعرنده اولديني کي ای رب شي تکرهه النفوس ديمکدر وبعض (شي) معناسنه کلمه تامه اولور وشوصورتده ابوعلی عندنده تکره اوله رق (شي) معناسنه در وسيدويه عندنده معرفه اوله رق (الشي) معناسنه در (فعمماهي) قول شريفنده اولديني کي ابوعلی به کورد تقدیر کلام (نعم شيئا هي) وسيدويه کوره (نعم الشئ هي) ديمک اولور واسم اولان ما لفظی بعض صفت اولور (اضرب ضرباً ما) کي اضربه ضرباً ای ضرب کان ديمکدر

واما (من) لفظی همیشه اسمدر لکن همیشه اسم موصول دکلدر بلکه بعض موصوله اولور (اکرمت من جاءك) قولزده اولدینی کبی و بعض استفهامیه اولور (من غلامك) و (من ضربت) کبی و بعض شرطیه اولور (من تضرب اضرب) کبی و بعض موصوفه اولور و موصوفه اولدقده صفتی یامفرد اولور شاعرك .

و کفی بنافضلا علی من غیرنا حب النبی محمد ایانا

شعرنده اولدینی کبی ای علی شخص غیرنا دیمکدر و یا جمله اولور (من جاءك) فقد اکرمته) کبی و اما من کلمه سی نامه و صفت اوله من نته کیم شو قطعه ده اشبو نقطه لره اشارت ایله نکتته و لطافت واردر .

﴿قطعه﴾

گفت چون گفتم که من کامل زما حال من دو مرتبه سافل زما
گفتم آری من ندیم عاقلم هست بینم لیک نا عاقل زما

وبیلملیدرکه ای وایه لفظاری دخی بعض اسم موصول اولورلر (ای) الذی و (ایة) الی معناسنه اولور (ایهم فی الدار) کبی الذی فی الدار دیمکدر و (اضرب ایتم فی الدار) کبی الی فی الدار دیمکدر . و بعض استفهامیه اولورلر (ایتم اخوک) و (ایتم لقیتم) کبی . و بعض شرطیه اولورلر (ایما تدعوا فله الاسماء الحسنی) قول شریفده اولدینی کبی . و بعض موصوفه اولورلر (یا ایها الرجل) قولزده اولدینی کبی و لکن بونلر دخی (من) کبی تامه و صفت اولمزله و هر تقدیر (ای) بعضی صفت اولدینی کورینور ایسه ده لکن اول صفت اولان ای فی الاصل استفهامیه درکه صفته نقل اولمشدر (مررت برجل) ای رجل کبی رجل عظیم دیمکدر .

اشبو (ای) و (ایة) کلمه لرنده اضافت ملترزم اولوب اضافت ایسه خواص اسمدن اولمسی جهته جانب اسمیتی مرجح اولمغله و اسم ایسه اعرابده اصل

بولغله شوکله لر همیشه معربدر مکرکه صله لرینک صدری محذوف اوله شو
 صورته ضم اوزره بنالری جائز اولور (ثم لنزعن من کل شیعة ایهم اشد
 علی الرحمن عتياً) آیت کریمه سنده (ای) ضم ایله قرائت اولندیغنده اولدینی
 کبی (ایهم هو اشد) تقدیرنده در صله نك صدرندن هو حذف اولمش
 و (ای) ضم اوزره مبنی قیلنمشدر زیرا صله لرینک صدری حذف اولندقد
 اول محذوف منوی به احتیاجلری اوله جفندن احتیاج الی الغیرده حرفه
 مشابهلری تأکید ایدر و برده مبنی بولنان غایاته مشابه اولوزلر زیرا مبنی
 بولنان غایاتده کندیلمی بیان ایلان بعض سنه که (مضاف الیه) در حذف
 اولدینی کبی بولردن دخی کندیلمی ایضاح ایلان بعض سنه که صدر صله در
 حذف اولنمشدر پس ضم اوزره بنالری موجه کورلشدر ودخی ای وایه
 موصوفه اولدقلمی حالده دخی مبنی لردر (یا ایها الرجل) قولزده اولدینی
 کبی زیرا هر برمنسادی مفرد معرفه علی مایرفع به مبنی در نته کیم محالرنده
 بیلنمشدر.

وبیلملیدرکه لغه (بنی طی) ده حالت رفعه ذو و حالت نصب و جرده ذی
 کاه (الذی) و یا (الذی) معناسنه اسم موصول اولور شاعرك
 (وبئری ذو حفرت وذوطویت) شعرنده اولدینی کبی الی حفرتها والی
 طویتها دیمکدر بونده دخی مبنی و یا معرب اولمسندنه تشبیه لرده اولدینی کبی
 اختلاف اولنمشدر و بیلملیدرکه (ما) ی استفهامیه دن صکره واقع (ذا)
 کله سی دخی کاه اسم موصول اولور (ماذا صنعت) قولزده اولدینی کبی
 ای ما الذی صنعت دیمکدر.

اشبو (ماذا صنعت) قولمز نحو نده ایکی وجه جائزدر (وجه اول) (ما)
 ای شیء معناسنه و (ذا) الذی معناسنه اسم موصول اولمسیدر (ماذا صنعت)
 قولمز بوکا کوره ای شیء الذی صنعت دیمکدر جوابی بر مبتدای محذوفک
 خبری اوله رق مرفوع اولور مثلاً جوابنده رفع ایله الاکرام دنیلورکه الذی
 صنعت الاکرام تقدیرنده در (وجه ثانی) (ما) ای شیء معناسنه اولوب
 و (ذا) اسم موصول اولوب زائد اولمسیدر و یا خود (ماذا) مجموعی
 ای شیء معناسنه اولمسیدر بونک جوابی بر فعل محذوفک مفعولی اولمق

اوزره منصوب اولور مثلاً جوابنده نصب ايله الاكرام دنيلور كه صنعت
الاكرام تقدیرنده در .

اسماء موصوله اشته بالاده ذكر ایلدیکمز اسملردن عبارتدر و حدوث
معنانه اولان اسم فاعل واسم مفعول اوزره داخل الف لامده حرف
موصولدر نته کیم بیلندی و خفی اولیه که اسم موصولک عائدی اکر ترکیبده
مفعول ایسه فضله اولدیغندن بر مانع منع ایلمدکجه حذفی جائز اولور (الله
يبسط الرزق لمن يشاء ويقدرله) قول شریفنده اولدیغی کی لمن يشاؤه دیمکدر .

درس ۱۳۵

خفی اولیه که (الذی) والذی نحو یله بر نسته دن خبر و یرمک طریقی بیلمک
واخبار قننی محله صحیح و قننی محله ممتنع در او کرمک لازمدر (نجات)
بوابده متعلمینه تمرین و تفهیم ایچون بر طاقم فائده لر ثبت ایدوب (الذی ايله
اخبار بابی) تسمیه ایلدیلر .

خلاصه سی شودر که مثلاً (الذی) ايله بر جمله نک جزئندن خبر و یرمک
اراده اولنسه امور ثلثیه رعایت ایلملیدر (اولاً) الذی بی جمله ثانیه
صدرنده تصدیق ایلملیدر و (ثانیاً) جمله اولی ده مخبر عنک موضعی فهم
ایلیوب جمله ثانیه ده اول موضعه (الذی) یه راجع بر ضمیر کتور ملیدر
و (ثالثاً) مخبر عنی جمله ثانیه ده خبر اوله رق تأخیر ایتملیدر . مثلاً (ضربت
زیداً) قولزده اولان (زید) دن خبر و یرمک استر ایسک (الذی) بی
جمله ثانیه صدرنده تصدیق ایدرسک و مخبر عنه اولان (زید) ک جمله
اولی ده موضعی که مفعول مقامیدر جمله ثانیه ده آنک مقابلی موضع مفعولده
الذی یه راجع بر ضمیر کتور یرسک و مخبر عنه اولان (زیدی) اک آخرده
کتور یرسک (الذی ضربته زید) دیرسک و اکر (ضربت هنداً) قولزده
هنددن خبر و یرمک استر ایسک ینه وجه مذکور اوزره خبر و یر یرسک
فقط (الذی) یرینه (الی) کتوروب و ضمیری مؤنث اوله رق ارجاع
ایدوب (الی ضربتها هند) دیرسک . و (حرف موصول اولان الف لام)
دخی بوقیاس اوزره در مثلاً (ضرب زید عمرواً) قولزده (زید) دن

الف لامه خبر و یرمک دیلرایسک (الضارب زید) دیرسک واکر عمرودن
 خبر و یرمک دیلرایسک (المضروب عمرو) دیرسک (الضارب زید) صیغه
 معلوم اوزره (الذی ضرب هو عمرو) تقدیرنده در (المضروب عمرو)
 صیغه مجهول اوزره (الذی ضرب هو عمرو) تقدیرنده در (الذی) الف
 لام صورتنه تحویل اولوب صورت اولده (فعل مبنی للفاعل) دن اسم
 فاعل و صورت ثانیده (فعل مبنی للمفعول) دن اسم مفعول اخذ اولمشدر
 نته کیم درس سابقده بجئی کجی . و (اشبو اخذک ممکن اولسنده) جمله
 فعلیه نک متضمن اولدیغی فعلک متصرف اولسی شرطدر زیرا نعم و بنس
 و حبذا و عسی و لیس کی افعال غیر متصرفه دن اسم فاعل و اسم مفعول
 کلیه جکندن مثلاً لیس زید منطالقا قولزده (زید) دن (الف لام) ایله
 خبر و یریه مز . و برده فعل مزبورک اولنده سین و سوف و حرف نفی
 و استفهام کی اسم فاعل و اسم مفعولدن استفاده اولنه میه حق بر حرف دخی
 بولنماق شرطدر شو جهتله مثلاً (سیقوم زید) قولزده (زید) دن
 (الف لام) ایله خبر و یریه مز زیرا سیقومدن اسم فاعل بنا اولنسه آنجق
 (قائم) دینه بیلور که شو تقدیرده معنای سین فوت اولور و بیلملیدر که
 اکر (الذی) و الذی نحوی ایله اخبارده آنفا ذکر ایلدیکمز امور ثلثه دن
 بری متعذر اولسه اخبار دخی متعذر و ممنوع اولور شواجلدن یدی محله
 ممنوع اولمشدر .

(اولکیسی) ضمیر شانندن خبر و یرمک متعذر . زیرا ضمیر شانک
 جمله ده تقدیمی واجبدر کندنن اخبار اولنسه جمله مخبره ده (الذی) ی
 تصدیر واجب اولدیغندن ضمیر شانی تأخیر ایلمک لازم کلور ایدی
 بوالیه اوله مز .

(ایکنجیسی) بر موصوفدن صفتی بولمیه رق اخبار متعذر .
 (اوچنجیسی) بر صفتدن دخی موصوفی بولمیه رق اخبار متعذر زیرا
 قننی کله دن اخبار اولنه حق ایسه اول کله جمله مخبره ده اک آ خرده
 کتور بله جکندن و جمله اولی ده مخبر عنهمک موضعی بیلنوب جمله ثانیه ده
 اول موضعه موصوله بر ضمیر ارجاع اولنه جکندن مثلاً (ضربت زیداً

(العاقل) قولمزده يالكز (زيد) دن اخبار اولنسه (زيد) مقامنده جمله مخبرده موصوله راجع بر ضمير كتور يلوب طيعي (العاقل) كلمه سيده اكا متصل ايراد اولنوب (زيد) اك صكره كتور يلور كه الذي ضربته العاقل زيد دينور شو صورتده ايسه ضميرك موصوف اولسي لازم كلور واکر يالكز (العاقل) دن اخبار اولنسه (الذي ضربت زيدا هو العاقل) دينلور كه شو صورتده ضميرك صفت اولسي محذوري واردر پس يالكز موصوف وياخود يالكز صفتدن اخبار اولنه ميوب مثال مذکورده موصوفدن مع صفته اخبار اولنور كه (الذي ضربته زيد العاقل) دينلور .

(دردنجيسي) عامل اولان بر مصدر دن معمولي ذكر اولنميه رق اخبار ممتنعدر مثلا عجيبت من دق القصار الثوب قولمزده (دق القصار) دن معمولي اولان (الثوب) ذكر اولنميه رق اخبار متعذر در زيرا اخبار اولنسه (الذي عجيبت منه الثوب دق القصار) دينلمك كورينور كه (ضمير) ك (الثوب) ده عمل ايتمسنی ارأه ايدر بوايسه اوله من واما مع معموله مصدر دن اخبار اولنور مثلا مثال من بورده (دق القصار الثوب) دن خبر وير يلوب الذي عجيبت منه دق القصار الثوب (دينور) .

(بشنجيسي) حال واقع اولان كلمه دن اخبار ممتنعدر زيرا حال نكره اولور واکر آندن اخبار اولنسه جمله ثانيه ده معرفه اولان ضميرك آنك موقعنده بولنسي لازم كلور معرفه نك نكره موقعنده بولنسي ايسه اوله من .

(التنجيسي) الذي نك غيري بر كلمه يه مستحق اولان ضمير دن اخبار ممتنعدر زيرا شو تقديرده الذي تصدير اولنسه ضميرك الذي يه راجع اولوب اول غيرك ضمير من قالمسنی استلزام ايده جكندن متعذر در مثلا (زيد ضربته) قولمزده ضربته ده اولان ضمير بارز منصوب دن اخبار مراد اولنسه قاعده مشروحه اوزره (الذي زيد ضربته) دينلور شو صورتده ضربته ده اولان ضمير بارز منصوبه مرجع اولغه (الذي) و (زيد) مستحق اولوب بر ضميري ايكي مستحقه ارجاع ايسه متعذر اولغه

و یالکنز موصوله ارجاع اولندقدده زیده راجع اوله حق ضمیر قالمامله
اجنار ممکن اوله میه جنی ظاهر در .

(یدنجیسی) الذی نك غیرى برکلهیه مستحق اولان ضمیری مشتمل اولان
اسمدن دخی اخبار متعذر در مثلاً (زید ضربت غلامه) قولزده (غلامه) دن
اخبار اولنسه (الذی زید ضربته غلامه) دینلور بوا یسه صحیح دکلدر زیرا
(ضمیر) موصوله عائذ اولسه مبتدا عائذسنز قالور واکر مبتدایه عائذ قیلنسه
موصول عائذسنز قالور ایدی بوا یسه اوله مز .

درس ۱۳۶

(مبحث اسماء افعال وما کان علی وزن فعال) مبنی عارض لازمندن بریسی
دخی اسماء افعالدر (اسماء افعال دیمک) (اسماء معانی افعال) دیمکدر یعنی
برطاقم اسملر در که مدلوللری اولان معنی افعال مخصوصه نك معنالر یدر که
برقسمی امر و بعضیسی فعل ماضی معناسنه کلشدر فقط افعال کی متصرف
اولیوب و صیغه لری دخی صیغ افعاله بکزه مدیکندن افعال جمله سندن
قیلنما مشلر در وجه بنالری معناده مبنی اصله مشابه اولملریدر .

اسماء افعالندن امر معناسنه اولان (ها) و (روید) و (هانم) و (هات)
و (حیل) و (بله) و (علیک) و (دونک) و (امین) و (وراک)
و (امامک) و (الیک) و (سه) و (طه) و (قط) و نحو (نزال)
و (قرقار) و (عرعار) در و غیر ذلک

(ها) خذ معناسنه که آل و طوت دیمکدر و همزه ایله (هاء) دخی لغتدر
ایکسیده کاف خطابه (هاء) و (هاءک) دیو استعمال اولنمق جائز در
و کاه ممدوده ده کافدن مستغنی اولنور (حرف خطاب) تصریف اولنوب
هاک ها کما ها کما ها کن دینور و همزه دخی کافک تصریفلری کی
تصریف اولنه بیلوب هاء هاؤما هاؤم هاء هاؤما هاؤن دینور .

(روید) امهل معناسنه که مهل ویر و تائی ایله دیمکدر فی الاصل ضم
را ایله (رود) کله سیدر که مهل و تائی معناسنه در پس تصغیر اولنوب
(روید) اولمش و یاخود (ارود) نك مصدری (ارواد) کله سیدر که

زوائدی حذف و تصغیر اولمغله روید اولمشدر اشبو (روید) کلمه سی درت وجه
اوزره مستعملدر (وجه اول) (اسم فعل امر) اولور که مانحن فیه مزددر شو
تقدیرده کافی خطاب دخی داخل اولور (روید زیداً) و (رویدك زیداً)
دینور امهله دیمکدر (وجه ثانی) منصوب و منون اوله رق بر مصدره صفت
واقع اولور سرت سیر آرویداً کبی . (وجه ثالث) حال دخی واقع اولور
سار القوم رویداً کبی بو مثالده معرفه یه متصل اولمغله صفت اوله میوب حال
قیلنمشدر (وجه رابع) مصدر اوله رق دخی استعمال اولنور مابعدینه
اصافله (روید عمرو) کبی و یقال رویدکن رویدکائی روید کمونی
رویدکنی رویدکائی رویدکنی فافهم (هلم) احضر یعنی سن احضارایت
وکتور معناسنه در تقول هلم زیداً ای حضره و دخی اقبل و تعالی یعنی سن
اقبال ایت و بری کل معناسنه کلور تقول (هلم الینا) ای اقبل و تعالی
و (اعط) معناسنه ده کلور تقول هلم کذا ای اعطه پس لازم و متعدی
استعمال اولنور تأمل اشبو (هلم) عند البصرین و الکوفین مرکب در
بصر یلره کوره اصلی (هلم) در (ها) حرف تنبیه در ولم کلمه سی (لم)
ماده سندن که جمع ایلمک معناسنه در فعل امر اولمغله (ضم نفسك الینا)
یعنی سن کنیدیکی بزه یناشدر که مراد بزم یا بزمه کل دیمک اولور و یا خود
(ضم الفلان الینا) یعنی سن فلانی بزه یناشدر که مراد آنی بزم عند مزه
کتور و احضارایت دیمک اولور و برکیسه سکا (هلم الینا) دیسه جوابنده
(الی م اهام) دیرسک همزه نك و هانك فتحیه یعنی نیره یه کلمیم دیمکدر اصلی
(الی م الم) ایدی (الی ما الم) کلمه سندن مخفف در ها حالی اوزره ترك
اولنور واکر برکیسه سزه (هلم اتم) دیسه جوابنده (الی م نهام) دیرسک
بو وجهله جوابی اصمعی حکایه ایلمشدر واکر (هلم کذا) دینسه یعنی
(شویله برشی ویر) دیمکدر اکر ویر میه جك ایسهك جوابنده (لا اهامه)
دیرسک (لا اعطیکه) دیمکدر همزه نك فتحی و لامك ضمی ایله وکاه اولور که
یا لکنز همزه مضموم قیلنور وکاه همزه و لام مضموم قیلنور وکاه همزه
مضموم و لام مکسور قیلنور واما (هلم) نك کو فیلره کوره اصلی (هلم) در
هل اسرع معناسنه امر و (ام) قصد معناسنه ام ماده سندن در فعل امر اولمغله

عجابه بزى قصد ايت يعنى تيز كل وياخود عجاه آنى بزم همچون قصد ايت
يعنى تيز کتور ديمکدر .

واما اهل حجاز عند بنده (هلم) مرکب اوليوب مفرد اوله رق اسم فعل
امر در و افراد و تنبيه و جمع و مذکر و مؤنث ده مساويدر متصرف دکدر
نته کيم آيت کریمه ده جمع عند بنده هلم شهداءکم واقع در احضر وهم ديمکدر
واما بنو تميم و اهل نجد اسم فعل دکدر بلکه فعل امر در انجق على ماسبقها
وياخود هل زياده قيانم شد در ديديلر و تصریف ايلديلر هلم هلموا
هلمى هلموا هلمن کي (هلموا الى حوايجکم) حديث شريفى بولغه اوزره
واقع اولم شد در ونون مشدده ادخاليله هلمن هلمان هلمن هلمن هلمان
هلمنان ديديلر ونون مخففه ادخاليله هلمن هلمن هلمن ديديلر واما اهل
حجاز عند بنده فعل اوليوب بلکه اسم فعل ايدو کندن تصریف ايتيوب
ونون مشدده و مخففه ادخال ايلمديلر .

(هات) اعطى معناسنه که بکاویر و بکا کتور ديمکدر و تصرف اولنوب هات
هاتيا هاتوا هاتى هاتيا هاتين دينور شو جهتله بعضيلر فعل امر در اسم
فعل دکدر ديديلر و امام خليل آتى يوتى ايتاء ماده سندن فعل امر در
همزه ثانيه الفه قلب اولنش و همزه اولى ها قيانم شدرايا و هيا و اراق و هراق ده
همزه ها قلنديغى کي ديم شد در و عربلرک (ما اهاتيك) قوللرى بونى
مؤيد در که ما اعطيك ديمکدر (ايتاء) دن فعل مضارع نفس متکلم و حده ده
همزه اوليه الفه قلب و همزه افعال ها قيانوب اولنه بر (ما) ي فيه کتور لمش
و آخريته بر ضمير منصوب که کاف خطابدر متصل قيانم شد در و نفس متکلم
مع الغير ده (ما نهاتيك) ديديلر ما نعطيك ديمکدر واما اسم فعل قلانلر شو
تصرف و لحوق ضمائر لفظاً فعله مشابهتى پک قوى اولديغند در ديوتعمير
ايدرلر .

(حيهل) فتحه لر و تشديد يا ايله در (حا) نک فتحى و (يا) نک فتح
و تشديد يله (حى) و (ها) نک فتحى و لامک فتح و تشديد يله (هلا) دن

مرکبدر یالکز ارلهرق (حی) اقبل یعنی بری کل معناسنه در وکاه متعدي اولوب (ایئت) یعنی کتور معناسنه اولور وهلا اسرع معناسنه در پس (حی) (هلا) ایله ترکیب و مزج ایدیلهرک حیهل دیندکده دخی کاه اسرع معناسنه استعمال اولنوب والی ایله تعدی ایدرک (حیهل الی الثرید) دینور اسرع الیه دیمکدر وکاه با ایله تعدی ایدرک حیهل بزید دینور اسرع بذکره دیمکدر وکاه اقبل معناسنه اولوب علی ایله تعدی ایدر (حیهل علی زید) دینور اقبل علیه دیمکدر وکاه بنفسه متعدي اولوب ایئت معناسنه اولور حیهل الثرید دینور ای ایئه یعنی کتور دیمکدر (حیهل) علی الاشهر (خمسة عشر) کبی هر ایکی جزئی فتح اوزره منی در (سیبویه) آخرنده الف اولهرق (حیهلا) دخی دیدی و آنک غیریلری (سکون لام) ایله (حیهل) و سکون ها و فتح یا و لام ایله (حیهل) و سکون ها ایله منون اولهرق (حیهلاً) دخی دیدیلر .

(بله) دع و اترك معناسنه که ترك ایله دیمکدر (بله زیداً) دینور اترکه دیمکدر اسم فعل اولدقده مابعدی منصوب اولور وکاه مصدر اولهرق استعمال اولنور شو حالده مابعدی اضافتله مجرور اولور (بله زید) دینور الزم ترك زید دیمکدر وکاه کیف کلهسنه مرادف اسم اولور شو حالده مابعدی مرفوع اولور اولکی و اوچنجی صورتده فتحه سی فتحه بنادر وایکنجی صورتده اولان فتحه سی فتحه اعرابدر و فی تفسیر سورة السجده من صحیح البخاری (اعدت لعبادی الصالحین مالا عین رأی ولا اذن سمعت ولا خطر علی قلب بشر ذخراً من بله ما اطلعتهم) الحديث بونده معانی ثلثة مذکورده رن خارج اولهرق من کلهسیله معرب و مجرور واقع اولمشدر بعضیلر بوراده غیر کلهسیله تفسیر ایلدیلر بو تفسیر (بله) کلهسنی کلمات استئذان عد ایدنلرک قولنه موافقدر و (اجل) معناسنه دخی کلمشدرکه حرف جوابدر و (نهایه) ده بو حدیث من کلهسنندن مجرداً مرفوعدر دع و اترك معناسنه مفسردر کذافی (الاقیانوس) .

(علیک) الزم معناسنه که ملازمت و مداومت ایله دیمکدر وکاه با ایله مستعملدر (علیک بالعیق) دینور تمسک به معناسنه یعنی اکا ملازمت و اهتمام و آنکله

تسك ايت ديمكدر شيخ رضى بروجب فعلی تقدير ايتدی پس (عليك زیداً) وجب عليك اخذ زيد ديمك اولور سرعت ايجون اختصار اولمشدر واليك و امامك و دونك دخی بوكی در (دونك) خذ معناسنه كه طوت و آل ديمكدر ويقال (دونك هذا) ای خذه من ادنی مكان منك (آمین) همزه نك مدی وقصری ايله و بعضاً ممدودك میمی مشدد اولور و امام واحدی بسیط نام تفسیرنده اماله اولمنسنى دخی ذكر ایلدی اللهم استجب معناسنه كه یارب قبول ايله ديمكدر و مصباحده مرسو مدركه امین اصل قصریله در مدی اشباعیه در زیرا عربی اوزاننده (فاعیل) یوقدر اللهم استجب معناسنه اسم فعل امر در و تشدیدى خطادر و راغب (صه) و (مه) کبی اسم فعلدر دیدی و شیخ رضى قابیل و هابیل کبی اوزان سریانیه دندر افعال معناسنه در دیدی اقیانوسده فی الاصل نذیر و نکیر کبی مصدر اولوب صکره اسم فعل اولمق بعید دکلدر دینلدى بوکا کوره همزه نك قصریله امین دینلور و بعضیلر آمین کله سنی اسماء الهیه دندر دیدیلر (ابوعلی القسوی) بلکه شو بعضك مرادی آمین لفظنده حق تعالی به راجع ضمیر واردر ديمك اوله زیرا استجب معناسنه در دیدی و بعضیلر كذلك فلیکن یعنی بویلجه ایشله ديمكدر دیو تصویر معنا ایتدیلر (وراك) تأخر معناسنه كه صکره به و ارقه به قال ديمكدر (امامك) تقدم معناسنه كه ایلرو کیت ديمكدر (اليك) الارغه و برطرف اول سائر آدملر ايله اوغراشمه سنك غیری کیمسه ده ایشك اولسون معناسنه در اليك غنی دینور بندن منفصل و اوزاق اول ديمكدر و اليك کذا دینور خذه یعنی سن بونی طوت و بونکله اول ديمكدر و (اذهب اليك) دینور اشتغل بنفسك یعنی سن نفسکله مشغل اول و نفسکله قارش ديمكدر (صه) صادق فتیح و هانك سکونیله و منوناً هانك کسریله فی الاصل مصدر مقامنه قائم صوت ایکن بعده اسم فعل امر اولمشدر متکلمه کلمه زجر در كه اسکت معناسنه در سوس و خاموش اول ديمكدر (طه) طانك فتیح و هانك سکونیله اطمئن معناسنه یعنی مطمئن اول ديمكدر (مه) میمك فتیح و هانك سکونیله اکفف معناسنه یعنی

(ائمه) (بواشدن فراغت ایت) دیمکدر تا کید مراد اولنورایسه (مهمه)
دینوب تکرار اولنور (قط) قافک فتحی و طانک سکونیه (انته) و (یکفی)
معنارینه در (انته) معناسنه اولدقده اسم فعل امر در سن دیکردن منتهی
اول بوبسدر معناسنه در (یکفی) معناسنه اولدقده ینه اسم فعل اولوب فعل
مضارع معناسنه اولور یعنی کفایت ایدر دیمکدر ضمیر متکلمه متصل اوله رق
نون وقایه ایله قطنی و نونسز قطی دینور یکفینی معناسنه در شو صورتلرده
ماضی معناسنده متصوردر بعض نجات (قط عبدالله درهم) دیدیلر عبدالله
لفظنک مفعولیت اوزره نصیبیه (یکفی عبدالله درهم) سبکننده در و بعض
نون الحاق و مابعدینی ینه منصوب قیله رق (قطن عبدالله درهم) دیدیلر و
(قط) کلمه سی بعض حسب معناسنه دخی کلور مثلا فلاندن بر درهم آل
بسدر دینه جک یرده خذ من فلان درها قط دینور و (ابن تیناتی) موعب
نام کتابنده عبدالله مجرور اوله رق (قط عبدالله درهم) دینلدیکی دخی
عربدن نقل ایلدی (حسب زید درهم) معناسنه در و عربلر قطی دیرلر
حسبی معناسنه در خفی اولیه که (قط) بعض برنسنه یی تقلیل ایچون اولور
ماعندک الا هذا قط دینور که سنک عندکده یالکز شونسنه واردر دیمکدر
بونده طاء ساکنه نك تشدیدیلده در اسم فعل اولدقده ترین لفظ ایچون
ویا خود سیاق کلامدن منفهم شرطه جواب اوله رق بعض اولسه برفا
کتوریلوب فقط دخی دینور (نزال) اولنک فتحی و آخرینک کسر یله فعال
وزنده در انزل معناسنه در و آنفا تعدادده (نحو نزال) دیمکدکمز زیرا
ثلاثی ده شووزن پک چوقدر مثلا فعال کی افعل معناسنه و تراک کی
اترك معناسنه و عمل کی اعمل معناسنه و نصار کی انصر معناسنه در و دخی
بوکی پک کثیر در شو جهتله سیبویه افعال ثلاثیه متصرفه دن امر معناسنه
فعال وزنی قیاسیدر دیمشدر فقط مبرد مثلا قام ده قوام و قعده قعاد
مسموع دکدر دیو قیاسی قبول اتمدی لکن فاضل عصام قیاس سماعه
توقف ایلمز دیو رای ایلدی (قرقار) مؤنثده استعمال اولنور استقری
معناسنه در يقال (قرقار یا هند) یعنی ای هند آرام واستقرار قیل دیمکدر
ویا خود صوتی معناسنه در که سمان یعنی قرقره ایت دیمکدر قرقره قیرقیر

ایده رك شدتله كولمكدرد و دوه قسمی كوكره يه رك بوكرمكدرد و كوكرچين
اوتمكدرد تقول قرقار ياهندای صوت بالضحك بالقرقرة اوصوت كقرقرة
الابل اوالمحامة (عرعار) تلاعب بالعرعة معناسنه یعنی عرب بیننده
معروف عرعره دنیلان اویونی اوینا دیمكدرد خفی اولیه كه رباعی ده اشبو
قرقار و عرعاردن غیرى مسموع دكلرد دینلمشدر.

درس ۱۳۸

اسماء افعال دن ماضی معناسنه اولان (هیات) (شتان) (سرعان) (وشكان)
(بظان) (اف) (اوه) در و غیر ذلك (هیات) اسم فعل ماضی در ما
ابعد معناسنه نه عجب اوزاق اولدی دیمكدرد اصلی (هییه) در یا الفه قلب
اولمشدر بونده لغات متعدد مسموع در (هیات) هانك فتحیه و (ایات)
های همزه یه ابدل ایله و (هیان) و (ایهان) تابه بدل نونلرایله و (هایات)
و (هایهان) الف زیاده سیله و (آیات) و (آیهان) اولنده الف ممدوده
ایله اشبو سگزدن هر برینك آخری حرکات ثلاث ایله اوقنور تنوین ایله
و تنوینسز بوندن قرق سکز لغة ظاهر در و هیات تانك سکونیه و هیاه
ها اوزره وقفله و ایها و هیها تاسز و نونسز و (آیات) هالری همزه لره قلب
ایله بونلرده بش دانه در مجموعی الی اوج لغتدر اهل حجاز عندنده
مشهور اولان هیات در هانك فتحی و تانك فتح اوزره بناسیله و بی تمیم
عندنده مشهور اولان هیات در تانك کسر اوزره بناسیله (شتان) شینك
فتحی و تانك تشدیدى و نونك فتح اوزره بناسیله اسم فعل ماضی در نه عجب
آریلدى و نه يك بعید اولدی معناسنه در تقول (شتان زید و عمرو)
ای افترقا و ما ابعدها و کاه مرفوعی ایله کندى بیننه بر (ما) لفظی کتوریلور
تقول (شتان مازید و عمرو) ای بعدا و تقول (شتان مابین زید و عمرو)
ای بعد مسافه بین زید و عمرو امام فرا قلیل اوله رق نونك کسر یلده نقل
ایلمشدر (سرعان) سینك حرکات ثلاثیه و نونك فتحیه در سینك فتحی
ایله اولمق افصح در نه عجب سرعت ایتدی و قریب اولدی معناسنه در
(وشكان) واوك حرکات ثلاثیه و نونك فتحیه در لکن واوك فتحیه

مبالغه ایله امر در وهیات نه عجب بعید اولدی معناسنه در و دیگر لر دخی
 بوقیاس اوزره در ونجاندن نیجه لر اسماء افعال دن اکثری هم معنا اولدقلری
 الفاظ فعل دن معدولدر دیدیلر مثلاً (روید) امهل معناسنه (ارواد) دن
 امر اولان (ارود) دن و (نزال) انزلدن وهیات (هیهی) بمعنی بعددن
 و (سرعان) سرع و (وشکان) وشك و (شتان) شتت و (بطآن) بطؤدن
 معدولدر دیدیلر لکن شیخ رضی قبول ایتیموب بونك اوزرینه هرکز
 بر دلیل کوره مم دعوی بر دلیل ایسه مسموع اوله منز حالبوکه واکر
 الفاظ فعل دن معدول اولسه لرینه فعل اوله رق قالمی ایدیلر بونلر ایسه فعل
 معناسنه اسملر در چونکه اصل اولان بودرکه برنسنه برشیئدن معدول
 اولسه اول شیئك نوعندن خروج ایتاملیدر پس برداعی اولیه رق
 (فعل) عدل سببیه فعلیتدن اسمیته نه کیفیتله خروج ایدر دیمشدر .
 وهر نقدر فاضل عصام مثلاً (نزال) نك انزلدن عدولی سببیه فعلیتدن
 اسمیته خروجی ثلث و مثلث نحوینك ترکییدن افراده خروجی کی در
 دیمش ایسه ده بختنده مرور ایلدیکی اوزره اول برداعی و مقتضای ضرورت
 ایله اولمشدر دینور .

خفی اولیه که امر اولان فعال وزننده (مصدر) و (صفت) واعیان
 مؤنثه دن برعینه (علم) اولان اسملر دخی وارددر مصدر اولان هم معرفه
 وهم مؤنث اوله رق بولنور (فجار) کبی (الفجرة) (والفجور)
 معناسنه در (شیخ رضی) شونوع مصدرک نه تعریف ونه تأنیثه حالا
 بر دلیل بوله مدم دیمشدر .

وصفت اولان دخی مؤنثه مخصوص اوله رق بولنور (فساق) کبی فاسقة
 معناسنه در بونلر فعال وزننده اولان امره وزناً مشاکل اولدینی کبی
 مبالغه بی متضمن اولقده دخی مشاهلر در زیرا (مصدر معرفه) واقع اولان
 اعلام جنسیه دندر که اعلام لفظیه در جمعنده معنای وصفیت باقیدر پس
 آنکه مبالغه قصد اولنور وصفیت اولنورده صفت اولدقلرنده هر حالده مبالغه
 وارددر و برده (نزال) نحوئده عدل مسلم اولدینی صورتده بونلرده دخی
 مثلاً (الفجرة) و یا (الفجور دن) و (فساق) فاسقة دن معدول

اولملى اعتبار اولندقدە فعال بمعنی الامرہ عدلاً دخی مشابہ اولورلر (فعال بمعنی الامرہ) هر حالده بر مناسبت و مشاکلتلى اولوب و فعال بمعنی الامر دخی معناده امر فعلی به مشابہ ایدوکنندن بونلر بالاتفاق مبنی لردر . و اما فعال و زننده اعیانندن بر عینه (علم) اولملىینه مؤنثه مخصوصلردر بونلر آخرلرنده را حرفی اوله رق ذوات الرا و یاخود را حرفک غیرى اوله رق غیر ذوات الرا قسملرینه منقسملردر مثلاً حذام و قطام و غلاب و حضار و بوار و طمار کبی اهل حجاز عننده کرک ذوات الرا و کرک غیرىسی اوله جمعیسی مبنی در مجرد علمیت و تأنیث موجب بنا اوله میه جغندن وزنا فعال بمعنی الامرہ ذاتاً مشاکل اولدیقى کبی عدلاً دخی مشابہ اولسون ایچون عدل دخی تقدیر ایدلمش شو جهتله مبنی قانمشدر . و برده اعلام شخصییه اعلام جنسیه مجراسنده اجرا اولندیغندن مبالغهده دخی ملایمت و مناسبت بولنه یلور پس عدل اعتبار اولندقدە دخی وزناً و مبالغه مناسب اولمش اولور .

ویلملیدرکه اکثر بنی تمیم ذوات الرانک ماعداسنی (معرب) و علمیت و تأنیث ایله (غیر منصرف) قیلدیلر و اما ذوات الراپی مبنی قیلدیلر زیرا بنی تمیمک امالهیه حرصلری غالب و باخصوص ذوات الراده پک راغبلردر امالهیی مصحح ایسه کسره اولمغله و بو ایسه انحق بنا تقدیرنده حاصل اوله بیلیمکه و برده حرف را مخرجنده مکرر کبی اوله رق ثقیل بولندیغندن وطریق واحده سلوک طرائق مختلفهیه سلوکن یعنی هر حالده کسر اوزره بنا احوال ثلثهده حرکات ثلاث ایله اختلافدن اهون و انسب اولدیغندن مبنی قیلدیلر و وجه بناسنده اهل حجاز کبی (فعال بمعنی الامرہ عدلاً و زنه و مبالغه مناسبت و مشاکلتی دخی اعتبار ایلدیلر فقط (ذوات الرا) یه حملاً ذوات الرانک غیرنده دخی هر کز بر حاجت یوق ایکن (عدل) اعتبار ایلدیلر و بنی تمیمدن بعضیلر کرک ذوات الرا و کرک آنک غیرى اوله معرب و غیر منصرف قیلدیلر تأمل .

درس ۱۴۰

(بحث الاصوات) خفی اولیه که صوت لغتده برنسنه نک اهتزاز و حرکه سندن

هوانك تموجيله حاصل وهوايله قائم بر كيفيتدر كه هوا آنی صماخه ایصال
ایلر اكر بر مخرجه اعتماد ایلهر ك فدن خروج ایدر ایسه اكا (لفظ)
دیرلر و اكر ایتز ایسه بطریق التغلیب (صوت) اطلاق ایدرلر شو تقدیرده
(صوت) لفظ و غیر لفظه شاملدر انساندن ماعدا حیوانات و جماداتدن
صادر اولان صوتلره آنلرده مخرج اولمديغندن وانساندن فك غیرندن
ویا خود فدن مخرجه اعتماد ایتیهرك واقع صوتلره لفظ دینامز شو بمخده
نحاتك اصوات ایله مرادلری هرگز لفظ اولمیان دكلدر بلكه لفظ اولاندر
ولفظ دخی یا بر معنایه موضوع اولور اكا كلمه و لفظ موضوع دیرلر و یا خود
موضوع اولمز نحاتك مرادلری الفاظ موضوعه دخی دكلدر و بر معنایه
وضع اولنمیان انساندن یا لغرض صدور ایدر و یا خود واهی اوله رق صادر
اولور واهی اوله رق صادر اولان مثلاً انسان طور دینی یرده عبث اوله رق
دیز بیز و یا چته پته دیسه و بوکی تفوهاتده بولنسه اولدینی کی نحاتك
مرادلری اشبو شق ثانیده دكلدر و اما شق اولكه لغرض انساندن صدور
ایدندر نحاتك اصوات ایله مرادلری آنك ضمننده دركه ایضاحی لازمدر
لغرض صدور ایدن ایکی قسمدر .

(قسم اول) مؤخرأ مصادره منقوله اولاندر بودخی ایکی شقندن خالی
دكلدر یا مصادره منقوله اوله رق و مصدریت الزام ایدیلور تعجب عندنده
انساندن صدور ایدن (واه) کی فی الاصل صوت اولوب و بر معنایه
موضوع دكل ایکن بعده عرب مصدر مقامنده قائم قلدیلر و حاله مناسب
فعل تقدیر ایلدیلر نصب و تنوین ایله (واهاآله ما طیبه) دیرلر یعنی نه عجب
كوزل نسته در دیمكدر و یا خود مصادره منقوله اوله رق و اسم فعل قننور
مثلاً صه و مه کی كه فی الاصل صوت اولوب و بر معنایه موضوع دكل ایکن
بعده عرب مصدر مقامنده طوتوب و بعده (اسم فعل امر) قلدیلر شو
ایکی شقندن شق اول مصادره و شق ثانی اسماء افعال حكمنده اولمغله نحاتك
اصوات ایله مرادی بونلر دخی دكلدر .

(قسم ثانی) مصادره منقوله دخی اولمیاندر بوده اوچ نوعدر نوع اول
انساندن تعجب و ندامت کی بر حالك عروضنده صادر اولان صوتلردر

مثلاً متعجب و مستند اولان کیمسه نك (وی) دیمسی کبی شو لفظ هرگز محکوم علیه و محکوم به اولمغه صلاحیتی یوقدر (نوع ثانی) بر نسنه نك صوتی کبی سسلنمك اراده ایدره نك انسان کندی نفسندن اصدار ایتدیکی صوتلردر مثلاً قارغه صوتنه تقلیداً (غاق) و بر جسم دیگر جسمه دکده ظاهر اولان صوته تقلیداً (طق) دیمك کبی بونلر دخی محکوم علیه و محکوم به دکلر (نوع ثالث) بر حیوانه زجر و یا انی دعوت ضمننده انساندن صادر اولان صوتلردر مثلاً دوهی چو کرتمك ایچون (نخ) و بر حیوانه ایلر و کیمسی و یا ناقه یه ولدی جانبیه کلسی ایچون (داه داه) و یا خود (ده ده) و یا ایراقدن چاغرمق ایچون (یاه یاه) دیمك کبی بونلر دخی محکوم علیه و به دکلر اشته نحاتك اصوات ایلر مرادی شواوچ نوعدرکه انتقای ترکییدن ایچون مبنیلردر نوع اول طبیعتك اقتضایلدیکی حرکه و یاسکون اوزره مبنیلر نوع ثانی و ثالث سکون اوزره مبنیلردر فقط (غاق) کسر اوزره مبنی اولمسی اجتماع ساکنین دن حذر ایچوندر و بیللمیلدرکه بونلر علی سبیل الحکایه ترکییلرده تلفظ اولنسه لر مثلاً (قال زید عند التعجب وی) و (قال زید غاق) و (قال الغراب غاق) و (غاق صوت غراب) و (قال زید نخ) کبی شوصورتده (هذا اللفظ) اعتباریله اسم حکمنده اولورلر وینه مبنی ایسه لرده لکن شوصورتده مبنی بولملری اصوات اولملری اعتباریله اولمیوب بلکه اصواتدن حکایه اولدقلری جهتله در.

و غفلت اولنیه که برکوی رحمه الله عندده مختار اولان آخری بنای محکی ایلر مشغول اولانلرک اعرابی تقدیری اولمسیدر و اما جمهور عندده اعرابی محلیدر نته کیم مرور ایتدی واطه لی مرحوم ترکییده بولنلرک وجه بناسنده نیم عندده مختار اولان بودرکه برصوتدن بنفسه حکایه اولنمق متعذر اولوب مقصد ایسه صوت اصلی یی نهایت درجه ده بکزه درجه سینه نقل اولمغله مشابیه نقصان اولماسیچون اعرابدن منع ایدلنی دیدی. فاضل جانی و هندی ترکییده علی سبیل الحکایه تلفظ اولنلرک بناسی صوت اولملرندن اولمیوب اسم حکمنده بولندقلرندن نحاتك مرادلری اولان بعض اصوات تعریفندن خارج قیلدیلر و حکایه یی نوع ثانی یه تخصیص ایتدیلر.

و شوانواع ثابته وضع بولند یغندن اقسام کله دن دکل ایکن اقسام کله مبنیه دن
قلوب کندیلرندن بحث اولنسی مبنی به مشاکلتلرندن ایچوندر دیدیلر .

درس ۱۴۱

نحائک بعض اصوات ایله مرادلری (کل لفظ حکمی به صوت او صوت به
للهم) دینه رک تعریف اولنادر فاضل جامی وهندی بوراده شو وجهله
تصویر معنا ایلدیلر یعنی مراد اولنان بعض اصوات هر بر لفظ غیر موضوعدر که
آنکله بر صوت حکایه اولنمش یعنی بر شئیک صوته تقلیداً انساندن صدور
ایتمش و یا خود آنکله بهائم سسلنلشمش در دیمکدر که نوع ثانی و ثالثدن
عبارتدر شو تعریفده (حکایه) نوع ثانی به یعنی انسانک بر نسنه نک صوته
مشابه اوله رق کندندن اصدار ایتدیکی صوته تخصیص اولنمشدر که فاضل
جامی وهندینک راییدر و برده شو تعریفدن نوع اول خارج اولغله افرادینی
جامع دکدر و برده (للهم) یرنده للحووان دینمیدر زیرا بهائمندن متبادر
اولان ذوات الاربع اولاندر تعریفده نوع اولک ذکر اولنماسی نوع ثانی
و ثالث غیر انسانه متعلق ایکن مبنیاته ملحق اولدقده نوع اول که خالصا
صوت انساندر بطریق الاولى ملحق اوله جغندن ذکرینه حاجت کورلما مشدر
دیو توجیه اولنمش و بهائم علی طریق التمثیل ذکر اولندی دینمشدر لکن
متأخرین دن محققین نحات مثلاً امام برکوی واطهلی کبی تعریف مز بورده
حکایه نک نوع ثانی به تخصیص اولنسنی قبول ایتیوب بو برقوری و همدر زیرا
علم نخودن غرض اصلی تراکیب عربیه نک حالتی بیلیمکدر ترکیبده واقع
اولمائی تعریفده ادخال و ترکیبده واقع اولانی اخراج ایتک معقول دکدر
(ترکیبده واقع اولان اسم اولوب اصوات حکمندن چیقار) دیملری
معناسز بر سوزدر زیرا عرف نحاته اصوات اسمدن اعمدر بر قسمی
اسمدر که اول محکی فی التراکیب اولاندر شو جهتله اصواتدن مبحث اسمده
بحث اولنمشدر و بر قسمی غیر کلهدر که اول محکی فی التراکیب اولیاندر و شو
جهتله اسماء الاصوات دینما مشدر دیدیلر و (نوع اولک) تعریفده داخل
اولنماسنی و (للهم) ده اولان دخلی ینه وجه مذکور اوزره توجیه

ایدوب اولی اولان تعریفده (لفظ حکی به صوت او صوت به للحيوان
او صدر عن طبع) دینک ایدی دیدیلر و حکایه بی نوع ثانی به تخصیص ایتیموب
ترکیده علی سبیل الحکایه تلفظ اولنانه دخی شامل قیلدیلر .

و نح اتدن بعضیلر نوع ثالثی یعنی بر حیوانه زجر و یا آتی دعوت ایچون
انساندن صادر اولان صوتلری مثلاً (نخ) و (یاه یاه) کبی اسماء افعالدن
قلدیلر پس مانحن فیهمز اولان اصواتدن خارج اولوب سه و مه کبی اسماء
افعال قیللندن اولورلر بوبعضک قولنی شیخ رضی دخی بکنمش واطهلی
دخی حق ویرمشدر زیرا بونلردن فعل معناسی مستبان اولمغله اسماء افعال
تعریفده داخلردر و برده حق سبحانه و تعالی حیواناتی بعض بوکبی لفظلر
ایله مطلوبی فهم ایتیمکده عقلاً منزلده قلدیغندن آنلرک فهم ایده جکی لفظ
ایله تکلم و آنلره خطاب ایلیمکده بر بآس یوقدر پس (نخ) چوک معناسه در
(داه داه) یوری دیمکدر (یاه یاه) اقبل و تعالی یعنی کل معناسه در .

(یاه یاه) ده های اولی نک فتحیه یاه یاه دخی لغتدر اصواتدن اولدیغندن
مفرد و تثنیه و جمع و مذکر و مؤنثی برابردر لکن بعض لغتده تثنیه و جمع لنور
و تذکر و تأنثی دخی مرعی اولور تقول (یاه یاه) بسکون الاخر یاه یاهان
یاه یاهون یا هیات بفتح التاء یاه یاهتان یا هیاهات داعی فقیردیر که خاطره کلان
نوع اول دخی اسماء افعالدن قیلنمقدر . زیرا اسم فعل قیلنسان (اف)
و (اوه) دخی بوقیللندر پس (اف) اتضجر و (اوه) اتوجع معناسه
اسم فعل اولسنه باقیلور ایسه انساندن مثلاً تعجب و ندامت عندنده صدور
ایدن (وی) دخی اتعجب معناسه اسم فعل اولمقدر و انسانه بر حالک
عروضی عندنده صادر اولان بوکبی صوتلر دخی حاله مناسب هکذا اسم
فعل قیلنمقدر مکرکه مصادره نقل و اسم فعل قیلنمق عربک استعمالنه
موقوفدر . و مانحن فیهمز اسم فعل قیلنمیاندر دیو توجیه اولنه .

درس ۱۴۲

(بعض المركبات) مبنی عارض لازمندن بریسی دخی بعض مرکباتدر زیرا
مرکبات آلتی نوعدر بری ترکیب اسنادیدر که مخاطبه فائدۀ تامه ویرر

واوزرینه سکوت صحیح اولور براسنادی متضمن اولان مرکبدرکه جمله وکلام دینلور زید قائم وان زید قائم وضرب زید وهیاهت زید کی (ایکنجیسی) ترکیب اضافیدرکه برمضاف ایله مضاف الیه هیئتندن حاصلدر غلام زید کی .

(اوچنجیسی) ترکیب تقيیددرکه آنده جزء ثانی اولده مقید اولور حیوان ناطق ورجل فاضل کی شو اوچ نوع ترکییدن بوبابده بمحضر یوقدر . (دردنجیسی) ترکیب تعدادیدر (احد عشر) و (حادی عشر) کی (تسع عشر) و (تاسع عشر) یه وارانه دکن بونلر برحرف عطفی متضمنلدر مثلاً (احد عشر) احد و عشر دیمکدر و (حادی عشر) دخی (احد عشر) دن مأخوذ اولسی اعتباریله حرف عطفی متضمن دیمکدر وکاه مثلاً (حادی عشر) نك برحرف عطفی متضمن اولدینی شو وجهله بیان اولنورکه (حادی عشر) (واحد من احد عشر) تقدیرنده در (اون بر) عددندن بردانه دیمکدرکه اون عددندن صکره کلان اون برنجی عدددر و (واحد من احد عشر) قولمز (واحد من احد عشر) تقدیرنده در شو حالده (عشر) احد اوزره معطوف اولوب (واحد) اوزره دکلدر پس (واحد من احد عشر) مقامنده صیغه فاعل ایله (حادی) وضع اولندقدده (عشر) آنک ظاهری اوزره ناچار عطف اولنور شو تقدیرده (حادی عشر) دخی حرف عطفی متضمن اولمش اولور .

شو نوع ترکیب ابن حاجبک روش عباره سندن مستبان اولدینی اوزره ایکی کله اولوب براسم قوه سندهدر شو جهته جزء ثانی حرف عطفی متضمن اولدیغندن وجزء اول آخری وسط کله حکمنده اولوب محل اعراب اولدیغندن مبنیدر دیمشدر ولکن برکوی رحمه الله جزء لفظی جزء معناسنه دلالت ایتدیکندن ایکی اسم نظریله باقوب وهر ایکی جزئک مبنی اولسی حرف عطفی ایکسی معاً متضمن اولدیغنددر دیمشدر .

وبیلمیدرکه اسماء عدددن بر صیغه فاعل مشتق قیلنسه مشتق منه دن بردانه سی واودخی عدد سابقدن صکره کلنی اولور مثلاً (ثلاثة) دن

بر صیغه فاعل اخذ اولنسه که (ثالث) در (ثلاثه) ده ایکی عدندن صکره کلان او چنجی عدد دیمک اولور .

صیغه فاعل (عشر) یه وارانه دکن بلا تعب آله بیلور (عشر) نک فوقنده (حروفات) صیغه فاعل حروفاتندن زیاده ایدوکنندن مجموع جزینندن آلتق متعذر در وهر جزینندن بعض حرف آلتسه مثلاً (ثلثه عشر) ده (تاشر) ویا (ثالث) دینسه مضنه التباسدر پس احد الجزینندن التق لازم کلور واول امرده مقصوده دال بولنسون ایچون جزء اولدن آنور مثلاً حادی عشروثانی عشروثالث عشر دینور وقس علی هذا وعشرون فوقنده دخی بوقیاس اوزره در مثلاً حادی وعشرون وثنائی وعشرون دینور انجق حرف عطف مذکوردر مادون عشرینده (آحاد) عشرات ایله حرف عطف حذف اولنه رق ترکیب اولوب عشرون واخواتنده (آحاد) عشرات ایله شووجهله ترکیب اولنه مامسی زیرا (عشرین) واخواتنده (واو) و (یا) علامت اعرابدر شووجهله ترکیب ایسه موجب بنا ایدوکنندن جمعی جائز اوله مز .

وخفی اولیه که بر حرفی متضمن اوله رق مبنی قیلنان عدده خاص اولیوب عددک غیرنده دخی بولور (هو جاری بیت بیت) و (هو بین بین) قولزده (بیت بیت) و (بین بین) ده اولدینی کی مثال اولده (بیت بیت) ایکی اسم اولوب بعده بر اسم قلنمش و آخری فتح اوزره مبنی بولنمشدر خبر ومبتدادن حال وقوعنی تجویز ایدنلره کوره خبردن ویا مبتدادن حال اوله رق محلاً منصوبدر ملاصقاً بیتی و بیتیه تقدیرنده در (فلان بنم قونشومدر خانه لریمز یکدیگرینه ملاصق ومتصل اولدینی حالده) دیمکدر بوکا کوره حرف عطفی متضمندر واکر خبر بعد خبر قلنور ایسه محلاً مرفوعدر (بیت منه ملصق الی بیت منی) تقدیرنده در که (فلان بنم قونشومدر بنم خانهم آنک خانه سنه ملاصق ومتصل) در دیمکدر بوکا کوره حرف جری متضمندر . ومثال ثانی ده (بین بین) دخی ایکی اسم اولوب بعده بر اسم قنوب آخرلری فتح اوزره مبیدر ظرفیت اوزره محلاً منصوبدر (هووقع بین هذاوین)

ذاك تقدير نده در كه مثلا شومتاع فلان ايله فلان بيننده در ديمكدر و (هذا الشئ بين بين) دينور هذا الشئ وقع بين الحيد وبين الردى تقدير نده در كه شوشى ايو و فنا بيننده در يعنى نه ايو و نه فنادر ديمكدر بوده بر حرف عطفي متضمندر .

(بشنجيسى) تركيب صوتى در بر كله و بر صوت اولان لفظدن تركيب اولنوب بر اسم قيلناندر سيبويه كى سيب فارسىجه الما ديمكدر و ويه اغرا و تحريص مقامنده انساندن صادر اولور بر صوتدر تيز و چابك اول ديمكدر مجموعى تركيب اولنوب ائمه نخودن عمر و بن عثمان الشيرازى يه الما يي بك سور و قوقلر اولديغندن لقب قيلنمشدر .

(التنجيسى) تركيب مزجى در ايكي كله تركيب و مزج اولنوب بر اسم قيلناندر بعلبك و معدى كرب كى بعلبك شامده بر قصبه در بعل بر پوت ناميدر و بك صاحب بلده نك اسميدر مجموعى تركيب و مزج اولنوب اول قصبه يه اسم قيلنمشدر و معدى كرب (معدى) و (كرب) كله لرندن تركيب ايدوب بر صحابه كزيناك اسميدر .

شوبسطمز بيلندى ايسه نحاتك مبنيايده بحث ايلدكلى بعض مركباتدن مرادلرى اشته شو اوچ قسم اخيردر كه تركيب تعدادى و تركيب صوتى و تركيب مزجى در .

درس ۱۴۳

اشبو بعض مركبات (كل اسم من كلمتين ليس بينهما نسبة) ديمكله تعريف ايدلمشدر يعنى حقيقة و يا حكماً ايكي كله دن حاصل بر اسمدر كه نه فى الحال و نه قبل التركيب اول ايكي كله بيننده بر نسبت يوقدر ديمكدر و نفى اولنان نسبتله مراد احدى الكلمتينك مع الاخرى هيئت تركيبه سنك ظاهرندن منفهم اولان نسبتدر پس مثلا خمسة عشر نك هيئت تركيبه سنك ظاهرى بر نسبتله دال اولماغله (خمسة عشر) ده دخى قبل التركيب نسبت عطف واردرديو اعتراض اولنه مز .

واما بر تركيب اسنادى و يا اضافى و يا تقييدى علم قلنسه دخى هيئت تركيبه سنك

ظاهرندن بر نسبت منقهم اولمغله شو و تعريفدن بالکليه خارجلردر . ودخی
(من زید) و (ان زیداً) نحوی فرضاً علم قيلنسه لر بونلردخی خارجلردر
اظهارده (وهو کل کلمتين ليس احديهما عاملة في الاخرى) دينه رك تعريف
اولنشدن اغياری اخراجده بو تعريف پک ظاهر در و حق اولميه که النجم
والصعق نخونده الف لامک کلمه يه شدت اتصالي جهتله بونلر ايکي کله
کورليوب علم قيلنسه لرينه مانحن فيهمزدن خارجدر .

بورايه قدر بسط وايضا حيز بيلندي ايسه معلوم اوله که مبنیاتده مبحوث
عنهمز اولان (بعض مرکبات) جزء ثانيسي بر حرفي متضمن اولوب اولماق
جهتيله ايکي شقندن خالی دکدر (شق اول) جزء ثانيسي بر حرفي متضمن
اولانلردر ترکیب تعداديلر کي جزء ثانیلری متضمن حرف اولديغی
جهتيله و جزء اوللری اگر لفظ (اثنين) دکل ايسه آخری وسط کله
حکمنده اولوب محل اعراب اولماغله مبنی اولورلر . فقط آخری حرف
صحيح اولان فتح اوزره و آخری حرف غله اولان سکون اوزره مبنی
اولور احد عشر و احدی عشرة و حادی عشر و حادیة عشرة کي (تسع
عشرة) و (تاسعة عشرة) يه وارانده دکن . ودخی عددک غيرنده بيت
بيت و بين بين ده اولديغی کي نته کيم درس سابقده بحثی کچدی . ولکن
جزء اول اگر لفظ اثنين اولور ايسه آنحق جزء ثانی حرفي متضمن اولديغی
جهتيله مبنی قيلنوب جزء اول معرب اولور و نون حذف اولنور مثلاً جاءني
اثنا عشر و رأيت اثني عشر و مررت باثني عشر دينور .

جزء اولک معرب قانوب و نونک حذف اولنسنی توجیه و بيانده بعضيلر
حرف عاطف حذف اولندقدده مضافه شبيه اولديغندن نون حذف اولنوب
معرب قلندی دیدیلر و بعضيلر اسماء اشاره ده مرور ایلديکی اوزره باب
تشیهی برقياس اوزره اجرا ایلدکلرندن معرب حکمنده قيلوب نونده طلبا
للايجاز والاختصار حذف اولنشدن و حذف عاطفده حذف نونه مونس
اولمقدن اچوندن دیدیلر و (فاضل عصام) جزء ثانی نون مقامنده قائم
اولمغله نون حذف اولنشدن بوکا ايسه اثني عشرده ضميره اضافتله اثني عشرک
جائز اوليوب حالبوکه مثلاً (ثلاثة عشر) ده اضافتله ثلاثة عشرک جائز

اولسی دلیلد وائنان نون اعراب بولندجه مبنی قیلنمیه جفی کبی نون مقامنده قائم اولان ایله دخی مبنی اولیوب معرب اولور دیشدر (شق ثانی) بر حرفی متضمن اولیانلردر بوده اگر جزء ثانی صوت اولور ایسه که ترکیب صوتیلرده در هرایکی جزئی جزء اولی فتح اوزره و جزء ثانیهی کسر اوزره مبنی اولور سیبویه کبی . اقیانوس ده مسطوردر که حالت تنکیرده منون قلنور شول کیمسه که هذا سیبویه و رأیت سیبویه و مررت بسبویه دیو غیر منصرف اعرابی کبی معرب قیلمشدر تشیه و جعلیوب سیبویهان و سیبویهون دیر و معرب قلمیوب وجه مذکور اوزره مبنی او قویانلر تشیه سنده ذوا سیبویه و کلاها سیبویه و جمعنده ذوو سیبویه و کلهم سیبویه دیر لر مؤلف قاموس تحفة الایه نام رساله سنده (راهویه) ماده سنده بورسمه تحقیق ایتشددر .

واگر جزء ثانیهی صوت اولمز ایسه که ترکیب مزجیلرده در جزء اوللری اگر آخری حرف صحیح ایسه فتح اوزره و اگر حرف غله ایسه سکون اوزره مبنی اولور (بعلبک) و (معدی کرب) کبی و جزء ثانیلری معرب اولوب کله ترکیب و علمیت ایله غیر منصرف قلنور و اما لغت غیر فصیحده جزء اول جزء ثانییه مضاف وایکیسیده معرب و مضاف الیه غیر منصرف اوله رق و دخی جزء اول ثانییه مضاف وایکیسیده معرب لیکن مضاف الیه منصرف اوله رق دخی واردر خذ هذا وکن من الشا کرین .

درس ۱۴۴

(مبحث بعض الکنایات) مبنی عارض لازمندن بریسی دخی بعض کنایاتدر کنایه لغه و اصطلاحاً سامعینه مبهم قاله رق برشی معیندن دلالتی غیر صریح بر لفظ ایله تعبیر ایلمکدر و بوراده مقصود من کنیدیه کنایه اولنان لفظلردر و مانحن فیه مزهر بر کنایه ایچون اولان اولان لفظلر دکلدر زیرا الفاظ کنایه دن بر صنفی مثلاً فلان و فلانة و هن و غائط و رفت لفظلری و بوکیلردر که معربلدر فلان و فلانة ایله شخصدن کنایه اولنور مثلاً زید و یاخود هند یا نه کلدی دیه جک یرده کنایه ایله جاءنی فلان او جاءنی فلانة دینور و هن شی و نسه معناسنده در اسمی ذکر اولنمیان هراسم جنسندن

و غالباً ذکرى مستهجن اولان شیدن کنایه اولنور و رفت فحش معناسنه اولوب جماعتدن کنایه اولنور و غائط چقور یره دینور شو جهته فضا طبعیدن کنایه اولنور و الفاظ کنایه دن بر صنفی مثلاً ضمیر غائب کبی که مضمرات عدادندندر اشبو بادن خار جدر . پس شو مبخنده مراد من بعض کنایاتدر و اولدخی بعض الفاظ معینه لر در که . کم . و کذا . و کیت . و زیت . و کاین . و اسماء استفهام . و شرطدر شو جهته هر برندن علی حده بحث ایلمک لازم کیشدر (کم) کافک فتحی و میمک سکونیه بر اسم مهمدر مابعدنده بر تمیزه محتاجدر ایکی حرفلی اوله رق وضعی وضع حرفه مناسب اولغله میندر بونکه عدددن کنایه اولنور و ایکی وجهه مستعملدر بری عددک مقدارندن سؤال ایچون اولور که کم استفهامیه دینور نقدر و قاچ نسنه در معناسنه که فارسیده چند مراد فیدر و ما بعدنده ممیزی مفرد و منصوبدر کم رجلاً عندک دینور سنک عندکده نقدر آدم واردر دیمکدر بونک ممیزی اوزره (من) داخل اولمق پک نادر در حتی شیخ رضی بر نظم و نثرده مشاهده ایتدم دیشدر آنحق علامه زمخشری (سل بنی اسرائیل کم آتیانه من آیه ینة) آیت کریمه سنده استفهامیه اولسنی دخی تجویز ایلمشدر .

وجه ثانی کثیر معناسنه اولور که (کم خبریه) دینور و مابعدنده ممیزینه مضاف اولغله ممیزی مجرور اولوب آنحق مفرد و مجموع دخی اولور کم رجل عندک و کم رجال عندک دینور سنک عندکده چوق آدم و یا آدملر واردر دیمکدر بونک ممیزینه (من) داخل اولمق کثیر الوقوعدر (کم من رجل عندک) کبی کم استفهامیه معنای استفهامی متضمن اولوب و استفهام صدر کلام اقتضا ایتمکه و کم خبریه انشای تکثیره دلالت ایدوب و بوده کلامدن بر نوع اولدیفندن اول امرده اکا تنیه واجب اولغله ایکیسی دخی کلامک صدرنده بولنورلر . اشبو . کم استفهامیه . و خبریه . بولندقلری کلامده علی حسب العوامل محلاً مرفوع و منصوب و مجرور اولورلر . اما (منصوب اولملری) کندیلردنصکره بر فعل واقع اولسه که کندیلره

راجع ضمیرده و با اول ضمیری مشتمل اسیده عمل ایتمکله کنیدیله ده
 عملدن اعراض ایلمامشدر شو تقدیرده میزلی حسیدیه و فعلک اقتضاسنه
 کوره مفعول مطلق و مفعول فیه و مفعول به و بونک غیریلری واقع اولور لر
 مثلاً کم استفهامیه ده (کم ضربه ضربت) و (کم یوما سرت) و (کم رجلاً
 ضربت) کبی (مثال اول) ده مفعول مطلق و (ثانی) ده مفعول فیه و (ثالث) ده
 مفعول به اوله رق منصوبدر و مابعدلری لفظاً منصوب کنیدیله تمیزیدر
 دینور و مثلاً (کم خبریه) ده (کم ضربه ضربت) و (کم یوم سرت) و
 (کم رجال ضربت) کبی تامل ایله معلومدر و مابعدلری لفظاً مجرور کنیدیله
 تمیزی و مضاف الیه دینور . و اما (کم رجلاً ضربته) یا خود (کم رجل
 ضربته) قولنخونده (کم) منصوب و مرفوع اولغه احتمالی واردر زیرا
 بعدنده اکر آخر بر فعل مقدر دکل ایسه مذکور اولان فعل ضمیرده عمل
 ایتمکله (کم) ده عمل ایتمکدن مستغنی و معرض اولغله کم منصوب اوله میوب
 بلکه مرفوع اولور و اما اضمار علی شریطة التفسیر قیلندن قیلنسه که (کم
 رجلاً ضربت ضربته) و (کم رجل ضربت ضربته) تقدیرنده یولور
 یعنی مابعدنده بر فعل مقدر اولسه که مذکور اولان ضربته جمله سی آنی
 تفسیر اولور شو حالده اول مقدر (ضربت) عملدن غیر معرض اولغله
 (کم) آنکله مفعولیت اوزره منصوب اولور و اما (مجرور اولملری)
 اوللرنده بر حرف جر و یا بر مضاف اولدقده در مثلاً استفهامیه ده (بکم
 درهماً اشتریت) و (غلام کم رجلاً ضربت) و خبریه ده (بکم رجل
 مررت) و (عبدکم رجل اشتریت) کبی بونلر ایچون صدر کلام وار ایکن
 (حرف جر) و یا (مضاف) ک اوزرلرینه تقدم ایتمی حرف جر
 و مضافی مجرور لرندن تأخیر ممتنع اولدیغندن و برده کم استفهامیه
 و خبریه حرف جر و مضاف ایله یه برکله واحده حکمنده اولدقلرندر .

و اما (مرفوع اولملری) کنیدیله ن صکره وجه مذکور اوزره بر فعل
 و یا اوللرنده بر حرف جر و یا مضاف اولدیغنده در شو تقدیرده باعتبار
 میزه اکر ظرف اولور ایسه خبریت اوزره و اکر ظرف اولور ایسه
 ابتدائیت اوزره مرفوع اولور خبریت اوزره مرفوع اولمی مثلاً (کم

یوماً سفرك) قولزده اولدینی کبی اصلی (کم یوماً الکائن سفرك) اولوب کم (الکائن) ک مفعول فیہی اولدق منصوب و (الکائن) مبتدأ تک خبری ایدی الکائن حذف و تقدیر اولوب مقامنده (کم یوماً) قائم قیلنمغله پس (کم یوماً) مبتدایه خبر قیلنمشدر و ابتدائیت او زره مرفوع اولسی کم استفهامیه ده (کم رجلاً ابوک) قوللرمزده اولدینی کبی لکن بوسیویه عندنده در که صدارت کلام اقتضا ایدن بر معنایی متضمن بر نکره دن معرفه ایله خبر ویرلسنی تجویز ایشدر و اما سائری عندنده چونکه نکره اولوب و ما بعدی معرفه اولمغله خبر مقدمدر بوراده متفق علیه مثال (کم رجلاً قام) در و اما (کم خبر یه ده) ده کم رجل ابوک دینسه شو تقدیرده کم بالاتفاق خبر مقدمدر فافهم.

درس ۱۴۵

خفی اولیه که کم استفهامیه و خبریه تک ممیزی برقرینه ایله معلوم اولدقه بعض حذف اولنور مثلاً بر یکمسه تک مالی درهم اولدینی بیلنوب مقدارندن سؤال عندنده (کم مالک) دینسه اولدینی کبی که (کم درهماً مالک) تقدیرنده در سنک مالک تقدیر درهمدر دیمکدر و یاخود عندنده دراهم چوق اولدینی بیلنرک کثرتندن اخبارده (کم مالک) دینسه اولدینی کبی که (کم درهم اودراهم مالک) تقدیرنده سنک مالک چوق درهم و یاخود درهمدردر دیمکدر شو صورتلرده (استفهامیه) ده (کم) ابتدائیتله مرفوع اولوب و (مال) لفظی خبر اوله رق کاف خطابه مضاف اولمشدر که (بوسیویه) عندنده در و اما جمهور عندنده بر عکسدر که کم خبر مقدمدر و اما (خبریه) ده بالاتفاق خبر مقدمدر و (مال) لفظی ابتدای مؤخردر و مثلاً فلانی قاچ کره ضرب ایلمش اولدیغکدن و یا نصل ضرب ایلدیگکدن و یاخود کیمی ضرب ایلدیگکدن سؤال اولنهرق (کم ضربت) دینسه مصدر بناء نوع ایله (کم ضربة ضربت) و یاخود مصدر بناء مره ایله (کم ضربة ضربت) او (کم مره ضربت) و یاخود کم رجلاً ضربت تقدیرنده در که معنا معلومدر و یاخود بونلر بیلنرک آنجق کثرتندن اخبار عندنده کم ضربت دینسه که تقدیر کلام

غير خفيدير شو صور تکرده (کم) لفظی . رجل : تقدیری صور تنده
مفعول به و مصدر تقدیرنده مفعول مطلق و مع ملاحظة الزمان مصدر
بناء مرة تقدیرنده (و مرة) تقدیرنده مفعول فيه اولمق اوزره منصوب در تأمل
ان كنت اهلاً وفي غير زبد تنالا ترى البحث سهلاً .

و خفی اولیه که هر قننی محله کم لفظی استفهامیه و خبریه اولمق و ممیزی
مذکور و محذوف اولمق احتمالی اولسه (کم) ده و دخی مابعدنده اولان
کلمه ده اوچ وجه جائزدر (فرزدق) شاعرك .

کم عمه لك يا جرير وخالة فدعاء قد حلبت على عشاري

شعرنده اولدینی کبی اشبو شعرده (کم) لفظی اگر عمه کله سی کندینک
ممیزی قینور ایسه ابتدائیت ایله مرفوع اولمق و اگر (عمه) کله سی ممیزی
قینمیوب ممیزی محذوف و مقدر ایسه (کم حلبة) یاخود (کم مرة) تقدیرنده
اوله رق شو حالده مصرع ثانیده اولان حلبت فعلنه مفعول مطلق و یا مفعول
فيه اولمق احتمالی وارددر که شو اوچ وجه متصوردر .

و (عمه) لفظی اگر (کم) لفظنک ممیزی قینور ایسه (کم) استفهامیه
اولدقده منصوب اولمق و خبریه اولدقده مجرور اولمق و اگر (کم) لفظنک
ممیزی اولیوب ممیزی محذوف و مقدر ایسه ابتدائیت ایله مرفوع اولمق
احتمالی وارددر که (عمه) ده اشته شو اوچ وجه وارددر (کم) و یاخود عمه
ابتدائیتله مرفوع اولدقده خبر (قد حلبت) جمله سیدر (لك) عمه کله سنک
صفتیدر خطاب جریره در (یا جریر) ترکیبی آراده بر جمله معترضه در
و (خالة) عمه اوزره معطوفدر و (فدعاء) خالة کله سنک صفتیدر (عمه)
کله سنک صفتی محذوف بر (فدعاء) در که شو مذکور دلالتیه اکتفا
اولمشدر و یاخود (کل منهما فدعاء) تأویلیله هر برینه صفت قیلنه بیلور
اعرابده (معطوف) معطوف علیه و (صفت) موصوفه تابع اولدیغندن
(خالة) و (فدعاء) ده دخی (عمه) کله سنک اعرابه موافق اوله رق
اوچ وجه جائزدر . و بوندن بشقه (فدعاء) کله سنی مبتدایه خبر

و (قد حلبت) جمله سنی (فدعا) به صفت و یا (فدعا) ده اولان
ضمیر مستکندن حال قیلمق احتمالیده واردر بو باینده تفصیل اراده ایدن
معرب الکافییه مزاجعت ایتسون اشبو شعرك مفردات معناسی (کم)
استفهامیه و یا خبریه دزکه معناسی معلومدر (عمه) پدرک همشیره سنه
دینور (لك) سنك ایچون معناسنه (یا) حرف ندا (جریر) منادی
مفرد معرفه درکه شوشعرا یله ذم اولنان شخصدر وشاعر مشهوردر (و)
حرف عطفدر (خاله) والدهنك همشیره سیدر (فدعاء) ایش کورمدن
الی وایاغی یامرلمش واکرلمش عورته دینور (قد) حرف تحقیقدر (حلبت)
سود صاعمق معناسنه اولان حلبدن فعل ماضی مفرد مؤنث غائبه در
ضمیری (کم) ه راجعدر لفظی اعتباریله هر تقدیر معنا کم عمه و کم خاله
اعتباریله تشبیه ضمیری اقتضا ایدرایسوده (علی عشاری) حلبت فعلنه
متعاقدر علی ایله صله لئسی ثقات واکراه معناسنی متضمن اولدیغندندرکه
وقوع فعل خواهش لریله اولیوب اکراه و جبرایله اولدیغنی ایما ایدر عرب
(حلبت هند علی ناقتی) دیرلر یعنی (هند) جبر واکراهله خواه ناخواه
ناقمی صاغدی یعنی استخراج لبن ایتدی دیمکدر عشار رجال وزننده
نفساء وزننده (عشراء) لفظنك جمعدر (عشراء) و (نفساء) جمع وزننده
مفردلردر عشراء مدة حملی اون ماهه بالغ اولان دوهیه دینور که شوخالده
آندن سودالمق بك مشکل اولور محصول بیت (کم) لفظی استفهامیه و تمیزی
مذکور عمه لفظی و خبر قد حلبت اولدیغنه کوره (یا جریر) تقدیر عمته
وخاله لرك واردر که اللری وایاقلری خواه و ناخواه ایش کورمدن یامرلمش
تحقیق بنم سرکش دوه لریمی صاعمشلردر دیمکدر بو محله استفهام مجرد
استهزا ایچوندرو (کم) لفظی شوخالده خبریه اولدیغنه کوره (یا جریر)
چوق عمته وخاله لرك واردر که اللری وایاقلری خواه و ناخواه ایش
کورمدن یامرلمش تحقیق بنم سرکش دوه لریمی صاعمشلردر دیمکدر دیگر
احتمالرده دخی بوقیاس اوزره معنا عندالتأمل ظاهردر اشبو شعرنده
فرزدق جرایری بك ذم ایدوب كرك بابا و كرك آتاسی طرفی فرومایه
والحق اولوب مع الاکراه قاپوسنده سرکش دوه لرینی صاغوب ایش کورمکدن
عمته وخاله لرینك اللری وایاقلری یامرلمش اولدیغنی بیلدیریور.

(کذا) کافک فتحی و آخرنده الف مقصوره ایله اسم مبهم درکه (کم) کلمه سی کی بوشکله عددن کنایه اولنور مثلاً عربلر (فلان بکا قرق درهم ویردی) دیه جک یرده اعطانی کذا درهماً دیرلر یعنی بکا شوقدر درهم ویردی دیمکدر مابعدی تمیزیت اوزره منصوبدر وکاه اعطانی کذا من الدرهم دینور که ممیزی اوزره من داخل اولور وکاه تکرار ایدیلوب حرف عطفله و حرف عطفسز دخی استعمال اولنور بونک اوزرینه متفرعدر که برکیمسه دیگر برکیمسه نک کندی اوزرنده حق اولدیغی اقراراً بلاعطف (لفلان علی کذا کذا درهما) دیسه شی مبهمی مقر اولان کیمسه اوزره اقرارک اقل محتملی لازم ایدو کندن اون بر درهم اقرارایلمش اولور واکر حرف عطفله (لفلان علی کذا وکذا درهماً) دیسه یکرمی بر درهم اقرار ایلمش اولور تفصیلی کتب فقهیه دهدر.

وبعض کذا کلمه سی (شویله جه) و (بونک کیدر) معناسنه غیر عددن دخی کنایه اولنور مثلاً یوم سبت ده چیقدم دیه جک یرده (خرجت یوم کذا) دیرلر که شویله برکونده چیقدم دیمکدر. اشبو کذا فی الاصل کاف تشبیه ایله اسم اشاره اولان زادن مرکبدر بعده (کاف) زائده لازمه منزله تنزیل اولنوب وکاف وزادن تشبیه واسم اشاره معناری منخلع اوله رق یکدیگریله مزج ایدیلوب اسم واحد قیلنمشدر.

شوجهته لهذا لفظنه موافق اولوب آخرینه علامت تأنیث الحاقی جائز دکدر و (ذا) فی الاصل مبنی اولدیغندن فی الحال دخی بناسی اوزره قالب (کذا) مبنیدر.

(کیت وزیت) آخرلرنده حرکات ثلاثه جائز اوله رق بونلر ایله بر حدیث یعنی جمله وکلامدن کنایه اولنور پس کنایه اولندقلری جمله دن عبارتدر اولوب و جمله ایسه فی ذاتها مستحق اعراب اولمامغله مبنیدر وچوق دفعه تکرار اولنوب و حرف عطفله مثلاً (فعل فلان کیت وکیت) دینور یعنی فلان شویله و شویله جه ایشلدی دیمکدر و (قال فلان ذیت وزیت) دینور یعنی

فلان شویاچه و شویاچه سویلدی دیکدر . حریری مرحوم دره سنده (کیت و کیت) ایله آنجق افعالدن و (ذیت و ذیت) ایله آنجق اقوالدن کنایه اولنور عکسی جائز دکلردیدی ولیکن اکثر تعمیم ایلدیلر .
 (کاین) فی الاصل کاف وای دن مرکب وای هر نقدر معرب ایسه ده ترکیب و مزج اولنوب و معنای افرادیلری منخاع اوله رق آخرنده لفظاً و خطاً نون ساکنه ایله سکون اوزره مبنی براسم مهم اولمش و تکثیر عدده نقل اولنمشدر کم خبریه معناسنه در لکن مابعدنده تمیزی منصوبدر (کاین رجلاً لقیت) دیرلر چوق آمده اولشدک دیکدر . و بعض تمیزی اوزره من داخل اولور . بونده همزه یی یایه ابدال اینه کین و کاعن وزننده کاین ورمی وزننده کای و عم وزننده کاء لغات نادره در .

درس ۱۴۷

خفی اولیه که اسماء استفهامیه و شرط دخی کلمات کنایه دن عد اولنمشدر من و ما وای و این وانی و متی شوالی کله استفهام و شرط بیننده مشترکدر و اذا کله سی شرطه مختصدر و کیف وایان کله لری استفهامه مختصدر اما (من) و (ما) استفهام ایچون اولدقلرنده علی حسب العوامل محلاً منصوب و مجرور و ابتدائیت اوزره محلاً مرفوع اوله بیلورلر اما ظرف اولدقلرندن خبریت اوزره مرفوع اوله منزلر مثلاً (من) ده من ضربت و من ضربته و بمن مررت و غلام من ضربت دینور اولده مفعولیت اوزره منصوب و ثانیده مبتدا اوله رق مرفوع و اخیرینده مجروردر و (ما) ده (ماضربت) و (ماضربته) و (بما مررت) و (غلام ماضربت) دینور تأمل ایله معلومدر و شرط ایچون اولدقلرنده دخی اشبو و جوه ثلثه جاریدر مثلاً (من) ده من تضرب اضرب و من یأتینی فهو مکرم و بمن تمرر امرر و غلام من تضرب اضرب دینور اولده مفعولیت اوزره منصوب و ثانیده مبتدا اوله رق مرفوع و اخیرینده مجروردر و (ما) ده (ماتصنع اصنع) (و ما تقدموا لانفسکم من خیر تجدوه عندالله) قول شریفی و (بما تمرر امرر) و مثل ماتصنع اصنع کبی تأمل ایله معلومدر و اما (ای) و (ایه) معرب ایدوکنندن مانحن فیه مزدن دکل ایسه ده

استطراداً ذکر ایدم (ای) استفهام ایچون اولدقده (ایهم ضربت) و (ایهم قائم) و (ایهم مررت) قوللر مزده اولدینی اوزره و جووه ثلاثه مذکوره جاری اولدینی کی ظرفیت اوزره منصوب اولدینی تقدیرده محلاً مرفوع خبردخی اولور (ای وقت حیثک) قولمزده اولدینی کی پس (ای) ده و جووه اربعه حاصلدر واما شرط ایچون اولدقده آنجق و جووه ثلثه ایله بولنور (ایهم تضرب اضرب) و (ایهم یأتینی فیهو مکرم) و (بایهم تمرر امرر) کی زیر اسماء شرط دنصکره آنجق فعل واقع اولوب فعل ایسه مبتدا اولمغه صالح اولدیغندن خبریت اوزره مرفوع اوله من (ایه) دخی ای کیدر.

واما (این) و (انی) و (متی) و شرطه خاص اولان (اذا) و استفهامه خاص اولان (کیف) و (ایان) بونار (من این) قولمزده اولدینی کی بر جار ایله مجرور اولدقده ظرفیت اوزره منصوب اولورلر وهر تقدیر بعضیلر اذا کلهسی بعض ظرفیتدن چیقشوب وقت معناسنه اسم صریح اولور مثلاً (اذا یقوم زید اذا یقعد عمر) قولمز کی که وقت قیام زید وقت قعود عمرو دیمک اولور بونده اذا ابتدائیت اوزره مرفوعدر دیدیلر ایسه لکن قبول اولنماشدر حتی شیخ رضی کلام عربده بونک صواب اولسنه دلالت ایدر برشاهده مطلع اوله مدم دیمشدر.

درس ۱۴۸

(بعض الظروف) خفی اولیه که ظروفدن اکثری مثلاً افعالدن وارد اسم زمان و مکانلر و دار و بیت و جوف و دخی بوکیلر معرب ایدوکنندن مابحن فیه مزدن دکلردر آنجق شو میجشده ذکر اولیه جکمز بعض ظرفلردر که مبنی اولوب زمان و مکانه دلالت ایدر و کندیلرده ظرفیت معتبر اولور و یاخود زمانه دلالتده ظروفه مشابه و یاخود ظروف مجراسنده جاری و یا مبحث ظروفده ذکر می مناسب آلور مبنیلردر. بونلردندخی بعضیلری مبنی عارض لازم و بعضیلری مبنی عارض غیر لازمدن اولدقلرندن پس شو محمله مبنی عارض لازمدن اولانلری تفریق و بیان و مبنی عارض

غیر لازمیدن اولناری دخی صکره کندی مبحثده عیان ایده چکر و بالله التوفیق
 مبنی عارض لازم جمله سندن اولانلر . (امس) همزه نك فتحی وسینك
 کسریله مبنیدر سینك فتح وضمیله دخی واردر ظروف زمانیه دن اولوب
 فارسیده دوش مراد فیدر که دونکی کیجه دیمکدر وجه بناسی حرف
 تعریف معناسنی متضمن اولمسیدر و شوجهته در که معرفه ایله توصیف
 اولنور و اگر کندیله مطلق زمان ماضی مراد اولنسه کلیات ابی البقاده
 یازلدینی اوزره معرب اولوب و اوزرینه الف لام داخل اولور (کان لم تغن
 بالامس) کبی و اگر برکله یه مضاف اولسه بالاتفاق معرب اولور لیکن بنی
 تیمم هر حالده معرب و غیر منصرف قلدیلر و بعض عربدن شاذ اوله رق تنوین
 ایله دخی مسموعدر .

(قط) قافك فتحی وطاء مشدده نك ضمیله که اشهر لغاتدر وطاء مضمومه نك
 تخفیفیه و دخی طاء مشدده و یاخود مخففه نك ضمنه تبعیتله قافك دخی ضمیله
 و نادراً اسم فعل اولان (قط) وزننده قافك فتحی و طانك ساکن نیله ده
 واردر که مجموعی بش لغتدر . (کچمش زمانك جمیعنده) ديك مفادنده در
 ماضی منقیه مخصوصدر (مارایته قط) دینور بن فلافی اصلاً کچمش
 زمانك جمیعنده کورمدم دیمکدر وجه بناسنده مخففه نك وضعی ایکی حرفلی
 اولمق ملاسسه سیله وضع حرفه شبیه اولوب و مشدده آنك اوزرینه محمولدر
 دینلدی صاحب تسهیل معنای حرفی متضمن اولدیغندندر دیدی زیرا
 مارایته قط قولمز مارایته فی زمن من الازمنة الماضیه مفادنده دریغی آنی
 بو آندن اعتباراً کچمش زماندن بر آنده کورمدم دیمکدر پس من وفی
 معنالرینی متضمن در .

ومنقى اللبیده دخی بناسی معنای حرفی متضمن اولدیغندندر زیرا (مارایته
 قط) قولمز (مارایته مذ ان خلقت الى الان) مفادنده در دینلدی یعنی بن
 آنی خلق اولنشمدن شو آنه دکن کورمدم دیمکدر پس مذ و الی معنالرینی
 متضمندر و بعضیلر استغراق نفیده لما کیدر پس حرفه مشابه اولدیغندندر
 دیدیلر .

(عوض) عينك فتحی وواوك سکونی وصادك مبنی اوله رق حرکات ثلاثیه

(کله جک زمانک جمعنده) دیک مفادنده در مضارع منفی به خاصدر
 (لا اراه عوض) دینور بن فلانی ابدایعی کله جک زمانک جمعنده کورم
 دیکدر وعند البعض ماضی منفی ده دخی اولور قط مفادنده در مارایت
 مثله عوض دینور بن آنک مثلی اصلاً کورمدم وعند البعض دهر و زمان
 معناسنه در خاف معناسنه اولان عوضدن مأخوذدر زیرا زماندن بر جزء
 صاوشوب کیتدکده زمان آنک بدلنه بر جزء آخر تعویض ایدر فقط
 استعمال اولره کوره دخی ینه بومعنادن مأخوذدر نته کیم قواعد اعرابده
 شیخزاده کوسترمشدر بونک وجه بناسنده مبنی عارض لازم عدادندن
 کورنلر معنای حرفی متضمن اولدیغنددر دیدیلر زیرا (لا اراه عوض)
 لا اراه فی زمان من الازمنة المستقبله دیکدر پس من وفی معنایینی متضمندر
 نته کیم شرح تسهیلده کوسترمشدر .

ومبنی عارض غیر لازمدر کورنلر (قبل) و (بعد) کی اولوب اضافندن
 قطع اولمغله ضم اوزره مینیدر واکر اضافله مستعمل اولور ایسه معرب
 اولور (عوض العائضین) کی دهر الداهرین ابدالابدين دیکدر دیدیلر
 وبونکله بیله مبنی عارض لازم صره سنده ثبت اولمغنی (قط) به مناسبتندن
 ایچونددر دیو توجیه ایلدیلر . لکن فصحای عرب کلامنده (عوض) نک
 فتح وکسر اوزره مبنی اوله رق گلکی (اضافندن قطع اوله رق ضم اوزره
 مبنی اولمسی) قوللر ینه ملایم دکدر وعند الاضافة معرب اولمسی جانب
 اسمیت ترجیح ایدوب مبنی اصله مشابهت ضعف بولدیغنددر دینله بیلور .
 (مذ و منذ) مذ ذال معجمه نک سکونیه و منذ ذالک ضمیله مینیدر ، منذده
 ذالک کسر یله ده مسموعدر بوراده مانحن فیه همز اسم اولان مذ و منذدر
 هر تقدیر ظرف دکالر ایسه ده زمانه دلالتده ظرفه مشابه اولدقلرندن
 شو مبحثده کندیلردن بحث اولمشددر .

وجه بنالری حرف اولان (مذ) و (منذ) به لفظاً موافق اولمایددر
 وبعضیلر اول مدة و جمیع مدة معناسنه اولمیری ملاحظه ایله اضافندن منقطع
 اولمایددر دیدیلر . وبعضیلر (مذ) ایکی حرفلی اولمغله وضعاً وضع حرفه
 شبیه اولدیغنددر و (منذ) ده (مذ) اوزره محمولدر دیدیلر اشبو (مذ)

و (منذ) ده ايکي معنا تصور اولور کاه (اول مدة) يعنى اوزرلرينه
تقدم ايدن فعل زماننک اول مدتی معناسنه اولورلر شو تقديرده کندیلردن
صکره اولان (اسم) حقيقة ويا حکماً (مفرد) و (معرفه) اولمليدیر
اما (مفرد اولمی) زیرا برسنه نك اول مدتی آنجق شیء واحد اولور
شو جهتله حقيقة مفرد اولمليدیر واکر مثنی وجموع اولورایسه باری مفرد
حکمنده اعتبار اولمليدیر والا اولیت مدته حکم جائز اوله من واما (حقيقة
ويا حکماً معرفه اولمی) زیرا بروقت مجهولی اول مدة قيلمقده فائده
یوقدر (مارأيتہ مذ او منذ يوم الجمعة) دینور (اول مدة عدم رؤيتي يوم الجمعة)
تقديرنده درکه بنم آنی کورمامکلكمک اول مدتی يوم جمعه در ديمکدر
و (رأيتہ مذ الیومان اللذان صاحبنا فيهما) دینور (اول مدة عدم رؤيتي
اليومان اللذان صاحبنا فيهما) تقديرنده درکه بنم آنی کورمامکلكمک اول
مدتی اول ايکي کوندرکه آنده مصاحبت ايتدک ایدی ديمکدر و (مارأيتہ
مذ يوم لقيتني فيه) دینور (اول مدة عدم رؤيتي يوم لقيتني فيه) تقديرنده درکه
بنم آنی کورمامکلكمک اول مدتی شول کوندرکه آنده بکا ملاقی اولدک
ایدی ديمکدر .

مثال اولده مابعدلری حقيقة مفرد و معرفه در و مثال ثانیده حکماً مفرد
و حقيقة معرفه در و مثال ثالثده حقيقة مفرد و حکماً معرفه در .

وکاه (جميع مدة) معناسنه اولورلر شو تقديرده مابعدلرنده یا (مقصود
بالعدد) که بیانی مقصود اولان زماندر نقدر اولدینی ده بیلنه جک برصورتده
واقع اولور (مارأيتہ مذیومان) دینور (جميع مدة عدم رؤيتي يومان)
تقديرنده درکه بنم آنی کورمامکلكمک مدتک جمیسی ايکي کوندر ديمکدر
ويا (مصدر) واقع اولور (مارأيتہ مذ ذهابك) کبی ويا (جملة فعلیه)
واقع اولور مارأيتہ مذ خرجت کبی ويا (جملة اسمیه) واقع اولور
(ماخرجت مذ زيد مسافر و) ماخرجت مذانک ذاهب و (ماخرجت
مذان ذهبت کبی شو صورتلرده مابعدلرنده بر زمان تقدير اولور مثلاً
(مارأيتہ مذ ذهابك) قولمز مذ زمان ذهابك تقديرنده در و ديکدرلرده دخی
قياس و تأمل ايله تقدير و معنا ظاهر در .

اشبو (مذ) و (مذ) كرك اول مدة وكرك جميع مدة معناسنه اوله لر
اولرنده اولان جمله نك مضمونه مضاف اوله رق و كلامده مبتدا اولور لر
وما بعدلری مرفوع اولوب كندیلره خبر واقع اولور واما (زجاج) و توابی
مذ ومننده ظرفیت اعتبار ایلیوب بین بین مفادنده كور دیلر و كلامده
كندیلرینی خبر و ما بعدلرینی مبتدا قیلدیلر پس مثلاً مارأیته مذ یومان قولمز
زجاجه كوره بینی و بین عدم رؤیتی یومان ديك اولور تأمل .

درس ۱۴۹

(اذا) همزه نك كسری والفك قصريله شرطیه در وگاه مفاجاة ایچون
اولور شرط ایچون اولدقده جواب اقتضا ایدر و (ظرف زمان مستقبل)
اولوب ما بعدنده جمله فعلیه واقع اولور و فعلی غالباً ماضی اولوب آنی
مستقبل مفادینه تحویل ایدر (اذا كانت الشمس طالعة فالنهار موجود)
قولزده اولدینی کی و بعض مضارع دخی اولور (اذا يقوم زيد يروح)
دینسه اولدینی کی و یلملیدر که اذا بعض (ظرف زمان ماضی) اولور
(اذا رأو تجارة اولهوا انفضوا اليها) آیت کریمه سنده اولدینی کی و اگر
بعد القسم اولور ایسه (ظرف زمان حال) اولور (والليل اذا يغشى) آیت
کریمه سنده اولدینی کی .

(اذا) ی شرطیه عندالا کثر مضمون شرطه مضاف اوله رق آنی محلا مجرور
قیلر و کندیسی جوابك مفعول فیهی اوله رق جوابیله محلا منصوب اولور .
وعند البعض اذا مضمون شرطه مضاف اوله رق آنی مجرور قیلر و کندیسی
فعل شرطك مفعول فیهی اوله رق شرطیله منصوبدر شو ذهابه كوره اذا
کلمه سی شرطده و شرط دخی اذا کلمه سنده عامل اوله رق برسنه نك هم عامل
وهم معمول اولسی لازم کلور لکن جهت لری مختلف اولدیندن بونده
برباس کورلما مشدر نته کیم اسماء شرطده دخی واقعدر که مثلاً (متى تفعل
افعل) قولزده متى عامل اوله رق شرط و جزایی مجزوم قیلما مشدر و کندیسی
شرطك مفعول فیهی اولمغله شو جهتله ده معمولدر فاضل مکی دخی شو ذهابی
اختیار ایلمشدر .

واما عند المحققين مضاف اليهك مضافه عمل اتمى لازم كلسون ايجون اذا
 كلمسى شرطه مضاف اوليوب خافض دكلدر آنحق فعل شرطك مفعول
 فيمى اوله رق محلاً منصوبدر وبيلمليدر كه (اذا) كلمسى مفاجاة ايجون
 اولدقده نا كهان برشيئك حصول وظهورني افاده ايدر بوصورته جمله
 اسميه مخصوص اولور و شرط معناسنى متضمن اولمامغله جواب ايرادينه
 محتاج اولمز و (اذا) ي مفاجاتى كتورمكن غرض ماقبلتك وجودنصكره
 مابدينك على سبيل المفاجاة حصوله دلالت ايتك اولمغله كلامك صدر
 وابتداسنده اولمز و استقباله دلالتى اوليوب زمان حاله دالدر (خرجت
 فاذا السبع) دينور يعنى چيقدم كه نا كهان اسد طوربور ديمكدرشوتريكيك
 تفصيلي حذف خبر مبختنده مرورايلمشدر (اذا) ي مفاجاة عندالاحض
 حرفدر وعند المبرد ظرف مكاندر وعند الزجاج ظرف زمان در كه
 استقباله خاصدر . اشبو اذا كلمه سنك وجه بناسى شرطيه اولدقده حرف
 اولان ان شرطيه معناسنى متضمن اولديغندندر ومفاجاة ايجون اولدقده
 حرف ايسه بناسى ظاهر و بوراده مانحن فيهمزدن دكلدر واكراسم ايسه
 (اذا) ي شرطيه محمولدر دينور و آخرنده الف اولمغله هر حاله سكون
 اوزرينه مبيندر وبعضيلر شرطيه اولدقده مابعدنده اولان مضمون جملهيه
 مضاف اولوب مضمون جمله ايسه صراحة مذكور اولمامغله مضاف اليهيسى
 كانه محذوف اولوب اضافندن منقطع اولمش حكمنده اولديغندندر و آخرنده
 الف اولوب ضمهيه متحمل اولمديغندن سكون اوزره مبيندر ديديلر
 و آنك غيرنده شو مذكوره محمولدر (اذ) همزهك كسرى وذاك
 سكونيله در وجه بناسى ايكي حرفلى اولمغله وضعى وضع حرف كى
 اولديغندندر وبعضيلر (اذا) ده بعضك تعليلي كى تعليل ايدوب و وضعى
 وضع حرف كى اولديغندن سكون اوزره مبنى اولمشدر ديديلر .
 اشبو (اذ) كلمسى زمان ماضى ايجوندر ومعناى شرطى مشتمل اولمامغله
 مابعدنده جمله فعليه واسميه واقع اولور و (اذ يرفع ابراهيم القواعد)
 ودخى (اذا لجرمون نا كسوا رؤسهم) آيت كريمه لرنده اولدينى كى واكر
 بينا و بينا كلمه لرنندصكره واقع اولور ايسه مفاجاة ايجون اولور (بينا يا خود


بینا انا کذا اذ جاء زید (قولزده اولدینی کبی یعنی بن شوایشه مشغول اولدیغم ائناده ناکهانی زید حقیقه کلدی دیمکدر وگاه اذ کله سی تعلیل ایچون اولورکه ترکی ده زیر دینور فافهم .

(لما) مقصود من اسم اولاندر اکثر نجات عنده زمانه دال اولوب حین معناسنه ظرفدر لکن ادات شرط کبی مستعمل اولوب وجوابنک مفعول فیهیدر وابن مالک وابن هشام عنده همیشه ماضی به مختص اولمغله اذ معناسنه در و بعضیلر دیگر برنسنه نک واقع اولمسندن مسبب اوله رق برنسنه نک وقوعی ایچون مستعمل اسمدر دیدیلر وجه بناسی حرف اولان لمایه لفظاً موافق اولدیغندندر و بعضیلر کذا اضافندن منقطع حکمنده اولدیغندندر دیو تعلیل ایتدیلر .

درس ۱۵۰

(متی) استفهاماً و شرطاً زمان ایچوندر یعنی ظرف زماندر متی القتال و متی تخرج اخرج کبی .

(این) و (انی) استفهاماً و شرطاً مکان ایچوندر لر یعنی ظرف مکاندر در این زید و (این تکن اکن) و (انی زید) و انی تجلس اجلس کبی بونلرک وجه بنالری استفهام و شرط معنارینی متضمن اولملریدر استفهامده اصل اولان ایسه همزه و شرطده اصل اولان ایسه (ان) درکه حرفلدر پس معنای حرفی متضمن اولمش اولورلر .

(ایان) استفهامیه اوله رق زمانه مخصوصدر یعنی ظرف زماندر و استفهامیه اولان (متی) دن فرقی (ایان) انحق امور عظامده استعمال اولنور (ایان یوم الدین) کبی پس ایان قیام زید دینمز وجه بناسی معنای استفهامی متضمن اولمسیدر (کیف) استفهاماً برنسنه نک حال وصفتی طاب معرضنده ذکر اولنور  اوزره مبنی وظروف مجراسنده جاریدر وجه بناسی معنای استفهامی متضمن اولمسیدر مابعدنده اسم اولور ایسه خبریت اوزره محلاً مرفوعدر (کیف زید) کبی علی ای حال زید یعنی زید نه حال اوزره در دیمکدر واکر مابعدنده فعل اولور ایسه اول فعلک فاعلندن حالیت اوزره

محلا منصوب اولور کیف جئت کبی علی ای حال جئت یعنی نه حال اوزره کلرک مثلاً راکب اولدیغک حالدده می ویا ماشی اولدیغک حالدده می دیکدر و بعض فی ای حال جئت تقدیرنده تصویر اولنور شو صورتده ظرفیت اوزره محلا منصوب قلنور اشبو کیف (ما) کله سنه متصل اولدقده عند البصرین ضعیف اوله رق شرط ایچون کلسی تجویز اولندی کیفما تجلس اجلس کبی علی ای هیئت تجلس اجلس دیکدر واما عند الکوفین (ما) کله سیله متصل اولیه رق دخی تجویز اولندی کیف تجلس اجلس کبی .
(حیث) مکان مبهم ایچوندر یعنی ظرف مکاندر و ما بعدنده غالباً جمله یه مضافدر و شاذ اوله رق مفردده اضافتله دخی واردر نته کیم شاعرک .

اما تری حیث سهیل طالعا نجم یضی کالشهاب ساطعا

شعرنده اولدینی کبی یعنی کورمز میسک مکان سهیلی طلوع ایدیچی اولدینی حالدده . اول بر نجم درکه پار لایحیدر شعله شهاب کبی . مرتفع اولیچی اولدینی حالدده .

حیث کله سنک وجه بناسی مضمون جمله یه مضاف اولوب مضمون جمله ایسه غیر صریح اولغله اضافندن منقطع اولمش حکمنده اولدیغنددر شو جهتله مفردده اضافتی عندنده نیچهلر معرب قلدیله لکن مفردده اضافت شاذ اولغله شهر اولان مبنی اولمسیدر و حرکات ثلثه اوزره مبنی اولمسی مشوعدر .

(لدی) لامک فتحی والف مقصوره ایله (لدن) لامک فتحی و دالک حرکات ثلثه می ونونک سکونیه (لدن) لامک فتحی و ضمی و دالک سکونی ونونک کسریله (لد) لامک فتحی و ضمی و دالک سکونیه (لد) لام و دالک ضمیله مجموعی طقوز لغتدر عند معناسنه درکه ظرف زمان و مکان اولورلر انحق بونلر زمان و مکانک اول و ابتداسندن اعتبار اولنورلر . و برده بونلر بالفعل حاضرده مستعمل اولورلر و جمله سی مبنیدر آنحق (لدی) ده شیخ رضی زمان و مکانک اول و ابتداسندن اعتبار اولغله اختصاصی اولماسیله معرب واعرابی تقدیری اولمسنه ذاهبدر و اکثرک اختیاریده

بودر والفی علی و الی ده اولان الف کیدرکه اسم ظاهره متصل اولدقده
 تابتدر و ضمیره متصل اولدقده یایه منقلب اولور . بونلرک وجه بنالری
 ابتدا مفادینی حائر اولملریله من معناسنی متضمن اولملریدر پس اوزرلرینه
 من کله سنک دخولی مجرد تأکید ایچون اولور (جئت لدن طلوع الشمس)
 دینور طلوع شمس عننده وابتداسنده کلدیم دیمکدر و (جئت من لدن طلوع
 الشمس) دینور ینه بومعنایه در و (جئت لدن دار زید) دینور زیدک داری
 عننده وهمان اولنده یعنی اوچنده کلدیم دیمکدر و (جئت من لدن دار زید)
 دینور ینه بومعنایه در (کاف) مقصودمن مثل معناسنه اسم اولاندرکه
 اوزرینه حرف جر داخل اولسیله بیلنور شاعر عجاجک .

بیض ثلاث کنعاج جم یضحکن عن کالبرد المنهم

شعرنده مصرع ثانیده اولدینی کی یضحکن عن اسنان مثل البرد الذائب دیمکدر
 (مفاد بیت) نعاج کثیره کی اوچ بیاض نسنه لر کانه اریمکلیکه قابل بیاض
 ولطیف طولو دانه سی کی دیشلرندن ضحک وخته ایدرلر دیمکدر نسادن
 اوچ محبوبه یی مدح ایدیور وجه بناسی حرف اولان کافه مشاکل اولمسیدر
 وشوبابده ذکر ی لازم البنا اولوب و مثل معناسنه اولسی مناسبیله درکه
 (مثل) ده بعض اضافیدن منقطع اوله رق ظروف مجراسنده جاری (غیر)
 لفظنک مقابلیدر .

(عن) مقصودمن جانب معناسنه اسم اولاندرکه اوزرینه حرف جر
 داخل اولسیله بیلنور من عن یمینی کی من جانب یمینی دیمکدر وجه بناسی
 ظاهر در وشوبابده ذکر اولنسی لازم البنا اولوب وظرف مکان مبهم اولان
 جانب معناسنه اولدیغندندر .

(علی) مقصودمن فوق معناسنه اسم اولاندرکه کذا اوزرینه حرف جر
 داخل اولسیله بیلنور من علیه کی من فوقه دیمکدر وجه بناسی ظاهر در
 وشوبابده ذکر ی مناسبی تأمل ایله امر باهر در .

(مبحث المبنى العارض غير اللازم) خفی اولیه که مبنی عارض غیر لازم شروط بنا بولند یعنی تقدیرده مبنی اولوب بولند قدده معرب اولنلردر و شرط بنا بولند قدده دخی ایکی قسمدن خالی دکلدر بر قسمی واجب البناء که شرط بنا بولند قدده البته مبنی اولانلردر و بر قسمی جائز البناء که شرط بنا بولند قدده البته بنا واجب اولیوب بلکه اعراب و بنا جائز اولاندر .

واجب البناء اولان درت قسمدر . (اولکیسی) مضاف الیهی بلا عوض حذف اولنوب و (مضاف الیه محذوف) نیتده کوزه دیلمک یعنی منوی وملحوظ فی الذهن اوله رق اضافندن منقطع اولان اسملردر که کړک ظرف و کر غیر ظرف اوله لر شو حالد مضاف الیه محذوفه محتاج اوله جقلرنندن (احتیاج الی الغیر) ده حرفه مشابه اوله رق مبنی قیلنورلر و جبراً للنقصان اقوای حرکات اولان ضم اوزره مبنی اولورلر بونلر (قبل) و (بعد) و (تحت) و (فوق) و (قدام) و (خلف) و (وراء) و دخی تحت معناسنه (اسفل) و (دون) و فوق معناسنه (من عل) و (من علو) کبی و اما سائر بونلر عددانده اولانلر مثلاً مین و شمال کبی اضافندن منقطع اوله رق بنالری مسموع اولما مغله شو مذکوراته قیاس اولنلرلر و دخی (غیر) لفظی شدت ایهامده اشبو غایاته شبیه ایدو کندن مضاف الیهی محذوف و منون اوله رق اضافندن قطع اولند قدده اضافندن منقطع ظرفلر مجراسنده جاری قیلنوب ضم اوزره مبنی ایدیلور و بوده آنجق (لا) و (لیس) لفظلرنندن صکره اولدیغنده در زیرا بونلردن صکره استعمالی کثیردر پس (جاء فی زید لا غیر) و (جاء فی زید لیس غیر) دینور ضم اوزره مبنی در لا غیر زید و لیس غیر زید تقدیرنده در و دخی (حسب) کله سی کثرت استعمالندن و اضافت ایله عدم تعرفده (غیر) کله سنه مشابهتندن ایچون شو مذکوراته حکمنده در و بیلمیدر که بونلرک جمله سنده اگر مضاف الیه ذکر اولنسه معرب اولورلر و اگر مضاف

الیه محذوف (دن عوض اوله رق مضافه برتنوین ویریلسه شو تقدیرده دخی
مضاف معرب قیلنور .

(وکلا ضربنا له الامثال) آیت کریمه سنده اولدینی کبی وکل امة تقدیرنده در
واما نظرفده قیلندر شاعرك .

فساغ لی الشراب و کنت قبلاً اکا داغص بالماء الفرات

شعرنده و (کنت قبلاً) قولنده اولدینی کبی قبل هذا الزمان تقدیرنده در
بونلرده مضاف الیه حذف اولندقدده آندن عوض مضافه برتنوین ویریلوب
معرب قیلنمشدر (مفاد بیت) شاعرك اقرباسندن بری قتل اولنوب
غم و غصه سندن بوغازندن صوچکمز ایکن قاتلنی قتل وانتقامنی آلدیغنده
دیورکه شراب بکا یک سائع یعنی خوشکوار و بوغازمدن سهولته کچر اولدی
حالبوکه آندن انتقام آلمزدن اول قریب و آزالدیکه طاتلو صو بوغازمدده
قاله رق بوغوله یازدم انتهى

ودخی بیللمیدرکه اگر مضاف الیه منویا حذف اولنوب نسیا منسیا ترک
اولنسه ینه مضاف معرب قیلنور و بووجهله مضاف الیهی حذف اولنق
آنحق ظرفلرده مسموعدر شاعرك (رب بعد کان خیراً من قبل) قولنده
اولدینی کبی که بعد و قبل معرب اوله رق واقعدر مثلاً جئتک قبل الظهر
دیندکده معنا ظهردن اول سکا کلدیم دیمک اولدینی کبی بونده (مضاف الیه)
محذوف و منوی اوله رق (جئتک قبل) دینسه ینه معنا بویله در واما
منسی اوله رق حذف اولنوب (جئتک قبلاً) دینسه بوندن اول بر زمانده
سکا کلدیم دیمک اولورکه فرق ظاهر در .

(ابکنجیسی) منادای مفرد معرفه درکه (ادعوك) ده اولان کاف خطاب
موقعنده اولغله صورت ندانک غیرنده رفعی حرکه و حرفدن هر نه ایله
ایسه اول اعراب اوزره منی قیلنور (یازید) کبی زید ضم اوزره مبنیدر .
(اوچنجیسی) غیر مکرره لالنفی الجئسک اسمیدرکه مفرد و نکره اولوب
ولالنفی الجئسه متصله اوله شو تقدیرده من استغراقیه معناسنی متضمن

اولدیغندن و عاملی اولان (لا) ضعیف اولمغله عمل محلیسنه موافق اولمق اوزره
(لا) نك دخولندن اول اسم مزبورك نصبی حرکه و حرفدن هر نه ایله ایسه
ینه اول اعراب اوزره مبنی قیلنور (لارجل فی الدار) کبی رجل فتح اوزره
مبنیدر بونلرك محللارنده یحیی کچشدر .

(دردنجیسی) کندینه نون جمع مؤنث و یا خود نون تأکید متصل قیلنمش
اولان فعل مضارعدر که آخری وسط کلمه حکمنده قاله رق . نون جمع مؤنث .
متصل اولدیغنده ماضی به حملاً سکو اوزره مبنی قیلنور و نون تأکید متصل
اولدیغنده جمع مذکرده ضم اوزره و واحده حاضرده کسر اوزره و بونلرك
غیرنده فتح اوزره مبنیدر بونك یحیی ده مطلب فعلده کلور .

درس ۱۵۲

(واما جائز البنا) اولان اوج قسمدر .

(اولکیسی) بر جمله به و یا جمله به مضاف (اذ) کلمه سنه مضاف اولان ظرفلردر
بونلر بالواسطه و یا بلا واسطه مضاف الیهلری اولان جمله دن اکتساب بنا
ایلیهرك و لاجل الخفة فتح اوزره مبنی قیلنورلر (يوم ينفع الصادقين
صدقهم) آیت کریمه سنده يوم کبی که مابعدنده اولان جمله نك مضموننه
مضاف و فتح اوزره مبنیدر ودخی حیثند و یومئذ قوللر مزده حین و يوم
کبی تقدیر کلام حین اذ کان کذا و یوم اذ کان کذا در حین و يوم (اذ)
کلمه سنه مضاف و فتح اوزره مبنیلردر و (اذ) کلمه سیده مابعدنده اولان جمله
مضموننه مضافدر آنحق مضاف الیه حذف اولوب آندن عوض مضاف
اولان (اذ) کلمه سنه یرتنوین و یریا مشدر بونلرك اکتساب بنا ایلملری
لزوم تحتنده اولمغله معرب قیلنملری دخی جائزدر ودخی مثل و غیر
کلملریکه (ما) ی مصدریه و یا (ان) مصدریه و یا (ان) مفتوحه مشده
مدخوللرینه مضاف قیلنلرینه بو حکمده لردر (قیامی مثل مقام زید)
و (قیامی مثل ان تقوم) و (قیامی مثل انك تقوم) و (اقول غیر ما تقول)
و (اقول غیر ان تقول) و (اقول غیر انك تقول) کبی .
(ایکنجیسی) کلامده مکرره واقع لانیفی الجنسك کندینه متصل و مفرد
ونکره بولنان اسمیدر (لاحول و لا قوه الا بالله) ده اولدینی کبی .

(اوچنچینسی) غیر مکرره لالئی الجنسک مفرد وکندینه متصل و مبنی بولنان اسمنه صفت واقع اولان اسمدر (لارجل ظریف) کبی ظریف فتح اوزره مبنیدر و محل بعیدینه حملاً مرفوع اوله رق لارجل ظریف و محل قریننه حملاً منصوب اوله رق لارجل ظریفاً دخی دینور بونلرک دخی محالرنده بجئی یکمشدز .

و خفی اولیه که (الآن) لفظی که اولنده الف لام ایله اسم واحد حکمنده اولوب وقت حاضر معناسنه در ترکیده (شمدی) دینور بودخی فتح اوزره مبنیدر لکن وجه بناسی مختلف فیه در (سیرافی) عندنده شو حالده تنیه و جمعی کلیوب و تصغیر دخی اولنه میوب و لامنی نزع دخی جائز اولمیدیغندن کندنده تصرف اولنه مامقده حرفه مشابه اولمیدر و سیبویه و اخفش و (مازنی) و (زجاج) عندنده هذا الوقت دیمک اولغله اسم اشاره معناسنی متضمن اولمیدر و (ابی علی) یه کوره اولنده اولان الف لام زائد اولوب کنیدیسی حرف تعریف معناسنی متضمن اولمیدر و مع هذا معرب اولمیدیه تجویز اولندی نته کیم شاعریک :

کانهما ملان لم یتغیرا وقد مر اللدارین من بعدنا عصر

شعرنده مصرع اولدی ملان کبی من الان دیمکدر آخری من ایله مجرور در حرف جر اولان من دن لاجل التخیف نون و الف لامدن الف حذف اولمشدر مفادیت کانه اول ایکی دار حالا متغیر اولما مشلر در حالبوکه اول ایکی داره بزدنصکره برعصر مرور ایتشددر دیمکدر و اشبو الانده نادر آهزم لری حذف و لامک فتحیله لان دخی واردر .

درس ۱۵۳

(مبحث معرفه و نکره) خفی اولیه که معرب و مبنی بولنان اسملرک بر قسمی معرفه و بر قسمی نکره اولوب عقیب مبنی ده معرفه و نکره دن بحث ایلمک مناسبت آلمزدکلدر .

(المعرفه) ، معرفه ، لفظنده مفهومك بوجه مامعلوم اولسنه وضعاً اشارت بولناندركه (ماوضع لشيء بعينه) ديمككه معرفدر يعنى بين المتكلم والمخاطب معلوم ومعهود برشيء متعينه (وضع كلي) وياخود (وضع جزئي) ايله وضع اولنان اسمدر و مراد واضعك حين وضعنده واحد معيني قصد ايلمش اولسي دكلدر و اكر اويله اولسه تعريف مذكوره آنجق اعلام داخل اولورايدى زيرا اعلامدن ماعدا اقسام معرفه مستعملك قصد ايلديكي هر برمعينه صالحدر شوجهتله اوضح اولان (ماوضع ليستعمل في شيء بعينه) ديمليدر دينلدي يعنى معرفه بر متعين ده استعمال اولفق همچون وضع اولنان اسمدر ديمكدر كرك اول واحد متعين واضعك مقصودي اولسون علملركي وكرك اولسون اعلامك غيري معرفه لركي . ومعارف بالاستقراء التي نوعدركه مضمرات و اعلام و مهمات و معرف باللام و معرف بالندا و برده منادانك غيري اقسام اربعة معرفه دن برينه اضافت معنويه ايله مضاف بولناندر .

وبيلمليدركه (وضع جزئي) ايله موضوع اولان اعلام شخصيه وجنسيه دركه وضع وموضوع لهلري خاصدر و وضع كلي ايله موضوع اولان ايكي قسم اوزره در بر قسمي وضع وموضوع لهي عام اولاندركه عامه نكراتدر و بر قسمي وضعي عام وموضوع لهي خاص اولاندركه حروفك و على ماهو التحقيق اعلامك غيري اقسام معرفه نك وضعلايدر و بعضيلرينه كوره اعلامك غيري اقسام معرفه نك وضع وموضوع لهلري عامدر و بعضيلرينه كوره اقسام معرفه دن (معرف باللام) و (معرف بالندا) و (معرف بالاضافه) نك وضعلري وضع نوعيدر . وديكر اوچ قسمك وضعلري وضع شخصي اولوب وجه مذكور اوزره در بونلر تعريف مذكوره اولان وضعي (نوعي) و (شخصي) يه تعميمه محتاجلدر . لكن (وضع) لفظي اطلاق اولندقدن متبادر اولان وضع شخصيدر .

اقسام ثلثه مذكوره ده (وضع نوعي) يه قائلله كوره (اشارت الى التعيين) هيئت تركيبه لرينه ك ملزومي اولوب (معرف باللام) ده مدخول الف لامك و (معرف بالندا) ده مدخول ادات ندانك و (معرف بالاضافه) ده مضاف و مضاف اليه ك تعيين ده مدخلي واردر . و وضع شخصي يه قائلله

کوره شو (اشارت) یا لکنز (الف لام) و (ندا) و (اضافته) در مدخولارینک تعیین ده مدخلی اولیوب (معرف باللام) ده تعیین الف لام و (معرف بالندا) ده تعیین ادات ندایه مقارن اولسیله و (معرف بالاضافه) ده تعیین اضافت الی المعرفیه ملتبس بولمسیله در وشو جهتله تعریف مذکور اقسام ثلاثه مذکوره به متناول دکلر دینه رک اعتراض اولمشدر .

شو اجلدن بیضاوی رحمه الله تعریف مذکور دن عدول ایله معرفیه (ما فی اشاره الی معین) دیه رک ترسیم ایلمشدر و علامه تفتازانی احسن اولان رسم معرفه ده (ما وضع لیستعمل فی شیء بعینه) و رسم نکره ده (ما وضع لیستعمل فی شیء لا بعینه) دینمیدر دیمشدر و بعضیلر تعریف مذکور دن دخی مراد بودر دیدیلر .

اطه لی مرحوم اعتراض واردی دفع ایچون تعریف مذکور ده اولان وضعی نوعی و شخصی به تعمیم ایلمک و (اشارت مذکوره) (معرف باللام والنداء والاضافه) وضع شخصی صرنده داخل دکل ایسه ده الف لام و ندا و اضافته بیله اوله رق وضع نوعیلرنده داخلدر دینمک ممکندر وشو جهتله مصنف تعریف مذکور دن عدول ایلمامشدر دیمشدر .

وبیلمیدر که تعیین و عدم تعیین ده معتبر اولان دلالت لفظدر مثلاً (جاءنی رجل) قولمزده (رجل) متکلمک اخبار و تلفظی جهتله بوجه ما معلومی اولدینی کی سامعک عننده دخی معلوم اولسی دائرة امکاندن خارج دکلر لکن بحسب دلالة اللفظ رجله بر تعیین اولما غله نکره در و (جاءنی الرجل) قولمزده (الرجل) بحسب دلالة اللفظ متعین اولمغله معرفه در .

معرفه، مفهومک معلومیتنه لفظنده اشارت بولنان اولوب تعیین و عدم تعیین ده اعتبار دلالت لفظه اولمغله ضماؤک مرجعاری نکره و یامهم دخی اولسه لفظ و وضعاری حسیله معرفه لر در . والف لام عهد ایله معرف برکله (معهود نکره دخی بولنسه ینه معرفه در مثلاً ربه رجلاً و نعم رجلاً و یاله رجلاً و) ارجلاً تضربه قوللر مزده ضمیر لر معرفه اولوب و . هله مثلاً جاءنی رجل فضربته قولمزده اولدینی کی مرجوع الیه اقدحجه بر حکم ایله مختص اولور ایسه الف لام عهد ایله معرف کی اولوب ضمیر راجعک

تعریفنده شبهه یوقدر ومثلاً حق سبحانه وتعالی نك (انا ارسلنا الى فرعون رسولا فقصی فرعون الرسول) قول شریفنده اقدمجه معهود اولان (رسولاً) نكره ايسهده الف لام عهد ايله معرف اولان (الرسول) معرفه در. لكن شيخ رضى حق اولان ربه رجلاً ونعم رجلاً وبئس رجلاً قوللزمزده اولان ضمير لر ومثلاً (رب شاة وسخلتها) قولمزده اولديغى كى برحكم ايله مختص اولماش صرف نكره لره راجع ضمير لر نكر اولميدر واما اقدمجه برحكم ايله مختص نكره يه راجع اولان ضمير معرفهده داخلدر مثلاً جاءنى رجل فضربته قولمزده اولان ضمير منصوب متكلمه كلمش اولان مذكور رجله راجع اولوب ديكرينه راجع دكلدر وبلا شبهه معرفه در و اصرح اولان رسم معرفهده (ما اشيربه الى خارج مختص اشارة وضعيه) دينمكدركه بويلجه ترسيم اولندوقده اقدمجه برحكم ايله مختص نكره لره راجع ضمير لر ومعهود اقدمجه برحكم ايله مختص اولدقجه نكرهده اولسه الف لام عهد ايله معرف اولانلر معرفهده داخل اولور ديمشدر فارجع اليه . شوسطمنر كوزلجه مطالعه وفهم اولدى ايسه انواع معارفك هر برندن هر نقدر يوقاريلرده دخی بحثلرى كچمش ايسهده مقامه مناسب ينه بررنبذه بيان ايدهلم.

درس ۱۵۴

(النوع الاول) معارفدن نوع اول مضمرا ندر و سائرندن اعرفدر ومضمرا تده اك اعرف اولان ضمير متكلم و بعده ضمير مخاطب و بعده ضمير غائبدر .

مضمرا تك وضعلى عام وموضوع لهلى خاص اولوب برامر كلى اعتباريله معانى معينه ازاسنده وضع اولمشلردر مثلاً (انا) بر ضميردر واضع اول (نفس متكلم وحده) مفهومى نفسندن حكايه ايلمى حيثى ايله ملاحظه ايدوب وبعد الملاحظه اشبو مفهوم كلى تحتنده اولان افراد مشخصه نك ملاحظه سنه آلت ووسيله قلوب (انا) لفظى مفهوم كلى مذكور تحتنده اولان افراد مشخصه دن هر برى مقابلهده وضع ايلمشدركه (انا) لفظى اطلاق اولندوقده آنحق بر فرد مخصوص ومعين منقسم اولور مثلاً زيد

(انا قائم) دینسه (انا) ایله آنجق زید و عمرو (انا قائم) دینسه (انا) ایله آنجق عمرو مراد اولور. ومثلاً (انما) برضمیردر واضع اولاً تشییه مذکر مخاطب ویاخود تشییه مؤنث مخاطبه مفهومی کندیله خطابله حکایه ایلمسی حیثیتی ایله ملاحظه ایدوب وشو مفهومی تحتنده اولان افرادنک ملاحظه سنه آلت قیلوب (انما) لفظی مفهوم کلی مذکور تحتنده اولان افراددن هر بری مقابلنده وضع ایلمشدرکه عندالاطلاق غیری مفهوم دکلدر مثلاً زید ایله عمروه خطاباً انما قائمان دینسه انما ایله آنجق زید ایله عمرو وخالد ایله بشره خطاباً انما قائمان دینسه انما ایله آنجق خالد ایله بشر مراد اولور ضمائرک کافه سنده کیفیت وضع بوقیاس اوزره معلوم اولوب وضعلری برمفهوم کلی ملاحظه سیله اولدینی جهتله عام وموضوع له لری برمفهوم کلی نك افرادندن هر بر فرد مشخص اولغله جزئی اوله جفی امر مجزومدر و بومتأخربندن محققینک مسلکیدر.

واما محققین متقدمینه کوره مثلاً انا برضمیردر واضع نفس متکلم وحده مفهومی نفسندن حکایه ایلمسی حیثیتیه ملاحظه ایدوب (انا) لفظی مفهوم کلی مذکور تحتنده اولان افرادده استعمال ایلمک شرطیه مفهوم کلی مذکور ازاسنده وضع ایلمشدر وسائر ضمیرلرک وضعیده بوقیاس اوزره در بولره کوره ضمائرک وضع وموضوع له لری عامدر و (اعلام) دن بشقه سائر انواع معارف ده دخی بوجله ذاهلدر.

(النوع الثانی) معارفدن نوع ثانی علملردرکه وضع وموضوع له لری خاصدر اعلام (ما وضع لشیء بعینه غیر متناول غیره بوضع واحد) دینمکه ترسیم اولنور یعنی (علم) وضع واحد ایله بشقه سنه غیر متناول اوله رق معلوم ومعین برنسنه به بخصوصه وضع اولنان اسمدر دیکلدر مثلاً زید کی که ذات زید بخصوصه تصور اولنوب معلومیت ومعهودیتی حیثیتیه لفظ زید آنک ازاسنده وضع اولمشدرکه شو وضع وتسمیه ایله آنک غیرینه متناول دکلدر واما دیگر برکیسمه به دخی (زید) تسمیه قیلنمش اولسه اول دخی آریجه بروضع وتسمیه مخصوصه ایله اوله جفندن واول وضع وتسمیه مخصوصه ایله دیکرینه غیر متناول بولنه جفندن (اعلام مشترکه)

تعریفمزدن خارج اوله منز و بعض . اشخاص متعدده شامل بر اسم غلبه استعمال ايله اول افراددن برنده شایع اولور که بو کیلره اعلام غالبه دینور مثلاً (ابن عمر) و (ابن عباس) کی حضرت عمر رضی الله تعالی عنه افند منزك مخدوملرندن هر برینه ابن عمر دینله بیلور ایکن مؤخرأ عبدالله ابن عمر رضی الله تعالی عنهماده شایع اولوب و غلبه استعمال ايله بر درجه یه کلمشدر که (ابن عمر) مشارالیه حضرت تلمینه علم اولمشدر ابن عمر دینلده کده آنجق عبدالله ابن عمر حضرت تلمی مراد اولور و حضرت عباس رضی الله تعالی عنه افند منزك مخدوملرندن هر برینه (ابن عباس) دینله بیلور ایکن مؤخرأ غلبه استعمال ايله بالخاصه عبدالله ابن عباس رضی الله تعالی عنهما یه علم اولمشدر ابن عباس دینلده کده انجق عبدالله ابن عباس حضرت تلمی اراده اولنور میستعملینک بر اسمی بر فرد معین ده استعمالده توغلاری ایسه واضع معین دن صادر وضع مخصوص منزلده اولمغله اعلام غالبه دخی تعریفمزدن خارج اولیوب اعلام شخصیه دندر .

و بیلملیدر که بعض حقایق اذهینه متعلقه یه دخی اسملر تسمیه اولنور که آنلره ده اعلام جنسیه اطلاق اولنور بونلر دخی تعریفمزدده داخلدر مثلاً (اسامه) کی که (اسد) یعنی حیوان مفترس مفهومی بخصوصه تصور اولنوب شو معلومیت و معهودیتی حیثیتی ايله (اسامه) لفظی اشبو معنای جنسی ازاسنده وضع اولمشدر اسامه دینلده کده من بین الماهیات انجق ماهیت اسد مراد اولور .

واما معلومیت و معهودیتدن مع قطع النظر اشبو مفهوم جنسی ازاسنده موضوع اسد لفظی نکره در و بو کی یه اسم جنس دینور که تحتده بولنان افراد بیتده قدر مشترك اولوب آنلردن هر بر فرد صادقدر شو جهتله اسم جنس فرد مبهم ایچون موضوعدر دینلمش علم جنس ایسه ماهیت مخصوصه یه وضع اولنش اولمغله اسم جنسدن فرق لیدیلمشدر شو صورتده افراد اسد دن هر بر فرد مشخصه حقیقه (اسد) دینلور لکن حقیقه اسامه اطلاق اولنه منز زیرا فرد مشخص ماهیت معلمه اولیوب اول ماهیتک افرادندر و اما مجازاً اطلاق اولنور و بونی تفهیم ایچون بر مثال

مثلاً زید انساندر لکن انسان دنیلان شی زید دکلدر وکیف ماکان
اعلام جنسیه نك بعض من جهة الوضع اولیه رق اسم جنسلر کی افرادده
استعمالیده کورلمشدر لکن اعلام جنسیه اوزرلرینه مثلاً (اسامه) کی
تأیث و عامیت ایله صرفدن منع ایدیلیمک. والف لام ادخالنی ترك ایلیمک.
وکندیلدن حال ایراد اولمق. ومعرفه ایله توصیف ایدیلیمک. وبنی انسانه
مخصوص عام واقع کنیه لرده اولدینی کی اعلام جنسیه نك دخی برصنفته
مثلاً (ابو الحارث) و (ام عامر) و (ابن دأیه) و (بنت طبق) کی اب وام
وابن و بنت لفظلری مضاف اوله رق کورلمک کی احکام علمیتک جریانیله
ممتاز بولنمشلردر.

اسماء اجناس کی استعماللری کوریلوب واوزرلرینه امور لفظیه مذکوره نك
جریان ایلمسی جهته شیخ رضی کلمات عربیه ده مثلاً غرقة و بشری و صحراء
لفظلرنده اولدینی اوزره تأیث لفظی و کرسی لفظنده اولدینی اوزره نسبت
لفظیه بولندینی کی اعلام جنسیه ده اولان تعریفک ده تعریف لفظی اولمسنده
برباس کوره مم دیشدر.

(ابن حاجب) حضر تلری دخی عمر لفظنده عدل تقدیری اولدینی کی
اعلام جنسیه ده ذکر اولنان امور لفظیه جاریه مبنی تعریف تقدیری
اولسنه قائل اولمشدرکه کذا اعلام جنسیه ده اولان تعریفک حقیقی اولیوب
امر لفظی اولسنی اختیار ایلشمدر. فاعتبر ان کنت من اولی الابصار.

درس ۱۵۵

خفی اولیه که بنی انسان ایچون علملر وضع اولندینی کی آت دوه قیون کچی
کلب و بوکی استعمال والفت اولنان حیوانلره دخی بعض اعلام شخصییه
وضع اولمشدر مثلاً (لاحق) و (شدم) و (خطه) و (ضمران) کی
لاحق معاویه ابن ابی سفیانک فرسنگ اسمیدر و شدم نعمان ابن منذرک
بردوه سنگ اسمیدر ابل شد قیات آنک نسلندندر و خطه خاء معجمه نك
ضمیمه برکتر کچینک اسمیدر (قبیح الله معزنی خیرها خطه) مثلی بونک
اوزرینه مبتیدر و ضمران ضاد معجمه نك ضمیمه نابغه نك برکلبنک اسمیدر.

واما الفت واستعمال اولمیان طیر ووحوش وصيد اولن ان حیوانلر وبو کبی لرك افراد شخصیه سنی یکدیگر ندن تمیزه احتیاج اولدیغندن بونلر ایچون اعلام شخصیه ایشیدیلیمیوب آنجق جنس ونوعلرینی تمیز ایچون اعلام جنسیه مسموع اولمشدر وبونده مناسبت تسمیه یه دخی رعایت ایدیلمشدر مثلاً یلکلرینک یوقاریسی بغایت آق واورته سی قرمری و آشاغیسی سیاه اولوب برسنه دن قورقوب یلکلده تویلیری قباروب طاوس کبی کونا کون الوانله متلون اولور کرپی یه شیه برنوع کوچك قوشه منقش نسنه نك لونى مختلف اولق معناسنه اولان برقشه لفظندن اخذایله ابو براقش دینلمشدر وارسلانله شاننك بالا اولسنه مبنی اسامه وصيد وکسبه سخی ایلمسی جهته ابو الحارث وصر تلانه عظم بطنی جهته حضاجر و حیوانلرك اك فاسدی اولغله دیشی صر تلانه تفأولاً ام عامر ولاشه نك ایلکو میکنه قونمسی ملاحظه ایله قارغه یه عضو مذکوره دینلان (دای) دن اخذایله ابن دایه و قیویریلوب یاتده طبق شکلنده اولسنه مبنی زهرلی وجته سی چوک برنوع حیه یه بنت طبق دینلمشدر وقس علی هذا.

بونلردن بعضیسنک هم اسم جنس وهم علم جنسی کورلمشدر مثلاً اسد واسامه و ثعلب و ثعالبه کبی اسامه ارسلانک و ثعالبه دلکونک علم جنسی در واسد و ثعلب اسم جنسلردر و بعضیسنک آنجق علم جنسی معروف اولمشدر مثلاً ابن مقرض و حمار قبان کبی ابن مقرض سکسار دینلان حیواندر و حمار قبان قبرلرده بولنور بر حیواندر.

(وبیلملیدرکه) علملر اعیانده جاری اولدینی کبی معانی ده دخی جاری اولور مثلاً سبحان و شعوب و ام قشعم و کیسان و ام کیسان و برة و فجار و زوبر و اولی لك کبی (سبحان) بعض اضافتسز استعمال اولندقدده تسبیحه علم اولوب علمیت والف و نون زائدین ایله غیر منصرف ایدیلور و (شعوب) و ام قشعم موت یعنی اولومك علمیدر و (کیسان) غدر و تعسفه و (ام کیسان) بر آدمك آرقه سینه غفلة دمك ایله اورمغه علم اولمشدر و (بره) احسانك و (فجار) فسقك علمیدر و (زوبر) هپ و کتوری معناسنه علمدر (ذهبوا بزوبر) دینور ذهبوا بالکلیه یعنی جمله سی بردن کتیدیلر دیمکدر صنوبر

وزنده زبور وقتحتین ایله زبردخی دینلمشدر و (اولیك) تهدید و وعیده علم قیلنمشدر تفصیلی شیخ رضی ده محرر در .

ودخی اوقات ایچونده اسملر طاقلمشدر مثلاً غدوة و بکرة و سحر و فنه کبی غدوة غین معجمه نك ضمی و دالك سکونیه صباحك اول وقتنه دینور ایچنده بولندیغك صباحك اول وقتی مراد اولندقدده اکا علم اوله رق علمیت و تأنیث ایله غیر منصرف اولور بکرة بانك ضمی و کافک سکونیه غدوة معناسنه و آنک کبی در سحر فتحین ایله طک یری آچلمزدن مقدحه اولان وقته دینور و ایچنده بولندیغك سحر مراد اولنور ایسه اکا علم اولور و الف لامله (السحر) دن معدول اولمسیله عدل و علمیت ایله غیر منصرف قلنور شو عدل غدوة و بکرة و فنه ده دخی اعتبار اولنه یلور فنه فانك فتحیه ساعت زمانی یه دینور که آلمش دقیقه مدتدر ایچنده بولندیغك بر ساعت معین مراد اولنور ایسه علم اولوب علمیت و تأنیث ایله غیر منصرف اولور فینه و فیئه دخی فنه معناسنه در .

ویلملیدر که بر عدد ذکر اولنوب کندیلر معدودی مراد اولنمیوب نفسی مراد اولنسه بودخی بولندیغی مرتبه نك علمی عد اولنور مثلاً ثلثة نصف ستة قولزده ثلثة و ستة کبی که اعداددن بولندقلر مرتبه نك علمی عد اولنور رق علمیت و تأنیث ایله غیر منصرف قلنه یلور و اما عدد ذکر اولنورده معدود مراد اولور ایسه اولوقت علم اولمیوب منصرف اولور مثلاً عندی ستة قولزده ستة کبی .

ویلملیدر که الفاظ عربیه نك وزنلری بیلیمک ایچون وضع اولنسان اوزان دخی موزونلری نك علملری عد اولنور بولنرک موزونلری غیر منصرف ایسه کندیلر دخی غیر منصرف اولور و موزونلری منصرف اولور ایسه کندیلر نده علمیتدن بشقه علل تسعه دن یرعلت بولنمز ایسه منصرف اولور لر و بولنور ایسه صرف و عدم صرفلری جائز اولور لکن عدم صرفلری مرجحدر . مثلاً (فعالان الذی مؤثنه فعلی غیر منصرف) دینسه (سکران) نك مؤثی سکری اولوب غیر منصرف و سکران فعالانک موزونی و مثالزده فعالان سکران نك علمیدر سکرانده ایسه وصفیت و الف و نون

زائدتین اولوب غیر منصرف اولمغله (فعلان) دخی علمیت و الف و نون
 زائدتین ایله غیر منصرف اولور. و مثلاً عمر) کلمه سی عدل و علمیت ایله
 غیر منصرف اولوب وزنی فعل دخی عدل و علمیت ایله غیر منصرفدر.
 و مثلاً زید منصرف اولمغله وزنی اولان فعل دخی علمیتدن بشقه برعلت
 بولنه میوب منصرفدر. و مثلاً قائمه علی وزن فاعلة دینسه فاعلة کلمه سنک
 موزونی اولان قائمه منصرف اولمغله فاعلة منصرف ایدیلماک و یا خود
 موزونی منصرف ایدیه فاعلة علمیت و تأیث ایله غیر منصرف ایدلماک
 جائزدر لکن غیر منصرف ایدیلماسی مرجحدر.

و بیلملیدر که علملرده بعض الف لام دخی کوریلور بوده ایکی نوع اوزره
 بولنور که یا لازم و یا خود غیر لازم اولور **اکر** الف لامه معرف بر اسم
 جنس الف لامه بیله بر شخص معین ده استعمالی تغلب اولنوب اکا علم
 قیلنسه مثلاً الثریا والصعق کی بوکی علملرده الف لام کلمه یه لازم اولور
 الثریا معروف یدی یلدره والصعق خویلدر بن نفیل بن عمرو بن کلابه
 صاعقه لی و یوزکاری برکونده طعمانه طوپراق قاتدیغندن یوزکاره شتم
 ایدهرک در حال کنیدنه بر صاعقه اصابت ایلهرک هلاک ایلماکه علم اولمشدر.

واکر بر صفت و یا مصدر بر شخصه علم قیلنور ایدیه مثلاً حسن و فضل کی
 بولنره فی الاصل صفت و یا مصدر اولمسنی ملاحظه ایله الف لام ادخال
 ایلماک و یا خود علم اولمارینی ملاحظه ایله ادخال ایتماک جائز اولوب
 بوکیلرده کوریلان الف لامی حذف و اثبات جائزدر و اما وجه مذکور
 اوزره اولمیان علملره مثلاً زید عمرو بکر کی الف لام ادخالی هر **کز**
 جائز اولمز.

و بیلملیدر که بر علم (شخص مسمی بهذا الاسم) اعتباریله نکره قیلنه بیلور
 مثلاً (زید) ایله شو اسمله مسمی اولانلردن بریسی مراد اولنسه اسم
 جنس منزلده اوله رق نکره اولور و شو صورتده اوزر لرینه الف لام دخی
 ادخال اولنه بیلور مثلاً جاءنی الزید دینور زید آدلو بر کیسه بکا کلدی دیمکدر
 و دیگر بر کلمه یه اضافت لرینه دخی اجتسار اولمشدر نته کیم مضر الحمراء و ربیعة
 الفرس و انمار الشاة قوللرنده اولدیغی کی مضر و ربیعة و انمار بنو زاردن

برار کیمسه نك علمایدر بونلر برادرلرایدی پدرلرندنصکره میراثلری
تقسیم ایچون اول وقتك والیسی افعی بن بحر انك یانه کیتـ دیلر افعی بن
بحران ذهبله قبه حمرا بی مضره و فرسلری ربیعیه و قیونلری اماره و یردی
شواسمله مسمی اولانلر چوق اولدیغندن نکره حکمنده قیلنوب هر بری
کندینه اصابت ایلان میراثك اسملرینه مضاف ایدیلهرك تعیین اولنشلردر.

درس ۱۵۶

خفی اولیه که علملر سبقت ایدن درسلر مزدن مستبان اوله جفی اوزره یا اعلام
شخصیه و یا خود اعلام جنسیه اولورلر و اعیان و معانی ده جاریدرلر .
و بیلملیدر که اعلام اوچدن خالی دکلردر یا کنیه و یا خود لقب و یا خود اسم
اولورلر اگر اب ام ابن بنت لفظلریله مصدر اولورلر ایسه کنیه دینور
مثلا ابوالحسن و ام کلثوم و ابن عباس و ابوالحارث و ام عامر و ابن دایه
و بنت طبق کی و اگر شولفظلر ایله مصدر اولمز ایسه شو صورتده مدحی
و یا ذمی مشعر اولور ایسه لقب دینلور مثلا علودن اشتقاقی ملاحظه ایله
(علی) و عوادن اشتقاقی ملاحظه ایله معاویه کی و اگر مدح و ذمی
دخی مشعر دکل ایسه اسم دینور مثلا زید و جعفر کی (اسم) عندالتحات
اوچ وجه اوزره اطلاق اولنور که بعض فعل ایله حرفك مقابلنه دینور
بواعمدر و بعض صفتك مقابلنه دینور که الف و نون زائدتین بحشده جاریدر
و بعض کنیه و لقب مقابلنه دینور که بوراده مانحن فیه مزدر .

و بیلملیدر که علملر افراد و ترکیب جهتیله مفرد و مرکب و نقل و ارتجال
حسبیلله منقول و مرتجل قسملرینه دخی منقسم اولورلر (اعلام مفرده)
کله واحده اوزره بولنلرلر مثلا زید عمرو اسامه کی (اعلام مرکبه)
ایکی ودها زیاده کله لردن ترکیب ایلانلرلر مثلا تابط شرا و عبدالله و سیبویه
و معدی کرب و بعلبک کی (اعلام منقوله) شمذیکی مسالمینه وضع
اولنمزدن اقدم دیگر برشی ایچون موضوع اولوب بعده آندن اشبو مسالمینه
نقل و علم قلنمش اولانلرلر بونلرده (یا براسم عیندن منقول) اولورلر
جعفر و ثور و اسد کی جعفر برنهر صغيرك اسمی اولوب بعده برذاته علم

قیلنمشدر وثور اوکوز دینلان حیوان اولوب بعدہ ثور بن عبد منافہ
(واسد) سباعدن ارسلانہ دینورایکن بعدہ اسدان بن خزیمہ یہ عام قیلنمشدر
ویا (بر اسم معنیدن منقول) اولور فضل وایاس کی فضل نقص مقابلی
زیادہ یہ دینور ایکن مؤخرأ فضل ابن عباس حضرت تدرینہ وایاس عطیہ
وعوضہ دینور ایکن مؤخرأ بصرہ قاضیسی ایاس ابن معاویہ یہ علم اولمشدر.
ویا (مثلا اسم فاعل . اسم مفعول . صفت مشبہہ . کی بر صفتدن منقول اولور
خالد محمد حسن احمد عطشان کی خالد دوام ایدیجی یہ دینلور مؤخرأ
حضرت خالد رضی اللہ عنہ و محمد کثرت خصال حمیدہ سی جہتیلہ پک مدح
و ثنا اولنسان کیمسہ یہ دینلور مؤخرأ حضرت سرور کائنات علیہ اکمل
التحیات و اتم التسلیات افندیز حضرت تدرینہ و حسن پک کوزل نسنہ یہ دینلور
مؤخرأ حضرت حسن رضی اللہ تعالیٰ عنہ افندمرہ و احمد حمدی اکثر
اولانہ دینلور مؤخرأ ینہ مفخر کائنات علیہ الصلوٰۃ والسلام افندمرہ
وعطشان صوسز کیمسہ یہ دینلور ایکن مؤخرأ عبدالمطلب ابن ہاشم
حضرت تدرینک بر قلنجنہ علم اولمشدر . ویا (بر فعلدن منقول) اولور شمر
ویشکر و اصمت کی (شمر) تشمیردن فعل ماضی ایکن مؤخرأ بر فرسہ
و (یشکر) شکردن فضل مضارع ایکن مؤخرأ بر کیمسہ یہ و (اصمت) صمت
یصمتدن امر حاضر ایکن مؤخرأ قورقونج یر صحرایہ عام قیلنمشدر
ویا خود (بر مرکبدن منقول اولور) تأبط شرأ و عبد اللہ و سیبویہ کی کہ
(تأبط شرأ) شری قولتیغہ آلدی معناسنہ بر جملہ ایکن مؤخرأ ثابت ابن
جابرہ (و عبد اللہ) اللہک قولی معناسنہ بر ترکیب اضافی ایکن مؤخرأ
حضرت سید الکونین افندمرہ حضرت تدرینک پدرلرینہ و (سیبویہ) فاکہدن
المامعناسنہ اولان سیب ایلہ تعجب عندندہ اصدا رایدیلو رویہ لفظندن عبارت
ایکن مؤخرأ ائمہ نحوذن عمرو ابن عثمان الشیرازی یہ عام قیلنمشدر ویا خود
(صوتدن منقول) اولور مثلاً (بہ) کی معناسز بر صوت اولوب طفولیتیدہ
بونئی چوقجہ تلفظ ایلمسی جہتیلہ عبد اللہ بن الحارث بن نوفلہ علم قیلنمشدر
چو جقلغندہ والدہ سی ہند (لانکحن بہ . جاریۃ خدبہ . مکرمۃ محبہ . تجب
اہل کعبہ) ار جوزہ سیلہ ترقیص ایدر ایثر یعنی بہیہ بن بر تنومند محبوبہ

دختر نکاح ایدوب آلورمکه حسن و جمالده قریش نسوانه غالبه اولور
دیگر اشته اعلام منقوله شو ذکر ایله یکمز وجه اوزره بولنادر .
(اعلام مرتجله) دینلنده مسالرینه وضع اولنمزدن اقدم دیگر برنسنه
موضوع اولیانلردر مثلاً (عمر) و (عثمان) و (غطفان) و (فقعس)
و (خنف) و (کبی و اما) (محب) (موهب) (موظب) (مکوزه)
و (حیوه) شاذ اوله رق اعلام مرتجله دن قیلنمشلردر (محب) ادغامسز
اوله رق و (موهب) هانک فتحیه برارکیمسه نک علملریدر و (موظب)
ظانک فتحیه بر موضع و (مکوزه) کافک سکونی و اوک فتحیه و (حیوه)
یانک سکونی و اوک فتحیه کذا بررکیمسه نک علملریدر لفظلری خلاف
قیاس اوله رق واقع اولمشلدر زیرا (محب) ده قیاس اولان ادغامه
(محب) دینلی و (موهب) و (موظب) (معتل الفادن مصدر میمی
واسم زمان و مکان مکسور العین اوله رق کلمک قیاس اولغله هانک
وظانک کسریله اوقتملی و (مکوزه) ده قیاس اولان (مکازه)
و (حیوه) ده قیاس اولان (حیه) دینلی ایدی بونلر شو حالده کی
مسالرینه وضع اولنمزدن اقدم موافق قیاس اوله رق مسموع ایهلرده
لکن شو حالده اولدقلری کی مخالف قیاس بولنه رق دیگر برنسنه اطلاق
اولنملری مسموع دکلدر .

درس ۱۵۷

(النوع الثالث المبهمات) معارفدن نوع ثالث مبهمات ایله مراد
اسماء اشاره و موصولاتدر زیرا اسم اشاره من غیر اشاره واسم موصول
من غیر صله مبهمدر متأخرینه کوره بونلردخی مضمرات کی وضع عام
کلی ایله معانی معینه ازاسنده موضوعلردرکه وضعلری عام و موضوع لهلری
خاصدر مثلاً هذا بر اسم اشاره در واضع اولامفرد مذکر مشارالیه
مفهومی ملاحظه وشومفهوم کلی بی وضعنه آلت قلوب هذا لفظی شو
مفهومک افراددن هر بر فرد مقابلنده وضع ایلمشدر ومثلاً الذی بر اسم
موصولدر واضع اولا بین المتکلم والمخاطب مضمون صله ایله معهود مفرد

مذکر مفهومی ملاحظه و وضعه آلت قلوب الذی لفظی شو مفهوم
افرادن هر بر فرد مقابلنده وضع ایلمشدر تثیه و جعلی دخی بوقیاس
ایله معلومدر واما متقدمینه کوره افراد خارجی ده استعمال اولنق شرطیه
بعد الملاحظه بین الافراد مشترک ذکر اولنان مفهوم کلی لر مقابلنده
موضوعلردرکه وضع و موضوع لهری عامدر نته کیم مضمراتده دخی
بویلجه قائل اولمشلردر .

(النوع الرابع المعرف باللام) معارفدن نوع رابع معرف باللام اولان
کلهلردر ادات تعریفدن اولق اوزره وارد اولان میم لام تعریفدن بدل
اولغله آیریجه اعتداد اولنق لازم دکلمدر الف لام تعریف درت معنایه یعنی
(جنس) (استغراق) (عهد ذهنی) (عهد خارجی) ایچون کلشدر
و کیفیت تقسیمده اختلاف آرا واقع اولمش و ذهنه اک اقرب شوندن عبارت
بولنمشدرکه لام تعریفک معناسی مخاطب عندنده معرف بر نسنیه اشارتدر
شواشارتده مدخولی بولنان لفظک یا مفهومه و یا خود اول مفهومدن بر
حصه معنیه اولور و مفهوم لفظه اشارت اکر من حیث هو هو ایسه شو
صورته الف لامه الف لام جنس . الف لام طبیعت . الف لام حقیقت .
دینلور (الرجل خير من المرأة) قولزده اولدینی کی و اکر (کل فرد)
اعتباریه ایسه الف لام استغراق دینلور (ان الانسان لفي خسر الا الذين
آمنوا) آیت کریمه سنده اولدینی کی و اکر (فرد ما) اعتباریه ایسه الف
لام عهد ذهنی دینلورکه (بعض غیر معینه) دال اولوب تعینی آنجق قرینه
عقلیه ایله اولور . الف لام عهد ذهنی ایله معرف اولان هر تقدیر لفظاً
اوزرینه مثلاً مبتدا اولق و ذوالحال اولق و معارفله موصوف اولق کی
احکام معارف جاری اولور ایسه ده معناده نکره کییدر (ادخل السوق)
قولزده اولدینی کی . و اکر (الف لام) مدخولنک مفهومندن بر حصه
معنیه اشاره ایچون اولور ایسه الف لام عهد خارجی دینلور و معین
اولسی صراحة و یا کنایه ذکر کی کچمک و یا خود مخاطب عندنده حاضر
و معلوم بولنق ایله اولورکه الف لام عهد خارجی شو جهتلر ایله صریحی

وکنائی و حضوری قسملرینه منقسم اولور (انا ارسلنا الی فرعون رسولا
فعصى فرعون الرسول) و دخی (وایس الذکر کالائی) قول شریفنده و
(ركب الامیر) قولزده اولدینی کی . معرف باللامک کیفیت وضعه کنجه
بیلملیدرکه اشارت الی التعین ذکر اولدینی اوزره یالکز لامده اولمی
التزام اولنور ایسه واضع اولا مخاطب عندنده معلوم و معروف برماهیه
و یا آندن بر حصیه اشارت مفهومی ملاحظه ایله شو مفهومک
خصوصیاتندن هر برینه وضع ایلمشدر دیرزکه مثلاً (الرجل خیر من المرأة)
قولزده (الرجل) ده اولان الف لام من حیث هو هو مدخولی اولان
رجله و (ان الانسان لفی خسر) قول شریفنده (الانسان) ده اولان
الف لام کل فرد اعتباریله انسانه و (ادخل السوق) قولزده (السوق) ده
اولان الف لام افرادندن بر فرد مطلوب اولق اعتباریله سوقه و (فعصى
فرعون الرسول) قول شریفنده الرسول ده اولان الف لام مدخولی
اولان رسولک (ماصدق علیه) سی یئندن (انا ارسلنا الی فرعون رسولا)
قول شریفنده ذکر سی سبقت ایدن رسول مرسله اشارتدر . و مدخول
الف لامک تعریفی الف لام مناسبته در والف لامک وضعی عام و موضوع لهی
خاصدر . و اگر الف لام مخاطب عندنده معلوم و معروف برماهیه
و یا آندن بر حصیه اشارت مفهومیله بعد الملاحظه تحتنده بولن خصوصیاتده
استعمال اولنق شرطیله وضع اولنمشدر دینور ایسه الف لامک وضع
و موضوع لهی عام اولمش اولور و بعض الف لام مدخولندن آرو
کورلیه رک شو وضع کیفیتی معرف باللامده اجرا اولنور . و بعض الف
لامک مدخولیله بیله هیئت ترکیبیه سی معنای مذکوره وضع اولنمشدر
دینورکه وضعی وضع نوعی قیلندن اولمش اولور وعلیک التدبر و کیفیه
وضع النداء و الاضافة تجلی بعد التفکر .

(النوع الخامس المعرف بالنداء) انواع معرفه دن بشنجیسی معرف بالندادر
منادانک تفصیلاً احکامی مفعول به بحثنده مرور ایلمکه اطناب بحث ایلمیز
کوفیلر معرف بالندایی کویامثلاً (یا رجل) یا ایها الرجل منزله دردیهرک
معرف باللامده داخل کوروب آروجه تعداد ایتدیلر و بعض نجات

مناداده اولان تعريف كاف خطاب موقعده واقع اولسندندر ديهرك
مضمرات عددانده كوروب آيروجه عدايامديلر و بيلمليدركه ادات ندا
ايله مناداده حصول تعين بر معين قصد اولنديغنده در مثلاً يارجل كبي والا
نكرده داخلدر مثلاً يارجلأ كبي نته كيم بونكدي بياني كچمشدر .
(النوع السادس المعرف بالاضافه) انواع معارفدن التجيسي معرف
بالنداك غيري بر معرفيه اضافت معنويه ايله مضاف اولغله تعرف
ايلمش كله لردر . مثل وغير كله سي كبي ابهامده متوغل اولان كله لر اضافتله
تعرف ايده ميه جكندن شو حكمدن مستثنا اولوب نكره لردر اضافت
لفظيه ايله مضاف اولانلر دخی اضافت لفظيه تعريف افاده ايتيه جكندن
حد معرفه دن خارجدر بونلرك دخی محمله تفصيلي كچمشدر (النكره)
معرفه نك تعريف واقسام واحكامي بيلمكله نكرده آنك مقابلي اولغله
معلومدر (نكره) (ما وضع لشيء لا يعينه) دينمكله معرفدركه بعينه
اوليه رق يعنى متعين بر نسنهيه وضع اولنان كله در ديمكدر .
عددلرده ابهام اولوب آنجق ميزلريله تعين ايده جكلرندن مناسب بحث
بولنغله وابن حاجب حضرتلري كافيه سنده معرفه ونكره بحثي عقينده
اسماء عدددن بحث ايلمكله اتباعاً للكافيه على وجه الكفايه اسماء عدددن
بشمز اقتضا ايتش وشو آراده منفرداً ذكر اولنسي احكام خاصه وفيره سي
بولنمقدن ايلرو كمشدر .

درس ۱۵۸

(مبحث اسماء عدد) اسماء عدد اشياى معدوده دن منفرد و يا خود مجتمع
بر حالده بولنان هر شيءك مقداريني بيلدير مك ايچون وضع اولنان
لفظلردركه (ما وضع لكمية آحاد الاشياء) دينمكله تحديد اولنمشدر مثلاً
واحد لفظي منفرد بر حالده بولنان شيلرك كيتني بيلدير مك ايچون
موضوعدركه بر نسنه دن (كم) لفظيله وارد سؤاله واحد ايله جواب
ويريلور و ائينن لفظي مجتمع بر حالده اولوب و بر كره تكرر ايليان شيلرك
كيتني بيلدير مك ايچون موضوعدركه ايكي نسنه دن (كم) لفظيله وارد سؤاله
ائينن ايله جواب ويريلور و هكذا الى مالا نهايه كيديلور .

اسماء عددك اصولی اون ایکی کلمه در که آنلر (واحد) (اثنان) (ثلاثة) (اربعة) (خمسة) (ستة) (سبعة) (ثمانية) (تسعة) (عشرة) (مائة) (الف) لفظلر یدر متباقی یا مثلاً واحد و اثنان کی تاء تأنیثی الحاق ایله و یا خود (ثلاث) عددندن (تسع) عددینه دکن اولدینی کی تاء تأنیثی اسقاط ایله و یا خود (مائین) و (الفین) کی تشیه ایله و یا خود (مائت) و (الوف) و (عشرون) کی جمع و یا شبه جمعه و یا خود (ثلثمائة) و (احدى عشر) کی ترکیب اضافی و یا واو عطفی متضمن ترکیب مزجی ایله و یا خود (احدى وعشرون) کی عطف ایله تفرع ایلمشدر .

تعداد مراد اولنور ایسه (بر) ده واحد و مؤنثده واحده (ایکی) ده اثنان و مؤنثده اثنان و یا خود اثنان دینور علی وفق القیاس تاء تأنیث ایله (اوچ) ده ثلاثة دینور عشرة عددینه منتهی اولانه دکن تاء تأنیث ایله و مؤنثده ثلث دینور (عشر) یه دکن تاسز اوله رق زیر بونلرده تأنیث جماعت اولوب مذکر ایسه اسبق اولغله علامتی احرازده تقدم ایتمس و شو وجهله مذکر ایله مؤنث بینی فرق اولمشدر .

(اون بر) ده احدى عشر و مؤنثده احدى عشر (اون ایکی) ده اثنا عشر و مؤنثده اثنا عشر و یا خود اثنا عشر دینور که علی وفق القیاس ثبت اولنور . بیللملیدر که احدى و احدى لفظلری آنحق نیفده بولنور لر اما واحد لفظنک نیفده وقوعی یک قلیلدر (نیف) بر عقد اوزره دیگر بر عقد دکن زائد قیلنان عددلره دینور اصلی فعل وزنده نیوف اولوب واو یاه قلب و یا یاه دغم اولمشدر (اون اوچ) ده ثلاثة عشر دینور (تسعة عشر) یه دکن جزء اول قبل ترکیب بولنمادیغی حال اوزره یعنی تا ایله ثبت اولنور لکن جزء ثانی بر کلمه واحده حکمنده اولان ترکیبده بر جنسندن ایکی علامت تأنیث جمع اولمسون ایچون تاسز کتور یلور و مؤنثده ثلث عشرة دینور (تسع عشرة) یه دکن جزء اول تاسز اوله رق و جزء ثانی انتفای مانعدن ایچون تا ایله کتور یلور .

(یکرمی) ده مذکر ایله مؤنث بینی بلا فرق عشرون دینلور و اخواتی بولنان عقود سبعة متباقیه ده دخی من غیر فرق کیدیلور .

واشبو عقود ثمانية دن برينك اوزرينه زياده قيلندقدده عقدی زائد اوزره
عطف ايلمك طريقه ايراد ايدرسك مثلاً (يكرمی بر) ده احد و عشرون
(يكرمی ايکی) ده انسان و عشرون ديسك ومؤثده علی ما هو القياس
احدی و عشرون (انسان و ياخود ثنتان و عشرون ديسك) (يكرمی
اوچ) ده ثلثة و عشرون دينور تسعة و عشرون به دكين جزء اولده كذا
تای تانيث ايله ومؤثده ثلث و عشرون دينور تسع و عشرون به دكين جزء
اولده تاسز اوله رق (اوتوز) ده ثلثون دينور و وجه مذکور اوزره
طقسان طقوز عددينه دكين و اريلور (يوز) ده مائه و (بيك) ده الف
و ثنيه لرنده مائتان و الفان و جعلرنده مائت و الف دينور بونلرك جمعلى
مقدار معينه دلالت ايتامكه بعضيلر عدد جمله سندن قيلماملر در .

و بيلمليدركه مائه ايله الف اوزره زياده قيلندقدده يا بونلری اول زائد
اوزره و ياخود زائدی بونلرك اوزرينه عطف ايدرك ايراد ايدرسك مثلاً
(مائه و واحد) (مائه و انسان) (مائه و ثلثة) و ياخود (واحد و مائه)
و (انسان و مائه) و (ثلثة و مائه) ديهرك بوقياس اوزره عد ايلرسك
خفی اوليه كه قبيله تيم (احدى عشرة) (انسان عشرة) كله لرنده مع ثقل
التركيب فتحات اربعه نك و (ثلث عشرة) ده (تسع عشرة) به منتهى اولانه
دكين فتحات خمسة نك توالی و اجتماعندن قاهره عشرة لفظك شينى
مكسور قيلدیلر لكن حجازيون خفت سكوندن ايجون ساكن قيلدیلر
ولغت فصيحہ ساكن اوقونمقدر نته كيم قرائت متواتره ده (و قطعنا هم اثنتي
عشرة اسباطاً) آيت كريمه سنده دخى سكون شين ايله واقعدر .

و خفی اوليه كه (ثمانى عشرة) عددنده يا حرفى مفتوح اوقونمش و سكون يا
ايله ده كمش و مع فتح النون ياي حذف ايلمك شاذ بولمشدرد .

درس ۱۵۹

قاعدة تعداد بيلندى ايسه اسماء عددك ميزلرينى دخى بيلمليدركه (واحد)
و (انسان) لفظلرينك ميمى مقصود بالعددى بالصراحه مفيد اولوب مثلاً
رجل ديندكده جنس و وحدت و رجالان ديندكده جنس و اثنينيت مفهم

و مستبان بولمغله میز لرینی ذکر ایلمک کندیلرینی ذکر دن مغنی اولور پس
واحد رجل و اثنا رجلین دینلمز .

واما (ثلثة) عددینک (عشرة) عددینه دکن میز لری مجرور اولوب
لفظاً و یامعناً مجموع اوله رق کتوریلور ثلثة رجال و اربعة رهط کی (مجرور
اولملری) استعماللری کثیر اولمغله لاجل التخفیف عددک تمیزه اضافتلری
اختیار اولندیغندندر و (مجموع اولملری) معدودک عدده مطابقت ایتسی
ایچوندور . آنجق اوچدن طقوزده قدر (مائه) لفظنه مضاف اولان عددلرده
(مائه) لفظی تمیز واقع اولوب و حالبوکه جمع اولمغله شو حکمدن مستثنا
بولمشدر مثلاً ثلثمائة کی مقتضای قیاس ایسه ثلثمئات و یا خود ثلثمین
دینامیلیدی زیرا قیاس اولان اوچدن اونه قدر اولان عددلرک تمیزینک
لفظاً و یامعناً جمع اولمسیدر مائه لفظنک ایسه ایکی جمعی وارد بری جمع
مذکر سالمدر که حالت رفعده و او و نون ایله مأون و حالت نصب و جرده
یا و نون ایله مئیندر و بری جمع مؤنث سالمدر که الف تا ایله مئاتدر .

ثالث و اخواتند نصکره جمع مذکر سالم وارد اوله من زیرا اوچدن اونه
قدر عددلرده کرک مذکر و کرک مؤنثده معدودلرنده اولان (تأنیث جماعت)
معتبردر جمع مذکر سالمده ایسه تأنیث جماعت معتبر دکلدر شاعرک

ثلثمائین للملوك . وفی بها ردائی وجلت عن وجوه الالهاتم

شعرنده ثلثمائین ضرورت شعریه دن ایچون واقع اولمشدرو (اخفش) اصلی
مئین اولوب غسلین کی فعلین وزننده مفرددر لام الفعلی محذوفدر دیمشدر
لکن شیخ رضی اخفشک مرادی اسم جمع اولمسی اولمیدر دیمشدر . زیرا
مفرد اولسه بر یوزده مائه دینلدیکی کی مئین دخی دینلی ایدی حالبوکه هرکز
ایشیدلما مشدر و بعضیلرده مئین فی الاصل مای اولوب عصی کی فعل وزننده در
بعده یای اخیره نونه منقلب اولمشدر و نته کیم شاعرک . و حاتم الطائی و هاب المای
شعرنده اصلی اوزره واقع اولمشدر دیمشدر . بوکا آخرنندن ضرورت

شعريه دن اچون نون ساقط اولمشدر دینهرك جواب ویرلشدر .
 ثاٹ واخواندن صكره مآت لفظنك جمع مؤنث سالمي (مآت) ك دخي
 وقوعی جائز اوله من زيرا ثاٹ واخواندن صكره مثلاً ثلثة وعشرون
 اربعة وثلثون كبی واوونون ايله جمع مذكر سالم صورتنده اولان عددلرك
 ورودی معتباد اولوب الف تا ايله مجموع اولان عددك ورودی خلاف
 معتباددر و برده ثلثات رجل دینلمك كبی مآت اچونده برتمیز ایراد
 اولندقدہ تمیزك الف تا ايله مجموع اولانی ولی ایلمسی لازم كلور ایدی
 حالبوكه مثلاً عشرون رجلا كبی جمع مذكر سالم صورتنده اولان عددلردن
 صكره وارد اولور ایكن تمیزك الف تا ايله مجموعی ولی ایلمسی ینه خلاف
 معتباددر . ثلثات رجل ترکیبی اصلاً جائز اولیوب (مآت) ك میمزيله
 مذكور اولسی عریته کلیا مرفوض و متروکدر لکن مآت لفظنه بر عدد
 مضاف اولیهرق یالکیز بولندقدہ بعض مفردة اضافتله مآت رجل دخي
 مسموع اولسنه منی میمزيله مذكور اولسنك کلیا مرفوضیتی عندالبعض
 نا تمام کبی عد اولمشدر . و بیلمیلیدرکه اوچدن اونه قدر اولان شو عددلر
 معدودلرینك آنجق جمع قاتی وار ایسه اول جمع قلته مضاف اوله جقلری
 کبی آنجق جمع کثرتی وار ایسه اول جمع کثرته مضاف قلنورلر مثلاً ثمانية
 اقلام وار بعة رجال كبی واکر هم جمع قلة وهم جمع کثرتی وار ایسه
 عددك معدوده مطابق اولسی اچون اغلب اولان جمع قلته مضاف اولملریدر
 مثلاً ثلثة احرف کبی و خارج قیاس اولهرق جمع کثرته اضافتله دخي واردر
 ثلثة قروء وار بعة حروف کبی حالبوكه جمع قلة اولهرق (قراء) ك جمعنده
 اقراء و حرفك جمعنده احرف دخي واردر و بر معدودك جمع کثرتی
 بولندقدہ عددك نادراً جمع مؤنث سالمه اضافتی و بعض جمع کثرتی دخي
 وار ایكن جمع مؤنث سالمه اضافتی قلیل الوقوع ایسه ده کورلشدر ثلث
 عورات و سبع سنبلات کبی سنبله نك جمع کثرتی اولهرق سنابل دخي
 واردر .

و بیلمیلیدرکه شو عددلرك تمیزی لفظاً و یا معنأ جمع اولمیلیدر دینلدی لفظاً جمع
 معلومدر و معنأ جمعدن مراد اسم جنس واسم جمعدر لیکن اکثر نحات

تمیز اسم جنس و یا خود اسم جمع اولور ایسه آراده بر من جاره کتور یلهرک
مثلاً ثلثة من الخیل و اربعة من الرهط و خمسة من التمر دینمکی اختیار
ایلدیلر. و هر نقدر اسم جنس ایله اسم جمع معناده افراد متعددی شامل
اولملری جهته جمع کیلر ایسه ده لکن شو عددلرک جمعه اضافتی تمه
ایلدکنصکره لفظاً مفرد بولسان اسم جنس و اسم جمعه اضافتلینی کر یه
کور دیلر. و (اخفش) شو عددلرک اسم جنس ایله اسم جمعه اضافتی
اصلاً جائز دکلر دیشدر لکن اخفشک شو ذهابی هرگز صحیح دکلر
زیرا اسم جمعه اضافته آیت کریمه ده (تسعة رهط) قول شریفی وارد
اولدینی کبی غر بلرک (ثلثة نفر) قولی دخی مسموعدر.

درس ۱۶۰

و بیلملیدر که احد عشر نك تسعة و تسعين عددینه دکن مییزلری منصوب
اولوب و مفرددر (منصوب اولسی عقود ثمانیه ده نونک نون جمع صورتنده
اولوب و مع ابقاء النون اضافت ایسه متعذر و حقیقه نون جمع اولماغله
حذفی دخی غیر ممکن اولسندندر.

و غیر عقودده اضافت تقدیرنده اوچ اسمک بر اسم واحد کبی اولسی
لازم کلوب بوا یسه کر یه کورلدیکندندر. و (مفرد اولسی) منصوب
بولمنی جهته کلامده فضله اولمغله فضله قلیل اولسون ایچوندر (احد
عشر رجلاً) و (عشرون درهماً) و (تسع و تسعون نعجة) کبی
و بیلملیدر که (مائة) و (الف) و ثنیه لرینک و (الفک) جمعک مییزلری
مجزور اولوب و مفرددر (مائة رجل) و (الف درهم) و (مائتا رجل)
و (الفادرهم) و (ثلثة آلاف درهم) کبی (مجزور اولسی) مائة و الف
دخی اصول اعداددن اولمغله مییزلرینک مییز آحاده مطابقتی مناسب
کورلدیکندندر. و (مفرد اولسی) آحاد جانب قلت و مائة و الف جانب
کثرته اولوب و مییز مائة و الفده قلته دال اولان مفرد اختیار اولنه رق
عدالته رعایت اولندیغندندر.

و بیلملیدر که بعض نادراً مائة رجال دخی دینشدر که مییز مائة جمع

صیغه سیله کتورلمشدر و بعض مفرد ومنصوب اوله رق دخی کورلمشدر
نته کیم شاعرك .

إذا عاش الفتي مأتين عاماً فقد ذهب اللذاعة والفتاء

شعرنده مائه لفظنك تشیه سنك ممیزی مفرد ومنصوب اوله رق واقع
اولمشدر بونلره شاذ اولمق اوزره جواب ویریلور .
و (حق سبحانه) و تعالی نك ثلثمائة سنين قول شریفنده ثلثمائة تنوین
ایله اوقنوب سنين جمع صیغه سی اوزره بدل ویاخود عطف بیان اولوب
لفظاً یا ایله منصوبدر تمیز دکلدر وثنی عشرة اسباطاً قول شریفنده اسباطاً
دخی بدل ویاخود عطف بیاندر واقیس ومشهور اولانده بودر . و اما
قراءت حمزه وکساء اوزره ثلثمائة سنين قول شریفنده (ثلثمائة) سنين
لفظنه مضاف اولوب وسنين جمع صیغه سی اوزره اوله رق تمیزدر ولفظاً یا
ایله مجروردر و اسباطاً دخی جمع صیغه سیله تمیز اولوب ولفظاً منصوبدر
نحاتدن (زجاج) توجیه اولك اقیس اولمسی تأیید معرضنده واکر ثلثمائة
سنين قول شریفنده سنين منصوباً تمیز واقع اولسه مثلاً مائة رجل
قولمزده رجل بردانه رجل اولوب معنای ترکیب (یوزدانه رجل) دیمک
اولدینی کی ثلثمائة سنين قول شریفنده سنين اقل جمع اوچ اولغله ثلث
سنين منزلنده اوله رق مفاد آیت کریمه اوچیوز دانه اوچ سنه لر دیمک
اولوب مدت لبثك طقوز یوزسنه اولمسی لازم کلور ایدی دیمشدر لکن
بونی حمزه وکسائینك ذهانی رد ایچون دیسه دهها بجای اولور ایدی و برده
زجاجك شویانی اکر (جمع) مفردده اولان سیاق اوزره مأخوذ اولور
ایسه در حالبوکه اولیه اولمیوب تمیز جمع صیغه سیله کتورلدیکبنده دخی
قصدمن بعینه تمیز جمع صیغه سیله اوله رق ثلثة اثواب قولمزده اولان قصدمن
ککیدر و حالبوکه عددلرك ممیزنده اصل اولان لفظاً ویاخود معنا جمع
اولمقدر مؤخرأ برقسمنده لعله مفردده عدول اولمشدر شوصورتده ممیزك
جمع اوله رق ایرادی اصلی اوزره استعمال اولمش اولور .

وبیلملیدرکه معدود مؤنث و آندن معبر اولان لفظ مذکر و یاخود برعکس بولنور ایسه عددده ایکی وجه یعنی تذکیر و تأنیث جائز اولور مثلاً لفظی مذکر اولان شخص لفظیله بر مؤنث و لفظی مؤنث اولان نفس لفظیله بر مذکر مراد اولنسه باعتبار اللفظ ثلاثة اشخص و اربع انفس دنیله جکی کبی باعتبار المعنی ثلث اشخص و اربعة انفس دخی دنیلور .

وبیلملیدرکه تمیزک توصیفی دخی جائزدر و توصیف اولندقدده و صفده لفظ و معنا جانبیه اعتبار اولنورکه مثلاً ثلثون رجلاً ظریفاً و مائة رجل طویل ذینک جائز اولدینی کبی ثلثون رجلاً ظرفاء و مائة رجل طوال دخی جائزدر .

وبیلملیدرکه سیدویه و نحاطدن بر جماعت قننی درجهده اولور ایسه اولسون عددک تمیزینک سبع طوال واحد عشر طویلاً و مائة ابيض کبی صفندن قلمسینی استقباح ایلمشردر زیرا تمیزدن غرض ازاله ابهامدر صفت ایسه بعض اوصافیه مأخوذ ذات مهمیه دال بولندیغندن اکثر اوصافده اشبو ازاله ابهام غرضی منعدمدر و اما صفت بعض اجناسه مختص اولور ایسه شـ صورته استقباح اولنمز مثلاً ثلاثة علماء و مائة فاضل کبی فافهم و تفصیل البحث فی الرضی فارجع الیه .

درس ۱۶۱

خفی اولیه که امور متعدده جمله سنده بولنان مفرداتک بولندقلری حال و مرتبه لری و ماقبلنه بر عدد منضم و زائد قلنه رق عدد ازیده تصویر و تحویل لری دخی اسماء عددک احوالندن معدود بولنش و اعتبار تصویر آنحق مافوق الواحدده عشریه قدر اولمغله اول امرده آندن بچشمز مناسب کورلمشدر .

عددلرده باعتبار التصیر الثانی و الثالث دنیلور العاشریه قدر و مؤنثلرنده تائی تأنیث الیه الثانیة و الثالثة دنیور العاشرة یه قدر و ایضاح بحث ضمننده شو وجهله آغاز کلام ایدرز که مثلاً امور عشردن ایکنجی مرتبهده بولنان عدد واحد ماقبلنده بولنان عدد انقص یعنی واحده منضم قلنه رق بر عدد

ازیده یعنی ایکنجیلکه تصویر و تحویل اولنور که اثنین عددندن اسم فاعل
 اخذ اولنه رق ثانی دینلور ایکنجی دیمکدر و ثانی الواحد دینور که برک
 ایکنجیسی دیمکدر و اوچنجی مرتبهده بولنان عدد واحد ماقبلنده بولنان
 عدد انقص یعنی اثنینه منضم قلنه رق بر عدد ازیده یعنی اوچنجیلکه تصویر
 و تحویل اولنور که ثلثة عددندن اسم فاعل اخذ اولنه رق ثالث دینلور
 اوچنجی دیمکدر و ثالث الاثنین دینور که ایکنک اوچنجیسی دیمکدر و بوقیاس
 اوزره عشریه قدر اخذ و اعتبار اولنور و اما واحد لفظنک ماقبلنده بشقه
 بر عدد اولما مغله و عشرنک فوقنده ایسه اسم فاعل اخذی غیر ممکن بولنمغه
 واحد و ما فوق العشرده تصویر جریان ایلمز و بیلملیدر که تصویرده اولان
 اسم فاعلر معنای و صورت اسم فاعل اولوب شوماده لرك ضرب یضرب بابندن
 فاعلری بین العرب مستعملدر ثنیت الواحد دینور بره بردخی ضم ایدره لک
 و یاخود فلانجی بر کیمسه یه نفسمی دخی ضمله ایکی قلدیم دیمکدر و ثلث
 الاثنین دینور ایکی یی اوچ قلدیم دیمکدر و بوقیاس اوزره عشریه قدر جاریدر
 و اما عشرنک فوقنده مثلاً احد عشرنک مجموعندن بویله بر اسم فاعل اخذ
 اولنه من آنحق جزء اولدن اسم فاعل اخذ اولنه رق حادی عشر دینلور که
 تصویر اعتباریله اولیوب آنحق بولندیغی مرتبه یی افاده ایلر .

و بیلملیدر که امور متعدده جمله سنده بولنان مفردات عددک بولندقلری حال
 و مرتبه لری اعتباریله الاول والثانی والثالث دینلور العشریه قدر و مؤنثه
 الاولى والثانية والثالثة دینلور العشرة یه قدر اشبو اعتبار عشرنک فوقنده
 دخی جاری اولوب الحادی عشر والثانی عشر والثالث عشر دینلور التاسع
 عشریه دکن و مؤنثه الحادیة عشرة والثانية عشرة والثالثة عشرة دینلور
 التاسعة عشرة یه دکن یکرمی ده عشرون یکرمی برده عطفله الحادی
 وعشرون یکرمی ایکیده الثانی وعشرون و مؤنثه الحادیة وعشرون والثانية
 وعشرون دینوب و بوقیاس اوزره کیدیلور . اشبو اعتبارده بولنان اسم
 فاعلرده معنای فعل بولنمیوب آنحق صورت اسم فاعل بولنمشلردر بوا اعتباریله
 مثلاً الثانی ایکنجی والثالث اوچنجی مرتبهده بولنان عدد دیمکدر .

و بیلملیدر که شـ و اعتبار ایله مثلاً ثالث الاثنین دنیله من بلکه ثالث ثلثة

ویا خود ثالث اربعة وهکذا دنیله بیلور که اوچک اوچنجیسی ودرک اوچنجیسی
 دیمکدر وبونک کی اگر عشر اوزره زائد عددلرک مرتبه سی بیلدیر یلمک
 استنور ایسه اضافتله مثلاً حادی عشر احد عشر دینلور اون برک اون
 برنجیسی دیمکدر و بعض اولور که مرکب ثانیسه ذکر اولندیغندن استغنا
 حاصل اولدورق مرکب اولدن جزء اخیر حذف اولنور مثلاً حادی احد
 عشر دینلور فقط شو تقدیرده موجب بنا اولان ترکیب زائل اولمغله مرکب
 اولدن جزء اول معرب اولمش و جزئین اخیرینده موجب بنا باقی اولمغله
 مبنی بولمیشدر .

و خفی اولیه که شو اعتبارلرده تذکیر و تأیث علی وفق القیاس جاری اولسی
 زیرا بولنلرده معنای جماعت یوقدر مثلاً الثالث عشر قولمز اون برنجی
 مرتبهده بولنان شیء واحددر واما ثلثة عشر قولمز اون اوچ دانه نسنه در
 فافهم ان کنت من اهل الشعور .

درس ۱۶۲

(مبحث المذکر والمؤنث) اسماء عددده مذکر ومؤنث سوزلرینک
 بولمیشندن اسماء عدد بحی عقیبنده مذکر ومؤنثدن بحث مناسبت آماز
 دکدر (مذکر) کنندده نه لفظاً و نه تقدیراً علامت تأیث بولمیان ومؤنث
 کنندده لفظاً و یا خود تقدیراً علامت تأیث بولنان اولوب مفهوم مؤنث
 وجودی اولمغله اولجه آنی تعریف لازم کلشدر مؤنث (مافیه علامه
 التأیث لفظاً اوتقدیراً) دیمکله تعریف اولنور یعنی کنندده ملفوظ ویا
 مقدر علامت تأیث بولنان کله در دیمکدر مؤنث بیلندکده مذکر مؤنثک
 خلاقی اولمغله مذکرک تعریفی دخی منفهم اولور که (مالم یوجد فیه علامه
 التأیث لالفظاً ولا تقدیراً) دینلور علامت تأیث امرأه وناقه وضاربه
 وغرفة کله لرنده اولدینی کی عند الوقف ها اوقنور تای تأیث وحبلی
 وهرء کله لرنده اولدینی کی الف مقصوره والف ممدوده در .

ویلمیلیدر که ملفوظ اولان علامت تأیث حقیقه ویا حکماً ملفوظ اولمقدن
 اعمدر حقیقه ملفوظ اولان مثلاً امرأه وناقه وضاربه وغرفة کله لرنده

اولدینی کی و حکماً ملفوظ اولان مثلاً عقرب و جهنم کله‌ری کی اوج حرف اوزره زائد مؤنثات سماعیه ده اولدینی کی زیر اوج حرف اوزره زائد مؤنثات سماعیه ده حرف رابع تاء تأنث منزله در شواجلدن آنلرده عند التصغیر تاء تأنث ظاهر اولماز مثلاً عقرب و جهنم لفظلرینک تصغیرنده عقرب و جهنم دینور و اما اوج حرفلی مؤنثات سماعیه ده تاء تأنث مقدر اولوب آنلر تصغیر اولندقدده اوجنجی حرفدنصکره تاء تأنث اظهار اولنور مثلاً قدم و عین لفظلرینک تصغیرنده قدیمه و عینیه دینور و بعضیلر اطراداً للباب اوج حرفلی مؤنثات سماعیه قیاساً اوج حرف اوزره زائد مؤنثات سماعیه ده دخی تاء تأنث مقدر اولمسیله حکم ایلدیلر و نادرأ بعض اوج حرف اوزره زائد مؤنثات سماعیه ده دخی عند التصغیر تاء تأنث ظهورینی مثلاً قدام و وراء کله‌رینک تصغیرنده قدیمه و وریته دخی دیندیکنی ابراز ایتدیلر و حتی صیغه‌ری تأنث ایچون بولن ان کسرتا ایله انت وها و هی و ذی و قی و بوا مثلاً ده دخی تاء تأنث مقدردر دینلمش لکن اصح اولان بونارک صیغه‌ری تأنث ایچون موضوعدر .

ویلملیدرکه مؤنث علامت تأنثک ملفوظ و یا مقدر اولمسی جهته لفظی و تقدیری قسملرینه منقسم اولدینی کی دیگر بر جهته دخی حقیقی و لفظی قسملرینه منقسم اولورلر (مؤنث حقیقی) مقابلنده جنس حیواندن بر مذکر بولن ان اسماء مؤنثه در مثلاً امرأة و ناقة و حبلی و نفساء و زینب و سعاد و اتان و عناق کی امراء عورته و حبلی حامله عورته و نفساء هنوز وضع حمل ایتمش عورته دینور که مقابللرنده رجل واردر و زینب و سعاد اسمای نسا دندر که مقابلنده اسماء رجال واردر و ناقة مقابلنده حمل و اتان مقابلنده حمار و عناق مقابلنده جذع واردر (مؤنث لفظی) مقابلنده جنس حیواندن مذکر بولن ان اسماء مؤنثه در مثلاً ظلمة و غرقة و بشری و صحراء و عین و عقرب کی مجرد لفظلرنده حقیقه و یا حکماً علامت تأنث بولنوب و یا خود لفظلرنده تقدیر اولنوب تأنثلری لفظلرینه منسوبدر دیکدر و ارباب نهاییه غیر خقی در که تقسیم ناییده بولن ان لفظی ایله تقسیم اولده بولن ان لفظی بیننده عموم و خصوص من وجه واردر .

وبیلمییدر که لفظنده علامت تأیث ظاهر اولیان کله ده حکما ملفوظ ویاخود
مقدر اولان خاصه ناه تأیثدر ولفظنده علامت تأیث ظاهر اولیان کله لرك
مؤنث اولدینی کندیلره ضمیر مؤنث راجع اولمسیله وکندیلره ویا کندیلره
راجع ضیره اسناد اولنان فعل ویا شبه فعله علامت تأیثك حقوقیه ومؤنثه
مخصوص اسماء اشاره ویا موصوله لرله مشار ومعهود بولنملریله بیانور مثلا
والشمس وضحیها قول شریفنده شمس لفظنك مؤنث اولدینی (وضحیها) ده
اولان ضمیر مؤنثك شمسه رجوعیله بیانمیشدر ومثلا والتفت الساق بالساق
قول شریفنده ساق لفظنك مؤنث اولدینی ساقه اسناد اولنان (التفت) فعلنه
علامت تأیثك لحقوقیه واطی نزاعه قول شریفنده اطی لفظنك مؤنث
اولدینی اطی لفظنه راجع ضمیر مستتره مسند نزاعه کله سنه علامت تأیثك
لحقوقیه بیانمیشدر ومثلا تلك الدار قولزده دار لفظنك مؤنث اولدینی
مؤنثه موضوع تلك ایله مشار اولمسیله ورایت الهندالتی فی الدار قولزده هند
کله سنك مؤنث اولدینی مؤنثه موضوع التی ایله معهود وموصوف
بولنمسیله بیانمیشدر .

وبعض جمعلری مؤنثه مخصوص ویاخود مؤنثه غالب وزن اوزره اولمسیله
دخی بیلنور مثلا حائض کله سنك مؤنث اولدینی جمعی مؤنثه مخصوص
قواعل وزنده اولمسیله وعناق وذراع وکراع ویمین لفظلرینك مؤنث
اولدینی جمعلری مؤنثه غالب افعال وزنی اوزره بولنمسیله بیلنور وهر تقدیر
مذ کرده مثلا مکان وجنین وطیحال کله لرینکده جمعی افعال وزنده کلش
ایسه ده لکن مذ کرده عناق وذراع ویمین وزنده اولان کله لرك افعال
وزنده جمعنملری قلیلدر .

ومؤنثات سماعیه ثلاثیه لرك تأیثی مصغرلنده تائی تأیثك ظاهر اولمسیله
دخی معلومدر وواچدن اونه قدر اولان اسماء عددك تأیثلری (تا) دن
مجرد اولمسیله جزم اولنور .

(اولکسی) بشقه بر معناسی اولیه زق مجرد تأنیث ایچون اولور مثلاً عمامه و غرقة و ظلمة کله لرنده اولدینی کی و بو کله یه لازمدر .

(ایکنجیسی) معنای تأنیثی تأکید ایچون کتور یلور مثلاً ناقه و نعجة کی تاسز اوله رق ناق و نعیج دینلمز تا ایله ناقه دیشی دوهیه و نعیجه دیشی قیونه دینور و بو کسیلرده دخی (تا) کله یه لازمدر و بعض صفتده اولان تأنیثی تأکید ایچون اولور مثلاً عجوزة کی تادن مجرد اوله رق عجوز قوجه قاری یه دینور لاجل التأکید آخرینه تا کتور لمشدر بو کی تا کله یه لازم دکلدرد و بعض جمعده اولان تأنیث جماعتی تأکید ایچون اولور بوده یا واجب الدخول و یا خود جائز الدخول اولور (واجب الدخول اولان) افعلة و فاعلة بنالرنده اولاندر ازمه و غلمة کی زمام و غلام لفظلرینک جمعیدر تاسز اوله رق ازم و غلم دینلمز و جائز الدخول اولان فاعلة و فاعولة بنالرنده و جمع اقصى ده اولاندر جمالة و صقورة و بعولة و خیوطة و صیاقلة و ملائكة کی تاسز دخی استعمال اولور لر و بعض حجارة و ذکارة کله لرنده اولدینی کی فاعلة بناسنده و عمومه و خئولة کله لرنده اولدینی کی فعولة بناسنده تانک لزومی دخی قلیلاً و اقعدر (جمالة) حییمک کسریله جمل لفظنک جمعیدر و بعضیلر حییمک حرکات ثلاثیه اسم جمعدر دیدیلر (صقورة) صادق ضمیلله صقر لفظنک جمعیدر صقر شاهین و طغان کی صید و شکار ایلیان قوشه دینور (بعولة) بانک ضمیلله زوج و زوجه یه اطلاق اولان بعل لفظنک جمعیدر (خیوطة) خانک ضمیلله ایملک تیلنه دینلان خیط لفظنک جمعیدر (صیاقله) قلنججه جلا و یرمک صنعتی اولان کیمسه یه دینلان صیقل لفظنک جمعیدر (ملائكة) فرشته معناسنه اولان ملک لفظنک جمعیدر (حجارة) حانک کسریله طاشه دینلان حجر لفظنک جمعیدر (ذکارة) ذالک کسریله ارکک معناسنه اولان ذکر لفظنک جمعیدر (عمومه) عینک ضمیلله عمومجه معناسنه اولان عم لفظنک جمعیدر (خئولة) خانک ضمیلله والده نک برادر ی معناسنه اولان خال لفظنک جمعیدر .

(اوچنجیسی) مذکر ایله مؤنث بیننی فرق ایچون کتور یلور که اسم فاعل و اسم مفعولده و افعیل تفضیل ایله افعیل صفتک غیر ی صفت مشبهه ده و یای

نسبت ایلہ منسوب اولانده قاعدۀ جاریہ در ناصرة و منصورة و حسنة و بصریة
کبی مذ کرده (تا) سز اوله رق کتور یلور و بعض اشبو فرق برقاچ اسمای
جامده ده دخی کورلمشدر مثلاً امرأة و انسانة و رجلة و غلامة کبی (امرء)
(مرء) انسان معناسنه در مذکر و مؤنثه اطلاق اولنور لر ایسه ده لکن
اکثر اولان مؤنثه تا ایلہ امرأة و امرأة دیکدر و اما انسان مذکر و مؤنثه
شامل اولوب مؤنثه تا ایلہ انسانة دینک نادر اولوب لغت عامیه در شاعریک .

لقد کستی فی الهوا ملابس الصب الغزل
انسانة فتانة بدر الدجی منها خجل
اذا زنت عینی بها فبالدموع تغتسل

شعرنده مسموع ایسه ده لکن مولد اولسی ظن اولنور دینمشدر و اما
رجل و غلام آنجق مذکرده استعمال اولنور لر مؤنثه امرأة و امة
استعمال اولنور رجلة و غلامه اطلاقده نادرأ مسموعدر .

(دردنجسی) جنس ایلہ واحد بیننی فرق ایچون اولور که (تا) دن مجرد
اولدقه جنس و تانک مدخولی اولدقه اول جنسدن بر فرد مراد اولمش
اولور مثلاً (نخل) و (نخلة) و (تمر) و (تمرة) و (ضرب) و (ضربة)
و (سفین) و (سفينة) و (لین) و (لينة) کبی بعضیلر سفین سفینه ک
ولین لینه ک جمعی اولوب (تا) جمع ایلہ واحد بیننی فرق ایچون اولسنه
میل ایلمشدر و بعض اسم جنس تا ایلہ و واحدی تا دن مجرد اولور فقط
یوپک آزدر (کمه) و (کم) و (فقعه) و (فقع) کبی کمه و فقعه متعارف
دینور اسم جنسدر و واحدی تامز اوله رق (کم) و (فقع) در و بعضیلر
بونلرده دخی تادن مجرد اولانک اسم جنس اولسنه قائلر ایسه ده لکن
مظهر تحقیق اولان وجه مذکور اوزره اولسیدر .

وینلملیدر که کندیلہ واحدی بیننی تا ایلہ تمیز اولنان اسم جنسلی حجازیلر
مذکر اوله رق استعمال ایدر لر و غیریلری مؤنث مجراسنده اجرا ایدر لر
قرآن عظیم الشانده شوایکی وجه اوزرده واقع اولمشدر (نخل منقعر) و

(نخل خاویه) کبی ویلمیدر که یای نسبت دخی (تا) کبی بعض وحدت
ایچون کلشدر مثلاً (اعراب) و (اعرابی) و (فارس) و (فارسی) و
(عرب) و (عربی) و (روم) و (رومی) کبی.

(بشنجیسی) جماعته دلالت ایچون کتوریلور مثلاً خرجت خارجه
وسارت قتوبه ورکبت جماله وذهبت بصریه قوللزمزده (خارجه) (قتوبه)
(جماله) (بصریه) کبی خارجه اطاعتدن خروج ایدنلره وقتوبه آرقه لرینه
سمر اورلمش دوه لره وجماله شداده وزننده دوه جیلره وبصریه بصریه
منسوب اولانلره دینور موصوفلری استعمال اولنماغله بوتلر برار
جماعتک صفتلری اولسنه دلالت ایچون اخرلرینه تا کتورلمشدر.

(التنجیسی) تأکید صفت ایچون کتوریلور بوده فمال وفاعل ومفعال
وفعول واكثر فانك ضمی وعینک فتحیله فعل بمعنی الفاعل وعینک سکونیه
فعل بمعنی المفعول وزنلرده اولان صفتلرک اخرینه کانه موصوفلری جماعت
اولوب کندیلر جماعت منزلنده اولدقلرینه ووصفده نهایته ایردکارینه دلالت
ایچون داخل اولورکه وصفده کمال مبالغه نی افاده ایلر (نسابه) و (راویه)
و (مطرابه) و (فروقه) و (سبیه) و (سبه) و (لغنه) و (لغنه) کبی
نسابه علامه وزننده علم انسابه بغایت آشنا ودانا اولان کیمسه یه دینور
علامه کلمه سننده اولان تا دخی بوقیلدندر راویه پک زیاده شعر وحديث
روایت ایلان کیمسه یه دینور مطرابه کثیر الطرب اولان کشی یه دینور
فروقه پک زیاده خوف ایدر اولانه دینور سبیه سینک ضمی وباء اولی نک
فتحیله ناسه پک شتم ودشنام ایدن بدزبان کیمسه یه دینور وبانک سکونیه
قبه وزننده سبه کندینه پک شتم ودشنام اولنمش کیمسه یه دینور.

لغنه سبیه وزننده پک لعن اوقیان کیمسه یه دینور وسبیه وزننده لغنه پک
ملعون اولانه دینور وزنین اخرین ده یعنی سبیه وسبیه نخونده (تا) کلمه یه
لازم اولوب واما دیگرلرده جائز الانفصالدر.

(یدنجیسی) مفردینک عجمه اوله رق عریته منقول اولدیغنه دلالت ایتسون
ایچون جمع اقصى یه لاحق اولور (جواربه) و (موازجه) و (کیالجه) کبی

جواربه جورب لفظنك جمعيدر كه لسانزده تحريفله چوراب دينور كورب
معريدر موازجه موزج لفظنك جمعيدر كه موزه معريدر معروف آياق
قابيدر كه عربجه خف و تركجه مست اطلاق اولنور كيالجه كيلجه لفظنك
جمعيدر برنوع اولچكه دينور .

(سكزنجيسى) مفردينك اسم منسوب اولمسنه دلالت ايچون ينه جمع
اقصى يه لاحق اولور اشاعره و مشاهده كي اشعري و مشهدي كلمه لر ينك
جمعلريدر عند الجمع ياي نسبت حذف اولمغله آندن بدل كي اوله رق
آخرلرينه بر (تا) كتورلمشدر .

(طقوزنجيسى) آخر حرفندن اولجه اولان مدهء محذوفه دن عوض اوله رق
جمع اقصى يه لاحق اولور (فرازنه) و (زناده) كي . فرازين و زناده دن
يالر حذف اولندوقده آندن عوض اوله رق آخرلرينه اشبو (تا) كتورلمشدر
شو اخلدن (يا) ايله (تا) مجتمع اولمز و (يا) حذف اولندوقده (تا)
كلمه يه لازم اولور فرازنه و فرازين فرزان كلمه سنك جمعيدر فرزان فانك
كسريله شطرنج آلتندن فارسجه فرزين و تركجه فرز تعبير اولنان آلتدر
و زناده و زناده دن قريب كلسنك جمعيدر زنديق دينسز ايمانسز كيمسه لره
دينور .

(اونجيسى) يا ابي و يا امي قوللرمزده ياي متكلم حذف اولندوقده آندن
عوض اوله رق كتوريلور يابا و يا امت دينور .

(اون برنجيسى) محذوف اولان فاء الفعل كلمه دن و يا خود لام الفعل كلمه دن
عوض اوله رق كلمه نك آخرينه كتوريلور (عدة) و (زنة) و (كرة)
(ظبة) كي اصللري (وعد) و (وزن) و (كرو) و (ظبو) ايدى
وعد و وزن كلمه لر ينك فاء الفعل و كرو و ظبو كلمه لر ينك لام الفعل حذف
اولنوب محذوفدن عوض آخرلرينه تا كتورلمشدر (عدة) عينك
كسريله وعد معناسنه در (زنة) زانك كسريله وزن معناسنه (كره)
كافك ضميله يوارلق سنه يه (ظبه) ظانك كسريله قلنجك آغزينه دينور .
خفي اوليه كه ابو عمروك ذهابه كوره (تا) بعض الف تائيدن دخي عوض
اوله رق كتوريلور مثلاً حباري كلمه سنك تصغيرنده حيرة دينور واما

بشقه لرینه کوره (تا) الف تأییدن عوض اوله مز و جباری کله سنک
تصغیرنده حیر دینور جباری حانک ضمی والفک قصریله (طوی) دینلان
قوشه دینور .

(اون ایکنجیسی) وصفیتدن اسمیه نقل اولندیغنه دلالت ایتک و غالبا
موصوفنه غیر محتاج بولندیغنه علامت اولمق اوزره کتوریلور (فریسه)
(و اکیله) کبی فریسه ارسلاک صید ایلدیکی شکاره و اکیله اکل ایچون
سوریدن افراز اولنان قیونه دینور بوکیلرده اولان (تا) غالباً کلهیه
غیر لازمدر . شیخ رضی موصوفنک ذکر اولنماسنه مبنی حلوبه وقتوبه
کبی هر بر فعوله بمعنی مفعوله دخی اولی اولان (تا) نک اشبو تای نقل
اولسیدر دیشدر .

خفی اولیه که شو ذکر اولنان وجوه اثی عشرده بولنان (تا) قسم اول
وثانی وثالث وخامسده تأیث ایچوندر ومتباقیده تأیثه مشابه اولمغله ینه
فی الجملة تأیثه راجعدر کک مذکر و کک مؤنثیده مستعمل اوله لر
لفظلرنده وجود تادن ایچون تأیث معتبردر .

آنحیق مثلاً طلحه کبی کندیلره بر مذکر عاقل تسمیه اولنان مستشارکه
بوکیلرک منع صرفک غیرنده تأیثی معتبر دکلددر و ضمیر مذکر ارجاع
اولنور مثلاً طلحه قائم ابوه کبی .

و خفی اولیه که بعض مؤنثه مخصوص اسم فاعل (ومفعول) وزنلرنده صفتلر
وارددر که آنلرده غالب اولان تانک عدم لحوقیدر حائض و طالق و مرضع
کبی حائض ذات الحیض معناسنه نماز سر خاتونه دینور و طالق ذات الطلاق
معناسنه بوش اولان عورته دینور و مرضع امزریجی عورته دینور
و بعض تا ایله مرضعه دینور بولنلرده اگر حدوث معناسی قصد اولنور
ایسه بهممه حال تا ایله کتوریلور لکه شوصورتده معنالی حیض کتوریجی
و بوشانجی و امزریجی عورت دیمک اولور و بعض حدوث معناسی قصد
اولنمقدده مذکر ایله مؤنث بدینده مشترک صفتلر دخی تادن مجرد اوله رق
کتوریلور مثلاً حمل ضامر و ناقة ضامر و رجل عانس و امراة عانس کبی
(ضامر) پک آریقلمش حیوانه دینور و (عانس) قوجهیه وارمامش

عورته وارکن قالمش ارککه دینور و خفی اولیه که مفعال و مفعیل و مفعول
و فعال موزونی اولان صفتلرده و فاعول بمعنی فاعل موزونده دخی غالباً
مذکر و مؤنث مستوی اولوب (تا) لاحق اولمز معطار و منطق و محرب
و سهام و دلاث و شکور کبی معطار عطر سورینان رجل و خاتونه دینور
منطق سخنور و بلیغ کیمسه یه دینور محرب بهادر اولان شخصی دینور
سهام سحاب و زننده خفیف الروح لطیف و سریع انسان و حیوانه دینور
دلاث دالک کسریله جست و چالاک انسان و حیوانه دینور شکور پک شکر
و سپاس ایلیان انسانه و ازاجق علف ایله اکتفا ایدن حیوانه دینور .

واما فاعول بمعنی مفعول موزونلرنده مذکر و مؤنث کذا مستوی اولوب
(تا) هرکز لاحق اولمز آنحق و صفیتدن اسمیه نقل ایچون لاحق اولور
(قتوب) (ورکوب) کبی قتوب آرقه سنه سمر اورولش جمل و نافه یه
ورکوب کثیرالرکوب اولان کیمسه یه و بنیلیمکه تخصیص اولنش حیوانه
دینور و اما فاعیل بمعنی مفعول موزونلرنده کذا مذکر و مؤنث مستوی
اولوب آخرینه تا لاحق اولمز آنحق موصوفی محذوف اولور ایسه
اولوقت لاحق اولور رجل اوامراة قتیل و هذه قتيلة فلان قوللرمزده
اولدینی کبی و بعض فاعیل بمعنی فاعله لفظاً مشابهتی جهتله موصوفی ذکر
اولنسه دخی الحاق اولنور امرأة قتيلة کبی نته کیم فاعیل بمعنی فاعلنده
فاعیل بمعنی مفعوله لفظاً مشابهتدن ایچون (تا) بعض کره حذف اولنور ملحقه
جدید قولزده اولدینی کبی .

درس ۱۶۴

خفی اولیه که آخرنده الف مقصوره اولوب و آنحق تأنیث ایچون اولان
وزنلر غالب حالده مشهور اولان اوتوز ایکی وزندر (۱) فعلی در فانک
ضمی و عینک سکونیه بو وزنک موزونی یا صفت و خود غیر صفت اولور
صفت اولور ایسه بوده یا افعال تفضیلک مؤنثی اولور (فضلی) و (نصری)
کبی فضلی افضل نک و نصری انصرنک مؤنثیدر و بو افعال تفضیلده قیاس
جاریدر و یا خود افعال تفضیلک مؤنثی اولیوب غیری اولور (انثی)

(وختی) و (حبلی) کی و غیر صفت اولور ایسه بوده یا مصدر اولور
 (بشری) و (رجعی) کی و یا خود اسم اولور (رؤیا) (وهمی)
 و (حزوی) کی رؤیا و همی ده بعضیلر رؤیا و بهماة دخی دیندیکنی
 روایتله الفلرینک الحاق ایچون اولسنه ذاهب اولدیلر ایسه ده اسمده فعلل
 وزنی ثابت اولماغله و رؤیا و بهماة لغة شاذه بولمغله جواب ویر یلمشدر
 رؤیا او یقوده کوریلان حالدرکه اکثری بی اساسدر و همی کدی اوتی
 دینور برناتدر و حدوی بر موضع اسمدر (۲) فعلی در فانک ضمی و عینک
 فتحیله بووزنده آنجق (شعی) و (ادمی) و (اربی) مسموع اولمشدر
 شعبی و ادمی برر موضع اسملر یدر و اربی داهیه و آفت معناسنه در
 و بعضیلر بر صویک اسمی اوله رق (جنفی) کله سنی دخی روایت ایلدیلر
 لکن سبویه اشبو کله بی الف ممدوده ایله ثبت ایلمشدر (۳) فعلی در فانک
 و عینک فتحیله بووزنده اولانده یا مصدر اولور (بزکی) و (جمزی) کی
 و یا خود وصف اولور (وٹی) و (زلجی) کی و یا خود اسم اولور (دفری)
 و (نملی) و (احلی) کی بزکی سرعت سیر معناسنه در جمزی قور دلنکی
 یلمکه دینور وٹی پک صیچرایجی و پرتاو ایدیجی حیوانه دینور فرس وٹی
 دینور صیچرار اوینار چاپک سیرآت دیمکدر و زلجی سریعه السیر معناسنه
 ناقیه صفت اولور و دفری و نملی و احلی برر موضع اسملر یدر (۴) افعلی در
 همزه نك فتحی و فانک سکونیهل افعلی کی افعلی انساندن عامه و جماعت
 معناسنه در (۵) فعالی در فانک ضمیهل جباری کی (۶) فوعالدر فانک
 فتحیله حولایا کی حولایا حانک فتحیله نهروان اعمالندن بر قریه در
 (۷) فعالی در فانک ضمی و عینک تشدیدیهل شقاری کی شقاری کلنجک
 چیچکنه دینور تخفیفله ده اغتدر (۸) فعلا فانک و لام اولی نك فتحی و عینک
 سکونیهل جججی کی انصاردن بر جماعتدر (۹) فعلا فانک ضمی و عین
 مشدده نك فتحیله بقیری کی بقیری کومه او یوننه دینور برقاج کومه
 طوبراق یغوب و ایچنه کیم بولور ایسه آنک اولق اوزره بونجق کی برنسنه
 کتم ایدوب بزم بلده لرده اکثر قزلز اوینار لر (۱۰) فعلا فانک و عین
 مشدده نك کسریله خلیفی و حثی کی خلیفی خلافت معناسنه و حثی

قدرمق معناسنه مصدرلردر (۱۱) فلو تادر فانك و عینك فتحیه رهوتا
ورحموتا کبی رهوتا قورقغه ورحموتا مرسته دینور (۱۲) فعلولی در فا
وعینك ولام اولی نك فتحیه حبو کری کبی حبو کری آفت و داهییه دینور (۱۳)
فوعلی در فاو عینك فتحی و اوک سکونیه خوزلی و خوزری کبی خوزلی بانی صالمش
کبی کسینک کسینک آغر آغر یور ویشه دینور و خوزری قوللری صالیه رق
واتکلری طاغیده رق یور ویشه دینور (۱۴) فعلی در فاو عینك فتحی یانك
سکونیه خیزی و خیزری کبی خیزی خوزلی معناسنه در و خیزری خوزری
معناسنه در (۱۵) فعلی در یانك فتحی فانك سکونی و عینك فتحی لامك
تشدیدیه یهیری کبی یهیری بهوده و باطل نسنه یه دینور بونك و زننده
اختلاف اوانوب بعضیلری یفعلا و بعضیلر فعیلا و بعضیلر فعلی دیدیلر فافهم
(۱۶) مفعلی در میمك فتحی فانك سکونی و عینك فتحی لامك تشدیدیه
مکوری کبی مکوری لئیم و نا کس کیمسه یه دینور (۱۷) مفعلی در میمك
کسری فانك سکونی و عینك فتحی لامك تشدیدیه سابقا مکوری بووزنده
دخی مرویدر و برونك اوجی بیوک آدمه و یصی کودملو آدمه ده دینور (۱۸)
مفعلی در میمك و عینك کسری و فانك سکونی و لامك تشدیدیه مرعزی کبی
مرعزی کچی نك قیللری دیننده اولان خرده و یومشق تویلره دینور که
تفتك تعبیر اولنور (۱۹) فعلی فانك ولام اولی نك کسری و عینك سکونیه
هر بندی کبی هر بندی یان یان یوریمکه دینور (۲۰) فعللایدر فتحات و عینك
سکونیه بردرایا کبی بردرایا سیبویهك روایتی اوزره بر موضع اسمیدر
(۲۱) فعللایدر فاو عینك فتحی و لامك کسریله ذریا کبی ذریا آفت و داهییه
معناسنه در تشدیدیه ده لغتدر (۲۲) فعلیا فاو عینك فتحی و لامك کسری
ویانك تشدیدیه زکریا کبی زکریا معلوم نبی ذیشاندر علی نبینا و علیه السلام
(۲۳) فعلی در فاو عینك کسری ولام مفتوحه نك تشدیدیه وفقی و زمکی
کبی وفقی کاه بریان و کاه او بریان اوزره آغارق یوریمکه دینور و زمکی
قوشك قویرینی بیتدیکی یره دینور (۲۴) فعلی در فاو عینك فتحی و نونك
سکونیه جلندی و جنبطی کبی جلندی فاجر و زنا کار کیمسه یه دینلور
و جنبطی غضبندن طلوم کبی شیشمش آدمه دینور (۲۵) فعلی در فانك ضمی

وعین مشدده نك فتحيله سمهي کي سمهي هوايه و باطل نسنهيه دينور
 (۲۶) فعالي در فانك فتحيله صحاري کي (۲۷) فعلي در فانك فتحی وعینك
 ضمیله جلندی بووزنده دخی مرویدر (۲۸) فعانادر فانك کسری عینك
 فتحيله عرضی کي عرضی کمال نشاطدن طوغری اولیوب یانلیه رق
 اولان یوریمکه دینور (۲۹) فعلي فانك کسری عینك فتحی لام اولی نك
 سکونیه سبطری کي ترجمه قاموس ده نونك زیاده لکنه باقلمیوب سبطری
 سینك کسریله عرضی وزنده در دینلمشدر سبطری خرام و رفتار ايله
 اولان یوروشه دینور و اما فتحین و لامك تشدیدیه فعلی وزنده اولان
 مثلا ذری کي و فتحین و لام اولانك سکونیه فعلی وزنده اولان مثلا
 خبر کي و فتحین ايله فعلا وزنده اولان مثلا عفرا کي بونلرده الف
 مقصوره سفر جل کله سنه الحاق ایچوندر ذری آفت و د آهیه و خبر کي
 هلاك اولان طائفه و عفرا ارسلا نه دینور (۳۰) افعلي در همزه نك
 کسریله هجیری کي هجیری عادت معناسنه در و صایقلمق معناسنه مصدر
 دخی اولور (۳۱) فعلا در فانك کسری عینك سکونی لام اولی نك فتحيله
 هندبا کي هندبا معروف سبزه نك اسمیدر و دالك کسریله ده لغتدر
 (۳۲) فعلي در فاو لام اولانك ضمی وعینك سکونیه قرفصی کي قرفصی
 چله یه کیرمش صوفیلر کي دیزلرینی قارننه یاشد یروب اوتورمغه دینور
 بونده قاف و فانك حرکات ثلاثیه مرویدر .

شو وزنلرک تأیثه مختص الف مقصوره ايله مؤنث بولنان ابنیه نك اکثرینی
 احاطه ایلجه کی اشارت کرده ارباب تحقیقدر .

و اما ایکی وزن که بریسی فعلی در فانك فتحی وعینك سکونیه و بریسی
 فعلی در فانك کسری وعینك سکونیه بووزنلرده بولنان کله لرده اولان
 الف مقصوره تأیثه مخصوص اولیوب بعض الحاق ایچون دخی اولور .
 فانك فتحی عینك سکونیه (فعلی) وزنده اولان اگر فعلا وزنده
 بولنان صفتلرک مؤثی اولور ایسه مثلا سکری کي و یا خود مصدر اولور
 ایسه مثلا دعوی کي و یا خود جمع اولور ایسه مثلا مرضی و جرحی کي
 شو صورتلرده آخرلرنده اولان الف مقصوره تأیث ایچون اولور

واکر اسم اولورایسه شو صورتده آخرلرنده اولان الف بعض الحاق
 ایچون اولور علقی وتتری کی و بعض تأیث ایچون اولور شروی کی
 علقی کندندن سپورکه یاپیلور برناتدر وتتری بری برینک آردنجه بر
 برر دیمکدر اصلی وتتری در واو تابه قلب اولمشدر علقی وتتری ده الف
 جعفر کله سنه الحاق ایچوندر و بعضیلرده تأیث ایچون اولمسنه ذاهبدر
 وشرژی مثل ومانند معناسنهدر واما فانک کسری وعینک سکونیه
 (فعلی) وزننده اولان اکر مصدر اولور ایسه ذکر کی و (یاخود
 جمع اولور ایسه که) بووزنده جمع اوله رق مسموع اولان حجل و ظربی
 کله لیدر بولنر آخرنده الف مقصوره تأیث ایچوندر (ذکر کی) ذکر
 معناسنهدر و (حجل) ککک قوشنه دینلان حجل و حجله لفظلرینک
 جمعیدر و (ظربی) کدی جنه سنده کوجن دینور شرطه سی زیاده منتن
 حیوانه دینلان ظربان لفظنک جمعیدر واکر وزن مذکور اوزره بولنان
 صفت اولور ایسه سبویهک بیاننه کوره آخرنده اولان الف مقصوره
 الحاق ایچون اولوب وتا ایله برابر اولور رجل عزهاته وامرأة سعاله کی
 (نحاتدن ثعلب) عزهاته کله سنی تاسز اوله رق منونادخی نقل ایلمشدر
 عزهاته عشق و محبتدن بی بهره خشک طبع اولان شخصه دینور وسعاله
 وهمک اختراع ایلدیکی مهیب غول بیابانی یه وساحره جنه دینور واکر
 مصدر وجمع وصفنک غیری اولورایسه الف مقصوره بعض الحاق ایچون
 اولور معزی کی و بعض تأیث ایچون اولور دفل و شعری کی و بعض
 تأیث والحقاقه محتمل اولور ذفری کی معزی کچی یه دینور الفی الحاق
 ایچوندر مذکر و منصرفدر و بعضیلر الفی تأیث ایچوندر دیوب غیر
 منصرف قیلدیلر و دفل آغو آغا جنه دینور و شعری برطاغک آدیدر
 وفلک ده ایکی کوکب اسمیدر و ذفری قولاق طوزینه دینور منون و غیر
 منون اولور و بعض مقصوره تکشیر حروف ایچون دخی کلورکه کله ده
 حرف سادس اوله رق زیاده قیلنوب و تنوین دخی لاحق اولمغه بیلنور
 قبعثری و کثری کی و بر الفک الحاق ایچون اولدینی وزنده الفک یرینه

لام وضع اولندقدده حاصل اولان وزنده اسم بولمغله بیانور ومنونا
اوقتمسیله و بعض تاء تأنیثک لاحق اولمسیله ده فهم اولنور .

درس ۱۶۵

و خفی اولیه که آخر ندده الف ممدوده اولوب و آنجق تأنیث ایچون اولان وزنلر
غالبا یکر می اوچ وزندر (۱) فعلاء در فانک فتحی عینک سکونیه بووزن
افعل صفتک مؤنثده قیاس جاریدر حمراء و بیضاء کبی و بعض مذکری
افعل اولیان صفتده دخی اولور مثلاً (مرأة حسناء) (دیمه هطلاء) (حلة
شوگاء) (داهیه دهیاء) (عرب عرباء) قوللر مزده اولدینی کبی حسناء
یک کوزل محبوبیه وصف اولور وهطلاء ایرو دانه لی یغمور یاغدی ریر
سحابه صفت اولور مثلاً سحاب هطلاء و دیمه هطلاء دینور شوگاء سردلکی
هنوز کیتامش لباسه وصف اولور مثلاً ثوب شوگاء و حلة شوگاء دینور ثوب
جدید دیمکدر و دهیاء تأکید ایچون داهیه لفظنه صفت قیلنور و عرباء
خلوص و فصاحتی انبا ایله تأکید ایچون عرب لفظنه وصف اولور و دخی
وزن مذکور اوزره اولان بعض مصدر اولور سرء و ضراء و لاواء کبی
و بعض اسم مفرد اولور صحراء و هیجاء کبی و بعض اسم جمع اولور طرفاء
و قصباء کبی سرء سونمکه و ضراء صیقلمغه دینور ولا و اضراء معاسنه در
و صحراء معلوم و هیجاء جنک و جداله دینور و طرفاء ایلغین آغاجلرینه دینور
و بعضیلر اسم جنس در مفردی طرفاء در دیمشیلر در و قصباء قامشلکه دینور
(۲) فعلاء در فاوعینک فتحیه بووزن اوزره تأداء سحناء جنفاء قرماء
لفظلری مسموع اولمشدر تأداء دنیئه جاریه یه دینور عربلر تحقیر مقامنده
یا ابن التاء و بن عاجز دکلم دیه جنک یرده ما انا ابن تأداء دیرلر و سحناء
بشره بدنک تزوتازه لکسه دینور و جنفاء برصویک اسمیدر و قرماء بر موضع
اسمیدر بونلر حمراء وزنده دخی ثبت اولمشلر در قرماء کله سنی سیبویه
قاف ایله جوهری فایله ثبت ایلمشدر (۳) فعلاء در فانک کسری عینک
فتحیه غنباء و سیراء کبی غنباء غنب معاسنه یاش اوزمه دینور و سیراء یول
یول قلملی برنوع آلاجه قاشه دینور نجاتدن فراء سیراء کله سنده سینک

کسری یا به اتباع‌ادر اصلی سینک ضمیله در دیشدر (۴) فعلاءدر فانک
ضمی عینک فتحیله بووزنده اولانده یامفرد اولور عشراء ورحضاء کی
ویاخود جمع اولور فقهاء وعلماء کی عشراء اوزرندن اون آی یکن کبه
ناقیه دینور ورحضاء استمه عقبنده ظهور ایدن تره دینور وفقهاء فقیه
لفظک وعلماء عالم لفظک جمعیدر (۵) فاعلاءدر قاصعاء کی قاصعاء غرب
طاوشانک دلیکنه دینور (۶) فعلیاءدر کبریاء کی (۷) فعلاءدر فانک
فتحیله بووزنده اولانده یامصدر اولور براکاء کی براکاء حربده ثبات
ایامک معناسنه در ویاخود اسم اولور ثلاثاء کی ثلاثاء ثلثه کی صالی کونه
دنیلور ویاخود صفت اولور طباقاء کی طباقاء ناقیه آشمقندن عاجز دوهیه
دینور حمل طباقاء دینور حمل عاجز عن الضراب دیمکدر (۸) فعولاءدر
بروکاء کی بروکاء براکاء معناسنه در (۹) فعلاءدر هندباء کی دالک فتحیله
(۱۰) فعلاءدر هندباء کی دالک کسریله (۱۱) فعلاءدر فانک ولام اولانک
فتحی وعینک سکونیه عقرباء کی عقرباء دیشی عقربه دینور ویمامه ده
بر ارضک اسمیدر (۱۲) فعلاء فانک ضمی عینک سکونی لام اولی نک
فتحیله خنفساء کی خنفساء اوصورغان بو جکنه دینور (۱۳) فعیلاءدر
فانک فتحیله قریشاء کی قریشاء برنوع خورما آغاجنک اسمیدر که خورماسی
تازه قورق ایکن بغایت اطیب اولور (۱۴) فعلاءدر زمکاء کی منون اولسی
کوریلما مکله الفی سنمار لفظنه الحاق ایچون دکدر (۱۵) افعلاءدر همزمنک
فتحی عینک کسریله بووزنده اولانده یامفرد اولور اربعاء کی اربعاء
چهارشنبه کونه دینور ویاخود جمع اولور انبیاء کی (۱۶) افعلاء همزمنک
فتحی عینک ضمیله (۱۷) افعلاء همزمنک وعینک فتحیله اربعاء بووزنلرده
دخی لغتدر (۱۸) فعلیاء زکریاء کی (۱۹) فاعولاء عاشوراء کی (۲۰)
مفعولاء معیوراء کی معیوراء حصار وحشی معناسنه غیر لفظنک جمعیدر
(۲۱) فعالات فانک فتحی لام اولی نک کسریله جیخادباء کی جیخادباء برنوع
چکرکه یه دینور (۲۲) فعالات فانک فتحی عینک سکونیه برناساء کی برناساء
ناس معناسنه در (۲۳) فعلاء فانک ولام اولی نک ضمیله قرفصاء کی
بووزنلرده الف ممدوده ایله مؤنث انیه نک اکثرنی احاطه ایلیه جکی امر

مجزومدر و بیلمیدر که الف ممدوده دخی بعض الحاق ایچون کلمشدر مثلاً
 حرباء کی آخرنده اولان الف ممدوده قرطاس لفظنه الحاق ایچوندر .
 و بیلمیدر که بعض آخرنده الف ممدوده بولنه رق مؤنث اولان کلمه الف
 مقصوره ایله دخی اوقفور که احدالالفین محذوف اولمش اولور مثلاً حسنا
 وقصبا اوزمکی وزکریا وهندبا و قرفصی کی و محذوف اولان الف اول
 مرتبه ده بولنان القدر زیرا سیبویه ک بیان ایله یکی اوزره الف ممدوده
 الف مقصوره دن اولجه مد ایچون بر الف زیاده قیلنوب و الف مقصوره
 همزه یه مبدل اولمغله حاصلدر پس حذف اولمغه زائد اولان احریدر و الف
 زائده حذف اولمقدقه همزه اصلی اولان الف مقصوره یه تحول ایدر
 تفصیل بحث شروح شافیه دن آرا نملیدر .

درس ۱۶۶

خفی اولیه که فعل و شبه فعلک بر مؤنثه و یا مؤنثه راجع ضمیره اسناد اولنلری
 کیفیتندن و یا بر مظهر و مضمرة اسناد اولنلری حاللرندن تخدیش ذهن
 اولماق اوزره اشاعیده آریجه بحث ایله جکز آنجق شواراده سماعاً مؤنث
 بولنان کلملری ذکر ایله مثنی بخته کچه جکز سماعاً مؤنث بولنان کلملرک بر
 قسمنک تأیثی واجب و یا غالب و بر قسمی جائز التأیث اولوب بوبابده بر جوق
 سوزلر سویلنمش و منظومه لر تنظیم اولمشدر لکن بز انجق خلاصه تحقیق
 بیانله اکتفا ایدرز و بغایه الله تعالی تأیثی واجب و یا غالب اولانلری آریجه
 و جائز التأیث اولانلری آریجه برار جدول ایله بیان قیلر و مؤنث
 اولدقلری حالده اولان معنایینی دخی ارئه ایلرز .

﴿ تأیثی واجب و یا غالب اولوب بین الفصحا انجق مؤنث اوله رق مستعمل
 اولان مؤنثات سماعیه ﴾ (اذن) قولاغه دینور بدنده جفت اولان عضولرک
 اسملری غالباً سماعاً مؤنثدر (اصبع) پارمغه دینور (است) سته دن مأخوذه
 ذکر ی مستهجن محل (ارض) زمین معناسنه ترکجه یر دینور (ارنب)
 طاوشان دینلان حیوان (افی) حیه یه دینور (بئر) قیویه دینور (ثعلب)
 دلکو دینلان جانور بعضیلر بونی جائز التأیثیده ثبت ایله یلر (جهنم)

دوزخه دینور (جحیم) جهنم معناسنه در (حرب) جنك وجداله دینور
 (خمر) اوزم شیره سندن مأخوذ شرابه دینور خمرک جمیع اسم وصفقلری
 مؤنثدر (دلو) قوغه یه دینور (دار) قوناق و سراهه دینور (درع) زرعه
 دینور جنك لباسیدر (ذراع) درسك اوچندن اورته پارمغك اوچنه دکن
 اولان عضوه دینور (ذئب) قورد دینلان جانور (ریح) یوزکاره دینور
 جمیع یوزکار اسملری دخی مثلاً شمال جنوب سموم حرور صبا کی مؤنثدر
 (رجل) رانك کسریله ایاغه دینور (ساق) طپوق ایله دیزك آرالی
 اولان عضوه دینور (سن) دیشه دینوردیش اسملریده غالباً سماع مؤنثدر
 (سراویل) شلواره دینور عربلر زینت ایچون کیرلر (سمیر) جهنمه
 دینور (سقر) نارو جهنم معناسنه در (شمال) شمال جهتدن اسن روزکاره
 وصول جهته وصول اله دینور (شمس) آفتابه دینور (ضیع) صرتلانه
 دینور (عین) باصره یه وینبوعه دینور سائر معنالریده وار ایسه ده وجوب
 تانیث شو معنالرده در (عقب) کتف وزتنده و سکون قاف ایله دخی واردر
 آیاغك اوکجه سنه دینور (عرب) عجمك خلاقی طائفة انسانی یه دینور
 و خالص عربی حیوانلره عرب دینلور (عضد) دیرسکدن اوموزباشنده
 کورکه وارنجه قدر عضوه دینور که قول تعیر اولنور فارسیده بازو دینلور
 (عروض) ناحیه معناسنه و مکة مکرمه یه و عجمی ناقیه و مصرع اولدن جزء
 اخیره دینور (عصا) دکنکه دینور (عنکبوت) اورمچك دینلان حیواندر
 (عقرب) هوامدن موزی بر حیواندر (غول) آفت و داهیه و اشیای
 متخیله یه دینور (فخذ) او یلق دینلان عضو معروف (فأس) پالته یه دینور
 (فرس) آلت حرب اولان آته دینور (فلک) ضم اول ایله سفینه یه
 دینور که دریاده جریان ایلر ترکیجه کی دینور (فردوس) جنته دینور
 (فهد) سباعدن پارس دینلان جانور (قدم) ایاغه دینور (قوس) یایه
 دینور (کف) بش پارمنی مشتمل اولان آوجه دینور (کتف) فرج
 و مثل و جبل و زنلرنده اموز باشلر ينك آردنده اولان یعی کیمکه دینور که
 کورک تعیر اولنور (کرش) کتف وزتنده اشکنبه یه دینور (کبد) یورک
 و جگر و بوکی اجزای جوفیه یه دینور (کأس) صواچله جك قابه دیتور

(اضی) ناروجهنم معناسنه (ملح) طوزه دینور (موسی) میمک ضمی
والفک قصر یله باش تراش ایلان اوستریه دینور مفعول و یاخود فعلی
وزنده در فعلی وزنده اولدقده حبلی قیلندن اولور (منجیق) بر آلتدر
جنک هنکامنده طاش آتارلر (معا) رضا وزنده کرش معناسنه (نفس)
روحه وقانه ویاوز کوزه دینور (نعل) نالین دینلان آیاق قابی (نار) آتسه
دینور (ورك) کتف وزنده بدنده اولیغک اوست طرفه دینورکه اوجه
وکیکنه اوجه کیکی دینور ایکی طرفلی اولور ایکیکنه ورکان دینور لحم
وشحمله ترکیده قیناق تعبیر اولنورکه عربی ده الیه دینور وفارسیده سرون
دینلور (ید) اله دینور دست معناسنه (یمین) آند وقسمه وصاغ جهته
وصاغ اله دینور یمین جمیع معنالرنده مؤشدر ابن حاجب حضر تلی
منظومه بلیغلرنده ذکر اولنان اشبو التمش کله نك لازم التائیت اولدقلمی
بیان بیور مشلردر وهر نقدر بولنردن مثلاً ملح واصبع کی بعضیلرینک
نادراً تذکیری دخی مروی ایسه ده فصحای عربدن شایعاً مسموع اولان
تائیلری اولغله نادره اعتنا اولنماشدر بین الفصحا تائیتی شایع کله لر ابن
حاجب حضر تلرینک بیان ایلدکلرنده منحصر اولیوب قومک کتب
ومنظومه لرنده نیچه علاوه بولنمشدرکه مظهر تحقیق اولان زیرده تلخیص
اولنمشدر (امام) سحاب وزنده اوکه دینور پیش معناسنه (ابهام) باش
پارمغه دینور (ابل) دوه قسمنه دینور اسم جمعدر خفی اولیه که ابل
وخیل وغم کی لفظندن واحدی اولیان اسماء جموعک آدمیونک غیرنده
تائیتی واجبدر (اربعا) یوم اربعه یه دینور بعضیلرینک رأینه کوره آخرنده
اولان الف ممدوده تائیت ایچون اولیوب مؤنث سماعیدر وثلاثاء لفظنده
دخی بووجه اوزره ذاهب اولمشدر لکن اولی اولان آخرلرنده اولان الفک
تائیت ایچون اولمسیدر (اتان) سحاب وزنده دیشی اشکه دینور وقیو
آغزنده یوصون باغلمش طاشه دخی دینلور (اضحی) ارطی وزنده قربان
یرامی کوتسه واول کونده ذبح اولنان قربانلره دینلور فی الاصل اضحاة
لفظنک جمعی اولوب بعده معنای مذکورده غالب اولمشدر بعضیلر بونی مفرد
وجائز التائیت اوله رق ثبت ایلدیلر (اروی) همزه نك قبحی واولک کسر یله

طاع کچیلرینه دینور اسم جمعدر و بعضیلر ارویه نك جمع کثرتی در دیدیلر
 (بنصر) بانك کسریله اورتیه پارمغه سرچه پارمق بیننده اولان پارمغه دینور
 (بقر) صغر قسمنه دینور (تبراك) بچاغه دینور سکین معناسنه (ثیب)
 طول خاتونه و متزوج اولمش ارککه دخی دینور طول خاتونه تا ایله ثیه
 دخی دینلور خفی اولیه که برلفظك معناسی مذکر اولدقده لفظده مذکر
 و معناسی مؤنث اولدقده لفظده مؤنث اولمق لازم دکدر مثلاً شخص لفظی
 شخص مؤنث مراد اولنسه ده مذکر در و نفس لفظی نفس مذکر مراد
 اولنسه ده سماعاً مؤنثدر (ثریا) اولکر دیدکری طوب کواکه دینور
 آخرنده اولان الف تأیث ایچون اولدیغنه کوره مؤنث سماعیدر (ثلثاء)
 یوم ثلثیه دینور آخرنده اولان الف ممدوده تأیث ایچون اولدیغنه کوره
 مؤنث سماعیدر (ثمام) غراب وزتمده بیان داریمی دیدکری اوتدر شرح
 مفصلده لازم التأیث اولدیغی ارئه اولمشدر (جفار) جیمك کسریله بیله
 باغلنوب کندیله قیویه اینلان ایپه دینور (جزور) بوغازلنه حق دویه دینور
 (حدود) سودی آزالمش قیویه دینور (جمادی) جیمك ضعی و دال مهمله ایله
 و آخرنده الف مقصوره ایله حباری وزتمده یودخی علی رای آخرنده اولان
 الف تأیث ایچون اولیوب مؤنث سماعیدر شهر عربینه دن ایکی ماهك اسمیدر
 غلط مشهور اوله رق جیمك فتیحی و ذال مکسوره ایله جمادی الاولی جمادی الاخره
 و بعض صفتی دخی مذکر اوله رق جمادی الاول جمادی الاخر دینلور (حیثل)
 صر تلانه دینور ضبع معناسنه (جریاء) جیمك کسریله پویراز یلنه دینور
 بعضیلرک زعم ایلدیکی اوزره آخرنده اولان الف ممدوده تأیث ایچون دکسه
 مؤنث سماعیدر (حرور) کیجه ایله اسن ریح حاره یه دینور (حضاجر) ضبع
 معناسنه (حدور) انیش و اینکبه یره دینور (حانوت) میخانه یه دینور
 نادراً تذکری دکان تاویلله در (حلاق) منیه یعنی اولوم معناسنه در (حصص)
 حانك کسریله شام دیارنده بربلده در سائر اسماء بلدان بقعه اعتباریه مؤنث
 و موضع اعتباریه مذکر استعمال اولملری جائزدر مثلاً بغداد و شام و مصر کی
 (حضار) سهیل یلدیزندن اول طلوع ایدر بریلدیذر (خنصر) سرچه
 پارمغه دینور (خیل) آت قسمنه دینور (دبر) ضمتین ایله آرده دینور که

اوک مقابلہ۔ در (در) دالک فتحی رانک تشدیدیلہ نفس وذات (ذنوب)
 صبور وزنندہ قیچہ وقیناغہ دینور (ذود) اوچدن اونه قدر اولان ناقہ یہ
 دینور لفظندن مفردی یوقدر (ذهب) التونہ دینور (رخی) عصاوزنندہ
 دکرمانہ دینور (رحم) اخوت وعمومۃ کبی اسباب قرابتہ دینور (رخل)
 دیشی قوزی یہ دینور (زند) بیلک کمیکنہ دینور ایکسسنہ زندان دینلور
 وبرنوع چقماقدرکہ اهل بادیه دوزرلر (زوج) چفت اولان نسہ دن
 یکدیگریہ نسبتلہ ہر برینہ وچفت اولان نسہ یہ وار وعورتہ دینور وعورتہ
 تصریحاً للتأنیث زوجہ دخی دینلور زوج لفظنک مؤنث سماعی اولدیغی
 منظومۃ عراقیہ کوردیکمز جہتلہ ثبت ایلدک (سوق) چارشویہ دینور
 قلیلا مذکر دخی اولور (سماء) کوکہ دینورکہ ارض مقابلدر (سلطان)
 حجت وسطوت معناسنہ اولوب پادشاهہ دینور بعض رجل تأویلیلہ مذکر
 اولہ رق دخی استعمال اولنور (سموم) اسی سام یلنہ دینور (سلم) سکر
 وزنندہ نردبانہ دینور مؤنثدر بعض مذکر اولور (سباط) قطام وزنندہ
 حما عارضہ سنہ دینور (ستہ) است معناسنہ در (شعوب) منیہ یعنی اولوم
 معناسنہ (شعیب) آزق قویہ جق طغارجفہ دینور مزادہ معناسنہ (شبا)
 یوصونہ ونوزای عقاربہ دینور (صراط) جہنم اوزرہ قورلمش قنطرہ یہ
 دینور تأنیثی بومعنا یہ مخصوصدر (صاع) برکونہ اولچک اسمیدر (صعود)
 چیقلمق شانندن اولان طاع ونردبان وبایر وتپہ مقولہ سی یرہ وبرنوع
 ناقہ یہ دینور (ضلع) ایکو کمیکنہ دینورکہ قبورغہ تعیر اولنور (ضرب)
 فتحین ایلہ بیاض بالہ دینور (ضائن) قیون قسمنہ دینور (طیر) قوشہ
 دینور (طباع) انسانک مجبول اولدیغی سحیہ یہ دینور (طاغوت) لات
 وعزری دینلان پوتہ وهر غوایت وضالات اصحابنہ دینور (طست) لکن
 تعیر اولنان قابہ دینور (طوی) اورلمش قیویہ دینور (طبق) اورتویہ
 وحال وقرن وجماعت وقبیلہ معنالرینہ دہ کلور (عقاب) غراب وزنندہ
 طوشنجل قوشنہ دینور قرہ قوش نوعنددر (عجوز) قوچہ قاری یہ دینور
 (غیر) قافلہ یہ دینور وعلی قول ذخیرہ کتورن دودلر جملہ سنہ دخی دینور
 اسم جمع اولوب لفظندن مفردی یوقدر (عناق) دیشی اوغلانہ دینور

(عرس) جاریه حسنايه دينور (عقیان) برنوع التونه دينور (عجم) عربك
غیری طوائف انسانی به دينور (عوا) منازل قردندر (غنم) قیون قسمنه
(فرسن) دوه قسمتك طبائنه دينور (فخت) قپانه وفاقه و عرب باجه لرینه
دينور (قنب) قافك ضمیله نساذه دیلاق دینلان لحم زائده و دابه ذکرینك
قابى اولان دری به دینو و (قدام) زناز و زننده امام معناسنه در (قدر)
قافك كسر یله چوملك و تنجره به دينور (قفا) بیونك آردینه دينور كه
اكسه تعبیر اولنور (قلت) طاعلرده خلقی حفره لره دينور (قلوص)
كنج و دیشی دوه به دينور (قدوم) صبور و زننده دولكر لرلك كسر تعبیر
ایلدكلى آلتهدينور (قبا) قافك ضمیله مدینه به قریب بر موضعدر كه
مسجد قبا آنده موسسدر (كئود) صرب یوقشه دينور (كراع) غراب
وزنده قیون و صغر قسمتك بجاقلرینك انچه رك یرینه دينور (لبوس)
زهره دينور درع معناسنه در (ماعز) كچی به دينور (منجنون) صودولابنه
دينور (ناب) آزی دیشلرینه دينور (نبل) سهامه دينلور (نعم) دوه
وقیون قسمنه دينور (نخل) صولوغه و نفسه دينلور (نوی) عصا و زننده
عزم و قصد اولنان سمت و جهت و مرهمه دينور و ایراق اولمغه دخی دينلور
وخانه و سرایه و برمكندن دیگر مكانه نقل و تحول ایلمكه دخی اطلاق
اولنور و خورما چكر دكلرینه دينلور كه اسم جمع اولور و احدی نواتدر
لكن بومعناذه مذكر و مؤنث اولور (نخيل) خورمالغه دينور و نخلك جمعی
دخی دینلمشدر (وراء) آرده دينور اوك مقابلیدر (وحش) یبانی حیوانه
واسسز خالی یره دينلور (وعل) طاع كچیلرینه دينور (هبوط) صبور
وزنده اینش وانكبه یره دينور (يسار) صولاله دينور و جوب تأیث
بومعناذه در وصوله دينور كه عین مقابلیدر (يعرب) عربده برقیله در
شودكر اولنان كله لر بعض منظومه و كتابلردن ترجیح و تلخیص اولمشدر
وهر نقدر بعضیسنك مثلاً ذهب و سوق و سلطان و سلم كی تذکیریده
مروی ايسهده لكن غالب اولان تأیثدر و خفی اولمیه كه جمع سلامتک غیری
جميع جمعلر باعتبار الجماعه مؤنثدر و ذكر اولندينی اوزره لفظندن واحدی
اولیمان اسماء جموع ادمینك غیرنده واجب التأیثدر و حروف هجا دخی

سما مؤنثدر ودخی بر معنایه موضوع و لغرض مستعمل جمیع حرفلر مثلاً
 با من الی عن کبی سما مؤنثدر و بیاملیدر که واحدیه کندی بینی تا ایله
 فرق اولنان اسم جنسلر مثلاً نخل و تمر و بر و ثمر کبی که واحدلری نخله
 و تمره و بره و ثمره در حجازیلره کوره شیخ رضی ده بیان اولندیغی اوزره
 مذکر اوله رق مستعمل و دیکرلره کوره مؤنث اوله رق مستعملدر و کلام
 فصاحده هر ایکی جهته کوره دخی وارد اولمشدر و بعضیلر واحدیه کندی
 بینی تا ایله فرق اولنان اسماء جموعک حجازیلره کوره مؤنث و اهل نجد
 و تیممه کوره مذکر استعمال اولندیغی بیانه نخل و تمر و بر و بقر کلهلریله
 تمثیل ایلمشدر . و شارح قاموس نخل و شجر و سما و ارض کبی اسم جنس
 و اسم جنس مجراسنده جاری اولان کله لر که واحد و جمعه اطلاق اولنور
 تذکیر و تأنثلری جائزدر دیمشدر و هر حالده سما ثابت اولان ثابت
 اولدیغی وجه اوزره اخذ اولنور فافهم

﴿سما آ جائز التأنیث اولان کله لر﴾

(آل) حال و زننده سرابه دینور لمعت و لمع الآل دینور ای السراب
 دیمشدر (ازار) بدنه بورینه جک جار و ملحفه یه دینور (انس) آدم
 اوغلنه دینور مفردی انسی در (ابط) قولتغه دینور (اضحی) معناسی
 و اختلاف سبقت ایتدی منظومه عراقیه ده جائز التأنیث اوله رق مبسوطدر (اجاء)
 طی قبیله سی دیارنده برجیل و مصرده برقریه در (امان) برکیمسه یه ارتق
 مرحمتله قصوری عفو اولنه رق و یریلان تأمینات و وثیقه (بشر) آدم
 اوغلنه دینور (باع) قولاج تعبیر اولنان مقداره دینور (تم) نانک کسر یله
 پالته یه دینور فاس معناسنه و تیمور بیل و چایه دینور مسحاة معناسنه (ثمر)
 میوه یه دینور (ثعبان) اوزون و بیوک یلانه دینور (جراد) چکرکه یه دینور
 (جن) کو زدن نهان بر مخلوق (جام) کو مشدن اولان قابه دینور کاسه
 و مشربه معناسنه (حال) انسانه مختص اولان هیئت و کیفیته دینور مثلاً

(زیدله حال حسن) وحسنه دینور زیدک کوزل حالی وارد دیمکدر
 (حمام) یبانی کوکرجنه دینور (حرف) اسمله فعلک مقابلی اولان کله
 (حزنق) خانک کسریله کنج ارنه دینور (داء) مرض و علتله دینور
 (روح) ودیعه الهی اولان جانه دینور حکما نفس اطلاق ایدرلر (سری)
 هدی وزنده عامه لیل ده یوله کیمکه دینور اسمدر بنو اسد بونی جمع
 قیاسله همیشه مؤنث او قورلر (سقط) خلقتی ناقم دوشکه دینور (سیل)
 آچیق یوله دینور (سلاح) کتاب وزنده آلت حرب دینور (سلم)
 سینک کسر و فتحیله بارشمغه دینور صلح مغاسنه شارح قاموسک بیاننه کوره
 تأیثی نقیضی اولان حرب لفظنه حمل ایله در (شعیر) آریه دینور (شام)
 شامیه دینور (صلیف) بیونک ایننه دینور عرض العنق مغاسنه (صدا)
 چاغردقه طاغ و کنبه امثالندن منعکس آوازه ورأسک ایچنده اولان
 حشو واجزاسنه و دماغه دینور (ضحی) قوشلق و قته دینور تصغیرنده
 ضحوه نك مصغیرینه ملتبس اولسون ایچون هاسز اوله رق ضحی دینور
 وضی کونشه دخی اطلاق اولنور لکن بومعاده همیشه مؤنثدر (طریق)
 یوله دینور (طاووس) معر و قدرکه قنادلری مزین قوشدر طاووس قوشی
 دینلور (ظهر) اویلان و قته دینلور (عجز) برسنه نك کیروسنه دینور
 مؤخر الشی مغاسنه یقال رکب عجز البعیر ای مؤخره (عنق) بیونه دینور
 عشا کیجه قرا کولغنک اولنه دینور (فضا) ساحه و میدانه و ککیش صحرايه
 دینور (فسا) فاس الکاسنده بربلده در (فهر) فانک کسریله جویز
 قیره جق مقداری اولان صخره یعنی طاشه دینور (قشام) مائده دن
 سفرده قالان بقیه دینور (قلب) قیویه دینور (کحل) کافک فتحیله
 قتلق سنه دینور و سمایه دخی دینلور و کافک ضمیله سورمیه دینور (لیث)
 ارسلانه و برنوع اورمحکه دینور (لسان) آلت قول اولان جارحه
 مخصوصیه دینور که دل تعیر اولنور (لیل) کیجه دینور (منون) دهر
 وزمانه دینور و موته یعنی اولومه دخی دینلور (مسک) طیب معروفدر
 (نوی) خورما چکر دکنه دینور یقال اکلت التمرة و لفظت نواها (نخل)
 خورما اغاجنه دینور مذکر و مؤنث استعمال اولنور (نخل منقعر) و

(نخل خاویة) قول شریفنده اولدینی کبی بوکی لرده ولان قاعده جاریه سابقا کجدی (واسط) بعض قریه و محل آیدر اسماء بلدانک بقعه اعتباریله مؤنث و موضع اعتباریله مذکر استعمال اولنه جنی ایسه مرور ایلدی و قبیله اسملریده قبیله اعتباریله مؤنث استعمال اولنه ییلور.

بیت سماعا واجب التائیت ایله جائز اولانی بیل
دکلسه یازدیغم کلی بولنمق غیریده مشکل

درس ۱۶۷

(مبحث مثنی) مثنی اسم تنیه دیمکدر مثنی نك تعریفنده (مالحق آخره) الف اویاء مفتوح ماقبلها و نون مکسورة لیدل علی ان معه مثله من جنسه (دنیلور یعنی مثنی شول بر اسم تنیه درکه مفردینک آخرینه اول مفرد ایله جنسنندن بر مثلنک بولندیغنه دلالت ایتسون ایچون الف و یاخود ماقبلی مفتوح یا ایله برده نون مکسوره لاحق اولور جائی مسلمان و رأیت مسلمین و مررت بمسلمین قولار مرزده مسلمان و مسلمین کبی شو تعریفدن مستبان اوله جنی اوزره مفاد مثنی اولان شیئن بر جنسندن بولنوب معینین مختلفین اولما ملیدر شو صورتده (طهر) و نقیضی بولنان (حیض) مغالرینه آریجه و ضعلرایله موضوع مثلاً قرء لفظنک تنیه سی بولنان (قرآن) ایله طهران و یاخود حیضان مراد اولنور یوخسه طهر ایله حیض مراد اولنمز.

اب ایله ام ده (ابوین) و شمس ایله قرده (قرین) دینلمسیله اعتراض اولنه مرزیرا اب ایله ام و شمس ایله قر بیننده مناسبت کامله بولنمغله جانب مذکر جانب مؤنثه تغلیب اولنهرق (ام) ادعاء اب و (شمس) ادعاء قر تسمیه اولنوب مثنی قیلنمشلردر بوکی تنیه لرك افرادی تغلیب و ادعا ایله بر جنسنندن اولمش اولور.

و علملرك تنیه و جمعلریده المسمى بهذا الاسم اعتباریله نکره قیلنوب امرین و یا امور متعددهیه متناول بر مفهوم تحصیل ایلمکله در مثلاً زیدان شو اسم ایله مسمى ایکی ذات وزیدون شو اسم ایله مسمى ذاتلر دیمکدر. ذکر اولنان شو اشتراك معنوی اعتباریله تنیه نك صحتنده شبهه یوق ایسه ده

لكن محل نزاع مجرد اشتراك لفظی اعتباریله جواز تشبیه در که مثلا آنفا
 مرور ایدن (قرآن) ایله حیض ایله طهر مراد ایده بیلیمکدر بونک مثلی
 ایسه کلام عربده بالاستقراء بولنماغله جمهور حنفیه و علامه مدقق ابن
 حاجب حضرتلری تجویز بیور مامشلدردر .

لكن نجاتدن جزولی واندلسی وابن مالک مجرد لفظده اتفاق بولنماغله تشبیه
 وجمعی اعتبار ایلمشلدردر و مثلاً قرآن ایله حیض و طهر مراد ایدیله بیلیمکی
 تجویز ایتمشلدردر واندلسی (عین شمس) و (عین میزان) مراد اولنه رق
 عینان دنیلور دیمشدر .

بونلرک ذهابی امام شافعی رحمه اللهک شوذها بلرینه قریب در که اسماء
 مشترکه بر لفظ عمومله واقع اولسه مثلاً (الاقراء حکمها کذا) قولمزده
 اقراء کی ویاخود غیر موحیده واقع نکره کی موضع عمومده واقع اولسه
 مثلاً (مالقیت عینا) قولمزده عین کی بونلر جمیع مدلولات مختلفه لرینه عام
 و شامل اولور دینلمشدر . جمهور حنفیجه شو قوللر مزده اقراء ایله
 حیضلر ویا طهرلر و عین ایله معانی موضوعه سیندن متکلمک مطلوبی
 اولان معنائک هر بر فردی اراده اولنور ویاخود اقراء ایله قرء اسمیه
 مسمی اولانلر و عین ایله عین اسمیه مسمی هر بر فرد مراد اولور
 فافهم ان کنت من اهل النبی و لیس للانسان الا ماسعی .

درس ۱۴۸

تشبیهلرک اکثرینک تعریف مثلی ایله حکمی معلوم اولوب انحق آخرنده
 الف مقصوره ویا ممدوده بولنان کلهلرک تشبیهلری اخذ اولندیغنده آخزلرینه
 بعض تغیر تطرق ایلدیکی جهتله آنلرک کیفیت تشبیه سیندن محملابحث ایلیه جکیز
 آخرنده الف مقصوره بولنان بر اسمک تشبیه سی اخذ اولنمق مراد
 اولندیقدن نظر اولنور اسم مزبور اکراوچ حرفلی اولوب وحرف ثالث
 بولنان الف مقصوره حقیقه و اودن منقلب ایسه مثلاً عصا لفظی کی ویاخود
 و اویمیدر یایی میدر بیلنمیوب و اماره (یا) اولان اماله دخی مسموع اولمیه رق
 و او ی حکمنده ایسه مثلاً بر شخصه علم قیلنمش فدا وزننده الی لفظی کی

شوايکي تقديرده حين تشيهده اعتباراً للاصل الف واوه قلب اولنور
عصا والى لفظلرينك تشيه سنده عصوان والوان دينور. واکر وجه
مذکور اوزره اوليوب حقيقه يادن منقلبه ايسه مثلاً رحي لفظی کي
وياخود واوميدريايي ميدري بيلنميوپ لکن اماله مسموع اوله رق وياخود
اصليه اولوب واماله دخي بولنه رق حکما يائی ايسه مثلاً عددن فرد
معناسنه عصا وزنده اولان خسا وبرشخصه علم قيلنان متي لفظلری کي
بونلرده اعتباراً للاصل حين تشيهده الف يايه قلب اولنور رحي وخسا
ومتی لفظلرينك تشيهلرنده رحيان وخسيان ومتيان دينور.

واکراسم مزبور درت حرفلی ودها زياده اولور ايسه لاجل التخفيف
کذا حين تشيهده مطلقاً الف يايه قلب اولنور مثلاً حبل وحنطی وقبعثری
ومصطفى ومرتضى لفظلرينك تشيهلرنده حبلان وحنطيان وقبعثيان
ومصطفيان ومرتضيان دينلور.

وآخرنده الف ممدوده بولنان براسمك تشيهسي اخذ اولنق مراد اولندقدہ
کذا نظر اولنور اکر همزهسي اصليه اولور يعني زائده اولمز ويا برزائده
ويا اصليه دن منقلبه بولمز ايسه حين تشيهده عل الاشهر ثابت اولور مثلاً
قراءتی حید وکوزل اولان کيمسهيه دينلان قراء لفظی کي که تشيه سنده
(قراء آن) دينلور وابوعلى بعض عربدن همزهني واوه قلبله قراوان دخي
دينلديکني حکايه ايتمشدر. واکر همزهسي تأنيث ايچون اولوب يعني الف
تأنيثدن منقلبه بولنور ايسه واوه قلب اولنور حمراء کي تشيه سنده حمراوان
دينلور همزه نك واوه قلب اولنمسي حرف ثقیل اولمقدہ واوه قرينتي اولمسي
جهتله در نته کيم شو مناسبندن ايچون بعضيده واو همزهيه قلب اولنمشدر
توقيتدن ماضی مجهولده وارد اوقت ووجهك جمعی اجوه کلهلری کي.

واکراخرنده الف ممدوده بولنان اسمك همزهسي اصليه اوليوب وتأنيث
ايچون دخي اولمز بلکه يا الحاق ايچون اولور وياخود واو ويايای
اصليهلردن منقلبه بولنور ايسه شوصورتلرده حين تشيهده همزهني اثبات
ايتمک وياخود همزهني واوه قلب ايلمک يعني شوايکي وجه جائز اولور
علماء لفظی کي که همزهسي قرطاس لفظنه الحاق ايچون کتورلشدر واودن

ویا خود یادن منقلبه در وکساء لفظی کبی که اصلی کساو اولوب همزه سی واو اصلیه دن ورداء لفظی کبی که اصلی ردای اولوب همزه سی یای اصلیه دن منقلبه در بونلرک تنیه سنده همزه ایله غلباء آن وکساء آن ورداء آن دینلمک و همزه بی واوه قبله غلباوان وکساوان ورداوان دینلمک جائزدر.

اثبات همزه نك جوازی زیرا غلباء نخونده همزه مثلاً قرطاس لفظنده حرف اصلی یه مقابله الحاق ایچون کتورلمش وکساء ورداء نخونده ایسه حرف اصلی دن منقلبه بولنش اولمغله اصلیه حکمنده طوتیه رق قراء لفظی قیلندن کورملری جهته در.

وهمزه بی واوه قلب دخی جائز اولسی هر نقدر اولسه شو همزه بعینها اصلیه اولماسی جهته حمراء حکمنده کورلمسنددر و بعضیلر کساء ورداء نخونده همزه نك حین تنیه ده یایه قلب اولمنسی دخی روایت و تجویز ایلدیلر. (خفی اولیه که) نون تنیه لاجل الاضافة حذف اولنور زیرا نون تنوین کبی کله نك تمامیت و دیگر برکله دن انفصالی اقتضا ایلر اضافت ایسه آخر ایله امتزاج و اتصالی ایجاب ایدر که شوایکی معنایینده منافات واردر.

وبیلملیدر که تاي تأنیث مثنی ده بعینها ثابت اولور مثلاً شجرة و تمره کله لرینک تنیه سنده شجرتان و تمرتان دینور و اما خصیه والیه لفظلرینک تنیه سنده خلاف قیاس اوله رق تاي تأنیثی حذف ایله خصیان والیان دینلمسی خصیه والیه ایکیشر اولوب یالکز بر یله دیکر سز انتفاع اولنه مامسی جهته احد هانک آخره شدت اتصالی بولمغله ایکی خصیه دن معبر خصیان وایکی الیه دن معبر الیان لفظلری کانه مفرد حکمنده اولسی و تاء تأنیثک بر کله نك حشونده بولند مامسی تصویرینه مبنیدر و مع هذا علی وفق القیاس تاء تأنیث ایله خصیتان و الیتان دخی دینلور و بعضیلر خصیه والیه معنایرنده تاسر اوله رق خصی والی دخی هر نقدر قلیل الاستعمال ایسه ده لغت اولمغله خصیان والیان خصی والی لفظلرینک تنیه سی اولمنسی تجویز ایلمشدر درکه شو صورتده اشکال یوقدر.

درس ۱۶۹

(مبحث جمع) جمع لغتده طاغیق نسنه لری بریکدر مک معناسنه در و مصدر

بمعنی المفعول دخی اولورکه بریکدیر یلمش نسنه و شو جهته جماعته و یوم
قیامته دخی اطلاق اولنور و اصطلاح نمحاطده (مادل علی آحاد مقصوده
بحروف مفرده بتغیر ما) دینه رک تعریف اولنور یعنی حروف مفردیه
بربر مقصود اولان آحاد اوزره بحسب الصوره برتغیره ملتبس اولدینی
حالده دلالت ایلیان اسمدر دیمکدر مثلاً مسلمون و مسلمات کله لری کی که
مسلم و مسلمة لفظلرینک جمعلریدر مسلمون مسلم لفظلیه مقصود آحاد
مذکر جمله سنه و مسلمات مسلمة لفظلیه مقصود آحاد مؤنث جمله سنه دلالت
ایلر و لاجل الجمع کتورلمش واو و نون و الف و تا ایله بحسب الصوره بر
نوع تغیره ملتبس اوله رق صیغه جمع اولمشلردر .

تعریفده ذکر اولنان (تغیر) زیاده و یا نقصان و یا حرکات و سکناتده حقیقه
و یا حکماً اختلاف جهتلیله اولمغه شاملدر مثلاً (مسلمون) و (مسلمات)
و (رجال) و (غرف) و (اسد) و (فلک) کی (مسلمون) مسلم لفظنک
و (مسلمات) مسلمة لفظنک و (رجال) رجل لفظنک جمعیدر که حرف
زیاده ایلمکله اخذ اولمشدر و (غرف) غرقه لفظنک جمعیدر که تایی حذف
و رای تحریک ایله اخذ اولمشدر و (اسد) همزه نك ضمی و سینک سکونیه
و یا خود همزه و سینک ضمیله فتحین ایله اسد لفظنک جمعیدر که یالکیز
حرکات و سکناتده حقیقه برتبدل ایله اخذ اولمشدر بونلرده تغیر بحسب
الظاهر در و اما ضم اول و سکون تایی ایله (فلک) لفظی کذا ضم اول
و سکون تایی ایله فلک لفظنک جمعیدر برونلده مفرد و جمع اوله رق مستعملدر
مفرد اولدقده اولنک ضمه سی قفل لفظنک اولنک ضمه سی کیدر (قفل)
ضم اول و سکون تانیله لفظ مفرد اولوب تیمور کلیده دینور و جمع اولدقده
اولنک ضمه سی اسد لفظنک اولنک ضمه سی کیدر (اسد) ضم اول و سکون
تانیله سبقت ایلدیکی اوزره اسد لفظنک جمعیدر شو جهته فلک لفظنده
حین جمعه حرکات و سکناتده حقیقه برتغیر یوق ایسه ده لکن حکماً وار
کیدر پس تعریف جمعه اولان تغیر بحسب الظاهر و یا بحسب التقدير
اولمقدن اعم اولمش اولور .

خفی اولیه که تعریف مذکورده (مادل علی آحاد) جمله سی جنسدر جمله

واسماء اجناس واسماء جموعه ومثلاً (ثلاثة) (وعشرة) وبوکی اسماء عدده شاملدر
و (مقصودة بحروف مفردة) قولنر فصل اولوب جمعك غيرني اخراج ایلر
زیرا اسم جنس واسم جمعك مفردی اولیوب کندیلرینه مفرد ضمیری
ارجاع اولنسی کندیلرک مفرد اولملرینه دلیل باهردر ومثلاً قمر لفظنک
وراکب ركب لفظنک مفردی دکدر انجق صادق اولدقلری آحاددن
برواحد موضوع لفظلردر واسماء عددک ایسه لفظلردن هرکز مفردی
اولیوب تعریف مذکور افرادینی جامع واغیارینی مانعدر .

اسماء اجناس واسماء جموعدن هیچ برینک جمع اولمدینی مذهب سبویه درکه
اکثر نحاس بورای اوزره اولوب واصح اولان دخی بودر واما اخفش
جامل و باقر و طلب و رکب و صحب کی لفظندن واحدی اولان اسماء جموعک
جمع اولملرینی مثلاً جامل جمل و باقر بقر و طلب طالب و رکب راکب و صحب
صاحب لفظنک جمعی اولسنی اختیار ایلدی واما اسماء اجناسک ومثلاً ابل
وخیل وغنم کی لفظندن واحدی اولیان اسماء جموعک جمع اولماسنده
سبویه موافقت ایلدی .

ونحادن امام فرا لفظندن واحدی اولان اسماء جموعله برابر مثلاً
قمر وقمره وروم ورومی کی کندیله واحدی یینی تا ویاخود یا ایله فرق
اولنان اسماء اجناسک دخی جمع اولسنه ذاهب اولمشد لکن اصح اولان
ذکر اولندینی اوزره بونلرک بریسی جمع دکدر و آنفا اشارت اولندینی
اوزره مثلاً قمر لفظنک وراکب ركب لفظنک مفردی اولیوب آنجق
واحد موضوع لفظلردر واسماء اجناس واسماء جموعه ضمائر مفردنک
صحت ارجاعی مفرد اولملرینه دلیلدر . وحابوکه ذکر اولنان اسماء اجناس
واسماء جموع جمع اولسه لر جمع قلة اوزان مخصوصه اوزره کلدیکنندن
وبونلردن بریسی اول وزنده بولمقدقلردن نهایت جمع کثرة اولورلر ایدی
جموع کثرت ایسه تصغیر اولندقدده واحدینه رد اولسنه رق تصغیر اولنور
ونسبتده دخی کذا واحدینه رد ایدیلور بونلرده ایسه حین تصغیر ونسبتده
اوله بررد غیرمتصوردر شوماده لر ایسه قویاً مفرد اولملرینی مؤیددر .

خفی اولیه که تعریف مذکور ایله معرف اولان جمع ایکیدن خالی دکلدر
یا جمع مصحح و یا خود جمع مکسرر اولور و جمع دیگر جهتهله دخی جمع
کثرت و جمع قلة شقلرینه تقسیم اولنور (الجمع المصحح) بوده ایکی قسمدر که
یا جمع مذکر مصحح و یا خود جمع مؤنث مصحح اولور (جمع مذکر
مصحح) (مالحق اخره و او مضموم ماقبلها و ایاء مکسور ماقبلها و نون
مفتوحة یبدل علی ان معه اکثر منه) دینه رک تعریف اولنور یعنی جمع
مذکر مصحح مفردینک آخرینه حالت رفعده ماقبلی مضموم و او
و حالت نصب و جرده ماقبلی مکسور یا ایله و هر حالده برده نون مفتوحة لاحق
اولان اسمدر تا که شو لحوق مفردیله بیله بر مثلندن اکثری بولندیغنه
دلالت ایله جاءنی مسلمون و رأیت مسلمین و مررت بمسلمین قوللرمزده
مسلمون و مسلمین کی .

خفی اولیه که جمع مذکر مصحح قیلنه حق اسمک آخرنده ملفوظ
و یا خود مقدر اوله رق ماقبلی مکسور یا حرفی بولنور ایسه مثلاً القاضی
وقاض کی حین جمعه حذف اولنور القاضی وقاض کلمه لرینک جمعنده
حالت رفعده القاضون وقاضون و حالت نصب و جرده القاضین وقاضین
دینور و اگر آخرنده الف ممدوده بولنور ایسه مثلاً بر رجله علم قیلنان
ورقاء کی حین جمعه الف ممدوده و او قلب اولنور و رقاء لفظنک
جمعنده و ورقوون و ورقوین دینور و اگر آخرنده الف مقصوره بولنور
ایسه مثلاً مصطفی کی حین جمعه التقاء ساکنیندن ایچون الف مقصوره
حذف اولنور و الف مقصوره یه دلالت ایتمسون ایچون ماقبلی مفتوح
اوله رق قالور مصطفی لفظنک جمعده مصطفون و مصطفین دینور .

ویلمیلدر که جمع مذکر مصحح اخذ اولنه حق اسم مذکر ایکیدن خالی
دکلدر یا اسم غیر صفت و یا خود صفت اولور اسم غیر صفت اولور ایسه
جمع مذکر مصحح اخذینک حتی اوج شرط ایله مشروطدر شرط اول
مذکر اولمیلدر شرط ثانی عام اولمیلدر شرط ثالث عاقل اولمیلدر پس (عین)

و (مرأة) و بر فرسه علم اوله رق (اعوج) لفظ لری جمع مذکر مصحح ایله جمع اولنه من و بیلملیدر که بو راده مذکر ایله مراد کرک ملفوظ و کرک مقدر اوله تاء تأییدن مجرد اولمقدر پس مذکر عاقله علم اولوب فقط آخرنده بوانسان مثلاً (طلحة) لفظی تادن مجرد اولما مغله جمع مذکر مصحح ایله جمع اولنه من بلکه الف تا ایله جمع اولنه رق طلحات دینور لکن کوفیلر و ابن کیسان جمع مذکر مصحح ایله جمع اولنسنی تجویز ایلدیلر انجق کوفیلر سکون لامله طلحون و طلحین دیدیلر و ابن کیسان فتح لامله ثبت ایلدی. و اما مذکر عاقله علم قیلنه رق مثلاً (ورقاء) و (سلمی) کیلرک جمع مذکر مصحح ایله جمع اولنملری جائزدر زیرا علامت تأییدیه اصل اولان (تا) اولوب الف اولما مغله الف جمع مذکر مصحح ایله جمعی منع ایده من حالبوکه جمع مذکر مصحح اخذنده الف ممدوده و اوه قلب اولنه جغندن علامت تأیید اولمق صورتی محو اولمش اولور و اگر الف مقصوره ایسه بالکلیه حذف اولنور.

اشته بر اسمده اشبوذکر اولنسان شروط ثلثه تحقق ایلدکده جمع مذکر مصحح ایله جمع اولنسنی جائز اولور مثلاً زید و وورقاء و مصطفی کبی جمعلرنده زیدون و وورقوون و مصطفون دینور کما سبق.

و اگر (جمع مذکر مصحح اخذ اولنه حق) اسم صفت اولور ایسه مثلاً اسم فاعل اسم مفعول کبی جمع مذکر مصحح اخذینک صحتی بش شرطله مشروط اولوب بری وجودی دردی عدمیدر.

(شرط اول) وجودیدر که مذکر و عاقل اولمیلدر پس مثلاً صافن و صاهل امثالی بو جمع ایله جمع اولنه من.

(شرط ثانی) مذکر و عاقل اولمغله بیله افعول فعلاء اولما ملیدر یعنی مذکر و مؤنثی ایچون آریجه صیغله موضوع اوله رق مذکری افعول وزننده و مؤنثی فعلاء وزننده اولان بر صفت اولما ملیدر مثلاً احمر حمراء کبی بو کیلره بین النحاح افعول صفت دینلور جمع مذکر مصحح ایله جمع اولنه من زیرا افعول تفضیل جمع مذکر مصحح ایله جمع اولنور که مثلاً انصر کله سنک جمعیده انصر و ن دینلور و اگر افعول صفت دخی جمع مذکر مصحح ایله

جمع اولنسه افعلى تفضيله التباس لازم كلور ايدى واكر ئىچون برعكس اولمدى دىنلور ايسه زياده يه دالالتدن اىچون افعلى تفضيله معناى صفتك اكمل اولمى جهتله اشرف جموعى احرازه افعلى صفتدن اليق بولمىسيله جواب ويريلور .

(شرط ثالث) فعلى دخى اولمامليدر يعنى مذكر ومؤنثى اىچون كذا آريجه صيغله موضوع اوله رق مذكرى فعلى وزنده ومؤنثى فعلى وزنده اولان برصفت اولمامليدر مثلا سكران كى بوكيلر اشبو جمع ايله جمع اولنه من زيرا مثلا ندمان ندمانه كى مذكرى فعلى ومؤنثى فعلى وزنده اولان صفتلر اشبو جمع ايله جمع اولنديغندن اكر فعلى وزنده اولنلر دخى اشبو جمعه جمع اولنسه التباس لازم كلور ايدى وبرعكس اولمامسى زيرا مذكر ايله مؤنث بىنى (تا) نك وجود وعديله فرق اولنمق اصل اولوب فعلى فعلى وزنده بولنلر ايسه شواصل اوزره بولندقلرندن اشرف جموعى احرازه اخرى بولمىشلردر .

(شرط رابع) مذكر ايله مؤنثه على السويه اطلاق اولنان صفت دخى اولمامليدر مثلا صبور وجريح كى رجل صبور وجريح وامرأة صبور وجريح دىنلور بوكيلرك مذكر ومؤنثدن برينه اختصاصى اولمديغندن نه اشبو جمع ايله ونه ده الف تا ايله جمع اولنلرى استحسان اولنمامشدر بلكه مناسب اولان مذكر ايله مؤنث ينه مستوى اوله حق برجمعه جمع اولنمقدركه صبور وجريح كلهلرينك جمعه صبر وجريح دىنلور .

(شرط خامس) تاى تائينه ملتبس دخى اولمامليدر علامه ونسابه كى زيرا جمع مذكر مصحح ايله تاى تائينك اجتماعى كرىه كورلديكندن و تاى تائينك حذفده التباس محذورى بولنديغندن بوكيلر دخى اشبو جمعه جمع اولنه من واما اشبو شروط مذكوره يه موافق اولان صفتلر مثلا ناصر ومنصور ونصار وانصر وحسن وندمان كى اشبو جمعه جمع نورلر سنه وارض لفظلرينك جمعه بولنده تذكير وعقل منتفى اولوب علم وياخوه صفت دخى اولمقلرى حاليه مسموع اولان سنين وارضين و بوكيلر شاه

اولمغه قاعده مبسوطه مزه مغل دکلر و بيلمليدركه اشبو نون جمع دخي
تثيه نوننده ذكر اولنان علتدن ايچون لاجل الاضافة حذف اولنور .

درس ۱۷۴

و اما (جمع مؤنث مصحح) (مالحق آخره الف وباء) دينهرك تعريف
اولنور يعنى جمع مؤنث مصحح مفردينك آخريته الف و تا لاحق اولان
اسمدر ديمكدر مؤنثات و مسلمات كې كه مؤنثه و مسلمة كلهلرينك جمعليدرك
بركلهده ايكي غلامت تانيث جمع اولماق ايچون حين جمعده مؤنثه و مسلمة
كلهلرينك آخرنده اولان تا حذف اولنهرق پس اشبو جمع ايله جمع
اولمشدر .

خفي اوليه كه جمع مؤنث مصحح اخذ اولنه حق اسم مؤنث صفت اولوب
و برمذكري بولنور ايسه اول مذكر واو و نون ايله جمع اولنور برمذكر
اولمليدرك مثلاً ناصرات و منصورات و نصارات و نصريات و حسنات و ندمانات
كې كه ناصرة و منصورة و نصارة و نصري و حسنة و ندمانة افظلرينك
جمعليدرك مذكرلري ناصر و منصور و نصار و انصر و حسن و ندماندركه
جمع مذكر مصحح ايله جمع اولنورلر و اما مذكري افعال و زتنده اولان
فعلاء موزوني و مذكري فعالان و زتنده اولان فعلى موزوني مثلاً حمراء
وسكري كې و مذكر ايله مؤنث كندنده مستوي بولنان مثلاً صبور و جريح
كې بولنر مذكرده جمع مصحح ايله جمع اولنيه جقلىرندن فرعك اصل
اوزره مزيتي لازم كلامك ايچون مؤنثده دخي جمع مصحح ايله جمع اولنزلر
لكن نحاتدن ابن كيسان افعال فعلاء و فعالان فعلى موزونلرنده مذكرلرنده
واو و نون ايله جمعي تجويز ايلديكي كې مؤنثلرنده دخي الف تا ايله جمعي
تجويز ايلمشدر و بيلمليدركه غلبه اسميه ايله بالاتفاق جائز اولور نته كيم
عليه الصلوة والسلام افندمرك (ليس في الخضر اوات صدقة) قول شريفنده
شواجلدن خضرء كلمه مي الف تا ايله جمع اولمشدر .

واكر جمع مؤنث مصحح اخذ اولنه حق صفتك واو و نون ايله جمع اولنور
برمذكري يوق ايسه كنديسي تاي تانيثدن مجرد اولماق شرطدر پس

حائض وطالق نحوی الف تا ایله جمع اولمز زیرا حائضه وطالقه الف تا ایله جمع اولندیغندن اگر حائض وطالق دخی الف تا ایله جمع اولنسه التباس لازم کلور ایدی بلکه جمعلرنده حوائض و حیض وطوالق دنیلور و اگر جمع مؤنث مصحح اخذ اولنه حق اسمده معنای وصفیت اولمز ایسه ابن حاجب حضرت تلرینک بیان ایلدکلری اوزره مطلقا الف تا ایله جمع اولنورلر مثلاً حمزه و طلحه و زینب و صحراء و سلمی کبی جمعلرنده حمزات و طاهحات و زینبات و صحروات و سلموات دنیلور لکن شیخ رضی اشبو اطلاق بکنمیوب مثلاً نار و شمس کبی مؤنث سماعی اولوب تائیتی غیر حقیقی بولسانلرده تائیت حقیقی اولمیوب و ظاهراً علامت تائیت دخی بولندیغی جهته تائیتک خفی اولمسندن ایچون الف تا ایله جمع مطرد اولمیوب مثلاً سموات و کائنات کبی سماعی اولسنی اختیار ایلمشلردر .

وخفی اولیه که جمع تکسیری اولیان (اسم جنس مذکر لایعقل) غالباً الف تا ایله جمع اولنور حمامات و سرادقات کبی و حرفلری اضلی اوله رق هر بر اسم خماسی دخی تکسیری اولمدقچه الف تا ایله جمع اولنور سفر جل کبی که جمعه سفر جلالت دینور و اما اگر جمع تکسیرلری بوانور ایسه اشبو جمع ایله جمع اولمز لر مثلاً جوالق کله سی کبی که حییمک و لامک کسر یلدر و حییمک ضمی و لامک فتحی و کسر یلده لغتدر چواله دینور جمع تکسیر اوله رق جمعه مساجد و مصاییح و زلرنده جوالق و جوالیق کله کله ارتق الف تا ایله جوالقات دینلمز .

وبیلملیدر که جمع تکسیری مسموع اولیان جمعلر دخی غالباً الف تا ایله جمع اولنور لر مثلاً رجالات و صواحبات و بیوتات کبی و اما مثلاً کلبک جمعی اولان اکلب لفظنک جمعه جمع تکسیر اوله رق اکالب وارد اولمغه اکلبات دینلمز .

وبیلملیدر که حرفلری اصلی اوله رق هر بر اسم خماسی که صفت واقع اولوب کړک مذکر و مؤنث بیننده مشترک اوله صه صلق کبی و کړک مؤنثه مختص اوله جیحمرش کبی جمع تکسیرلری مستکره اولمغه الف تا ایله جمع اولنور لر صه صلق چاغراغان اولان قوجه هر یف و قوجه عورته دینور و جیحمرش پک یاشلو قاری یه دینور .

و (دخی مذکر لایعقلک صفتی) مطرداً الف تا ایله جمع اولئور کړک
مذکر حقیقی اوله صافن و صاهل و سبجل و سبطر کبی جمعلرنده صافنات
و صاهلات و سبجلات و سبطلرات دینلور و کړک مذکر غیر حقیقی اوله ایام
خالیات قولزده خالیات کبی که خالی لفظنک جمعیدر و اوائل کتابده مرور
ایلیان المرفوعات و المنصوبات و الحجر و رات دخی بوقیلندر که مرفوع
و منصوب و مجرور لفظلرینک جمعلریدر نته کیم عبدالرحمن جامی حضر تلری
کافیه شرحنده اشارت بیور مشلردر و اما عقلایه صفت قیلنه رق مثلاً نسوة
مرفوعات و منصوبات او مجروراة دینلسه مرفوعة و منصوبة و مجرورة
لفظلرینک جمعی اولورلر .

و بیللملیدکه غیر عقلانک مصغرلری دخی مصغرده معنای وصف بولنغله
الف تا ایله جمعلورلر مثلاً جمیلات و حمیرات کبی فافهم بوندن زیاده تفصیلاته
خواهشکر اولانلرک شیخ رضی یره مراجعت ایلملری لازمدر .

درس ۱۷۲

(الجمع المكسر) جمع مکسر و جمع تکسیر دینلان مفردینک صیغه سی
تحصیل جمعیت ایچون حقیقه و یاخود حکماً متغیر و منکسر بولنان جمعلردر که
(ما تغیر بناء واحده) دینمکه معرفدر رجال و افراس و غلمان و اسد
و غرف و فلك و هجان کبی (رجال) رجل و (افراس) فرس و (غلمان) غلام
و (اسد) و (اسد) و (غرف) و (غرفه) و (فلك) قفل و زننده
ینه بو وزننده فلك و (هجان) کتاب و زننده ینه بو وزننده هجان لفظنک
جمعلریدر رجال و افراس و غلمان و اسد و غرفده واحدلرینک بناسی حقیقه
متغیر اولمش فلك و هجانده حکماً متغیر بولنمشدر زیرا فلك کله سنک اولنک
ضمه سی مفرد اولدقده سابقاً ذکر اولندیغی اوزره قفل کله سنک اولنک
ضمه سی کیدر و جمع اولدقده اسد کله سنک اولنک ضمه سی کیدر و هجان
کله سنک اولنک کسره سی مفرد اولدقده کتاب کله سنک اولنک کسره سی
کیدر و جمع اولدقده رجال کله سنک اولنک کسره سی کیدر و بیللملیدر که
جمع مصححده مفردینک صیغه سی متغیر و منکسر اولیوب آنجق آخرینه

خارجا جمع ایچون کتوریلان حرفلرک لحوقیله برتغیر تطرق ایلدیکندن
 ومصطفون نخونده هر قدر مفردینک نفسنده عروض تغیر مشاهده اولمقده
 ایسهده شو تغیر تحصیل جمعیت ایچون اولیوب آنجق بعد حصول الجمعیه
 لازم کلدیکندن جمع مصحح اولوب بوکیلر جمع تکسیر تعریفدن خارجدر
 جمع مصحح وجمع مکسر معلوم اولدی ایسه خفی اولیه که جمع دیگر جهتلهده
 جمع کثرت وجمع قلت قسملرینه منقسمدر (الجمع القلة) جمع قلت اوچدن
 اونه قدر افراد اوزره اطلاق اولنه بیلان جمعلردر که اوزان مخصوصه اوزره
 کلملردر اول وزنلر افعال وافعاله وفعلة در افلاس وافراس وارغفة
 وغلمة کی که فلس وفرس ورغیف وغلام کله لرینک جمعلریدر نته کیم
 بریت فارسی ایله شو وزنلر بیان اولمشدر بیت جمع قلت چار باشدر
 وزان نحو یان افعال فعله هم بوزن افعله نحاتدن فراء فتحین ایله فعله
 وزنده بولنان جمعلر دخی جمع قلتدر دیمشدر و بوکاعر بلرک (هم اكلة راس)
 قوللریله استدلال ایلمشدر که مفادی آنلر آنجق بر باشی اکل ایدیجیلردر
 دیمکدر که آزلقلرندن بررأسک کفایت ایده جکنی مشعردر لکن فر آنک بونکله
 استدلالی هیچ برشی دکدر دینلمشدر زیرا شبو قلت فعله وزنده (اکلة)
 کله سنک خصوصیتدن ناشی اولیوب آنجق بررأسی اکل ایده بیللمندن
 مستبان اولمشدر ونحاتدن تبریزی افعلاء وزنده اوللری دخی جمع قلة دن
 قلمشدر مثلاً اصدقاء کی و بعض نحات وأحدینک متغیر اولماسی جهتله
 تشبیه مشابهنندن ایچون جمع مصححی دخی جمع قلتدن عد ایلدیلر ابن
 حاجب حضرتلری دخی کافیه سنده اشبو مسلکه سالک اولمشدر ونحاتدن
 ابن خروف جمع کثرت ایله جمع قلت ییننده مشترک اولسنی اختیار ایلمشدر
 وشيخ رضى تشبیه لفظاً مشابهنه معنأ دخی مشابهنی اقتضا ایلمز دیوب
 اصح اولان مطلق جمع ایچون اولوب قلت وکثرته صالحدر دیدی واما
 اوزان اربعة متقدمه نك قلته اختصاصی اوچدن اونه قدر عددلرک تمیزنده
 غلبة وقوعلریله وبالاستقراء معلوم ومستدلدر (الجمع الکثرة) جمع قلت
 وجمع مصححک غیري جمعلرک کافیه سی جمع کثرتدر که اوندن یوقاری
 افراده دخی اطلاق اولنورلر.

وبيلمليدرکه جمع قلت و جمع کثرتدن هر بری ديکريک و جوديله بيله بعض ديکرندن ايجون دخی استعاره اولنه بيلور مثلاً ثلثة قروء قول شريفنده اولديغي کي که قرء لفظنک جمع قاتی اولان اقراء و ارايکن جمع کثرتی اولان قروء ذکر اولنوب ثلثة عددينه تميز قيلنمشدر وبيلمليدرکه جمع کثرت يکرمی ايکی وزن اوزره بولنمشدر.

(اولکيسي) فعلدر فانک ضمی وعينک سکونيله حمرکي احمرنک مؤنثدر.
(ايکنجيسي) فعالندر فانک ضمی عينک سکونيله غفران کي غفير لفظنک جمعيدر.

(اوچنجيسي) فعالندر فانک کسری عينک سکونيله غلمان کي غلام لفظنک جمعيدر.

(دردنجيسي) فعلی در فانک فتحی وعينک سکونی و آخرنده الف مقصوره ايله جرحی کي جريح لفظنک جمعيدر.

(بشنجيسي) فعلدر فانک کسری عينک فتحيله فرق کي فرقه لفظنک جمعيدر
(التنجيسي) فعالدر فانک ضمی عينک تشديديله صوام کي صائم لفظنک جمعيدر
(يدنجيسي) افعلاء در همزه نك فتحی وعينک کسری و آخرنده الف ممدوده ايله اولياء کي ولی لفظنک جمعيدر.

(سکزنجيسي) فعلدر فانک ضمی وعينک فتح و تشديديله حيض کي حائض لفظنک جمعيدر.

(طقوزنجيسي) فعالدر فانک کسریله رجال کي رخل لفظنک جمعيدر.
(اوننجيسي) فعلدر فانک ضمی وعينک فتحيله غرف کي غرفه لفظنک جمعيدر.
(اونبرنجيسي) فعلة در فتحاتيله نصره کي ناصر لفظنک جمعيدر.
(اون ايکنجيسي) فعلة در فانک ضمی وعينک فتحيله قضات کي اصلي قضيه در يا الفه قلب اولنمشدر قاضي لفظنک جمعيدر.

(اون اوچنجيسي) فعلة در فانک کسری وعين و لامک فتحيله قرطه کي قرط لفظنک جمعيدر قرط کوبه يه دينورکه قولاغه آصيلور.
(اون دردنجيسي) فعالدر فانک فتحی و آخرنده الف مقصوره ايله يتامی کي يتيم لفظنک جمعيدر.

(اون بشنجیسی) فعل در فانك فتحیه عید کی عبدلفظنك جمعیدر .
 (اون التنجیسی) فعول در فانك ضمیله وجوه کی وجهلفظنك جمعیدر .
 (اون یدنجیسی) فعلاء در فانك ضمی وعینك فتحیه ظرفاء کی ظرف
 لفظنك جمعیدر .
 (اون سکننجیسی) فعالی در فانك ضمی و آخرنده الف مقصوره ایله
 اساری کی اسیرلفظنك جمعیدر .
 (اون طقوزنجیسی) صیغه منتهی الجموع اوزره اولاندر مثلاً عوامل
 و ترائب و ضنادید و کراسی و مصابیح و مساجد و اناعم و اکابر کی فواعل
 و فعائل و فعالیل و فعالی و مفاعیل و فاعیل و فاعل و زلرنده ، عامل ،
 و ، تریه ، و ، صندید ، و ، کرسی ، و ، مصباح ، و ، مسجد و انعام ، و ، اکبر
 لفظلرینك جمعلریدر (یکرننجیسی) فعلی در فانك کسری وعینك سکونی
 و آخرنده الف مقصوره ایله ظرفی کی ضربان لفظنك جمعیدر .
 (یکرمی برنجیسی) فعل در ضمتین ایله اسد کی اسدلفظنك جمعیدر و حمر
 وزنی اوزره دخی واردز نته کیم مراراً مرور ایلدی .
 (یکرمی ایکننجیسی) مفعولاء در مشیو خاء کی شیخ لفظنك جمعیدر .

درس ۱۷۳

خفی اولیه که بر عامل یعنی ، فعل ، و یا خود فعله مشابه بولنان که مثلاً ، اسم فاعل
 ، اسم مفعول ، صفت مشبیه کی بولنن یابر اسم مظهره و یا خود بر ضمیره
 اسناد اولنقدن خالی دکلدر اسم مظهره اسناد اولنور لر ایسه اول اسم مظهر
 کرک مفرد و کرک تنیه و کرک قننی بر جمع واقع اولور ایسه اولسون کنندینه
 اسناد اولنان عاملک یعنی فعل و یا خود مشابه فعلک افراد و غیتی واجیدر .
 فقط اول اسم مظهر اگر مفرد مذکر و یا خود تنیه مذکر و یا خود جمع
 مذکر مصحح اولور ایسه عاملنك مفرد مذکر غائب بولنمی لازم اولور
 ضرب زید و ضرب الزیدان و ضرب الزیدون و اضارب زید و اضارب
 الزیدان و اضارب الزیدون کی . و اگر اول اسم مظهر مفرد مؤنث حقیقی

وياخود تثنیه مؤنث حقیقی و آدمین دن اولوب عاملنه دخی متصل ایسه
 عاملنک مفرد مؤنث غائبه اولسی واجب اولور ضربت هند و الهند ان
 وزید ضاربة جاریته کی. لکن شوصورتده فعل افعال متصرفه دن اولمیدر.
 واکر افعال غیر متصرفه دن اولور ایسه فعل مدح و ذم و فعل تعجب کی
 تذکیر و تأنیث جائز اولور نعم او نعمت المرأة هند کی. واکر اول اسم
 مظهر مفرد مؤنث غیر حقیقی ویاخود مفرد مؤنث حقیقی غیر ادمی ویا
 خود تثنیه مؤنث حقیقی غیر ادمی ویاخود عاملنه غیر متصل بولنور ایسه
 شوصورتلرده عاملک مفرد مذکر غائب ویاخود مفرد مؤنث غائبه اولسی
 جائز اولور (طلعت) او (طلع) ویاخود (اطالعة) او (اطالع الشمس
 او الشمسان و (سارت) او (سار) ویاخود (اسائرة) او (اسائر الناقة
 او الناقان و (جاءت) او (جاء) ویاخود (اجائیة) او (اجاء) القاضی
 الیوم امرأة کی.

واکر اسم مظهر جمع مؤنث مصحح ویاخود جمع مذکر مکسر ویاخود
 جمع مؤنث مکسره اولور ایسه کړک عاقل وکړک غیر عاقل اوله عاملنک
 کذا مفرد مذکر غائب ویاخود مفرد مؤنث غائبه اولسی جائز اولور
 (جاءت) او (جاء) ویاخود (اجائیة) او (اجاء المؤمنات) او ، الصافات ،
 او ، الرجال ، او ، الایام ، او ، النساء ، او ، الانوق ، کی. لکن بونیده بیلمیدر که
 اکر عامل مشابه و موازن فعل اولمز ایسه افراد واجب اولمز (مررت
 برجل قعود غلمان) ترکیبند اولدینی اوزر که غلمان قعود لفظنک فاعلی اولوب
 غلمان غلامک و قعود قاعدک جمع مکسریدر تکسیرایله قعود موازنة فعلدن
 خروج ایلمکه قاعده کلیه مزه مورث خلل دکلدر.

واکر بر عامل ، مضمرة ، یعنی ضمیره اسناد اولنور ایسه اول ضمیر مفرد
 مذکر ضمیری اولوب یعنی ، مفرد مذکره راجع ، ایسه عاملنک دخی مفرد
 مذکر اولسی واکر تثنیه مذکر ضمیری ایسه عاملنک دخی تثنیه مذکر
 اولسی واکر جمع مذکر مصحح ضمیری ایسه عاملنک دخی جمع مذکر
 اولسی لازمدر زید ضرب . اوضارب . والیزیدان ضربا . اوضاربون
 والیزیدون ضربوا . اوضاربون و یزید ضربت اوانت ضارب و (یزیدان

ضربتما او اتما ضاربان و (يازيدون ضربتم او اتم ضاربون و) انا ضربت
او ضارب و (نحن ضربنا و ضارب كى و اكر ، ضمير ، مفرد مؤنث ضميرى
ايسه عاملنك دخى مفرد مؤنث و اكر تشيئ مؤنث ضميرى ايسه عاملنك
دخى تشيئ مؤنث اولسى واجب در هند ضربت او ضاربة و الشمس طلعت
او طالعة و الناقة هربت او هاربة و الهندان ضربتا او ضاربتان و الشمسان طلعتا
او طالعتان و الناقتان هربتا او هاربتان كى .

واكر اول ضمير جمع مذكر مكسر عاقل ضميرى ايسه جمع مذكر سالمك
غيرى هر بر جمع جماعت اعتباريله مؤنث اولغله عاملك مفرد مؤنث و ياخود
جمع مذكر اولسى واجب اولور الرجال نصرت او نصروا و اناصرة
او ناصرون كى .

واكر اول ضمير جمع مذكر مكسر غير عاقل ضميرى اولور ايسه و ياخود
جمع مؤنث مصححه و ياخود جمع مؤنث مكسره ضميرى اولور ايسه كرك
عاقل و كرك غير عاقل اوله لر عاملك مفرد مؤنث و ياخود جمع مؤنث اولسى
واجب اولور الازمن رجعت اور رجعن اور اجمة اور اجمات اور واجع
و المسلمات نصرت اونصرن و اناصرة و اناصرات و انواصر و الصافات
صهلت اوصهالن اوصاهلة اوصاهلات اوصواهل و النساء ضحكت اوضحكن
اوضحكة اوضحكات اوضواحك و العيون ظهرت اوظهرن اوظاهرة
اوظاهرات اوظواهر كى و عليك الاعتبار .

شومحله دكين معرب و مبنى و معمولات و مذكر و مؤنث و تشيئ و جمع و نيجه
فوائد كثيره دن بحث اولندى بوندن بويله دخى اسمدن عامل اولنلرى
بيانله مطلب اسمى تكميل و بعناية الله تعالى مطلب فعله شروع ايله جكر .

﴿ مبحث العامل القياسى ﴾

مقدمة كتابده بيان اولنديغى اوزره عامل قياسى طقوز دانه اولوب بريسى
فعلدركه آندن مطلب فعلده بحث اولنه جقدر و سكر دانه سى اسمدركه آنلر
، مصدر ، اسم فاعل ، اسم مفعول ، صفت مشبهة ، اسم تفضيل ، اسم مضاف ، اسم

مبهم تام و کندیلرده مقدمه ده کوسترلیدی اوزره معنای فعل بولنان کلمه لر
اوله جقدر اسم مضافدن مجرور اتده واسم مبهم تامدن تمیزده واسماء افعالدن
مبحث مبنی ده اوله جقه بحث مرور ایلمکله شوو آراده دیگر لرندن بحث
اولنه جقدر .

درس ۱۷۴

(مبحث المصدر) مصدر لغة مصدر میمی اولوب صدور و یاخود اسم
مکان اولوب محل صدور معناسنه در اصطلاح نحاتده فعل اوزره جاری
اولان حده دلالت ایدن اسم دینورکه (اسم الحدث جاری علی الفعل)
دینمکله تعریف اولنور حدث ایله مراد بر، غیر ایله ، یعنی فاعلیله قائم بر معنا
دیگر فعله انفعاله و فاعلین صادر اوله رق و آنکله قائم و فاعلین صادر
اولیه رق انحق آنکله قائم بولنانلره شاملدر کسر انکسار ضرب مشی
طول قصر حسن قبح کی .

و فعل اوزره جاری اولمسلیله مراد اول حدثن بر فعل مشتق اولوب
و حدث مشتق منه اول فعلی مؤکد و یاخود نوع و یا عددنی مین اوله بیلور
یعنی مفعول مطلق واقع اولسی صحیح اولور بر حدث اولمسیدر مثلاً
جلست جلوساً و جلسته و جلسته قولزده جلوس و جلسته و جلسته کی .

پس و یلاله و و یحاله قولزده اولان ویل و ویج و بوکیلردن بر فعل مشتق
اولسامغله و عالمیت قادریت مسعودیت معموریت کی آخرینه یای مصدر یه
الحاقیله مصدر قیلنلردن اصللری اسم فاعل و یا اسم مفعول اولسی جهته
بر فعل مشتق اولمادیفی کی مفعول مطلق دخی واقع اوله میه جقلرندن
اصطلاح نحاتده بوکیلر مصدرده داخل اوله مز .

بالاده مصدر ایچون ذکر اولنان تعریف بصریلر عننده درکه اشتقاقده
مصدرک اصل اولسنه ذاهیلردر . بصریلر مصدرک اصلته اوچ وجهله
استدلال ایدرلر .

(وجه اول) مصدرک مفهومی واحددرکه حدثدر فعلک مفهومی ایسه
متعدددرکه حدث ایله برابر زمانه دخی دلالت ایدر واحد ایسه متعدددن

اقدام اولمغله مصدر دخی فعلدن مقدم و فعلک اصلی اولمش اولور مصدر
افعالک اصلی اولدقده اسم فاعل واسم مفعول و بوکجه متعلقات افعالک دخی
اصلی اوله جنبی بالبداهه ثابت اولور .

(وجه ثانی) مصدر اسمندر اسم ایسه افاده ده فعلدن مستغنیدر فعلدن
مستغنی بولنان ایسه فعله اصل اولمغه احرادر .

(وجه ثالث) مصدر اسم مکان اولوب محل صدور معناسنده مصدره
مصدر دینمسیده اشیای تسعه نک کنندن صدور ایلمسی جهته در .

لکن کوفیلر مفهوم مصدرک مجرد واحد اولمسی اشتقاقده اصالتی اقتضا
ایتمز واسمک افاده ده فعلدن استغناسی مصدرک اشتقاقده اصالتی مقتضی
اوله مز و مصدر لفظنک مصدر میمی بمعنی المفعول اولمسیده محتملدر دیهرک
فعلک اشتقاقده اصل اولمسنه وجوه ثلثه آتیله ایله استدلال ایتدیلر .

(وجه اول) فعلک اعلالی مصدرک اعلالنه (وجوداً و عدماً مداردر)
اعلالده مداریت ایسه اشتقاقده اصالتی اقتضا ایلر (وجوداً مدار اولمسی
مثلاً بعد کله سنده واو بین یاء و کسره واقع اولمسی جهته حذف ایله اعلال
بولندیغندن مصدری اولان عدة کله سنده دخی واو حذف اولنه رق آندن
عوض اخرینه برتا کتورلمکله اعلال وقوع بولمشدر وقام کله سنده اعلال
بولمغله مصدری اولان قیامده دخی واو یایه قاب اولمغله اعلال بولمشدر
و (عدماً مدار اولمسی) مثلاً یوجل کله سنده واو بین یاء و کسره واقع
اولماسی جهته اعلال بولندیغندن مصدری اولان وجلا کله سنده دخی
اعلال اولنماشدر وقاوم کله سنده اعلال بولنماشله مصدری اولان قوامده
دخی اعلال بولنماشدر .

(وجه ثانی) فعل مصدر ایله تأکید اولنور مثلاً ضربت ضرباً قولزده
اولدینی کبی ، ضرباً ، ضربت مفهومی مؤکد بولنمشدرکه ضربت ضربت
منزلنده در لیکن بونکله تأکید صناعی قصد اولنیوب تأکید اسمی مراد
اولنمشدر و تأکید لفظییه تشبهاشو قولز ضربت ضربت منزلنده در دینوب
فتح کاف ایله مؤکد اولان ایسه مؤکدن اصلدر دینلنمشدر .

(وجه ثالث) مصدر کله سی مصدر میمی بمعنی المفعول اولوب مصدر

معناسنده در فعلدن صدور ایلمسی جهتله مصدره مصدر دینلمشدر مفعول
 موزونلرینک مفعول معناسنده ورودی ایسه کلام عربده شایعدر نته کیم
 مشروب عذب مرکب فاره دیرلر مشروب عذب و مرکوب فاره معناسنده در
 دیدیلر بصریلر دخی شو وجوه دن هر برینی رد ایدرک فعلنده اعلال
 اولمغله مصدرده دخی اعلال بولمق مجرد مشاکلت یعنی مصدر فعلنه
 حذف و اعلالده موافق و مطرد اولمقدن ایچوندر یوخسه مداریتدن
 ایچون دکلدن نته کیم یعد کله سندن بین یاء و کسره واقع اولدینی جهتله
 و او حذف اولندیغندن بین یاء و کسره واقع دکل ایکن اطراداً للباب
 باقی صیغه لردن دخی حذف اولنمشدر و باب افعالدن فعل مضارع نفس متکلم
 وحده ده ایکی همزه نك اجتماعی لازم کلامک ایچون همزه افعال حذف
 اولمغله باب بر وتیره واحده اوزره اولمق ایچون باقی صیغه لرده دخی
 حذف اولنمشدر شو جهتله اعلالده اصالت اشتقاقده اصالتی اصلا اقتضا
 ایلمیه چکی معلومدر مع هذا یعد عدة یوجل و جلاّده اولان بیانلرینه
 کوره فعل مضارعک اصل اولمسی وقام قیاما و قاوم قوامده اولان
 بیانلرینه کوره فعل ماضینک اصل اولمسی لازم کلور شو جهتله ده
 کلاماری مشوشدر حالبوکه مثلاً رمی کله سنده اعلال وار ایکن مصدری
 اولان رمی ده اعلال یوقدر و اعشوشب کله سنده اعلال یوق ایکن مصدری
 اولان اعشیشاب کله سنده اعلال واردر اشته بوکیلر ایله ده منقوض اولمغله
 وجه اوللری رد اولنمشدر و وجه ثانیلریده تأکید ضاعیده مثلاً جائنی
 زید زید قولمزده فتح کافله مؤکد اعرابده کسر کافله مؤکددن اصل اولمغله
 تأکید اسمیده ده مثلاً ضربت ضرباً قولمزده ضربک ضربت مفهومی
 مؤکد اولمسیله فعلک اشتقاقده اصل اولمسی لازم کلز دینه رک رد اولنمشدر
 و وجه ثالثه مشرب عذب و مرکب فاره قوللر من جری النهر و سال المیزاب
 قینلندن اولمسی یعنی محل ذکر اولنوب حال مراد اولنمش اولمسی محتمل
 اولمغله جواب ویریلمشدر .

شیخ رضینک بیان ایلدیکی اوزره بصریلرک معتمد علیه اولان دلیللری
 بودرکه بر اصلدن اخذ اولنان فرعه مافی الاصل بولنوب و برده زیاده لک

اولمیدرکه فرعی اول اصلدن اخذ ایلمکدن غرض اول زاندى تحصیلدر مثلا کومشدن معمول بر یوزکده اصل اولان کومش بولنوب و برده صنعت مخصوصه یه ملتبس اولمشدرکه پارمغه طاقلمغله استعمال اولنیور و آتی کومشدن اخذ واعمالدن غرضده بودر. بونک کی فعلدهده مصدرک معناسی اولان حدث بولنوب و برده زاندى اوله رق ازمنه ثلثه نك برینه دلالتی واردرکه فعلی مصدردن اخذ ایلمکدن غرض بودر شو حال ایسه بالبداهه مصدرک اصل اولسنی اثبات ایلر.

علم صرفده مفصلا بیان اولندیغی اوزره مصدرلر یاسماعی و یاخود قیاسی اولوب ثلاثی مجردک مصدرلری سماعیدرکه سبویه عندنده اوتوز ایکی وزنه مرتقی بولمشدر و غیریلر دهانچه وزنلر علاوه و بعضیلر التمش ایکی یه قدر تعداد و بعض نظمیلر انشاد ایلمشدرکه تحریری باعث ملالدر انحق کتب قومده مشهور و مشهود اولان الی بش وزن جدول آتیده کوسترلشدر.

قتل	فسق	شغل	رحمة
فتحله	کسر ایله	ضمه	فتحله
نشدة	کدره	دعوی	ذکری
کسر ایله	ضمه	فتحله	کسر ایله
بشری	لیان	حرمان	غفران
ضمه	لامک فتحی یانک تشدیدیه	سریله	ضمه
نزوان	طلب	حنق	صغر
فتحاله	فتحین ایله	خانک فتحی نونک	صادک کسری
		کسر ایله	عینک فتحیه
هدی	غلبه	سرقة	ذهاب
هانک ضمی دالک فتحیه	فتحین ایله	سینک فتحی رانک کسری ایله	ذالک فتحی ایله
صراف	سؤال	زهاده	درایه
صادک کسر ایله	ضمه	فتحله	کسر ایله
دخول	قبول	وحیف	صهویه
ضمه	فتحله	فتحله	ضمه

مدخل مرجع مسعاة محمده
 میك و خانك فتحيله میك فتحی و جیك كسریله میك و عینك فتحيله اصلی میك فتحی و عین
 مسعیه الفعلنك كسریله

سبویهك ذكر ایلدیكى بو قدر در طلبه بیننده مصدر چقوری تسمیه اولنور

بغایه	کراهیه	مکرم	شری
ضمله	فتحله	میك فتحی رانك ضمه	عصاوزنده
سبویه بونلری نادر اولدقلرندن ذكر الیامشدر			
قری	صلی	عتی	سخری
رضاوزنده	کسرتین ايله	عینك ضمی نانك كسریله	سینك كسریله
سخریه	هبة	دعة	خصوصیه
سینك ضمه	كسرايله	فتحله	فتحله
عبودیه	دیومة	نصیحة	جمزی
ضمله	دالك فتحيله	فعيله وزنده	فتحاته قوردلنکی یلکه دینور قاموس اسم اولدیغی تصریح ایلشدر

مفتون	کاذبه	قائم	بتیان
کافی قوله تعالی	کافی قوله تعالی لیس	کاذا قلت قت قائما	نانك كسریله بیان کی
بایکم المفتون	لوقعتها كاذبه	ای قیاما	واول معنایه مصدر در
			نانك كسریله بو کله
			شاذ واقع اولشدر

هجیری	هجیری	تجوال
فاء الفعلنك كسری و عین	افعیلا وزنده هجیری	نانك فتحيله تذکار
الفعلنك كسرو تشدید بيله	معناسته مصدر در	تکرار کی
خلیفی و حثینی کی		

تجوال و هجیری اوزان مبالغه دندر هجیری چو قجه صایقلمق و تجوال کثره
 جولان معناسته در بووزنلرده اولان مصدر لر سماعی و یا خود قیاسیمیدر

دیو ز محشریدن سؤال اولند قدده بوبابك كثر استعمالندن ایچون لایق اولان قیاسی اولمیدر دیدی امام فرا و کوفیلر تفعال وزنده اولانلری تفعیل بابنك مصدری قیلوب تفعیل منزله کوردیلر بونلرک تفصیلا بیانلری کتب صرفیه ده مسطوردر بوراده بوقدر ایله اکتفا ایلدك (شری) وزنی و اندنصرکه ذکر اولنانلرک بعضیسی صیغه مصدرده حذف و اعلال ایله تصرفدن و یا بریای مصدریه و (تا) حرفی الحاقندن حاصل و بعضیسی غایت شذوذده اولوب و بعضیسنك مصدر اولسی بین القوم مختلف فی اولدیغندن و تجوال و هجیری نحوی اوزان مبالغه مصدردن اولوب و تجوال نحوی علی رأی مصادر ثلاثیه دن اولدیغندن بونلر مصادر سماعیه صره سنده اکثریا تعداد اولنماشدر و اما ثلاثی مجردك غیرینك مصدرلری قیاسیدرکه مثلاً هر برماضیسی افعیل وزنده اولانك مصدری افعال وزنی اوزره و هر بر ماضیسی استفعال وزنده اولانك مصدری استفعال وزنی اوزره کوردیمك کبی برار قضیه کلیه ایله مضبوطدر و مع هذا بعض مصادر سماعیه لری دخی وارددر مثلاً تفعیل باینده تشدید و تخفیف ایله کذاب و کذاب و تسبیح معناسنه سبحان کبی و باب تفعله تلاق کبی تانك و میمك کسری و لامك تشدیدیه نته کیم شاعرك .

ثلاثة احباب فب علاقة وحب تلاق وحب هو القتل

شعرنده واقع اولمشدر مفاد شعر انسان ایچون حب و محبتلر اوچ نوعدر بریسی بر محبوبه یه اولان عشق و علاقه در ایکنجیسی بر ادمه اظهار محبتله یلتاقلنمقدر اوچنجیسی قتل اعادی محبتیدر دیمکدر و خفی اولیه که مصدرلرک عملنه کلنجه بوبابده مسئله اوچ وجه اوزره درکه عمل یا بالکنز مصدرک اولور و یا خود یا لکنز فعلک اولور و یا خود مصدر و فعلک اولسی جائز اولور .

درس ۱۷۵

(وجه اول) عمل یا لکنز مصدرک اولمیدر. خفی اولیه که مصدرلر گنیدیلردن مشتق قلنان فعلک عملی کبی عمل ایدرلر اول فعل کرک ماضی و یا حال و یا

استقبال ایچون اوله مثلا (اعجینی ضرب زید عمرواً امس) قولزده ضرب
 کبی که امس لفظنک دلالت ایلدیکی اوزره بوندن مشتق اولان فعل ماضیدر که
 ضرب در پس مثال مذکورده ضرب کلهسی فعل ماضی اولان ضرب کبی
 عمل ایدوب منون اوله رق زید کلهسی لفظاً مرفوع و یاخود زید لفظه
 مضاف اوله رق محل قرینی لفظاً مجرور و محل بعیدنی فاعلی اولق اوزره
 محلاً مرفوع قلمش و عمرواً کلهسی مفعولی اولق اوزره لفظاً منصوب
 ایلمشدر. و مثلاً اعجینی اکرام عمرواً خالداً غذا قولزده اکرام کبی که غذا
 کلهسنک دلالت ایلدیکی اوزره بوندن مشتق اولان فعل مضارعدر که یکرمد
 پس مثال مذکورده اکرام کلهسی یکرمد کبی عمل ایدوب قیاس سابق اوزره
 عمرواً کلهسی فاعلی اولق اوزره لفظاً و یا محلاً مرفوع و خالداً کلهسی مفعولی
 اولق اوزره لفظاً منصوب ایلمشدر. شویانمز کوزلجه منفهم اولدی ایسه
 بیلملیدر که مصدرک فاعل و مفعول به صریحک غیری معموللرده عمل
 ایلمسی بر شرطه متوقف دکلدر لکن فاعل و مفعول به صریحده عملی
 برکوی حضر تکرینک بیاننه کوره بش شرطه متوقفدر.
 (اولکیسی) مصدر مصغر اولما ملیدر.

(ایکنجیسی) قبل العمل بر صفتله موصوف اولما ملیدر زیرا مصدرک عملی
 یالکز کندندن مشتق اولان فعل ایله بینارنده مناسبت اشتقاق بولندیغندن
 اولیوب حین عملده برده (ان مع الفعل) منزله فرض و تقدیر اولنسی
 جهتله در مثلاً اعجینی ضرب زید عمرواً امس قولمز (اعجینی ان ضرب
 زید عمرواً) و (اعجینی اکرام عمرواً خالداً غذا) قولمز اعجینی ان یکرمد
 عمرواً خالداً منزله در فعل ایسه مصغر و موصوف اوله میه جعندن مصغر
 و قبل العمل موصوف اولان مصدرده تقدیر مزبور جاری اوله مز و مجرد
 مناسبت ایسه عملده کفایت ایتمز پس اعجینی ضربک زیداً و یاخود اعجینی
 ضرب شدید زید عمرواً دنیه مز و اما بعد العمل وصف عمل سابقه مضر
 دکلدر اعجینی ضرب زید عمرواً شدید کبی.

(اوچنجیسی) زمان حاله دال کله لره مقترن اولما ملیدر مثلاً اعجینی ضربک
 زیداً آلان دینلمز زیرا مقترن بالحال اولان مصدر ان مع الفعل ایله مقدر

اوله من زیران کلهسی ماضی اوزره داخل اولدوقده مجرد مصدریت
ایچون اولوب ماضی معناسنده اوله رق قالور ماضی ده ایسه حاله هر کر
احتمال یوقدر ومضارع اوزره داخل اولدوقده ایسه استقباله تخصیص ایلرکه
حاله منافیدر . لکن بعضیلر مصدرک عملی کندندن مشتق اولان فعل ایله
بیلرنده مجرد مناسبت اشتقاق بولندیغندر و برسنه ایله مأول اولان هر
وجهله آنک حکمنده اولسی لازم اولدیغندن مصدرک ان مع الفعل ایله
مأول اولسیله هر حالده ان مع الفعل حکمنده طوتلمسی لازم دکلردیوب
مصدرک عملنی ماضی و حال و استقباله تعمیم ایلدیلر ابن حاجب رحمه الله
دخی شو مسلکه سالك بولنشدرد و بعضیلر مقترن بالحال اولان مصدرک
(مامع المضارع) ایله یعنی مای مصدریه نك مدخولی بر مضارع ایله مقدر
ومفروض اولسنی مثلاً اعجینی ضربك زیدا الان اعجینی ماتضرب زیداً
منزلده بولنسنی رای ایلدیلر نته کیم ابن عقیل دخی الفیه شرحنده بونی
تفصیل و تصریح ایلمشدر شو صورتده جواب مذکوره حاجت قالمز ایسه ده
لکن ان مصدریه نك استعمالی مای مصدریه دن دها اشهر واکثرا وبلغله
شیخ رضی عننده مرضی اولان مقترن بالحال اولان مصدرک دخی (ان مع
المضارع) ایله مقدر اولسیدر و شو صورتده جواب مذکوره یعنی برشی
ایله مأول اولان هر وجهله اول حکمده بولنق لازم دکل پس مصدر
مقترن بالحال (ان مع المضارع) ایله مأول اولغله استقبالی مفید اولسی
لازم کلهرک منافاة غیر لازمدر دینمکه احتیاج واردر .

(دردنجیسی) معرف باللام دخی اولما ملیدر زیرا مصدر حین عملده ان مع
الفعل ایله مقدر اولوب ان مع الفعل اوزره ایسه لام تعریف داخل
اوله میه جغندن ان مع الفعل ایله مقدر مصدر اوزره دخی عدم دخولی
لازم کلور لکن برشی ایله مأول اولان هر وجهله اول شی حکمنده اولسی
لازم اولدیغنه منی بعضیلر مصدر معرف باللامک دخی عملنی تجویز و شاعرك :

لقد علمت اولى المغيرة انى كررت فلم انكل عن الضرب مسمعا

شعریله استدلال ایلدیلرکه معرف باللام اولان (الضرب) مسمع لفظنی

مفعولی اولمق اوزره لفظاً منصوب قیلمشدر اشوبیت بحرطویلدن اولوب
عروض و ضرب و بعض حشوی مقبوض واقع اولمشدر مفادی قسم
ایدرمکه تحقیق مغیره طائفه سنک مقدم واک اولوسی بیلدیکه بن مرة بعد
اخری جمله ایتدم و مسمع دنیلان کیمسه بی ضرب ایلمکدن رجوع ایلمدم
دیمکدر . اشبو شعره حذف و ایصال طریقله (مسمعا) کررت فعلنک
مفعولی اولوب معنا (صلت و حملت علی مسمع) دیمک اولغله . و دیگر کونه
دخی جوابلر ویریلمش ایسه ده لکن ویریلان جوابلرک جمله سی طوغریدن
حقیقمقدر صواب اولان مصدر معرف باللامک مع قلة عملنی تسلیم
ایلمکدر نته کیم ابن حاجب حضرتلری دخی (و اعماله باللام قليل)
بیورمشلردر وقلتنه کلام قدیمده مصدر معرف باللامک هرکز فاعل
و مفعول به صریحده عملی کورلما سی دلیل کافیدر فقط حرف جر واسطه سیله
اوله رق عملی واردر لایحب الله الجهر بالسوء قول شریفنده اولدینی کبی .
(بشنجیسی) مصدر مفعول مطلق صرف دخی اولما ملیدر زیرا شو صورتده
عمل یالکز فعلکدر .

(وجه ثانی) عمل یالکز فعلک اولمسیدرکه بوده مصدر مفعول مطلق
صرف اولدقده در (مفعول مطلق صرف) فعلی مذکور اولان و یا خود
لازم الحذف اولیه رق فعلی محذوف اولان مفعول مطلق درکه بوکی
مفعول مطلق نه فعل مقامنده قائم ونه آندن بدل اولوب نیابت و بدلیتدن
صرف و خالص اولمش اولور . شو صورتده عمل یالکز فعلک اولور . زیرا
بونده ان مع الفعل تقدیر ایدلسه معنا صحیح اولمز مثلاً ضربت ضرباً اوضربه
اوضربه زیداً قولزده معنا ضربت ان ضربت زیداً اولمق سخیف و غیر
صحیحدر و جالبوکه مع وجود القوی ضعیفک عملی هرکز موجه اوله مز
پس عمل آنجق فعلک اولوب قول مزبورده ، زیداً ، ضربت فعلنک مفعول
به صریحی اوله رق لفظاً منصوبدر .

واما ضربته ضرب الامیر اللص قولزده اللص لفظنده عامل فعل اولیوب
مصدردر زیرا شو ترکیبده اولان مصدر حقیقه مفعول مطلق دکدر

بلکه حقیقه مفعول مطلق اولان محذوفدرکه تقدیر کلام ضربته ضرباً
مثل ضرب الامیر اللصدر شو بیامزدن مستبان اوله جفی اوزره مصدرک
عدم عملی حقیقه مفعول مطلق اولوب و بر فعلدن نیابت و بدلتی اولمدینی
صورتده در.

(وجه ثالث) عملی فعله و مصدره و یرمک جائز اولمسیدرکه بوده مصدر
مفعول مطلق اولوب فعلی لازم الحذف اولدیغندهدرکه شو صورتده
فعل مقامنده قائم اولمش اولور مثلاً سقیما زیدا قولزده اولدینی کی
اصالتدن ایچون عملی فعل محذوفه و یرمک و یاخود نیابتدن ایچون
مصدره و یرمک جائزدر.

درس ۱۷۶

خفی اولیه که مصدرک معمولی کنسینک اوزرینه تقدیم اولمقی جائز
اوله من زیرا مصدر حین عملده (ان مع الفعل) منزلنده اولوب ان
مصدریه حیزنده بولسان ایسه ان اوزره تقدم ایده میه جکندن مصدرک
معمولی دخی مصدر اوزره تقدم ایده من پس اعجینی عمرواً ضرب زید
دیمک جائز اوله من.

و بیلملیدرکه مصدرک فاعلی بلا نائب حذف ایلمک جائزدر زیرا واضع
، مصدری، وضعنده آنجق ماهیت حدته نظر ایلیوب یوخسه حدثک محل
قیامنه نظر ایتمامشدرکه خلاصه کلام مصدرک وضعنده بر فاعل مایه نسبت
ماخوذ اولمامشدر. پس مفهوم مصدری تصور بر فاعل مایه تصور
متوقف دکدر. و اما مصدرک غیرنده فاعلی بلا نائب حذف ایلمک جائز
دکدر. و وضع مصدرده فاعل مایه نسبت مآخوذ اولمدیغندن مصدرده
(فاعل) مستتر دخی قیلنمز بلکه ذکر اولمدینی تقدیرده حذف اولنور.
و خفی اولیه که مصدرک فاعلنه و مفعولنه اضافتی مطلقاً جائز اولدینی کی
عدم اضافتی دخی جائزدر فقط فاعلنه اضافتیمی اولی در و یاخود عدم
اضافله طوغریدن طوغری به فاعل مرفوع قیلنمسیمی اولی در اختلاف
اولنمشدر فاضل جامی مرفوع قیلنمسی جهتی مثلاً اعجینی ضرب زید

قولزده ضرب لفظاً مرفوع ومنون اوله رق اعجینی فعلنک فاعلی وزید
دخی لفظاً مرفوع ومنون اوله رق (ضرب) کله سنک فاعلی اولمسنی اولی
کور مشدر واولی اولمسنی شو صورتده مصدر منون اوله رق نکره اولوب
ونکره نک فعله مشابهتی ده ا قوی اولمسیله تعلیل ایتمشدر لکن کلام
فصحاده اکثر اضافتله بولنوب وقرآن مینده دخی مثلاً و (لولادفع الله
الناس) آیت کریمه سنده اولدینی کی اضافتله بولمسی جهت اضافتی مرجحدر
وهر حالده فاعلنه اضافتی مفعولنه اضافتدن اکثر بواندینی متفق علیه در .
وحنی اولیه که مصدر، مضاف، متعدی اولدقده صورت اضافت بش وجه
اوزره متصوردر .

(اولکیسی) فاعلنه مضاف اولوب مفعولی منصوب بولنمسیدر ولولا دفع
الله الناس آیت کریمه سنده واعجینی ضرب زید عمرواً قولزده اولدینی کی .
(ایکنجیسی) فاعلنه مضاف اولوب مفعولی ذکر اولنماقدر مثلاً عجیت
من ضرب زید قولزده اولدینی کی .

(اوچنجیسی) مصدر مبنی للمفعول اوله رق نائب فاعلنه مضاف بولنمسیدر
مثلاً عجیت من ضرب عمر قولزده اولدینی کی که مثلاً فاعلی اولان زید
حذف اولنوب مفعولی اولان عمرو آنک مقامنده قائم اولمش اوله .
(دردنجیسی) مفعولنه مضاف اولوب فاعلی مرفوع اوله رق ذکر اولنمقدر
عجیت من ضرب اللص الجلاد قولزده اولدینی کی .

(بشنجیسی) مفعولنه مضاف اولوب فاعلی ترك اولنمقدر لایسأم الانسان
من دعاء الخیر آیت کریمه سنده اولدینی کی ای من دعاء الخیر دیمکدر واما
، مصدر مضاف، لازم اولور ایسه شو صورتده آنجق بروجه واردرکه
فاعلنه مضاف اولنمسیدر اعجینی ذهاب عمرو قولزده اولدینی کی .

درس ۱۷۷

(مبحث اسم الفاعل) اسم فاعل ما اشتق من فعل لمن قام به بمعنى الحدوث
دینمکه معرفد یعنی ، اسم فاعل ، بر اسمدرکه بر، حدث، یعنی مصدردن بالواسطه
ویا خود بلا واسطه مشتق قلنمش و برذاته که حدث آنکه قائمدر بلا زیاده
ولانقصان وضع اولنش و حالبوکه کنیدیسی حدوث معناسنه ملبس بولنمشدر

مثلاً ناصر کی که نصر تدن مشتق قیانبوب نصرت ایله متصف ذاته وضع اولنمش و ناصر ایسه حدوث معناسنه ملتبس بولنمشدر اسم فاعل صیغه سی ثلاثی مجرددن فاعل وزنی اوزره وثلاثی مجردك غیرندن حرف مضارعت برمیم مضمومه یه تبدیل و ماقبل آخر مکسور قینه رق مضارع معلوم صیغه سی اوزره کلشدر مکرم و مستغفر و متفاعل کی .

اسم فاعل معلوم اولان فعلنک عملی کی عمل ایدر ، فعل ، متعدی ایسه کنیدی دخی متعدی و لازم ایسه لازم اولور اسم فاعلک عملی فعل مضارعه لفظاً و معنأً و استعمالاً مشابهنیدن ناشی اولغله زمانده مضارعه مخالف اولماق اوزره تحقیقاً و یا حکایه زمان حاله و یا خود استقباله دلالتی شرط قیلنمش فقط اسم فاعلده بر فاعله نسبت اولنمق معتبر ایسه ده مفعول بهه نسبت غیر مأخوذ اولغله هله بر مفعول بهی منصوب قیلنمده حاله و یا خود استقباله دلالت ایلمسی شرط لازمدر شوصورتده بر اسم فاعل متعدی بالاستقلال زمان ماضی یه خاص اولسه و یا خود وجودی مستمر اوله رق ضمن استمرارده زمان ماضی یی مشتمل بولنسه مفعول بهی منصوب قیله میوب بلکه مفعول بهیه اضافت معنویه ایله اضافتی واجب اولور زید ضارب عمرو امس و انا ضارب زید قولزده اولدینی کی . لکن امام کسائی کرک ماضی و یا حال و یا استقباله دال اوله اسم فاعلک عملنه ذاهب اولغله شوصورتده اضافت واجب اولمیوب و مضاف اولدقده اضافتی لفظیه اولور واشبو ذهابنه حق سبحانه و تعالی نک (و کلیمهم باسط ذراعیه بالوصید) آیت کریمه سیله استدلال ایلدی اشبو استدلالنه شووجهله جواب ویرلشدرکه بسط هر نقدر زمان ماضی ده ایسه ده لکن متکلم کنیدی زمان ماضی ده و یا زمان ماضی یی شوآنده فرض ایلمکله بطریق الحکایه حال مراد ایلمک جائز بولنغله بوراده دخی حکایه حال مراد اولنمش اولور .

و اگر زمان ماضی یه دال اوله رق مفعولنه مضاف اولان اسم فاعلک بر معمول آخری بولنور ایسه آرتق اول معمولده عامل بر فعل تقدیر اولنور زید معطی عمرو درهماً امس قولزده اولدینی کی که درهماً لفظی کانه (ما اعطاه) دینهرک واقع سؤاله جواب اولمق اوزره مقدر (اعطاه) فعلیه منصوبدر .

وبیلمیدرکه اگر اسم فاعل الف لامه ملتبس اولور ایسه که صورت حرف
تعریف اولوب و حقیقه حرف موصولدرکه اسم موصول معناسنه در (الضارب
غلامه عمرواً أمس عندنا) قولزده اولدینی کی بونک فاعل منفصل ایله
مفعول بهده عمل ایلمسی آنجق مصغر و قبل العمل موصوف اولماق ایله
مشروطدر وشو تقدیرده جمیع ازمنه مستوی اولوب زمان ماضی به ملتبس
اولدقده دخی عمل ایلر. و اگر اسم فاعل الف لامدن مجرد بولور ایسه عملی
کذا مصغر و قبل العمل موصوف اولماق شرطلرله برابر بش شیئ برینه
اعتماد ایلمکه متوقفدرکه. (یا بر مبتدایه) اعتماد ایلمیدر زید ضارب عمرواً
قولزده اولدینی کی. و (یا بر موصوفه) اعتماد ایلمیدر جائی رجل ضارب
عمرواً قولزده اولدینی کی و یا بر (ذوالحاله) اعتماد ایلمیدر جائی زید را کبا
غلامه قولزده اولدینی کی و یا بر (کلمه استفهامه) اعتماد ایلمیدر اقامان الزیدان
وما صانع البکران قولزده اولدینی کی و یا بر (کلمه نفیه) اعتماد ایلمیدر ماقائم
الزیدان و غیر قائم الزیدان و لیس ضارب البکران عمرواً قولزده
اولدینی کی. و یا خود بر موصوله. اعتمادک ذکر اولنماسی زیرا صفتلر الف لام
موصولک غیرینه صله واقع اوله منلر الف لام موصول ایله معرف اسم
فاعلک ایسه احکامی بیان اولندی ترکیه اوله رق اشبو شروط عمل
شو یتلر ایله بیلدیرلشددر.

اسم فاعل عامل اولسه در کلام	آلیه تصغیر و توصیف ایله نام
پس برینه اعتماد ایتک ایچون	آلتی نسنه شرط قلندی ای غلام
مبتدا موصوف موصول ذوالحال	نفی و استفهامدر آکله تمام

اسم فاعلک عملنده قبل العمل موصوف اولماقنی شرط ایلمک زیرا اسم فاعل
موصوف اولدقده صفت کندینه مسند اولوب اسم فاعل مسند ایله اولور
مسند ایله اولق ایسه اسم خاص اولمغله فعله مشابهتی بعید اولور و اما
بعد العمل موصوف اولور ایسه. عملی مانعدن سالم اوله رق وقوع بولمغله
بعد العمل موصوف اولق عمل سابقه مضر اوله من مثلاً جائی رجل ضارب
غلامه شدید کی.

واما مصغر اولماغی شرط ایلمک زیرا مصغر اولان برصفت ایله موصوف منزلنده اولوب مثلاً ضویرب قولمز ضارب صغیر منزلنده در پس موصوف اولماغی شرط ایلمک عدم تصغیری دخی مقتضیدر. واما الف لامدن مجرد اسم فاعلده بش نسنه دن برینه اعتمادی دخی شرط ایلمک زیرا بعدالمتدا مسند ایله واقع اولیوب آنجق مسند واقع اولور وصفیت ایله حال مآلده خبرکی اولوب صفت و حال موقعنده بولنان کذا مسند اولورکه فعل دخی همیشه مسنددر. و استفهام ایله نفی حکمه تعلق ایدوب ذاته متعلق اولیه جقلرندن فعله شایانلردرکه کنیدلردن صکره واقع اولان فعل موقعنده اولمش کیدر پس شوبشدن برینه اعتماد ایلیان اسم فاعلک فعله مناسبتی قوی اولمش اولور. واما الف لام موصوله معتمد اولان اسم فاعل حقیقه فعل اوله رق بعده اسم فاعل صورتنه تغیر و تحویل اولمش اولدیغدن فعله مناسبتی نک قوی اولوب شو جهتله بونک عملنده عدم تصغیر و توصیفدن بشقه برشرطه حاجت کورلماش و عملی جمیع ازمنه یه تعمیم اولمشدر و شو اجلدن آریجه بیان ایدیلمشدر.

(خفی اولیه که) اسم فاعلک تشیه و جمع لرینک حکمی دخی مفرد لرینک حکمی کیدر. و بیلملیدکه نون تشیه و نون جمع حین اضافتده و جو با ساقط اولور و مضاف اولیه رق مفعولنی منصوب قلیدیغی حالده دخی معرف باللام اولدقدده لاجل التخفیف نون تشیه و جمعی حذف جائزدر مثلاً (الضاربون زیداً) و (زید و عمرو والضاربان بکراً) قولزده (الضاربون زیداً) و (زید و عمرو الضاربان بکراً) دیمک دخی جائزدر نته کیم بعض قرائتده (المقیم الصلوة) واقع اولمشدر الصلوة لفظنک نصیله. واما عندالتکیر حذفی ضعیف اولوب (لذاثقوا العذاب) قول شریفنده العذاب لفظنک نصیله اولان قرائت شایان اعتماد دکدر.

و بیلملیدرکه صیغ مبالغه فعال و فاعول و مفعال وزنلنده کلور ضراب و ضروب و مضراب کی واما سیبویه فاعل و فعل وزنلینی دخی زیاده قلمشدر علیم و حذر کی اشبو صیغ مبالغه و تشیه و جمع لری دخی عمل و شرطده بلا فرق اسم فاعل کیدر فقط امام برکوی بونلرک مفعول به یی

منصوب قلمسندده حال واستقبال معناری شرط قلنمز دیدی زیر بونلر
 حدثه زیاده ومبالغه به دلالت ایدر زیاده و مبالغه ایسه تجدد حدث
 منزله در که فعله قرینتلینی تزید ایلر واما اسم فاعل ایله اسم مفعول حدث
 فعلی به تبعاً دلالت ایدوب قصداً دلالتلری ذاته در پس زمان فعله دلالتله
 تقوی مشابّهت ایچون حال واستقباله دلالتلری شرط قلنور . و صیغ
 مبالغه نك ذکر اولندیغی اوزره عمللری بصریلرک مذهیدر . واما کوفیلر
 تغیر صیغه لری جهته فعله لفظاً مشابّهتلی فوت اولدیغندن عمل ایده ماملرینه
 ذاهب اولدیلر و کندیلدنصرکه منصوب اوله رق بولن ان کله لر فعل مقدر
 ایله منصوب در دیدیلر . بصریلر ظرفندن کوفیلرک تمسکینه تغیر صیغه لری
 جهته واقعا مشابّهت لفظیه فوت اولمش ایسه ده مزیت مبالغه اول نقصانی
 جابر و مکملدر دینه رک جواب ویرلمشدر .

درس ۱۷۸

(مبحث اسم المفعول) اسم مفعول ما اشتق من فعل لمن وقع علیه دینمکه
 معرفدر یعنی اسم مفعول بر اسمدر که (بر حدث) یعنی مصدر دن بالواسطه
 ویا خود بلا واسطه مشتق قیلنمش و برذاته که حدث آنک اوزرینه واقعدر
 وضع اولمشدر (منصور) کبی که نصرتن مشتق قیلنوب یاردم اولنمش
 ذاته موضوعدر .

اسم مفعول صیغه سی ثلاثی مجرددن مفعول وزنی اوزره کلش وثلاثی مجردک
 غیرندن اسم فاعل صیغه سی اوزره فقط ماقبل حرف آخر مفتوح اوله رق
 واقع اولمشدر مکرم ومستخرج کبی رالرک فتحیه اسم مفعول مجهول اولان
 فعلنک عملی کبی عمل ایلر که نائب فاعلنی مرفوع ایدر زید مضروب غلامه
 کبی وکلامده مفعول آخر بولنور ایسه منصوب باقی قالور زید معطی
 غلامه درها کبی .

اسم مفعول عمل واشتراطده اسم فاعل کییدر که (نائب فاعل منفصل)
 ومفعول ثانی وثالثده عملی اکر اوزرنده الف لام موصول بولنور ایسه
 آنجق مصغر وقبل العمل موصوف اولماق ایله مشروطدر وشو صورتده
 جمیع ازمنه اسم فاعلده اولدیغی کبی مستویدر (زید المعطی غلامه درها الان

اوغدا اوامس) کبی . واکرالف لامدن مجرد اولور ایسه مفعول ثانی و ثانی نصبنده حال ویا استقباله مقارنتی لازمدر وکذا مصغر و قبل العمل موصوف اولیوب اسم فاعلده مرور ایلدیکی اوزره بش شینک برینه اعتماد ایللملیدر اسم مفعولک تشیه و جمعری دخی مفردلری کییدر .

درس ۱۷۹

(مبحث الصفة المشبهة) صفت مشبهة ما اشتق من فعل لازم لمن قام به علی معنی الثبوت دینمکله معرفدر یعنی صفت مشبهة بر اسم مدر که بر فعل لازم یعنی مصدر غیر متعدیدن بالواسطه ویا خود بلاواسطه مشتق قلنهرق و مضموننک قائم بولندیغی ذاته وضع اولنوب حالبوکه لزوم واستمرار معناسی اوزره بولنمشدر مثلاً حسن و کریم کبی که حسن حسنله و کریم کرم ایله متصف ذاته وضع اولنمشدردر حسنله کرم ایسه صاحبزنده ثابت و مستمر بولنمشدر اما سابق الذکر (اسم فاعل) متعدی و لازمندن دخی مشتق اولوب و ما قام به الحدیث موضوع ایسهده مضمونلری حدوث و تجدد اوزرهدر مثلاً ضارب و ذاهب و قائم کبی که مضمونلری اولان ضرب و ذهاب و قیام صاحبزنده ثابت و مستمر دکلدر .

شویانمزدن مستبان اولدیغی اوزره صفت مشبهه لر صاحبزنده مستمر و غیر متجدد معناله دلالت ایدر لر که جمهورک رأییدر . لکن شیخ رضی شوو جهله رأی ایلنمشدر که حدوث و استمرار صفتک قیدلری اولمغله اصل صفت مشبهه نه بر زمانده حدوثه و نهده جمیع ازمنهده استمرار ایچون موضوع دکلدر وصفده شوا یکی امره بر دلیل دخی یوقدر مثلاً صفت مشبهه دن (حسن) مطلقاً و حسن معناسنه اولوب اتصاف بالحسن بعض ازمنهده و یا خود جمیع ازمنهده میدر لفظنده بوکار دلیل یوقدر بلکه حقیقه شوا یکی امریننده بر قدر مشترک صادق اولور که اتصاف بالحسن در فقط اتصاف بالحسنک جمیع ازمنهده اولسنی نفی ایدر برشی اولیوب بعض ازمنه بعضندن اولی دخی اولما مغله کانه ثبوت ایله حکم اولنمشدر که بعض ازمنه یه تخصیص ایدر قرینه بولند قه ظاهر اولان اتصاف بالحسنک جمیع ازمنهده وقوعی اولمش اولور

بوکا کوره مستمر و غیر متجدد و یا خود متجدد اوله رق جمیع ازمنه ده مستمر معنایه صدقی منقهم اولور .

و بیلمیدرکه اسم فاعل اولان ضامر و طالق و شاذب و بوکیئر ایله اعتراض اولنه من زیرا بونلر بحسب اصل الوضع حدوث معناسنه اولوب مؤخرآ من جهة الاستعمال کنیدیله ثبوت واستمرار عارض اولمشدر چونکه صیغه اسم فاعل حدوث معناسنه موضوع اولوب اسم فاعل صیغه لرنده حدوث و تجدد اغلب و اکثردر . حتی حدوث معناسی اراده اولندقدنه صفت مشبهه بی صیغه فاعله تحویل مطرد اولمشدرکه مثلاً حسن لفظنده حدوث حسنی ارأه مراد اولنور ایسه حاسن دینور .

اشبو صفت مشبهه نك شواسمه وجه تسمیه سی تشیه و جمع مذکر ومؤنث اوله بیلمسی جهتله اسم فاعله مشابه اولدیغندندر و برده اسم فاعلك معناسی مصدرینه برذولفظی ضم اولنه رق افاده اولنه بیلدیکی کی صفت مشبهه نك دخی معناسی مصدرینه برذولفظی ضم اولنه رق افاده اولنه بیلور مثلاً ضارب لفظنك معناسی (ذو ضرب) ديمك اولدیغی کی حسن لفظنك معناسیده ذو حسن ديمكدر پس شو و جهله دخی اسم فاعله مشابه اولمش اولور . و عملی اسم فاعله مشابه اولوب اسم فاعل ده فعله مشابه بولندیغی جهتله در .

درس ۱۸۰

صفت مشبهه صیغه لر غالباً ماضیسی بکسر العین فعل و بضم العین فعل وزننده اولان بابلردن کلور . اما ماضیسی بفتح العین فعل وزننده اولانلردن وقوعی پك نادردر . اما ماضیسی بکسر العین فعل اولاندن بناسی لازم ایچون بولن ان ماده لرذن کلور و غالباً ادواء و عوارض باطنیه و بونلرک اضدادی معنایینه دائر اوله رق فعل وزنی اوزره کلور فانك فتیح و عینك کسر یله فرح و بطر و شکز کی (فرح) مسرور و شادان و (بطر) شدتله شادان و (شکز) سیء الخلق اولان کشییه دینور و دخی فعل وزنی اوزره کلور فانك فتیح و عینك ضمیلله ندس و حزن و حذر و عجل کی (ندس) فهم و فطانت صاحبیه و (حزن) غمکین اولانه و (حذر) متیقظ و اندیشه ناك آدمه و (عجل) مشربی ایوه کن اولانه دینور بونلر فرح وزننده دخی

واردرد. ودخی، فعول، و، فعل و، مثلث الفا اوله رق عینک سکونیه، فعل،
 وزننده کلور غیور و سلیم و شکس و حر و صفر کی (غیور) غیرتلو
 کیمسه یه و (سلیم) آفادن سالم اولانه و (شکس) شینک فتحی کافک
 سکونیه چتین خویلو سرکش طبیعت اولان انسان و حیوانه و (حر)
 حانک ضمی رانک سکونیه آزاده و کشی زاده اولان کیمسه یه و (صفر)
 صادک کسری فانک سکونیه بوش و خالی نسنه یه دینور و دخی الوان
 و عیوب ظاهره و حلی مغالرینه دائر اوله رق مذ کرده افع و مؤنثه
 فعلاء و جمعده ضم فا و سکون عینله، فعل، وزننده کلور احمر حمراء حمر
 و اعمی عمیاء عمی و احور حوراء حور کی اشبو ماضیسی بکسر العین
 اولانک متعدیسندن متعدی صاحبه لازم و مستمر اولیه جفندن صفت
 مشبهیه مختص وزنلر اصلا کلیوب آنجق ماقام به الفعل اسم فاعل وزنی
 اوزره کلور حامد و صاحب و راکب کی اما رحیم کله سی بضم العین فعل
 بانه بعدالنقل مشتق قیلنمش اولغله جای اعتراض دکدر زیرا بو باده
 (لازم) ابتداء و یاخود عندالاشتقاق لازم بولتمقدن اعمدر .

و (اما ماضیسی بضم العین) فعل وزنی اوزره اولان ماده لر ثابت و مستمر
 غرائز لازمه یه دائر اولوب همیشه لازم ایچوندرد و بوندن صفت مشبهیه
 غالبا فاعل وزنی اوزره کلور کریم کی و دخی فانک و عینک فتحیه (فعل)
 و فانک فتحی و عینک کسریله (فعل) و مثلث الفاء ساکن العین اوله رق
 (فعل) و فانک فتحیه (فعال) و فانک ضمیله (فعال) و فانک و عینک
 ضمیله (فعل) و فانک فتحیه (فعول وزنلرنده کلور حسن و خشن و صعب
 و صلب و ملح و جیان و شجاع و جنب و وقور و قور لفظلری کی (حسن)
 کوزل نسنه یه و (خشن) فرح وزننده سرد و درشت نسنه یه و (صعب)
 صادک فتحی عینک سکونیه کوچ و چتین نسنه یه و (صلب) صادک ضمی
 لامک سکونیه قتی و سخت اولان نسنه یه و (ملح) میمک کسری لامک
 سکونیه شور و طوزلو نسنه یه و (جیان) حییمک فتحیه قورقق و بی زهره
 ادمه و (شجاع) شینک ضمیله یکیت و بهادره و (جنب) ضمتین ایله
 سرد و سرکش حیوانه و جنابتلو کیمسه یه و وقور غیور وزننده صاحب

وقار و تمکین اولان آدمه دینور واما ماضیسی بفتح العین فعل وزنی اوزره بولنلردن صفت مشبهه وقوعی نادر در زیر یا متعدی ویلا لازم اولدن خالی اولیوب متعدی اولدقده هر کز صاحبنه لازم و مستمر اولمز مثلاً ضرب و نصره کی و لازم اولدقده دخی صاحبنه اکثر غیر لازمدرکه متجدد و غیر مستمر در مثلاً قیام و قعود کی پس اشبو شقندن صفت مشبهه وقوعی طبیعی آزونادر اوله جقدر بوندن صفت مشبهه فاعل و افعول و بکسر العین فاعل و بفتح العین فاعل وزننده کلمشدر حریص و اشیب و ضیق و صیرف کی (حریص) طمعکار آدمه دینور و (اشیب) احمر وزننده صاچ و صقالی آغارمش کشی به دینور مؤنثنده شمطاء لفظیله اکتفا اولنمغله شیباء دینلمز و (ضیق) سید وزننده طار نسنه به و (صیرف) حیدر وزننده متبصر و ایش بیلور آدمه دینور.

و بیلملیدرکه ماضیسی کرک مکسور و کرک مضموم و کرک مفتوح العین اولاندن اوله بونلرک جمیعنده جوع و عطش و شبع وری معنارینه دائر و شومعنالرله ملایم و متدائر بولنان ماده لردن صفت مشبهه فعلا و وزنی اوزره کلور جوعان و عطشان و شبعان وریان و سکران و غضبان و عجلان کی فافهم.

شوبیانلر مزدن مستبان اوله جفی اوزره اوزان ضیغ مشبهه علی الاشهر اوان بش عدده بالغ اولمشدرکه شوقطعه جمله سنی شاملدر.

﴿ قطعه ﴾

شکس جیان جنب صیرف حسن ملح شجاع غیور احمر خشن
مستفعان فاعلان مستفعان فعلا عطشان صلب کریم سید حزن

و بیلملیدرکه صفت مشبهه صیغه لری اسم فاعل صیغه سینه مخالف اولوب عربدن شو و جمله مسموع و ثابت اولمشدر واما اسم فاعل صیغه سی بیان اولدینی اوزره قیاسیدر.

خفی اولیه که صفت مشبهه ل فاعلینک عملی کی عمل ایدر لر فقط صفت مشبهه ثبوت واستمرار معناسنه اولوب مقتضی زمان ایسه معنای حدوث اولغله صفت مشبهه نك عملنده حال واستقبال معنای شرط اولمز لکن مصغر وموصوف اولماق وماقبلنده بش شیئک برینه اعتماد ایلمک اسم فاعلده اولدینی کی بونده دخی شرط قیلمشدر . فقط صفت مشبهه ده هرکز موصوله اعتماد بولمز زیرا صفت مشبهه ثبوت واستمرار معناسنه در ثبوت واستمرار معناسنه اولان کله لر اوزره داخل الف لام ایسه بالاتفاق موصوله اولیوب آنحق حرف تعریفدر .

ویلملیدر که بر صفت مشبهه نك معمولنده عملی صورتنده مسئله اون سکنز وجه اوزره متصوردر زیرا صفت مشبهه یامعرف باللام اولور الحسن کی ویاخود مجرد عن اللام اولور حسن کی وشوایکی صورتدن هر برنده معمولی یامضاف واقع اولور (وجهه) کی ویاخود الف لامه ملتبس اولور (الوجه) کی ویاخود اضافه والف لامدن مجرد واقع اولور (وجه) کی پس الی صورت حاصل اولور وشوایکی صورتدن هر برنده معمولی مرفوع ویاخود منصوب ویاخود مجرور اولمق احتمالی وارد که مجموعی اون سکنز صورت اولور نتهکیم اشبوجدولده کوسترلمشدر وزیرده مدار اختصار اولمق اوزره خانه لرده بردن اون سکنزه قدر وضع رقم اولنه رق اشارت واعلام قلمشدر .

<p>(۲) (الحسن و جهه) وجه عند البصرین مفعوله تشبیه طریقه و عند الکوفین تمیزیت اوزره منصوبدر موصوفه راجع ضمیره مضاف اولمشدر و صفتک فاعلی موصوفه راجع ضمیر مستتردر شو ترکیب ایکی ضمیری مشتمل اولغله حسن در</p>	<p>(۱) (زید الحسن و جهه) وجه لفظاً مرفوع صفتک فاعلیدر موصوفه راجع ضمیره مضاف اولمشدر شو ترکیبده علی وفق الحاجه بر ضمیر بولغله احسن در</p>
---	---

<p>(۴) (الحسن الوجه) الوجه لفظاً مرفوع صفتك فاعلیدر شو ترکیبده صفتی موصوفه ربط ایدر لفظاً بر رابط یعنی ضمیر بولند یغندن قیسح در</p>	<p>(۳) (الحسن وجهه) (صفت معرف باللام) وجه لفظنه ووجه موصوفه راجع ضمیره مضاف قیلنمشدر شو ترکیبده اضافه هرگز مفید تخفیف اولماغله بالاتفاق ممتنع در</p>
<p>(۶) (الحسن الوجه) الوجه اضافله محروردر و صفتك فاعلی موصوفه راجع ضمیر مستتردر شو ترکیب دخی علی وفق الحاحه بر ضمیری مشتمل اولوب احسن در</p>	<p>(۵) (الحسن الوجه) الوجه عند البصرین مفعوله تشبیه طریقیله و عند الکوفین تمیزیت اوزره منصوبدر و صفتك فاعلی موصوفه راجع ضمیر مستتردر شو ترکیب دخی علی وفق الحاحه بر ضمیری مشتمل اولوب احسن در</p>
<p>(۸) (الحسن وجهاً) وجهاً تمیزیت اوزره منصوبدر صفتك فاعلی کذا موصوفه راجع ضمیر مستتردر شو ترکیب دخی بر ضمیری مشتمل اولوب احسن در</p>	<p>(۷) (الحسن وجه) وجه لفظاً مرفوع صفتك فاعلیدر شو ترکیبده دخی صفتی موصوفه ربط ایدر بر رابط بولماغله قیسح در</p>
<p>(۱۰) (حسن وجهه) وجه لفظاً مرفوع صفتك فاعلیدر موصوفه راجع ضمیره مضاف اولمشدر شو ترکیب دخی بر ضمیری مشتمل اولوب احسن در</p>	<p>(۹) (الحسن وجه) صفت معرف باللام وجه لفظنه مضاف اولمشدر شو ترکیب مفید تخفیف ایسهده لکن معرفه نکرهیه اضافتی خلاف معهود اولغله بالاتفاق ممتنع در</p>
<p>(۱۲) (حسن وجهه) صفت وجه لفظنه مضاف اوله رق لاجل الاضافه تنوینی ساقط اولمشدر ووجه دخی موصوفه راجع ضمیره مضاف اولمشدر شو ترکیبده اهون تخفیفله اکتفا اولندیغندن بصریلر بونی تجویز ایتدیلر</p>	<p>(۱۱) (حسن وجهه) وجه مفعوله تشبیه طریقیله و یا خود تمیزیت اوزره منصوبدر موصوفه راجع ضمیره مضاف اولمشدر و صفتك فاعلی موصوفه راجع ضمیر مستتردر شو ترکیب ایکی ضمیری مشتمل اولغله حسن در</p>

وکوفیلر مجرد بر تخفیف حاصل اولمغله تجویز ایتدیلر	
(۱۳) (حسن الوجه) الوجه لفظا مرفوع صفتك فاعلیدر شو ترکیده دخی هرگز رابط بولنما مغله قییح در	(۱۴) (حسن الوجه) الوجه مفعوله تشبیه طریقیله و یا خود تمیزیت اوزره منصوبدر صفتك فاعلی موصوفه راجع ضمیر مستتردر شو ترکیب دخی بر ضمیری مشتمل اولوب احسن در
(۱۵) (حسن الوجه) الوجه اضافتله مجروردر وصفك فاعلی موصوفه راجع ضمیر مستتردر شو ترکیب دخی بر ضمیری مشتمل اولوب احسن در	(۱۶) (حسن وجه) وجه لفظا مرفوع صفتك فاعلیدر شو ترکیده دخی هرگز رابط اولما مغله قییح در
(۱۷) (حسن وجهها) وجهها تمیزیت اوزره منصوبدر وصفك فاعلی ضمیر مستتردر و شو ترکیب دخی بر ضمیری مشتمل اولمغله احسن در	(۱۸) (حسن وجه) وجه اضافتله مجروردر وصفك فاعلی کذا ضمیر مستتردر شو ترکیب دخی بر ضمیری مشتمل اولوب احسن در

خفی اولیه که شو صورتلرده معمولک مرفوع اولسی هر حالده فاعل بولندیغندندر و شو تقدیرده صفتك فاعلی اسم مظهر اوله جغندن ایچنده ضمیر مستتر اولمز و بونده صفت فعل کی در که فاعلی تشبیه و جمع بولنسه دخی صفتك مفرد اولسی واجیدر .

واما معمولک منصوب اولسی بصریلر عننده اکر معمول معرفه ایسه مفعوله تشبیه طریقیله در زیر تمیزک معرفه اولسنی تجویز ایتزلر و نکره ایسه تمیز واقع اولسی جهتلدر و اما کوفیلر عننده تمیزک معرفه دخی اولسنی تجویز ایتدکلرندن مطلقا تمیزیت اوزره در و اما معمولک مجرور اولسی بالاتفاق صفت معمولنه مضاف اولدینی جهتلدر و بیللملیدر که معمول صفت، منصوب و مجرور اولدیغنده صفتده البته موصوفه راجع بر ضمیر مستتر اولور تا که اول ضمیر صفتك فاعلی اوله و شو صورتده

موصوفی مفرد ایسه صفت دخی مفرد و تنیه ایسه تنیه و جمع ایسه جمع و مذکر ایسه مذکر و مؤنث ایسه مؤنث واقع اولور مثلاً زید حسن و جهاً والزیدان حسنان و جهها والزیدون حسنون و جهها و هند حسنة و جهها والهندان حسنتان و جهها والهندون حسنات و جهها قولزده اولدینی کی فقس و اعتبر.

درس ۱۸۲

و خفی اولیه که جدولده کوسـترلـدیـکی اوزره اون سکنز صورتدن ایکیسی مطلقاً ممتنع و بری مختلف فیه و دردی مع قبح جائز و ایکیسی حسن و طقوزی احسندر اما ممتنع اولان ایکی صورتدن بریسی اوچنجی خانهده کوسـترلـدیـکی اوزره صفت معرف باللام معمولنه مضاف اولوب و معمولی دخی موصوفه راجع ضمیره بالواسطه و یا بلا واسطه مضاف بولنان الحسن وجهه و الحسن وجه غلامه کی بونک ممتنع اولسی زیرا صفت مشبههده اضافه حاصل اوله حق خفت صفتدن تنوین و یانون تنیه و نون جمعی حذف اتمکله. و یا خود فاعلندن و یا فاعلنک مضاف الیهندن (الحسن الوجه) و (الحسن وجه الغلام) ده اولدینی اوزره موصوفه راجع ضمیری حذف و صفتده مستتر قیامغله. و یا خود هم حذف تنوین و یا، حذف نون تنیه، و یا حذف نون جمع، و هم ضمیری حذف و مستتر ایلمکله اولور شو ترکیبده ایسه بروجهله خفت حاصل دکدر حالبوکه ارتکاب اضافهندن مقصد تحصیل خفتدر و ممتنع اولان صورتک ایکنجیسی طقوزنجی خانهده کوسـترلـدیـکی اوزره صفت معرف باللام مجرد عن اللام اولان معمولنه مضاف بولنان صورتدر و بونک مع حصول الحقة ممتنع اولسی زیرا اضافهده معهود اولان نکره نک معرفه فیه اضافهتیدر پس معرفه نکره فیه اضافتی خلاف معهود اولغله تجویز اولنما مشدر.

و اما جواز و عدم جوازنده اختلاف اولنان بر صورت اون ایکنجی خانهده کوسـترلـدیـکی اوزره صفت مجرد عن اللام معمولنه و معمولی دخی موصوفه راجع ضمیره مضاف بولنان صورتدر که بونده آنحق صفتدن حذف تنوین ایله خفت حاصل اولمشدر حالبوکه صفتده مستکن ضمیر ایله استغنا حاصل

اولمغله موصوفه راجع ضمیر بارزی دخی حذف ایلمک ممکندرکه خفتده
 بوجهت دها اباندر اضافتی ارتکاب ایسه خفت قصدیچون اولمغله اقصى
 وابلغ خفت ممکن ایکن اکا تعرض اولمیوب اهون خفتله اکتفا اولندیغندن
 بصریون بوتربکی تجویز ایلمدیلر آنجق ضرورة شعریهده مع قبح جائز
 کوردیلر واما کوفیلر مجرد خفتک حصوله باقهرق بلا قبح سعه کلامده
 دخی تجویز ایلدیلر .

واما مع قبح جائز اولان درت وجه کنندده هرکز موصوفه راجع ضمیر
 بولنیاندرکه دردنجی ویدنچی واون اوچنجی واون التنجی خانهلرده کوسترلمشدر
 ربط معنوی بولنمغله تجویز اولنش ولفظاً صفتی موصوفه ربط ایدر بر
 ضمیر بولنمغله قییح عد ایدلمشدر .

واما حسن اولان ایکی وجه کنندده ایکی ضمیر بولناندرکه ضمیرک بری
 صفتده و دیگری معمولنده در نته کیم ایکنجی واونبرنجی خانهده کوسترلمشدر
 حسن اولسی صفتی موصوفه ربط ایدر محتاج الیه اولان ضمیری مشتمل
 اولدیغنددر و احسن اولماسی حاجت مقدارندن زائد ضمیری مشتمل
 اولدیغنددر .

واما احسن اولان طقوز صورت کندیلرده علی قدر الحاجه یعنی برضمیر
 بولناندرکه یدیننده ضمیر صفتده وایکیسندده جانب معمولنده در فارجمع
 الی الجدول .

درس ۱۸۳

وحنی اولیه که غیر متعدی اولان اسم فاعل واسم مفعول یعنی هرکز
 بر مفعوله تعدی ایلمیان فعل لازمندن مشتق اسم فاعل و آنجق بر مفعولنی
 منصوب قیلر فعل متعدیدن مشتق اسم مفعول ذکر اولنان اقسامده صفت
 مشبه کیدرکه اسم فاعل فاعلنی واسم مفعول نائب فاعلنی مرفوع قیلر
 ودخی آنلری مفعوله تشبیه طریقیله ویا تمیزیت اوزره منصوب ودخی
 آنلره مضاف اوله رق مجرور قیلرلر مثلاً (زید قائم الاب) و (زید
 مضروب الاب) دینور (اب) افظنک رفع ونصب وجر یله . وایلمیدرکه

اسم منسوب دخی صفت مشبهه کیدر مثلاً زیدها شمی الابدین نور اب
لفظنک کذا رفع و نصب و جر یله .

و یخفی اولیه که (اسم فاعل متعدی) و (بر مفعولن زیاده یه تعدی ایلان
قعللردن مشتق اسم مفعول) فاعل و نائب فاعل لرینی منصوب و یا خود
بالاضافه مجرور قیله مزلر زی را شو صورتلرده مفعوله ملتبس اولور ایدی
مثلاً (زید ضارب اباه) دینسه (اباه) ضارب لفظنک مفعولیمیدر و یا خود
فاعل اولوب مفعوله تشبیه طریقیله و یا خود تمیزیت اوزره منصوبیمیدر
بیلنمز ایدی و (زید ضارب اباه) دینسه ضارب فاعلنه و یا خود
مفعولنه می مضافدر بیلنمز ایدی فاعلنی منصوب و مجرور قیلمسی غیر جائز
اولدقده مثال اولده (اباه) آنجق مفعول اولسی و مثال ثانیده آنجق
مفعولنه اضافتی تحقیق ایدر .

و مثلاً زید معطی اباه دینسه (اباه) اسم مفعول اولان (معطی) لفظنک
مفعول ثانسیمیدر و یا خود مفعول اول اوله رق نائب فاعل قلنمش
و مفعوله تشبیه طریقیله و یا تمیزیت اوزره منصوب ایدلش اولوب مفعول
ثانیسی محذوفیدر بیلنمز ایدی .

و (زید معطی اباه) دینسه معطی مفعول ثانی و یا نائب فاعلنه می مضافدر
بیلنمز ایدی نائب فاعلنی نصب و جری جائز اولدقده مثال اولده (اباه)
آنجق مفعول ثانی اولسی و مثال ثانیده مفعول ثانی یه اضافتی تحقیق ایدر
و علیک الاعتبار .

درس ۱۸۴

(مبحث اسم التفضیل) اسم تفضیل لغه ایکی نسنه دن برینک آخری
اوزره تفضیل و رجحاننه دلالت ایلان اسمد دیمکدر . و (اصطلاح)
نحاتده (ما اشتق من فعل لموصوف بزیاة علی غیره) دینمکه معرفدر یعنی
اسم تفضیل ، دینلان بر اسمدر که بر ، حدث ، یعنی مصدردن مشتق
قلنمش و حالبوکه اول حدثده بشقه لرینک اوزرینه زیاده و رجحان
ایله متصف برذاته وضع اولمشدر وصیغه تفضیل بحسب الاصل مذکرده

افعل ومؤنثه فانك ضمی وعینک سکونی و آخرنده الف مقصوره ایله فعلی وزننده بولنشدر احسن وحسنی کی پس خیر وشر لفظلری قی الاصل اخیر و اشرف اولوب مؤخرأ کثرت استعمالدن ایچون حذف ایله تخفیف اولندقلرندن اسم تفضیلده داخل اولورلر. (خفی اولمیه که اسم تفضیل بناسی یدی شرط ایله متصور اولور. (اولکیسی) ثلاثی مجرددن اولمیدر زیرا ثلاثی مزید فیه و رباعی مجرد و مزید فیه دن تمام حروف محافظه اولنه رق (افعـل فعلی) بناسی ممکن اوله مز و بعض حروف اسقاط اولندیغنده ایسه التباسدن خالی اولمز مثلاً باب افعالدن همزه افعال حذف اولنه رق موقعنه همزه تفضیل کتوریلوب (اخرج) دینسه اخراجدن و یاخود خروجدنمی اسم تفضیلدر بیلنمز ایدی وقس علیه .

(ایکنجیسی) بنا اولندیغی ثلاثی مجرددن فعل کلش اولمیدر پس مثلاً (رجل) لفظنده ارجل دینه مز اما دماق معناسنه اولان (حنک) لفظندن احنک ورودی شاذدر (عر بلر احنک البعیرین) دیرلر ایکی دوه نك الك دماقی وزیاده اکل ایده نی دیمکدر .

(اوچنجیسی) بنا اولندیغی ثلاثی مجرددن وارد اولان فعلی فعل تام اولمیدر پس کان و صارده ا کون و اصیر دینه مز .
(دردنجیسی) ودخی اول فعل تام لازم النفی اولمایدر پس نبس ماده سندن اثباتده مستعمل اولسون ایچون افعـل تفضیل بنا اولنمز (نبس) سر عتله سوزسویلمک و دپرتمک معناسنه اولوب منفی اوله رق استعمال اولنور (مانبس فلان بالمجلس) دینور ما تکلم فاسرع دیمکدر و مانبس دینور ما تحرك دیمکدر (بشنجیسی) ودخی اول فعل افعال متصرفه دن اولمیدر پس نعم وئبس ده انعم وائبس دینه مز .

(التنجیسی) بنا اولندیغی ثلاثی مجرددن وارد اولان (فعل) تام و متصرف اولمغله بیله معناسی قابل کثرت اولمیدر پس (غربت الشمس و طلعت) ماده لرندن افعـل تفضیل کلز که الشمس الیوم اغرب منها امس و یاخود اطلع منها امس دینمز و بوشـرط ایله معناسی قابل کثرت اولمیان بعض عیوب

ظاهره دن دخی احتراز اولنه بیلور مثلاً عور یعنی کورلک کبی بونده افعـل
تفضیل اوله رق اعور دینمز بلکه افعـل صفت اوله رق واقعدر .

(یدنجیسی) بنا اولندیغی ثلاثی مجرد الوان و عیوب ظاهره یه دائر
اولمالمیدر . زیرا بونلردن افعـل صفت وارد اولمشدر افعـل صفت بناسی ایسه
مطلقاً بر صفتک ثبوتنه دال اولمغله بر صفتده آخر اوزره زیاده ور جحانه
دال اولان افعـل تفضیل بناسی اوزره طبعاً مقدم اولدیغی کبی وضعاً دخی
مقدم اولسی معتبردر شو تقدیرده الوان و عیوب ظاهره دن افعـل تفضیل
دخی بنا اولنسه افعـل صفته التباس لازم کلور ایدی .

لکن کوفیلر سواد ایله بیاض لونده اصل اولملریله شولونلردن افعـل تفضیلک
ورودینه ذاهب اولوب شاعرك : ابیض من اخت بنی اباض (دخی) لانت اسود
فی عینی من الظلم مصرعلریله استدلال ایلدیار بصریلر بوکا شاذ اولمغله جواب
ویرمشلر در عیوبی عیوب ظاهره ایله تقيید ایلیمک زیراعیوب باطنه یه دائر مواددن
افعل تفضیل وارد اولور اجهل وابلد و احق کبی بعضیلر حقی آثار ظاهره سی
مشهود اولانه خاص قیلوب یعنی عیوب ظاهره دن زعمیله عربلرك (احق
من ابن هبنقه) قولنده احق شاذدر دیدیلر حالبوکه عیوب باطنه نك بعض
آثار ظاهره سی کورنمک غیر خفیدر .

وبیلملمیدرکه ثلاثی مجردك غیریدن والوان و عیوبدن معنای تفضیل اخذی
مراد اولنور ایسه (اشد) و (اکثر) و بوکبی تفضیله دال و غرضه مناسب
بر افعـل تفضیل لفظی کننددن معنای تفضیل اخذی مراد اولنان ماده نك
مصدرینه ضم اولنور و اول مصدر ترکیبده تمیزیت اوزره همیشه منصوب
اولور مثلاً زید اشد من عمرو استخراجاً و اسرع منه انطلاقاً و اکثر منه
بیاضاً و اقبیح منه عمی دینور .

و خفی اولیه که اسم تفضیلده قیاس اولان مبنی للفاعل اولمقدرکه اصل فعلده
غیریلر اوزره فاعلک تفضیلنه دلالت ایلر شو صورتده افعـل تفضیل مضمونی

افعل تفضیل ایله متصف ذات ایله قائمدر مثلاً اعلم و افضل و احسن کبی پک
زیاده عالم و فاضل و حسن دیمکدر.

و بعض افعـل تفضیل مبنی للمفعول اوله رق دخی واقع اولور که مفعولک
تفضیلنه دلالت ایلر شو و تقدیرده افعـل تفضیلک مضمونی افعـل تفضیل ایله
متصف ذات اوزره واقعدر مثلاً اشهر و اشغل و اعرف و اعذر و الوم کی
پک زیاده مشهور و مشغول و معروف و معذور و لوم اولنمش دیمکدر.

درس ۱۸۵

خفی اولیه که اسم تفضیلک وضعی برشیء آخرک اوزرینه تفضیل ایچون
اولمغه اسم تفضیل ایله بیله مفضل ذکر اولنه جنی کبی مفضل علیه اولان
شیء آخری دخی ذکر لازم کلور. و ذکرری یا من حرفیه اولور که اکا
من تفضیلیه دینور زید افضل من عمرو قولزده اولدینی کبی و یاخود اضافته
اولور زید افضل الناس قولزده اولدینی کبی و یاخود اسم تفضیل الف لام
عهدا ایله معرف قیلنور که الف لامله برمعینه اشارت اولنه جغندن و شوتعین
ایسه مفضل علیک اولجه لفظاً و یا حکماً ذکرری کچمک و یاخود مخاطبک
معلومی بولنقی ایله متعین بولنمسندن ایلر و کله جکندن مفضل علیه ظاهراً
مذکور حکمنده اولور مثلاً سابقاً زیدک عمرودن افضل ایدوکی مرور
ایدرک (زید الافضل) دیندکه اولدینی کبی عمرودن افضیلتی معلوم و معهود
اولان زید دیمک اولور. پس اسم تفضیلک من و یاخود اضافت و یاخود الف
لامدن بریله استعمال اولنسی لازم اولوب بولنردن هرگز خالی اولمز
مکرکه مفضل علیه معلوم اوله الله اکبر قولزده اولدینی کبی الله اکبر کل شیء
و یاخود الله اکبر من کل شیء دیمکدر. و بیلماید که ذکر اولن ان شو امور
ثله دن ایکیسنی جمع ایتک جائز اوله من مثلاً زید الافضل من عمرو دینمز
زیرا بریله غرض تمام اوله جغندن آخر لغو اولور و اما اعشی شاعرک عامر
نام کیمسه بی علقمه نامنده بر کیمسه اوزره تفضیل صد دنده سویلدیکی :

ولست بالا کثر منهم حصی و انما العزة لاکثر

شعر نده اسم تفضیل الف لامه بیله من ایله مستعمل کور نمکده ایسه ده من تبعیض ایچون اولوب ویا خود فی معناسنه بولنوب من تفضیلیه اولما مغله مدار اعتراض دکلدر مفاد شعر یا علقمه سن آنلرک یینده عدد جهتیله عامردن اکثر دکلسک بلکه عامرک اتباع واصحابی سنک اتباع واصحابکدن چوقدر و حالبوکه عزت وغالیت اتباع واصحابی چوق اولانلر ایچوندر دیمکدر.

درس ۱۸۶

درس سابقدن منقهم اولان اسم تفضیل یا من ویا خود اضافه ویا خود الف لامه مستعمل اولور شوامور ثلثه دن هر برنده ایسه مسائل مخصوصه وارددر. اسم تفضیل من ایله مستعمل اولسه آنجق مفرد مذکر اوله رق استعمال اولنور زیرا فعل تفضیلک افعیل صفتدن فرقی من تفضیلیه ایله اولسی جهته من تفضیلیه نک افعیل تفضیله کمال امتزاجی وارددر و شو جهته افعیل تفضیلک اخری کانه وسط کله کی در تشیه و جمع و تأنیث ادا تیری ایسه آخر کله یه مختص اولمغله وسط کله حکمنده بولنان اسم تفضیلک آخرینه لاحق اولمیری کریه کورلمشدر. واما اسم تفضیل الف لامه استعمال اولنسه موصوفه افراد و تشیه و جمع و تذکیر و تأنیث مطابقت و موافقتی لازمدر. زیرا صفتک موصوفه مطابقتی لازم اولوب من تفضیلیه ایله امتزاج کی بر مانع ایسه یوقدر و (اما اسم تفضیل) اضافته استعمال اولنسه شو صورتده ایکی معنا متصوردر (معنای اول) اسم تفضیل ایله موصوفک اسم تفضیلک مضاف الیهی اوزره زیاده لکی قصد اولمقددر اسم تفضیلک شو معنا ایله استعمالندن مقصود موصوفک شو معناده مشارکری اوزره تفضیلی اولمغله هر نقدر موصوفی مضاف الیهی بحسب الاراده خارج ایسه ده لکن مضاف الیهی مفهومندن بعض اولوب بحسب مفهوم اللفظ داخلدر زید افضل الناس قولزده اولدینی کی زید ناسدن بعض اولوب بحسب المفهوم داخل و بحسب الاراده خارجدر پس شو معنا ایله یوسف احسن اخوته دینه من زیرا اسم تفضیلک مضاف الیهی اولان (اخوة) لفظی یوسفه راجع ضمیره مضاف اولمندن یوسف علیه السلامک (اخوة) ده داخل اولدینی غیر خفیدر.

(معنای ثانی) اسم تفضیل ایله موصوفك مطلقا غیر اوزره زیاده لکی قصد اولمقدرکه معنای اول کی آنجق مضاف الیه اوزره زیاده لك قیدیه مقید دکلر شو صورتده اسم تفضیل موصوفك داخل بولندیغی جماعته مضاف اولسی جائز اولدیغی کی هرگز داخل اولدیغی جماعته ده مضاف اولسی جائزدر. و بیلیملیدرکه اسم تفضیلک اضافتی سائر صفئرک اضافتی کی توضیح و تخصیص ایچونددر (نینا افضل قریش) و (یوسف احسن اخوته) قوللر مزده اولدیغی کی. و بعض غیر جماعته دخی مضاف اولور فلان اعلم بغداد قولمزده اولدیغی کی.

معنای اول ایله مستعمل اسم تفضیلک موصوفی هر نقدر مثنی و مجموع اولسه ده اسم تفضیلک مفرد کتورلسی و موصوفی هر نقدر مؤنث اولسه ده اسم تفضیلک مذکر قلمسی جائز اولدیغی کی موصوفه افراد و تشیه و جمع و تذکیر و تأنیده مطابقتی دخی جائزدر زیرا مفضل علیه کنیدیه بیله مذکور اولمقده من ایله مستعمل اسم تفضیله مشابتهی واردر آنده مرعی اولان افراد و تذکیر اولمغله شو جهتله بونک دخی مفرد مذکر اولسی و معرفه بولمقده الف لامله مستعمل اسم تفضیله مشابتهی بولمغله شو جهتله دخی موصوفه مطابق ایراد اولنسی جائز اولور. و اما معنای ثانی ایله مستعمل اسم تفضیل الف لامله مستعمل اسم تفضیل کی اولوب موصوفه مطابقت و موافقتی لازمدر.

درس ۱۸۷

خفی اولیه که اسم تفضیل ملفوظ اولان براسمی کرک مظهر و کرک مضمهر اولسون مفعولیت اوزره منصوب قیله من و مفعول به اولسی ظن اولنور برلفظ بولنور ایسه اول لفظده عامل اولمق اوزره اسم تفضیل لفظنک دلالت ایله جکی بر فعل تقدیر ایدیلور (هو اعلم من یضل عن سبیله) قول شریفنده اولدیغی کی اعلم من کل احد اعلم من یضل تقدیرنده در.

تعبیر مزده، مفعول بهی منصوب قیله میه جعی، کوستریلوب مفعول به ده عمل

ایده مزه. دیمدیکمهزه باعث زیرا (انا ضرب منک لزید) و (انا عرف منک بزید) قوللر مزده اولدینی کی حرف تقویله ودخی (انا امر بزید) و (ارمی منک بالنساب) قوللر مزده اولدینی کی حرف تعدیله کندینه اسناد عمل اولنور ودخی بیللملیدرکه اسم تفضیل کرک مظهر و کرک مضمیر براسم ملفوظی فاعلیت اوزره مرفوع دخی قیله مز زیرا کرک فاعلیت اوزره رفع و کرک مفعولیت اوزره نصب بالاصاله فعلک شانندن اولوب اسم تفضیل لفظندن ایسه غیر اوزره زیاده پی مفید اولق اوزره برفعلک وجودی تصور اولنه مدیغندن و برده اسم تفضیلده اصل اولان من ایله استعمال اولنق اولوب اشبو استعمالده ایسه اسم تفضیل هرکز متی و مجموع و مؤنث واقع اوله میوب اسم تفضیلک شو جهتله اسم فاعله دخی مشابهتی پک بعید بولندیغندن. آرتق نه فعله ونه اسم فاعله مشابهتی اولیوب رفع و نصب عملنی ایشلیه میه جکی درکاردر. و (اما اسم تفضیل ضمیر مستترده) بلا شرط عمل ایدر زیرا، اثر عمل، ظاهر اولماغله ضمیر مستترده عمل ضعیف اولوب قوه عامله احتیاجی یوقدر. ودخی اسم تفضیل ظرف و حال و تمیزده دخی بلا شرط عمل ایدر (زید احسن منک الیوم را کباً و (عمرو اکثر منک الیوم حسناً) قوللر مزده اولدینی کی زیرا ظرف ایله حالده عمل ایچون رایحه فعل بولنسه کافیدر تمیزده ایسه بعض رطل زیتاً قولمزده اولدینی اوزره اسم مبهم دخی عامل اوله بیلور شو صورتده اسم تفضیلک بولنرده عمل ایده بیلمسند ترده اولنمز.

درس ۱۸۸

درس سابقدن منفهم اولدینی اوزره اسم تفضیل برلفظی مفعولی اولق اوزره منصوب قیله مدینی کی فاعلی اولق اوزره مرفوع دخی ایده مز فقط ذکر اولنه حق شروط خمس بولنور ایسه اول وقتده فاعل ظاهری مرفوع قیله بیلور (مارأیت رجالاً احسن فی عینه الکحل منه فی عین زید) قولمزده اولدینی کی الکحل لفظاً مرفوع اسم تفضیل اولان احسن نک فاعلیدر شروط خمس دن (شرط اول) اسم تفضیل من حیث اللفظ برشیئک

صفتی اولمیدر نته کیم مثالزده (احسن) رجلاً لفظنک صفتیدر وصفی اولمقدن مراد یعنی بر شیئه اعتماد ایلمیدرکه مثالزده اولدینی کبی یا اول شیئک نعتی اولمیدر ویاخود اول شیدن خبر ویا حال واقع اولمیدر .

(شرط ثانی) من حیث المعنی والحقیقه اولجه اعتبار اولنان شیئک متعلقنک صفتی اولمیدرکه اول متعلق شیء اول ایله غیر یبینه مشترکدر نته کیم مثالزده احسن حقیقه کحک صفتیدر کل رجلك متعلق اولوب عین رجل ایله عین زید بینه مشترکدر اشبو متعلقه (مثالزده مثلاً کحله علی الاشهر سبب تسمیه اولنور زیرا عین رجل ایله عین زیدک احسن اولمیرینه سبب کحدر و مسبب دخی دینلورکه سبب قیلنمش دیمکدر ویاخود سبیلنمش دیمک اولور زیرا کل عین رجل ایله عین زیدده متقرر اولغله عین رجل ایله عین زید کحله ظرف اولوب کحک تقرر و تمکنه سبیلدر پس کل مسبب اولمش اولور و قس علیه .

(شرط ثالث) مسبب و سبب تسمیه اولنان متعلق مذکور شیء اول اعتباریله فی نفسه مفضل اولمیدر

(شرط رابع) متعلق مذکور شیء اولک غیر اعتباریله فی نفسه مفضل علیه اولمیدر نته کیم مثالزده کل شیء اول یعنی عین رجل اعتباریله مفضل و شیء اولک غیر یعنی عین زید اعتباریله مفضل علیه در .

(شرط خامس) اسم تفضیل منفی اولمیدر و بعد النفی حکم بر عکس اولورکه کل عین رجل اعتباریله مفضل علیه و عین زید اعتباریله مفضل اولور .

اشبو شروط خمسہ نک تحقیق عندنده اسم تفضیلک فاعل ظاهرینی مرفوع قیله بیلیمی زیاده لک قیدی مرتفع اولوب فعل معناسنه بولنسندن یعنی (احسن) حسن منزلده قالمسندن ناشیدر زیرا شوصورتده متعلق مذکور مثلاً مثالزده کل عین رجل اعتباریله مفضل و عین زید اعتباریله مفضل علیه و بعد النفی بر عکس بولنمق اعتباریله مختلف ایسه ده لکن بالذات متحد اولوب اسم تفضیلده اصل اولان ایسه مفضل ایله مفضل علیه بینه بالذات تغایر بولنمق اولدیغندن اسم تفضیل علی ما هو الاصل قالماسی جهتله قیله

معنای تفضیلدن خروجی سهل اولمشدر واسم تفضیل اوزره نفی توجه ایتدکه ایه زیاده لك قیدینه متوجه اوله جغندن مفاد مثال عین رجلده اولان كلك حسنی عین زیدده اولدینی حالده حسنی اوزره زائد دکلدر دیمك اولورکه یعنی یامساوی ویا آندن دون اولسی تخیل اولنور مساوی اولسنه ایه مقام مدح ملایم اوله من پس خلاصه معنا (حسن فی عین رجل الکحل دون حسنه فی عین زید) دیمك اولورکه (احسن) حسن معناسنده قالور ومتعلق مذکور یعنی الکحل فاعلی اولق اوزره مرفوع قلنور.

واکر الکحل فاعل قیلنمیوب مبتدا ایدیلسه واحسن لفظی مقدم خبر قیلنسه اسم تفضیل ایه معمولی اولان (منه فی عین زید) قولمز بیننده بر اجنبی یعنی کحل ایه فصل لازم کلور ایدی کحل لفظی ایه عارض اولان ابتدائیت اجنبی اولقدن اخراج ایده من واما الکحل فاعلیت اوزره مرفوع قاندقده فاعل فعلدن جزء کی اولغله اجنبی اولمز واکر مبتدا و خبر اولملری فرض اولنان صورت مذکورده اجنبی ایه فصل واقع اولسون ایچون (منه فی عین زید) قولمز (الکحل) اوزره تقدیم اولنهرق (مارأیت رجلاً احسن منه فی عین زید الکحل فی عینه) دینسه ویاخود (منه) ده اولان ضمیر مظهر اوله رق کتوریلوب مقدم قلنسه و مبتدای مؤخر قلنه حق (الکحل) مضمراولهرق کتورلسده (مارأیت رجلاً احسن من الکحل فی عینه هو فی زید) دینسه شواییک روش تعیرده تعقید شدید اولغله طبع سلیم قبول ایده من و حالبوکه مانحن فیهمز اولان عبارة مشهوره قیلندن دخی دکلدر.

درس ۱۸۹

خفی اولیه که مسئله کحل مختصر جه بشقه عبارله لر ایه دخی تمثیل اولنه بیلور مثلاً مارأیت رجلاً احسن فی عینه الکحل من عین زید دینلورکه (منه فی عین زید) موقعنده من عین زید دینمکله کتفا اولنور بونده ایه منه ده اولان ضمیر مقدار نجه اختصار واردر واکر عین لفظی دخی قالدیریلوب (من زید) دینسه بودخی اوله بیلور و اخصر اولور و مفادی کذا عبارة اولك مفادینه واریر.

واکر قبل النفی مفضل علیه اولان عینک ذکر ی تقدیم اولنه رق (مارایت
 کعین زید احسن فیها الکحل) دینلور ایسه بودخی جائزدر مارایت عینا
 کعین زید احسن فیها الکحل تقدیرنده در فی الاصل مارایت عینا احسن
 فیها الکحل کعین زید ایدی عین زید تقدیم اولنمغه (عیناً) لفظی ذکر
 ایلمکدن استغنا حاصل اولمشر مثال مذکورده (احسن) ارأه اولندیغی
 اوزره بتقدیر الموصوف (رایت) نک مفعولیدر و (کعین) ظرف مستقر
 اوله رق موصوف مقدردن حالد و بواکر رؤیت رؤیت بصر معناسنه
 ایسه در واکر رؤیت رؤیت قلب معناسنه ایسه (کعین) رایت نک مفعول
 ثانیسی واحسن مفعول اولیدر سحیم ابن وثیل الریاحی نام شاعرک شوشعری
 دخی ذکر اولنان اشبو مثاله مماثلدر.

﴿ شعر ﴾

مررت علی وادی السباع ولااری کوادی السباع حین یظلم وادیاً
 اقل به ركب اتوه تأیه واخوف الا ما وقی الله ساریاً

(مررت) فعل وفاعل (علی وادی) ظرف لغودر مررت یه متعلق
 (السباع) وادی لفظنک مضاف الیهیدر وادی السباع یرتجی جانورلر
 دره سی دیمکدر (و) حالیه ویاخود اعتراضیه در (لااری) فعل مضارع
 منفی، نفس متکلم وحده، جمله سی محلاً منصوب مررت نک فاعلندن حالد
 ویاخود لا محلاً لها من الاعراب جمله اعتراضیه در (کوادی السباع) ظرف
 مستقر اولوب کله جک وادیاً لفظندن حالد (حین) کافدن مستفاد
 تشبیه مفادینک ویاخود لااری نک مفعول فییدر (یظلم) فعل مضارع
 مجهولدر تحتده مستر نائب فاعلی وادی السباعه راجعدر و جمله سی محلاً
 مجرور حین لفظنک مضاف الیهیدر (وادی) لااری نک مفعولیدر واکر
 رؤیت رؤیت قلب معناسنه اخذ اولنور ایسه مفعول اولیدر و مفعول ثانیسی
 سبقت ایدن کوادی در (اقل) اسم تفضیلدر (به) اسم تفضیله متعلقدر
 با فی معناسنه وضمیر وادی یه راجعدر (رکب) لفظاً مرفوع اقل نک

فاعلیدر اسم تفضیل اولان اقل مع فاعله مرکب اوله رق لفظاً منصوب
 وادیا قولنک صفتیدر (اتوه) فعل و فاعل و مفعولدر جمله سی ركب لفظنک
 صفتیدر ضمیر وادی یه راجعدر (تأیه) تثبت و توقف معناسنه در اقل نك
 فاعانه اولان نسبتدن تمیزدر (و) عاطفه در (اخوف) اقل اوزره معطوفدر
 اخوف اسم تفضیل اولوب مبنی للمفعولدر ایچنده مستکن نائب فاعل وادی یه
 راجعدر (الا) حرف استنادر (ما) مصدریه توقییه در (وقی الله)
 فعل و فاعل جمله سی لامحل لها من الاعراب مانك صله سی اولوب تأویل
 مفردده اوله رق بتقدیر المضاف محلا منصوب اخوف نك مفعول فیهیدر ای
 الا وقت ما وقی الله دیمکدر و مستثنی مفرعدر و بوجهور عندنده در و بعضیلر
 عندنده ما اسم موصولدر زکدن و یاخود اخوفده اولان ضمیر مستکن دن
 مستثنی اولمق اوزره منصوبدر و وقی الله جمله سی لامحل لها من الاعراب
 مانك صله سیدر و موصوله عائد مخدوفدر ای الا ما وقاء الله دیمکدر (ساریاً)
 لفظاً منصوب ركب لفظندن حالدر و یاخود (وقی) فعلنک مفعولیدر (ساری)
 سری دن اسم فاعلدر سری ضم سین ایله هدی وزننده کیجه ایله یوریمک
 معناسنه در.

مقاد شعر بن وادی السباعدن مرور ایتدم حالبوکه قر نغلق اولدقده وادی
 السباع کبی بروادی کورمدم او یله وادی که آنده قورقوسندن طوره
 طوره یوریان دوه جیلر پک اقل و نادر اولوب غایت مخوفدر و شو حال دهشت
 اشمال جمیع وقتده در آنحق جناب مولانک و قایه ایلدیکی وقتده دکل دیمکدر.
 اشبو شعر دن مانحن فیهمز لاری کوادی السباع وادیاً اقل به ركب
 عباره سیدر شو عباره یی اولجه سبقت ایلیان عباره من سیاقنده تعبیر ایدر
 ایسه ک (لاری وادی اقل به ركب منهم فی وادی السباع) دیرز و طریق اختصاره
 کیدر ایسه ک (منهم فی وادی السباع) موقعند من وادی السباع دیمکله اکتفا
 ایدرز الله اعلم بالصواب و هو نعم المرجع و نعم المأب .

کنندند بر فعل اصطلاحينك معنای مطابقی و یا معنای تضمینی فهم
اولنان لفظلردر

کنندیلردن بر فعل اصطلاحينك مطابقة معنای فهم اولنانده اسماء افعالدرکه
انلردن مبحث مبنیده مقدار کافی بحث اولندی .

کنندیلردن بر فعلك معنای تضمینی یعنی بر حدث مفهومی فهم اولنانلرده
اسماء افعالك غیری مثلاً ظرف مستقر اسم منسوب اسم مستعار اسم صفت
وسائری کی .

(ظرف مستقر) کنندند بر متعلق عام یعنی، کون، حصول، وجود، کی هر
بر موجوده ملحوظ بر فعل یعنی حدث عام مفهومی فهم اولنمی ملاحظه سیله
معنای فعلدن عد اولنمشدر و بعضیلر مثلاً (فاضل جامی) کی، معنای فعلی،
عبارده مصرح و یا خود مقدر اولیه رق مجرد قحوای کلامدن استنباط
اولنمغه تخصیص ایلدکلرندن ظرف مستقرده ایسه ده متعلق عام اسم فاعل
و یا خود فعل اوله رق مقدر بولندیغندن ظرف مستقری فعل و یا خود
شبه فعلده ادخال ایلمشلردر .

ظرف مستقر قانك فتحیله اولوب ظرف مستقریه دیمکدر ظرف نحات
عندنده طوغریدن طوغری به ظرف زمان و ظرف مکانه اطلاق اولنور
بعده تسامحاً جار و مجروره دخی اطلاق اولنمشدر و متعلق هر بر موجوده
عام و شامل یعنی کون حصول وجود استقرار کی هرشیده بولنور
افعال عامه دن اوله رق حذف اولنوب جار و مجرورده متضمن قینور
یعنی معناسی آندن فهم اولنور ایسه اول جار و مجروره ظرف مستقر
تسمیه اولنور وجه تسمیه جارك متعلق اولان فعل عام محذوفك معنا
و عملی و ایچنده مستکن اولان ضمیری عندالحذف بالانتقال جار و مجرورده
مستقر اولسی ملاحظه سیدر .

شو بیانندن مستبان اوله جعی اوزره ظرف مستقر ایکی شرطه مشروطدر
برنجیسی متعلقك محذوف اولسی و ایکنجیسی متعلق محذوفك افعال
عامه دن بولنمشدر .

واکر جار و مجرورك متعلق حذف اولنماش و یا خود حذف اولنش

ایسه ده بر فعل خاص اولوب افعال عامه دن دکل ایسه اول جار و مجروره ظرف لغو تسمیه اولنور مثلا مررت بزید قولزده (بزید) متعلق اولان مررت مذکور اولغله ظرف لغودر وزید فی الدار قولزده (فی الدار) اکر متعلق محذوف مثلاً حصل و یا حاصل کی افعال عامه دن تقدیر ایدیلور ایسه ظرف مستقردر و اکر مثلاً اکل و یا آکل کی بر فعل خاص تقدیر ایدیلور ایسه ظرف لغودر لکن بعضیلر ظرف مستقرده آنجق متعلقنک محذوف بولنسی شرطیه استفا ایدوب متعلق محذوف فعل خاص اولسه ده ظرف مستقر اطلاق ایتدکارندن بونلره کوره ینه ظرف مستقردر .

ظرف لغوه شو اسمی اطلاقک وجهی کندندن برعالمک معناسی فهم اولنیموب و عمل و اعراب و ضمیر کی برشی انتقال ایلیمدیکی جهتله ایچی بوش ظرف کی اولسی ملابس سیله در و برده من جهة العمل ملنی اولوب اصلانه مظهر ونه مضموده عامل دکلدر و بعضیلر ظرف تسمیه سی مناسبندن خالی بر تسمیه اولوب ظرف مستقره مشابهتی جهتله مجرد بر اصطلاحدر ولغو تسمیه اولنسی کلام کنندیسز تمام اولسی حسیله کلامده فضله بولندیغندندر دیدیلر و بعضیلر کلام اللهده دخی بولنسی جهتله لغو تسمیه سنی محل ادب کوره رک ظرف مستقره متعلق محذوفنک افعال عامه دن بولنسی ملابس سیله ظرف عام دیدکاری کی ظرف لغوه دخی متعلقنک خاص اولسی مناسبتیه ظرف خاص تسمیه ایلدیلر .

ظرف مستقرلر متضمن اولدقلری کون وجود حصول کی افعال عامه نك یعنی حذف اولنان متعلقلرینک منابنده بولندقلرندن هر حالده عامل اولورلر ایسه ده عمللری متضمن اولدقلری افعال عامه منابنده نیاتلرندن ایچون اولسی جهتله ضعیف بولندیغندن فاعل ظاهری مرفوع قیله میه جقلری کی مفعول به ده دخی عامل اوله مزلر وجود حصول کون کی متضمن اولدقلری افعال عامه نك افعال لازمه اولسی جهتله باقلدقده مفعول بهی هرگز منصوب قیله میه جغنده شبه اولنمز .

لکن امور سته یعنی مبتدا موصوف موصول ذوالحال نفی واستفهامدن

برینه اعتماد ایلر یعنی اوللرنده بولنردن بری بولنور ایسه قوت بوله رق
فاعل ظاهری مرفوع قیله بیلورلر و برفاعل ظاهری مرفوع قیلمدقلرنده
فاعللری متعلق محذوفدن منتقل ضمیر مستتردر و بیللمیدرکه ظرف
مستقرلر مفعول به و فاعل ظاهرک غیری حال و ظرف و سائر بوکبی
معموللرده بلاشرط عمل ایده بیلورلر.

معنای فعلدن (اسم منسوب) آخرینه نسبت ایچون بریای مشدده کتوریلان
اسملردرکه عمل خصوصنده اسم مفعول کبی اولوب اسم مفعولک عملنده
ذکر اولنان شرطلر بونده دخی مرعیدر (مررت برجل هاشمی اخوه)
قولزده هاشمی کبی ماقبلنده موصوفه اعتماد ایله (اخوه) کله سنی نائب
فاعلی اولق اوزره لفظاً و اوایله مرفوع قیلمشدر معنای فعلدن (اسم
مستعار) مشابیهت علاقه سیله و ماوضع لهی اراده ایلمکه مانع برقرینه دخی
اوله رق ماوضع لهنک غیرنده استعمال اولنان اسمدرکه افاده ایلدیکی بر
معنای فعل مقتضاسی اوزره عمل ایلر (مررت برجل اسد غلامه) و (مررت
برجل اسد علی) قوللر مزده اسد کبی اسم فاعل صیغه سیله مجتبی کله سنک
مفادنی اعطا ایتمکده اولدیغندن مجتبی کله سی کبی عامل اولوب مثال اولده
موصوفه اعتماد ایله فاعل ظاهری مرفوع قلمش و مثال ثانیده ظرفده عمل
ایلمشدر.

معنای فعلدن (اسم صفت) کندندن برصفت معناسی فهم اولنان هر بر
اسمدرکه اول فهم اولنان صفت کبی عمل ایلر و (هو الله فی السموات)
قول شریفنده لفظه جلاله و (زید خاتم فی ظنی) قولزده خاتم کبی لفظه
جلاله و خاتم علم ایسه لرده لکن لفظه جلالدن المعبود و خاتم دن جواد
معناسی فهم اولنغله متضمن اولدقلری اشبو معنای وصفی اعتباریله
(فی السموات) لفظه جلاله یه و (فی ظنی) خاتم لفظه تعلق ایلمشدر آیت
کریمه و هو المعبود لمن فیها وزید خاتم فی ظنی قوللر زید جواد فی ظنی
دیگر.

معنای فعلدن (اسم اشاره) مثلاً هذا زید یوم الجمعة امام الامیر جالساً
قولزده اولدینی کبی یوم الجمعة و امام الامیر هذا دن منهم اشیر معناسنک

مفعول فیهی و جالساً زید کله سندن حال اولوب عامل هزادن مستبان اشیر
مفهومیدر زیرا زید کله سی معناده اول فهم اولنان اشیر مفادینک مفعولیدر
مثال مذکور اشیر زیداً یوم الجمعة امام الامیر جالساً دیکدر.

و بعض لیت و لعل کله لرنده دخی معنای فعل اعتبار اولنور مثلاً، لیت،
ویا خود لعل زیداً یوم الجمعة عندنا مسروراً قولزده اولدینی کی که (لیت)
اتنی و (لعل) اترجی مفادنی اعطا ایتسی ملا بسه سیله (زیداً) شو اعتبارایله
مفعول به منزلده و مسروراً آندن حال قیلمشدر.

سائر حروف مشبهه بالفعلدن دخی معنای فعل فهم اولنور ایکن لیت
ولعدن غیرینک ذکر اولنم سامسی زیرا معنای فعل اعتبار اولنمق جهتیله
عمل (لیت) و لعل کله لرینک غیرنده مسموع اولمامشدر.

بعضیلر حرف نداده دخی معنای فعل اعتبار ایلدیلر مثلاً یازید را کبا
قولزده، یا، لفظی ادعو مفادنی اعطا ایلنمسی جهته بالنفس، یا، کله سی عامل
قنوب منادا اداه ندایه مفعول به قیلمشدر و اما، ادعو، مقدر اولوب،
یا، کله سی ادعو منابنده در منادا مقدر اولان ادعو کله سنک مفعول بهیدر
دیالره کوره اداه ندا معنای فعلدن دکدر بونکده تفصیلی منادا بحثنده
مرور ایلنشدر و دخی حرف تشبیه ده دخی بعض معنای فعل اعتبار
ایدیلنشدر که بوده لفظاً و یا تقدیراً ایکی قسم اوزره تصور اولنور لفظاً
مثلاً (زید قائماً کمر و قاعداً) و (کانه اسد صائلاً) قولر مزده اولدینی کی قائماً
زید کله سندن وقاعداً عمرو کله سندن و صائلاً ضمیر بارزدن حال واقع
اولمش و عامل شبه مفادنی اعطا ایلنمسی حسیله کاف و کان در دینلمشدر.
و تقدیراً مثلاً زید اسد صائلاً قولزده اولدینی کی زید کاسد صائلاً
تقدیرنده در.

و دخی حرف تنبیه ده دخی بعض معنای فعل اعتبار اولنور مثلاً آنفا
مرور ایلنن هذا زید یوم الجمعة امام الامیر جالساً قولزده عامل انبه مفادنی
اعطا ایلنمسی حسیله هذا کله سنده حرف تنبیه اولان ها لفظی اعتبار
اولنه بیلور.

و حرف دخی نفی ده دخی بعض معنای فعل اعتبار ایدیلور مثلاً (ما انت

بنعمة ربك بمجنون) قول شریفند و (لانت بذی علم كاملا) قول زده اولدی
 کبی مثال اولده بنعمة قولنده ، باء ، ما کله سندن منفهم انتفی مفادینه متعلق
 قیلنوب آیت کریمه انتفی منك الجنون ملابساً بنعمته و کرمه دیمکدر دینلمشدر
 و مثال ثانیده کاملاً علمدن حال اولوب عامل انتفی مفهومیدر انتفی منك
 العلم کاملاً دیمکدر.

شود کراولناندن ماعداء استفهام، استثناء، مضمون جمله، نسبت حکمیة، و سائر
 کبی معنای فعل اعتبار اولنان یرلردخی وارد که محمل رنده ثبت اولنمشدر
 عندالمطالعه معلوم اولور. خفی اولیه که ذکر اولنان اسم صفت و آنی ولی
 ایدن معنای فعللر معمولات فعلدن آنجق فاعل ایله مفعول بهک غیری
 حال و ظرف کبی معموللرده عمل ایده بیلورلر و عند البعض فاعل ظاهر
 و مفعول بهده عمل ایده مدکاری کبی مفعول مطلقده دخی عمل ایده مزلر
 نته کیم فاضل عصام حاشیه سنده ذکر ایلنمشدر.

ومن الله التوفيق وعليه التكلان

﴿المطلب الثاني في الفعل﴾

مطلب ثانی فعلک بیاننده اولوب ماضی و مضارع و نواصب و جوازم و متعدی
 و غیر متعدی و افعال قلوب و افعال ناقصه و افعال مقاربه و فعل تعجب
 و افعال مدح و ذم و نیجه مسائل نفیسه و مواد مفیده نک بیان و عیاننده در.

درس ۱۹۱

فعل لغة حدث معنایه در و اصطلاح نحاطده (مادل علی معنی مستقل بالفهم
 مقترن باحد الازمنة الثلاثة) دینه رک تعریف اولنمشدر یعنی فعل اوج زمانک
 برینه مقترن اولوب مفهومیته مستقل بر معنایه دلالت ایلان کله در.
 فعلک ماده سی وضع شخصیه حادثه دلالت ایدوب و هیئت وضع نوعیه
 احدازمنة ثلثیه دلالت ایلر. و حدث عرض اولوب بذاته قائم اوله میه جفندن
 بر فاعله نسبت اقتضا ایدر شو تقدیرده فعلک معنایه حدث و زمان

و بر فاعله نسبت اولش اولور . بونلردن حدث وزمان مستقل ایسه ده
بر فاعله نسبت معنای حرفی اولوب طرفین نسبتك حالتك تعرف
و ملاحظه سینه یعنی برینك مسند و دیگرینك مسند الیه اولدیغنی بیامکه
آلتدرکه شو حالده غیر مستقندر مستقل ایله غیر مستقندن مرکب اولان
معنا ایسه غیر مستقل اولدیغندن فعلك معنای مطابقیسی غیر مستقل اولور .
شو صورتده (مادل علی معنأ مستقل) قولزده معنای مستقندن مراد
معنای مطابق اولمیوب بلکه معنای اعمدر لکن اوده آنجق ضمن تضمن ده
متحققدر . فعلك معنای تضمینسی اولان حدث ایسه مستقل اولدیغندن
فعلك معنای مستقله ده دلالتی بولنوب تعریف فعلدن حرف خارجدر زیرا
حرفك هرگز معنای مستقلی یوقدر .

(فاضل عصام) حاشیه سنده بیوررلرکه بر فاعله نسبت اجمالاً بر (فاعل ما) بی
تعقل ایله متعقل اولوب بوده فعلی ذکر ایلمکه منفهم اولور شو صورتده فعلك
معنای مطابقیسی مستقل اولوب تعریف فعلده معنادن مراد معنای مطابقی
اولش اولور . و (اما سید شریف) حضر تکرینك ارائه بیوردقلری
اوزره فعلده بر ، فاعل معینه نسبت ، اخذ اولنور ایسه اشبو صورتده عدم
استقلال ظاهر اولوب فعلك معنای مطابقیسنه دلالتی فاعلنك بعینه ذکرینه
محتاجدر پس تعریف فعلده توجیه سابقه احتیاج درکاردر و هر حالده
حد فعلدن حرفك خروجی امر باهردر .

وهیئت فعل وضعاً احد ازمنه ثلثیه دلالت ایلیه جکندن اشبو قید ایله اسم
دخی حد فعلدن خارج اولور و اما زماندن منسلخ اولان فعللر عسی و کاد
و نعم و بش کی و کذا حدثن منسلخ اولنلر کان و صار کی بونلر وضعاً
زمان و حدثه دال بولندقلرندن حد فعلده داخلدر .

خفی اولیه که فعلك خواص کثیره سی اولوب (قد) و (سین) و (سوف)
و (جوازمك) دخولی و (تائیث ساکنه) و (ضائر بارزه متحرکه
مرفوعه نك) لحوقی خواص کثیره سندندر (قد) کلمه سنك فعله خاص اولسی
زیرا تحقیق فعل ایچون ودخی ماضیده بعض تقریب و توقع و مضارعده
تقلیل ایچون موضوعدر بومعنا لر ایسه آنجق فعلده اولور . و سین ایله

سوف نك جهة اختصاصی زیرا بونلر فعلی زمان حالدن زمان استقباله تاء
 خیر ایچون وضع اولمشلردر بودخی انجق فعلده متصور اولور. وحوازمك
 فعله جهة اختصاصی زیرا جوازم یا بر فعلی نفی ایچون اولور لم ولما کی
 ویاخود طلب فعل ایچون اولور (لام امر) کی ویاخو طلب ترك ایچون
 اولور (لاء ناهیه) کی ویاخود برنسنه یی بر فعله تعلیق ایچون اولور ادوات
 شرط کی شو معنالر دخی آنحق فعلده بولنه جغندن بالضرور فعله مختص
 اولور. وتای تأنیت سا کنه نك جهة اختصاصی زیرا تای تأنیت متحرکه اسممه
 خاص اولمغله تای تأنیت سا کنه ده فعله ویرلمشدر و برعکس اولماسی
 اسمده خفت وفعله ثقلت بولمغله خفیف اولان سکونك فعله ویرلمسی
 اولا اولدیغنددر وحرکه و سکونله تفریق اولنسی یکدیگرنندن فرق
 ایچونددر. وضمائر بارزه متحرکه مرفوعه نك جهة اختصاصی زیرا بونلر
 مقتضی فاعل اولانه داخل اولوب وکلامده فاعل اولورلر فاعل اقتضا
 ایلمك ایسه فعلك شاننددر سائر فاعل اقتضا ایدن اسملر ایسه فعلك
 فرعیدر و بزده فرعله اصل مساوی اولسون ایچون ضمیرك ایکی نوعی که
 بری ضمیر بارزو دیگرى ضمیر مستتردر بونلردن بری فروع فعلان
 منع اولنق لازم کلشدر ضمیر مستتر اخف و اخصر اولمغله منع ایدلیوب
 انجق فعلك ماعداسندن ضمیر بارز منع ایدلمش پس ضمائر بارزه فعله
 مختص اولمشدر.

درس ۱۹۲

(مبحث فعل الماضی) فعل ماضی مادل علی زمان قبل زمانك دینمكله
 معرفدر یعنی ایچنده بولندیغك زمان حالدن اول مرور ایتش برزمانه
 بحسب اصل الوضع دلالت ایلیمان فعلدر دیمکدر و آخری همیشه لفظاً
 ویا تقدیراً فتح اوزره مبنیدر ضرب ورمی کی (مبنی اولمسی) اسممه
 مشابهت تامه سی اولمدیغی وفعله اصل اولان بنما اولدیغی جهتله در.
 و (حرکه اوزره مبنی) اولمسی اسم موقعنده واقع اوله بیلمکده اسممه
 استعمالاً مشابهتی بولندیغندن و فعل مضارع شو جهتله ودخی ذکرى آتی

مضارع موقبلزده کتورلمسی جائز اولمغله و شرط و جزا دخی اوله بيلمکه
 مشابهي اولديغنددر . نته کيم مررت برجل ضارب قولزده ضارب موقعنده
 يضرب ديمك جائز اوله بيله چكي کي ضرب دخی دينله بيلور وان تضربني
 اضربك دينه چك يرده ان ضربتي ضربتك دخی دينور و دائماً بر مرفوع
 طلب ايلمکده واکثر منصوبي دخی استدا ايتمکده و مصدر و زمانه دلالاتي
 اولمقده دخی فعل مضارعه مشابهي واردر فعل مضارعك ايسه اسمه
 مشابهي تامه سي بولنديغندن فعل ماضينك شو جهتله دخی اسمه مناسبي
 بولنش اولور لکن اسمه مشابهي تامه سي اولمديغندن فعل مضارع کي
 اسمده اصل اولان اعرابي اخذ ايده ميوب انحق حرکه اوزره مبنی اولمشدر
 و (فتح اوزره مبنی) اولمسی فتح اخف حرکات بولنديغني جهتله در . لکن
 (واوک) غیری آخرنده ضمير مرفوع متحرك بولنور ايسه مثلاً ضربن
 صيغه سندن ضربنا صيغه سنده دکن اولان صيغه لرده اولديغني کي برکله
 واحده حکمنده اولان اشبو صيغه لرده اربع حرکات متواليات جمع
 اولمسون ايچون ضمير مرفوع متحرك ماقبلي يعني (آخر ماضی)
 سکون اوزره مبنی قيلنور . و آخرنده واو بولنور ايسه واوه
 مجانستندن ايچون آخری لفظاً ويا تقديرأ مضموم قلنور ضربوا ورموا
 کله لرنده اولديغني كي . و (اما) آخرنده ضمير منصوب متصل
 اولور ايسه کلامده فضله اولوب ماقبلندن جزء کي اوليه جغندن آخر
 ماضی ساکن قيلنمز ضرب به و ضربك و ضربنا قوللرمزده اولديغني کي .
 و خفي اوليه که انشاء ايقاعيده افعالن غالباً فعل ماضی واقع اولور مثلاً
 بت و اشتریت کي بولنر ايله خارجده بريعدن اخبار مراد اولميوب انحق
 شولفظلر ايله في الحال تحصيل بيع قصد اولنور شو جهتله صدق و کذب
 احتمالی يوقدر و اما ابيع قولمز و انشاء مراد اولنميرق بت و اشتریت
 خارجده بريعي اخبار اولمغله صدق و کذب محتملدرکه واقعه مطابق ايسه
 صادق دکسه کاذبدر . و بيلمليدرکه بش محله فعل ماضی استقبال معناسنه
 منصرف اولور .

(اولکيسي) انشای طلبی موقعنده که بوده يادعا اولور رحمك الله کي

یرحمک الله یعنی الله سکا رحمت ایلسون دیمکدر ویا امر اولور مثلاً سائل
 مسترحمی خادمی زیده حواله ایله آمرک (اعطاک زید) قوی کی .
 (ایکنجیسی) وقوعی مجزوم اولسنی قصدا یله تحقق وقوعه دلالت ایلسون
 ایچون امور مستقبله دن لفظ ماضی ایله اخبار اولندیغنده در (ونادی اصحاب
 الجنة اصحاب النار) قول شریفده اولدینی کی .

(اوچنجیسی) جواب قسمده ادات نفی دن (لا) ویاخود (ان) ایله منفی
 بولندیغنده در (والله لافعلت) و (والله ان فعلت) کی والله لافعل دیمکدر .
 (دردنجیسی) ان شرطیه نك و ان شرطیه معناسنی متضمن کله لرك دخولی
 عندنده در (ان اکرمتی اکرمتک) و (متی اعطیتنی احسنک) قولار مزده
 اولدینی کی ان تکرمنی اکرمتک ومتی تعطنی احسنک دیمکدر .

(بشنجیسی) ظرف مضاف منبأ بنده بولنان (اما) ی مصدریه توقیتیه نك
 دخولنده در (لا فارقک مادامت السموات) قولمزده اولدینی کی مدة ان
 تدوم السموات دیمکدر وبعض بونده ماضی معناسنده اوله رق دخی قالور
 (و کنت علیهم شهیداً مادمت فیهم) قول شریفده اولدینی کی . و بیلملیدر که
 آلتی محله فعل ماضی ماضی واستقبال معنارینه محتمل اولور .
 (اولکیسی) همزه تسویه دنصکره (سواء علی اقامت ام قعدت) قولمزده
 اولدینی کی .

(ایکنجیسی) کلامدنصکره (کما قمت قمت) قولمزده اولدینی کی .
 (اوچنجیسی) حیثاً دن صکره (حیثما قعدت قعدت) قولمزده اولدینی کی
 زیرا شواوچنده رایحه شرط واردر .

(دردنجیسی) حرف تخضیض دنکره (الانزلت) و (هلاقت) قولار مزده
 اولدینی کی .

(بشنجیسی) مبتدا واقع بر موصول عامه صله اولدقده (الذی اتانی فله درهم)
 قولمزده اولدینی کی .

(التنجیسی) مبتدا واقع بر نکره عامه صفت واقع اولدقده (کل رجل اتانی
 فله درهم) کی زیرا بولنده دخی رایحه شرط واردر نته کیم مبتدا بآبنده
 مزور ایلدی .

(مبحث المضارع) فعل ماضیدن بر بنده بیان اولندی ایسه بیللمیدرکه فعل مضارع (ما اشیبه الاسم باحد حروف نایت) دینمکله معرفدر یعنی فعل مضارع نایت کلمه سنک جمع ایلدیکی حروف اربعه دن بریسی اولنده بولنق سببیه اسم فاعله مشابه اولمش بر فعلدر دیمکدر . اشیبو درت حرفدن همزه فعل مضارع متکلم وحده ده و نون متکلم مع الغیرده و تا مفرد مؤنث غائبه و تثنیه مؤنث غائبه ده والی عدد مخاطب و مخاطبه لرده و (یا) غائبه لرده و جمع مؤنث غائبه در . و حروف مضارعه ماضیسی درت حرفلی اولنلرده مضموم و انک غیرنده مفتوحدر اولنده نایت حرفلرندن بر حرف بولنمغله فعل مضارعک اسم فاعله مشابهتی اوج جهته درکه لفظاً و معنأ و استعمالاً مشابهدر (اما لفظاً مشابهتی) فعل مضارع اسم فاعله مطلق حرکات و سکناتده ترتیب و عددلرنده موازن بولندیجهته در ضارب و یضرب و مدحرج و یدحرج کی و (اما معنأ مشابهتی) ایکی وجهه در (وجه اول) شیوع و خصوص قبول ایللمکده در زیرا اسم فاعل لامدن مجرد اولدیغنده شیوع افاده ایدوب و حرف تعریفک دخولی عننده تخصص ایلر ضارب و الضارب کی بونک کی فعل مضارع دخی حرف استقبال و حالدن تجرد عننده حاله و استقباله محتمل اولورکه شیوع افاده ایتش اولور یضرب کی و بونلردن برینک دخولی عننده تخصص ایدرکه حرف حالک دخولی عننده حاله و حرف استقبالک دخولی عننده استقباله دلالت ایلر سیضرب و مایضرب کی (وجه ثانی) کرک فعل مضارع و کرک اسم فاعله قرائن دن تجرد عننده فهم زمان حاله مبادرت ایلرکه معنأ شو و وجهه دخی مشابهلدر و (اما استعمالاً مشابهتی) بو دخی ایکی وجهه در (وجه اول) فعل مضارع ایله اسم فاعل ایکیسی دخی نکره یه صفت واقع اوله بیلورلر مثلاً جائی رجل ضارب دینلدیکی کی جائی رجل یضرب دخی دینور (وجه ثانی) فعل مضارع ایله اسم فاعلدن هر برینک اوزرینه مفید تأکید اوله رق لام ابتدا داخل اوله بیلور مثلاً ان زیداً لضارب دیندیکی کی ان زیداً لیضرب دخی دینور اشیبو لامه لام ابتدا

دینلمسی زیرا فی الاصل مبتدا اوزره داخل اولور بوراده (ان) نك
 دخولی سببيله ابتدادن تأخر ايلمشددر پس اصلنه رعاية آنحق اسممه
 ویاخود اسممه مشابعت تامهسی بولانه داخل اولور شوو جهتله (ان زیداً
 لضرب) دینلمز اشته استعمالاً مشابعتلریده ذکر اولنان شوایکی وجهلهدر
 بینلرنده اشبو مشابعت کامله بولنمق سببيله فعل مضارع اسممه اسممه اصل
 اولان اعرابده تابع اولهرق معرب اولمشدر واسم دخی فعلده اصل اولان
 عملده فعله تابع اولهرق عامل اوله یلمشددر.

خفی اولمیه که شود کر ایلدیکمز بصريلك ذهاب واختیارلرینه مبتنی در واما
 کوفیلره کوره لام ابتدا دینلان فعل مضارعه داخل اولدقده مضارعی زمان
 حاله تخصیص ایلر. سین وسوف ادات استقبالدن اولدیغی کی کوفیلره کوره مضارع
 اوزره داخل لامده ادات حالنددر شوو تقدیرده فعل مضارع اوزره لامك
 دخولی اسممه ایریجه بروجه مشابعت اوله مز و برده کوفیلر عنندده فعل
 مضارعك معرب اولمسی اسممه مشابعتی اولدیغندن دکلدر بلکه فعل مضارع
 بالاصاله معربدر وشووجه اوزره بیان ایدرلرکه اسملر اوزره معانی مختلفه
 توارد ایلدیکی کی برقاج معنا بیننده مشترك و محتمل اولان حرفلرك فعل
 مضارعه داخل اولمسی جهتيله فعل مضارع اوزره دخی معانی مختلفه
 توارد ایلمکله (حروف مشترکه) ومعالميريك تبیینی ایچون اقتضاسنه
 کوره اعرابلره محتاج اولور مثلاً لا تضرب قولزده (لا) نافییه وناهییه
 اولمغه محتمل اولمغه نافییه اولدیغنی اعلام ایچون فعل مضارع اعراب
 رفعه وناهییه اولدیغنی اعلام ایچون جزمه محتاجدر مرفوع اوقندقده لا
 خالصاً نفی ایچون اولمش اولور و مجزوم اوقندقده نهی ایچون اولمش اولور
 ومثلاً (لا تأكل السمكة وتشرب اللبن) ده و او و او صرف و او عطف اولمغه
 محتمل اولمغه و او صرف اولدیغنی اعلام ایچون تشرب قولمز اعراب
 نصبه وعاطفه اولدیغنی اعلام ایچون اعراب جزمه محتاجدر منصوب
 اوقندقده و او صرف اولدیغنی بینلور و مجزوم اوقندقده عاطفه اولدیغنی
 تیقن ایدیلور ومثلاً (ما بالله حاجة فيظلمك) قولزده يظلم قولمزك منصوب

اوقمسی فانك سببیه اولدیغنه و مرفوع اوقمسی عاطفه بواندیغنه دایلدیر
 ومثلاً لیضرب قوازه یضرب قولزك جزئی لامك لام امر اولمسنه
 ونصبی لامك لام کی ویاخود لام ججود اولمسنه دلالت ایدر وشوذر
 اولنان اعراباردن هر بری سببیه ده معنا متغیر اولور. وهر تقدیر بعض
 محلهء مثلاً یضرب زید ولن یضرب زید ولم یضرب زید قوللرمزده برینك
 معناسنك دیکره التباسی محذوری یوق ایسه ده بونلرده دخی حکم مطرد
 قیلنمشدر كرك اسم و كرك فعللرده مواضع ملتبسسه غیر ملتبسسه دن كرك
 اکثر ویا اقل ویا مساوی اوله مواضع ملتبسسه غیر ملتبسسه یه حمل اولنق
 جریان ایده کیشدر. زیرا بعض اولور که اقلده علتی ثابت اولان بر حکم
 اکثرده مطرد قیلنور که اکثر اقله حمل اولنور نته کیم یعد کلمه سنده و او
 بین یاء و کسره واقع اوله رق حذف اولندیغندن اطراداً للباب تعد واعد
 ونعده دخی حذف اولنمشدر ونته کیم اگر مده یعنی نفس متکلم و حده ده
 ایکی همزه نك اجتماعی کریه کوریلر ك همزه حذف اولندیغنی کی اطراداً
 للباب یكرم و تکر و نکر مده دخی اجتماع محذوری یوق ایکن حذف
 اولنمشدر.

درس ۱۹۴

خفی اولیه که فعل مضارعك اسم فاعله مشابتهی اولنده نایت حرفلرندن
 بر حرف بولنق سببیه اولدیغندن فعل امرلر وقف اوزره مبنی اولوب
 معرب اوله مامشلردر زیرا مثلاً انصر کله سنك اصلی تنصرایدی حرف
 مضارعة حذف اوله رق ابتدا بالاسکون متعذر اولمغله ابتدا ممکن اولسون
 ایچون عین الفعلنه تبعاً مضمومه اوله رق برهمزه وصل کتوریلنمشدر
 شو حالده اسم فاعله مشابته قالممغله آخری وقف اوزره مبنی اولمشدر.
 لکن بوذهاب بحریلرک رأیدر واما کوفیلر عنندنه انصر کله سنك اصلی
 لتصردر کثرت استعمالدن ایچون لام امر حذف و تقدیر اولنمش و حرف
 مضارعة حذف اولنوب یرینه برهمزه وصل مضمومه کتوریلنمشدر بونلره
 کوره آخری لام مقدره ایله مجزوم اولوب معربدر مبنی دکلر تفصیل

بحث کتب صرفیه در : ویلملیدرکه اسم فاعله مشابعت تامه انحق فعل
 مضارعده کورلمکه فعل مضارعك ماعداسی معرب دکلردر. واما فعل
 مضارع اخرینه نون تأکید مقله و مخففه ونون جمع مؤنث لاحق اولمده
 همیشه معربدر. لکن اشبو نونلردن بریسی داخل اولدقده مبنی اولور
 زیرا نون تأکیدك فعل مضارعه شدت اتصالی اولمغه فعل مضارع
 صیغه سندن جزء کبی اولور شو تقدیرده اعرابا کر نون تأکیددن اولجه
 مضارعك آخرینه لاحق اولسه اعراب وسط کلهده اولسی لازم کلور
 حالبوکه اعرابك محلی آخر کلهدر واکرنون تأکید اوزره ادخال اولسه
 اعراب کلمه اخری اوزره داخل اولمش اولور. و برده نون حرف اولمغه قابل
 اعراب دکلدر. و کذا نون جمع مؤنثك ماقبلی ساکن اولمغه قابل اعراب
 دکلدر و نون جمع اوزره داخل اولسه اعراب کلمه اخری اوزره داخل
 اولمش اولور. و سبویه شو وجه اوزره بیان ایلمشدرکه آخری اسکان
 اولمغه مثلاً یضر بن یضر بن یه مشاهددر اسمه مشابه اولمسيله فعلی) اصلی
 اولان بنادن اخراج جائز اولدقده فعله مشابه اولان فعلی اصلی اولان
 بنایه رد ایلمک اولی اولور و حالبوکه محل اعرابده سکون الزام اولنق کبی
 بنایه داعی دخی موجوددر دیشدر. واما **کوفیلر** اشبو اخرینه نون
 تأکید ونون جمع مؤنث لاحق اولمش فعل مضارعك وجه بناسنده شو
 وجهله اداره کلام ایتدیلرکه فعل مضارعك اعرابك عاتی اسمك اعرابك
 عاتی قدر ظاهر اولماغله وشو نونلر ایسه خواص افعالدن اولسی جهتله
 جانب فعالیت تقویه ایدوب فعللرک ایسه اکثری مبنی اولمغه ادنی سببله
 بنایه رجعت ایدر دیدیلر و بعضیلر نون تأکیددن اولجه کلمه نك اخرنده
 اولان حرکتلر مفرد مذکر و جمع مذکر و واحد مؤنث یثنی فرق ایچون
 جلب اولمشدرکه مفرد مذکرده مفتوح و جمع مذکرده مضموم و واحد
 مؤنثده مکسوردر پس اخری حرکت مجتبله ایله مشغول اولمغه اخرینه
 نون تأکید داخل اولمش فعل مضارعك اعرابی تقدیریدر دیدیلر
 و آخرینه نون جمع مؤنث لاحق اولانده و ضربن یه نظر ایله سکون الزام
 اولنوب و علت بناضعیف اولمغه بودخی معرب و اعرابی تقدیریدر دیدیلر
 و تفصیل البحث فی الرضی .

بیامایدر که اول کتابده مرور ایلهدیکی اوزره فعل مضارعك اعرابی رفع و نصب و جزمدر آخرینه ضمیر بارز مرفوع متصل اولیوب آخری حرف صحیح اولان فعل مضارعك رفعی ضمه و نصبی فتحه و جزمی حذف حرکه ایله در بوده مفرد مذکر غائبه و مفرد مؤنث غائبه ایله مفرد مذکر مخاطبه و نفس متکلم و حدهده و نفس متکلم مع الغیرده در که درت صیغهده در کرک تحتلرنده مستکن ضمیر مرفوع بولنسون زید یضرب و هند یضرب و انت یضرب و اضرب و یضرب کی و کرک بولنسون یضرب زید و یضرب هند کی و کرک آخرینه ضمیر بارز منصوب متصل اولسون یضربك و یضربك و اضربك و یضربك کی .

و آخرینه ضمیر بارز مرفوع متصل اولیوب آخری حرف عله اولان فعل مضارعك اگر آخرنده اولان حرف عله واو و یا خود یا ایسه رفعی تقدیراً ضمه و نصبی فتحه و جزمی حذف حرف آخر ایله یعنی آخرنده واو ایسه واوی یا ایسه یایی حذف ایله در رفعی تقدیراً ضمه ایله اولسی زیرا واو و یا اوزره ضمه ثقیلدر یدعو و یرمی کی . و نصبی فتحه ایله اولسی واو و یا اوزره فتحه خفیف اولدینی جهتله در لن یدعو و لن یرمی کی . و جزمی حذف حرف آخر ایله اولسی زیرا جازم اسقاط ایده جک حرکه بوله مدقده حرکه یه مناسب اولان حرفی حذف ایلمشدر لم یدع و لم یرم کی . و اگر آخرنده اولان حرف عله الف ایسه رفعی تقدیراً ضمه و نصبی تقدیراً فتحه ایله در یرضی و لن یرضی کی زیرا الف قابل حرکه دکلدر و جزمی عله مذکورده دن ایچون حذف حرف آخر یعنی حذف الف ایله در لم یرض کی .

و آخرینه نون جمع مؤنثک غیری ضمیر بارز مرفوع متصل اولان فعل مضارعك رفعی نون ایله و نصب و جزمی حذف نون ایله در بوده تنیه مذکر غائبه و تنیه مؤنث غائبه ایله تنیه مذکر مخاطب و تنیه مؤنث مخاطبه ده و جمع مذکر غائبه و جمع مذکر مخاطبه و مفرد مؤنث مخاطبه ده در در که بش صیغهده در یضربان و یضربان و یضربون و یضربون و یضربین کی نصب

و جزم عندنده نونلر اسقاط اولنور مثلاً ان یضربا ولم یضربا دینور . شو
 صیغه لرك رفعی نون ایله اولمسی زیرا محل اعراب آخر کله در و آخر کله
 شو صیغه لرده تنبیه لرده (الفه) مناسبتله فتحه ایله و جمع لرده (واو) ه
 مناسبتله ضمه ایله و مفرد مؤنث مخاطبه ده (یا) یه مناسبتله کسره ایله
 مشغول اولمغله آخر کله اوزره اعراب جاری اوله مامشدر و علة بنا
 بولنمغله اعراب بالکلیه منع دخی اولنه مامشدر نونک ایسه (غنه) ده
 واوه مشابتهی اولوب رفع کده . واوه مناسبتی بولنمغله (نون) اعراب رفع
 مقامنده قلنمشدر شو تقدیرده هر نقدر شو صیغه لرده علامت رفع اولان
 (نون) ک فاعل لری اولان ضمیر بارز مرفوع یعنی واوه و یا و الفد نصکره
 واقع اولمسی محذوری وارد خاطر ایسه ده ضمیر مرفوع متصل اولان
 واو و یا و الفک فعله شدت اتصالی بولنمغله فعلدن جزء کی در و باخصوص
 بونلر حروف مدولین اولوب و حرف واحد اوزره بولنلرندن کله بونلر
 ایله بیله منصور و عمار و مسکین کله لری کی کله واحده و کوریه جکی
 درکاردر . و شو صیغه لرك جزمی حذف نونله اولمسی زیرا نون علامت
 رفع اولمغله جزم صورتنده بولنه مز و نصبی دخی حذف نون ایله اولمسی
 اسمک تنبیه و جمع لرنده نصب جره تابع اولدینی کی فعلده ده نصب جزمه
 تابع بولندیغندندر و مفرد مؤنث مخاطبه صیغه سیده اخونینه محمولدر .

واما آخزینه نون جمع مؤنث لاحق اولان فعل مضارع مثلاً یضربن
 و تضربن کی بعضیلرینه کوره منی و بعضیلرینه کوره معرب اولوب اعرابی
 تقدیردر نته کیم آنفاً بیان اولندی و بیلملیدر که صیغ خمسّه مذ کوره ده
 اولان نون اعراب نون تأکید مشدده و مخففه ایله اجتماعی عندنده حذف
 اولنور و حذف اولنمشنک وجهی آخزینه نون تأکید لاحق اولمشنک
 بناسنه قائل اولنلره کوره ظاهر در و معرب اولوب اعرابی تقدیری اولمسنه
 قائل اولنلره کوره اجتماع نونات محذوریدر تفصیل بحث کتب صرفیه ده در .

درس ۱۹۶

خفی اولمیه که فعل مضارع نواصب و جواز مدن مجرد اولدقده مرفوع
 اولور و رفعنده عاملی تعیینده بش مذهب وارددر .

(مذهب اول) بصر یلر رفعنده عامل معنوی اولوب اسم موقعنده وقوعیدر مثلاً زید ضارب و و مررت برجل ضارب و و رأیت رجلاً ضارباً قولزده ضارب محلهده یضرب دخی دینور پس نواصب وجوآرمدن تجرد غنده اسمك اسبق واقوای اعرابی اولان رفع ایله مرتقع اولمش دیدیلر. بصریلرک شو ذهابه اعتراض اولنه رق فعلی مضارع ضله وقوعنده مثلاً (الذی یضرب) قولزده و (سیقوم) و (سوف یقوم) نحوئده وکاد فعلنه خبر واقع اولدقده مثلاً (کاد زید یقوم) کبی ودخی (یقوم الزیدان) نحوئده اسم موقعنده واقع اوله مز. (سیقوم) و (سوف یقوم) نحوئده عدم وقوعی زیرا سین ایله سوف اسم اوزره داخل اوله منزلر. (الذی یضرب) و (یقوم الزیدان) قولزده یضرب و یقوم محلهده اسم کتوریله یلور لکن شو صورتده اولان ترکیب فعل صورتده اولان اولان ترکیبه موافق اوله مز و (کاد زید یقوم) قولزده اسم موقعنده وقوعه صلاحیت منتفیدر پس اسم موقعنده واقع اوله مدیغی اشبو محللرده فعل مضارع بلا عامل مرفوع اولسی لازم کلور دیدیلر اشبو اعتراضه جواباً سین احد اجزای کله کبی اولوب سیقوم مع السین (قائم) موقعنده واقع اوله یلور و سوف سین کیدر و (الذی یضرب) موقعنده الذی ضارب هو و یقوم الزیدان قولزده قائمان الزیدان دینه یلور اعرابده اولکنه موافق دکل ایسهده لکن یضرب و یقوم) نك مجرد اسم موقعنده وقوعی کافیدر وکاد زید یقوم نحوئده اصل اولان اسم موقعنده وقوعه صلاحیت ایدی نته کیم شاعرك (وما کدت آیباً) شعرنده اسم واقع اولمشدر لکن مؤخرأ اشبو اصلدن عدول اولمشدر زیرا محلهده معلوم اوله جنی اوزره کاد افعال مقاربهدن اوله رق مضمون خبری اولان مصدرک قرب حدوتی و فاعلک کانه فی الحال آنکله مشغول اولسنی اقتضا ایدرکه شو حالده خبرینک انجی ادات استقبالدن مجرد فعل مضارع اولسی لازم کلور دینلمشدر.

(مذهب ثانی) ائمه نحاتدن (فراء) بصر یلرک مذهبه وارد اعتراضدن حذراً فعل مضارعک رفعنده عامل معنوی اولوب لکن نواصب

و جواز مدن تجر ديدر ديدى اسم موقعنده وقوعى اولمىنى قبول ايلامدى
 ابن حاجب حضرتلى دخی شو ذهابه ميل ايلمشدركه و پرتفع اذا تجرد
 عن الناصب والجازم بيو رمشدرد و دخی ابن هشام جامعنده وابن مالك
 كافيه كبرا سنده و جميع كتابلرنده بونی اختيار ايلمشدرد . ائمه نجاتدن
 (اخفشك) عاملى معنوى اولوب عوامل لفظيه دن تجر ديدر ديمى
 و (اعلم ششم پيك) عاملى معنوى اولوب اهمال عوامل ايله مرفوعدن
 ديمى دخی مذهب فرايه بك مغاير كوريله من .

(مذهب ثالث) ائمه نجاتدن ثعلبك ذهابدركه عامل معنوى اولوب نفس
 مضارعدر ديدى .

(مذهب رابع) بعض نحساتك رايدركه عامل معنوى اولوب اعرابى
 ايجاب ايليان سبيدر ديديلر .

(مذهب خامس) امام كساينك ذهابدركه عامل لفظيدر حرف مضارعدر
 زيرا (فعل مضارع) قيلمق اوزره حرف مضارعت كتورلايكننده همان رفع
 حادث اولمشدرد پس عمل رفعى عامل معنوى يه حملدن ايسه عامل لفظى يه احاله
 اولى در . و اما نواصب و جواز مدن برينك دخولنده حرف مضارعت عاملتى
 ضعيف اولمقله اجزاي كله عدادينه كيروب اشبوطارى منفصل ايله عامليتدن
 منعزل اولور ديدى . اشبودر سمزدن منفهم اولدينى اوزره فعل مضارعت
 عامل رفعنده بش مذهب واردر و اخفش ايله اعلمك ذهابلريده آيزوجه
 عد اولنور ايسه يدى مذهب اولور برينه كوره لفظى والتيسنه كوره معنويدر
 والتى معنويدن اوچى وجودينه دركه اسم موقعنده وقوعى و نفس مضارعت
 و اعرابى ايجاب ايليان سبب اولاسيدر و ديكر اوچى عدميه در والعهدة عليك .

درس ۱۹۷

(مبحث النواصب) نواصب فعل مضارع درت كله دركه ان لن بكى اذن
 كله لريدن نواصب فعل مضارعدن (ان) كله سى مصدر يه اولوب مدخولى
 مصدر ايله مآول اولور (اريد ان تحسن الى) قولمزده (وان تصوموا خير لكم)
 قول شريفنده اولدينى كى ان تحسن فتحة ايله و (ان تصوموا) حذف

نون ايله منصوبدر (ارید احسانك الى) و (صیامكم خير لكم) دیکدر .
 و بیلمیدر که ظن معناسندن عاری یعنی جزم و یقینه دال اولان ماده لردن
 صکره واقع اولان ان کلهسی اشبو (ان مصدریه ناصبه) دکلدر بلکه ان
 مشدده دن مخففه اولان ان در علمت ان سیقوم و علمت ان لا یقوم کبی
 زیرا اشبو ان ناصبه رجا و طمع ایچون اولوب ان مشدده دن مخففه اولان
 ان تحقیق ایچوندر علمه ایسه تحقیق ایچون اولان مناسب اولور . و دخی
 فعل ماضی اوزر ه داخل ان کلهسی ده ماضی تحقق وقوعه دال اولمغله ان مخففه
 مذکوره اولوب ان ناصبه دکلدر . و امامفید ظن اولان ماده دن صکره واقع
 اولسه انده ایکی وجه واردر نته کیم (و حسبوا ان لا تكون فتنة) ایه کریمه سنده
 ان لا تكون رفع و نصبه اوقنمشدر زیرا ظن غلبه وقوعه دلالتی اعتباریه دال
 علی التحقیق اولان ان مخففه یه ملایم اولدینی کبی ظنده عدم تیقن بولمق
 اعتباریه ان ناصبه دخی ملایمدر پس شوایکی جهته رعایت صحیح
 اولمشدر . نواصب فعل مضارع دن ان کلهسی بیلندی ایسه نواصب دن
 ایکنجیسی که (ان) کلهسیدر لن ینصر ولن ابرح قولزده اولدینی کبی اشبو
 کله نك اصلنده اختلاف اولمشدر . امام فراعننده اصلی لاییدی الف
 نونه ابدال اولنه رق لن اولمشدر . و امام خلیل عننده لان ایدی قصر و
 تخفیف اولنوب لن اولمشدر نته کیم عربلر ای شیء دیه جک یرده قصر
 و تخفیف ايله ایش دخی دیشلردر . و سبویه عننده برأسه حرفدر .
 و اشبو کله نك معناسی مؤکداً نفی مستقیدر تأیید معناسنه دکلدر و اگر
 تأیید معناسنه اولسه ایدی (فلان ابرح الارض حتی یاذن لی ابی) آیت
 کریمه سنده حتی انتها ولن تأیید اقتضا ایدرک تناقض وقوع بولور ایدی
 و نواصب فعل مضارع دن اوچنجیسی که (اذن) کلهسیدر بونده دخی
 اختلاف اولمشدر اذن کلهسی بصریلر عننده عند الوقف الف اوزره
 وقف اولدینی اشعار ایچون همیشه الف ايله اذا صورتنده کتب اولنور
 و کوفیلر عننده اعتبار تلفظه در دینوب نونه کتب اولنور و ابن حاجب
 و برکوی دهمهم الله عندلرنده مختار اولان اذن کلهسی برأسها حرف
 اولوب نونه کتب اولمقدر که سبویه ک مذهیدر و مازنی دن مروی اولان

دخی مطلقاً اذن کله سنک برأسها حرف اولوب الف اوزره وقفک عدم
 صحتیدر واما نجاتدن مبرد ، الف و ، نون اوزره وقفی تجویز ایلدی و شو جهتله
 (امام فرا) زمان مستقبل ایچون موضوع اذا کله سنه ماتبس اولسون ایچون
 اذن کله سی عملدن ملخی اولدقده نون ایله کتب اولنلیدر و عامل قیلندقده
 عملی جهتله (اذا) دن ممتاز اوله جغدن الف ایله کتب اولنلیدر دیمشدر .
 خفی اولیه که اذن کله سی خلیلدن مروی اولان (اذان) دن مخففدر و شو
 صورتده ناصب ان لفظی اولوب یوخسه اذن آریجه بر حرف ناصب اوله من
 و بعض کوفیلر برأسها اسم منوندر دیدیلر و سبویه عننده ذکر اولدینی
 اوزره برأسها حرف اولوب ماقبلنه اعتماد شرطیه فعل مضارع مستقبل
 منصوب قیلر . و شیخ رضی شو وجهله بیان ایلیمشدر که اذن کله سنک
 اصلی اذ کله سیدر (اذ) کله سی ایسه زمان ماضیه به موضوع اوله ق و بر
 جمله به مضاف اولور معنای ماضیدن تجرید اولنه رق جمیع ازمنه به صالح
 اولمق و مدخولی اولان فعلک مطلقاً زمانه اشارت ایچون مضاف الیه
 اولان جمله حذف اولنوب آندن عوض بر تنوین کتورلدکده اذن اولور
 نته کیم بر شخص ، انا ازورک یعنی ، بن سنی زیارت ایدرم دیدکده اذن اکر مک
 دینور اصلی (اذ تزورنی اکر مک) در (وقت زیارتک لی اکر مک یعنی بنی زیارت
 ایلدیکک و قتده بنده سکا اکر ام ایدرم دیمکدر) (اذ) کله سنک مضاف الیه
 اولان (تزورنی) جمله سی حذف اولنوب آندن عوض بر تنوین کتوریله رک
 اذن اکر مک دیمشدر . شو صورتده اذن کله سی جمیع ازمنه به صالح
 اولور که شاعرک اذن لقام بنصری قولنده اولدینی کی زمان ماضیه و جئتی
 اذن اکر مک قولزده اولدینی کی زمان مستقبله و (قلت هذا القول)
 سویلیان کیمسه به جوابا اذن اظنک کاذباً قولزده اولدینی کی زمان حاله
 دخی صالح اولور .

اذن کله سنده (اذما) و (حیثما) ده اولدینی کی معنای شرط بولنوب فقط
 بونک مضاف الیه اولان جمله من حیث المعنی ثابت اوله رق لفظنده تنوین
 عوض اولغله جوابی جازم دکدر و بزده اذن کله سنده معنای شرط دائمی
 الوقوع اولیوب اغلب حاله در زیرا حق سبحانه و تعالی نک (فعلتها اذن

وانامن الضالین) قول شرط پندہ شرطك هرگز معنای یوقدر. ویلمایدرکه
 اذن کلمہ سی شرط معنایی تضمین ایتدکده لوجستی اذن لا کر منک قولنزدہ
 اولدینی کی ماضی ده وانا ازورک سویلیان کیمسه جوابندہ اذن اکر منک
 دیندکده اولدینی کی مستقبلاہ دخی بولنور لکن شرط معنایی تضمین
 ایدرک زمان حالہ مقارن اولمز.

واکر اذن کلمہ سنک مدخولی اولان فعل مضارع خالصا استقبال ایچون
 اولاق قصد اولنور ایسه اذن کلمہ سنک نصکره (ان) مقدره ایله فعل مضارع
 منصوب قیلنور شیخ رضی نک شویانہ کوره اذن کلمہ سی ناصبه اولیوب
 آنجق اذن کلمہ سنک نصکره استقباله نص ایلمک اراده اولدقدہ ماقبلہ
 اعتماد ایلمامک شرطیله فعل مضارع ان مقدره ایله منصوب قیلنور وشو
 حالہ اذن کلمہ سنہ ناصبه دینلور ایسه ادنای ملایسه وتجوژدن ایلر وکلور.
 وهر حالہ اذن کلمہ سنک نصکره فعل مضارعک نصی فعلنک مستقبل اولوب
 وما قبلہ اعتماد اتمام سیله مشروطدر واعتماد ایله مراد اذن کلمہ سنک
 مابعدی ماقبلہ خبر اولمقدر (انا اذن اکر منک) و(انی اذن اکر منک) قوللرمزده
 اولدینی کی ویاخود مابعدی ماقبلندہ اولان برقسه جواب اولمقدر (والله
 اذن لاخرجن) قولنزدہ اولدینی کی زیر اصور مذکورده اولدینی کی
 اذن کلمہ سنک مابعدی ماقبلہ اعتماد ایلدکده مابعدی ماقبلنک تمہ سنندن
 اولوب مابعدی حکما اذن کلمہ سی اوزره سابق اولور اذن کلمہ سی ایسه
 ضعیف برعامل اولمقلہ حکماً سابق اولاندہ دخی عمل ایدہ مز.

ویلمایدرکه اذن کلمہ سی واو وفای عاطفہ نصکره واقع اولسه مدخولی اولان
 فعل مضارعده ایکی وجه یعنی رفع ونصب جائز اولور معطوفک استقلالہ
 نظر اولنور ایسه اشبو اعتماد قوی عد اولنہ میوب شو جہتلہ نصب جائز
 اولور وهر نقدر اعتماد قوی دکل ایسه ده ینہ فی الجملة معتمد اولمش اولہ جغندن
 رفع دخی تجویز اولنور.

درس ۱۹۸

نواصب فعل مضارعدن دردنجیسی که (کی) کلمہ سیدر (اسلمت کی ادخل

الخيه (قولزده اولديني كې اشبو كلكه نك ماقبلى مابعدينه سبيدر نته كيم
مثالزده اسلاميت دخول چته سبب اولمشدر وبعض كى حرف جر دخى
قيلنور مثلا (جئك كى تكرمى كى شوصورتده مابعدنده بر (افى) ناصبه
تقدير اولنور. ويلمليدركه (كى) كلمسى اوزوره اكر لام جاره داخل
اولور ايسه كى كلمسى شو تقدير ده آنحق ناصبه اولور (لكىلا تأسوا) قول
شريفنده اولديني كې وبونده معنای تحليل آنحق لامدن استفاده اولنور.
واكر كى كلمسندنكره ان ناصبه ذكر اولنور ايسه كى كلمسى شو تقديرده
آنحق حرف جر قيلنور ولام معناسنه اولور وحرف جر اوله رق شو
مذكورك غيرنده اسم صريحى آنحق كيمه نخونده مجرور قيلر.

شومذكور بصيرلك ذهابيدرواما اخفشك ذهابى كى كلمسى جميع استعملده
حرف جر درر وكندندنكره فعل مضارع ان مقدره ايله منصوبدر وما
بعدنده بعض (ان) ظاهر اولور عيرلك (لكى ان اكر مك) قولنده اولديني
كې ولكىلا تأسوا قول شريفنده كى. لام متقدمه دن بدلدن وشاعرك. كى
لتقصينى رقيه ماوعدتى. شعرنده (لام) (كى) دن بدلدن بر حرف ايسه
معناده موافق اولان حرفدن بدل اوله بيلور نته كيم بعضيار شاعرك قتم
اذا اصبت غاديا. شعرنده ثم كلمسنى فادن بدل قيلمشلدنر اشته شوبيان
اخفشك خلاصه رأيدرواما خليل عننده ان كلمسندن ماعدا ناصبه اولمامغله
كى كلمسندنكره فعل مضارع ان مقدره ايله منصوبدر.

واما كوفيلرك ذهابى كى كلمسى (ان) كې بنفسيها هميشه ناصبه در وكى
كلمسندنكره (ان) ذكر اولنور ايسه اول (ان) كلمسى زائده در وياخود
كى لفظندن بدلدن و كيمه نخونده كى كلمسيه منصوب بر فعل تقدير ايدرلركه
مثلا بر كيمسه سكا جئك ديدكده كيمه دير ايسك كى افعلى ماذا تقديرنده
كوريرلر حالوكه صله يى حذف ايدوب معمولى ابقا وكى حرف جر
قيلنميه رق (ما) ي استفهاميه نك الفى حذف ايلمك نظيرى كورليمان مواددن
اولمغله تضييف اولمشدر وان اردت التفصيل فارجع الى محله.

خفى اولميه كه آلتى موقعده فعل مضارع ان مقدره ايله منصوب قيلنور.

(اولکیسی) حتی کلمه‌سند نصر کرده در بوده فعل مضارع هر نقدر زمان تکلمه نظراً ماضی و یا خود حال و یا مستقبل اولور ایسه‌ده لکن ماقبله نظراً مستقبل اولمسیله مشروطدر اشبو حتی (کی) و یا خود (الی) معناسنه در کی معناسنه اولدقده ماقبلی مابعدینه سبب اولور (اسلمت حتی ادخل الجنة) قولزده اولدینی کی اشبو مثاله اسلامیت دخول جنته سبب و فعل مضارع ماقبله و زمان تکلمه نظراً مستقبلدر، والی معناسنه اولدقده انتهای غایت ایچون اولور (اسیر حتی تغیب الشمس) قولزده اولدینی کی حتی اولی معناسنه اولوب و فعل مضارع محققا مستقبلدر و (کنت سرت حتی ادخل البلد) قولزده اولدینی کی حتی کی و یا خود الی معناسنه اولوب و فعل مضارع ماقبله نظراً مستقبلدر و اما زمان تکلمه نظراً ازمنه ثلثیه احتمالی وارد.

واکر (حتی) کلمه سنک مدخولی اولان فعل ایله (محققا) زمان حال مراد اولنسه که بعینه زمان تکلمدر (مرض فلان حتی لایر جونه الآن) قولزده اولدینی کی و یا خود (بطریق الحکایه) حال مراد اولنسه مثلاً (کنت سرت امس حتی ادخل البلد) قولزده اولدینی کی که بلده یه دخول ایچون کیجه‌ده اولان سیر و حرکتی شمیدی حکایه در کانه زمان دخولده اشبو عبارده حاضر ایدیلوب زمان تکلمده حکایه قیلنم‌شدر و زمان دخولده احضار اولنان عبارده مدخول حتی مرفوع اولمغله پس علی حاله براقلمشدر تحقیقا و یا خود حکایه حال مراد اولنان شو صورتلرده حتی کلمه سی جاره و عاطفه اولیوب حرف ابتدادر و آزاده بر ناصب و جازم اولیوب فعل مضارع مرفوعدر و آنجق براتصال معنوی حصوله کلمک ایچون ماقبلی مابعدینه سبب اولمق و اجیدر نته کیم امثله مذکوره ایله معلومدر.

و بیللمیدر که مدخولی اولان فعل ایله حال اراده اولنقدقه حرف ابتدا اولدینی جهتله مثلاً (کان سیری حتی ادخل البلد) قولزده (کان) ناقصه اولدینی حالده (حتی) حرف ابتدا قیلنسه معنا فاسد اولور زیرا حتی حرف ابتدا اولدقده مابعدی ماقبلدن منقطع اولوب (کان) خبرسز قالور پس مثال مزبورده حتی حرف ابتدا اوله میوب مدخولیه حال مراد

اولنه من و مدخولی مرفوع قیلنه من بلکه (ان) مقدره ایله منصوب قیلنور واما (کان) تامه قیلنور ایسه حتی نك مدخولیه حال اراده اولنه رق حتی حرف ابتدا و مدخولی مرفوع قیلنه یلور .

و بیللملیدرکه حتی نك مدخولیه حال اراده اولندقدنه ماقبلنك مابعدینه سبیتی واجب اولدینی جهته (اسرت حتی تدخل البلد) قولزده حتی نك مدخولیه حال مراد اولنه میوب حتی حرف ابتدا قیلنه من پس مدخول حتی مرفوع قیلنم بلکه ان مقدره ایله منصوب اولور زیرا مثال مذکورده مدخولیه حال اراده اولنه رق حتی حرف ابتدا اولسه مابعدی مقطوع الوقوع خبر مستأنف اولوب و ماقبلی مابعدینه سبب اولسی لازم کاور کلامده حرف استفهامك وجودی جهته وقوع سبب ایسه هنوز مشکوک اولدیغندن سبیده شك ایلمکله بیله مسببك وقوعه حکم ایتک لازم کاور ایدی واما (ایهم سار حتی یدخل البلد) قولزده سبب که سیر و مسبب که دخولدر محقق و مجزوم اولوب شك آنجق تعین فاعلده اولغله (حتی) حرف ابتدا قیلنه رق مدخولی اولان (یدخل) فعلنده رقع جائزدر .

درس ۲۰۰

(ایکنجیسی) کی معناسنه اولان لامدنصکره درکه بوکا لام کی دینلور بوندنصکره واقع فعل مضارع ان مقدره ایله منصوب قیلنور زیرا حرف جر اولغله فعل اوزره دخولی متممدر لکن ان ناصبه مقدر اولدقدنه مدخولی اولان فعل مصدر ایله مأول قیلنه جغندن تأویلاً اسم اوزره داخل اولمش اولور (اسلمت لادخل الجنة) قولزده اولدینی کی اسلمت لدخولی الجنة دیمکدر .

(اوچنجیسی) منفی اولان کان نك خبرنده اولان لام جاره زائده دن صکره کذا فعل مضارع ان مقدره ایله منصوب قیلنور و (ما کان الله لیعذبهم) آیت کریمه سنده اولدینی کی (ما کان) صفة الله تعذبهم و یاخود یهم (ما کان الله ذا تعذبهم) و یاخود (ما کان الله معذبهم) تقدیرنده در . (دردنچیسسی) (فا) و (واو) دن صکره فعل مضارع ان مقدره ایله

ایله منصوب اولور (اما فادن صکره منصوب اولسی ایکی شرطله مشروطدر (شرط اول) فانك سیدیه اولمیدر یعنی ماقبلنك مابعدینه سبب بولمیدر زیرا تغییر لفظ تغییر معنایه دلالت ایتسی جهتله رفعدن نصبه عدول ایتك سببیت اوزره تنصیص ایچوندر سببیت قصد اولمقدده ایسه دلالت مرقومهیه احتیاج یوقدر (شرط ثانی) ماقبلنده اشیای سته دن بریسی اولمیدر یعنی یا (امر) بولمیدر (زرنی فا کر مك) کی لیکن منك زیارة فا کرام منی دیمکدر . و یا (نهی) بولمیدر لاشتمنی فاضربك کی لایکن مك شتم فاضرب منی دیمکدر دعادخی امر ایله نهی ده مندر جدر اللهم اغفر لی فافوز ولا تؤاخذنی فاهلك قولزده اولدینی کی و یا (استفهام) بولمیدر هل عندکم ماء فاشربه کی هل یكون منکم ماء فشرب منی دیمکدر و یا (نفی) بولمیدر ما تأتینا فتحدثنا کی لیس منك اتیان فتحدث منا دیمکدر مستدهی جواب اولمغله نفی دخی معنأ انشا قیلندن کورلمشدر و تحضیض و نفی ده مندر جدر لولا انزل علیه مالک فیکون معه نذیراً قول شریفنده اولدینی کی زیرا نفی فعلی مستلزمدر نته کیم آیت کریمه ده رسول ذیشانیه بیله نذیر اولمق اوزره انزال ملکک واقع اولمیدینی مفیددر و یا خود (تمی) بولمیدر لیت لی مالاً فانفقه کی لیت لی ثبوت مال فانفاق منی دیمکدر وصیغه ترجی اوزره بولنان تمی ده داخلدر قراءه حفص اوزره لعلی ابلاغ الاسباب اسباب السموات فاطلع قول شریفنده اولدینی کی و یا خود (عرض) اولمیدر الا تنزل فتصیب خیرا کی الا یكون منك نزول فاصابة خیر منی دیمکدر .

شومواضعك جمله سنده مضای سببیت مقصود اولوب وفا شو معنایه دالدر ومدخولی اولان فعل مضارع ان مقدره ایله منصوب ومصدر ایله مأول اولدرق ماقبلنده اشیای سته دن مفهوم مصدر اوزره معطوفدر .

وما قبلنده اشیای سته دن بری بولمیهرق انتصاب فعل اوله من و هر نقدر شاعرك . سأترك منزلی لینی تمیم . والحق بالحجاز فاستریحا . شعر نده واقع ایسه ده بوده ضرورت شعریه اوزره محمولدر .

واما واودنصکره فعل مضارعك ان مقدره ایله ، منصوب اولسی کذا ایکی شرطله مشروطدر (شرط اول) جمعیت یعنی ماقبلنك مابعدینه مصاحب اولمیدر (شرط ثانی) بونك دخی ماقبلنده ذکر اولنان اشیای سته دن

بررسی بولمانیدر سابقا مرور ایدن مثاللرده فایرینه واکتورلسه بوکا
دخی مثال اولور مثلاً زرنی واکرمک کی لیجتماع الزیارة والاکرام
دیمکدر ولاتاً کل السمک وتشرب اللبن کی لایجتماع منک اکل السمک مع
شرب اللبن دیمکدر وقس علیه ذکر اولنان اشبو فاوواو دنصکره فعل
مضارعک ان مقدره ایله منصوب اولسی زیراً (فا) و (واو) بیاتمزدن
معلوم اولدینی اوزره انشادنصکره واقع اوله رق عاطفه لردر جمله خبریه یی
انشا اوزره عطف ایلمک ایسه متممدر واما مابعدلرنده فعل مضارع
ان مقدره ایله منصوب ومصدر ایله مأول قیلندقدده مفردی انشادن منهم
مفرد اوزره عطف ایلمش اولورزکه محذور قالمز .

(بشنجیسی) (او) کله سندن صکره دخی فعل مضارع ان مقدره ایله
منصوبدر واشبو تقدیر ونصب (او) کله سنک الی ان ویاخود الا ان
معناسنه اولسیله مشروطدر لالزمنک اوتعطینی حق قولزده اولدینی کی
لالزمنک الی ان تعطینی حق ویاخود لالزمنک الا ان تعطینی حق دیمکدر
الی ان تعطینی حق قولمز الی اعطائک لی حق دینمکه والا ان تعطینی حق
قولمز الا وقت اعطائک لی حق دینمکه مأولدر تقدیر وتأویل اول نحاتک
وثانی ائمه نحاتدن سبویک مختاریدر .

(التنجیسی) مطلقاً حروف عاطفه دنصکره یعنی کرک ذکر اولنان فاوواو
وکرک بونلرک غیری عاطفه لر دنصکره اولسون معطوف علیه اسم صریح اولور
ایسه فعل مضارع کذا ان مقدره ایله منصوب اولور اعجینی ضربک زیداً
وتشتم اوفنشتم اوتم تشتم کی .

درس ۲۰۱

خفی اولیه که کی معناسنه اولان لامدن واشبو لامه ملحق لام زائده دن
ودخی حروف عاطفه دنصکره مقدر ان ناصیه ک اظهار اولنسی جائزدر
(جئتک لان تکرمنی) و (اردت لان تقوم) و (اعجینی قیامک وان تذهب)
قوللرمزده اولدینی کی زیراً اشبو حرفلر مثلاً جئتک للاکرام واردت
للقیامک واعجینی قیامک وذهابک کی اسم صریح اوزره داخل اولدقلرندن

فعلی اسم صریحه قلب ایدر اولان ان ناصبه نك كندیلردن صکره اظهار اولنسی جائز اولور .

واما (لام ججود) اسم صریح اوزره داخل اوله مدیغندن لام ججوددن صکره ان ناصبه بی اظهار جائز دکلدر . و (حتی) کله سندن صکره دخی اظهاری جائز اوله مز زیرا اغلب حالده کی معناسنده مستعمل اولوب شو معنا ایله ایلنه اسم صریح اوزره داخل اوله مز و بونده الی معناسنه اولان حتی کی معناسنه اولان حتی اوزره محمولدر زیرا فعل مضارعی ولی ایلان حتی کله سنده غالب اولان معنای اولدر . و دخی بمد الانشا و او وفا و او کله سندن صکره دخی ان ناصبه اظهار اوله مز زیرا بونلر مدخوللری اولان فعل مضارعك سببیت و جمعیت و انتها معنایینه تنصیص ایچون نصبی اقتضا ایلدکلرندن ، عوامل نصب ، منزلنده اولملشدردر ، زرنی فان اکر مک . و لالزمنك اوان تعطینی حتی دینلمز .

و بیللملیدرکه ان مقدره ایله منصوب فعل مضارع اوزره داخل اولان (لا) کله سیله (لام کی) مجتمع اولسه لایمن متوالینك اجتماعی مستکره اولمغله ان کله سنی اظهار واجب اولور حق سبحانه و تعالی نك (لئلا یعلم اهل الکتاب) قول شریفنده اولدینی کی .

و بیللملیدرکه ضعفیتندن ایچون ان ناصبه مواضع مذ کوره نك غیرنده اکثر یامن غیر عمل مضمهر قیلنور عربلرک (تسمع بالمعیدی خیر من ان تراه) ضرب مثلنده اولدینی کی که تسمع فعلنك اوزرنده ان مقدر اولوب سماعت بالمعیدی تأویلنده در و کلامده مبتدادر حالبوکه تسمع کله سی منصوب اولیوب مرفوعدر و بهضیلر ان واسطه سیله اولیه رق نسبت تامه وزماندن بالتجرید معنای مصدری اخذ اولندیغنه ذهاب اولملشدردر . لکن مشهور اولان ذهاب اولدر و مواضع مذ کوره غیرنده بعض شاذ اوله رق مع العمل دخی اضماری مرویدر شاعرك .

الا ایهذا اللائم احضر الوغی . وان اشهد اللذات هل انت مخلد

شعر نده (وان اشهد) دلائیله احضر کلمه سنده اولدینی کی لکن اشبو شعر قیاس اوله میه جغندن مواضع مذکوره صره سنده یازلما مشدر مفاد شعر حربده حاضر اولمق ولذات غزا و جهادی مشاهده ایتمکدن بی زجر و منع ایدیجی اولان کیمسه آیسن حرب ولذاتی ترک ایامکله غلامیسک دیمکدر.

درس ۲۰۲

(مبحث الجوازم) جوازم فعل مضارع اون بش دانه در بوناردن درت دانه سی آنجق بر فعلی مجزوم قیلرکه آنلر (لم) (لما) (لام امر) (لاء نهی) در جوازم فعل مضارع دن (لم) معنای مضارعی ماضی به قلب و نفی ایدر لم ینصر کی معنای یاردم ایتدی بر غائب ارچمیش زمانده دیمکدر و (لما) دخی لم کی در آنجق لم دن بش جهتله ممتازدر .

(اولکیسی) لما ایله منفی اولان وقت انتقادن زمان تکلمه دکن مستمر اولوب لماده جمیع ازمنه ماضیه بی استغراق واردر لما ینصر کی معنای یاردم ایتدی بر غائب ارچمیش زمانک جمیعنده دیمکدر .

(ایکنجیسی) لما کلمه سی اوزره ادات شرط داخل اوله منر مثلا ان لما یضرب دینلمز واما ان لم یضرب دینلور .

(اوچنجیسی) لما ایله غالباً وقوعه انتظار اولسان فعل نفی اولنور مثلا رکوب امیری توقع ایلان کیمسه به لما یرکب الامیر دنیلور و بعض غیر متوقعده دخی استعمال اولنور مثلا ندم فلان ولما ینفعه الندم قولمزده اولدینی کی .

(دردنجیسی) لما ایله منفی اولانک زمان حاله قریبتی شرط قیلنمشدر مثلا لم یکن زید فی العام الماضی مقیم دنیلور اما لما یکن زید فی العام الماضی مقیم دینلمز .

(بشتنجیسی) لما ایله منفی اولان فعلک بعض قیام قرینه عننده حذفی جائزدر مثلا شارفت المدینه ولما دیرسک ولما ادخلها دیمکدر . جوازم فعل مضارع دن (لام امر) کندیلله بر فعل طلب اولسان لامدر مثلا لینصر کی یاردم ایتسون دیمکدر

ولام دعا لام امرده داخلدر لیفقرلنا الله قولمزده اولدینی کی اشبو لام امر
مکسور اوقنور وفتی دخی لغتدر وواو وفا وشم دن صکره ساکن اوقنمق
دخی لغت فصیحده در حق سبحانه و تعالی نك ولتات طائفة اخری لم یصلوا
فیصلو و دخی (ثم لیقضوا) قول شریفنده اولدینی کی وجوازمدن (لا) ی
نهی کندیله بر فعلک ترکی طلب اولسان (لا) در مثلاً لاینصر کی یاردم
ایتمسون دیمکدر ولاتنصر کی یاردم ایتمه سن دیمکدر.

درس ۲۰۳

جوازمدن اون بر دانه سی کلم مجازات تسمیه اولنور لر یعنی جزا اقتضا
ایدیجی کلمه لر دیمکدر که آنلر (ان) (حیثما) (این) (انی) (اذما) (اذا ما)
(متی) (مهما) (ما) (من) (ای) کلمه لریدر اما کیفما و اذا لفظلریله
انجزام مضارع شاذ و نادر در.

اشبو کلم مجازات ایکی جمله اوزره داخل اولوب اولکنه شرط و ثانی یه
جزا دینور اولکنه شرط دینلمسی تحقق ثانی یه سبب اولدینی جهتله در
و ثانی یه جزا دینلمسی جمله اولی دن مسبب اولوب آنک اوزرینه مبتنی
اولدینی جهتله در و بیلملیدر که جمله شرطیه همیشه جمله فعلیه اولور و اما
جمله جزائیة فعلیه واسمیه دخی اولور.

خفی اولیه که اگر شرط و جزا ایکیسی دخی فعل مضارع اولوب جزاده
(فا) یوق ایسه شرط و جزاده جزم واجب اولور ان تضرب اضرب
قولمزده اولدینی کی و اگر یالکنز شرط مضارع اولور ایسه آنحق شرطده
جزم واجبدر ان تزرنی فقد زرتک قولمزده اولدینی کی و اگر شرط ماضی
و جزا مضارع اولوب جزاده فایوق ایسه جزاده ایکی وجه یعنی جزم و رفع
جائز اولور ان اتانی زید آته قولمزده اولدینی کی (آتیة) دیمک دخی
جائزدر. جزمک جوازی ادات شرط اولان جازمه تعلقی جهتله در و رفعک
جوازی اراده ماضی حیلوله ایتمکه تعلقک ضعیف اولمسی جهتله در و (جزاده
فایوق ایسه) دیمکلی کمزیرا ادخول (فا) جزمه مانع اولمغه مدخولی اولان فعل
مضارعده آنحق رفع تحقق ایلر.

و خفی اولیه که شرطده عامل بالاتفاق ادات شرطدر واما جزاده عاملی
 تعیینده اختلاف اولمشدر ابن حاجب و برکوی رحمهما الله و اکثر نحاتک
 اختیار ایلدکاری شرط و جزاده عامل ادات شرطدر زیرا مبنای عمل
 عاملک اقتضاسنه کوره در کلام مجازات ایسه بر امرک بر امره تعلیق ایچون
 موضوع اولدقلرندن امرینده عملی مقتضیلردر نته کیم مثلاً معنای ابتدا
 و افعال ناقصه و ما ولا بر مسند و بر مسند الیهی اقتضا ایلدکارندن (معنای
 ابتدا) مبتدا و خبرده و افعال ناقصه و ما ولا اسم و خبرده عامل اولمشدردر
 واما خلیل و مبرد عندنده ادات شرط عامل ضعیف اولدیغندن شرط
 و جزاده عمل ایتمکه مقتدر اولیوب ادات شرط آنحق شرطده عاملدر
 و ادات شرط شرط ایله بیله جزاده عاملدر دیدیلر و اخفش جزاده عامل
 یالکنز شرطدر دیدی و کوفیلر کلام عربده جر جوارى بولندیکی
 جزاده اولان جزمکده شرط مجزومه جواریت حسبیله اولدیغنه ذاهب
 اولدیلر و شوجهتله شرط ماضی جزا مضارع اولدقدده جزاده رفع واجبدر
 دیدیلر .

درس ۲۰۴

خفی اولیه که ادات شرطک جزاده تأثیری بولندقدده جزاده قطعاً فانک
 دخولی جائز اولمز زیرا دخول فایه احتیاج قالمز و اگر تأثیر وعدم تأثیری
 محتمل اولور ایسه جزاده ایکی وجه یعنی فانک دخولی وعدم دخولی جائز
 اولور و اگر ادات شرطک جزاده هرگز تأثیری اولمز ایسه شو تقدیرده
 جزاده جواب شرط اولدیغنه دلالت ایچون فانک دخولی واجب اولور .

اشبو ضابط کلی معلوم اولدی ایسه خفی اولیه که جزاده فانک دخولی بش
 موضعده واجب و ایکی موضعده جائز و ایکی موضعده ممتنعدر جزاده فانک
 دخولی واجب اولان بش موضعدن : (اولکیسی) جزا جمله اسمیه
 اولسه شرطی کرک ماضی و کرک مضارع اولسون جزاده فانک
 دخولی واجبدر ان ضربت فانت مضروب و ان تکرر م فانت
 محبوب کی زیرا جمله اسمیهده ادات شرطک هرگز تأثیری اولیوب

و صلاحیت محلیه دخی منعدم اولدیغندن تعلق معنوی بولنماغله رابط لفظییه
احتیاج مس ایلمشدیر .

(ایکنجیسی) جزا جمله ماضویه غیر متصرفه اولسه کذا فانك دخولی
واجبدر زیرا بونده دخی ادات شرطك تأثیری اولیوب و صلاحیت محلیه
دخی منعدم اولمغله رابط لفظییه احتیاج درکاردر حق سبحانه و تعالی نك
فان کرهتموه فعسی ان تکر هوا شیئاً ودخی ومن یفعل ذلک فلیس من الله
فی شیء قول شریفنده اولدیغی کی .

(اوچنجیسی) جزا جمله ماضویه اولوب و ماضی کندی معناسی اوزره
بولنسه علة مذکوردهن ایچون کذا فانك دخولی واجبدر و شوصورته
ماضی کندی معناسنده اولوب مضارع معناسنه اولدیغی تعیین ایچون ظاهر
ویا خود مقدر برقد کلهسی کتورلمسی لازمدر حق سبحانه و تعالی نك ان
یسرق فقد سرق اخ له ودخی وان کان قیصه قدم قبل فصدقت قول
شریفنده اولدیغی کی .

(دردنجیسی) جزا سین و سوف ولن و ما کله لرینه مقترن فعل مضارع
جملهسی اولسه کذا فانك دخولی واجبدر زیرا ادات شرطك دخولندن
اقدام سین و سوف ولن استقباله و ما کلهسی حاله دلالت ایلیوب ادات شرط
ایسه اوچ اولکنده حاصلی تحصیل قیلندن اوله جغندن نه یکیدن براستقبال
افاده ایدر ونهده ما کله سنك مدخولنده حالی استقباله تبدیل ایلر شو جهته
هرکز تأثیری اولیوب تعلق معنوی بولنماغله رابط لفظییه احتیاج غیر
منکردر حق سبحانه و تعالی نك وان تعاسرتم فسترضع له اخری دخی ومن
یتبع غیرالاسلام دینا فلن یقبل منه قول شریفنده وان جئتی فسوف اکرمک
وان ضربت فما اضربک قولار مزده اولدیغی کی .

(بشمجیسی) جزا جمله فعلیه انشائییه اولسه ادات شرطك کذا تأثیری
بولنمادیغندن (فا) نك دخولی واجبدر جمله فعلیه انشائییه دیا (امریه) اولور ان
ضربک زید فاضر به کی ویا (نهییه) اولور ان ضربک زید فلا تضربه کی و (یادعائییه)
اولور ان تکر منی فیرحمک الله کی ویا (تمنییه) اولور ان جئتی فلیتک مکرم کی
ویا (عرضیه) اولور ان جئتی فلا تنزل کی ویا (تخصیصیه) اولور ان جئتک فهلا
تکرم کی ویا (استفهامیه) اولور ان ضربک زید افتضربه وان اتاک فهل تکرمه کی .

خفی اولیه که (فانک همزه استفهامیه اوزره و دیگر ادوات استفهامیه نك فانک اوزره دخولی جائز دکلدر . و یلملیدر که همزه استفهامیه ایله مصدر جواب شرطده همزه استفهامیه نك ادات شرط اوزره تقدیمی جائز اولدیغندن غالباً ادات اوزره مقدم اولسی تقدیر اوله رقی فانک تورلمز مثلاً ان اکرمک اتکرمنی قولمز ان اکرمک تکرمنی منزلنده در حق سبحانه و تعالی نك ارأیت ان کذب وتولی الم یعام قول شریفنده و حضرت علی رضی الله تعالی عنه افندمزک نهج البلاغه ده اولان وان فعل الله ذلك لکم اتؤمنون قولنده اولدینی کبی و اما دیگر ادوات استفهامک استفهامده عراقت و اصل تلری اولیوب ادات شرط اوزره تقدم ایلملری هرگز جائز اولدیغندن تقدیر مذکور آنلرده جاری اوله میوب فانک توریلور و بعض همزیه حمل ایله فانک ترکی دخی تجویز اولمشدر حق سبحانه و تعالی نك ان اتیکم عذب الله بغته اوجهره هل یهلاک الا القوم الظالمون دخی (ان اخذ الله سمعکم و ابصارکم و ختم علی قلوبکم من اله غیر الله) و حق سبحانه و تعالی نك (ارأیت ان کنت علی بینة من ربی و اتانی منه رحمة فن ینصرنی من الله ان عصیته) قول شریفنده اولدینی کبی . خفی اولیه که فای جزائییه موضع لزومده بعض ضرورت عندنده حذف اولنور شاعریک . (من یفعل الحسنات الله یشکرها) قولنده اولدینی کبی لکن من یفعل الخیر فالرحمن یشکره دخی مروی اولمغله پکده ضرورة یوقدر دینامشدر و کوفیلر حال اختیارده دخی حذفی تجویز ایلمشدر .

درس ۲۰۵

و اما جزاده فانک دخولی جائز اولان ایکی موضعدن (اولکیسی) جزاسین و سوف وان و ما کله لرندن عاری فعل مضارع مثبت اولسه فانک دخول و عدم دخولی جائزدر ان تضرب اضرب یا خود فاضرب کبی جزا مضارع اولوب مفید استقبال اولدیغندن اداة شرطک استقباله قلب کبی بر تأثیری اولمغله تعلق معنویک ضعیف اولسندن فانک کتورلمسی و غیر استقباله احتمال شایبه سنی رفعه جزایی خالصاً استقباله تخصیص ایلمسنه نظراً

اولدجه تأثیری محسوس اولدیغندن فانك كـتوريلمامسی جائز اولور .
 (ایکنجیسی) جزا حروف مذکوردهن غاری فقط مطلق نفی معناسنه
 اولان (لا) کله سیله منفی فعل مضارع اولسه کذا فانك دخول وعدم
 دخولی جائزدر ان تضرب لا اضرب یاخود فلا اضرب کبی اذات شرطك
 کذا قلب معنا کبی بر تأثیری کورللامسنه نظراً فانك كـتورلمسی واستقباله خالص
 قیلمق کبی اولدجه شایبه تأثیر بولمسنه نظراً کتورللامسی جائز اولور واکر
 (لا) کله سنك خالصا استقبال ایچون اولسی اخذ اولنور ایسه شوصورده
 اداة شرطك هرکز تأثیری اوله میه جغندن دخول فا واجب اولور .
 واما جزاده فانك دخولی متمتع اولان ایکی موضعندن (اولکیسی) جزا
 ماضی متصرف اولوب مضارع معناسنه اولسه جزاده فانك دخولی متمتعدر
 زیرا اداة شرط ماضی متصرفك معناسنی استقباله منصرف قیلمسی جهتله
 جزاده تأثیر قویسی تحقق ایله یکنندن اشبو تعاق معنوی ایله رابط لفظی دن
 استغنا حاصل اولمشدر .

(ایکنجیسی) جزا لم ولما ایله منفی اولان فعل مضارع اولسه شوصورده
 دخی فانك دخولی متمتعدر زیرا لم ولما ایله منفی اولان مضارع دخی ماضی
 متصرف حکمندهدر اداة شرطك بونده دخی معنای استقباله قلب وتخلیص
 کبی تأثیر یلینی کورلمکله کذا شوتعلق معنویله اکتفا اولنوب فانك دخولی
 متمتع اولمشدر .

خفی اولیه که فعل شرطدنصکره ذکر اولنان بر فعل اکر ان تررنی تررنی
 احسن اليك قولمزده اولدیغی کبی تأکید ویاخود (ومن يفعل ذلك ياق
 ائاما يضاعف) قول شریفنده اولدیغی کبی بدل اولور ایسه اعرایده فعل
 شرطه تابعدر واکر ان تأتی تسأل احسن اليك قولمزده اولدیغی کبی حال
 ویاخود ان تحسبني اضربك فلا تصيب قولمزده اولدیغی کبی مثلاً مفعول
 ثانی ویاخود ان تضرب الذي احبه اضربك قولمزده اولدیغی کبی تتمه شرطدن
 اولان بر موصوله صله ویاخود ان تضرب رجلاً اعرفه اضربك قولمزده
 اولدیغی کبی تتمه شرطدن بر کلمه یه صفت اولور ایسه شوصورتلرده مثلاً
 (تسأل) لفظاً مرفوع اوله رق جمله سی محلاً منصوب حال قیلنور واضرب

لفظاً مرفوع اولوب جمله‌سی محلاً منصوب مفعول قیلنور واکر ان مقدر
 قیلنور ایسه لفظاً دخی منصوب بولنور و احب لفظاً مرفوع اولوب جمله‌سی
 لاجل لها من الاعراب الذی نك صله سیدر و اعرف لفظاً مرفوع اولوب
 جمله‌سی محلاً منصوب رجلاً لفظنك صفتیدر و قس علیه و جوابدنصکره
 وارد فعلك دخی حکمی شو بیانه قیاسله معلومدر .

و بیامیدر که جزاجله اسمیه اولدقده جزاده فاموقعنه (ادا) ی مفاعلة
 کتورلمسی دخی جائزدر حق سبحانه و تعالی نك (وان تصبهم سیئة بما قدمت
 ایدیم اذاهم یقنطون) قول شریفنده اولدینی کی زیرا اذای مفاعلة ده
 بعد امر بر امرک حدوتی مبنی و مشعر اولغله فای تعقیبه معناسی وارددر .

درس ۲۰۶

خفی اولمیه که فعل مضارع بش شنیدنصکره (ان) مقدره ایله مجزوم
 قیلنور .

(اولکیسی) (امر) دنصکره زرنی اکرمک کی ان تزرنی اکرمک دیمکدر .
 (ایکنجیسی) (نهی) دنصکره لاتفعل الشریکن خیراً لك کی ان لم تفعله
 یکن خیراً لك دیمکدر .

(اوچنجیسی) (استفهام) دنصکره هل عندکم ماء اشربه کی ان یکن عندکم
 ماء اشربه دیمکدر .

(دردنجیسی) (تمی) دنصکره لیت لی مالا انفقہ کی ان یکن لی مال انفقہ
 دیمکدر .

(بشنجیسی) (عرض) دنصکره لاتنزل تصب خیراً کی ان تنزل تصب
 خیراً دیمکدر . اشبواشیای خمسة دنصکره واقع فعل مضارعك ان مقدره
 ایله مجزوم اولمسی اشیای خمسة دنصکره واقع فعل مضارع ماقبلنه مسبب
 اولغله صالح اولوب و ماقبلنك کنندینه سببیتی قصد اولندیغنده درکه شو
 تقدیرده اشیای خمسة دن مأخوذ فعل مضارع ایله بران جازمه تقدیر
 اولنهرق اشیای خمسة دنصکره واقع فعل مضارع آنکله مجزوم قیلنور
 و (ان) تقدیرینك اشیای خمسة مذکوره دنصکره یه مختص قیلنمسی زیرا

اشیای خمسہ مذکورہ طلبہ دلالت ایدر لر و طلب غالباً بر مطلوبہ تعلق ایدر کہ اول مطلوب اوزرہ بر فائدہ ترتب ایلر و اول مطلوب اوفائدہ یہ سبب و اوفائدہ اول مطلوب بدن مسببہ اولور پس فائدہ مترتبہ اشیای خمسہ مذکورہ دنصکرہ واقع فعل مضارع اولوب و اشیای خمسہ مذکورہ ایلہ مطلوب اولان فعلکده اکا سببیتی قصد اولندقدہ فعل مطلوبہ بران جازمه تقدیر اولنور کہ اشیای خمسہ مذکورہ دنصکرہ واقع فعل مضارع جزا قیلنوب آنکله مجزوم اولور مثلاً اسلم تدخل الجنة قولزده اسلم فعل امر اولوب آندن مطلوب اولان اسلامدر و فائدہ سی تدخل الجنة قولزدن مستفاد دخول جنتدر اسلام دخول جنتہ سبب اولوب واشبو سببیتی ادا و افادہ قصد اولنمش پس اسلمت دن مأخوذ و مطلوب تسلم فعلیلہ بران جازمه تقدیر و تصویر ایدیلوب (تدخل) آنکله مجزوم قیلنمشدر کہ قول مذکور ان تسلم تدخل الجنة دیک اولمشدر.

و مثلاً لا تکفر تدخل الجنة قولزده لا تکفر نہی اولوب عدم کفر جنتہ سببدر واشبو سببیتی ادا و افادہ قصد اولنمشدر پس وجہ مذکور اوزرہ بوده ان لا تکفر تدخل الجنة دیک اولمشدر زیرا نہی و فعل منفی بہ قرینہ اولوب فعل مثبتہ قرینہ دکلدر شواجلدن عند الجمهور لا تکفر تدخل النار دیک جائز اولہ من. لکن امام کسائی بونک معناسی بحسب العرف ان تکفر تدخل النار دیکدر بوکی موقعلرده (عرف) شرط مثبتک قرینہ سی اولوب عرف ایسہ قرینہ قویہ در دیدی.

و خفی اولیہ کہ ذکر اولندیغی اوزرہ اشیای خمسہ دنصکرہ انجزام مضارع سببیت قصد اولندیغندہ اولغلہ سببیت قصد اولنمز ایسہ فعل مضارع مجزوم قیلنہ میوب آنحق مرفوع اولور و رفع تقدیر ندہ یا عند وجود الصلاحیة صفت اولور مرفوع اوقنان قرائت اوزرہ حق سبحانہ و تعالانک فہب لی من لدنک ولیاً یرثی قول شریفندہ اولدینی کی ولیاً وارثاً منی دیکدر و یا خود حال اولور فذرہم فی طغیانہم یعمہون قول شریفندہ اولدینی کی عمہین دیکدر و یا خود جملہ مستأنفہ اولور شاعرك :

وقال رائدہم ارسوا نزاولہا فكل حقف امری یجری بمقدار

شعر نده (ارسوا نزاولها) خوانده اولدینی کی (ارسوا) امر حاضر جمع مذکر مخاطب اولوب لفظاً و معنأً انشادر و (نزاولها) جمله مستأنفه اولمغله نزاول لفظاً مرفوعدر و خبریه اولدیغندن ارسوا اوزره عطف اولنق ممکن اولمیه جنی کی (رائدك) غرضی ارسا ایله امری مزاوله ایله تعلیل اولمغله امره جواب اوله رق مجزوم دخی قیلنه مامشدر زیرا امره جواب اوله رق مجزوم اولسه ایدی اسلم تدخل الجنة قولمزده اولان سیاق اوزره مزاوله ارسا ایله تعلیل اولنلی ایدی بوایه خلاف غرضدر مفاد شعر آنلرك پشدارلری دیدیکه قالکیکز حرب و مقاتلهیه مزاوله و معالجه ایدلم زیرا هر شخصك موتی الله عظیم الشانك قدر و قضاسیله جریان ایلردیمکدر.

درس ۲۰۷

شوبسطمز کوزلجه اذعان اولندی ایسه تکمیلا للفائده کلم مجازاتك نفسلرندن دخی برنبذه بحث ایدلم کلم مجازاتدن (ان) شرط و جزا اقتضا ایدوب شرطه جزانك شیء واحد کی اولمسنی ایجاب ایدر و بوده بالضرور کلامك اوزامسنی موجب اولدیغندن حصول تحقیقندن ایچون ان کلهسی شرط و جزاده عامل قیلنور. و دیگر کلم مجازاتك جازمیتی ایهامده اشبو ان کلهسنه مناسبتلرندن ان معناسنی متضمن اولدقلرندندر.

شرط و جزا اقتضا ایلیان کلهلر ایچنده اشبو (ان) دن بشقه حرف یوقدر باقی قالان بالجمله اسم اولوب اوچ دانهسی ظرف مکاندرکه مفعول فیه واقع اولورلر آنلر حیثا و این وانی کلهلریدر (حیثا) لفظنده اولان (ما) مای کافه درکه اضافندن کف و منع ایدر تا که مبهم اولوب ان شرطیهیه مناسب اوله پس آخرنده اشبو مای کافه اولمدقده فعل مضارعی مجزوم قیلنه من لکن (این) کلهسی آخرنده (ما) لفظی کرک بوانسون و کرک بولنسون جازمدر و این کلهسنه لاحق اولان (ما) لفظی مای کافه اولیوب بلکه مجرد زیاده ایهام ایچون کتوریلور و اما (انی) کلهسنه ما لفظی هرکنز لاحق اولمز و مطلقاً جازمدر. و کلم مجازاتدن اوچ دانهسی ظرف زمان درکه آنلر اذما و اذاما ومتی لفظلریدر بونلر دخی مفعول فیه واقع اولورلر

(اذما) کلمه سنده اولان ما لفظی مای کافه اولوب تزید ابهامله ان شرطیه به تحصیل مناسبت معروضنده کتورلمشدر اصلی اذ ظرفیه درکه (ما) لفظنک حقوقی اضافندن منع ایدوب شرط ایچون تهیه ایلمشدر شویبان (مبردک) مسلیکی و ابن حاجب و برکوی رحمهما اللهک مختاریدر واما سبویه عندنده براسه حرف جازم اولوب فعلی وزننده ذر و سیرافی اذما ایچون عمل جزمی اثبات ایدر سبویه و اصحابندن غیرنی بیهام دیمشدر واما (اذاما) کلمه سنده ما لفظی کذا اشبو مای کافه اولوب آسنز عملی شاذ و نادر در زیرا اذ کلمه سی امر مقطوع ایچون موضوعدرکه ابهامه منافیدر لکن بعض بر امر مقطوع خلاف مأمول ظهور ایتک محتمل اولسنه مبنی ان معناسنی تضمین ایدرک عامل جزم اوله بیلمسی تجویز اولنش و اضافندن مانعه مای کافه ایله ده تقویه نمشدر واما (متی) لفظی آخرینه کرک ما لفظی لاحق اولسون و کرک اولسون عامل جزمدر و متی لفظنه لاحق اولان ما مای کافه اولیوب بعض مجرد زیاده ابهام ایچون کتوریلور و کلم مجازاتندن (مهمما) سبویه عندنده فعلی وزننده در فانک فتحیه و بعضیلر اصلی (ما) کلمه سی اولوب زیاده ابهام ایچون آخرینه برما لفظی زیاده قیلنمشدر و اولکی ما لفظنک الفی هایه قلب اولنه رق مهمما اولمشدر دیدیلر و بعضیلر اکفف معناسنه اولان (مه) ایله (ما) ی شرطیه دن مرکبدردیدیلر مهمما کلمه سی ترکیبده اکثر مفعول به واقع اولور مهمما تفعل افعل کی و بعض مفعول مطلق اولور مهمما تأتتا آتک کی ای ایان تأتتا آتک دیمکدر و کلم مجازاتندن (ما) کلمه سی مای شرطیه دیمکله موسوم اولوب ترکیبده مفعول به اولور ماتفعل افعل کی و تسهیلده بعض ظرف زمان اوله رق دخی کلدیکی ثبت اولمشدر شاعرک .

و ماتک یابن عبد الله فینا فلا ظلما نخاف ولا افتقاراً

شعرنده اولدیفی کی و کلم مجازاتندن (من) و (ای) ترکیبده مبتدا و مفعول واقع اولور لر من یکرمنی اکرمه و آئی عالم یتکبر بیغضه الله تعالی قولزده

(و من يضلل الله فلا هادي له) و دخی (ایما تدعو فله الاسماء الحسنی)
قول شریفده اولدینی کی .

درس ۲۰۸

(مبحث صیغه الامر) صیغه امر (صیغه یطلب بها الفعل من الفاعل المخاطب
بحذف حرف المضارعة) دینهرک تعریف اولنور یعنی حرف مضارعتک
حذفنه ملتبس بر صیغه درکه فاعل مخاطبدن اشبو صیغه ایله بر فعل طلب
اولنور تعریفده اولان (صیغه یطلب بها الفعل) جمله سی غائب ویا مخاطب
ویا متکلم هر بر امر معلوم و مجهوله شاه لدر پس (من الفاعل) دینمکه
مجهولدن احتراز اولنمشدر زیرا مبنی للمفعول ایله بر فعل فاعلدن طلب
اولنیوب آنجق اوزرینه ایقاع اولنق اوزره مفعولدن طلب اولنورو (المخاطب)
دینمکه غائب و متکلمدن احتراز اولنمشدر و (محذف حرف المضارعة)
دینمکه صیغه خطاب اوزره او قندیغنه کوره (فذلک فلتفرحوا) قول شریفی
مثلندن وصه و مه وروید نچوندن احتراز اولنمشدر .

امر حاضرک آخرینک حکمی بصر یلر غندنده حرف مضارعت حذف اولنهرق
مقتضی اعراب اولان اسمه مشابیهت قالمغله حقیقه سگون اوزره وقف
وبنادر وصوره مضارع مجزومک حکمی کیدرکه اخری حرف صحیح ایسه
ساکن قیانور و نون اعراب و حرف عله ساقط اولور مثلاً لم یضرب لم یضربا
لم یضربوا ولم یخش ولم یغز ولم یرم دنیلدیکی کی امر حاضرده ده اضرب
اضربا اضربوا و اخش واغز وارم دنیلور زیرا معنأ مجزوم باللامه مشابه
اولغله کندینه آنک حکمی و یریلور واما کوفیلر غندنده امر حاضر لام
مقدرده ایله مجزوم اولغله محتاج بیان دکلدور .

امر حاضر صیغه سی بصر یلر غندنده فعل مضارعک مخاطبدن یاپیلور
و کوفیلر غندنده فعل مضارعک مخاطبدن لام امر ایله مجزوم امر حاضر
مخاطب صیغه سی آنوب شو صیغه ایسه استعمالا متروک اولغله آندن اشبو
امر حاضر یاپیلور .

ویا پلمسنک طریق بصر یلره کوره حرف مضارعت و کوفیلره کوره لام

امرايله حرف مضارعت حذف اولنور وما بعد حرف مضارعت ساكن ايسه
 برهمزه وصل كتورينور لكن ساكن اولان (ما بعد حرف مضارعت) دنسكره
 اولان حرف مضموم ايسه همزه وصل مضموم واكر مضموم دكل ايسه
 هر حالده مكسور قيلنور اقل واضرب واعلم واجتمع كي واكر ما بعد
 حرف مضارعت متحرك اولور ايسه حرف مضارعت حذف اولنوب آخر كله
 ساكن قيلندقدده صورة حاصله صيغه امر اولمش اولور مثلاً تعد كله سندن فعل
 امر اخذ اولندقدده عد و تقا تل كله سندن فعل امر اخذ اولندقدده قاتل دينور
 باب افعال دن فعل مضارع ده نفس متكلم وحده ده ايكي همزه جمع اولسون
 ايچون همزه افعال حذف اولنوب ونفس متكلم وحده نك غيرنده دخی
 اطراداً للباب محذوف بولنديغندن ما بعد حرف مضارعت ساكن ايسه ده
 لكن ارباب ذكايه غير خفیدر كه نفس متكلم ده اجتماع محذوري انتاج ايله
 همزه افعالك حذفی ايجاب ایدن حرف مضارعت اولان نفس متكلم
 همزه سی اولوب امر حاضر اخذنده ايسه حرف مضارعت ذانا حذف اولنه جغندن
 موجب حذف بولنما غله (امر حاضر) همزه افعال اعاده اولنه رق اخذ
 اولنور مثلاً اكر امدن امر حاضر اخذی مراد اولندقدده تكرمدن حرف
 مضارعت حذف اولنور و همزه افعال اعاده و آخری ساكن قيلنه رق اكرم
 ديلور واما تعد نچونده امر حاضر اصلي اوزره آلتامسی (مثلاً تعددن امر
 حاضر ده اوعد دینلما مسی) زیرا اصلي اوزره اخذ اولنه رق اوعد دینلسه
 مشتق منه اولان مضارعه و او محذوف ایدو كندن اصلنه بتعاینه حذف
 و اعلال اولندقدده عد دینلماك لازم كله رك سعی هبا و ضایع اولور ایدی
 و تقصیل البحث فی الصرف .

درس ۲۰۹

(مبحث فعل مالم یسم فاعله) فعل مالم یسم فاعله فاعلی ذکر اولنیان
 مفعولك فعلی دیکدر كه فعل مجهول اطلاق اولنور فاعلی حذف اولنه رق
 مفعولی فاعل مقامنده اقامه قلنمش اولور. مجهول قيلنمق اراده اولنان فعل
 فعل ماضی ايسه حرف اول مضموم و ما قبل آخر مكسور قيلنور زیرا

معنای مجهول بین المعانی غریب اولمغه کنیدی ایچون ضمه دن کسره یه
خروج کی بر امر غریبی مشتمل بین الاوزان غریب بوزن اختیار
اولمشدر ضرب و دخرج واعلم کی واولنده همزه وصل اولانلرده
حالت درجده امر حاضرینه ملتبس اولمسون ایچون حرف ثالث مضموم
قینور انطلق واقدر واستخرج کی واولنده تا اولنلرده تفعیل ومفاعله
ودخرج بابلرینک مضارعنه ملتبس اولمسون ایچون تا ایله بیله حرف ثانی
مضموم قینور تعلم وتجوهل وتدخرج کی وعین الفعی الفه منقلبه معتل
العین ده مثلاً قال و باع کلهلرینک مجهولنده قیل و بیع دینلور اصلاری قول
و بیع ایدی علم صرفده معلوم اولدینی اوزره اعلال اولنوب قیل و بیع اولمشدر
بوکیلرده لغه فیصحه اوزره اشمام دخی کلمشدر نحاتک بوراده اشمامله
مرادلری فاء الفعللرینک کسره سنی ضمه جهته تقریب ایلمکدرکه شو
حالده یای ساکنه برپارچه و اووه میل ایتش اولور زیرای ساکنه ماقبلنک
حرکه سینه تابعدر و بعضیلر بوراده اولان اشمام حالت وقفده اولان اشمام
کییدرکه فاء الفعی خالص کسر ایله او قومق ایله بیله طوداقلرینی یومقدرد
دیدیلر . و بعضیلر ضمه خالصه دنصکره یا ساکنه اوله رق کتورلمکدر
دیدیلر لکن بونلر غیر مشهوردر و بعض قیل و بیع نخونده عندالاشمام یا
واو قیانه رق قول و بوع دینک دخی علی ضعف مسموع اولمشدر وافتعال
وافتعال بابلرندن معتل العین دن ماضی مجهولده دخی ذکر اولدینی اوزره
وجوه ثلثه ایشیدلمشدر مثلاً اختیار و انقید کی زیر اختیار و انقید کلهلرنده
(تیر) و (قید) بلا فرق قیل و بیع کییدر و اما استخیر و اقیم بابلری شو
مذکوره قیاس اولنه مز زیر بونلرده فی الاصل حرف علهنک ماقبلی حرف
صحیح ساکن اولوب علی القیاس حرف علهنک حرکه سی ماقبلنه نقل
وعین الفعل و اوایسه یایه قلب اولنه رق معروف اولدینی اوزره اعلال اولنور
و شو صورتده برلغت واحده اوله رق استخیر و اقیم دینلور و اگر مجهول
قیانمسی اراده اولنسان فعل فعل مضارع اولور ایسه حرف اول مضموم
وماقبل آخر مفتوح قینور یضرب و یکرم و یلتزم و یستخرج و یتمدخرج
کی و معتل العین ده عین الفعل الفه قلب اولنور مثلاً یقول و بیع و یستخیر

ويقيم كلمه لرینك مجهولنده یقال ویباع ویستخار ویقلم دینلور اصلی یقول
ویدیع ویستخیر ویقومدر حرف علامه متحرك و ماقبلی حرف صحیح
ساکن اولدیغندن حرکه سی ماقبلنه نقل اولنهرق الفه قلب اولنور و یختار
و ینقاد كلمه لرینك مجهولنده یختار و ینقاد دینور آنحق حرف مضارعنك
ضمیله معلومه اصلاری یختیر و ینقیددر یانك كسر یله و مجهوله یختیر
و ینقیددر یانك فتحیله هر حالده یا متحرك ماقبلی مفتوح بولندیغندن
الفه قلب اولنور .

درس ۲۱۰

(مبحث المتعدی و غیر المتعدی) خفی اولیه که فعللر یا متعدی و یا خود غیر
متعدی اولور فعل متعدی (مایتوقف فهمه علی متعلق) دیندرک تعریف
اولنور یعنی فهمی فاعلك غیری بر متعلقه توقف ایلیان کله در دیمکدر
و متعلق ایله فاعلك غیری بر متعلق مراد اولنسی زیرا اصطلاح نجاتده
(تعلق) فاعلك غیر فاعله اولان نسبتنه دینور که مثلاً هذا الفعل صادر
من الفاعل و (قائم به) و (مسند الیه) دینلور لکن (متعلق به) دینلمز
و شو آراد (متعلق مقصود) ما وقع علیه الفعل یعنی مفعول به صریحدر
زیرا زمان و مکان و غایه و حال و بویکی سائر متعلقات فعلی ذکر ایتیمکسزین
فهم و تعلق فعل ممکن اوله یلور .

متعدی اولان فعللرده اوچ ضرب اوزره متصوردر (ضرب اول) آنحق
بر مفعوله متعدی اولانلردر (ضرب زید عمر واً) قولزده ضرب کی کلامده
اشبو قسمك وقوعی بك چوقدر بوقسمك مفعولی بعض قیام قرینه عندنده حذف
اولنور (اهذالذی بعث الله رسولا) قول شریفنده اولدیغی کی بعثه الله دیمکدر
و بعض بلاقرینه منسیاً حذف اولنور که فعل لازم منزله اولور نته کیم (فلان
یا کل ویشرب) قولزده اولدیغی کی یفعل الاکل والشرب دیمکدر .

(ضرب ثانی) ایکی مفعوله متعدی اولانلردر که بوده اوچ قسم اوزره در .
(قسم اول) مفعول ثانسی مفعول اولنه مابین اولاندر (اعطیت زیداً درهماً)
قولزده اولدیغی کی بوقسمك ایکی مفعولانی معاً و یا خود برینی وجود قرینه

عندنده منو یا حذف جائز در مثلاً (سأل زید عمرواً درهماً فاعطی) و یا خود (فاعطی درهماً) دیدیکم زده اولدینی کی و بعض بلا قرینه منسیا دخی حذف اولنور نته کیم (فلان یعطی) دینور یقعل الاعطاء دیمکدر .

(قسم ثانی) مفعول ثانسی مفعول اوانه مباین اولیوب بلکه صادق اولانلردر که انلره افعال قلوب دینلور درس آتیده بیانی کلور .

(قسم ثالث) مجرد مبتدا و خبر اوزره داخل اوله رق آنلری مفعولیت اوزره

منصوب قیلمقده و ایکی مفعولانی معا و یا خود یالکیز برنی منوی اوله رق بلا قرینه حذف جائز اولما مقده و وجود قرینه عندنده یالکیز برنی حذف قلیل بولمقده افعال قلوبه ملحق اولان فعللردر که آنلر (صیر) و دخی اعتقاد باطل

و یا خود صیر معناسنه اولان (جعل) و صیر معناسنه اولان ترك و اتخذ و بوکی بعض فعللردر (صیرت زیداً عالماً) قولم زده و حق سبحانه و تعالی نك (جعلاو

الملائكة الذين هم عباد الرحمن انائاً) و (فجعلناه هباءً منثوراً) و (وترکنا بعضهم یومئذ یوج فی بعض) و (واتخذ الله ابراهيم خلیلاً) قول شریفنده اولدینی کی .

(ضرب ثالث) اوچ مفعوله متعدی اولانلردر اعلم واری کی (اری)

کله سی اعلم کی افعال بایندن فعل ماضی اولوب اصلی ارأی در (یا) متحرک

ما قبلی مفتوح اولمغله الفه قلب اولنمش پس همزه سی تلین و حرکه سی رایه نقل ایدیلهرک اجتماع ساکنین لازم کله همزه حذف اولنوب اری اولمشدر

ثلاثی رؤیت بصریه یعنی کورمک معناسنده بر مفعوله و رؤیت قلبیه یعنی

مشاهده مرتبه سنده بیلمک معناسنده ایکی مفعوله متعدی اولور لکن همزه

افعالک کلسیله کوسترمک و بیلدرمک معنالرینه اولدیغندن ثلاثی سندن فضاه

بر مفعول آخره تعدی بی مقتضی اولدیغندن اری کله سی کوسترمک معناسنده

ایکی مفعوله و اعلام یعنی بیلدرمک معناسنده اوچ مفعوله متعددی اولور

و خفی اولیه که افعال و تفعیل بایلرندن انبأ و نبأ و اخبر و خبر و حدث فعللری

بعض اعلام معناسنی مشتمل اوله رق اوچ مفعوله متعدی اولور لر مثلاً انبأ

زید عمرواً بکراً فاضلاً دنیلور که زید بکرك فاضل اولدینی عمره خبر ویره رک

بیلدردی دیمکدر و اما شو فاعللر اعلام معناسنی مشتمل اولمدقلرنده هرکز

اوچ مفعوله متعدی اولیوب آنحق ایکی مفعوله متعددی اولور لر و مفعول

ثانی یه تعدیلری اکثریا (با) واسطه سیله اولور نته کیم (انبئونی باسماء هؤلاء

و انبئهم باسماءهم و فلما انبأهم باسماءهم (قول شریفنده و اخبرهم بالخبر و خبرهم بالشئ قولر مزده اولدینی کی . و سبویه مفعول ثانی به تعدیلری آنحق حرف جر واسطه سیله اولور و حق سبحانه و تعالی نك من انبأ هذا قول شریفی من انبأ بهذا تقدیرنده در دیدی .

و معلوم اوله که اوج مفعوله متعدی اولان فعللرك مفعول اولی کندیله اکتفا اولنق و بعض کنندن دخی استغنا ایله حذف ایدیلمك جائز اولمقده اعطیت باینك مفعول اولی کییدر مثلاً اعلمت زیداً دینمکه اکتفا و اعلمت عمرواً منطوقاً دینمکه مفعول اولدن استغنا جائزدر و مفعول ثانی و ثالثی احدهما ذکر اولندقدده آخرك دخی ذکر ی واجب اولمقده و ایکسینی بردن ترك جائز بولمقده افعال قلوبك مفعولینی کییدر .

فعل متعدی معلوم اولدی ایسه فعل لازمه که لم فعل لازم تعریف متعدینك خلافته ملتبس اولاندر که فهم و تعقل اولنملری غیر فاعله متوقف اولیان فعللردر حسن و قعد کی و بعض کنندده جمیع بدنك مدخلی بولنان لازم و برعضو واحد و یا خود قلب و حس ایله ایشانان متعدیدر کی بیان رای اولنمش ایسده شو بیان بر استقراء جائز التخالف در و بیلماید که لازم علم صرفده بیان اولدینی اوزره مثلاً اذهبت زیداً و فرحته و ذهبت بزید قولر مزده اولدینی کی همزه و تضعیف و حرف جر ایله و ما شئیه و استخرجه قولر مزده اولدینی کی مفاعله و استفعال بابلرینه نقل ایله و تفعیل و تفعیل بایندن تایی حذف ایله متعدی اولدینی کی متعدی دخی اسباب تعدیه یی حذفله و انفعال و تفعیل و تفعیل بابلرینه نقل ایله لازم اولور ننه کیم ترکیه اوله رق دنیلمشدر .

لازمك تعدیه سیچون بش سبب و ارای پسر
بری همزه بری تضعیف بری سیدر حرف جر

بریسیده نقل ایله در بریسیده حذف ایله

کیم بولشی بیلور ایسه اوله دائم معتبر

هم اولور لازم متعدی تأمل ایلمکل
حذف اسبابیله همده نقل ایله چکمه کدر

(مبحث افعال قلوب) افعال دالة على فعل قلابي داخله على المبتدأ والخبر ناصبة ايها على المفعولية (ديمسكه تعريف و بيان اولنور يعنى افعال قلوب دنيلان برطاقم فعللر ذر كه فعل قلابي به دالات ايدرلر و مبتدا ايله خبر اوزره داخل اولوب آنلري مفعوليت اوزره منصوب قيلر لر علمت و رأيت و وجدت و زعمت و ظننت و خلت و حسبت و احسب معناسنه هب كبي .

تعريف مذكور ايله فعل قلابي اوليانلر و فعل قلابي اولوب فقط مثلاً عرف و فهم كبي بر مفعوله متعدي اولانلر خارجدر . و بيامليدر كه افعال قلوبك جمله اسميه اوزره دخوللري اول جمله ايله اخبارك منشائي علم و يا خود ظنميدر بيان ايجوندر شوجهتله افعال قلوبه افعال شك و يقين دخي دنيلور شك ايله مراد تساوي طرفيني مقتضي اولان شك اوليوب ظن در . و خفي اوليه كه بحث متعديده مرور ايلديكي اوزره اشبو افعال قلوبه ملحق بعض فعللر دخي واردر كه آنلر صير و جعل و ترك و اتخذ و بوكي فعللر در مثلاً و جد معناسنه (الف) و اعتقاد باطل معناسنه (عد) و بعد الاستفهام واقع (قال) كبي كه ظن معناسنه اولور و اري نك مجهولي (اري) كبي كه ظن معناسنه در فعل معلوم معناسنه مستعملدر شاعرك (والفي قولها كذباً و مينا) قولنده و كنت اعده فقيراً فبان غنيا و اتقول زيداً ذاهباً و زيد اري عمرواً قائماً قوللر مزده اولديني كبي . علامه شهير اطهلي مرحوم شو فعمللرك افعال قلوبه الحاقده بعضيلرك زعم ايلديكي اوزره افعال قلوب سماعي اوليوب ذكر اولسانده منحصر اولمديغنه تبنيه واردر ديمشدر . على الاشهر ثبت و ذكر اولنان افعال قلوبدن (علمت) و (رأيت) و (وجدت) شواوچ دانهسي علم و يقين ايجوندر و (ظننت) و (خلت) و (حسبت) اشبو اوچدانه دخي ظن ايجوندر و (زعمت) ظن ايله علم بيننده مشتركدر و (هب) احسب معناسنه فعل امر اولوب ايكي مفعوله متعدي اولور بوندن ماضي و مستقبل تصریف اولنمز هب زيداً منطلقاً دنيلور احسب زيداً منطلقاً ديمكدر و شيخ

رضی اعلم معناسنه امر و غیر متصرف اولمق اوزره تعلم لفظنی دخی زیاده قیلمشدر لکن جزائی منصوب قیله میوب بعدنده جزئین اوزره (ان) داخل اوله رق وارد اولور تعلم ان زیدا عالم کبی و علم معناسنه (دری) دخی مرویدرکه اوده بووجه اوزره در دری زید ان عمرواً قائم کبی .

(خفی اولیه که افعال قلوبک خصائص عیدیه سی) واردر . افعال قلوبک خصائصنددرکه ایکی مفعولندن بری اوزره اقتصار جائز اولیوب بری ذکر اولندقدده آخر دخی مذکور اولور زیرا افعال قلوبک ایکی مفعولی (حقیقه مفعول به ایکسینک مضمونی اولمغله) اسم واحد منزلنده در شو صورتده برینی حذف و دیگرینی ترك برکله نک بعض اجزاسنی حذف ایلمک کبی اولور بوانسه غیر جائزدر .

ومع هذا نادراً بعض وجود قرینه عندنده احد مفعولینک حذفی دخی مرویدر صیغه غیبت اوزره او قوندیغنه کوره حق سبحانه و تعالی نک ولا یحسبن الذین یخولون بما آتاهم الله من فضله هو خیراً لهم قول شریفنده اولدینی کبی که لا یحسبن هؤلاء یخلفهم هو خیراً لهم دیمکدر وشاعرك :

ایها الناطق المرقن عنا عند عمرو وهل لذلك انتهاء
لا تخلنا علی غرائک انا طالما قد وشی بنا الاعداء

شعرنده بیت ثانیده اولدینی کبی لا تخلنا جازعین دیمکدر مفعول ثانی حذف اولمشدر مفاد شعر ای بزم ایچون کلامنی ملک وقت اولان عمرو عندنده دام تزویر وافترا قیلیجی اولان کیمسه آیاسنک شو قوغیجلق و تزویرک ایچون انتها وارمیدر سن ملکی بزم علیهمزه اغرا و تحریض ایلمکک اوزره بزنی خوفندن جزع و فزع ایدیجی ظن ایلمه زیرا عدولریمز چوق دفعه لر حقمزده ملکه قوغیجلق ایلدیلر دیمکدر .

حاصل کلام افعال قلوبک احد مفعولینی اوزره اقتصار جائز دکلدر آنجق قیام قرینه عندنده مع قلة واقعدر و قیام قرینه عندنده ایکی مفعولنی بردن حذفده برأس یوقدر مثلاً من یسمع یخل قولنزه اولدینی کبی یخل مسموعه صادقاً دیمکدر .

و بعض تعمیم قصیدیه فعل قلبی فعل لازم منزلته تنزیل اولنوب مفعولینی منسیا حذف اولنور (هل يستوی الذین یعلمون والذین لا یعلمون) قول شریفنده اولدینگی کی بعضیلر منسیا حذفی قبول ایلمیوب آیت کریمه ده علمی علم بمعنی المعرفه اولمغله توجیه ایلدیلر فافهم .

درس ۲۱۲

ودخی افعال قلوبك خصائصنددرکه بعض علی سبیل الجواز ویاخود علی سبیل الوجوب عملی لفظاً ومعناً الغا وابطال اولنور (علی سبیل الجواز الغای عمل ایکی موضعه در .

(اولکیسی) ایکی معمولی بیننده توسط ایلدیکنده در زید علت منطلق کی لکن بوصورته اعمال الغادن اولادر زیرا بوصورته فعل قلینک اولدقچه تقدم لفظیسی اولوب وفعل اولسی جهته قوی بولندیغندن جانب عمل ترجیح اولنور .

(ایکنجیسی) ایکی معمولندن تأخر ایلدیکنده در زید منطلق علت کی بوصورته اولی اولان رأساً تقدم لفظی بولنمغله الغای عملدر وشو ایکی موقعده جواز الغاشو فعللارک افعال قلبیه اولوب سائر فعالر کی اثر ظاهر یلری بولنمائی جهته قوه ده سائر افعال درجه سنده اولیوب وتوسط وتأخر ایله ده عمللرینه برقاتدها ضعف طاری اولسندن وبرده مبتدا وخبر ومفعولین قیلمغه صالح ایکی جزئک الغا اولنهرق مبتدا وخبر قیلمدقده کلام تام اوله رق استقلالندن ناشیدر افعال قلوبده معمولینی اوزره مقدم بولندیغنده دخی الغانک جوازی نقل اولنمش ایسه ده لکن اشبو ذهاب مرجوح اولوب جمهور نجات تجویز ایلمامشلر در .

و (اما علی سبیل الوجوب الغای عمل التی موضعه در .

(اولکیسی) اسم فاعل ایله معمولی بیننده توسط ایتدیکنده درلست بمکرم احسب زیداً کی .

(ایکنجیسی) حروف مشبیه بالفعلین (ان) مشدده مکسوره نک ایکی معمولی بیننده توسط ایتدیکنده در ان زیداً احسب قائم کی .

(اوچنجیسی) سوف ایله مصحوبی بیننده توسط ایتدیکنده در . سوف
احسب یقوم زی . کی .

(دردنجیسی) عاطف ایله معطوف بیننده توسط ایتدیکنده در جاء فی تدر
واحسب عمرو کی .

(بشنجیسی) بر فعل ایله مرفوعی بیننده توسط ایتدیکنده در ضرب احسب
زید کی تسهیلده ثبت اولندیغنه کوره بصریلر شو قسمده الغانك جوازینه
ذاهب اولمشدرکه آنلره کوره مثال مذکور تنازع بابندن اوله رق زید
مرفوع اولوب (ضرب) نك فاعلی اولوق ویاخود زید منصوب اوله رق
(احسب) نك مفعول اولی و مقدم ضرب جمله سی مفعول ثانسی بولمق
جائز اولور .

(التنجیسی) توسط وتأخر حالده بولان افعال قلوبك مصدری اولور
ایسه در زیر مصدر ماقبلنده عمل ایده من زید ظنی قائم غالب وزید قائم
ظنی غالب قوللر مزده اولدینی کی . خفی اولیه که فاضل عصامك بیان
ایلدیکی اوزره الغا صورتنده معنا بعینه صورت اعمالده اولان معنا کیدر
مثلاً (زید قائم ظننت) قوللر ظننت زیداً قائماً دیمکدر معناده جزئینه تعلق
باقی اولوب لکن لفظاً عمل ایلمامشدر و شیخ رضینک تحقیقنه کوره افعال
قلوب حین الغاده ظرف معناسنده در مثلاً زید قائم ظننت قوللر زید قائم
فی ظنی دیمکدر لکن اشبو توجیه (زید قائم ظنی غالب) قوللر مزده جاری
اوله من دینلمشدر زیرا (زید قائم فی ظنی غالب) عباره سی سقیمدر و شیخ
رضینک قول من بورك معناسی ظنی زیداً قائماً غالب در دیمسی یعنی بعینه
صورت اعمالده اولان معنا ایله بیان ایلمسی اعترافدر دینمشدر لکن شیخ
رضینک قول من بورده توجیه اولنه منافی توجیه ایلمسی قول من بورده
توجیه اولنه موافق توجیه ایله دخی توجیه ایده بیلیمسینه منافی دکلدر زیرا اطله
مرحومك اشارت بیوردینی اوزره ممکندرکه قول من بورك معناسی زید قائم
فی ظنی الغالب اوله بوا یسه لفظاً خبر اولانك معناً وصف اولسی جائز اولمغله
توجیه وحیه در و شیخ رضینک قول من بورده توجیه اولنه منافی توجیه
ایلمسی شوایکی توجیهك دخی جائز اولمسنه اشارت ایچون اولمسیده محتملدر

ودخی افعال قلوبك خصائصندركه عملی معنأً باقی اولوب یالکز لفظاً علی سبیل الوجوب ابطال ایدیورکه بوکا تعلیق تسمیه اولنور تعلیق عنوانی مفقوده الزوج اولان عورته عربك (امرأة معلقة) دیلرندن مأخوذ درکه مفقوده الزوج اولان عورت مصالحنی تسویه ایده جك کیمسه سی اولدیغندن کشیسی وارکی اولیوب و آخرینه نکاح ایله دخی وارده میه جغندن کشیسی یوق کی دخی دکدر بلکه وادی حیرته اصلمش قلمش کیدر معلق اولان فعل دخی لفظاً عملی ابطال واجب اولدیغندن برلفظه عامل اولیوب و معنأً عملی باقی اولدیغندن ملغی عن العمل کی دخی بولنیوب مفقوده الزوجه مشابه اولشدر .

و بیلیمیدرکه تعلیقك حقیقتده اختلاف اولنوب بعضیلر مدخولی اولان جمله اسمیهك ایکی جزئیه عمل فعلی لماع ابطال ایلمکدر دیدیلر بومعنا ایله تعلیق خصائص افعال قلوبدن اولوب آنحق افعال قلوبك ایکی مفعولارنده تحقق ایدرکه ابن جاجب رحمه اللهک مسلکیدر . و بعضیلر لماع مفعولنده عمل فعلی ابطال ایلمکدر دیدیلر بومعنا ایله تعلیق عام اولوب افعال قلوبه ودخی شککت ونسیت وتبیت کی فعل قلبه دال هر برفعله وکندیله علم طلب اولنور امتحنت وسألت کی فعللره وبقیلدن لمست وابعرت وسمعت وشممت وذقت کی افعال حواس خمس ظاهریه شاملدر زیرا تعلیق بونلرده دخی جاریدر و برکوی رحمه اللهده بومسلکه سالک بولنشاردر .

شوبسظمز اذعان اولندی ایسه خفی اولمیه که تعلیق بش شیدن بریله تحقق ایدر (اولکیسی) کلمه استفهامله که استفهام کله لرندن بری افعال قلوبك مفعولنی ویاخود مفعول ثانیهسی اوزره داخل اولسه عمل لفظی وجوباً ابطال اولنور (علمت ازید عندك ام عمرو) و (علمت غلام من انت) قوللر مزده اولدیغی کی .

(ایکنجیسی) کلمات نفیدن ماولا وان ایله که بونلردن بری وجه مشروح

اوزره داخل اولسه افعال قلوبك عمل لفظیسی كذا وجوباً ابطال اولنور
رأيت مازید منطلق وظننت لازید فی الدار ولا عمرو وحسبت ان زید
ذاهب قوللر مزده اولدینی کی .

(اوچنجیسی) لام ابتدا ایله که بونك دخی دخولیه عمل لفظی كذا
وجوباً ابطال اولنور وجدت لزید منطلق قوللر مزده اولدینی کی .

(دردنجیسی) لام قسم ایله که كذا لام قسمك دخولی افعال قلوبك عمل
لفظیسی وجوباً ابطال ایدر شاعرك (لقد علمت لیاتین منیتی) قولنده
اولدینی کی .

(بشنجیسی) خبرینه لام ابتدا داخل اولمش (ان) مشدده مکسوره ایله که
بونك دخی دخولی عمل لفظی یی كذا وجوباً مبطل در علمت ان زیداً
لقائم قوللر مزده اولدینی کی ان کلمه سنی خبرنده لام ابتدائك دخولیه تقيديز
زیرا لام ابتدا داخل اولمده (ان) مشدده مفتوحه اولوب تعلیق
تحقق ایلمز .

خفی اولیه که شود کر اولنانلر ایله تعلیق تحقق ایلمسك وجهی زیرا بونلر
وضعاً صدر جمله ده بولنه جقلرندن جمله نك بقای صورتی اقتضا ایدرلر
افعال قلوب ایسه داخل اولدینی جزئی مفعولیت اوزره منصوب قیله جغندن
تغیرینی اقتضا ایلر پس یینلرینی توفیق لازم کلوب لفظاً امور مذکورہ نك
حقوقینه رعایتله افعال قلوبك لفظاً عملی وجوباً ابطال اولمش ومعناً افعال
قلوبك حقوقنه رعایتله افعال قلوبك معناً عملی وجوباً ابقا قیلنمشدر .

تعلیق صورتنده افعال قلوبك عمل معنویسی مرعی بولندیغندن صورت
تعلیقده معمولینی اوزره محمله حملاً نصب ایله عطف جائز اولمشدر مثلاً علمت
لزید قائم وبکراً قاعداً قوللر مزده اولدینی کی .

وبیلمیدر که تعلیق ایله الغا بیننده فرق بیانمزدن وشیش رضینك درس
سابقده توجیه اولندن مستبان اوله خفی اوزره الغا لفظاً ومعناً ابطال
عملدر واما تعلیق یالکز لفظاً ابطال عملدر . لکن فاضل عصامك بیان
وتوجیهندن وشیش رضی نك توجیه نایسندن مستبان اولان الغا دخی تعلیق
کی یالکز لفظاً ابطال عمل اولغله شوصورتده آنحق الغابعض جائز وبعض

واجب اولوب و صورت جواز کثیر الوقوعدر و اما تعلیق همیشه واجبدر
دینکله فرق اولنور .

درس ۲۱۴

ودخی افعال قلوبك خصائصندركه مفعولینی اوزره (ان) مفتوحه مشدده
داخل اولور علمت ان زیداً قائم قولمزده اولدینی کی شو ترکیبده ان زیداً
قائم جمله سی تأویل مفرد و حکم مصدرده اولوب محلاً منصوب علمت نك
مفعولی قیلنور سبویه عندنده اشبو مفعول مفعولین مقامنده قائمدر و اخفش
عندنده مفعول اول اولوب مفعول ثانسی محذوفدرکه مثلاً بر حاصلأ
تقدیر ایدیلور .

ودخی خصائص افعال قلوبندركه فاعل و مفعولی تکلم و خطاب و غیبتده
متحدی المعنی ضمیرین متصلین اولمق جائزدر (علمتی قائماً) و (علمتک
واقفاً) و (علمه ظالماً) قوللر مزده اولدینی کی معنایی (بن بنی قائم بیلدم)
(سن سنی واقف بیلدک) و (اوکندینی ظالم بیلدی) دیکدر شومذکور
افعال قلوبك غیرنده جائز دکلددر مثلاً (بن بنی ضرب ایتدم) و (سن سنی
ضرب ایتدک) و اوکندینی ضرب ایتدی) دیه جک یرده ضربتتی و ضربتک
و ضربیه دینمز بلکه ضربت نفسی و ضربت نفسک و ضرب نفسیه دینلور
زیرا افعال قلوبك غیرنده فاعل ایله مفعول بیننده مغایرت غالب اولمغله
نادراً فاعل ایله مفعول متحد اولدقده ندرتندن ناشی فاعل ایله مفعولک متحد
اولدینندن غفلت و ذهول اولنماق اوزره تنبیه و تصریح ایچون و برده غالب
اولان مغایرت اولمغله معناً متحد اولدینی کی لفظاً دخی متحد اولمق کریه
کورلديکندن لفظ بشقه لشه رق بقدر الامکان مغایرت حصوله کلمک ایچون
جانب مفعولده بر نفس لفظی زیاده قیلنور و اما افعال قلوبده بر آدم کندینی
دیگرندن ایوبیله جکندن اتحاد غالب اولمغله اتحاد تنبیه ایچون نفس لفظی کتورمکه
حاجت یوقدر . حالبوکه افعال قلوبده حقیقه مفعول به منصوب اول اولیوب بلکه
مضمون جمله بولمغله فاعل و مفعولنک لفظاً و معناً متحد اولمسنک جوازنده
شبهه یوقدر و افعالدن عدم و فقد حمل النقیض علی النقیض قاعده سی اوزره

شوخاصه ده وجد اوزره حمل اولمشدر ودخی رؤیت بصریه وحلمیه یعنی
کوزایله کورمک ونوم ورؤیا معنایینه اولان رؤیت ماده سی دخی اشبو
خاصه ده رؤیت قلبیه اوزره جاریدر . شاعریک

ولقد ارانی للرماح دریه من عن یمینی تارة وامامی

شعرنده وحق سبحانه و تعالی نک (انی ارانی اعصر خمرأ) قول شریفنده
اولدینی کی که ارانی ابصر معناسنه اولوب فاعل ومفعول متحدی المعنی
ضمیرین متصلین بولمشدر .

خفی اولمیه که افعال قلوبدن حسبت و خلت همیشه ایکی مفعولی اقتضا ایدر
اولان معنایندن منزل اولمز لر لکن بونلرک ماعداسی بعض دیگر معنایره
کلورکه اول معنایر ایله آنحق بر مفعوله متعدی اولور لر مثلاً ضننت اتهمت
معناسنه وزعمت کفلت معناسنه وعلمت عرفت معناسنه و رأیت ابصرت
معناسنه ووجدت صادفت معناسنه اولدقده اولدینی کی .

درس ۲۱۵

(مبحث الافعال الناقصه) خفی اولمیه که فعللرک مفهومی منده و ضعا بر فاعله
نسبت مأخوذ اولمغله هر بر فعل ایچون البته بر مرفوع لازمدر شو حالده اگر
بر فعل مرفوعیه کلام تام اولور یعنی مخاطبه بر فائده تامه و یروب آنک اوزرینه
سکوت اولنه بیلور ایسه اکا فعل تام تسمیه اولنور و مرفوعه فاعل و متعدی
اوله رق منصوبی بولنور ایسه منصوبه مفعول دنیلور .

واکر کلام یونندن مرفوعیه تمام اولمز بلکه بر معمول منصوبه محتاج اولور
ایسه اکا فعل ناقص دینور و مرفوعه اسم و منصوبه خبر اطلاق اولنور
ابن حاجب حضر تری بونک دخی مرفوعه فاعل تسمیه ایلمشدر و فعل
ناقص دینه رک وجه تسمیه سی مرفوعیه تمام اولدینی جهته در زیرا مثلاً
(کان زید) دینسه زید اولدی دیکدر بوندن ایسه زیدک نه اولدینی منفهم
اولیوب بر کلام مفید دکلدر واما خبر اوله رق مثلاً عالماً دینسه عالم اولدینی
وجاهلاً دینسه جاهل اولدینی وهکذا فهم اولنور .

و بعضی افعال تامه کبی حدث و زمان و نسبت به یغی شواوچنه بردن
دالت ایلمیوب بلکه افعال ناقصه یالکز مرفوعیه منصوبی بیننده اولان
بر نسبت و برده اول نسبتک قیدی اولان بر زمانه دالت ایدر لکه حدثه
دالتدن منسوب اولمشلردر و شوجهتله ناقصه تسمیه اولمشلردر دیدیلر .

افعال ناقصه (ماوضع لتقریر الفاعل علی صفة) دینمکله تعریف اولنور یغی
فاعلی بر صفت اوزره تقریر ایلمک ایچون وضع اولنش فعللردر دیمکدر
افعال ناقصه نك موضوع لهنده عمده اشبو تقریر اولوب فاعل ایله صفت
بیننده بر نسبت اولمغه نسبتک ایکی طرفلری اولان فاعل و صفت موضوع
له دن خار جدر و اما افعال تامه بر صفته و فاعلی اول صفت اوزره تقریره وضع
اولنش اولدقلرندن موضوع لهنزنده تقریر ایله بیله صفت دخی عمده بولمغه
افعال تامه شو تعریفدن خار جلدردر .

افعال ناقصه علی الاظهر کان و صار و اصبیح و امسی و اضحی و ظل
و بات و آخ و عاد و غدا و راح و مازال و ما انفک و ما فئ و ما برح
و مادام و لیس در سبویه افعال ناقصه نك بیاننده آنجق کان و صار و مادام
و لیس ی ذکرایله و سائر بوکبی خبره محتاج بولنانلردر دیمشدر سبویه نك
سیاق کلامندن منفهم اولان افعال ناقصه شوا افراد مذ کورده منحصر دکلدر
خفی اولیه که بر چوق افعال تامه بعض ناقصه معناسنی متضمن اوله رق
کورلمشلردر بونلرک معنای اصلیری مألده . تأکید و مبالغه ایچون بعض
حال و یاخود خبر بعد خبر و یاخود خبر منصوبه صفت اولق اوزره ارانه
و افاده اولنور مثلاً تم التسعة بهذا عشرة قولزده اولدینی کبی صار عشرة تامه
دیمکدر و کمل زید عالما قولزده اولدینی کبی صار عالماً کاملاً دیمکدر و عدل
زید امیراً قولزده اولدینی کبی صار امیراً عادلاً دیمکدر . و دخی بعض فعل
تام فعل ناقص معناسنه اوله رق دخی کلشدر .

افعال تامه دن جاء و قعد کله لرنده اولدینی کبی نته کیم عربلر (ما جاءت
حاجتک) دیرلر (ما) نافیه در و (جاءت) کانت معناسنه اولوب اسمی
تحتنده مستتر هی ضمیر یدر غفلت و اغباوت نحوینه راجعدر و خبری
(حاجتک) در حضرت امام علی رضی الله تعالی عنه و کرم الله افندمن

ابن عباس رضی الله تعالی عنهما بی خوارجه طرفلرندن ایچی اوله رق
کوندر دکلرنده اشبو ترکیبی حضرت ابن عباس رضی الله تعالی عنهما
افدمزه خطابا ابتدا خوارج قائل اولمشلردر . مفادی بزى بك غافل
ظن ایلدورسك لكن بزده اولان غفلت سنك خواهشكر ومحتاج اولديغك
قدر دکلدر یعنی سنك مأمول ایلدیکك قدر غافلردن دکلر دیمکدر .

ویا خود ترکیب مزبورده (ما) استفهامیه و (جاءت) صارت معناسنه
اولوب اسمی اولان ضمیر مستتر (ما) لفظنه راجع درونانی (من كانت امك)
ترکینده اولدینی کی خبری اعتباریله در و خبر کذا (حاجتك) در ودخی
(حاجتك) اسم و (ما) لفظی خبر اولوق دخی مرویدر یعنی قننی حاجت
سنك حاجتك اولدی دیمکدر که ترکیبه ده مرادك ندر ونه استیورسك
دینور . و عربلر (ارفف شفرته حتی قعدت کانها حربة) دیرلر قعدت
صارت معناسنه اولوب اسمی تحتنده مستتر هی ضمیر یدر شفرهیه راجعدر
و خبری (کانها حربة) ترکیبدر مفادی بچاغنی اول قدر کسکین ایلدی که
صانکه رح قصیر کی اولدی دیمکدر . نجاتدن (اندلسی) جاء و (قعد)
کله لرینك فعل ناقص معناسنه اولملری عربك استعمال ایلدکلری شو
موضعلری تجاوز ایلمز دیمشدر . و اما امام فراء (جاء البرقفیزین) دخی مسموع
اولغله اطراد و تجاوزه ذاهب اولمشدر . (ابن حاجب) (جاء البرقفیزین)
ترکیبی مثلنده (جاء) ده اطرادى تسلیم و تحسین ایلمشدر لكن (قعد) ده
اطرادى رد ایلمشدر و اطراده قائل اولنور ایسه آنجق شو ذکر اولنان
موضع نمونده اولنور دیمشدر مثلاً (قعد کاتباً) دینلمز و اما (قعد کانها
سلطان) دینله بیلور زیرا (قعد کانها سلطان) ترکیبی دخی (قعدت کانها
حربة) ترکیبی قیلندندر .

و بیلملیدر که افعال ناقصه دن بعضیلری دخی بعض فعل تام معناسنه دخی
کله رك افعال تامه دن اولورلر کان کی که ثبت ووقع معنارینه اوله و صار
کی که ذهب ورجع معنارینه اوله و اصبح کی که دخل فی الصباح و امسى
کی که دخل فی المساء معناسنه اوله لر .

خفی اولیه که افعال ناقصه همیشه مبتدا و خبردن مرکب جمله اسمیه اوزره داخل اولورلر و سبقت ایلدیکی اوزره جزء اولی اسمی و یا خود تعبیر آخر ایله فاعلی اولق اوزره مرفوع و جزء ثانی بی مفعوله مشابهتی جهتله منصوب قیلرلر و جمله اسمیه اوزره دخوللری خبرلرینه مغالرینک حکمنی اعطا ایلکمک ایچوندر مثلاً (صار زید غیا) قولزده (صار) کلمه سنک معناسی انتقال اولوب وشو معنائک حکمی شو معنا اوزره مترتب اولان اثردرکه خبرک منتقل الیه اولمسیدر صار کلمه سی زید غیا جمله سینه داخل اولدقده معناسی اولان انتقال حکمنی بالا فاده خبرینه اعطا ایلمشدرکه غیا مفادی منتقل الیه بولمیشدر زیرا صار کلمه سی حال زیدک بعد فقر غیا به انتقال ایلدیکنی افاده ایلمکه حال زید اسم فاعل صیغه سیله منتقل و فقر اسم مفعول صیغه سیله منتقل منه و غیا اسم مفعول صیغه سیله منتقل الیه اولمیشدر .

شو تعریف و بیانلر ایله معلوم اولان افعال ناقصه دن (کان) تامه و ناقصه اولور ناقصه اولدقده زمان ماضی ده خبرینک اسمنه ثبوتی اقتضا ایدر و اشبو ثبوتده یادائماً اولورکه برعدم سابق و یا خود انقطاع لاحقه دلالتی اولمز مثلاً کان زید فاضلاً کبی و یا خود دائماً اولیوب منقطع اولور مثلاً کان زید غیا فافتقر کبی و بعض ناقصه اولان کان صار معناسه دخی اولورکه [صیر ورة و انتقال اقتضا ایدر شاعرك .

بتیهاء قفر والمطی کانها قطا الحزن قدکانت فراخا بیوضها

شعرنده اولدغنی کبی صارت فراخاً بیوضها دیمکدر (مفاد شعر) اوتدن سودن خالی اولان صحراء تیهده بولنور ایدک حالبوکه را کب اولدیغمز حیوان کانه درشت اولان ارضه منسوب میورطه لری هنوز جوجک اولمش قطا نام سریع السیران قوش کبی ایدی . زیرا قطا قوشی سریع الطیران اولوب و با خصوص میورطه لری جوجک اولدقده طیرانی ده

اسرع اولور . يعنى اول خالى چولده قطا قوشى كى سريع السير حيوانلر
ايله كال سرعتله كيدر ايدك ديمكدر .

وبيلمليدركه بعض كان نك اسمى مستتر ضمير شان اولوب وخبرى ضمير
شانى مفسر جمله واقع اولور نته كيم شاعرك .

اذا مت كان الناس صنفان شامت و آخر مثن بالذى كنت اصنع

شعر نده كان الناس صنفان قولنده اولدينى كى (مفاد شعر) بن وفات
ايلديكمده ناس ايكي صنف اولور برصنفى شمانه ايديجى و بنم وفاتمله منرح
اوليجيدر و صنف آخر صاغلمده ايشلديكم افعال ممدوحه م ايله بنى ثنا
ايديجيدر ديمكدر و كان تامه اولدقده ثبت و وقع معنالىنه اولور عربلرك
كانت الكائنة والمقدر كائن قوللر نده اولدينى كى و حق سبحانه و تعالى
كن فيكون قول شريفده دخى تامه بولنمشدر و كان بعض مجرد تحسين
لفظ اچون كتوريلوركه زائده اولور ذكر و تركى معنای اصلى زياده
و نقصان قيلمز حق سبحانه و تعالى نك كيف تكلم من كان فى المهد صيا
قول شريفده اولدينى كى كيف تكلم من هو فى المهد حال كونه صياديمكدر .

افعال ناقصه دن (صار) انتقال اچوندر اشبو انتقالده يابرصفتدن ديكر
برصفته اولور صار زيد عالما قولمزده اولدينى كى و ياخود برحقيقتدن
ديكر برحقيقته اولور صار الطين خزفا قولمزده اولدينى كى و صار تامه
دخى اولور و تامه اولدقده يابرمكنندن ديكر برمكانه و يابرذاتدن ديكر
برذاته و يابرصفتدن ديكو برصفته انتقال اچون اولور و حروف جاره دن الى
واسطه سيله متعدى اولور صار زيد الى البلد كى ذهب اليه ديمكدر و صار
زيد من بكر الى عمرو كى رجع منه اليه ديمكدر و صار زيد الى الى الفقر كى
رجع اليه ديمكدر .

وافعالدن (آل) و (رجع) و (حال) و (استحال) و (تحول) و (ارتد)
صار معناسنه اولدقلر نده افعال ناقصه دن قيلنورلر نته كيم حق سبحانه
و تعالى نك (فارتد بصيراً) قول شريفده و شاعرك (ان العداوة تستحيل
مودة) و دخى (فيالك من نعمى تحولن ابؤسا) شعر نده اولدينى كى .

افعال ناقصه دن (اصبیح) و (امسی) و (اضحی) ماده لر یله دلالت ایلدکلری و قتلره مدخوللری اولان جمله نك مضموننی مقترن قیلمق ایچوندر مثلاً اصبیح زید قائماً دیندکده قیام زیدك وقت صباحه و امسی زید مسروراً دیندکده سرور زیدك وقت مسایه و اضحی زید حزیناً دیندکده حزن زیدك وقت ضحیه اقتراقی اقتضا ایلر بونلر صار معناسنه دخی اولور لر اصبیح او امسی او اضحی زید غنیاً دیندکده صار زید غنیاً دیمك اولور یعنی زید غنی اولدی دیمکدر یوخسه عناء زید شو و قتلرده حصول بولدی دیمك دکلدر و تامه دخی اولور که آنجق مدلوللری اولان وقته دخول معناسنه کلور لر مثلاً اصبیح زید دیندکده اولدینی کبی زید صباحه داخل اولدی دیمکدر . افعال ناقصه دن (ظل) و (بات) مدلوللری اولان وقته کذا مضمون جمله نك اقتراسته دلالت ایدر لر مثلاً ظل زید سائراً دیندکده سیرك جمیع نهاده و بات زید سائراً دیندکده سیرك جمیع لیلده زیده ثبوتی اقتضا ایدر و صار معناسنه دخی کلور لر که ظل زید غنیاً و بات عمرو فقیراً قولمز صار زید غنیاً و صار عمرو فقیراً دیمك اولور و بعض تامه دخی اولور لر ظلمت بیکان کذا و بت میتاً طیباً قوللر مزه اولدینی کبی لکن تامه اولملری قلة او زره بولندیغندن اکثریا اعتداد اولمز . افعال ناقصه دن (آض) و (عاد) و (غدا) و (راح) صار معناسنه در لر افعال ناقصه دن اولملری بومعناده در شو جهتله اکثر نجات بونلری دخی ملحقات عدادنده قیلمشیلردز ابن خاجب بوکا اشارت ایچون مقام اجمالده ذکر ایدوب و مقام تفصیلده سکوت ایلمشدر بونلر تامه دخی اولور لر نته کیم آض من سفره و عاد منه دینور یعنی سفرندن و از کلوب رجوع و عودت ایتدی دیمکدر و غدا زید دینور زید وقت غداة یعنی یارنده سیر و مشی ایلدی دیمکدر و راح زید دینور زید وقت رواحده که بعدالزوال کیجهیه دکن اولان وقتدر مشی و حرکت ایتدی دیمکدر و افعال ناقصه دن (مازال) که زال یزالدندر خاف یخاف کبی یوخسه زال یزول و زال یزیلدن دکلدر . زیرا بونلر همیشه تامه در لر و (مابرح) که باب رابعدن اولوب زال معناسنه اولان برح دندر لیلۀ ماضیهیه بارحه

اطلاقی دخی بوندندر و (فقی) که ما برح معناسنه در و (ما انفک) که ما انفصل معناسنه در شو فعلار فاعلک خبری قابل اولدینی وقتدن اعتباراً خبرک فاعله مستمر الثبوت اولسنی اقتضایدرلر مثلاً مازال زید امیراً قولمز زیدک امارتی قبولدن برو امارتک زیده مستمر اولسنی افاده ایلر استمرار افاده ایلملری زیرا شو فعلارک یعنی زال و برح و فقی و انفکک معالرنده زوال وانتفا اولوب اوزرلرینه اداه نفی داخل اولدقده ایسه معالری نفیک نفی اولور نفیک نفی ایسه استمرار وثبوت دیمکدر پس استمرار وثبوت مراد اولوب و افعال ناقصه دن اولمقده ظاهراً و یاخود مقدرأ مدخول اداه نفی اولملری لازمدر ظاهراً مدخول اداه نفی اولملری بیانمزه مشاهده اولمقده در و مقدرأ مدخول اداه نفی اولملری نته کیم حق سبحانه و تعالی نک (تالله تفتؤ تذکر یوسف) قول شریفنده واقع اولمشدر که لا تفتؤ دیمکدر زیرا اوزرلرینه اداه نفی داخل اولسه استمرار مقصودی مستلزم اولان نفی النفی متصور اوله من .

افعال ناقصه دن (مادام) فاعله خبرینک ثبوتی مدتیله برشیء توقیت و تعیین ایچوندر که اول مدة اول نسنه یه ظرف قیلنور زیرا اولنده اولان ماکله سی مصدریه اولمغله مدخولیه بیله تأویل مصدرده اولوب قبل المصادر ایسه تقدیر زمان کثیر الوقوعدر و اولنده ظرف زمان تقدیر اولندقده ظرفلر افاده ده غیر مستقل اولمغله مادام جمله سی برکلام مستقله محتاجدر مثلاً اجلس مادام زید جالساً قولمزه یالکنز مادام زید جالساً ترکیبی مفید اولیوب اجلس کلام مفیدینه احتیاجی درکاردر .

افعال ناقصه دن (لیس) جمهور نجاتک رأی اوزره فی الحال بر جمله نک مضمونتی نفی ایچوندر مثلاً لیس زید قائماً قولمز زیددن فی الحال قیامی نفیدر لکن سبویه مطلقاً جمله نک مضمونتی نفی ایچون اولسنه ذاهب اولمشدر شو اجلدن بعض زمان حال و بعض زمان ماضی و بعض زمان مستقبل ایله مقید اولور دیمشدر مثلاً لیس زید قائماً الان و لیس خاق الله مثله قوللرمزده و حق سبحانه و تعالی نک (الا یوم یأتیهم لیس مصروفا عنهم) قول شریفنده اولدینی کی .

خفی اولیه که افعال ناقصه نك جمیعده تقدیم و یا تأخیرینی مقتضی بر معنا عارض اولدجه خبرلرینی اسملرینك اوزرینه تقدیم ایلمك جائزدر و اما مقتضی تقدیم بر معنا عارض اولور ایسه اول وقت تقدیم و مقتضی تأخیر بر معنا عارض اولور ایسه تأخیر واجب اولور کم کان مالک و صار عدوی صدیقی قوللر مزده اولدینی کی مثال اولده کم کله سی استفهامیه اولمغله کان نك واسمنك اوزرینه وجوبا تقدم ایلمشدر و مثال ثانی ده هرا یکی جزءده اعراب منتفی اولمغله دفعاً للالتباس مقدم اولان اسم قیلنوب خبر وجوبا مؤخر اولمشدر. و بیلملیدر که افعال ناقصه نك خبرلرینی کنیدی لرینك اوزرینه تقدیم اوچ قسم اوزره تصور اولمشدر که بر قسمنده جائزدر آنلر کان دن راح یه قدردر که اون بردانه در زیرا بونلر فعل اولوب فعللر ایسه عملده قویلردر و بر قسمیده جائز دکلدر که آنلر اولنده نافی و یا خود مصدریه بر (ما) لفظی بولنانلردر زیرا حیز نفی ده بولنانك نفی اوزره و معمول مصدرك مصدر اوزره تقدم ایلملری جائز اوله من.

لکن ابن کیسان اولنده (ما) نافی بولنانده جمهوره مخالفت ایلمشدر که مثلاً (زال) کی کندنده نفی معنایی اولان فعل اوزره اداة نفی داخل اولدقه نفی الثبی ثبوت افاده ایلیه جکندن کان کی اولوب خبرینك تقدیمی جائز اولور دیمشدر.

و اما اولنده (ما) نئ مصدریه بولنانده یعنی مادام کله سنده جمهوره موافقت ایتمشدر و افعال ناقصه نك بر قسمنده یعنی لیس کله سنده اختلاف حاصل اولمشدر کوفیلر و ابن سراج و مبرد و جرجانی لیس نك خبری لیس نك اوزرینه تقدم ایده من زیرا لیس نفی ایچون اولوب معمول نفیک نفی اوزره تقدیمی ایسه متمتعدر دیدیلر.

و اما بصریلر و سبویه و فارسی و سیرافی لیس اوزره خبرینك تقدیمی جائزدر زیرا لیس فعللر فعل ایسه عملده قوی اولدیغندن معمولك اوزرینه تقدیمی جائز اولور دیدیلر.

(مبحث افعال المقاربه) افعال مقاربه (ماوضع لدنو الخبر رجاء او حصولاً او آخذاً فيه) دینمکه معرفدر یعنی افعال مقاربه خبرلرینک فاعلرینه قریت حصوله دلالت ایتسیچون وضع اولنش فعللردرکه شوقریت حصوله متکلمک حصول خبره امید قویسی اولوب حصولی رجا وامل ایلمسی ویاخود خبر حصول بولمق اوزره اولوب متکلمک جزم ویتقن ایتسی ویاخود خبر حصول بولمغه باشلیوب متکلمک مجزومی اولسی حبسیله برقریت اولمقدن خالی دکلدرکه بونده اوچ قسم متصور اولور .

(قسم اول) خبرک فاعله قریت حصولی متکلمک حصول خبری رجا وامل ایلمسی حبسیله اولمقدر بونک ایچون وضع اولناده عسی کلهسیدر (عسی) غیر متصرفدر و سبویهک بیانی اوزره طمع و اشفاق ایچوندیر طمع امرمحبوبده و اشفاق امرمکروهده اولور عسی زید ان یخرج و عسیت ان اموت دیندکده اولدینی کبی و عسی کلهسی ایکی وجهله استعمال اولنور (وجه اول) کئندندنصکره اسمی کتوریلور و بعده خبری ان مع المضارع اولهرق ایراد اولنور (عسی زید ان یخرج) کبی زید لفظاً مرفوع عسی کلهسنک اسمیدر ابن حاجب حضر تری فاعلی دیمکه تعبیرایلمشدر و (ان یخرج) مفرد تأویلنده و مصدر حکمنده اولهرق بتقدیر المضاف عسی کلهسنک محلاً منصوب خبریدر تقدیر کلام عسی حال زید الخرج و یاخود عسی زید ذا الخرج و جدر یعنی اوله که زیدک حالی خروج اوله و یاخود اوله که زید صاحب خروج اوله دیمکدرکه خروج زیدی رجا و طمع ایلمکدر. شویانه کوره عسی کلهسی ناقصه در و بعضیلر شوصورتده عسی کلهسی تامه اولوب (زید) فاعلیدر و (ان یخرج) مفعوله شیه اولهرق محلاً منصوبدر یوخسه خبر دکلدر زیرا بر مضاف تقدیر ایتیمکسزین زید اوزره حملی صحیح اوله من و مضاف تقدیری ایسه تکلفدر و فی الاصل عسی کلهسی قارب معناسنه اولوب بعده انشاء طمعنه نقل اولنمغه مثلزده (ان یخرج) جملهسی مفعول اولیوب آنجق مفعوله مشابه بولنمشدر دیدیلر .

و کوفیلر عسی کلهسی تامه اولوب زید فاعلیدر وان یخرج جملهسی تأویل مفرد وحکم مصدرده اوله رق بدل اشتهالدر مفاد مثال یرجی زید خروجه ددیگدر شو صورتده اون اجمال بعده تفصیل اولوب بونک ایسه نفس انسانده تأثیر ووقع عظیمی واردر دیدیلر شیخ رضی دخی شودهای تصویب و تقریب ایلمشدر.

وجه ثانی عسی کلهسندنصکره بعض ان مع المضارع وارد اولوب جملهسی محلاً مرفوع اسمی و یاخود تعبیر آخر ایله فاعلی قیلنور عسی ان یخرج زید کبی شو صورتده فاعل قیلنان جمله منسوب و منسوب الیهی مشتمل اولمغله خبردن استغنا حاصل اولور نته کیم (علمت ان زیداً قائم) قولزده (ان زید اقام) جملهسی عندالجمهور مفعولین مقامنده قائم اوله رق علمت نک مفعولی قیلنمشدر.

وبعضیلر شو حالده تامه اولسنه ذاهب اولوب قرب خروج زید مفادنده کوردیلر و بوجوده دیگر احتماللزدخی واردر مثلاً (عسی ان یخرج زید) قولزده محتمل که ان یخرج جملهسی محلاً منصوب خبرمقدم وزید لفظاً مرفوع اسم مؤخر قیلنوب و یخرج کلهسنک فاعلی زیده راجع ضمیر مستتر اوله . و محتمل که باب تنازعدن اولوب عسی و یخرج (زید) ده متنازع اوله لر عسی کلهسی اعمال اولنور ایسه ان یخرج جملهسی عسی ایچون خبر مقدم وزید اسمی قیلنور و (یخرج) کلهسنک فاعلی زیده راجع ضمیر اولور و اگر (ان یخرج) اعمال اولنور ایسه زید (یخرج) کلهسنک لفظاً مرفوع فاعلی قیلنوب عسی نک اسمی زیده راجع ضمیر مستتر اولور وان یخرج جملهسی خبر قیلنور عسی کلهسی شوایکی احتماله کوره دخی ناقصه اولمش اولور. و بیللملیدر که عسی کلهسی وجه اولده ذکر اولندیفی اوزره استعمال اولندقدده بعض مدخولی اولان مضارعدن ان مصدریه استعمالاً حذف اولنور بوده زیرده بیانی کله جک کادیه تشبیه اولنمسی حسیله اولور که (کاد زید یخرج) دیندیکی کبی عسی زید یخرج دخی دنیلور و حذفی نته کیم شاعرك :

عسی الكرب الذی امسیت فیه یكون وراءه فرج قریب

شعر نده واقع اولمشدر اصل اولان ان یکون و راءه دنيله جک ایکن ان
مصدریه محذوف بولمشدر (مفاد شعر) اوله که ایچنده بولنه رق اخشام
ایلدیکم حزن و غموم وراسنده برفرج قریب اوله دیمکدر.

درس ۲۱۸

افعال مقاربه دن (قسم تانی) خبرك فاعله قریبت حصولنی متكلمك اخباری
خبرك متهیی حصول اولدیغنی جزم و تیقن ایلمسی حسنیله اولمقدرکه بونك
ایچون وضع اولنانده (کاد) کله سیدر کاد زید یفعل قولمزده اولدیغنی کبی
یعنی قریب اولدی که زید ایشلیه ایدی دیمکدر کادنك فاعلی اسم محض اولوب
و خبری فی الحال قریبت حصوله دلالت ایتک ایچون ان مصدریه سز
اوله رق فعل مضارع اولور زیرا ان مصدریه استقباله دلالت ایدر که حاله
منافیدر و بعض عسی کله سنه تشبیها خبری ان مع المضارع دخی اولور که
مثلا (کاد زید ان یفعل) دینور نته کیم شاعرك :

رسم عفا من بعدها قد انجی قد کاد من طول البلی ان یصیحا

شعر نده واقع اولمشدر مفاد شعر اشیو اثر آثاردار معشوقه دن بر اثر درکه
محبوبه نك کیتدیکنندن صکره تحقیق محو و مندرس اولمش و آز قالمشدر که
کثرة الزمنه سببیه اول اثره طاری اولان ضعفیتک اوزامسندن بالکلیه
نام و نشان محبوب منقطع و زائل اوله دیمکدر.

وبیلملیدر که کاد کله سنك اوزرینه و مضارعنك اوزرینه اداة نفی داخل
اولدقه سائر فعللرده اولدیغنی کبی مضموننك نفینی اقتضا ایدر بعضیلر
بونك خلافی اوزره ذاهب اوله رق اداة نفیک دخولنده کرک ماضی و کرک
مضارعده اوله ثبوت اقتضا ایدر دیدیلر ماضی اثبات ایچون اولسنی (وما
کادوا یفعلون) قول شریفیه استدلال ایلدیلر که (فذبحوها) (قرینه سیله)
مراد اثبات فعل اولوب نفی فعل دکلدر دیدیلر و مضارعده اثبات ایچون
اولسنی شعراء عرب ذوالر مه نك :

اذا غير الهجر المحيين لم يكدر رسيس الهوى من حبه مية يبرح

شعريني اشبو شعر زوال محبته دلالت ايدر ديو تخطئه ايلدكارنده (ذوالرمة)
آنلری تصدیقیله (لم یکد) قولنک یرینه لم اجد کتوره رک شعرینی تغیر
ایلمسیله استدلال ایلدیلرکه اگر شعر من بورده یکاد فعانی نفی مفید ثبوت
اولمسه آنی تخطئه ایتمز لر و اودخی آنلری تسلیمیله شعرینی تغیر ایلمز
ایدی دیدیلر

ماضی ده اولان استدلالرینه جواب ویریلورکه (وما کادوا یفعلون) قول
شریفی فی وقت ما انتفاء ذبحه دلالت ایلر (وفذبحوها) قول شریفی ثبوت
ذبحه دلالت ايدر برشیئک بروقت ده متقی اولوب ووقت آخرده ثابت
اولمسنده ایسه تناقض یوقدر مفاد آیت کریمه بقره فی ذبح ایلدیلر حالبوکه
غلاء ثمنندن ایچون قریب اولمیلرکه آنی ایشلیه لرایدی دیمکدر

ومضارعده اولان استدلالرینه جواب ویریلورکه بعض فصاحده ذوالرمة یی
تخطئه ایدنلری و آنلری تسلیم ایله ذوالرمة نکده شعرینی تغیر ایلمسنی
تخطئه ایلمش لر در نته کیم (عتبه) دن مرویدرکه ذوالرمة کوفه یه کلدکده
اشبو شعرینی (ابن شبرمه) نک اعتراضی اوزره تغیر ایلمش ایدی اشبو
تخطئه و تغیری (عتبه) پدرینه نقل ایلدکده ابن شبرمه یی اعتراضده
وذوالرمة یی ابن شبرمه نک اعتراضی تسلیم ایله شعرینی تغیر ایلمسنده تخطئه
ایلمش و اشبو شعر همان حق سبحانه و تعالی نک (لم یکدیراها) قول شریفی
قیلندندرکه مفید نفی در دیمشدر (مفاد شعر) فراق و حسرت محبوبه نک
محب و عاشق لرینی تغیر و مشوش خاطر ایلدکده مینه ایله مسمیه اولان
محبوبه نک هوا و عشقنده ثابت اولان عاشق قریب اولمدی که مینه نک
مجتندن زائل اوله دیمکدر

درس ۲۲۰

افعال مقاربه دن (قسم ثالث) خبرک فاعله قرینیت حصولی فاعلک خبره

شروعی حسب سبیلہ برقریبیت اولمقدرکہ بونک ایچون وضع اولناندہ (طفق)
و (کرب) و (جعل) و (اخذ) و (انشاء) و (اقبل) و (هب) و (علق)
و (هلمل) در بونلر (کاذ) کی استعمال اولنورلرکہ خبرلری اکثر
ان مصدریہ سز اولہرق فعل مضارع اولور و افعال مقاربه دن بریسی دخی
(اوشک) کلمہ سیدرکہ عسی و کاذ کی استعمال اولنور یعنی خبری ان
مع المضارع و یا خود ان کلمہ سی اولیہرق فعل مضارع اولور (طفق)
فانک فتح و کسر یلہ یعنی باب ثانی و رابع دن کلورکہ طفق یطفق طفقا
و طفوقا دینلور و بومادہ اثبات موقعنہ خاصدرکہ مقام نفی دہ استعمالیلہ
ماطفق دیمک جائز دکدر فی الاصل شرع معناسنہ درکہ طفق فی الفعل دینور
شرع فیہ دیمکدر افعال مقاربه دن اولہرق طفق زید یفعل دینور زید باشلدی
بر دوزی یہ ایشلیور دیمکدر و (کرب) رانک فتح و کسر یلہ فی الاصل
قرب معناسنہ درکہ کربت الشمس دینور شمس غروبہ یقینلشدی دیمکدر
افعال مقاربه دن اولہرق کاذ کی استعمال اولنور کرب زید یفعل دینور
زید یقینلشدی هان ایشلمک اوزرہ در دیمکدر و (جعل) فی الاصل
اوجد معناسنہ در (وجعل الظلمات والنور) قول شریفندہ اولدینی کی
و طفق معناسنہ دخی کلوب افعال مقاربه دن اولور (جعل زید یقول) دینور
زید باشلدی بر دوزی یہ سویلیور دیمکدر و (اخذ) فی الاصل شرع
معناسنہ اولوب اخذ فی هذا الامر دینور شرع فیہ دیمکدر افعال مقاربه دن
اولہرق اخذ زید یقول دینور زید باشلدی بر دوزی یہ سویلیور دیمکدر
و (انشاء) فی الاصل اوجد معناسنہ در افعال مقاربه دن اولہرق انشاء زید
ینشد دینور زید باشلدی انشاء قصیدہ ایلور دیمکدر و (اقبل) فی الاصل
برنسبہ اوزرہ اقبال ایلیمک معناسنہ در اشبو بابدہ اقبل زید یحیی دینور
زید یونلدی کلیور دیمکدر و (هب) رد وزندہ فی الاصل شرع معناسنہ در
افعال مقاربه دن اولہرق شاعرك

هبت الموم القلب فی طاعته الهوی فلیج کائناتی کنت باللوم اغریہ

شعر نده واقع اولمشدرکه مفاد شعر آرتق باشلدم قلبنی هوا وهوس نفسانی به اطاعته وانقیادنده لوم ایدر ایدم قلم ایه هوا به اطاعتده مستمر اولوب اولقدر اچ وعناد ایتدی که کانه بن لوم ایه آتی هوا به اطاعت اوزره اغرا وتحریض ایدر ایشم کی اولدی دیمکدر (وعلق) لامک کسریله بودخی فی الاصل شرع معناسنه در افعال مقاربه دن اوله رق شاعرك .

ازاك علقت تظالم من اجرنا و ظلم الجار اذلال الحجير

شعر نده واقع اولمشدر مفاد شعر سنی کور یورمکه باشلک قومشولغمزه آدیغمز کیمسه به ظلم اید یورسک حالبوکه قومشویه ظلم آتی قومشولغمه آلان کیمسه بی اذلال وتحقیر ایلمکدر یعنی بزم حمایه مزده بولنان کیمسه لره حقارت ایتمکدهسک آنلره حقارت ایه بزی تحقیردر دیمکدر و (هلهل) فی الاصل قارب معناسنه در قریبه دلالتده کال مبالغه بی مفید اولمغله شو قسمه ملحق قیلنمشدر هلهل الطیر یغیب دینور شو اوچان قوش آرقالدی همان غیب اولیور دیمکدر و (اوشک) فی الاصل اسرع معناسنه در افعال مقاربه دن اوله رق اوشک زید یجی و اوشک زیدان یجی و اوشک ان یجی زید دینور زید یقلشدی همان کلیور دیمکدر ،

و بیلملیدرکه افعال مقاربه نك خبرلرینی اسملرینك اوزره تقدیم جائز ایهده لکن کندیلك اوزرینه تقدیم جائز دکدر زیرا متصرف اولمقلرنندن غیریلرینه نسبتله ضعیفلردر شو جهتله خبرلرینی کندیلرینك اوزرینه تقدیم جائز اوله من وهر نقدر متصرف دکلر ایهده فعل اولمقلرنندن حرفه نسبتله قویلردر شو جهتله ده خبرلرینی اسملرینك اوزرینه جائز اولمشدر .

درس ۲۲۱

(مبحث فعل التعجب) فعل تعجب ماوضع لانشاء التعجب دینمکه تعریف اولنورکه انشاء تعجب ایچون وضع اولنلمش فعل دیمکدر شو تعریف مزدن

ناهيك ولله دره وواهاله و يالك رجلا کي مقام تعجبه مستعمل لفظلر
 خارجدر زيرا بونلر فعل دکدر و تعجب ايجون وضع اولنيه رق استعمالاً
 مقام تعجبه ايراد اولنان (قاتله الله من شاعر) و (لاشل عشره) کي
 جمل فعلیه دعائیه دخی تعریفمزدن خارجدر . و برده فعل تعجب دنيلان
 کندی نفسنک مصدرنده انشاء تعجب ايجوندرکه مثلاً (ما احسن زیداً)
 قولمز زیدک حسنده تعجب اولنديغی افاده ايلر واما مثلاً (لاشل عشره)
 قولمزکه بر آدم کوزلجه اوق آتدقده وياخود مستحق تأديب اولان شخصی
 ضرب ايتدکده ايراد اولنورکه اون دانه پارمقلری قور میسون دیکدر
 نته کیم ترکجده الی وار اولسون وياخود الی یشللسون دینلور بونده تعجب
 مصدر فعل اولان (شامل) یعنی قور میقدده اولیوب بلکه خارجده واقع
 رمی وياضربه در .

و مثلاً (قاتله الله من شاعر) قولمزکه بر آدم کوزل برشعر سویلدکده ايراد
 اولنور وشعره مخصوص اولیوب هر بر تعجب اولنانده کتوزیلورکه مثلاً
 قاتله الله من ناطق وقاتله الله من حاذق وهکذا امر متعجبه کوره تکلم
 اولنور نته کیم ترکجده دخی کبره سیجه نه اعلا شاعر وياخود نه اعلا ناطق
 وياخود نه اعلا حاذق دینلور بونده دخی تعجب مصدر فعل اولان قتله
 اولیوب بلکه خارجاً تعجب اولنان وصفده در پس بوکیلر هر حالده فعل
 تعجبیدن خارج قاله جنی درکار و بدیدارد . خفی اولیه که فعل تعجبک ایکی
 صیغه سی واردر بری (ما افعله) در ما احسن زیداً کي و بری
 (افعل به) در احسن بزید کي اشبو فعل تعجب صیغه لری غیر متصرفدرکه
 بونلرک فعل مضارع و مجهولی اولمز و مؤنثه مخصوص صیغه لری بولمز
 آنحق منصوب و مجرور لری مذکر و مؤنث دخی اولور و مظهر و مضمیر
 دخی واقع اولور مثلاً ما احسنه ما احسنهما ما احسنهم ما احسنها ما احسنهما
 ما احسنهن ما احسنک ما احسنکما ما احسنکم ما احسنک ما احسنکما
 ما احسنکن ما احسننی ما احسننا و احسن به و احسن بهما و احسن بهم
 و احسن بها و احسن بهما و احسن بهن و احسن بک و احسن بکما و احسن
 بکم و احسن بک و احسن بکما و احسن بکن و احسن بی و احسن بنا کي

و منصوب و مجرور لری مظهر اوله رق مثلاً ما احسن زید اما احسن الزیدین
 ما احسن الزیدین ما احسن هنداً ما احسن الهندیین ما احسن الهندات
 واحسن بزیّد احسن بالزیدین احسن بالزیدین احسن بهند احسن بالهنّیّین
 احسن بالهنّیات دینور و بیلمایدرکه فعل تعجب صیغه سی آنجق اسم
 تفضیلک بنا اولندیغی ماده لردن بنا اولنور و آنجق ماضیده واقع اوله رق
 و مستمر اولان نسنه لردن بنا اولنسی دخی شرطندندرکه حال و مستقبل
 و ماضی غیر مستمر مستحق تعجب اوله من شو اجلدن فعل تعجب
 صیغه لرینک اک اشهری ما افعله صیغه سیدر و برده متعجب منه خلقی
 و عزیزی کی اولدیغنه دلالت ایتسون ایچون فعل تعجب فی الاصل مضموم
 العین اولان فعل بایندن و یاخود فعل تعجب بناسیچون بویابه منقول
 اولاندن بنا قیلنور ما احسنه واحسن به و ما انصره وانصر به کی .
 و بیلمایدرکه فعل تعجب صیغه لری آنجق مبنی للفاعل اولور لر مثلاً
 ما احسن زیدا و احسن بزیّد قولمز زید نه عجب کوزل اولدی دیمکدر
 و اما (ما اشهی الطعام) (و ما امقت الکذب) قولر من مبنی للمفعول
 بولمشلردر ما اشهی الطعام طعام نه عجب مشتهی یعنی کنندینه اشتها اولنور
 اولدی و ما امقت الکذب یلان سویلمک نه عجب مبعوض اولدی دیمکدر .

درس ۲۲۲

و بیلمایدرکه رباعی و ثلاثی مزید فیه والوان و عیوب ظاهره دن و فعل
 مجهولدن فعل تعجب صیغه لری ممکن اوله من واکر رباعی و ثلاثی مزید
 فیه والوان و عیوب ظاهره دن و فعل مجهولدن فعل تعجب اخذی مراد
 اولنور ایسه فعل تعجب اخذی مراد اولنان ماده نك مصدری مفعول
 قیلنه رق اولنه مثلاً (ما اشد) و یاخود اشد کی بر لفظ کتوریلور مثلاً ما اشد
 استخراجه و اشد با استخراجه و ما اشد سواده و اشد بسواده دینور .
 و بر مجهولدن فعل تعجب اخذی مراد اولنور ایسه متعجب منه مقامنده قائم
 اوله رق منصوب و یاخود (با) حرفیله مجرور (ما) مصدریه کتوریلوب
 و فعل مبنی للمفعول اکا صله قیلنور و اولنه مثلاً ما اشد و یاخود اشد کی
 بر لفظ کتوریلورکه مثلاً ما اشد ماضرب و اشد بما ضرب دینور . و خفی

اولیه که افعال افعالا باندن معروف اولان سیاق اوزره صیغه تعجب بناسی
مختلف فیه اولوب جمهور نجات سماعا وارد اولان اخذ اولنور قیاس اولنمز
دیدیلر لکن سبویه قیاس اولسنه ذاهب اولمشدر زید ماعطاه للمعروف
وما ابغضه له کبی واخفش ایله مبرد هر بر ثلاثی مزید فیه دن دخی تجویز
ایلدیلر مثلاً ما استخرجہ واستخرج به کبی ونادر اوله رق غیر فعلدن دخی
مسموعدر (ما احنک هذه الشاة) و (ما آله) و (ما افرسه) کبی وبعض
فعل غیر متصرفدن دخی مسموعدر (ما نعمة) و (ما بائسه) کبی و عیوب
باطنه دن دخی مبنی اولور (ما احقه) و (ما انوکه) و (ما لده) کبی
ومحذوفه الهمزه اوله رق ماخیره وما شره دخی وارددر.

وبیلملیدرکه فعل تعجب صیغه سی بیامزدن دخی منقهم اوله جنی اوزره
چوق نسنده افعال تفضیله مشابه بولنمشدر شواجلدن کسائی نک غیری
کوفیلر افعال تعجب افعال تفضیل کبی اسمدر دیدیلر واشبو ذهابلرینی
شاعرك (یا ما امیاح غزلا ناشدن لنا) شعرنده مصغر اوله رق کلسیله تقویه
ایلدیلر و آنحق آخرینک فتح اوزره مبنی اولسنندن شووجهله اعتذار
ایلدیلرکه معنای تعجبی متضمن اولوب وشومعنایی افاده ایچون لایق اولان
مستقلاً بر حرف وضع ایدیلیمک اولسی حسیله افعال تعجب حرف معناسنی
متضمن بولندیغندن آخری مبنی قیلنمش وفتح اخف اولمغله فتح اوزره
بنا تعین ایدیلیمشدر دیدیلر و (متعجب منه) ک منصوب اولسننده فاعلی
مضمر اولان فعله مشابه بولنان (افعال) دنصکره کلدیکنندن مفعول به
مشابهتندن ناشیدر دیملکه اعتذار ایلدیلر واما بصریلر وائمه کوفیندن کسائی
افعال تعجبک فعل اولسنه قائل اولدقلرنندن (بناء آخر) و (نصب متعجب
منه) دن اعتذاره حاجتلیری یوقدر وشعر مذکورده واقع مامیاح شاذ
بولنمشدر و بیلملیدرکه فعل تعجبک دیگر صیغه سی یعنی (افعال به) بالاتفاق
فعلدر ومعلوم اوله که انشاء تعجب ایچون موضوع اولان منصوب ومجرورلری
دخی داخل اوله رق (ما فعله) و (افعال به) هیئت ترکیبیه لرینک مجموعیدر
وامثال مجراسننده جاری اولدقلرنندن منصوب وجار ومجرور اوزرلرینه
تقدیم اوله رق سائر فعللرده اولدیغی کبی تصرف اولنه من وکنسیدیلر ایله

منصوب و مجرور لرینک بینی برنسنه ایله فصل دخی اولنمز مثلاً ما احسن فی الدار زیداً واحسن الیوم بزید دینمز لیکن مازنی ظرفیله وقوع فصلی عربدن (ما احسن بالرجل ان یرصد) دینمک ایشیدیلیمشدر دیمکله تجویز ایلمشدر ودخی نچاندن بر قسمی کان ایله فصلی تجویز ایلمشدردر ما کان احسن زیدا کی.

درس ۲۲۳

صیغه تعجبک کیفیت بناسی معلوم اولدی ایسه مفاد و هیئت ترکیبیه سنی دخی بیان ایدمه لم صیغه تعجبیدن (ما فعله) ترکیبده سبویه کوره (ما) کله سی نکره در شیء معناسنه در زیراً تعجبه مناسب اولان نیکاره اولوب سبب تعجب معلوم اولدقده ایسه تعجب ناجادر و ما کله سنک مابعدی یعنی (افعله) جمله سی خبر یدر و افعول نک فاعلی ایچنده مایه راجع ضمیر مستتردر و همزه سی یا بالاصاله لازم بولنسانی تعدیه ایچونددر ما احسن زیداً قولمزده اولدینی کی و یاخود صیغه تعجب بناسنی قصداً فعل بابنه نقل اولنمغه اعتباراً لازم اولانی مفعول اولنک غیری بر مفعوله متعدی قیلمق ایچونددر ما انصر زیداً قولمزده اولدینی کی ما احسن زیداً ترکیبک مفادی برنسنه زیدی کوزل قیلدی و ما انصر زیداً ترکیبک مفادی برنسنه زیده دیگرینه یاردم ایتدیردی دیمکدر و بونک کی مثلاً زید ما شد استخراجه ترکیبک مفادی برنسنه زیدک استخراجی شدید قیلدی دیمکدر لیکن انشاء تعجبه نقل اولدقدنصرکه معنای جعل یعنی ایتمک و قیلمق معناری بالکلیه محو اولوب آنجق ثمره لفظ اولان مجرد برنسنه دن تعجب ایلمک ایله اکتفا اولنورکه ما احسن زیداً زید عجب کوزل اولدی و ما انصر زیداً زید عجب یاردم ایتدی و مثلاً زید ما شد استخراجه زیدک استخراجی عجب شدید اولدی دیمک اولور . و حتی شو جهتله بر جاعلک جعلیله اولسی مستحیل اولان نسنه دن دخی تعجب اولدقده صیغه تعجبی استعمال جائزدر مثلاً ما علم الله و ما اقدر الله دینلور مفاد ترکیب معتبر اولیوب آنجق انشاء تعجبه بعد النقل اولان معناری معتبردرکه الله عظیم الشان نه عجب علیم و نه عجب قادر اولدی دیمکدر نته کیم ترکیبه بر قطعه ده بو معنایه رمز اولنمشدر .

﴿ قطعه ﴾

جهانك كرم و سردينه باقوب مفتوني اوله پك
 كچوب بو ظاهر اكواندن معنايه طغرا چك
 تعجب صيغه سي وش اوزكه برمعنايي تحصيل ايت
 دينلمز ایدی تحصيل ايتسه ما اعظم شانك

ونحاتدن اخفشه كوره (ما افعله) تركينده (ما) كلمه سي موصوله اولوب
 مبتدادر و (افعله) جمله سي صله سيدر و خبري محذوفدر كه مثلاً (شيء عظيم)
 در شو بيانه كوره مثلاً ما احسن زيدا تركينك مفادي (الذي جمله
 ذا حسن شيء عظيم) يعني زیدی كوزل قيلان شي شيء عظيمدر ديمك
 اولور.

ونحاتدن فرا وابن درستويه (ما افله) تركينه (ما) كلمه سي استفهاميه
 اولوب اي شيء معناسنده در وكلامده مبتدادر و (افعله) جمله سي خبريدر
 ديديلر شو تقديرده مثلاً ما احسن زيدا تركينك مفادي نه شي زیدی
 كوزل قيلادی ديمكدر شيخ رضى اشبو توجه من حيث المعنى قويدر زيرا
 كانه اولجه سبب حسنى مجهول اوله وق پس استفهام اولمشدر استفهامدن
 ايسه بعض معنای تعجب استفاده اولور نتهكيم (وماادريك ما يوم الدين)
 قول شريفنده اولديني كي ديمشدر شو توجه لرده دخى انشاء تعجبه نقل
 اولندقدنصكره معنا آنفا ذكر اولنان معنا كي دركه ما احسن زيدا قولار
 زيد نه عجب كوزل اولدی ديمكدر .

درس ٢٢٤

تعجبك ديكر صيغه سي اولان (افعل به) تركينده دخى اختلاف آرا
 وقوعبولمشدر (سبويه) عندنده (افعل) باب افعالدن امر حاضر صورتنده
 اولوب ومعناده فعل ماضى در (صارذا فعل) مفادنده در باب افعالدن فعل

ماضی ده ایسه بومعناده اولان واردر مثلاً الحُم کی که صار ذالحُم دیمکدر و (به) ده اولان با زائده اولوب و مجرور افعَل فعلنک فاعلیدر و بعض متعجب منه ان مصدریه ایله مصدر اولدقده آندن علی ماهوالقیاس اشبو با محذوف اولور احسن ان تقول قولمزده اولدینی کی احسن بان تقول دیمکدر شو بیانه کوره احسن بزید ترکیبنک مفادی زید حسن صاحبی اولدی و احسن ان تقول ترکیبنک مفادی سوزک حسن صاحبی اولدی دیمکدر سبویهک شودهایی امرک ماضی معناسنه کلسی هرکز معهود اولیوب و (افعَل) نک صارذ افعَل معناسنه اولسی قلیل ونادر اولدیغندن و (با) نک فاعلده زیاده اولسی دخی قلیل الوقوع بولندیغندن تضعیف اولنمشدر سبویهک ذهایی مذکورینه کوره افعَل به ترکیبنده (افعَل) ده مستتر بر ضمیر اولیوب فاعلی با ایله مجرور واقع اولاندر .

واما اخفش عندنده (افعَل) صورة ومعناً امردر و همزه سی صیرورة ایچوندرو و (به) مفعول به غیر صریحدر (با) تعدیه ایچوندرو یاخود (افعَل) نک همزه سی تعدیه ایچون اولوب (افعَل) بنفسه متعدی و (به) ده اولان با زائده در شو بیانه کوره احسن بزید ترکیبنک مفادی زیدی کوزل قیل دیمکدر اخفشک اشبو ذهابنه کوره (افعَل) ده فاعلی مستتردرکه ضمیر خطابدر .

و ائمة نحّاتدن فرا (افعَل به) ترکیبنده (افعَل) هر بر احده امردرکه مثلاً (احسن بزید) قولمزده احسن زیدی کوزل قیلیمق اوزره هر بر کیسمه یه امردر (صفة بالحسن) یعنی زیدی حسنله وصف ایله دیمکدر زیرا بر کیسمه ده بولنسی ممکن اولان جهات حسنک جمله سی زیدده موجود فرض اولنغله کانه هر قننی وصفله دیلر ایسک زیدی وصف و ثنا ایله دیمک اولور دیمشدر و هر حالده انشاء تعجبه نقل اولندقده بونده دخی مفاد ترکیب معتبر اولیوب مثلاً احسن زید قولمزده زید نه عجب کوزل اولدی دیمک اولور .

درس ۲۲۵

(مبحث افعال مدح و ذم) عندالنحات افعال مدح و ذم دینکله مشهور

و معروف اولان فعللر ماوضع لانشاء مدح اوزم دینهرك بیان اولنورکه
خارجده ناموجود برمدح و یاذمی انشا ایچون وضع اولنان فعللردر دیمکدر
آنلردن ایکی دانه سی نعم و بئس در بونلر فی الاصل فعل وزنی اوزره ایکی
فعللردر فاء الفعللرینک فتحی و عین الفعللرینک کسریله ولغه بنی تمیمده
فاء الفعلی مفتوح و عین الفعلی حروف حلقدن برحرف اولان نعم و بئس کی
کلهلرده درت لغه مطرد اولمشدرکه اشبو نعم و بئس فاء الفعللرینک فتحی و عین
الفعللرینک کسریله و فاء الفعللرینک فتحی و عین الفعللرینک سکونیله و فاء
الفعللرینک کسری و عین الفعللرینک سکونیله و فاء الفعل و عین الفعللرینک
کسریله اوقتمق جائردر و اشبو نعم ایله بئس نک شرطلری (فاعللری
یا معرف باللام) اولمیدر و اشبولام عهد ذهنی ایچون اولورکه ابتداء برواحد
غیر معینه اشارت ایچون اولوب بعده مخصوص ذکر اولنمغه معین اولور
و شوجهتله نفسده واقع اولسون ایچون کلام ده بعدالاجمال برتفضیل بولنمش
اولور نعم الرجل زید قولمزده اولدینی کی .

و (یاخود فاعللری بالواسطه) و یا بلا واسطه معرف باللامه مضاف اولمیدر
نعم صاحب الرجل زید و نعم فرس غلام الرجل زید و نعم وجه فرس غلام
الرجل زید قوللرمزده اولدینی کی . و (یاخود ضمیر اولوب) برنکره
منصوبه ایله تمیز اولنمیدر اول نکره منصوبه دخی کرک مفرد اولسون
و کرک برنکره و یا معرفیه اضافت لفظیه ایله مضاف بولنسون یعنی شو
قسملره شاملدر نعم رجلاً زید و نعم ضارب رجل زید و نعم ضارب زید
قوللرمزده اولدینی کی . و یاخود شیء معناسنه بر (ما) کله سیله تمیز
اولنمیدرکه اول ما کله سی تمیزیت اوزره محلاً منصوب قلنور (فنعماهی)
قول شریفده اولدینی کی نعم شیئاهی دیمکدر وهی صدقاته عائد اولوب
مخصوص بالمدحدر و (ائمه نجاتدن فزا و ابو علی) اشبو (ما) کله سی
موصوله اولوب الذی معناسنه در و نعم فاعلیدر و آیت کریمه ده صله سی
باجمعها محذوفه در و مخصوص بالمدح اولان (هی) صدقاته عائددر تقدیر
کلام (نعم الذی فعله هی) در نعم الذی فعله الصدقات دیمکدر دیدیلر .
و (سبویه و کسائی) اشبو (ما) کله سی معرفه و تامه اولوب الشیء
هی در وهی کذا صدقاته عائد اولوب مخصوص بالمدحدر دیمشدردر .

خفی اولیه که افعال مدح و ذم فاعلی آید قدن صکره مخصوص بالمدح و یا خود مخصوص بالذم ذکر اول نور نته کیم امثله مذکورده بی نامزدن معلومدر . و مخصوصك افعال مدح و ذمندن تأخری دائی اولیوب بلکه اغلب حالده در زیر صاحب مفتاحك تصریح ایلدیکی اوزره مخصوص بعض تقدم ایلر مثلاً زید نعم الرجل دینور .

و بیلملیدرکه مخصوص کلامده عندالاکثر مبتدا واقع اولور و ماقبلنده افعال مدح و ذم جمله سی خبر قیلنور مثلاً نعم الرجل زید قولمزده نعم الرجل خبر مقدمدر و (زید) مبتدای مؤخردر و (الف لام عهد) رابط مقامنده اولمغله خبر واقع اولان جمل مذکورده مبتدایه عائد بر ضمیر بولمغله حاجت یوقدر .

و عندالاقل جائزدرکه مخصوص بر مبتدای محذوفك خبری اوله مثلاً (نعم الرجل زید) قولمزده نعم الرجل دیندکده کانه برسائل (من هو) دیه رك سؤال ایتمش اوله رق شو تقدیرده زید قولمزا کا جواب اولوب هو زید تقدیرنده اولور .

و بیلملیدرکه مخصوصك مخصوص وقوعنك صحتك شرطی مخصوص معناده فاعلندن عبارت بولمغله فاعله جنس و افراد و تنه و جمع و تذکیر و تأنیثده موافق اولمیلیدر مثلاً نعم الرجل زید و نعم الرجلان الزیدان و نعم الرجال الزیدون و بنسبت المرأة هند و بنسبت المرأتان الهندان و بنسبت النساء الهندات قوللرمزده اولدینی کبی و (نعم المرأة هند) و (بنسبت المرأت هند) دیمك تعنی فاعل و مخصوص مؤنث اولدقلری حالده افعال مدح و ذمه علامت تأنیث الحاق اولنمیه رق دخی کتورمك جائزدر زیرا غیر متصرف اولدقلری جهتله حرفه مشابه اولدقلرندن آخرلرینه علامت تأنیث الحاق واجب دکلدر .

و بیلملیدرکه مخصوصك فاعله مطابقتی شرط قیلندیجی جهتله حق سبحانه و تعالی نك (بنسبت مثل القوم الذین کذبوا) قول شریفنده سؤال اولنورکه

(بئس) نك فاعلى اولان (مثل القوم) مفرد و مخصوص بالذم اولان (الذين كذبوا) جمعدر شو صورتده مطابقت بولنماش اولور جوابنده دينور كه بوكيلرى تاويل ايلرز مثلاً آيت كريمه ده جانب مخصوصه بر مثل لفظى محذوفدر و ياخود (الذين) قومك صفتى اولوب مخصوص محذوفدر ديرزكه تقدير آيت (بئس مثل القوم مثل الذين كذبوا) و ياخود بئس مثل القوم المكذبين مثلهم ديمك اولور .

وبيلمليدركه مخصوص وجود قرينه عندنده بعض حذف اولنور (نعم البعد) (نعم الماهدون) قول شريفنده اولديغى كى (نعم العبد ايوب) و (نعم الماهدون نحن) ديمكدر .

درس ۲۲۷

افعال مدح و ذمندن ايكي دانه سى دخی ساء و حبذا در ساء ذم ايچون اولوب افاده ذم و شرائط و احكامده بئس كيدير و حبذا مدح ايچون اولوب (حب) ايله (ذا) كلمه سندن مر كيدر و ذا كلمه سى فاعليدر اشبو حبذا امثال مجراسنده جارى اولمغله ابداء تغيير اولنمىوب هر نقدر مخصوص بالمدح تشبيه و جمع و مؤنث اولسه ده فاعلى اولان ذا كلمه سى مفرد مذكر اوله رق ايراد اولنور مثلاً حبذا زيد و حبذا الزيدان و حبذا الزيدون و حبذا هند و حبذا الهندان و حبذا الهندات ديلور و مخصوص بالمدح هر حالده حبذا دنصكره ذكر اولنور و حبذا نك مخصوصنك اعرابى نعم نك مخصوصنك اعرابى كيدير كه عندالاکثر مبتدا اولوب خبرى حبذا جمله سيدير و عندالاکل مخصوص سؤال مقدره جواب اوله رق مبتداى محذوفك خبريدر نته كيم ذكر اولندي و بونده ديكر وجهلر دخی وار ايسه ده لكن مرجوحدر و بيلمليدركه حبذا نك مخصوصندن اول و يا صكره مخصوصه موافق اوله رق بر تميز و ياخود حال كتورلك جائزدر مثلاً حبذا رجلاً زيد و حبذا زيد رجلاً و حبذا را كبا زيد و حبذا زيد را كبا و حبذا رجلين اورا كين الزيدان و حبذا الزيدان رجلين اورا كين ديلور و قس عليه الجمع و التانيث .

وبيلمليدركه اشبو تميز و حالده عامل حبذا ده اولان فعليدر و حال

ایرادنده مثلاً (حبذا زید را کبا) قولزده ذوالحال ذا کلمه سی یعنی فاعل اولوب یوخسه مخصوص بالمدح اولان زید دکدر زیرا مثلاً مثال مذکورده رکوب تتمه مدحدن اولوب مرتبه مخصوص ایسه بعد تمام المدحدر فافهم .

﴿ المطلب الثالث فی الحرف ﴾

اشبو اوچنجی مطلبیمز اقسام کله دن حرفک بیاننده اولوب حروف جاره و حروف مشبهه بالفعل و حروف عطف و حروف تنیه و ندا و حروف ایجاب و حروف زیاده نک و تفسیریه و مصدریه بولنان حرفلرک و حروف تخضیض و توقع و حروف استفهام و حروف شرط و حروف ردعک و تاء تأیید و تنوین و نون تأکیدک و شوصره ده سائر فوائد عظیمه و مباحث شریفه نک نشر و بیاننده در .

درس ۲۲۸

(حرف) لغه طرف و جانب معناسنده در و اصطلاحاً اسم ایله فعله مقابل برجانیده بولمغله اقسام کله دن مفهومیته غیر مستقل برقسمه اطلاق اولمیشدر و تعریفنده (مادل علی معنای غیره) دنیلیمشدر یعنی غیرنده کائن بر معنایه دلالت ایلیان کله در دیکدر و غیرنده کائن اولمی زیرا فهمی متعلقنک ذکرینه منوطدر . شو جهتله کلامدن جزء و رکن عد اولمقده براسمه و یاخود فعله محتاج اولورکه مثلاً سرت من البصره قولزده من کله سندن ابتدا معناسنی فهم ایلمک بصره لفظنک ذکرینه محتاجدر تا که بصره لفظنه نسبتله معناسی منفهم اوله و مثلاً قد ضرب قولزده قد کله سندن معنای تحقیقی فهم ایلمک ضرب لفظنک ذکرینه محتاجدر تا که معناسی ضربیه نسبتله تعقل اولنه .

و یلیملیدرکه موجود فی الخارج یابداته قائم اوله رق جوهر و یاخود بغیره قائم اوله رق عرض اولدینی کبی معقول فی الذهن دخی یا قصداً مدرك و فی ذاته ملحوظ اولورکه محکوم علیه و محکوم به اولمغه صالح اولور بوده

فعلارك مفهوميديرکه هميشه محكوم به واسملاک مفهوميديرکه بعض محكوم به
وبعض محكوم عليه اولور .

وياقصداً مدرک اوليوب بلکه تبعاً ادراک اولنور وغيريني ملاحظه آلت
ووسيله اولورکه محكوم عليه و محكوم به اولغه هرکنز صالح اولمز بوده معنای
حرفدر مثلاً (ابتدا) معناسنی عقل بالذات قصد وملاحظه ايلسه مفهوميتمده
مستقل وفي ذاته ملحوظ بر معنا اولورکه لفظ ابتدائک مدلوليدر ومتعلق
اجمالاً و تبعاً متعل اولورکه ذکرينه حاجت قالمز . و اما ابتدا معناسنی
عقل سير ايله بصره بيننده برحالت اولق حیثیتی ايله ملاحظه ايليوب وسير
ايله بصره نك تعرف حالرينه آلت ووسيله قيلسه مفهوميتمده غير مستقل
بر معنا اولورکه من کله سنک مدلوليدر وتعل اولنسی آنجق متعلقنک
ذکرينه محتاج اولوب ومتعلقنک حالی فهمه آلت اولور حاصل کلام
لفظ ابتدا بر معنای کلی به موضوعدرکه هر سنه نك ابتداسنه شاملدر
ومن کله سی اشبو معنای کلی نك جزئیات مخصوصه سندن هر بر جزئی
مقابلنده وضع اولنشددر اول معنای کلینک قصداً تعل وفي حد ذاته
ملاحظه اولنسی ممکندرکه مفهوميتمده مستقل اوله رق محكوم عليه و محكوم
به اولغه صالح اولوب معنای اسمدر و اما اول جزئیات مخصوصه دن هیچ
بر یسی متعلقنی ذکر سز متعل اوليوب و محكوم به و محكوم عليه اولغه
دخی صالح اولمزکه معنای حرفدر . اسم وفعل کندي نفسايرنده کائن
بر معنای دلالت ايدر وحرف بویله اوليوب بلکه غیرنده کائن بر معنای
دلالت ايدر دینلمکدن مراد بودر .

درس ۲۲۹

(مبحث حروف الجر) حروف جر ما وضع للافضاء بفعل او معناه الی
مایله او حمل علیه دینه رک تعریف اولنور یعنی حرف جر بر فعل
ويا خود معنای فعلی ولی ایلدیکی اسم صریحه و یا خود اسم صریح ايله
مأول اولان کلمه به جر وافضا ایچون وضع اولنات و یا خود جر وافضا
ایلیانلر اوزره عمل جرده محمول بولنان حرفلدر .

فعل ویاخود معنای فعلی ولی ایلدیکی اسمیه ویاخود اسمیه مأول کلمه یه جر وافضا ایلانلر اون درت کلمه درکه آنلر (با) (من) (الی) (عن) (علی) (لام) (فی) (کاف) (حتی) (کیمه) (واو) قسم (تاء) قسم (مذ) (مند) در بونلر ایچون البته برمتعلق لازمدرکه اول متعلق یا فعل اولور ویاخود معنای فعل اولور معنای فعل دید یکمز من جهة الاشتقاق فعله اتصالی و برحدث اوزره ادالاتی ولانلر درکه بونلره شبهه فعل دخی دینلور اسم فاعل اسم مفعول صفت مشبهه مصدر اسم تفضیل کبی ودخی کندندن فعل معنایی فهم اولانلر درکه بعض معنای فعل عنوانی بونلر تخصیص اولنور اسماء افعال وظرف مستقر کبی. اشبو حروف جاره دن فی و فی معناسنه اولانک مجروری ابن حاجب و برکوی رحمهما اللهک رایلری اوزره مفعول فیه اولمق اوزره محلاً منصوب قیلنور.

ولام ولام معناسنه اولانلرک مجروری مشارالیه مانک رایلری اوزره مفعول اولمق اوزره محلاً منصوب قیلنور واما جمهور نحات مجموعنک مجرورینی محلاً منصوب مفعول به غیر صریح قیلرلر ومفعول فیه فی مقدر اولان اولان ومفعول لهی لام مقدر بولنان محله تخصیص ایدرلر نته کیم مطلب اسمده تفصیلی مرور ایلانلر وکندنده افضا بولنمبوب عمل جرده اشبو کندنده افضا بولنانلر اوزره محمول اولانلر الی دانه در (رب) (حاشا) (خلا) (عدا) (لولا) (لعل) کلمه لر یدر و برده زائد بولنان حروف جاره درکه بونلر ایله غیر مفضی یدی قسمه بالغ اولمش اولور بونلر هر کس برمتعلق اقتضا ایلانلر.

(زائد بولنان) حروف جرلرک فائده سی تا کید و تحسین لفظ و تقویة عامل و رعایت سجع و فصاحت و بویکی نسنه لر در صورت و حرفیتده اشتراکندن ایچون عملده کندیلمده معنای افضا بولنان حروف جاره اصلیه اوزره محمولدر و (رب) عدم افضاده اشتراکندن ایچون زائد اوزره ویاخود تقلیل و یا تکثیری مفید اولمغله افاده معناده اشتراکندن ایچون حروف اصلیه اوزره ویاخود افاده تأکیدده اشتراکندن ایچون من

استغراقیه اوزره محمولدرکه برعامله تعلق یوقدر و بورمانی وابن ظاهرك
 ذهایدركه ابن حاجب وامام برکوی دخی بونی اختیار ایلمشدر . حروف
 جازء زائده ورب نك مجروری کنیدیلرك دخولندن اول بولندینی حال
 اوزره باقیدركه فاعل ایسه فاعل ومبتدا ایسه ینه مبتدا وخبر ایسه ینه خبر
 ومفعول ایسه ینه مفعول قیلنور آنحق محل قری حرف جرایله مجرور ومحل
 بعیدی مرفوع و یا منصوب در کی تعبیر اولنور (کفی بالله وبحسبك درهم
 ومازید بقاءم) قوللرمزده (ولا تلقوا بایدیکم الى التهلكة) قول شریفنده
 ورب رجل صالح لقیته ورب رجل طالح شتمت قوللرمزده اولدینی کی فافهم
 وحروف استثنا یعنی (حاشا) و (خلا) و (عدا) کله لرینك مجرور لری
 الا ایله مستثنی اولان کییدركه مثلاً کلام موجب تامده هر نقدر محلاً
 اولسهده نصب واجیدر ومستثنی منه مذکور اوله رق کلام غیر موجبده
 هر نقدر محلاً اولسهده نصب جائز ویدل مختاردر نته کیم بیان بحث مطلب
 اسمده کچمشدر اشبو حروف استثنا فعل ویاخود معنای فعلی مدخولنه
 افضا ایلمیوب وبلکه ازاله ایده جککرنندن عدم تعدیه وافضاده اشتراککرنندن
 ایچون عمل جرده زائد اوزره حمل اولنش وابن هشام دخی اشبو رأی
 تصویب ایلمشدر وامام برکوی دخی بوجه اوزره ذاهب اولمشدر .

و (لولا) ایله (لعل) نك مجرور لری محل بعدلری محلاً مرفوع در
 دینوب مبتدا قیلنور وما بعدلری مبتدایه خبر ایدیلور لولاك لهلك زید ولعل
 زید قائم قوللرمزده اولدینی کی مثال اولده کاف خطابك محل قری محلاً
 مجروردر (لولا) ایله ومحل بعیدی محلاً مرفوع مبتدادر وخبری
 وجوبا محذوف موجوددر ومثال ثانی ده زید هکدامبتدادر وخبری قائمدر
 اشبو لولا ایله لعل دخی عمل جرده عدم تعدیه وافضاده اشتراککرنندن
 ایچون یازائد اوزره ویاخود افاده معناده اشتراککرنندن ایچون حروف
 اصلیه اوزره محموللردر .

هر حالده شود کر اولئانلرده معنای افضا بولنمیوب هر کز برمتعلق اقتضا
 ایلمزلر وعمل جرده بالواسطه ویا بلا واسطه ارأه اولندینی اوزره حروف
 اصلیه اوزره محموللردر شو آراد، متعلق ایله مرادمن تحریر اولنمغله

مراد من از هر جهت بر اسم و فعله هر کز تعاقب و احتیاج جری اولمز دیمک
دکدر زیرا حروفک کلامدن جزء بولمقدمه هر حالده بر اسم و یا فعله
استنادی درکاردر .

اشبو بسطمنز کوزلجه منفهم اولدی ایسه شو حرفلرده حروف جر
و حروف اضافت دینلمسنگ وجهی مقدمه ذکر اولسان اون دوت
دانهده مستغنی بیاندر وکنندده معنای افضا بولمیانلرده آنلر اوزره
محمول اولدیغندن وارسته ریب وکاندر و باخصوص جملهسندده عمل جر
کورلمکله هله حروف جر تسمیهسندده هر کز اشکال یوقدر .

وبیلملیدرکه اشبو حروف جاره جهت آخر ایله دخی اوج قسمه تقسیم
اولنور بر قسمی لازم الحرفیه اولانلردرکه آنلر اون ایکی دانهدر (من)
(الی) (حتی) (فی) (با) (لام) (رب) (واو قسم) (تاء قسم) (کیمه)
(لولا) (لعل) کلهلیدر و بر قسمی حرف واسم دخی اولورکه آنلر بش
دانهدر (علی) (عن) (کاف) (مذ) (مند) در و بر قسمی حرف و فعل
دخی اولورکه آنلر اوج دانهدر حاشا و خلا وعدادر .

درس ۲۲۹

(مبحث معانی حروف جاره) حروف جارهدن من اون بش معنایه
گیشدر .

(اولکیسی) ابتداء غایه ایچون کلور بوده یا مکانده اولور سرت من البصرة
قولمزده اولدینی کی ویاخود زمانده اولور (صمت من یوم الجمعة) قولمزده
اولدینی کی من کله سنک ابتداء غایه ایچون اولدینی مقابلهده الی والی
معناسنی مفید برکله نک وضعی صحیح اولمسلیله بیلنور وزمانده دخی
غایت ایچون کلسی کوفیلرک راییدرکه علامتی موقعنده زمان لفظی وضع
ایلمک صحیح اولمسیدر .

(ایکنجیسی) تبیین جنس ایچون کلور که من بیانیه دینلور (فاجتنبوا الرجس
من الاوثان) قول شریفنده اولدینی کی (فاجتنبوا الرجس الذی هو الاوثان)
دیمکدر تبیین ایچون اولدینی موقعنده مقتضای مقام حسلیله الذی هو
ویاخود الی هی لفظی وضعک صحتیه بیلنور .

(اوجنچيسى) تبعيض ايجون كلور اخذت من الدارهم قولمزده اولديني
كبي اخذت بعض الدارهم ديمكدر .

(دردنجيسى) ظرفيت ايجون يعنى فى معناسنه كلور حق سبحانه وتعالى نك
(اذا نودى للصلاة من يوم الجمعة) قول شريفنده اولديني كبي فى يوم الجمعة
ديمكدر .

(بشنجيسى) تنصيص على العموم ايجون كلور كه زائده در (ماجائنى من
رجل) و (مامن رجل يحيى) و (لايقم من رجل) و (هل ترى من
رجل) قوللر من نچونده اولديني كبي .

(التنجيسى) تأكيد عموم ايجون كلور كه ينه زائده در (ماجائنى من احد)
و (مامن احد يحيى) و (ان ترى من ديار) و (لايقم من احد) (او من
ديار) و (هل ترى من احد) (او من ديار) قوللر من نچونده اولديني
كبي احد و ديار لفظلرى ذاتاً صيغۂ عموم اولغله (من) تأكيد عموم ايجون
كتورلش اولور و بيلمليدركه تنصيص على العموم و ياخود تأكيد عموم
ايجون من لفظنك زياته قيلنمسي اوج شرطيله مشروطدر (شرط اول)
ارائه اولنديني او زره اولنده برنقى و ياخود نهى و ياخود استفهام تقدم
ايلمليدرو نجاتدن سيرا فى برشق آخر علاوه ايله و ياخود بر شرط تقدم
ايلمليدردى شاعرك

ومهما يكن عند امرى من خليقة وان حالها تخفى على الناس تعلم

شعرنده اولديني كبي (شرط ثانى) مجرورى نكره اولمليدردر (شرط
ثالث) مجرورى يا فاعل و يا مفعول و يا مبتدا اولمليدردر .

(يدنجيسى) بدليت ايجون كلور (ارضيتم بالحياة الدنيا من الآخرة قول
شريفنده اولديني كبي بدل الآخرة ديمكدر .

(سكزنچيسى) تعليل ايجون كلور (مما خطيئاتهم اغرقوا) قول شريفنده
اولديني كبي .

(طقوزنجيسى) عن كله سنه مرادف اوله رق كلور كه بعد و مجاوزه ايجون

اولور (فویل للقاسیة قلوبهم من ذکر الله) ودخی (یاو یانا قدکنا فی غفلة من هذا) قول شریفده اولدینی کبی وبعضیلر آیت اولی ده تعلیل ایچون ویاخود ایکسینده دخی ابتدائیت ایچوندر دیدیلر .

(اونجیسی) باکله سنه مرادف اوله رق یعنی ملاسه ایچون کلور نحاتدن یونسک رأینه کوره (ینظرون من طرف خفی) قول شریفده اولدینی کبی (اونبرنجیسی) عند معناسنه موافق اوله رق کلور نحاتدن ابی عییده نک دهابنه کوره (لن تغنی عنهم اموالهم ولا اولادهم من الله شیئاً) قول شریفده اولدینی کبی .

(اون ایکنجیسی) ربما معناسنه موافق اوله رق کلور و بوده سیرافی وابن خروف وابن طاهر واعلمک ذهابلرینه کوره (ما) کله سنه متصل اولدیغنده در شاعرك .

وانالما نضرب الکبش ضربة علی رأسه تلقی اللسان من الفم

شعرنده اولدینی کبی لر بما نضرب الکبش دیمکدر . (اون اونجیسی) علی معناسنه یعنی استعلا ایچون کلور (ونصرناه من القوم) قول شریفده اولدینی کبی (اون دردنچیسی) متضادین ییننده فصل ایچون کلور ابن مالکک رأینه کوره (والله یعلم المفسد من المصاح) ودخی (حتی یمیز الخیث من الطیب) قول شریفده اولدینی کبی لکن مغنی الیب صاحبی آیه اولی و ثانیه ده ظاهر اولان من ابتدا ایچون ویاخود عن معناسنه اولوب ابن مالکک ذهابی منظور فیه در دیمشدر .

(اون بشنجیسی) سبویهک ذهابی اوزره غایه ایچون کلورکه مثلاً رأیته من ذلك الموضع دیدیکده اول موضعی رؤیتکه غایه یعنی ابتدا و اتهاسنه محل قیلمش اولورسک لکن بونده ده ظاهر اولان ابتداء غایه ایچون یاخود فی معناسنه اولمسیدر .

درس ۲۳۱

حروف جاره دن الی سکر معنایه کلمشدر .

(اولکیمی) اتتهاء غایت ایچون کلورکه بودخی یا مکانده اولور (سبحان الذی اسری بعبده لیلاً من المسجد الحرام الی المسجد الاقصی) قول شریفنده اولدینی کی و یاخود ز مانده اولور (اتموا الصیام الی لیل) قول شریفنده اولدینی کی والی ده متبادر و اکثر اولان غایت مغیاده داخل اولما مقدر ذکر اولنان آیت کریمه لرده اولدینی کی .

(ایکنجیسی) مع معناسنه کلور (ولاناً کلوا اموالهم الی اموالکم) قول شریفنده اولدینی کی .

(اوچنجیسی) تبیین ایچون کلور (رب السجن احب الی) قول شریفنده اولدینی کی .

(دردنجیسی) لام معناسنه مرادف اولور (والامر الیک) قولمزده اولدینی کی والامر لک دیمکدر .

(بشنجیسی) بعض تحتک رأی اوزره فی معناسنه دخی کلور (لیجمعنکم الی یوم القیامة) قول شریفنده اولدینی کی .
(التنجیمی) ابتدا ایچون اولور شاعرك .

تقول وقد عالیت بالکوز فوقها ایسقی فلا یروی الی ابن احمر

شعرنده اولدینی کی فلا یروی منی ابن احمر دیمکدر .

(یدنجیسی) عند معناسنه موافق اوله رق کلور شاعرك .

ام لاسیل الی الشباب ذکره اشهی الی من الرحیق السلسل

شعرنده اولدینی کی .

(سکزنجیسی) تأکید ایچون کلورکه زائده اولور (فرا) نک واولک فتحیله

اولان قرائت اوزره (افئدة من الناس تموا الیهم) قول شریفیله مستدلاً ذاهب اولدیغیدر .

حروف جاردن حتی الی کبی انتهاء غایت ایچوندر آنجق حتی کله سنک
مع معناسنه کلسی الی دن اکثردر و الی دن اوچ جهته فرقی ظاهر در .
(اولکیسی) حتی نک مجروری ایکی شرطیه مشروطدر (شرط اول)
حتی نک مجروری آنجق اسم ظاهر اولمیدر واما الی کله سی مظهر و مضمهر
اوزره دخی داخل اولور (کوفیلر) و (مبرد) حتی کله سنک دخی مضمهر
اوزره دخولی تجویز ایلیوب شاعرك .

انت حتاك تقصد كل فيج ترجى منك انها لا تحيب ودخى
فلا والله لا يبقى اباس فى حتاك يا ابن ابى زياد

شعر لريله استدلال ايلديلر ايسه ده بونلر غایت نادر و شاذدر قیاس اولمغه
صلاحیتی یوقدر دینمکه جواب ویریلدی (شرط ثانی) مجروری برزو اجزا
ایله مسبوق اولوب مجرور اول اجزانک یا آخری اولمی ویاخود جزء
آخرینه ملاقی بولنمیدر اکت السمكة حتی رأسها قولمزده وحق سبحانه
وتعالی نک (سلام هی حتی مطلع الفجر) قول شریفنده اولدینی کبی الی نک
مجروری ایه بویه بر شرطیه مشروط دکلدر . (ایکنجیسی) شاعرك .

الى الصحيفة كي يخفف رحله و الزاد حتى نعله القاها

شعر نده اولدینی کبی مابعدینک ماقبلنده اولان حکمده دخولی ویاخود شاعرك .

سقى الحيا الارض حتى امكن عزيت لهم فلا زال عنها الخير مجذوداً

شعر نده اولدینی کبی عدم دخولی اقتضا ایدر قرینه اولمز ایه غالب حالی
اوزره حمل اولنورکه مابعدی ماقبلنده داخل اولمغه حکم اولنور اکت
السمكة حتی رأسها قولمده اولدینی کبی واما شوصورتده الی کله سنده ایه
غالب حالی اولان عدم دخولیه حکم اولنور .

(طقوزنجیسی) تعویض ایچون کلورکه ابن مالکک بیان و تجویزی اوزره
محذوفه اولان آخر بر فی کله سندن عوض اوله رق زیاده قلنور ضربت
فیمن رعبت قولمزده اولدینی کی اصلی ضربت من رعبت فیه ایدی (فی)
وعائد منصوب حذف اولنوب محذوف اولان (فی) دن عوض اوله رق
اول موصولده بر فی کله سی زیاده قلنمشدر .

(اونجیسی) نحاتدن فارسی نك عندالضروره تجویزیدرکه تعویض ایچون
اولیه رق آنحق لاجل التأکید زیاده قلنور شاعرك .

انا ابو سعد اذاللیل دجا یحال فی سواده یرندجا

شعرنده اولدینی کی و بعضیلر (وقال اركبوا فیها) قول شریفنده دخی
تجویز ایلدیلر .

درس ۲۳۴

حروف جاره دن با اون درت معنایه کلمشدر .

(اولکیسی) الصاق ایچون کلورکه برنسنه نك مجرورینه لصوقی افاده
ایلر اشبو الصاقده یا حقیقی اولور بزید داء و امسکت الحبل بیدی قوللر مزده
اولدینی کی دردك زیده و حبلك یده لصوقی ایسه حقیقه در و یا خود مجازی
اولور مررت بزید قولمزده اولدینی کی مفادی زیددن مرور ایتدم دیمکدر
زیدك کندندن ایسه مرور اولنه میوب بلکه یانندن مرور ایدیله جکندن
پس مرورك زیده لصوقی حقیقه اولمیوب مجاز اولور .

(ایکنجیسی) تعدیه ایچون کلور و باء نقل تسمیه اولنور (ذهب بزید)
قولمزده اولدینی کی .

(اوچنجیسی) استعانه ایچون کلور (کتبت بالقلم) قولمزده و بسمله
شریفده اولدینی کی .

(دردنجیسی) سببیت ایچون کلور (ضربت زیداً بسؤ ادبه) قولمزده
اولدینی کی .

(بشنجیسی) مصاحبة ایچون کلور (اهبط بسلام) قول شریفنده
(وخرجت بعشیرتی) قولزده اولدینی کی مع سلام ومع عشیرتی دیمکدر.
(التنجیسی) ظرفیة ایچون یعنی فی معناسنه کلور (جاست بالمسجد)
قولزده اولدینی کی (فی المسجد) دیمکدر.

(یدنجیسی) تقدیه ایچون کلور (بابی وامی) قولزده اولدینی کی (فداک
ابی وامی) دیمکدر.

(سکرنجیسی) مقابله ایچون اولور (بعث هذا بهذا) قولزده اولدینی
کی بعث هذا لشيء بمقابلة هذا لشيء دیمکدر.

(طقوزنجیسی) عن معناسنه کلور (فأعزل به خيراً) قول شریفنده
اولدینی کی بصریلر بانك عن معناسنه کلینی قبول ایتیموب آیه کریمه ده یایی
سبیت ایله تاویل ایلدیلر.

(اونجیسی) استعلا ایچون یعنی علی معناسنه کلور (من ان تأمنه بقنطار)
قول شریفنده اولدینی کی (هل آمنكم عليه الا كما امنكم على اخيه) قول
شریفی دلالتیلله و دخی (واذا مروا بهم يتغامزون) قول شریفنده
اولدینی کی که (وانكم لترون عليهم) قول شریفی دلالتیلله ظاهر در.

(اونبرنجیسی) من معناسنه یعنی تبعیض ایچون کلور که بوکاده اصمعی
وفارسی وابن مالك ذاهلردر (عیناً يشرب بها عباد الله) قول شریفنده
اولدینی کی عیناً يشرب منها عباد الله دیمکدر.

(اون ایکنجیسی) قسم ایچون کلور که (باء قسم) تسمیه اولنور بالله
لا فعلن قولزده اولدینی کی.

(اون اوچنجیسی) غایت ایچون یعنی الی معناسنده کلور (وقد احسن بی) قول
شریفنده اولدینی کی وقد احسن الی دیمکدر.

(اون دردنجیسی) مجرد تأکید ایچون کلور که زائده اولور وزائده
اولمی التي موقعده واقعدر اولکیسی فاعلده در (کفی بالله شهيداً) قول
شریفنده اولدینی کی ایکنجیسی مفعولده در (ولا تلقوا بأيديكم الى التهلكة)
قول شریفنده اولدینی کی اوچنجیسی مبتداده در (بحسبك درهم)
قولزده اولدینی کی دردنجیسی خبرده در (ليس زيد بقائم وما زيد

بغافل وهل زید بفاسم (قوللر مزده اولدینی کی بشنجیسی عاملی منفی اولان
حالده در شاعرك .

فما رجعت بخائبة ركاب حكيم ابن المسيب منتهاها

شعرنده اولدینی کی التنجیسی نفس وعین لفظلریله واقع تا کیده در نته کیم
بعضیلر (یتربصن بانفسهن) آیت کریمه سنده بانی بوقیلدن کورمشلردر
بونلردن نفی واستفهامده قیاسا و دیگرلرده سماعا زائددر وزائد اولسی
حذفده معنایه خال کلامکله ظاهردر .

درس ۲۳۵

حروف جاردن لام یکر می ایکی معنایه کلشدر .
(اولیکسی) استحقاق ایچون کلور که ذات ایله صفت بیننده اولور (الحمد لله
والعزة لله) قولمزده اولدینی .
(ایکنجیسی) اختصاص ایچون کلور که ذاتین بیننده واقع اولور (الجنة
للمؤمنين والجل للفرس) قولمزده اولدینی کی .
(اوچنجیسی) افاده ملک ایچون اولور (المال لزيد) قولمزده اولدینی کی .
(دردنجیسی) افاده تمليك ایچون اولور (وهبت لزيد ديناراً) قولمزده
اولدینی کی .

(بشنجیسی) شبه تمليك ایچون کلور (جعل لكم من انفسكم ازواجاً) قول
شریفنده اولدینی کی و بعضیلر اختصاص ایله استحقاق بیننده اولان فرق
سابق قبول ایتیموب اختصاصی ارتباطیله تفسیر و معانی مذکوریه تعمیم
ایلمشلردر که اختصاص یا استحقاق اعتباریله اولور (الحمد لله والجنة
للمؤمنين) کی و یا خود ملکیت و یا تمليك و یا شبه تمليك اعتباریله اولور امثله
مذکورده اولدینی کی و یا اضافه اعتباریله اولور (الابن لزيد) قولمزده
اولدینی کی دینلمشدر و بعضیلر اشبو تعمیمده تقلیل اشتراك اولمغله ترجیح
واختیار ایلمشلردر .

(التنجیسی) تعلیل ایچون کلورکه بوده یا برشیئک ذهناً علتی بیان ایچون اولور (ضربت للتأدیب) قولزده اولدینی کی ویاخود خارجاً علتی بیان ایچون اولور خرجت لمخافتک کی.

(یدنحیسی) تأکید نفی ایچون کلورکه لام ججود تسمیه اولنور مابعدنده فعل مضارع ان مقدره ایله منصوب قیلنور (ما كان الله ليطلعكم على الغيب) ودخی (لم يكن الله ليغفر لهم) قول شریفنده اولدینی کی.

(سکزنحیسی) الی کلمه سنه مرادف اولور (کل یجری لاجل مسمى) قول شریفنده اولدینی کی.

(طقوزنحیسی) علی کلمه سنه مرادف اولور (ویخرون للاذقان) ودخی (وان اساتم فلها) قول شریفنده اولدینی کی.

(اوننجیسی) فی کلمه سنه مرادف اولور (ونضع الموازين القسط ليوم القيامة) قول شریفنده اولدینی کی.

(اونبرنجیسی) عند معناسنی افاده ایلر نته کیم ابن جنی (بل کذبوا بالحق لما جاءهم) قول شریفنده (لما جاءهم) ده لامک کسری ومیمک تخفیفیه اوقیان قرائت جدری ده لامی عند معناسنه قیلمشدر.

(اون ایکننجیسی) بعد معناسنه کلور (اقم الصلوة لدلوك الشمس) قول شریفنده ودخی نبی ذیشان علیه اکمل التحایا والتسلیمات افندمز حضر تلرینک صوموا لرؤيته وافطروا لرؤيته حدیث نبویسنده اولدینی کی.

(اون اوچنجیسی) مع معناسنه کلورکه بوکا بعضیلر قائل اولوب شاعرك .

فلما تفرقنا کانی و مالکا لطول اجتماع لم نبت ليلة معا

شعرینی ایزاد ایلمشدر.

(اون دردنجیسی) من کلمه سنه مرادف اولور جریر شاعرك .

لنا الفضل في الدنيا وانفك راغم ونحن لكم يوم القيامة افضل

شعرنده لکم قولنده اولدینی منکم دیمکدر .

(اون بشنجیسی) تبلیغ ایچون کلور (قلت لزیذ واذنت له) قوللر مزده اولدینی کی
 (اون التنجیسی) عن کله سنه مرادف اولور (وقال الذین کفروا للذین آمنوا
 لوکان خیراً ما سبقونا الیه) قول شریفنده اولدینی کی بوکا ابن حاجب قائل
 اولوب ابن مالک وغیرلری لام تعلیل وبعضیلر لام تبلیغ در دیمشدر.
 (اون یدنجیسی) صیرورة ایچون کلور ولام عاقبت ولام مال دخی تسمیه
 اولنور (فالتقطه آل فرعون لیكون لهم عدواً وحزناً) قول شریفنده
 اولدینی کی.

(اون سکرنجیسی) واو قسم معناسنه کلورکه لام قسم تسمیه اولنور مقام
 تعجیده وامور عظامده استعمال اولنور (لله لا یؤخر الاجل) قولمزده
 اولدینی کی شو تقدیرده لله قدطار الذباب دینلمک جائز اوله منز.
 (اون طقوزنجیسی) قسمدن مجرد اوله رق تعجب ایچون کلور ونداده
 استعمال اولنور یا للماء قولمزده اولدینی کی.

(یکرمنجیسی) تأکید ایچون زیاده قیلنور وبوده برقاچ نوعدر بریسی لام
 معترضه درکه فعل متعدیله مفعولی بیننده اولور (ردف لکم) قول شریفنده
 اولدینی کی و بریسی لام مقحمه درکه متضایفین بیننده اولور سبویهک رأی
 اوزره لابلزید ولا اخاله ولا غلامی له قوللر مزده اولدینی کی و بریسی لام
 تقویه درکه برعامل عملده اصل اولماسی ویاخود تأخیر اولمنی جهته ضعیف
 اولدیغندن آنی تقویه ایچون کتوریلور حق سبحانه و تعالی نک (هدی
 ورحمة للذین هم لربهم یرهبون) ودخی (مصدقاً لما معهم) ودخی (لما
 یرید) ودخی (نزاعة للشوی) قول شریفلرنده ومثلاً ضربی لزیذ حسن
 وانا ضارب اعمر و قوللر مزخونده اولدینی کی و بریسی لام مستغاثدرکه مبرد
 ذاهب اولوب وصحته سقوطلی دلالتله ابن خروفده اختیار ایلمشدر
 و برجماعته زائد اولماسنه ذاهب اولمشدر بوندن دخی اول کتابده
 بحث مرور ایتمشدر.

(یکرمی برنجیسی) تعدیه ایچون کلورکه بونی ابن مالک کافیه سنده ذکر
 ایدوب وشرحنده حق سبحانه و تعالی نک (فهب لی من لدنک ولیاً) قول
 شریفله تمثیل ایلمشدر و بعضیلر آیت کریمه ده اولان لامی شبه تملیکن

قلمش لردر و بعضیلر لام تعدیه بی ما اضرب زیداً لعمر و وما احبه لبکر
نحویله تمیل ایلدیلر مفادی زید عمری نه عجب ضرب ایتدی وزید کندینی
بکره نه عجب سودیردی دیمکدر .

(یکرمی ایکنجیسی) بتین ایچون کلور ما احببی و ما ابغضی لزید و تبالزید
و ویماله و سقیاً لزید و جدعاً له قوللر مزده اولدینی کی ،

درس ۲۳۶

حروف جاره دن رب شاعرک .

الارب مولود و لیس له اب و ذی ولد لم یده ابوان

شعرنده اولدینی کی فی الاصل انشاء تقلیل ایچون وضع اولمشدر و بعده
معنای تکثیرده دخی استعمالی شایع اولمشدر که حقیقه تقرب ایتمشدر
نته کیم (ربما یودالذین کفروا لو کانوا مسلمین) قول شریفنده و علیه الصلوة
افندمزک (یارب کاسیة فی الدنیا عاریة یوم القیامة) حدیث نبویلرنده و بعد
انقضاء رمضان براعرایدن مسموع اولان یارب صائمہ لن یصومه و یارب
قائمہ لن یقومه قولنده اولدینی کی و حتی معنای تقلیلده استعمالی اولقدر
قلیلدرکه برقرینهیه محتاج اولان مجاز کی اولمشدر .

و فی الاصل انشاء تقلیل ایچون اولوب و شایعاً تکثیرده دخی مستعمل اولغله
و جواباً صدر کلامی اقتضا ایده کلشدر نته کیم (کم) لفظی انشاء تکثیر ایچون
موضوع اولدیغندن اکا دخی و جواباً صدر کلام اقتضا ایلمسلیله حکم
اولمشدر .

اشبو رب کله سی ابوعلی واکا موافقت ایدنلرک ذهابی اوزره و جواباً برنکره
موصوفهیه مختصه اولمشدر و بوابن حاجب رحمه اللهک دخی اختیار
ایلدیکیدرکه مختصه بنکره علی الاصح بیورمشلردر و بیلملیدرکه رب کله سنک
فعلی غالباً فعل ماضی اولور رب رجل کریم لقیة قولمزده اولدینی کی
و غالب حالده وجود قرینه عندنده فعلی حذف اولنور مثلاً ما لقیته رجلاً
کریماً سو یلیان کیمسهیه جواباً رب رجل کریم دینلدرکه اولدینی کی رب

رجل کریم لقیته دیمکدر و بعض رب ضمیر مبهم اوزره دخی داخل اولورکه
برنکره منصوبه ایله تمیز اولنور و اول ضمیرک تمیزینه موافقتی لازم اولیوب
آنجق مفرد مذکر اولور ربه رجلا اوامراة و ربه رجلین اوامراتین و ربه
رجالا اونساء قوللر مزده اولدینی کی و اما کوفیلر تمیزینه موافقت ایلمسنه
ذاهب اولدیلرکه امثله سابقه ده آنلر ربه رجلا و ربهما رجلین و ربهم رجالا
وربها امراة و ربهما امراةین و ربهن نساء دیرلر.

و بیلملیدرکه بعض (رب) نك آخرینه مالفظی داخل اولوب عملدن منع
و کفایلر و شو صورتده جمله لر اوزره داخل اولور حق سبحانه و تعالی نك
(ربما یودالذین کفروا) قول شریفنده و شاعرك .

ربما اوفیت فی علم ترفعن ثوبی شمالات

شعرنده اولدینی کی و بعضیلر جمله اسمیه اوزره دخی داخل اولور
دیوب ابی دوادك .

ربما الجامل الموبل فیهم و عنا جیج بینن المهار

شعرینی ایراد ایلدیلر و بعضیلر مکفوفه اولان رب هرکز جمله اسمیه
اوزره داخل اولمز و شعر مذکورده اولان مالفظی ماء کافه اولیوب ماء
موصوفه در و الجامل بر مبتدای محذوفک خبری اولوب تقدیر کلام
هو الجامل دیمکدر و جمله (ما) لفظنک صفتیدر و ماء موصوفه نك محل
قریبی رب ایله محلاً مجرور و محل بیعدی محلاً مرفوع مبتدادر و خبری
الموبل فیهم جمله سیدر دیدیلر . و بیلملیدرکه بعض رب دصکره مالفظی
کافه اولیه رق زائده اولورکه شو تقدیرده اسم اوزره داخل اولور و آنی
جرایلر شاعرك .

ربما ضربة بسيف صیقل بین بصری و طنة نجلاء

شعرنده اولدینی کبی مفاد شعر شام ایالتنده واقع بصری دنیلان مکانیه
 قربنده واقع طعنه دنیلان موقع بیننده اولان مکان خالیده سیف مصیقلدن
 استعانه ایله یعنی شمشیر آبدار ایله چوق ضربلر وشدتلر کوردیم دیمکدر .
 ویلملیدرکه بعض رب مقامنده بر واو کتوریلورکه اکا واو رب دیرلر
 کندندنصرکه رب مقدردر کذا برنکره موصوفه اوزره داخل اولوب
 واول نکره موصوفه مقدره اولان رب ایله مجرور قیلنور نته کیم شاعرك .

وبلده لیس لها اینس الا الیغافرو الالعیس

شعرنده واقع اولمشدر بلده لفظی مقدره اولان رب ایله مجروردر ورب
 بلده دیمکدر مفاد شعر چوق بلده لر دخی وارددر که خراب اولوب آنده
 هرکز توطن ایتیش براینس یوقدر آنجق وحشی بقر یاوریلری وقومرل
 دوه لر وارددر که یعنی آنلره محل اولمشدر دیمکدر خفی اولیه که برحرف
 جرك عمانی ابقا ایله کندینی حذف ایلمکی بصریلر هرکز تجویز ایتدیلر
 آنجق کثرت استعمالندن ایچون قسم عندنده لفظه جلاله ده واو قسمی
 حذف و لفظه جلاله یی مجروراً او قیمنی مثلاً واللہ لافعلن قولزده الله
 لافعلن دیمکی تجویز ایلدیلر لکن حرف جر رب اولور ایسه ایکی شرطیه
 رب یی حذف و عمانی ابقا ایلمکی مطرداً تجویز ایتدیلر شرط اول اشبو
 حذف و ابقاء عمل آنجق شعرده اولملیدر شعرك غیرنده جائز دکلدر
 شرط ثانی واو ویاخود فا ویاخود بل لفظندنصرکه اولملیدر واو دنصرکه
 اولمسی نته کیم شعر مذکورده اولدینی کبی وفادنصرکه نته کیم شاعرك .

وان اهلك فذی حنق لظاه علی یکاد یلتهب التها ابا

شعرنده واقع اولمشدر وبل دنصرکه نته کیم شاعرك (بل بلد ذی سعد
 واصباب) شعرنده اولدینی کبی .

وخفی اولیه که فا و بل دنصکره مجرور اولان کلمه نک جری مقدره اولان رب ایله اولدیغنه هرگز خلاف یوقدر واما واو دنصکره مجرور اولان کلمه نک جری (رب) مقدر اوله رق آنکه میدر و یاخود رب مقدره اولیوب نفس واولیه میدر اختلاف اولمشدر (سبویه) اشبو واو جاره دکدر بلکه عاطفه در اول قصیده ده اولدجه عطف ایچون اولسی ظاهر در واول قصیده ده واقع اولور ایسه نته کیم شاعرک .

وقاتم الاعماق خاوی المحترقن مشبه الاعلام لماع الحفقن

شعری کی بونده بر معطوف علیه تقدیر اولنور که کانه اولجه مثلا رب هول اقدمت علیه دیش اوله رق بعده شعر مذ کوره ابتدار ایله کی فرض اولنور دیشدر شویانه کوره واو جاره اولیوب واو دنصکره مجرور بولنان کلمه نک جری مقدره اولان رب ایله اولمش اولور که بصریلر شو ذهاب اوزره در واما مبرد وکوفیلر اشبو واو هر نقدر فی الاصل عاطفه ایسه ده لکن رب مقامنده قائم بولمشدر وبنفسها جاره در زیر رب معناسنی حائر اولمشدر واکر اشبو واو عاطفه اولمش وما بعدنده رب مقدر بولمش اولسه ایدی فا دن و بل دنصکره رب کلمه سنی اظهار ایلمک جائز اولدیگی کی واو دنصکره دخی جائز اولور ایدی پس عاطفه اولیوب و معطوف علیه تقدیری تعسفر دیدیلر ومع هذا فی الاصل عاطفه اولسنی رای ایلدکرندن اوزرینه دیگر بر جرف عطفک دحوالی ده تجویز ایلمزلر واما واو قسم فی الاصل عاطفه اولدیغندن اوزرینه حروف عطفدن واو وفا وثم نک دخولی جائز اولور که و والله وفوالله وثم والله دنیله بیلور .

ابن حاجب رحمه اللهک واور بی حروف جاره عدادنده بیانی کوفیلرک ذهابی اختیار ایلدیکنه دلالت ایدر ایسه ده لکن مولینا جامی حضر تیزی (وفی عدها من حروف الجر تسامح) بیور مشلدر .

درس ۲۳۷

حروف جاره دن واقسم اسم ظاهره مختصه در که مثلا والله لافعلن وورب

العکبة لایقمن دینور واماوک لافعلن دینلمز و غیر سؤاله مختصه درکه واللہ
 اخبرنی دیک جائز اوله مز و کثره استعمالندن ایچون فعلی دائماً محذوف
 اولورکه اقسمت واللہ دنیله مز .

و حروف جاره دن تاء قسم دخی و او کییدر آنجق اصلی اولان و او دن
 درجه سی منحط اولمغله لفظه جلاله نک غیرنده بولنه مز مثلاً تالله لافعلن
 دنیلور و اما ترب الکعبه لافعلن دینلمز نته کیم قسم ده اصل اولان حرف
 با اولوب و اوک درجه سی بادن منحط اولمغله و او قسم محذوفه الفعل اولمق
 و آنجق غیر سؤال و اسم ظاهرده بولمق ایله تخصیص اولندی تاکه مرتبه
 اصلدن انحطاطی و اصلک مزیت و اعتلا سی معلوم اوله . و اما حرف با قسم ده
 اصل اولدیغندن و او وتادن اعم اولوب فعلی محذوف و غیر محذوف اولور
 و سؤال و غیر سؤال ده دخی بولنور و مضمهر و مظهر اوزره دخی دخولی
 کوریلورکه مثلاً (بالله) و (اقسم بالله) و (بالله اخبرنی) و (بالله لافعلن)
 و (بالرحمن لایقمن) و (بک لارحمن) دنیله ییلور .

و خفی اولیه که غیر سؤال ایچون اولان قسمک جوابنده یا لام و یا خود
 حروف مشبهه بالفعلدن ان و یا خود حروف نفی دن ما و لا ایراد اولنور
 (لام) آنجق موجه اولان بر جمله ده اولورکه کړک جمله اسمیه و کړک جمله
 فعلیه اوله واللہ لزید قائم و واللہ لافعلن قوللر مزده اولدینی کی و (ان)
 آنجق جمله اسمیه ده اولور واللہ ان زیداً لقایم کی و (ما) و (لا)
 انجق جمله منفیه ده بولنور واللہ مازید بقایم و واللہ لایقوم زید قوللر مزده
 اولدینی کی و بعض قیام قرینه عندنده جواب قسمدن حرف نفیک حذفی
 دخی و اقعدر حق سبحانه و تعالی نک (تالله تفتؤ تذکر یوسف) قول
 شریفده اولدینی کی لاتفتؤ دیکدر و اما سؤال ایچون اولان قسمه
 آنجق کنندنده معنای طلب بولنان برکه ایله جواب ویریلور (بالله اخبرنی
 و بالله هل قام زید) قوللر مزده اولدینی کی . و بیلملیدرکه بعض جواب
 قسم حذف اولنور و حذفی جواب قسمه دال اولان جمله بیننده قسم توسط
 ایلدیکنده و یا خود جواب قسمه دال اولان جمله تقدم ایلدکده اولور زیرا
 شواکی صورتده جوابدن مستغنی بولنور (زید واللہ قائم و زید قائم واللہ

قوللر مزده اولدینی کی اشیو مثالرده زید قائم جمله سی هر تقدیر بحسب المعنی جواب قسم ایسه ده لکن بحسب اللفظ آراده قسم توسط ویاخود تأخر ایلدیکندن وشیاع اولان جواب قسمک بعدالقسم ورودی اولدیغندن جواب تسمیه اولمیوب (دال علی الجواب) دینلور .

درس ۲۳۸

حروف جاره عدادنده ذکر اولنان کیمه لفظنده حرف جر قیلنان (کی) لفظیدرکه مطلب فعلده مرور ایلدیکی اوزره اشیو (کی) کوفیلر غندنده هرکز حرف جر اولیوب همیشه ناصبه در دیدیلر ونجالتدن اخفش همیشه حرف جر در دیدی وبصریلر بعض حرف جر اولوب وبعض ناصبه اولور دیدیلر وجاره اولدقده مابعدنده فعل مضارع ان مقدره ایله منصوب قیلنور واسم صریحی آنحق کیمه نحوئده یعنی استفهامیه اولان ما کله سی اوزره داخل اولدقده جرایلرکه (ما) کله سی (کی) لفظیله محلاً مجروردر دینلور و (کیمه) قولمزده کی لفظنک حرف جر اولدینی ما لفظندن الفک حذف اولمسیله بیلنور زیرا استفهامیه اولان ما کله سی اوزره حرف جر دخیولندن الفی حذف اولمقی بین العرب لزوم تحتند، در لم وعم کی .

و (حروف جاره عدادنده) ذکر اولنان (لولا) کله سی جمیع وقتده حرف جر دکلر آنحق ضمیره اتصالی غندنده سبویهک بر تصرف وذهابیدر .
خفی اولیه که (لولا) کله سی درت وجه اوزره استعمال اولنور .
(اولکیسی) برنسنه نك شیء آخرک وجودی سببیه امتناعی افاده ایلرکه شو تقدیرده جمله اسمیه وجملة فعلیه اوزره دخی داخل اولور (لولا زید لا کرمتک ولا شتمتی لا کرمتک) قوللر مزده اولدینی کی .

(ایکنجیسی) تخصیص وعرض ایچون اولورکه فعل مضارعه وفعل مضارع ایله مأول اولانه مختصه در (لولا تستغفرون الله) قول شریفنده اولدینی کی (اوچنجیسی) تنذیم وتر بیخ ایچون اولورکه فعل ماضی په مختصه در (لولا جاؤ علیه باربعة شهداء) قول شریفنده اولدینی کی .

(دردنجیسی) استفهام ایچون اولور (لولا اخرتني الى اجل قريب) قول شریفنده اولدینی کی .

اشبو استعمالات اربعه دن استعمال اولده یعنی برشیئک برغیرینک وجودندن
 ایچون امتناعی افاده ده مستعمل لولا کله سی ضمیره متصل اولور ایسه
 مثلاً (لولاک لهلاک زید) قولمزده (سبویه) لولا کله سنی حرف جر
 قیلمشدر زیرا حرف غیر عامله اتصال ضمیر هرکز کور یلمامشدر (لولا)
 ایسه حرف اولوب عامل دکدر پس (یا لولایی) عامل قیلمق و یا خود
 (لولایه) متصل اولان ضمیرلرده تاویلات بعیده کیتمک لازم کلور
 شو جهته (سبویه) لولا کله سنی شو مقامده حرف جر قیلمق ایله تصرف
 ایلوب الفاظ کثیره ده تاویلدن ایسه (لولا) نک نفسنده تصرف
 اولی در دیدی.

واما نح اتدن (اخفش) عملی هرکز وارد و مسموع اولیان بر حرفی
 عامل قیلمقدن ضمیرده تصرف اولی در پس (لولا) یت متصل اولان
 ضمیرلر ضمیر منفصلدن استعاره قانور لولاک قولمز لولا انت دن مستعادر
 ضمیرلرک ایسه بعض یکدیگرینک موقعنده استعمالی غیر منکر در دیدی
 نته کیم عربار ما انا کانت دیرلر اشبو عباردنک اصلی ایسه ما انا مثلاًک در
 لاجل التخفیف مثل لفظی حذف اولنوب موقعنده کاف تشبیه کتورلمش
 شو صورتده ایسه اجتماع مثیلین لازم کلکله ضمیر مجرور متصل حذف
 اولنوب یرینه انت ضمیری وضع اولمشدر.

و خفی اولیه که حروف جاره عدادنده ذکر اولنان (لعل) نک حرف جر
 اولسی دخی متفق فیه دکدر آنحق لغة عقیده مسموع اولمشدر قبیله
 عقیل شعرا سندن (کعب ابن الغنوی) ابی المغوار دینمکه ملقب برادرینک
 مرثیه سنده سویلیدیکی.

وداع دعا یا من یحب الی الندا فام یستجبه عند ذاک محیب
 فقلت ادع اخری وارفع الصوت مرة لعل ابی المغوار منک قریب

شعرنده لعل ابی المغوار قولنده کورلمشدر زیرا اسماء سته معتله دن اولان
 ابی لفظی یا ایله واقع اولمشدر اسماء سته معتله ده یا ایسه علامه جر در.

« مفاد شعر » برمنادی ای عطا واحسانه اجابت ایلیان کیمسه دیهرک ندا
ایلدی اول ندا عنده هیج بر محیب استجابه ایلمدیکه سائل اولان منادی یه
جواب ویرمدی پس اول منادی یه دیدمکه بزکره دخی ندا ایله وصوتکی
بزکره دخی قالدر اوله که ابی المغوار سکا قریب اوله یعنی مسئولکی اسعاف
ایلیه دیمکدر برادرینی سخا واحسانیه مدح و ثنادر .

درس ۲۳۹

حروف جاره دن (عن) اون معنایه کیشدر .
(اولکیسی) بعدو مجاوزه ایچون کلور بصر یلر عن کله سیچون بوندن بشقه
برمعناذ کر ایلمدیلر (مجاوزه) برنسنه نك برنسنه دن بر آخر نسنه یه تجاوز
وتعدیسنه دنیلور که بوده حقیقه شیئی اولک شیئی ثانی دن زائل اوله رق
شیئی ثالثه وصولیه اولور (رمیت السهم عن القوس الی الصید) قولمزده اولدینی
کبی واما (بعد) شومعنایه شامل اولدینی کبی شیئی ثانی دن بلازوال شیئی
ثالثه وصولی ویاخود مجرد شیئی ثانی دن زوالی شقلرینه دخی صادق
اولور که بونلرده مجاوزه علی سبیل التجوز تصور اولور اخذت عنه العلم
وادیت عنه الدین قوللر مزده اولدینی کبی .
(ایکنجیسی) بدلیت ایچون کلور (واتقوا یوماً لاتجزی نفس عن نفس شیئاً)
قول شریفنده (وصومی عن امک) حدیث شریفنده اولدینی کبی لاتجزی
نفس بدل نفس وصومی بدل امک دیمکدر .
(اوچنجیسی) استعلا ایچون کلور (فانما یخل عن نفسه) قول شریفنده اولدینی
کبی علی نفسه دیمکدر .
(دردنحیسی) تعلیل ایچون کلور (وما کان استغفار ابراهیم لایه الا عن موعده)
قول شریفنده اولدینی کبی .
(بشنجیسی) بعد معناسنه کلور (عما قلیل لیصبحن نادمین یحرفون الکلم عن
مواضعه) قول شریفنده اولدینی کبی موقع اخرده من بعد مواضعه واقع
اولمی دلاتیه معلومدر ودخی (لترکبن طبقاً عن طبق) قول شریفنده
اولدینی کبی که لترکبن حالة بعد حالة دیمکدر .

(التنجیسی) ظرفیت ایچون کلور شاعرك (ولاتك عن حمل الرباعة واينا)
شعرنده اولدینی کبی فی حمل الرباعة دیمکدر .

(یدنجیسی) من کله سنه مرادف اولور (وهو الذي يقبل التوبة عن عباده) قول
شریفنده اولدینی کبی .

(سکزنجیسی) بایه مرادف اولور (وما نطق عن الهوى) قول شریفنده اولدینی
کبی لکن مغنی الیب صاحبی ظاهر اولان آیت کریمه ده عن کله سی حقیقی
اوزره اولمقدر ومعنای کلام وما یصدر قوله عن هوى دیمکدر دیدی .

(طقوزنجیسی) استعانه ایچون کلور بونی ابن مالک قائل اولمش وعربك
رمیت عن القوس قولیه تمثیل ایلمشدر زیرا عرب دن رمیت بالقوس دخی
ایشیدلمشدرکه بونده بانك استعانه ایچون اولدینی ظاهر در .

(اونجیسی) حذف اولنان آخر برعن کله سندن عوض اوله رق زائده دخی
اولور شاعرك

اتجزع ان نفس اتاها حمامها فهلا التی عن بین جنبیک تدفع

شعرنده اولدینی کبی (ابن جنى) دیمشدرکه مراد شاعر فهلا تدفع
عن التی بین جنبیک دیمکدر اول موصولدن عن کله سی حذف اولنوب بعده
زائد قیلنمشدر .

خفی اولیه که عن کله سی اوچ وجه اوزره استعمال اولنور (وجه اول)
حرف جر اوله رق استعمال اولنورکه بیان اولندی (وجه ثانی) حرف
مصدر اوله رق استعمال اولنورکه لغه بنی تمیمه مثلا اعجینی ان تفعل دینه جک
یرده عن تفعل دخی دیرلر (وجه ثالث) جانب معناسنه اسم اوله رق
استعمال اولنورکه بوده اوچ موضعه در .

(اولکیسی) اوزرینه حروف جارهدن من داخل اولدقده در شاعرك (من عن
یمینی تارة وامامی) شعرنده اولدینی کبی ودخی حق سبحانه وتعالی نك (ثم
لاتینهم من بین ایدیهم ومن خلفهم وعن ايمانهم وعن شمائلهم) قول شریفنده
دخی جانب معناسنه اولسی محتمل در .

(ایکنجیسی) اوزرینه علی داخل اولدقده در نته کیم شاعرك (علی عن یمنی)
مرت الطیر سنجا (شعرنده واقع اولمشدر .

(اوچنجیسی) اخفشك ذهابدرکه عن کله سنك مجروری و متعلقك فاعلی
ایکیسی دخی ضمیر اولوب و مسمی لری شیء واحد اولدقده عن کله سی
جانب مغاسنه در دیدی امری القیسك (دع عنك نه بآ صیح فی حجراته)
شعرنده اولدینی کی که عن کله سنك مجروری و متعلق اولان دع کله سنك فاعلی
ایکیسی دخی ضمیر در و مسمی لری بر در که ایکیسی دخی ضمیر خطاب اولوب
مخاطبدن عبارتدر آنجق دع کله سنده اولان ضمیر مستتر مرفوع متصل
اولوب و عنك لفظنده کاف ضمیر بارز مجرور متصلدر لکن اخفشك
اشبو ذهابی عن موقعه جانب لفظك حاوی صحیح اوله مامغله رد اولمشدر .

درس ۲۴۰

حروف جاره دن علی طقوز معنایه کلمشدر .

(اولکیسی) استعلا ایچون کلور اشبو استعلا ده غالباً مجروری اوزره و یاخود
اکا قریب بولنان بر نسه اوزره اولور (وعلیها وعلی الفلك تحملون) و دخی
(اواجد علی النار هدی) قول شریفنده اولدینی کی و بعض استعلا حقیقی
اولوب معنوی اولور (ولهم علی ذنب) قول شریفنده اولدینی کی .
(ایکنجیسی) مع کله سی کی مصاحبه افاده ایلر (و آتی المال علی حبه) قول
شریفنده اولدینی کی .

(اوچنجیسی) عن کله سنه مرادف اولور شاعرك

إذا رضیت علی بنو قشیر لعمر الله اعجینی رضاها

قولنده اولدینی کی إذا رضیت عنی دیمکدر (مفاد شعر) اولوقت ده که
قبیله بنی قشیر بندن راضی اولدیلر بقاء مولایه قسم ایدرم که آنلرک
رضاسی بنی پک مفرح ایلدی دیمکدر .

(دردیجیسی) تعلیل ایچون کلور (ولتکبروا الله علی ما هداکم) قول شریفنده
اولدینی کی لهدایتیه ایام دیمکدر .

(بشنجیسی) ظرفیت ایچون کلور (ودخل المدينة علی حین غفلة) ودخی
(واتبعوا ماتلوا الشیاطین علی ملک سلیمان) قول شریفنده اولدینی کبی فی حین
غفلة وفی زمن ملک سلیمان دیمکدر .

(التنجیسی) من کله سنه مرادف اولور (اذا اکتالوا علی الناس یستوفون) قول
شریفنده اولدینی کبی .

(یدنجیسی) باکله سنه موافق اولور (حقیق علی ان لا اقول) قول شریفنده
اولدینی کبی ودخی عربلر اربک علی اسم الله دیرلرکه بسم الله دیمکدر .
(سکزنجیسی) ابن جنی نک ذهابیدرکه زائده اولور شاعرك

ان الکرم وایک یعمل ان لم یجد یوما علی من یتکل

شعرنده اولدینی کبی ابن جنی بونک اصلی من یتکل علیه ایدی علیه حذف
اولنوب آندن عوض اول موصولده برعلی لفظی زیاده قیلنمشدریدی .
(طقوزنجیسی) استدراک واضراب ایچون کلور مثلاً (فلان لا یدخل الجنة
لسوء ضیعه علی انه لا یأس من رحمة الله) قولزده اولدینی کبی .
خفی اولیه که علی کله سی ایکی وجه اوزره استعمال اولنور اولکیسی حرق
جر اوله رق استعمالیدر نته کیم بیان اولندی ایکنجیسی فوق معناسنه اسم
اوله رق استعمالیدر بوده اوزرینه حروف جاره دن من داخل اولدقده در
ننه کیم من علیه دینور من فوکه دیمکدر .

واخفش بونده دخی مجروری ومتعلقنک فاعلی مسمی لری براوله رق ضمیرین
اولورلر ایسه علی کله سی کذا فوق معناسنه اسم اولور دیدی (امسک علیک
زوجک) قول شریفنده اولدینی کبی علی موقعنه فوق لفظنک حلولی صحیح
اولماغله اخفشک اشبو ذهابی دخی منظور فیه قیلنمشدر .

درس ۲۴۱

حروف جاره دن کاف بش معنایه کلمشدر .

(اولکیسی) تشبیه ایچون کلور (زید کالاسد) قولزده اولدینی کبی .
(ایکنجیسی) تعلیل ایچون کلورکه بومعنایه کلمسنی بعضیلر نفی وبعضیلر اثبات ایلدیلر

و اثبات اید نلردن بعضیلر اشبو معنایه کلسنک جوازینی (ما)ء کافه اوزره دخول ایله تقید ایلدیلر سبویهک (کما انه لا یعلم فتجاوز الله عنه) مثالنده اولدینی کبی و بعضیلر مطلقا تجویز ایلدیلر مثلاً (ویکانه لا یفالح الکافرون) ده اولدینی کبی اعجب لعدم فلاحهم دیمکدر و بعضیلر بعض ماء مصدریه اوزره داخل اولدیغنده دخی تعلیل ایچون اولسنی تجویز ایلدیلر (کما ارسلنا فیکم) آیت کریمه سنده اولدینی کبی اخفش مفاد آیه کریمه لاجل ارسالی فیکم رسولاً منکم فاذا کرونی دیمکدر دیدی و حق سبحانه و تعالی نک (واذ کروه کما هداکم) قول شریفنده اولدینی کبی که واذ کروه ما هداکم دیمکدر .

(اوچنجیسی استعلا ایچون کلورکه بونی اخفش و کوفیلر ذکر ایلمشلدردر نته کیم بعض عربلره کیف اصیحت دینلر کده کخیر دیمشلدردر که علی خیر دیمکدر و بعضیلر بونده کاف تشبیه ایچون اولوب و بر مضاف محذوف در تقدیر کلام کصاحب خیر دیمکدر دیدیلر .

(در دنجیسی) بعضیلرک ذهابی اوزره مالفظنه اتصالی عننده مبادرة افاده ایلر (سلم کاتدخل وصل کایدخل الوقت) قولزده اولدینی کبی یعنی بر مجلسه همان داخل اولدیغک کبی سلام ویر و همان وقت داخل اولدینی کبی نماز قیل یعنی سرعت و مبادرت ایله دیمکدر .

(بشنجیسی) زائده اولور (لیس کمله شیء) قول شریفنده اولدینی کبی . خفی اولمیه که کاف مفرده جاره و غیر جاره اوله رق استعمال اولنور جاره اولدقده اسم ظاهره مختص اولوب یا حرف جر اولور که بیان اولندی و یا خود مثل معناسنه اسم اوله رق بطریق الاضافه ینه مدخولنی جر ایلر نته کیم شاعرك

بیض ثلاث کنعاج جم بیض کن عن کالبرد المنهم

شعرنده واقع اولمشدر سبویه وسائر محققین نحات کافک مثل لفظنه مرادف اسم اوله رق استعمالنی حال ضرورته تخصیص ایلدیلر (مفاد شعر مذکور) اوج بیاض نسنه یعنی خویر و محبوبه لر که سرکش لکده برسوری بقره و حشیه

کیلردر اریش طولو دانه‌لری کبی اولان دیشلرندن ضحک ایدرلر یعنی ضحک و تبسم ایلدک‌لرنده طولو دانه‌لری کبی بیاض و براق اولان دیشلری ظاهر و نمایان اولور دیمکدر (وکاف مفرده) غیر جاره اولدقده دخی یا حرف اولورکه اکا حرف خطاب دینلور اولئک وذلک لفظلرنده اولدینی کبی ویا اسم اولورکه اکا ضمیر خطاب تسمیه اولنور لک وانک وادعوک لفظلرنده اولدینی کبی .

درس ۲۳۳

حروف جاره‌دن مذ و منذ زمان ماضی ویاخود حاضر ایچون اولور زمان ماضی‌ده من معناسنه اولورلرکه بر فعل مثبت ویا فعل منفی زماننک ابتداسی اول زمان ماضی ایدوکنی ارانه ایدرلر مثلاً سافرت من البلد مذ سنة اصابها القحط ویاخود مارایت زیداً مذ سنة قدم الحاج دینسه مبدأ مسافرتی من البلد سنة اصابها القحط ومبدأ عدم رؤیت زیداً سنة قدم الحاج دیمک اولور و زمان حاضرده فی معناسنه یعنی ظرفیت ایچون اولورلرکه جمیع زمان فعل اول زمان حاضرده عبارت اولدینی ارانه ایدرلر مثلاً مارایت مذ شهرنا ویاخود مارایت مذ یومنا دینسه جمیع زمان انتفاء رؤیتی هذالشهر ویاخود هذا اليوم دیمک اولور .

خفی اولیه‌که مذومند ایکی وجه اوزره استعمال اولنورلر اولکیسی حرف جر اوله رق استعماللریدرکه ذکر اولندی ایکنجیسی اسم اوله رق استعماللریدرکه اول مدة ویاخود جمیع مدة معناسنه اولورلر نته کیم مطلب اسمده بعض ظروفک بیاننده مرور ایلدی مارایت زیداً مذالیومان اللذان صاحبنا ومادخلت الدار مذخرجت ومارایتها مذزید مسافر (قوللر مزده اولدینی کبی یعنی بن زیدی کورمدم کورمامکلیکمک اول مدتی مصاحبت ایلدیکمز اول ایکی کوندر و بن داره داخل اولدم عدم دخولک جمیع مدتی خروجدنبری اولان زماندر و بن داری کورمدم عدم رؤیتک جمیع مدتی زیدک مسافرتدنبری اولان زماندر دیمکدر ترکجه‌ده مثلاً زید ایله مصاحبت ایلدیکمز ایکی کوندنبریدرکه کورمدم وفلانچی داره عدم دخول

آندن خروجدنبریدر وفلانجی داری کوره مدیکم زیدک مسافر تندنبریدر
کبی ادا اولنور.

ومعلوم اوله که حروف جارهدن حاشا وخلا وعدا مابعدلرینی ماقبلارندن
استثنا ایچون کتوریلورلر وبونلر فعل اوله رق دخی استعمال اولنورلر که
مابعدلرینی منصوب قیلرلر نته کیم بحث مستشاده دخی مرور ایلدی.

درس ۲۴۳

(مبحث الحروف المشبهة بالفعل) حروف مشبهه بالفعل تعبیری فعله بکزیان
حرفلر دیکدرکه آنلر ان ان کان لکن لیت لعل یعنی اشبو الی کلمه در فعله
لفظاً ومعناً واستعمالاً مشابهلری جهتله کندیله حروف مشبهه بالفعل
دینلمشدر لفظاً مشابهلری زیرا فعل ماضی نک آخری کبی آخرلری فتح
اوزره مبیدر و فعللر ثلاثی ورباعی وخماسی اولدقلری کبی بونلردن دخی
ان وان ولیت ثلاثی ولعل وکان رباعی ولکن خماسیدر.

ومعنا مشابهلری زیرا کندیله فعل معنایی واردرکه ان وان اکدت
وکان شہت ولکن استدرکت ولیت تمیت ولعل ترخیت مفادینی مشعردر
واستعمالاً مشابهلری زیرا بونلر دخی افعال کبی اسملره ملازم اولوب
فعل متعدی کبی همیشه ایکی اسم اوزره داخلدرر اشته فعله اشبو مشابہت
تامه لرندن ایچون فعل کبی رفع ونصب عملانی حائر اولمشلدرر آنجق فرع
مزیه اصله بالغ اولماق وبرده فعلک فرعی اولدقلرینی اعلام وایذان ایچون
خلاف اصل اوله رق بونلرک منصوبلری مرفوعلرینک اوزرینه مقدم اوله
کلشدر وشیش رضی منصوبلرینک مقدم اولسنی فعله مشابہت تامه لری
اولدیغنه تنبیه ایچوندر دیمکله تعلیل ایتشدر زیرا بر فعل خلاف مقتضایی
اوزره دخی عمل ایلمسی عملده غایه ونهایه درجه ده اولسنی کوسترکه شو
حالده بر فعلک اوله مفعول بهنی منصوب ایده بیلوب وثانیاً فاعلانی مرفوع
قیلمسی فعلک اقوای عملندن اولمش اولور و ذکر اولنان حروف مشبهه
بالفعل فعلک اقوای عملی ویریلیمی تنبیه مذکوردرن ایچوندر دیمشدر
وفاضل עצام فعل متعدی یه مشابهلرندن ایچون اوله فعل متعدینک

خواصندن اولان نصبي اخذ ايلمشلر وثنائاً جميع افعال بيننده مشترك اولان عمل رفعي حائر بولنمشلردر ديمشدر.

خفي اوليه كه اشبو التي كلمه في الاصل مبتدا و خبر اولان ايكي اسم اوزره داخل اولورلر و بيان اولنديني وجه اوزره اولكني اسملري اولمق اوزره منصوب و ايكنجي بي خبرلري اولمق اوزره مرفوع قيلرلر و معموللري كنديلرك اوزرينه هر كز تقدم ايلمز زيرا ان كلمه سندن ماعدا جمله سي صدارة كلام اقتضا ايدرلر كه معموللري اوزرلرينه تقدم ايلسه معنای صدارة باطل اولور و اما ان كلمه سي كه همزه نك فتحي و تشديد نونيله در اصلا صدر كلامده واقع اولمزايسه ده لكن ان مصدرية ناصبه كي حرف موصول بولنمشدر و مدخولي بولنان جمله كندينك صله سيدر و مصدر ايله مأول در صله ايسه موصولك جزء اخيري منزله اولمغله اجزاء صله دن برسنه موصولك اوزرينه تقدم ايلمك جائز اوله مز.

وييلمليدركه اشبو حروف مذكوره به بعض عملدن كف و منع ايدر اولان ما لفظي دخي داخل اولور كه شوصورتده عمللري لغو و ابطال اولنور و فعللر اوزره دخي داخل اولورلر انما ضرب زيد و انما زيد ضارب قوللر مزده اولديني كي ،

درس ۲۴۴

حروف مشبهه بالفعلدن (ان) و (ان) بر جمله نك مضمونتي تحقيق و تقرير ايجون وضع اولنمشلردر لكن ان كلمه سي كه همزه نك كسري و تشديد نونيله در جمله نك مضمونتي تغيير ايلمز بلكه تا كيد ايلر (و اما ان) كلمه سي كه همزه نك فتحي و نونك تشديديله در جمله بي تغيير و مصدر ايله مأول قيلر .
وييلمليدركه تاويل مصدر ك طريق بشدر .

(اولكيسي) خبري مشتق اولور ايسه خبرندن مصدر اخذ اولنوب اسمنه مضاف قيلنور اعجبي ان زيدا قائم قولمزه اولديني كي اعجبي قيام زيد تاويلنده در .

(ايكنجيسي) خبري جامد اولور ايسه خبرينه ياء مصدرية الحاقيله مصدر

اخذ اولنه رق اسمنه مضاف قيلنور (اعجینی ان زید انسان) قولزده اولدینی کی اعجینی انسانیه زید تاویلنده در .

(اوچنجیسی) خبرندن مصدر اخذی ممکن اولمز ایسه خبرك صفتندن ایکی مصدر اخذ اولنوب بری آخره و آخرده اسمنه مضاف قيلنور حق سبحانه و تعالی نك (ذلك بانهم قوم لا یفقهون) قول شریفنده اولدینی کی قومك صفتی اولان لا یفقهون جمله سنده (لا) لفظندن انتفا ویفقهونندن فقاهت مصدرلری اخذ اولنوب انتفا فقاهته و فقاهته ده ان نك اسمنه مضاف قيلنور که آیت کریمه (ذلك بانتفاء فقاهتهم تاویلنده اولمش اولور .

(دردنجیسی) خبر بعض شرط و جزا جمله سی اولوب جزادن مصدر اخذ اولنه رق اسمنه مضاف اولان کلمه یه مضاف قيلنور (بلغی ان زیداً ان تعطه یشكر ابوه) قولزده اولدینی کی که خبر شرط و جزانك مجموعیدر جزادن (شكر) مصدری اخذ اولنوب زیده مضاف اولان اب کلمه سینه مضاف قيلنور که قول مزبور (شكر اب زید ایاك علی تقدیر اعطائك ایاه) تاویلنده اولمش اولور .

(بشنجیسی) و بعض خبرینك جزئندن کذا مصدر اخذ اولنه رق اسمنه مضاف اولان کلمه یه مضاف قيلنور بلغی ان زیداً ابوه قائم قولزده اولدینی کی بلغی قیام اییه تاویلنده در و بیلملیدر که ان مکسوره جمله نك معناسی تغییر ایتوب ان مفتوحه تغییر ایلدیکندن جمله موقعلرنده الف نون ماده سی مکسور و مفرد موقعلرنده مفتوح او قومق واجب در .

درس ۲۴۵

خفی اولمیه که الف نون ماده سی برکوی رحمه الله بیان ایلدیکی اوزره اون موقعده مکسور قيلنور .

(اولکیسی) ابتداء کلامده واقع اولدقده مکسور قيلنور و بواعمدر كرك متکلمك کلامنك ابتداء سنده اولسون ان زیداً قائم قولزده اولدینی کی و كرك وسط کلامده اولوب برکلام آخرك ابتداء سنده بولسون (ولا یخرنك قولهم ان العزة لله جمیعاً) قول شریفنده اولدینی کی ان العزة لله جمله سی کلام

سابقدن متولد (هل العزة) سؤال متوهمنه جواب ارله رق جمله مستأنفه در
وجمله موقعی اولدینی ظاهر در.

(ایکنجیسی) جواب قسمده دخی مکسور قیلنور والله ان زیداً قائم قولمزده
اولدینی کبی زیرا جواب قسم لاحالة جمله واقع اولور واما کوفیلر ومبرد
جواب قسمده لام وارایسه الف نون ماده سنک مکسور او قنمسنه ویوق
ایسه کسر وفتح جائز اولمسنه ذاهب اولدیلر ومفتوح او قودقلرنده جواب
قسمی مفرد ایله تاویل ایلدیلر لکن شیخ رضی بونی پک استبعاد ایدوب
مفرد صریح جواب قسم واقع اوله میه جنی ظاهر ایکن جواب قسم مفرد
ایله نیجه تاویل اولنه یلور دیمشدر.

(اوچنجیسی) صله ده دخی الف نون ماده سی مکسور او قنور حق سبحانه
وتعالی نک (وآتیانه من الکنوز مان مفاتحه لتتو بالعصبة) قول شریفنده
اولدینی کبی زیرا صله آنحق جمله اولور.

(دردنجیسی) براسم عین مبتدا واقع اولور و خبرنده الف نون ماده سی
بولنور ایسه بونده دخی وجوباً مکسور قیلنور زید انه قائم قولمزده
اولدینی کبی زیرا مفتوح او قنسه مدخولی اولان جمله مفرد ایله تاویل
اولنور وحالبوکه حمل صحیح اولمز ایدی زیرا (زیدقیامه) دیمک غیر
صحیحدر واما براسم معنا مبتدا قلینور و خبرنده الف نون ماده سی بولنور
ایسه شو صورتده حمل صحیح اوله جغندن باعتبار المواضع فتح وکسر
جاری اولور مأمولی انک قائم والعام انه حسن قوللر مزده اولدینی کبی
مثال اولده فتح ومثال ثانی ده کسر تحققیایمشددر فافهم

(بشنجیسی) بر جمله ده الف نون ماده سنک خبرنده لام ابتدا کور یلور
ایسه بونده دخی الف نون ماده سی مکسور او قنور (علمت ان زیداً لقائم)
قولمزده اولدینی کبی زیرا لام ابتدا دخی ان مکسوره کبی مضمون جمله یی
تأکید ایچون کلورکه جمله موقعی اولدینی تحققیایدر.

(التنجیسی) ظندن عاری قولدن صکره دخی الف نون ماده سی مکسور
قیلنور (قل ان الله واحد) قولمزده اولدینی کبی زیرا قول ماده سنک
بر جمله یه تعلقی اول جمله یی حکایه ایچون اولغله مضمون جمله ده تصرف

بولنیوب جمله علی حالها باقیه اولمغله جمله موقعی اولدینی تحقق ایلر وهر
نقدر مقول قول اولان جمله قولک مفعولی ایسه ده مفعولیتی باعتبار اللفظ
اولوب باعتبار المعنی اولمغله مفرد موقعی توهمی هرگز جاری اوله من
وظندن عاری دیمکه تقید من زیرا ظندن عاری اولسه افعال قلوب حکمنده
اولورکه مابعدنده الف نون ماده سی مفتوح قیلنور .

(یدنجیسی) ابتدائیہ اولان حتی کلمه سندنصکره دخی الف نون ماده سی
مکسور قیلنور زیرا جمله موقعی اولدینی ظاهر در اتقول ذلك حتی ان زیداً
يقوله قولزده اولدینی کی .

(سکزنجیسی) حروف تصدیقندنصکره دخی الف نون ماده سی مکسور
قیلنور زید قائم ویاخود ازید قائم سویلیان کیسه یه جواب اوله رق نعم ان
زیداً قائم قولزده اولدینی کی .

(طقوزنجیسی) حرف افتتاحندنصکره الا ان زیداً قائم قولزده اولدینی کی
(اونجیسی) واو حالندنصکره (وان فریقاً من المؤمنین لکارهون) فول
شریفنده اولدینی کی زیرا شو حر فلر دمنصکره وجوباً جمله واقع اولور
واشبو ذکر اولنان موقعلردن بشقه اوله رق حرف و دعدنصکره دخی
مکسور اوقنور (کلا انهم عن ربهم يومئذ لمحجوبون) قول شریفنده اولدینی کی
و ثم دمنصکره دخی مکسور اوقنور (ثم انهم لصالو الجحیم) قول شریفنده
اولدینی و دعادنصکره دخی مکسور اوقنور (اللهم اغفر لی انک غفور)
قولزده اولدینی کی و امر ونهی دمنصکره دخی مکسور اوقنور (تعال انک
الکریم و لاتحزن ان الله معنا) قولزده اولدینی کی و ندادنصکره دخی
مکسور اوقنور (یالوط انا رسل) قول شریفنده و دخی (اللهم انک
غفور فاعفر لی) قولزده اولدینی کی زیرا شو ذکر اولنان محللر دخی جمله
موقعلر یدر .

درس ۲۴۵

و خفی اولیه که برکوی رحمه اللهک اراه ایلدیکی اوزره الف نون ماده سی
اون موقعده دخی مفتوح اوقنور .

(اولیجیسی) الف نون ماده سی مدخولی اولان جمله ایله بیله فاعل اولدینی
حالده مفتوح قینور (بلغنی ان زیداً قائم) قولمزده اولدینی کی بلغنی قیام زید
دیمکدر .

(ایکنجیسی) مفعول واقع اولدینی حالده (کرهت ان زیداً جالس) قولمزده
اولدینی کی کرهت جلوس زید دیمکدر .

(اوچنجیسی) مبتدا واقع اولدینی حالده (عندی انک قائم) قولمزده اولدینی
کی عندی خبر مقدم وانک قائم جمله سی مبتدای مؤخر در عندی قیامک دیمکدر .
(دردنجیسی) مضاف الیه واقع اولدینی حالده (اجلس حیث ان زیداً جالس)
قولمزده اولدینی کی اجلس مکان جلوس زید دیمکدر .

(بشنجیسی) لو کله سند نصره زیرا لو کله سند نصره الف نون ماده سی
مع مدخولها بر فعل محذوفک فاعلیدر (لوانک قائم لکان کذا) قولمزده اولدینی
کی لو ثبت انک قائم لکان کذا تقدیر نده در لو ثبت قیامک لکان کذا دیمکدر .
(التنجیسی) امتناعیه اولان لولا کله سند نصره زیرا لولا کله سند نصره
مبتدا واقع اولور ونخاندن کسائی وفرا فاعل اولسنی زعم ایلدیلر (لولا انک
ذاهب لکان کذا) قولمزده اولدینی کی لولا ذهابک موجود لکان کذا دیمکدر
وما بعدی فاعل اولسنه ذاهبلر لولا وجود ذهابک لکان کذا دیو تقدیر ایدرلر
(یدنجیسی) (ما) ء مصدریه توقيتیه دن نصره زیرا بوند نصره الف نون
ماده سی مع مدخولها فاعل قینور (اجلس ما ان زیداً قائم) قولمزده اولدینی کی
اجلس مائت ان زیداً قائم تقدیر نده در اجلس مدة ثبوت قیام زید دیمکدر .
(سکزنجیسی) حروف جاره دن نصره (عجیت من انک قائم) قولمزده اولدینی کی
(طقوزنجیسی) مفردی مفرد اوزره عاطفه حتی دن نصره (عرفت امورک
حتى انک صالح) قولمزده اولدینی کی .

(اونجیسی) اسم اولان مذ ومنذ کله لرنند نصره (مارأیت زیداً مذ انک قائم)
قولمزده اولدینی کی اول زمان عدم رؤیتی زیداً زمان قیامک دیمکدر زیرا
شود کر اولنان موضعلرک جمله سی مفرد موقعیدر .

خفی اولیه که قننی بر موقعه الف نون ماده سنک مدخولی اولان جمله ایله بیلله مفرد و جمله اولسنی تقدیر صحیح اولسه الف نون ماده سی اول محله مکسور و مفتوح او قنمق یعنی شوا یکی وجه جائز اولور و بوده بر نیجه موقعه در (اولکیسی) الف نون ماده سی فاء جزا د نصکره واقع اولسه انده الف نون ماده سی مکسور و مفتوح او قنمق جائز اولور (من یکرمنی فانی اکرمه) قولزده اولدینی کی مکسور او قنمقده ان مکسوره جمله معناسنی تغییر ایتیه جکشدن معنا من یکرمنی فانا اکرمه دیمک اولور و مفتوح او قنمقده ان مفتوحه مدخولی اولان جمله ایله مفرد تاویلنده اولور لکن شو تقدیرده ان مفتوحه مدخولی اولان جمله ایله بیلله مبتدا اولوب خبری محذوفیدر و یا خود خبر اولوب مبتداسی محذوفیدر اختلاف اولنشد.

شیخ رضی مبتدادر و مبتدایه بر خبر لازم اولمغله خبری محذوفدر تقدیر کلام من یکرمنی فانی اکرمه ثابت در من یکرمنی فاکرامی ایاه ثابت دیمکدر دیدی فاضل عصام ان مکسوره التباسی دفع ایچون بو موقعه خبری تقدیم واجبدر ومع هذا حذفی تقدیرنده دخی التباس تحقیق ایده جکشدن لایق اولان حذف اولناملی ایدی تقدیر کلام من یکرمنی فانی اکرمه در من یکرمنی فانی اکرمه دیمکدر دیمکدر.

محقق سیالکوتی تقدیم خبرک واجب اولوب و حذفی تقدیرنده تأخری حالنده اولدینی کی التباس بولنه جغنی قبول ایتیموب کلاهما لیس بشی دیمکدر در زیرا محل التباس اولان تقدیرین اوزره معناه اختلاف اولمسیدر بوزاده ایسه حذف و ذکر تقدیرنده باختلاف یوقدر و نته کیم (لو انهم امنوا) قول شریقمده بعضیلر لو ثابت ایمانهم و بعضیلر لو ایمانهم ثابت تقدیر ایلدیلر که مقدم و مؤخر اوله رق دخی افاده ایلدیلر.

فاضلی جامی بر طریق اسلم بولمق واشبو شورشدن حیقمق اوزره ان مع جعلتها خبر اولوب مبتداسی محذوف اولمق شقنی دخی ارائه ایله آنفا مرور ایلیمان (من یکرمنی فانی اکرمه) قولمک من یکرمنی فانی اکرمه تقدیرنده اولسنی دخی کو ستر دیلر.

لكن اشبو صورت قبل الحاجة حذفى مستلزم اولمغله وفاء جزائيه دنصكره
جزا لفظنى ايراد ايلمك معهود اولمامغله تضعيف اولمشدر .
(ايكنجيسى) الف نون ماده سى مفاجاه ايجون اولان اذا كلمه سندنصكره
واقع اولسه آنده دخى الف نون ماده سنى مكسور ومفتوح اوقيمق جائز
اولور (من يكرمنى اذا انى اكرمه) قولزده اولدينى كى مكسور اوقنور
ايسه اذا انا اكرمه ومفتوح اوقنور ايسه اذا اكرامى اياه ثابت ديمك اولور
ونته كيم شاعرك .

وكننتارى زيدا كاقيل سيداً اذا انه عبد القفا واللهازم

شعرنده دخى واقع اولمشدر مكسور اوقنور ايسه اذا هو عبد القفا واللهازم
ومفتوح اوقنور ايسه اذا عبوديته لقفاه ولهازمه حاصله ديمك اولور مفاد
شعر بن زيدى هر كسك ظن ايلديكى كى سيد وعاليجناب ظن ايلر ايدم
مكر زيد قفا وحيه سى ناحيه لر ينك عبد خادمى ايمش كه يعنى آنجق بونينى
بيولتمك وصقالنه دوزن ويرمكدن بشقه برمزيتى اوليوب فضائل وكالاتدن
برى ايمش ديمكدن .

(اوچنجيسى) الف نون ماده سى مثلاً هذا وذاك وذلك وذلکم كييلردن
صكره وارد واو عاطفه دن صكره واقع اولسه آنده دخى الف نون
ماده سنده كسر وفتح جائز اولور (ذلکم وان الله موهن) قول شريفنده
اولدينى كى ذلکم مبتداى محذوفك خبريدر وان مفتوح اوقندقدده مع
جملتها اشبو خبر اوزره معطوفدر تقدير كلام (الامر ذلك والامر ايضا
ان الله موهن) ذيمكدن ومكسور اوقندقدده ان مع جملتها جمله متقدمه اوزره
معطوفدر ودخى شاعرك .

ذاك وانى على جارى لذ وحذب احتوا عليه بما يحنى على الجار

شعرنده اولدينى كى والتقدير غير خفى .

(در دنجیسی) الف نون ماده سی اول قولی و اول کلامی کی لفظ لردن صکره واقع اولسه آنده دخی کسر و فتح جائز اولور مثلا (اول قولی انی احمد الله) قولزده اولدینی کی مفتوح او قند قدده اول اقوالی حمد الله و مکسور او قند قدده اول مقولاتی هذا المقول (یعنی انی احمد الله) دیکدر فافهم .

(بشنجیسی) اما کله سندن صکره واقع الف نون ماده سنده دخی کسر و فتح جائز اولور (اما انک قائم) قولزده اولدینی کی مفتوح او قند قدده اما حقا معناسنه در حقا کله سندن صکره ایسه الف نون ماده سی مع جملتها فاعل و یا خود مفعول اوله جغندن مفتوح اولور (احقا انک قائم) قولزده اولدینی کی احق قیامک حقا دیکدر و مکسور او قند قدده الا کله سی کی حرف استفتاح اولور حرف استفتاحدن صکره ایسه جمله موقعی اولمغه الف نون ماده سی مکسور او قنور (الا ان عاداً کفر وار بهم) قول شریفنده اولدینی کی .

(التنجیسی) لاجرم لفظندن صکره واقع الف نون ماده سنده دخی کسر و فتح جائز در لکن غالب اولان فتحدر (لاجرم ان لهم النار) قول شریفنده اولدینی کی لاجرم لفظنده لا کله سی امام خلیک بیانی اوزره کلام سابق ردد و یا خود لا اقسیمده اولدینی کی زائددر زیرا جرم لفظنده دخی قسم معناسی وارددر خلیل و سبویهک بیانی اوزره جرم فعل ماضی اولوب حق معناسنه در و مابعدنده ان مع جملتها فاعلیدر و ائمة نجاتدن فرا لاجرم لابد و لا محالة معناسنه در دیدی اشبو لاجرم شک و کانی رفع و تأکید مرآمده جاری اولوب و بویابده کثرت و وقوعندن ناشی قسم معناسنده جریان ایلمشدر حتی شو اجلدن بوکا دخی قسمده اولان ادوات جوابیه اینله جواب ویریلور مثلا لاجرم لاتینک و لاجرم لقد احسنت و لاجرم انک قائم دینلور . پس لاجرم لفظندن صکره الف نون ماده سی مفتوح او قنور ایسه اصلنه نظر اولتمق اعتباریله در و مکسور او قنور ایسه عارض اولان معنای قسم اعتباریله در .

شو مذکور اتک حاصلی الف نون ماده سی جمله موقعنده مکسور و مفرد موقعنده مفتوح اولور و جمله و مفرد صالح اولان محله مکسور و مفتوح او قنمق جائز اولور .

خفی اولیه که ان مکسوره جمله معناسنی تغییر ایلمدیکی وفائده سی آنجق
مضمون جمله یی تا کیددن عبارت اولدینی ومدخولی اولان اسمین ایسه
دخولندن اول مبتدا وخبر بولندینی جهته ان مکسوره کان لم یکن حکمنده
طوتیه رق اسمنک اوزرینه محل بعیده حملاً رفعلیه عطف جائز کورلمشدر
(ان زیداً قائم و عمرو) قولزده اولدینی کی .

واما ان مفتوحه معنای جمله یی تغییر ایلمدیکی جهته کان لم یکن حکمنده
طوتیه میوب منصوب اولان اسمنک اوزرینه محل بعیده حملاً رفعلیه
عطف تجویز اولنالمشدر مثلاً بلغنی ان زیداً قائم و عمرو دینلمز بلکه
نصبیه و عمرواً دینلور لکن بعد العام واقع اولان ان مفتوحه مدخولی
اولان جمله سبویه رأی اوزره مفعولین مقامنده قائم اولوب باب علمت نک
مفعولینی ایسه کذا فی الاصل مبتدا وخبر جمله سندن عبارت بولمغه ان مکسوره
حکمنده بولنمشدر که اسمنک اوزرینه کذا رفعلیه عطف صحیح اولنمشدر
(علمت ان زیداً قائم و عمرو) قولزده اولدینی کی .

ویاملیدر که لفظاً ویاخود حکماً مکسور اولان ان نک اسمنک اوزرینه
محل بعیدینه حملاً رفعلیه عطفک صحتی ذکر اولنان مثالدرده کوریلدیکی
اوزره قبل المعطوف خبرک تقدم ایلمسیله مشروطدر زیرا قبل المعطوف
خبر تقدم ایتمیوب تأخر ایلمسه مثلاً (ان زیداً و عمرو ذاهبان) قولزده
اولدینی کی ایکی عاملک اعراب واحد اوزره اجتماعی لازم کلور که بدیهی
البطلاندر زیرا قول مزبورده شک یوقدر که ذاهبان کله سی هم معطوف
وهم معطوف علیه دن یعنی زید و عمرو دن خبر واقعدر (زید) دن خبر
واقع اولسی اعتباریه ذاهبان کله سنده عامل ان در و (عمرو) دن خبر
واقع اولسی اعتباریه عامل معنوی اولوب ابتدار پس ذاهبان کله سنک
رفعنده ایکی عاملک اجتماعی محذوری درکار و بدیدارد و شو مذکور
بصریلرک رأی و ذهابیدر واما کوفیلر اشبو عطفک جوازنده قبل العطف
خبرک تقدم ایلمسنی شرط ایتمزلر زیرا آنلرک عنسندنه ان کله سی آنجق

اسمنده عامل اولوب خبرنده عامل ان نك دخولدن اول اولديني كي
ابتدادر شواجلدن قول مزبورده كوفيله كوره محذور لازم كلز .

ائمه نجاتدن مبرد وكسائي بصريله موافقت ايدوب لكن ان مكسوره نك
اسمي مبنی اولوزايسه ان نك آنده عملی ظاهر اولديغندن كانه آنده عمل
ايلمامش كي اولور وشو جهتله ان مكسوره نك مبنی اولان اسمنك اوزرينه
قبل مضی الخبر رفعيله عطف جائزدر ديديلر كه مثلاً انك وزيد ذاهبان
تركيني تجويز ايلديلر لكن جمهور بصريين اسمي كرك معرب وكرك مبنی
اوله اوزرينه قبل مضی الخبر رفعيله عطفي تجويز ايلمديلر وبيلميلدر كه
حروف مشبهه بالفعلدن لكن دخی ان مكسوره كي معنای جمله يي تغير ايلمز
ومفيد اولديني استدراك معنای اصلي يه منافی اولمز شو جهتله لكن كله سنك
اسمنك اوزرينه دخی محل بعيدنی اعتباريله رفعيله عطف جائزدر (لم يخرج
زيد ولكن عمرواً خارج و بكر) قولزده اولديني كي واما سائر حروف
مشبهه بالفعلك دخوللارند نصكره معنای اصلينك عدم بقاسندن ايچون
اسملرينك محلی اعتبار اولنميوب رفعيله عطف تجويز ايديلمامشدر .

وبيلميلدر كه ان مكسوره جمله معناسنی تغير ايتيوب ان مفتوحه تغير ايلديكي
جهتله مضمون جمله يي مؤكد اولان لام ابتدا ان مفتوحه ايله بولنميوب ان
مكسوره ايله بولنور فقط ايكي حرف تا كيدك بری ديكريني ولي ايدرك
اجتماعي جائز اولديغندن لام ابتدا ان مكسوره يه مقارن اولميوب يا خبرينك
اوزرينه داخل اولور (ان زيدا لقائم) قولزده اولديني كي و يا خود ان
ايله اسمي بني فصل اوله رق اسمنك اوزرينه داخل اولور (ان في الدار
لزيداً) قولزده اولديني كي و يا خود متعلقات خبردن اسم ايله خبر بيننده
واقع اولان كله اوزره داخل اولور (ان زيدا اطعامك آكل) قولزده
اولديني كي . واشبو لام ابتدا لكن ايله دخی بولنور لكن ضعف وقلة
اوزره در زیرا لكن كله سي هر نقدر معنای جمله يي تغير ايلمز ايسه ده اشبو
لام مضموم جمله يي مؤكد اولوب ان مكسوره نك تا كيدده اشبو لامه موافقتي
قدر لكن كله سنك موافقتي يوقدر حالبو كه مع ضعف شاعرك . ولكنني من
جها لعמיד . شعرنده واقع اولمشدر مفاد شعر لكن بن محبوبه مك عشق

و محبتندن عصایه طیغامش یعنی قائم بویکه لهرک زار و زبون و آشفته حال
اولمشدر دیمکدر.

درس ۲۴۹

خفی اولیه که ان مکسوره مشدده نك استعمالی کثیر اولوب و تشدیدده ثقلت
اولمغله بعض مخففه واقع اولور که آخرندن نون متحرکه مع حرکتها حذف
اوله رق آنجق همزه نك کسری و نونك سکونیه ان قالور و شو تقدیرده
غالب اولان الغایه یعنی ابطال عملدر زیرا مخففه اوله رق ایکی حرف اوزره
قالمغله فتح آخر و اوچ حرف اوزره اولمق کی فعله بعض وجوه مشابهتی
فوت اولمشدر و مع هذا علی ماهو الاصل اعمال دخی جائزدر حق سبحانه
و تعالی نك (و ان کلاً لما لیوفینهم) قول شریفنده اولدینی کی اشبو آیت
کریمه ایله کوفیلرک حین تخفیفده اعمالی هرکز جائز کور ماملری رد اولمشدر
اشبو ان مخففه مکسوره ان نافیه دن فرق اولمق ایچون ان مخففه نك خبرینك
اوزرینه لام ابتدائک دخولی لازمدر مثلاً ان زید قائم قولزده ان کله سی
نافیه اولوب (ان زید لقائم) قولزده ان کله سی ان مخففه در و اشبو لام
لاجل الفرق حین الغاده لازم اولدینی کی حین اعمالده دخی لازمدر زیرا
اعمال عننده دخی اولور که اعراب تقدیری و یاخود محلی اولوب ظاهر
اولز پس دفع التباس ایچون لام لازم اولور و باب مطر اولمق ایچون
اعراب ظاهر اولان محمله دخی الزام ایدیلور شو مذکور ابن حاجب
رحمه اللهک ذهبايدر و اما سبویه و سائر نحوات اعمال عننده عمل ایله فرق
حاصل اوله جفته مبنی لزوم لامی حال الغایه تخصیص ایلدیلر و بیلماییدر که
بر محمله ان کله سنك نافیه اولیوب مخففه اولدینی تعیین ایدر دیگر قرینه
بولنه دخول لام ممتنع اولور (ان زید لن یقوم) قولزده و شاعرك (و ان
مالك کانت کرام المعادن) شعرنده اولدینی کی زیرا قول مز بورده ان
کله سندنصکره نفی وارد اولمغله و شعر مذکورده مقام مدح اولوب مقتضی
اثبات بولمغله ان کله سنك مخففه اولدینی معلوم اولمش پس لاجل الفرق
دخول لامه حاجت قالما مشدر.

وبیلملیدرکه ان مخففه الغا اولندقدمه فعل اوزره دخی دخولی جائز اولور
 لکن داخل اولدینی فعلک افعال ناقصه و افعال قلوب کی مبتدا و خبر اوزره
 داخل اولور فعللر دن اولمسی لازمدر (وان کانت لکبیره) دخی (وان نظنک
 لمن الکاذبین) قول شریفنده اولدینی کی واما کوفیلر تعمیم ایدوب افعال
 مبتدا و خبرک غیری فعللر اوزره دخی دخولی تجویز و شاعره.

بالله ربك ان قتلت مسلماً وجبت عليك عقوبة المتعمد

شعریله استدلال ایلدیلمر مقاد شعر ربك الله عظیم الشانه قسم ایدرمکه
 برمسلمانی قتل ایدر ایسه ک قاتل متعمدک مبتلا اوله جنی عقوبت و عذاب
 سنک اوزر یکه دخی واجب اولور دیمکدر بصریار اشبو شعره شاذدر
 دیهرک جواب ویردیلمر.

وبیلملیدرکه ائمه کوفین دن کسائی فعللر اوزره داخل (ان مع اللامی)
 اسملر اوزره داخل (ان مع اللام) دن فرق ایلوب اسملر اوزره داخل
 ان مع اللامی مخففه اولان ان کله سی اولوب و لام لاجل الفرق کتورلمش
 برلامدر واما فعللر اوزره داخل ان مع اللام نافیه اولوب و لام (الا)
 معناسنه در مثلاً (وان کانت لکبیره) قول شریفی وان کانت الا کبیره
 دیمکدر دیدی و شیخ زاده نک بیانی اوزره کسائینک غیری بعض کوفیلر
 فرق ایتیموب مطلقاً نافیه در و لام الا معناسنه در دیدیلر لکن لامک الا
 معناسنه اولمسی خلاف ظاهر اولوب و هر بر موقعده جاری اوله مامسیله
 رد اولنمشدر واکر لام الا معناسنه وارد اولسه جائنی القوم الا زیداً
 دینلدیکی کی اشبو معنای افاده ضمننده جائنی القوم لزیداً دیمک دخی جائز
 اولمی ایدی حالبوکه هر کز ایشیدیلما مشدر.

خفی اولیه که ان مفتوحة مشدده دخی بعض مخففه واقع اولورکه آخرندن

نون متحرکه مع حرکتها حذف اوله رق همزه نك فتحي ونونك سكونيله ان
 قالور وشو تقدیرده علی سبیل الوجوب بر ضمیر شان مقدردده عمل ایلرکه
 اول ضمیر شان محلا منصوب اسنی قیلنوب وما بعدنده اول ضمیر شانی
 مفسره اولان جمله محلا مرفوع خبر قیلنور . و بر ضمیر شان تقدیر اوله رق
 آنده وجوبا عمل ایتدیر یلمسی ان مفتوحه نك فعله مشابهتی ان مکسورده دن
 اکثر ایکن ان مکسورده نك عندالتخفیف سعه کلامده عملی کور یلوب ان
 مفتوحه نك عندالتخفیف عملی کور لما مسندن اضعفك اقوی اوزره ترجیحی
 لازم کلسون ایچوندر و هر تقدیر ان مکسوره مخففه اسم ظاهرده عمل **عمل اوله رق**
 مقدردده عملدن اقوی اولدیغندن ینه اضعفك اقوی اوزره ترجیحی لازم
 کلسی وارد خاطر ایسه ده ان مکسوره مخففه نك عملی قلیل الوقوع اولوب
 ان مفتوحه مخففه نك ضمیر شان مقدردده عملی ایسه دائمی اولمعه مع الدوام
 مقدردده عمل قلیلاً واقع عمله مقاوم و مقابل اولوب اضعفی اقوی اوزره
 ترجیح محذوری لازم کلز .

و بیلملیدرکه ان مفتوحه مخففه نك ضمیر شانك غیرند. عملی شاذ اوله رق
 وارد اولمشدر و هر تقدیر بعض اهل لغه ضمیر شانك غیری ضمیرده عملنك
 سعه کلامده ورودنی مثلاً (اظن انك قائم) و (احسب انك ذاهب) دینمکی
 حکایه ایلمشدر ایسه ده غیر معروف اولوب روایه شاده در و اما عندالضرورة
 واقعدر نته شاعرک

فلوانك فی يوم الرخاء سألتنی فراقك لم انجل وانت صدیقی

شعرنده واقع اولمشدر (فلوانك) قولنده ان مفتوحه مخففه ضمیر بارز
 منصوب متصل اولان كاف مکسورده ده عمل ایلمشدرکه ضمیر شان دکلدر
 مفادشعر منشرح البال وسعه و حسن حال اوزره اولدیغم برکونده اکر سن
 بندن هر نسنه دن بکا صعب اولان فراقکدن سؤال یعنی آنی طلب ایلمش
 اولسن یار و فادارم اولدیغك حالده کمال محبتم مقتضاسی بخل ایتم بلکه آکا
 دخی اجابت ایدرم دیمکدرکه کمال محبتدن هر بر مسئولی اسعاف ایدوب
 خدمتدن یوز چویرمیه جکئی بیاندر .

وبیلملیدرکه ان مفتوحه تخفیف اولنهرق ضمیر شان مقدرده عمل ایلدکده
اول ضمیر شانی تفسیره صالح جمل اسمیه و جمل فعلیه اوزره داخل
اولور واکر اولنده بر فعل بولنور ایسه اول فعلک علم وتیین وتیقن
وانکشاف وفکر وظهور کبی افعال تحقیقندن اولسی لازمدر (علمت ان
زید قائم) قولزده اولدینی کبی . واکر اولنده اولان فعل افعال تحقیقندن
اولز ایسه اول ان کلمه سی مخففه اولیوب بلکه ناصبه اولور (ظنت ان
لایقوم زید) قولزده اولدینی کبی . واکر ظن و یقینه احتمالی وار ایسه
ایکی وجه جائز اولور نته کیم (وحسبوا ان لاتکون فتنه) قول شریفنده ان
لاتکون رفع ونصبیه اوقتمشدر .

وبیلملیدرکه ان مخففه جمل فعلیه اوزره داخل اولدقده (فعل) افعال
متصرفه دن اولوب جمله سی شرطیه و یادعائیه دکل ایسه شو صورتده ان
ناصبه دن فرق اولنق ونون محذوفه دن عوض کبی اولمق ایچون اوزرینه
ان مفتوحه مخففه داخل اولان فعل متصرفیه بر سین یاخود سوف و یاخود
قد کلمه سی بولنق و یاخود نون محذوفه دن عوض کبی اولسون ایچون بر حرف
نقی اولمق لازمدر (علم ان سیکون) قول شریفنده و شاعره

واعلم فعلم المرء ینفعه ان سوف یأتی کل ما قدر

شعرنده و (علمت ان قد تقوم) قولزده (و علمت ان لاتقوم) و (تینت ان
ما تقوم) و (ایحسب ان لن یموت) و (ایظن لم یره احد) و (ظنت ان لما تقم)
و (علمت ان ان تقوم) قوللرمزده اولدینی کبی زیرا ان ناصبه ایله
مدخولی اولان فعل بیننده سین و سوف و قد کلمه لری هر کز واقع اوله من
واما حرف نقی هر نقدر ان مخففه وان ناصبه ایله دخی بولنور ایسه ده لکن
ان مخففه ایله بولنسی نون محذوفه دن عوض کبی اولمق ایچوندر وان
ناصبه دن لفظاً و معنأ فرق اولنه بیلور لفظاً فرقی من جهة العمل درکه مابعدنده
فعل منصوب ایسه ان ناصبه منصوب دکل ایسه ان مخففدر و معنأ فرقی
حرف نفیله استقبال قصد اولنور ایسه ان ناصبه استقبال قصد اولنر ایسه ان
مخففه در واکر ان مخففه نك داخل اولدینی فعل افعال غیر متصرفه دن

اولور ايسه وياخود جمله سى شرطيه ويا دعائيه ايسه فعل غير متصرفك
مصدرى اوليوب وشرطيله دعا مصدر ايله ماول اوله ميه جغندن شو
صورتلرده ان مخففه نك ان ناصبه يه التباسى اوليوب ذكر اولنان حرفلرك
برينه احتياج يوقدر ودخوللرى جائز دكلدر حق سبحانه وتعالى نك (وان
عسى ان يكون) ودخى (تبئت الحن ان لوكانوا يعلمون الغيب) ودخى
و(الحامسة ان غضب الله عليها) قول شريفنده اولديغى كى

درس ۲۵۱

حروف مشبهه بالفعل دن (كان) انشاء تشبيه ايجوندر اشبوكان مذهب اصح
اوزره برأسه حرف دريعنى مركب دكلدر واصل اولان دخى عدم تركيبدر
لكن ائمة نحاتدن خليل كاف تشبيه ايله ان مشددة مكسوره دن مركب اولمسنه
قائل اولمشدر اكا كوره مثلاً كان زیداً الاسد قولنك اصلى ان زیداً كالاسد
اولوب اول امرده انشاء تشبيه بيانسون ايجون كاف تقدم ايلمش وحروف
جاره دن صكره الف نون ماده سى مفتوح او قونه جغندن ان كلمه سنك همزه سى
مفتوح قيلنمشدر

كان كلمه سى هر حالده جمهور نحاتك رأيى اوزره اسمنى خبرينه تشبيه ايجون
كلور خبرى كرك مشتق اوله كانك قائم كى وكرك جامد اوله كان زیداً
الاسد كى لكن نحاتدن زجاج خبرى مشتق اولور ايسه شو حالده خبر
اسمندن عبارت بولنه جغندن و برشيئك كندى نفسنه تشبيهى اويه ميه جغندن
كان تشبيه ايجون اوليوب شك ايجون اولور واكر خبرى جامد اولور
ايسه شو حالده بر محذور اولماغله انشاء تشبيه ايجوندر دیدى زجاجك
ذهابنه كوره كان يا تشبيه وياخود شك ايجون اولمش اولور .

خفى اولميه كه اشبوكان دخى ان وان كى آخرندن نون متحرکه مع حركتها
حذق اولنه رق تخفيف اولنور كه كان قالور كاف وهمزه نك فتحى ونونك
سكونيله وشو تقديرده آخرندن فتح زائل اوله رق فعله مشابتهى قالماغله
استعمال افصح اوزره عملدن لغو اولنور نته كيم شاعرك

شعرنده اولدینی کبی واکر شعر مذکورده کان عمل ایلسه ایدی کان
 ثدیه حقان دینلی ایدی زیرا تنیه لک حالت نصبی یا ایله در مفاد شعر چوق
 صدر وسینه لکه آنده اولان موضع قلاده مشرق ومنوردر کان اول موضع
 قلاده ده اولان محبوبه نك ایکی مملری ایکی دانه حقه کبی در دیمکدر اشبو شعرک
 صدری شیخ رضی نك بیان ایلدیکی اوزره ذکر ایلدی کمز کبی اولوب
 وشرح تسهیل ده ووجه مشرق النحر وشرح لب الالباب ده و نحر مشرق
 اللون واقع اولمشدر.

(اشبو مخففه) اولان کان کله سی استعمال افصح اوزره عملده ملنی ایسه ده
 لکن بعضیلر صورۃ ان مفتوحة مخففه یه مقارن بولندیغندن و حالبوکه ان
 مفتوحة مخففه نك دخی اسم ظاهرده هرکز عملی کورلماش ایکن اضعفک
 اقوی اوزره رجحانی لازم کلامک ایچون مقدر بر ضمیر شانده عملی التزام
 اولندیغندن ان مفتوحة مخففه یه قیاسیه مخففه اولان کان کله سندنصرکه
 دخی بر ضمیر شان تقدیر اولمنسی مناسب کوردیلر فقط ان مفتوحة
 مخففه دنصرکه ضمیر شان تقدیری بالضروره واقع اولوب (کان) کله سندنصرکه
 ایسه ضمیر شان تقدیرینه بداعی اولما مغله عدم تقدیر دخی تجویز
 ایدیلمشدر و ظاهر اولان دخی بودر.

(ونحاتدن ابن مالک) اسم مقدرده عمل ایلیمکده مخففه اولان کان کله سنی
 ان مفتوحة مخففه کبی کوروب لکن اول اسم مقدرک ضمیر شان اولمنسی
 لازم کلز وبونی (کان) کله سندنصرکه واقع فعل متصرف ایله ان مفتوحة
 مخففه ده اولدینی کبی لم وقد کله سنک کتورلمسنک لزومی تأیید ایدر
 دیمشدر حق سبحانه و تعالی نك (کان لم تعن بالامس) قول شریفنده اولدینی
 کبی که کانک لم تعن بالامس تقدیرنده در دیمشدر و امام علی رضی الله تعالی عنه
 و کرم الله وجهه افندمن حضرتلرینک نهج البلاغه ده (کان قد وردت
 الاضغان) قول منیفنده اولدینی کبی که (کان) کله سندنصرکه بوضمیر شان
 تقدیر اولمشدر.

(ونحاتدن شیخ) رضی کان کله سندنصرکه واقع فعلیه حروف عوضک
 لزومی کان کله سنک (کاف) ایله (ان) دن اولمنسی تقویه ایلر دیمشدر.

لکن مذهب اصح عدم ترکیب اولوب و عند التخیف عملدن الغایله برطاقم تکلفاتیده ارتکاب ایلمامکدر.

درس ۲۵۱

حروف مشبهه بالفعل دن (لکن) استدراک ایچوندر استدراک متقدمدن تولد ایلیان بر توهمی رفع ایلمکدرکه مثلاً جاءنی زید دینلکده زید ایله عمر و بینده کال الفت و انسیت بولندیغندن عمروک دخی کلدیکی توهم اولندیقه اول توهمی لکن عمرواً لم یجیء دیمکله رفع ایدرسک.

(اشبو لکن) ایکی کلام بینده بولنورکه نفیاً و اثباتاً بری برینه مغایر اولور لر یعنی ماقبلنده بولنان کلام منفی اولور ایسه مابعدنده بولنان مثبت و ماقبلنده بولنان مثبت اولور ایسه مابعدنده بولنان منفی اولور و اشبو نفیاً و اثباتاً تغایر همان لفظاً اولمقده منحصر اولیبوب معناً دخی اولمغه شاملدر جاءنی زید لکن عمرواً لم یجیء و زید حاضر لکن عمرواً غائب ولم یجیء زید لکن عمرواً جاء و زید غائب لکن عمرواً حاضر قوللر مزده اولدینی کی و بیلملیدرکه اشبو لکن کلهسی (ان) و (ان) و (کان) کی بعض تخفیف اولنوب نونک سکونیه (لکن) قالورکه عاطفه اولان لکن کلهسنه لفظاً و معناً مشابه اولور شـ و صورتده لکن کلهسی دخی فعله مشابهتدن خروج ایدوب ومع هذا عاطفه و غیر عامل بولنان لکن کلهسنه مشابه اولدیغندن وجوباً عملدن لغو اولنور (اخفش) و (یونس) هر نقدر دیگر اخواتنه قیاسیه بونک دخی اعمالی تجویز ایلمشیر ایسه ده لکن شیخ رضی بوکا بر دلیل بیله مم دیمشدر.

(و بیلملیدرکه کرك) مشدده و كرك مخففه اوله (لکن) کلهسنک اولنده برواو کتورملک جائزدر مثلاً (ما جاءنی زید و لکن عمرو حاضر) قوللر ده اولدینی کی اشبو و او یا عاطفه اولوب جملهی جمله اوزرینه عطف ایلر و یا خود و او اعتراضیه در شیخ رضی ظاهر اولان و اوک اعتراضیه اولمسیدر دیمشدر.

(و بیلملیدرکه اشبو) لکن ده دخی بسیطه و یا خود مرکبه میدر اختلاف

اولمشدر (بصریلر) بسیطه در مرکبه دکدر دیدیلر واصل اولان دخی
عدم ترکیب در (واما کوفیلر) مرکبه در (لا) کلمه سیله برده کاف زائده
ایله مصدر ان مکسوره دن ترکب ایلمشدر اصلی لا کان در کافک حرکه سی
سلب اولنه رق همزه نك کسره سی کافه نقل اولنوب وهمده حذف اولنه رق
لکن اولمشدر و مرکب اولان برکلمه نك جزء لفظی جزء معناسنه دلالت
ایلدیکی کبی لکن کلمه سنده دخی لا کلمه سی مابعدینک ماقبلی کبی اولیوب بلکه
مابعدینک نفیاً واثباتاً مخالف اولسنی افاده ایلر وان کلمه سی کلام سابقدن
متولد و همک دفعیله مابعدنده جمله نك مضموننی تأکید و تحقیق ایلر دیدیلر.

درس ۲۵۳

حروف مشبهه بالفعل دن (لیت) انشاء تنی ایچوندنر و تنی طلب مالا طمع
فیہ (او) مافیہ عسر دینمکله تعریف اولنور یعنی اشیو بابده تنی ایله
مراد حصولنه طمع اولنمان یعنی بروقوعی ممکن اولیانی و یا خود ممکن
الوقوع فقط حصولنده عسرت و بعدیت اولان بر نسنه یی طلب ایلمکدر
شاعرك .

لیت الشباب یعود یوما فاخبره بما فعل المشیب

شعرنده وبر تحصیل مالدن امیدنی قطع ایلمش کیمسه نك لیت لی مالا فاحج
قولنده اولدینی کبی مفاد شعر کاشکه کنجلك زمانی برکون عودت ایلسه ده
اختیارلقک بکا ایشلدیکنی یعنی غدر و اذاسنی اکا خبر ویرسه ایدم دیمکدر
و مفاد مثال کاشکه مالم اولسه ده حج ایلسه ایدم دیمکدر کنجلك زماننک
عودتی غیر ممکن اولوب وبر نومیدک انه مال کچهرک حجه کیتمی ممکن
ایسه ده متعسر در

واما لیت کلمه سنک حصولی مترقب و مرجو اولان نسنه اوزره دخولی
نادر در واما واجب الوقوع اوزره دخولی مثلاً لیت غدا یجی دینک غیر
جاژدر .

وبیلملیدرکه بعض لیت کله سندنصکره ایکی جزء منصوب اوله رق دخی کورلمشدر مثلاً لیت زیداً قائماً قولزده اولدینی کی بونده جزءانی عند المحققین لیت نک خبر محذوفنده مستکن ضمیردن حال اولق اوزره منصوبدر تقدیر کلام لیت زیداً کائناً قائماًدر و امام فرا بوکی محلرده ایکی جزء لیت معناسیله یعنی اتنی فعلیله مفعولیت اوزره منصوبدر کان اتنی زیداً قائماً دینلمش کی درکه اتماء کائناً علی صفة القیام دیمکدر دیدی و امام کسائی بوکی محلرده جزءانی مقدر برکان ایله منصوبدر تقدیر کلام لیت زیداً کان قائماً دردیوب و شاعریک .

یالیت ایام الصبار واجعا - وکنت فی وادی العقیق راتعا

شعریله استدلال و تقدیر شعر یالیت ایام الصبار کان روا جعادر دیدی لکن (فرا) ینه کندی رأیبری اوزره توجیه ایدوب اتنی ایام الصبار واجعا دیمکدر دیدی . و محقق لیت نک خبرینی محذوف و آنده اولان ضمیر مستکن دن روا جعا کله سنی حال قیله رق تقدیر شعر لیت ایام الصبار لانا روا جعا یعنی لیت ایام الصبار کائناً لانا حال کونها روا جعا دیمکدر دیدیلر مفاد شعر کاشکه آوان عنفوان شباب رجعت ایدر اولسه لر ایدی و بنده سنیل صولرینک خرق و شق ایلدیکی دره لرده اوتلسه و یا یلسه ایدم دیمکدر کنجلیکی ثروت و سامان اوزره ترجیحدر

درس ۲۵۴

حروف مشبهه بالفعل دن لعل کله سی انشاء ترجی ایچوندر (ترجی) ممکن الوقوع اولوب فقط وقوعه وثوق و اعتماد اولنه میان بر نسنهیه انتظار واملدن عبارتدرکه (لعلک تعظینا) قولزده اولدینی کی بر امر محبوبه (و لعل اموت الساعة) قولزده اولدینی کی بر امر مکروهه ارتقاب و انتظاره شاملدر و بیلملیدرکه کلام باریده واقع اولان لعل کله لر یله ترجی مخاطبیره عائددر زیرا جناب باری ترجیدن منزله و مقدسدر مثلاً (لعله یتذکر

اویخشی) قول شریفی اذها انما علی رجاء کما التذکر والخشیة دیکدر و بو
 سبویهک ذهابی اویوب و حق اولانده بودر و فاضل تفتازانی بعض محل
 تحقیقه اطماعدن ایچون دخی اولور بیوردیلر (اعلمکم تفلحون) قول
 شریفنده اولدینی کبی و تحقیقندن بطریق الاطماع تعبیر ایلمک کریملرک
 اطماعنده خلف اولدیغنه و دیگر نکت لطیفهیه دلالت ایلسون ایچوندر
 و بعضیلر کلام باریده وارد لعل کلهلری ان کلهسنی کبی تحقیق ایچوندر دیدیلر
 لکن شیخ رضی اشبو ذهابی (لعله یتذکر اویخشی) قول شریفیه
 منقوضدر دیهرک رد ایلمشدر زیرا فرعونک تذکر ایلمدیکی امر محققدر
 و فاضل عصام شیخ رضی نک ردینه جواب و یروب متفرع اولان ایکی دن
 بریدر محتملدرکه فرعون دن تذکر وقوع بولدی ایسه ده خوف و خشیت
 وقوع بولمن اوله دیمشدر.

و نجاتدن ابن انباری و بعض کیمسهلر لعل کلهسنک بعض کی معناسنه یعنی
 تعلیل ایچون دخی کلهسنکی ذکر ایلدیلر و ترجی ممکن اولیسان محل ده لعل
 کلهسنی شو معنا اوزره حمل ایتدیلر مثلاً (اعلمکم تفلحون و لعلکم تشکرون
 و لعلکم تتقون) امثالی قول شریفلرده لعل کلهسنی کی معناسنه قیلدیلر.
 لکن جمهور نجات لعل کلهسنک معناسنی بیانده بر امر محبوب و یا بر امر
 مکروهه ترقیده یعنی طمع و اشفاقده اقتضار ایلدکلرندن صاحب کشفاف
 شوذهابی رد ایلمشدر. و بلکه لعل کلهسنک علیت و غرضیه عدم صلاحیتی
 متفق علیه در کورلمز میکه (دخات علی المریض کی اعوده و اخذت الملاء کی
 اشربه) دنیلور حالبوکه کی لفظی یرینه لعل کتورلمک هرکز صالح اوله مز.
 و بعضیلر لعل نک بعض استفهام معناسنه دخی کلهسنی مثلاً هل زید قائم
 معناسنه اوله رق لعل زیداً قائم دینلمسنی ایراد ایلدیلرکه بودخی بر قول
 ضعیفدر.

و بیلملیدرکه حروف جارده سبقت ایلدیکی اوزره لعل کلهسنی لغة عقیده
 حرف جر دخی اولور. و اشبو (لعل) کله سننده اون لغة مسموع
 اولمشدر (تسهیل) ده بیان اولدینی اوزره (لعل) (عل) (لن)
 (لغن) (غن) (عن) (لان) (ان) (رغن) (رغن) (لعلت) در

و بعضیلر رعل و غن لغتیرینی دخی علاوه ایله اون ایکی یه بالغ قیلمشیلردر
و شیخ رضی ده شوایکی دانه اولیوب اون اولکیلرایله برده مدیله لغاء کلمه سی
ذکر اولمشدر شو صورت ده لغاة مسموعه اون اوچ دانه اولمش اولور .

درس ۲۵۵

مبحث حروف العاطفه عطف بحی مطلب اسمده مرور ایلدیکندن بوراده
بیان ایده جکمز حروف عاطفه نك احوالیدر حروف عاطفه اون دانه درکه
واو فائم حتی او اما ام لا بل لکن کله لریدر و بعضیلر مفسره اولان
(ای) کلمه سنی دخی حروف عاطفه دن قیلدیله لکن اکثر نجات (ای)
حرف تفسیردر و مابعدی عطف بیاندر دیدیلر و بعضیلر مفرد اوزره
داخل بل کلمه سنی تدارك غلط ایچون موضوع اولوب حروف عاطفه دن
دکلدر دیدیلر زیرا عندالفصحاح بدل غلط بل لفظیله وارد اولمشدر لکن
اکثر نجات بل لفظی مطلقا حروف عاطفه عدادنده ذکر ایلدیلر .

اشبو اون دانه حروف عاطفه دن واو فائم حتی یعنی شو درت کلمه جمع
ایچوندر و بوراده جمعیله مراد او و اما کله لری کی احد الشیئین و یا خود
احد الاشیا ایچون اولما لریدر مثلا (جائی زید و عمرو) قولمزایله مراد زید
و عمرو ک ایکی سنك دخی کلدیکنی افاده در آنحق بونلرک یکدیگرندن فرقلری
(واو) مطلقا جمع ایچوندرکه معطوفیله معطوف علیه بیننده ترتیب بولنق
و بولنماق شقلرینه شاملدر حضرت رسول اکرم صلی الله تعالی علیه وسلم
افندمرك (لا یؤمن احدکم حتی یكون الله ورسوله احب الیه مما سواها) قول
نبویلرنده و حق سبحانه و تعالی نك (فکیف کان عذابی و نذر) دخی (ان هی
الاحیواتنا الدنیا نموت و نحیا) دخی (واسجدی وارکمی) قول شریفنده اولدینی
کی فافهم و (فا) بلا مهلة جمع و ترتیب ایچوندر و عدم مهلتک معناسی
معطوفیله معطوف علیه بیننده بر عمل آخر تحال ایلمامکدرکه مثلا جائی
زید فعمرو قولمز زید کله رک واریه بر فاصله کیر مکسزین آنی متعاقبا همان
عمروک دخی کلدیکنی مفیددر و (ثم) جمع و ترتیب ایچوندر آنحق بونده

مهلت و تراخی وارد در که (مثلاً جانی زید ثم عمرو) قولم زید کله رک و آرا ده
بر مده مصاحبتد نصکره عمرو ک دخی کلدیکی مفید در و (حتی) جمع و ترتیب
ایچوندر و بونده دخی مهلت و تراخی وارد در لکن بونده اولان مهلت
ثم ده اولان مهلتدن اقلدر.

وبیلملیدر که حتی نک معطوفی معطوف علیه دن جزء ضعیف و یا خود جزء
قوی واقع اولور که کله یعنی معطوف علیه متعلق اولان فعلک غایت
وانتهاسی قیلنمغه صالح اولور و بونکه فعلک جمیع اجزاء کله شمولی اولدینی
بینور مثلاً (قدم الحجاج حتی المشاة) دینلده ادنی بر حالده اولان حتی
ماشیلرک یعنی یایان یوریا نلرک دخی کلدیکی افاده ایلر که آرتق را کبلرک
بطریق الاولی کلدیکی حاصلی قدومک جمیع حجاجه شمولی مشعر اولور
ومثلاً (مات الناس حتی الانبیاء) دینلده افاده افراد ناس دن حتی اک اقوی
بولان نبی ذیشانلرک ارتحال ایلدکرینی افاده ایدوب موت و فنانک جمیع
ناسه شمولی مشعر اولور.

(وبیلملیدر که) (حتی) نک (ثم) دن فرقی ایکی جهته در (جهت اول)
حتی نک معطوفی معطوف علیه دن جزء اولمسیدر شو مذکور ثم ده شرط
قیلنما مشدر (جهت ثانی) ثم ده اولان مهلت بحسب الخارج اولوب حتی ده
اولان مهلت بحسب الذهن در نته کیم سبقت ایلیان مثالدرده اولدینی کبی
وبیلملیدر که جزء اضعف و یا خود اقوی ایله انتها فعلک جمیع اجزاء کله
شمولی مفید اولدینی کبی جزء اخیر ملاقی اولان شیله دخی انتها مفید
عموم در نته کیم (نمت البارحة حتی الصباح) دینلده اولدینی کبی که نومک
جمیع اجزاء ایله شمولی مفید در و بونده حتی حرف جر در.

وبیلملیدر که جاره اولان حتی نک مجروری ماقبلنده اولان ذواجزادن جزء
اخیر اولمغله و ماقبلندن جزء اولمیوب بلکه جزء اخیر ملاقی اولان نسنه
بولنمغه صالح وشو ایکی نوع افاده عموم طریقی حائر در لکن عاطفه اولان
حتی نک معطوفی ماقبلندن مطلقا جزء اولمغله مشروط اولوب ملاقی جزء
اخیر اولان حتی ایله معطوف اوله من زیرا حتی ده اصل و اکثر اولان
جاره اولمسیدر که عاطفه اولان دخی آنک اوزرینه محمولدر پس فرع مزیت

اصلہ اولشماق ایچون عاطفه اولان حتی آنجق معنیں دن برنده مستعمل اولمش وتعلق حکمده اجزایک اتحادی اتحاد متجاورین دن عقلاً اعرف ووجوداً اکثر بولمغله اظهر معنیں ایله که مدخولی ماقبلندن جزء اولمقدر تخصیص اولنمشدر. وخفی اولیه که کوفیلر قلة وقوعندن ایچون حتی کله سنک عاطفه اولمنی انکار ایله جاء القوم حتی ابوک ورایتهم حتی اباک ومررت بهم حتی ابیک قوللرمز نخونده حتی کله سنی عاطفه قیامیوب ابتدائی قیلدیلر ومابعدنده اضمار عامل ایلدیلر فافهم.

درس ۲۵۶

حروف عاطفه دن (او) (اما) (ام) یعنی شواوچ کله متکلمک عندنده مبهم وغیرمعین اولان احد الامرین ویاخود احد الاموره دلالت ایلمک ایچون وضع اولنمشدر.

اشبو حروف دن (او) کله سی جمله خبریه دن اوچ معنایه کلورکه اگر احد الشیئین دن خبرو یریلوب وعلى التعین بیانمز ایسه شک ایچون اولور (جاءك زید او عمرو) قولمزده اولدیغی کبی واکر على التعین بیانمزده مخاطبدن کتم اولنمق قصد اولنور ایسه ابهام ایچون اولور نته کیم لید شاعرك (وهل انا الامن ربیعة او مضر) شعرنده واقع اولمشدر لید شاعر کندیکن ربیعه ویاخود مضر قیلهلرینک قنغیسندن اولدیغی بیانمز دکلدر لکن ابهام قصد ایلمشدر واکر على التعین معلوم اولوب وابهام دخی مقصود دکل ایسه تفصیل ایچون اولور مثلاً برنسنه ک عرض اولمیوب جوهر اولدیغی ویاخود برعکس بولنمیدیغی ویاخود ایکسی دخی اولدیغی اوزره استدلال قصد اولنه رق هذا اما ان یکون جوهرأ او عرضاً قولمزده اولدیغی کبی وخفی اولیه که اول درسده اوکله سنک یالکز شک ایچون اولدیغی کوسترما مز مشترک اولدقلری معنایی ارأه وافادهدر.

ویلمیلدرکه (او) کله سی امر حیزنده بولنسه اگر امرین دن هرایکی سنی جمع ایلمکده مأمور ایچون برفضیلة ومزیة واریسه اباحت ایچون اولور تعلم الفقه والنحو وجالس الحسن وابن سیرین قوللرمزده اولدیغی کبی واکر

جمعده بر فضیلة یوق ایسه تخمیر ایچون اولور (اضرب زیداً او عمرواً) قولزده اولدینی کی .

و (بیللمیدرکه) مقام تنی ده اباحه جاری اولوب و مقام تحضیض و عرض ده بحسب القرینه اباحه و تخمیر محتمل اولور (لیتلی فرساً او حماراً و هلا تعلم الفقه و النحو و هلا تضرب زیداً او عمرواً و الا تضرب زیداً او عمرواً) قوللر مزده اولدینی کی و اما مقام استفهامده آنجق لاعلی التعمین احدا لامرینه دلالة ایچون اولور (ازید عندک او عمرو) قولزده اولدینی کی (و بیللمیدرکه) (او) کله سی بعض و او معناسنه ده کلور نته کیم شاعرك

وکان سیان ان لایسر حو انعما اویسر حو مهابا و اغبرت السرح

شعر نده واقع اولمشدر والی والا معنالرینه دخی کلورکه مابعدنده فعل مضارع ان مقدره ایله منصوب اولور نته کیم نواصب مجتده مرور ایلدی و بل معناسنه اضراب ایچون کلورکه شو تقدیرده حرف عطف اولیوب حرف استیناف تسمیه اولنور و مابعدنده آنجق جمله واقع اولور .

و بیللمیدرکه عاطفه اولان او کله سی چوق کره مفردی مفرد اوزره عطف ایچون اولدینی کی و بعض جمله بی جمله اوزره دخی عطف ایدر (ما ابالی ائت اوقعدت) قولزده اولدینی کی و بیللمیدرکه عاطفه اولان او کله سنده معطوف علیه اوزره اول امرده شک اوزره تنیه ایچون بعض بر اما لفظی زیاده قیلنور مثلاً (جاءنی امازید او عمرو) دنیلور .

و اما عاطفه اولان (اما) کله سنده معطوف علیه اوزره بر (اما) لفظی کتور ملک واجیدرکه مثلاً جاءنی امازید و اما عمرو دنیلور معطوف علیه اوزره اولان (اما) لفظی اول امرده شک اوزره تنیه ایچون کتوریلور و ایکنجی (اما) اوزره داخل اولان و او عاطفه ایکنجی (اما) لفظی اولکی (اما) اوزره عطف ایچون کتوریلور و ایکنجی (اما) لفظی مابعدینی اولکی (اما) نک مابعدینه عطف ایلرکه شو تقدیرده عبارده بر لغو و فائده سز سنه اولمدینی ظاهر و هویدادر پس بعض تحتک اما

کلمه سی عاطفه دکدر واکر عاطفه اولسه معطوف اوزرنده بولمز ایدی
 و برده عاطفه اولمش اولسه اوزرینه و او عاطفه دخی داخل اولغله ایکی
 حرف عطفک اجتماعی لازم کلور ایدی دیهرک اعتراضلری ناجادر.
 و بیللملیدرکه شک و ابهام و تفصیل مغالینه محتمل اولمده (اما) دخی (او)
 کیدر عاطفه اولان (او) و (اما) کلهلری بر مقدار بیلندی ایسه عاطفه
 اولان (ام) کله سندن دخی برنبده بحث ایدم.

درس ۲۵۷

خفی اولیه که (ام) کلمه سی ایکی قسم اوزره درکه یا متصله و یا خود منقطه
 اولور (ام متصله) هرکز همزه استفهامی استعمال اولمز و همیشه احد
 الامرین کندی و بر مقتضای فصاحت دیکری همزه استفهامی ولی ایدر
 و امرین دن بری متکلمک عندنده لاعلی التعین ثابت اوله رق مخاطبدن تعینی
 طلب اولنق اوزره ایراد اولنور و متکلمه نسبتله امریندن برینک دیکری
 اوزره تعینده رجحانی اولما غله امرینه متساوین دخی اطلاق اولنور (ازیداً
 رأیت ام عمرواً) قولزده اولدینی کی که مخاطبک زید و عمرودن بری سی
 کوردیکی معلوم اولوب آنحق کوریلان قنغیسی اولدینی بیلنم دیکندن
 مخاطبدن تعینی طلب ایلمکدن عبارتدر و مستویین که زید ایله عمرودر
 بری سی ام لفظی و دیکری همزه استفهامی ولی ایلمشدر واکر رأیت زیداً
 ام عمرواً دینسه فصاحتده ازیداً رأیت ام عمرواً قولزدن دون بر تعیره
 سلوک ایدیلمش اولور.

و بیللملیدرکه مراد طلب تعین اولغله ام متصله نك جوابی احد الامرینی
 تعین ایلمکله اولور که مثلاً مثال مز بورك جوابنده رأیت زیداً و یا رأیت
 عمرواً دینلور یوقسه نعم ولا کلهلریله جواب ویریلمز زیرا بونلر تعین
 افاده ایلمزلر.

واما همزه استفهامه مقارن او واما کلهلرینک جوابنده نعم و یا خود لا
 دینله بیلور مثلاً اجاءك زید او عمرو و یا خود اجاءك اما زید دینلکده
 نعم دینسه زید و یا خود عمرو کلدی دیمک اولور ولا دینسه زید

وياخود عمرو گمدي ديمك اولور زيرا بونلرده سؤال ايله مقصود مثلاً
 لا على التعيين زيد وياخود عمرو گمدي وياخود گمدي بوراسنك بياتي
 طلبدر يوخسه ام متصله ده اولديني كي تعيين مطلوب دكلدر و بيلميدركه
 ام متصله ده بعض نفي امري ايله دخي جواب ويريلور مثلاً ازيداً رأيت
 ام عمرواً قولزده متكلم زيد و عمرودن ايکسني دخي كورمديكي حالده
 بريني كورمش اولسني اعتقادنده خطاسي محتمل اولدقده مارأيت زيداً
 ولا عمرواً دينهرك جواب ويريلور .

واما ام منقطعه (اضراب عن الاول) ده بل لفظي و (ثابده شك خصوصنده
 همزه كيدر) وما قبلنده يا جمله خبريه وياخود استفهاميه واقع اولور (انها لا بل ام
 شاة وزيد عندك ام عمرو) قوللر مزده اولديني كي كه (مثال اولده)
 كورمش اولديني قطيعه يعنى سورينك دوه سوريسي اولديغنه حكم ايدر
 ايكن دوه سوريسي اولديني معلوم اوله رق آياقون سوريسيدير وياخود
 شي آخرميدر دينهرك شك اولدقده شو كيفيتدن استفهام اوله رق
 ام شاة دينمشدركه (بل هي شاة) ديمكدور و (مثال ثاني) ده مخاطب عندنده
 اولان زيد وياخود ديكر بر كيمسه ميدر دينهرك استفهام اولور ايكن
 زيد اولديني معلوم اوله رق عمرو وياخود ديكر بر كيمسه ميدر شك اولمغله
 بل عمرو دينلمشدركه بل عمرو عندك ديمكدور استفهام اولدن استفهام ثانيه
 اضراب واعراض اولمشدر .

درس ۲۵۸

حروف عاطفه دن (لا) (بل) (لكن) شو اوچ كله معطوف عليه دن
 برينه على التعيين اسناد حكم ايجون وضع اولمشلردر آنجق بونلردن (لا)
 حرفي معطوف عليه ثابت اولان حكمي معطوفدن نفي ايجوندر بونده
 حكم معطوف عليه اولوب معطوفه دكلدر مثلاً جائني زيد لا عمرو دينلده
 زيده محيئت ايله حكم اولنوب محيئتكم عمرودن نفي مفيد اولور و (بل)
 كله سي اثباتد نصكره اولور ايسه معطوف عليه دن حكمي معطوفه صرف
 ايلمك ايجون اولور بونده حكم لا كله سنك عكسنه اوله رق معطوفه در

معطوف عليه دكلدر مثلا (جاءني زيد بل عمرو) قولنر بل جاءني عمرو
ديكدر و معطوف عليه مسكوت عنه حكمنده در كه آندن واقع اولان
اخبار بطريق القصد اوليوب كانه حقيقت وعدم حقيقت ايله حكم اولنماش
كيدر .

واما بل كله سي نفي دنصكره اولور ايسه بونده اختلاف اولنوب بعضيلر
معطوف عليه دن نفي اولنان حكمنه معطوفه صرف ايلمك ايجوندركه
مثلا (ماجاءني زيد بل عمرو) قولنر بل ماجاءني عمرو ديكدر و معطوف
عليه مسكوت عنه حكمنده در ديديلر و بعضيلر معطوف عليه دن منفي
اولان حكمنه معطوفه اثبات ايجوندركه و معطوف عليه مسكوت عنه
حكمنده اولوب و ياخود حكم كندندن منفيدر مثلا (ماجاءني زيد بل
عمرو) قولنر بل جاءني عمرو ديكدر و معطوف عليه اولان زيد
مسكوت عنه حكمنده اولوب و ياخود (حكم حقيقت) زيددن منفي در كه
اشبو كلام عمروك كلوب زيدك كلديكني مفيد اولور ديديلر و (لكن)
كله سي بلا نفي مستعمل اوليوب يا مفردى مفرد اوزره و ياخود جمله يي
جمله اوزره عطف ايجون اولور مفردى مفرد اوزره عطف ايجون
اولور ايسه لا كله سنك نقيضى اولور كه معطوف عليه نفي اولنان حكمك
معطوفه ايجاب و اثباتى اقتضا ايلر ماقام زيد لكن عمرو قولنر ده اولدينى
كي قام عمرو ديكدر و جمله يي جمله اوزره عطف ايجون اولور ايسه ذكر
اولنان بل كله سي كي اولوب بعد الاثبات مابدينك نفي و بعد النفي
مابدينك اثباتى اقتضا ايدر .

(جاءني زيد لكن عمرو لم يجي و ماجاءني زيد لكن عمرو قد جاء) قولنر مزده
اولدينى كي .

درس ۲۵۹

(مبحث حروف التنيه و حروف الندا) حروف تنبيه دنيلان (الا) و (اما)
و (ها) يعنى شواوچ كله در كه مخاطب متكلمك ايراد ايله جكي نسنه دن
غافل اولماق ايجون جمله لر اولنده كتوريلور و شو جفته كنديلره

حروف تنبیه تسمیه اولمشدر (الا زید قائم واما زید قائم) قوللر مزده اولدینی کی .

حروف تنبیه دن (الا) و (اما) همزه انکار ایله حرف نفی دن مرکبلردر وانکار دخی معنای نفی اولوب ونفیک نفی اثبات اولغله اثبات وتحقیق افاده ایلمک ایچون ترکیب اولمشلر وان معناسنه بولمشلردر لکن عامل دکلردر وهر بر جمله اوزره کرک خبریه وکرک طلبیه اوله داخل اولورلر و جمله یه مختص بولمشلردر .

ویلملیدرکه الا اکثر ندا اوزره واما قسم اوزره داخل اولور و بعض اما کلمه سنک همزه سی ها وعینه تبدیل اولنه رق ها و عما دخی وارددر واحوال ثلثه ده حذف الف ایله ام وهم وعم دخی دینور .

وخفی اولیه که الا بعض حرف تحضیض اولور واما بعض حقا معناسنه کلورکه مابعدنده الف نون ماده سی مفتوح قیلنور تنه کیم بحثده مرور ایلدی .

واما حروف تنبیه دن (ها) جمله یه مختص اولیوب جمله ومفرد اوزره دخی داخل اولور ومفرد اتدن اکثر اسماء اشاره اوزره بولنور تاکه مخاطب اول اشارت لردن که اسماء اشاره نك معناسی آنجق آنکله تعین ایلر غافل اولیه هذا وهاتا وهذان وهاتان وهؤلاء قولمزده اولدینی کی ونداده ای کلمه سنک صفتی اوزره وجوبا داخل اولور یا ایها الرجل کی ویلملیدرکه بعض اسماء اشاره ایله حرف تنبیه فصل واقع اولور واشبو فصل اکثر حرف قسم حذف اولنه رق لفظة الله ایله و یا خود ضمیر مرفوع منفصل ایله اولور (ها الله ذالدار لادخلنها) و (ها اتم اولا) قوللر مزده اولدینی کی .

(حروف ندا دنیلان) ده علی الاشهر بش دانه کلمه درکه (یا) و (ایا) و (هیا) و (ای) و (همزه) در (یا) ایله قریب وبعیده ندا اولنور و (ایا) و (هیا) بعید ایچون موضوعلردر و (ای) قریب و (همزه) اقرب ایچون وضع اولمشدر واما (وا) لفظی مشهور اولان ندبده استعمال اولنور و بعض حروف ندادن (یا) مقامنده دخی قائم اولور مندوبی مناداده داخل قیلنر (وا) کلمه سنی دخی مطلقا حروف ندادن عد ایلدیلر وندای بعیده

بعدالهمزه الف ايله (آ) و بعدالهمزه الف و بعده ياء ساكنه ايله (آى)
دخى ايشيديلمشدركه بونلر ايله حروف ندا سكزه بالغ اولور .

درس ۲۶۰

(مبحث حروف ايجاب) حروف ايجاب دنيلان (نعم) و (بلى) و (اى)
و (اجل) و (خير) و (ان) يعنى شو التى دانه كلهدر بونلردن (نعم)
سبقت ايدن بر جمله نك كرك خبريه و كرك استفهاميه اوله و كرك مثبت
و كرك منفي بولنه مضمونى تقرير و تحقيق ايچون كتوريلور مثلاً قام زيد
وياخود اقام زيد دینلدكده نعم دینلسه نعم ماقام زيد ونعم لم يقم زيد
ديك اولور و (شو جهته) ابن عباس رضى الله تعالى عنهما رب الناس
افندمن حضرتلرى الست بر بكم قول شريفك جوابنده نعم ديك
كفردر بيورديلر .

(و بعضيار اقرار و طلب اوزره) تحمیل ايچون نفى اوزره داخل همزه
انكار دنصكره بلى موقعنده نعم كتورلمسنى تجويز ايلدكلرندن الست بر بكم
جوابنده نعم دینلمسنى دخى تجويز ايتديلر زيرا انكار معنا نفى اولوب
نفى النفى ايسه اثبات اولمغله نعم كلهسى انكار نفى دن مستفاد اثباتى تصديق
ايچون قيلنه رق كتورلمش اولور .

(بونلرك تجويزلرى) نعم كلهسى مع النفى همزه نك مدلولنى تقرير ايلمك
اوزره مبنى اولوب ابن عباس حضرتلرينك كلامى ايسه همزه نك مابعدى
مقرر اولمسى اوزره مبنى اولمغله شو ايكي قول بيننده تناقض يوقدر
واشبو بعضيلرك قولى عرفا بر درجه شهرت بولمشدركه اكر بر كيمسه
(يازيداليس لى عليك الف درهم) ديسه ده زيد جوابنده نعم سويلسه اقرار
ايلمش اولور .

(و بيلمليدركه) افعل و ياخود لاتفعل كې بر امر و يانهى دنصكره نعم
دينلسه شو تقديرده نعم كلهسنه حرف وعد دنيلور و بعدالاستفهام مثلاً
هل جاءك زيد دینلدكده نعم دینلسه و ياخود جواب سؤال مقدر اوله رق
صدر كلامده نعم دینسه مثلاً شاعرك

نعم دار من لادار خير له الدنيا تذر الريح يوماً احشاء ما فيها

شعر نده اولديغى كې اشبو نعم كله سنه حرف اعلام دينلور شوايكي صورتده اولان نعم كله سنه حرف تصديق دينلمز مكر كه بطريق التغليب اطلاق اولنه وييلمليدركه نعم كله سنده درت لغة مسموعدر بريسي نون وعينك فتحيله كه مشهور اولان دخی بودر وايكنجيسي نونك فتحى وعينك كسريله و اوچنجيسي نونك وعينك كسريله و در دنجيسي نونك فتحى وعين مفتوحه يي حا حرفه تبديلى ايله اوقيمقدر .

درس ۲۶۱

حروف ايجاب دن (بلى) كله سى ايجاب نقيه مختصه بولمشدن يعنى نفى متقدمى مطلقاً نقض ايدرك ايجاب و اثبات قيلمق ايجون كتور يلور مثلاً الست بر بكم قول شريفنده بلى ديديكمزده بلى انت ر بنا ديمش اولورز و ما قام زيد سويليان كيمسه نك جوابنده بلى دينلسه قد قام زيد دينلمش اولور و بعض بلى كله سنك على سبيل الشذوذ تصديق ايجابده استعمالى دخی كوسترلمشدر كه مثلاً اقام زيد سويليان كيمسه نك جوابنده بلى دينلده اولديغى كې اشبو بلى كله سى مذهب اصح اوزره براسها حرف در امام فرانك اصلى بل لفظى اولوب آخريسه وقف ايجون برالف زياده قيلمشدر ذهابه زعم تعبير اولمشدر و حروف ايجاب دن (اى) همزه نك كسرى ويانك سكونيله بعد الاستفهام اثبات ايجون اولور و بعض نحوات تصديق خبرده دخی استعمالنى ذكر ايلديلر هر حالده كندينه قسم لازم اولوب قسمسز استعمال اولمز و فعل قسم هر كز كتور يلمز و مقسم به انجق لفظه جلاله ورب و لعمرى لفظلرى اولمق ايله مشروطدر مثلاً اقام زيد دينلده اى والله و يا خود اى وربى و يا خود اى لعمرى دينلور كه مع القسم زيدك قائم اولديغى تصديقدر .

و حروف ايجاب دن (اجل) كله سيكه همزه نك و جيمك فتحيله درو (جير)

کله سیکه جیمک فتحی ویانک سکوئی ویرانک کسر ویاخود فتحیه امس
ویاخود کیف وزنده در و (ان) کله سیکه حروف مشبهه بالفعل دن اولان
ان کی همزه نک کسری ونون مشدده نک فتحیه در اشبو اوچ دانه کله
تصدیق خبر ایچون کلمشدر مثلاً بر کیمسه اتاک زید دید کده اجل ویاخود
جبر ویاخود ان دینسه اول کیمسه بی تصدیقاً قداقی دینلمش اولور ولم
یأتک زید دید کده دینسه لم یأت زید دینلمش اولور و بیلملیدرکه ان
کله سی تصدیق دعا ایچون دخی کلمشدر نته کیم فضالة ابن شریک بر حاجت
ایچون ابن زبیر حضر تلرینک نزدینه کلوب مرآمنه نائل اولمدقده لعن الله
ناقة حملتی الیک یعنی بنی سکا کتورن ناقه یه الله لعنت ایتسون دیدیکنده
ابن زبیر حضر تلری ان ورا کبها بیوردیلرکه یعنی اکا و آنک را کینه دخی
لعنت ایلسون دیمکدر .

و بیلملیدرکه ان کله سی بعد الاستفهام دخی کلمشدر نته کیم شاعراک

لیت شعری هل للمحب شفاء من جوی جهن ان اللقاء

شعر نده واقع اولمشدر مفاد شعر کاشکه محب وعاشق لره محبوبه لره اولان
اولان محبتک حرقت و التها بدن شفا وارمیدر بیلسه ایدم اوت واردرکه
اول لقا ووصلت در دیمکدر .

درس ۲۶۲

(مبحث حروف زیاده) حروف زیاده دینلان کلامده بعض زائد اوله رق
دخی واقع اولان حرفلدر و بر کله نک زائد اولسی آنسز اصل معنایه
نقصانلق طاری اولمامسیله بیلنور و کلامده کتورلملری یا تأکید معنایه
برفائده معنویه و یا تزین لفظ و تزید فصاحت واستقامت وزن ورعایت
سجع کی فوائد لفظیه دن ایچون اولور والا عبث و لغو اولوب کلام فصحا
وباخصوص کلام باری ده هر کز جاری اولمز ایدی

بعض زائد اوله رق واقع اولان حرفلر (ان) و (ان) و (ما) و (لا)

و حروف جردن (من) و (با) و (لام) و (کاف) در حروف زیاده دن ان
همزه نك كسرى و نونك سكونيله اولوب نأ كيد نفى ایچون اکثر نافیه
اولان ما کله سیله زیاده قیلنور ما ان رأیت زیداً قولمزده اولدینی کبی
و بعض مصدریه اولان ما کله سیله ولما لفظیله دخی زیاده قیلنور (انتظارنی
ما ان جلس القاضی ولما ان قام زید قت) قوللر مزده اولدینی کبی و دخی
(ما) اسمیه و حرف استفتاح اولان الا کله سندنصرکه دخی بعض زائد
اوله رق و قوعی کورلمشدر حق سبحانه و تعالی نك (ولقد مکناهم فیما ان
مکناکم فیہ) قول شریفده (والا ان قام زید) قولمزده اولدینی کبی .
و حروف زیاده دن (ان) همزه نك فتحی و نونك سكونيله اولوب اکثر لما
لفظیله و دخی لو کله سیله قسم متقدم بیننده زیاده قیلنور (فلما ان جاء البشیر)
قول شریفده (و والله ان لو قام زید قت) قولمزده اولدینی کبی و بعض
مقام انکارده دخی زیاده قیلنور (انا یحیی زید) قولمزده اولدینی کبی
و بعض کافیه دخی کورلمشدر شاعرک .

ویوما توافینا بوجه مقسم کان ظیة تعطوالی ناظرالسلم

شعرنده ظیة لفظنك جری ایله (کان ظیة) قولنده اولدینی کبی مفاد شعر
اولورکه برکون محبوبه بهجت و سروره مقارن وجه جمیلی ایله اول یشل
یا زاقلی سلم نام شجره یه لاجل التناول رفع راس ایلان آهولر کبی بزه
و فایله و حسن توجه کوسستر دیمکدر و حروف زیاده دن (ما) لفظی
معنای شرطی مفید بش کله ایله یعنی ادوات شرط اولدقلری حالده اذا
ومتی وای واین وان کله لر یله زیاده قیلنور اذا ماتخرج اخرج ومتی ما
تذهب اذهب وایما تدعو ادعو وایما تجلس اجلس واما تفعل افعل
قوللر مزده اولدینی کبی و ما لفظنك بعض حروف جرایله دخی زیاده لکی
کورلمشدر حق سبحانه و تعالی نك (فبا رحمة من الله لنت لهم واما خطیئاتهم
اغرقوا و عما قلیل) قول شریفلرنده (وزید صدیق کما ان عمرواً اخی)
قولمزده اولدینی کبی و بعض مع المضاف دخی زائد اولور حق سبحانه

وتعالیٰ نك (ایما الاجالین قضیت) قول شریفنده (و غضبت من غیر ماجرم) قولمزده اولدینی کی .

وبوابده بیلملیدرکه کافه عن العمل اولان ما لفظنك عاملی عملدن منع آیلماک و عاملی داخل اوله میسه جنی ماده لر اوزره دخوله صالح قیلماق کی تأثیر قویسی اولمغله ذواندندن عد اولنماشددز و حیثا واذما کله لرنده اولان ما لفظی کافه عن الاضافة اولوب و جازم اولملرینی مصححه اولمغله زائده دکلدر . و بیلملیدرکه (ما) ء کافه اوچ قسم اوزره بولنمشدر بر قسمی عاملی عمل رفعدن کف و منع ایدرکه اول آنحق قل و کثر و طال یعنی شو اوچ فعله لاحق و متصل اولور (فلما مدحت زیداً و طالما قدوشی بنا الاعداء و کثر ماشتمه) قوللر مزده اولدینی کی .

و بر قسمی عاملی نصب و رفع عملندن کف و منع ایدرکه اول حروف مشبهه بالفعله لاحق اولور و بر قسمی عمل جردن کف و منع ایدرکه بعض حرفلره و ظرفلره داخل اولور بعض داخل اولدینی حرفلر رب و با و کافدر (ربما یودالذین کفروا) قول شریفنده و شاعرك .

فلئن صرت لاتحیر جوابا لبما قدری وانت خطیب

شعرنده (و کنت کما انت) قولمزده اولدینی کی و بعض داخل اولدینی ظرفلر بعد و بین و حیث واذ کله لریدر فافهم . و حروف زیاده دن (لا) کله سی لفظاً و یاخود معناً بر نفیدنصکره مع الواو زیاده قیلنور (ماجاءنی زید و لا عمرو) قولمزده و حق سبحانه و تعالیٰ نك (غیر المغضوب علیهم و لا الضالین) قول شریفنده اولدینی کی و ان مصدریه دنصکره دخی زیاده قیلنور حق سبحانه و تعالیٰ نك (ما منعک ان لاتسجد اذا امرتک) قول شریفنده اولدینی کی و بعض قسم لفظنك اولنده دخی زیاده قیلنور حق سبحانه و تعالیٰ نك (لا اقسم بیوم القيامة و لا اقسم بهذا البلد) قول شریفنده اولدینی کی و اشبو لا لفظی زیاده ایله نفی قسم صورتنده ابراز اولنماق کانه قسمدن استغنا اولنور بر حیثله جلاء قضیه

اوزره تنبيه ايجوندر ولا لفظنك شاذ اوله رق مع المضاف دخى زياده لى
كورلمشدر نته كيم شاعرك .

فى بئر لاحور سرى وما شعر بافكه حتى اذا لصبح جسر

شعرنده واقع اولمشدر مفاد شعر رجل عاشق كيجه ايله هلاك قيو سنده
سير ومشى ايدوب معشوقك مواعد كاذبه سنده مفتون اوله رق صباح ضيا
باش اولنجيه دكن بئر هلاكده اولديغنى بيله مدى ديمكدر مفتون دنيا
اولانلرك خالى دخى بوكا ممائل در وحروف زياده دن من وبا ولا م وكاف
حروف جر بختنده مغالرينى بيان صرم سنده كوسترلدى شوجه تله تطويل
مقاله حاجت كوره ميز و عليك المراجعة .

درس ۲۶۳

(مبحث حرف تفسير) بر مبهى تفسير ايجون وضع اولنان حرفلر ايكي
دانه دركه بريسي (اى) لفظيدر همزه نك فتحى ويانك سكونيله وبريسى
(ان) لفظيدر همزه نك فتحى ونونك سكونيله اى لفظيله مبهم اولان هر
برمفرد و جمله دخى تفسير اولنور مثلا (جاءنى زيد) دينلد كده زيد
اسميله مسمى بر قاچ دانه اولوب و خبر و يريلان مثلا ابو عبد الله دينمكه
معروف اولان زيد اولسه زيدى تفسير وايضاح ايجون اى ابو عبد الله
دينلور ومثلا (زيد قطع رزقه) دينلسه رزقى قطع اولندى ديمك وفاتندن
كنايه اولمغله (قطع رزقه) جمله سى تفسير اولنور ايسه اى مات دينور
وقس عليه .

واما (ان) لفظى معنای قولده متقرر بر فعلاه مختص اولوب صريح
قولدنصكره واقع اولمز كه مثلا قال زيد ان جاء عمرو دينلمز بلكه قال زيد
جاء عمرو دينلور وهله معنای قولده اوليان فعلدنصكره هر كز واقع
اولمز واكر مقدر اولان بر مفعولى تفسير ايلر حق سبحانه وتعالى نك (ونا
ديناه ان يا ابراهيم) قول شريفنده اولديغى كى كه ندا آتجق قوليله اوله جفتندن

نداده معنای قول وارد که مفاد کلام (نادینه بلفظ) یعنی بزاکا بر لفظیله
 ندا ایلدک دیمکدر که (ان یا ابراهیم) قول شریفی اول لفظی تفسیردر و مثلاً
 (کتبت الیه ان ائت) قولمزده اولدینی کی که کتابه دخی لفظه متعلق اولمغه
 کتابتده دخی معنای قول وارد (کتبت الیه) قولمز (کتبت الیه شیئاً)
 یعنی بن اکا برشی یازدم دیمکدر (ان ائت) قولمز اول شیئ تفسیردر یعنی
 یازدیغم (ائت) لفظیدر دیمکدر پس مفاد عباره بن اکا مثلاً فلان شیئ
 کتور دیو یازدم دیمک اولور .

ویلملیدر ان کلهسی بعض مذکور اولان مفعولی دخی تفسیر ایلر نته کیم
 حق سبحانه و تعالی نک (ما قلت لهم الا ما امرتی به ان عبدوا الله) قول
 شریفده اولدینی کی ان عبدوا الله قول شریفی (به) ده اولان ضمیر
 مجروری تفسیردر و امر انحق قولیله اوله جغندن امرتده دخی معنای قول
 وارد مفاد کلام عبدوا الله یعنی الله عبادت ایدک دیو بکا امر ایلدیکک
 کی بنده آنلره آنحق اول بکا امر ایلدیکک نسنه بی سویلدیمکه یعنی الله
 عبادت ایدک دیدم دیمکدر و بعض ان کلهسی مذکور واسم مظهر اولان
 مفعولی دخی تفسیر ایدر نته کیم حق سبحانه و تعالی نک (و اوحینا الی امک
 مایوحی ان اقدفیه) قول شریفده اولدینی کی که (ان اقدفیه) قول شریفی
 (مایوحی) ده اولان ما لفظنک تفسیریدر که مالفظی (ما و حینا) فعلنک
 صریحاً مفعولیدر .

درس ۲۶۴

(مبحث حروف المصدر) داخل اولدینی بر جمله بی مصدر تأویلنده قیلان
 حرفلر اوچ دانه در که (ما) و (ان) و (ان) کلهلریدر ما کلهسی نافیه
 و موصوفه و موصوله و زائده و کافه و مصدریه اولور موصوفه و موصوله
 اولدقده اسمندر دیکر لرده حرفذر بوراده مانحن فیهمز معنای اخبرده
 بولنان یعنی مصدریه اولان ما کلهسیدر .

ماء مصدریه اکثر جمله فعلیه اوزره داخل اولور حق سبحانه و تعالی نک
 (و ضاقت علیهم الارض بما رحبت) قول شریفده اولدینی کی برجهها دیمکدر .

و بعض جمله اسمیه اوزره دخی دخولی کورلمشدر نته کیم امیرالمؤمنین
رضی الله تعالی عنه و کرم الله وجهه افندمزه (بقوا فی الدنیا ما الدنیا باقیة)
قول شریفنده اولدینی کی که بقوا فی الدنیا بقاءها دیمکدر .

و ان کله سی همزه نك فتحی و نونك سکونیه اولوب آنحق افعال متصرفه
اوزره داخل اولور ماضی و مضارعده بولنور و مضارعده اولدقدده آنی
منصوب قیلر (اعجینی ان خرجت واردت ان اخرج) قوللر مزده اولدینی کی
اعجینی خروجك واردت خروجی دیمکدر .

و (ان) همزه نك فتحی و نون مشدده مفتوحه ایله حروف مشبهه بالفعلین
اولوب آنحق جمله اسمیه اوزره داخل اولور مکرکه آخرینه ماء کافه
لاحق اوله شو تقدیرده جمله فعلیه اوزره دخی داخل اولور (اعجینی ان
زیداً قائم) و (حسبت انما اخرج زید) قوللر مزده اولدینی کی اعجینی قیام زید
و حسبت خروج زید دیمکدر تاویل مصدرک طریق یوقاریلرده بیان
اولدینغدن بوراده تکراره حاجت یوقدر .

درس ۲۶۵

(مبحث حروف التحضیض و حرف التوقع و التقرب و التحقیق و التقلیل)
برکشی بی برایشه تشویق و قدرمق ایچون وضع اولنان حرفلر درت
دانه درکه آنلر (هلا) و (الا) و (لولا) و (لوما) کله لریدر و بوللر ایچون
صدارة کلام واردر و لفظاً و یاخود تقدیراً و جواباً فعل اوزره داخل
اولورلر (هلا ضربت زیداً و هلا تضرب زیداً و هلا زیداً ضربته) قوللر مزده
اولدینی کی فعل مضارع اوزره داخل اولورلر ایسه اولی فعلی ایشلمک
اوزره تشویق و قدرمق افاده ایدرلرکه مثلاً هلا تضرب زیداً قوللر سن
زید ضرب ایلمزمیسک یعنی نه طور رسک همان ضرب ایله دیمکدرکه امر
مقامنده استعمال اولنور .

و ماضی اوزره داخل اولورلر ایسه مخاطبک برایشی ایشلمیوب ترك
ایلمسی اوزره توبیخ و لومی و کانه مستقبلمده تدارکی اوزره حض و ترغیبی
افاده ایلر مثلاً هلا ضربت زیداً قوللر زیدی ضرب ایتسک اولمز می ایدی
یعنی بردها ایهال ایلمه دیمکدر .

و حرف توقع و تقریب و تحقیق و تقلیل تسمیه اولنان (قد) کلمه سیدر که فعله
خاص اولوب ماضی و مضارع اوزره داخل اولور و دخولنده تحقیق افاده
ایلر آنجق بعض مواضعده ماضی اوزره دخولنده مع تحقیق و التوقع
زمان حاله تقریبی مفید اولور مؤذنك قد قامت الضلوة قولنده اولدینی کبی
و بعض من غیر توقع تحقیق و تقریب افاده ایلر مثلاً ركوب زیده توقع
و انتظار اوزره اولان کیمسه یه قدر کب زید دینلده اولدینی کبی و نواصب
و جوازم و حرف تنفیس یعنی سین و سوف دن مجرد فعل مضارع اوزره
دخولنده غالباً مع تحقیق تقلیل افاده ایلر (ان الكذب قد یصدق) قولزده
اولدینی کبی و بعض مجرد تحقیق ایچون دخی استعمال اولنور (قدری قلب
وجهك) قول شریفنده اولدینی کبی و یلملیدر که قد کلمه سیله مدخولی اولان
فعل بیننده قسم ایله فصل جائزدر نته کیم بعضیلرینك (قد والله احسنت و قد
لعمری بت ساهراً) قولنده واقع اولمشدر مفادی تحقیق مولایه قسم
ایدر مکه کیجه کوزلر مه اویقو کیر میهر ك یتوت ایلدم دیمکدر .

درس ۲۶۶

(مبحث حرفی الاستفهام) استفهام ایچون وضع اولنان حرفلر (همزه) و
(هل) کلمه لریدر بونلر دخی صدر کلامی مقتضیلردر و جمله اسمیه و جمله
فعلیه اوزره دخی داخل اولورلر .

و یلملیدر که همزه استفهام یا طلب تصدیق یعنی ایکی شی بیننده اولان نسبت
تأمة نك و قوعنی ذهنك اذعان و ایقان ایلمسیچون اولور (ازید قائم و اقام زید)
قوللر مزده اولدینی کبی و یاخود طلب تصور ایچون اولور (ادبس فی الاناء ام
عسل وافی الخابية دیسك ام فی الزق) قوللر مزده اولدینی کبی .

و اما استفهامیه اولان هل کلمه سی آنجق طلب تصدیق ایچون موضوعدر
(هل زید قائم و هل قام زید) قولزده اولدینی کبی و آنجق طلب تصدیق ایچون
اولدیندن هل کلمه سنك (خبری فعل اولان جمله اسمیه) اوزره و یاخود
(لاجل التخصیص مفعولی متقدم جمله فعلیه) اوزره دخولی استحسان
اولنما مشیدر که (هل زید قائم و هل عمرواً عرفت) ترکیبی قییح عد اولمشدر
زیرا فعل اوزره مرفوع و یا منصوبی تقدیم تصدیقك نفس فعلیه حصولی

استدعا ایدرکه شوحال هل برحاصلک حصولی طلب ایچون اولوق لازم کلور ایدی بو ایسه ارله من و برده هل کلمه سی فی الاصل (قد) معناسه دز نته کیم (هل اتی علی الانسان) قول شریفنده اصلی اوزره کلشدر قد ایسه لوازم فعلدن اولغله اومعناده اولان هل دخی لوازم فعلدن اولمش اولور وهر نقدر مؤخرأ استفهامیه قیلمش ایسه ده ینه اصلی یاد ایدرک فعله یک راغب بولمشدر شوجهتله (هل زید قائم وهل عمروأ عرفت) دینلسه ایدی فعلی کندندن آرو کوروب عهد قدیمی تذکر ایله محزون اولور ایدی واما خالص جمله اسمیه اوزره داخل اوله رق فعلی کورمن ایسه کوزدن ایراغ اولان قلدن دخی ایراغ اولور مصداقجه فعلی کورما مکه متبلی اولور واما (ازید قام واعمروأ عرفت) دینمکه هرگز برمانع یوقدر زیرا قول اول تصور فاعلی و قول ثانی تصور مفعولی طلبدر طلب تصدیق دکلدر و برده (همزه) استفهامده اصل اولوب اوله اصلی یتوره رک تحزن و تحسره مبتلا اولدن بریدر.

وبیاملیدرکه همزه استفهامده مسئول عنه همزه یی ولی ایلیان کلمه درکه مثلاً (اضربت زیداً) قولزده فعلدر وشوقولز اکر استفهامیه ضربک زید اوزره وقوعی بیلنمک استیلیور ایسه طلب تصدیق اولوب واکر زیده بر فاعلک تعلیقی بیانوب لکن تعلق ایدن فعل ضرب ویاخود غیرمیدر بیلنمک استیلیور ایسه تصور مسندی طلبدر.

ومثلاً (أنت ضربت) قولزده شک ضاربده اولوب مسئول عنه فاعلدر ومثلاً ازیداً ضربت قولزده شک مضروب ده اولوب مسئول عنه مفعولدر وسائر متعلقات بوقیاس اوزره معلومدر.

درس ۲۶۷

خفی اولیه که مواضع استعمالی اعتباریه همزه ده اولان تصرف هل کلمه سننده اولان تصرفدن اکثر بولمشدرکه همزه استفهام یدی موضعده هل کلمه سنندن من حیث الاستعمال ممتازدر.

(اولکیسی) بر جمله ده مع وجود الفعل همزه نک اسم اوزره دخولی من غیر قییح جائزدر واما هل کلمه سنک دخولی قییحدر نته کیم درس سابقمزده بیلندی.

(ایکنجیسی) همزه استفهام انکار توییخی وانکار ابطالی ده مستعمل اولور واما هل کله سی علی وجه الانکار هرگز استعمال اولمز انکار توییخی همزه نك مدخولی اولان فعلک وقوعی لایق دکل ایکن واقع وفاعلی معلوم اولدقده در حق سبحانه وتعالی نك (اتقولون علی الله ما لاتعلمون) قول شریفنده اولدینی کی وانکار ابطالی همزه نك مدخولی اولان فعلک وقوعی لایق اولدینی کی هرگز واقع اولیوب ومدعیسی کاذب اولدقده در حق سبحانه وتعالی نك (افاصفا کم ربکم بالبینین) قول شریفنده اولدینی کی.

(اوچنجیسی) همزه استفهام فی الحال واقع اولان بر فعلک انکاری ایچون استعمال اولنغه صالح اولوب مثلاً (اتضرب زیداً و هو اخوک) دینه بیلور واما هل سین وسوف کی مدخولی اولان فعل مضارعی استقباله تخصیص ایله جکندن فی الحال واقع اولان فعلک انکاری نه صالح اولیوب هل تضرب زیداً و هو اخوک دینک جائز اوله من (نورده) (اتضرب زیداً قولمز) (اترضی بضرک زیداً) دیمکدرکه حقیقه مسئول عنه اولان فعل محذوفدر هل ایسه استفهامده همزه کی اولیوب ضعیفدر فعلی حذف جائز اوله من و حالبوکه هل انکار ایچون هرگز مستعمل اولدیفندن شو محلی آریجه افر از من تزید فائده ایچوندرد. (دردنجیسی) همزه استفهام مخاطبی اقرار اوزره حمل ایچون نفی اوزره دخی داخل اولور (الم نشرح لك صدرك) و (الم یجدك یتیمافوی) و (الیس ذلك بقادر) (والست بر بکم) قول شریفنده اولدینی کی واما هل هرگز نفی اوزره داخل اولمز.

(بشنجیسی) همزه استفهام ام متصلده احدا لامرین دن استفهام قصد اولنورکه مستفهم عنه متعدد در پس انسب والیق اولان باب استفهامده اصل واقوی اولان همزه نی استعمال ایلمکدر و برده ام متصلده حکم ذاتا ثابت ومعلوم اوله رق آنحق احدا لامرینک تعینی طلب اولنور هل کله سی ایسه آنحق طلب تصدیق یعنی طلب حکم ایچون بولنغله هل کله سنک ام متصله ایله بولنه میه جنی شو جهته دخی ظاهر در واما ام منقطعه ایله بولنورکه (هل زید عندك ام عمرو) دنیلور زیرا ام منقطعه ده استفهام ثانیله اولدن اضراب واعراض قصد اولنور و آنحق ام منقطعه بل معنانه و همزه ایله مقدر اولوب معمول به اشبو استفهام ثانی اولور قول مزبورده (ام عمرو)

عباره سی بل عمرو عندك ديمكدر مستفهم عنه متعدد اوليوب ام منقطعه
ايله هل كله سنك بولمسنه بر مانع يوقدر .

(التنجيسي) همزة استفهام حروف عاطفه دن (واو) و (فا) و (ثم)
اوزره داخل اولوركه مثلاً (اومن كان) (واقن كان) (واثم اذا ماوقع)
دنيور واما هل كله سنك دخولي جائز اوله من .

(يدنجيسي) مثلاً (جاءني زيد) وياخود (رايت زيدا) وياخود (مررت بزيدا)
سويليان كيمسه نك جوابنده انكار وياخود استفهام طريقيه ازيد وياخود
ازيدا وياخود ابزید ديمك حائزدر واما هل زيد وياخود هل زيدا وياخود
هل بزيد ديمك جائز دكلدر (همزه نك هل دن من حيث) الاستعمال جهات
امتيازی بيلندی ايسه بيلمليدركه استفهاميه اولان هل كله سي دخی همزه دن
درت موضعه من حيث الاستعمال ممتازدر .

(اولكيسي) هل كله سي بعض اثبات ده تقرير ايجون كلوركه همزه
اثبات ده تقرير ايجون اوله من (هل ثوب الكفار) قول شريفنده اولديني كي
الم يثوب الكفار ديمكدر .

(ايكنجيسي) هل كله سي بعض مفيد نفى اولوب وحتى مابعدنده قصداً
للايجاب ادات استنادن الا كله سي كتورلك جائز اولوركه همزه ده شو حکم
جاری اوله من (هل جزاء الاحسان الا الاحسان) قول شريفنده اولديني
كي كه ما جزاء لاحسان الا الاحسان ديمكدر .

(اوچنجيسي) هل كله سنك اوزرينه حروف عاطفه دن واو وفا وثم نك
دخولي جائزدر (فهل اتم مسلمون) قول شريفنده وشاعرك (وهل انا
الا من غزوة) شعرنده (واسلم عليه ثم هل يلتفت الي) قولزده اولديني كي
واما همزه اوزره داخل اوله منلر .

(دردنجيسي) هل كله سي وسائر كلمات استفهام (ام) دنصكره واقع اولورلر
واما همزه اصالتی جهته اوله من (هل رأيت زيدا ام هل اكرمه وامن
يحب السائل وام كيف ينفك الشيع وام اي عالم يشفع قوللر مزده) اولديني كي .
وختي اوليه كه براسم استفهام دنصكره ام لفظي كله ام متصله آنجق همزه
ايله مسبوق اوله جعندن اشبو ام لفظي هر حالده ام منقطعه در وشو حالده .

اگر اشبو ام لفظنك مابعدنی آنده اشراك ایتك وربط اولنق قصد اولنور ایسه ام لفظندنصكره اول اسم استفهام اعاده وتكرار قیلنمق واجبدر (من یطعمنی ام من یسقینی) قولزده اولدینی کی واکر اشراك وربط مقصود اولمز ایسه اعاده جائز اولور (من یطعمنی ام یسقینی زید) کی . وهل کله سندنصكره ام لفظی کلور ایسه اخواتی اولان اسماء استفهامه حملاً هل لفظنی اعاده ایلمك و چونكه هل همزه کی صرف استفهام ایچون اولدیغندن اعاده ایلمامك دخی جائزدر .

درس ۲۶۸

(مبحث حروف الشرط) شرط ایچون وضع اولنان حرفلر اوچ دانه دركه (ان) و (لو) و (اما) کله لیدر و اسماء شرط دخی واردر كه آنلردن اسم و فعل مطلبلرنده بحث مرور ایلدی حروف شرطدن (ان) همزه نك کسری و نونك سکونیه کله مجازاتدن اولوب كرك ماضی و كرك مضارع اوزره داخل اوله استقبال ایچوندر مثلاً (ان تکرمنی اکر مك وان اکرمتی اکر متك) قوللر مزده اولدینی کی مفادلری مختلف اولیوب بردركه کله جکده سن بکا اکر ام ایدرایسه ك بنده سکا اکر ام ایدرم دیمکدر واشبو ان کله سنده اصل اولان اسماء شرطدن اذا کله سنك خلافتیه اوله رق وقوع شرطك غیر مجزوم اولمسیدر لکن بعض وقوع شرط مجزوم ایکن تجاهل طریقه کیدیلیمك و یاخود مخاطبك وقوع شرط مجزومی اولدیغندن کلامی آنك اعتقادی اوزره جاری قیلنق و یاخود وقوع شرط مجزومی اولان مخاطب جاهل منزله تنزیل ایدیلیمك و بو کی نکته لردن ایچون مقام جزمده دخی استعمال اولنور . و بیلیملیدر كه اکر اول کلامده شرط اوزره قسم تقدم ایدرایسه او شرطك لفظاً و یاخود معناً ماضی اولمسی لازم اولوب وجواب آتی لفظاً قسمه جوابه قیلنور و اما معناده قسمه و شرطه دخی جوابدر (والله ان آتیتی لا اکر متك) و (والله ان لم تأتینی لا بغضتک) قوللر مزده اولدینی کی واکر شرط و یاخود غیر شرط تقدم ایدرك اجزاء کلام بیننده قسم توسط ایلر ایسه جائزدر كه قسم طرفی اعتبار اولنوب شرط لغو اولنه كه جواب مثلاً جزمندن عاری اولمق

ومضارع مثبت ایسه نون تأکید ادخال ایدیلیمک کی قسمک اقتضا ایلدیکی
 حال اوزره بولنه و جائزدرکه شرط طرفی اعتبار اولوب قسم لغو اولنه که جواب
 مقتضای شرط اوزره کتور یله مثلاً (انا والله ان تأتني لا آتینک وان آتیتني والله
 لا ینک) و یا خود (انا والله ان تأتني آتک وان تأتني والله آتک) دیمک جائزدر
 و بیلملدرکه قسم بعض اول کلامده مقدر اولور و مقدر اولدقده دخی ملفوظ
 حکمنده اولوب مابعدنده اولان شرط لفظاً و یا خود معنأ ماضی اولمسی لازمدر
 و جواب آتی قسمه جوابدر حق سبحانه و تعالی نک (لئن اخرجوا لا یخرجون)
 قول شریفنده اولدینی کی که والله لئن اخرجوا لا یخرجون دیمکدر و لا یخر-
 جون جواب قسمدر جواب شرط دکلدر زیرا جواب شرط اولمش اولسه
 حذف نونیه مجزوم اوله رق لا یخرجوا دینلی ایدی و دخی حق سبحانه
 و تعالی نک (وان اطعموهم انکم لمشرکون) قول شریفنده اولدینی کی که والله ان
 اطعموهم انکم لمشرکون دیمکدر (انکم لمشرکون) جواب قسمدر جواب
 شرط دکلدر زیرا اگر انکم لمشرکون جواب شرط اولمش اولسه جزا جمله
 اسمیه واقع اولدقده دخول فواجب اولغله فانکم لمشرکون دینلی ایدی فافهم

درس ۲۶۹

حروف شرطدن (لو) کلهسی ماضی ده بر امرک حصولی ینسه ماضی ده
 مقدر بر امرک حصوله تعلیق ایچون وضع اولمشدر و ماضی ده مقدر بر
 امرک حصولی ایسه قطعاً منتفی اولغله اکاتعلیق اولنان امرک دخی حصولی
 منتفی اولمق لازمدر مثلاً (لو جئتني لا کرمتک) یعنی سن بکا کلش اولسه
 ایدک بن سکا اگرام ایدر ایدم دینسه زمان ماضی ده اگرامک حصولی ینسه
 زمان ماضی ده اولمسی تقدیر اولنان محیثتک حصوله تعلیق اولمش اولوب
 زمان ماضی ده ایسه محیثتک انتقاسی مجزوم اولغله اگرامک دخی انتقاسی
 لازم کلور شو جهته (لو) کلهسی وهی لانتفاء الثانی لانتفاء الاول دینمکه
 تعریف اولمشدر یعنی (لازم اولان) شرطک انتقاسدن ایچون (ملزوم
 اولان) جزانک انتقاسنی کو ستر بر کلهدر دیمکدر .

وبعض مقام استدلالده جزانک شرطه لزومی قصد اولوب (لازم اعتبار
 اولنان) جزانک منتفی اولمسیله (ملزوم اعتبار اولنان) شرطک منتفی

اولدیغنه استدلال اولنور نته کیم (لوکان فیهما آلهة الا الله نفسدا) آیت کریمه سنده انتفاء فسادیه انتفاء تعدد استدلال اولنمشدر وشو اجلدن ابن حاجب حضرتلری لوکله سنده خلاف مشهور اوله رق وهی لانتفاء الاول لانتفاء الثانی بیور مشلردر .

وبعض لوکله سی ایله برنسنه نك بیان استمراری اراده اولنه رق اول نسنه ابعده نقیضینی ایله ربط اولنوب ایراد اولنور (لواهاننی لا کرمته) قولزده اولدینی کی که اکرامک استمرار وجودنی بیاندر زیرا اهانة تقدیرنده دخی دریغ اکرام ایلمیوب اهانة بیله مستلزم اکرام اولدقد صدق واستقامتک اکرامی بطریق الاولى مستلزم اوله جنی درکاردر .

(وبیلمیلدرکه) کرک (ان) وکرک (لو) کله سی اوله لازم الفعل اولوب اسم اوزره داخل اولزلر وحق سبحانه وتعالی نك (وان احد من المشرکین استجارک) دخی (ولو انتم تملکون) قول شریفلرنده فعل مقدردر مذکور اولان استجارک و تملکون اول فعل مقدری مفسرلردر وشو اجلدن لوکله سندن صکره اولان الف نون ماده سنک فتحی لازمدر زیرا لوکله سندن صکره البته بر فعل بولنه جغندن الف نون ماده سی مع جملتها تأویل مفرد وحکم مصدرده اوله رق اول فعله فاعل قیلنور فاعلده اصل اولان ایسه افراد اولوب مفرد موقعنده ایسه الف نون ماده سی مفتوح قیلنور وینه جهت مذکوردن ایچون لوکله سندن صکره واقع الف نون ماده سنک خبری اگر مشتقاتدن اولوب اشتقاق فعل ممکن ایسه فعل محذوفدن عوض کی اولمق ایچون خبری فعل کتورلمیلدر مثلاً لو انک منطلق انطلقت دیه جک یرده لو انک انطلقت انطلقت دیملیدر دینلمشدر واما جامد اولوب اشتقاق فعل ممکن دکل ایسه اول اسم جامدکده خبر وقوعی جائزدر حق سبحانه وتعالی نك (ولو ان ما فی الارض من شجرة اقلام) قول شریفنده اولدینی کی .

درس ۲۷۰

حروف شرطدن (اما) همزه نك فتحی ومیمک تشدیدیه اولوب متکلمک خارجا ویاخود ذهنا اجمال ایلدیکی نسنه یی تفصیل ایچون وضع اولنمشدر مثلاً (جاءتني اخوتك اما زيد فاکرمته واما عمرو فاهنته واما بشر فاعرضت

عنه) قولزده اولدینی کبی و بعض اجمال تقدم ایتیموب آنحق استیناف ایچون کتوریلورکه اوائل کتبدده اولان اما کله لری بوقیلدندر دینشدر واما کله سی تفصیل مجمل ایچون اولدقده تکراری واجیدر و بعض برقسمنک ذکر یله دخی اکتفا اولنور لکن بوده ذکر اولنان قسم غیر مذکورک ضدی اولدقده در زیرا احد ضدینک آخر اوزره دلالتی واردر حق سبحانه و تعالی نک (فاما الدین فی قلوبهم زیغ فیتبعون ماتشابه) قول شریفده اولدینی کبی شو مذکور قرینه سیله معلومدرکه قسم اخر واما الذین فی قلوبهم زیغ قیتبعون المحکمات اوله جقدر لکن اولی الالبابه غیر خفی اولدیغندن برقسمنک ذکر یله اکتفا اولمشدر.

(وبیلملیدرکه اما) کله سنده فعل شرطک حذفی همیشه التزام اولمشدر و فعل شرط محذوفدن عوض اولق اوزره (اما) ایله فاء جزائییه بیننده (اما) حیزنده بولنندن بر جزء کتوریلورکه اوده یامنصوب و یا خود مرفوع بولنور (اما زید فنطلق) (و اما یوم الجمعة فزید منطلق) قوللر مزده اولدینی کبی لکن اشبو تعویض اولنان جزء متعلقات شرطدنمیدر و یا خود متعلقات جزادن اولوب تقدیم و تعویضی اولمشدر اختلاف واقع اولمشدر.

نحاتدن (سبویه) فعل شرط محذوفدن مطلقا حیز فاده بولنندن یعنی متعلقات جزادن بر جزء تعویض اولنور دیدی و اما حیز فاده اولانک فا اوزره تقدیمی جائز قیلمق خاصه سنی کوردی سبویهک بیانی اوزره (اما زید فنطلق) قولنک اصلی مهمایکن من شیء فزید منطلق و (اما یوم الجمعة فزید منطلق) قولنک اصلی مهمایکن من شیء فزید منطلق یوم الجمعة درونحاتدن (مبرد) فعل شرط محذوفدن مطلقا متعلقات شرطدن بر جزء تعویض اولنور دیدی مبردک بیانی اوزره (اما زید فنطلق) قولنک اصلی مهمایکن زید فنطلق در و جزاده مبتدا محذوف اولوب فهو منطلق تقدیرنده در و (اما یوم الجمعة فزید منطلق) قولنک اصلی مهمایکن من شیء یوم الجمعة فزید منطلق در (ونحاتدن ماذنی) حیز (فا) ده بولنان جزءک (فا) دن مع قطع النظر یعنی مانع آخر بولنیموب (فا) اوزره تقدیمی جائز اولور ایسه مثال مذکورلرده اولدینی کبی (مذهب سبویه) و اگر مانع آخر بولنوب فا اوزره تقدیمی جائز اولمز ایسه مثلا (اما یوم الجمعة فان زیداً منطلق) قولزده اولدینی کبی زیرا ان کله سنک

حیزنده بولنان ماقبلنده عمل ایدهمیه جکندن (یوم الجمعة) قوی منطلق لفظنه ظرف قائمه میوب شو جهته بویکی محله ده مذهب مبردی انتخاب ایلمشدر .

درس ۲۷۱

(مبحث حرف الردع وتاء التأنیت الساکنه) خفی اولیه که ردع وزجر ایچون وضع اولنان حرف کلا لفظیدر که اولیه دکل دیه جک یرده استعمال اولنور مثلاً برکیسه سکا فلان یبغضک یعنی فلان سکا بغض ایدیور دیسه آنی رد ومنع مقامنده کلا دیرسک که اولیه دکل اول کیسه بزه بغض ایتمز دیمکدر وبعد الامر کلا دینلده نفی اجابة ایدیلمش اولور مثلاً برکیسه سکا تعال یعنی کل دیسه ده سنده مقابلنده کلا دیمش اولسک هرکز کلم دیمک اولور . وکلا لفظی بعض حقا معناسنه دخی کلور که کندیله بر جمله نک تحقیق مضمونی قصد اولنور حق سبحانه وتعالی نک (کلا ان الانسان لیطغی) قول شریفنده اولدینی کی وشو صورتده کلا اسمدر وحرف اولان کلا یه مشاکل اولدیغندن مبنی در دینلسه بجادر لکن نجات حقا معناسنه اولان کلا دخی حرفدر وکندیله ان کی بر جمله نک تحقیق مضمونی مقصود اولوب بوا یسه حرفیتدن خروجه بادی اوله مز دیمشدر .

واما تاء تأنیت ساکنه دنیلان مسند الیهک تأنیته علامت اولسون ایچون فعل ماضی یه لاحق اولور وساکنه اولسی زیرا فعل ده اصل اولان بنا اولمغله لاحق اولدینی کله نک بناسنه اول امرده تنبیه ایچوندر نته کیم اسمده اصل اولان اعراب اولمغله آنلره لاحق اولان تاء تأنیت متحرکه بولمشدر . احکام مؤنث دن وبر عاملک تأنیت ویا تذکیری واجب ویا جائز اولسی احوالندن مطلب اسمده صورة کافیه ده بحث مرور ایلمکله بوبابده تطویل مقاله حاجت کوره میز .

درس ۲۷۲

(مبحث التنوین) تنوین لغة برکله یی نونلندر مق معناسنه در واصطلاحاً (نون ساکنه تبع حرکت الاخر لالتأکید الفعل) دینمکله معرفدر یعنی تنوین بذاتها ساکنه بر نوندر که وجودده برکله نک حرف آخرینک حرکت سنه تابعدر تأکید

فعل ایچون دکدر شو تعریفمزدن من ولدن ولم یکن لفظلرنده اولدینی کی اواخر
کله اولان نونلر و تأکید فعل ایچون موضوع نون تأکید خارجدر .
ویلملیدرکه تنوین التی نوع اوزره بولنمشدر .

(اولکیسی) تنوین تمکن درکه جمع مؤنث سالمک و (جوار) و (غواش)
نحوینک غیری اسماء معربه یه لاحق اولور زید ورجل وضارب کله لرنده
اولدینی کی لاحق اولدینی کله نک اعرابده اصالة و تقررینه دلالة ایلر .

(ایکنجیسی) تنوین تنکیدر معرفه یی نکرده دن فرق ایچون اسماء مبنیه یه
لاحق اولور مثلاً صه کله سی منون اوله رق اوقنسه آخرنده اولان تنوین
تنوین تنکیدر اولوب معناسی اسکت سکوتا مافی وقت ما دیمک اولور و تنوینسز
اوله رق صه دینسه معرفه اولوب اسکت السکوت الان دیمک اولور و مثلاً

سبویه لفظی منون اوله رق اوقنسه نکره اولوب شواسمیه مسمی بر ذات
مراد اولور و تنوینسز اوقنسه معرفه اولوب ذات معروف مراد اولور
شو مذکور اکثرک ذهابیدرکه تنوین تنکیدر اسماء مبنیه یه تخصیص اولنمشدر

واما بعضیلر هر برنکره یه لاحق تنوینی تنوین تنکیدر قیلدیلر و برتنوینک
لاحق اولدینی کله نک اعرابده اصالتنه دلالتله بیله نکره اولدینی دخی

افاده ایلمسندنه بر بآس اولیوب مثلاً رجل لفظنده اولان تنوینک هم
تنوین تنکیدر وهم تنوین تمکن اولمسندنه بر مانع یوقدر دیدیلر و اصح
اولان دخی بودر شو بیانه کوره تنوین تمکن ایله تنویر تنکیدر ییننده

عموم و خصوص من وجه واردر فلیتأمل

(اوچنجیسی) تنوین عوض در تنوین عوض محذوف اولان مضاف الیه دن

عوض اوله رق مضافه و یاخود بر محذوفدن عوض اوله رق آخرکله یه لاحق
اولان تنوین در مررت بکل قائماً قولمزدده کل لفظنده و یومئذ و حیئنذ قوللر

مزدده و جوار و غواش نخونده اولان تنوین کی اصلاری مررت بکل واحد

قائماً و یوم اذکان و حین اذکان کذا و جوار و غواشی ایدی و الامر معلوم

(دردنجیسی) تنوین مقابله درکه جمع مذکر سالمک نونی مقابلنده جمع مؤنث

سالمک آخرنه لاحق اولان تنوین در مثلاً مسلمات لفظنده اولان تنوین کی .

اشبو درت نوع تنوین اسمه خاص اولوب غیر اسمده هرکز بولنزلر .

(بشنجیسی) تنوین ترنم درکه تحسین انشاد ایچون ابیات و مصاریع و آخرنه

لاحق اولور زیرا تنوین حد ذاتنده خیشومده تردید صوتی تسهیل ایدر
برحرف اولوب تردید صوت ایسه اسباب حسن غنادندر اشبو تنوین
ابیات و مصاریع اواخرنده قافیه مطلقه یه لاحق اولور قافیه مطلقه حرف
رویی متحرک بولنان قافیه درکه اول حرکت اشباع اولنه رق فتحه ایسه الفه
ضمه ایسه واوه کسره ایسه یایه تحول ایدوب اشبو تنوین آندن منقلب
اولور و حروف مذکوریه امتداد لریله اطلاق صوت اولندیغندن بوبابده
حروف اطلاق تسمیه اولنور تنوین ترنم نته کیم شاعرك

اقلی اللوم عاذل والعتابن فقولی ان اصبت لقد اصابن

شعر نده واقع اولمشدر اشبو بیتك حرف روئی العتاب و اصاب لفظلرنده اولان
باء مفتوحه اولوب فتحه بطریق الاشباع الفه تحویل اولنوب والف ده عندالتغنی
نون ساکنه یه تبدیل اولنمشدر مفاد شعر یا عاذله فعلم اوزره لوم و عتابی آز
قیل و فعلمده اصابت ایدر ایسه هم والله جریر اصابت ایتدی سویله دیمکدر.
(آلتنجیسی) تنوین غالی در بودخی تحسین الشاد ایچون ابیات و مصاریع
آخرلرنده بولنور آنجق اشبو تنوین قافیه مقیده یه لاحق اولور قافیه
مقیده حرف روئی ساکن بولنان قافیه درکه عندالتغنی بعض تحریک اولنوب
و برونون ساکنه الحاق اولنور بوکا تنوین غالی دینلمسی زیرا غلو حدینی
تجاوز ایلنمک معناسنده در اشبو تنوینك لحوقیله ده بیت حد وزندن تجاوز
ایلیوب و تقطیع ساقط اولور تنوین غالی نته کیم شاعرك

وقاتم الاعماق خاوی المخرقن مشتبّه الاعلام لماع الخفقن

شعر نده واقع اولمشدر اشبو بیت بحر رجزدن ضرب اول و عروض اولی
سندندر انجق صدری مجنون و ابتداسی مطویدر وزنی مفاعلن مستفعلن
مستفعلن مفتعلن مستفعلن مستفعلن در واشبو وزن مخرق و خفق لفظلری
سکون قافیه او قنهرق تمام اولمشدر پس عندالتغنی قافلر تحریک اولنوب
وبرده نون ساکنه الحاق اولنمشدر وشو جهتله حد وزندن خروجی ده

ظاهر در مفاد شعر توز و غبارك كثر تنیدن اطرافى زندان كې قرانلق چوق
چول و صحرالر واردركه يوللرى خالى ولاجل الاهتدا نصب اولنان علامتلىرى
برى برينه مشابه و اوزاقدن صوظن اولنان سربابى پك پارلاقدر ديمكدر اشبو
ذكر اولنان تنوين غالى يى ابن حاجب رحمه الله تنوين ترنمه داخل اعتبار
ايلمشدر وشواجلدن فاضل جامى تنوين ترنمك موقع وقوعى قافيه مطلقه و مقيده يه
تعميم ايلمشدر بيلمليدركه تنوين ترنم و غالى اسمه خاص اولمىوب فعلده دخی
بولورلر و بيلمليدركه بر علمه مضاف اولان ابن لفظيله موصوف علمدن قصداً
للتخفيف تنوينى حذف واجيدر مثلاً جائى زيد ابن عمر قولزده اولديغى كى.

درس ۲۷۳

(مبحث نون التاكيد) نون تاكيد تاكيد فعل ايچون موضوع اولوب وايكى
قسم اوزره بولمشدركه برى نون مخففه ساكنه و ديكرى نون مشدده در .
نون مخففه هميشه ساكن اولوب و ماقبلى جمع مذ كرده مضموم و مفرد
مؤنث مخاطبه ده مكسور و بونك ماعداسنده مفتوحدر (ليضر بن و لتضر بن
واضر بن) و (ليضر بن و اضر بن) و (اضر بن) كلمه لرنده اولديغى كى
واما نون مشدده تشبيه لره و جمع مؤنثه مكسور اولوب و بونك ماعداسنده
هميشه مفتوحدر و ماقبلى نون مخففه ده اولديغى كى دركه جمع مذ كرده
مضموم و مفرد مؤنث مخاطبه ده مكسور و بونك ماعداسنده مفتوحدر .

(ليضر بن) (و لتضر بن) (و اضر بن) (ليضر بن) (لتضر بن) و (و اضر بن)
(لتضر بنان) (و اضر بنان) (ليضر بن و اضر بن) و (اضر بن) كلمه لرنده
اولديغى كى و بيلمليدركه نون مخففه تشبيه لره و جمع مؤنثه لاحق اولمز
زيرا على غير حده التقاء ساكنين لازم كلور ليكن نحاتدن يونس التقاء
ساكنين على غير حده يى حال وقفده تجويز اولنمسنه قياسيله جائز كورد يكنندن
نون مخففه نك دخی تشبيه لره و جمع مؤنثه لحوقى تجويز ايلمشدر .

خفى اوليه كه كرك نون مخففه و كرك نون مشدده امر و نهى و استفهام و تمنى
و تخفيض و عرض و قسم ضمننده كائن فعل مستقبله مختصردركه يعنى معنای
طلبه دال اولانلره لاحق اولورلر اضر بن و لاتضر بن و هل تضر بن و ليتك
تضر بن و هلا تضر بن (واما تزلن بنا فتصيب خيراً و والله لافعلن) قولزده

اولدینی کبی تخفیف و تشدید یله و بعض نهیه تشبیه اوله رق نفی دن صکره دخی فعل مضارع اوزره نون تأکیدک لحوقی نادراً واقعدر مثلاً لا تضربن وزید لم یضربن و مایقومن کبی نفی ده لحوقی نادر اولسی نفی معنای طلبه دلاتدن خالی و بری بولندیغی جهتله در و نادراً لحوقی آنجق نهیه تشبیه طریقه در نجاتدن (ابن جنی) اکر نافیہ اولان (لا) منفی به متصل اولور ایسه قیاساً تجویز ایدوب (و اتقوا فتنة لا تصيبن الذين ظلموا) آیت کریمه سیله استدلال ایلمشدر و بعضیلر آیت کریمه ده اولان (لا) ناهیه در نافیہ دکادر دیه رک جواب و یرمشدر و (منفصله واقع) اولدینی حالده دخی لاء نفی دن صکره لحوقی بعض کورلمشدر (لافی الدار یضربن زید) قولمزده اولدینی کبی. لکن نجاتدن ابوعلی معنای طلبدن عاری و مؤکده اولان ما کله سندن دخی بری بولندیغندن نفی دن صکره فعل مضارع اوزره نون تأکیدک حال اختیارده لحوقی مطلقاً منع ایلمشدر و اما حال ضرر ورته الضرورات تبیح المحذورات فحواً سنجهر روی رضا کوسترمشدر و نجاتدن (سبویه) من جهة الجزم لاء نهیه مشابهنندن ایچون (لم) دن صکره نون تأکیدک لحوقی تجویز ایلمش و شاعرك .

یحسبه الجاهل ما لم یعلم شیخا علی کرسیه معصما

شعرنده ما لم یعلم ایله استدلال ایتمشدرکه (ما لم یعلم) آخرنده اولان الف نون مخففه دن مقلوبه در و نون ساکنه اوله رق اوقیمق و الف محلنده نون یازمق دخی جائزدر مفساد شعر جاهل اولان کیمسسه آنی بیلمدکجه کرسی اوزره باشی صارقلی برشیخ ظن ایلر دیمکدر و سبویه حال اضطرارده فعل مضارع اوزره دخی دخوانی مثلاً انت تفعلن سویلمکی تجویز ایتمشدر و بعضیلر مضارعه تشبیه و قیاسیله حال اضطرارده اسم فاعل اوزره دخی دخوانی تجویز و شاعرك .


اقائلن احضروا الشهود

شعربنی ایراد ایلدیلر .

و یلمیدرکه هر بر اداة شرط که کنندن صکره زائده اولان ما لفظی واقع
اوله کرک جائز الحذف اولسون ان ومتی وای واین کله رینه لاحق اولان
ما کبی وکرک لازم بولنسون اذما و حیثاده اولدینی کبی بونلردن صکره دخی
فعل مضارع اوزره نون تا کیدک لحوقی جائز و کثیردر زیر اشیبو کله لر
ما لفظیه تا کید اولنغله مقصود غیر مقصوددن نقصان قالماق اوزره فعلک
دخی تا کیدی قصد اولمشدر و برده حزم و عدم ثبوتده شرطک نهیه
مشابهتی وارددر (اما تفعّلن و ما تفعّلن وایا ما تفعّلن افعّل واینما تکنون اکن
واذما تنصرن و حیثا تعملن تمّدح) قوللر مزده اولدینی کبی و یلمیدرکه
قسمک جوابی مثبت اولور ایسه آنده نون تا کید البته لازمدر (والله
لا فعلن قولمزده اولدینی کبی زیرا بر فعلی کندینه متصل اوله جق نون تا کید
ایله و حالبوکه صلاحیتی دخی اولدینی حالده تا کیدلر کسینین کنندن منفصل
اولان قسم ایله تا کیدی کریه کور مشلردر لکن بوده کندینه بر جار ویا
ظرفک تعلقی سبقت ایلاما مکه مشروطدر پس (ولئن متم اوقلتهم لالی الله
تخشرون) قول شریفیه نقض وارد اوله مز.

درس ۲۷۴

خفی اولیه که کرک تون مخففه و کرک نون مشدده جمع مذکر و مفرد مؤنث
مخاطبه ضمیر لریله یعنی و او ویا ایله کلمه منفصله حکمنده در شو جهته معتل
الاخردن مثلاً اغزو واره و اغزی واری کله لرندن اولی همزه وصل
اولان بر کلهیه ملتی اولدقلرنده التقاء ساکنین ایچون و او ویا حذف
اولور و و او ویا نیک ماقبلی مفتوح بولن ان مثلاً اخشو و اخشی کله لری
اولی همزه وصل اولان کلهیه ملتی اولسملر اخشوده و او مضموم و اخشی ده
یا مکسور قیلندینی کبی نون تا کیدک لحوقنده دخی اخشوده و او مضموم
و اخشی ده یا مکسور قیلنور مثلاً و اوک حذفیه اغزو الکفار و ارمو الغرض
و یا نیک حذفیه اغزی الکفار و ارمی الغرض و و اوک ضمیه اخشو الرجل
و یا نیک کسریله اخشی الرجل دیندیکی کبی نون تا کیدک لحوقنده دخی و اوک
حذفیه اغرن و ارمن و یا نیک حذفیه اغزن و ارمن و و اوک ضمیه اخشون
و یا نیک کسریله اخشین دنیلور.





Presented to the
LIBRARY *of the*
UNIVERSITY OF TORONTO
by

the estate of
M. Durmuş Gökçen



3 1761 06582347 8